


El Nuevo Testamento
en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 21 Feb 2024 from source files dated 29 Jan 2022

4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	54
SAN LUCAS	92
SAN JUAN	146
HECHOS	194
ROMANOS	243
1 CORINTIOS	269
2 CORINTIOS	294
GÁLATAS	311
EFESIOS	321
FILIPENSES	331
COLOSENSES	337
1 TESALONICENSES	343
2 TESALONICENSES	349
1 TIMOTEO	352
2 TIMOTEO	358
TITO	363
FILEMÓN	366
HEBREOS	368
SANTIAGO	386
1 PEDRO	392
2 PEDRO	399
1 JUAN	404
2 JUAN	411
3 JUAN	412
JUDAS	413
APOCALIPSIS	415

SAN MATEO

Jaayhui'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich pín Jesucristo y'ap'ajt yteedy'ajt jadu'n nej yhui'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huiði anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías müd y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huiði oy ñäy'adyii María. E je María oy ung'adyii Jesús huiði yxii Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzim yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huiði anajty yxii María, yi' ti anajty ycapxytungixy co ypigaangixy müd José; e ma anajty ca'ni ñaybudigiiyigixy, chi María oy y'ungdzimigy müd yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' pín yajnejhuihua'ñ. ²⁰ Huin'it ma jadu'n anajty niuinmayiy, chi Huindzin Dios tüg y'áangel ñayquëxi' cumäyjoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyijc'adiyb María, com yi' y'ung huiðibi yajma'xung'adamy hue' müd Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiyb com jëgix co yi' ya-jpocyñihuadzam ñaax ycajp.

²² Tüg'óciy jada ytundaayi yajtaayi ycijxy yca'pxy jadu'n nej je Dios anajty ti nimäy je profeta, je jäy huiði Dios y'ayuc najtzcapxyip ma anajty jadu'n yjaybetyity:

²³ Je töxyjäy huiðibi ca' yëdyjc müddzinäy hue' je' ung tzimicip. Chi ypadamyb tüg je y'ung hue' je' yxii'adaanip Emanuel.

Emanuel hue' yhuimbizimy Dios müd ñich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nímäyíi, chi huoy María jadu'n nej jihuüy töxyjic'adyíi. ²⁵ Per ni ca' ajcxy jadu'n chinaay jadu'n nej jäy ypicy chinäy ixti cooni oy María y'ung yajma'xung'aty. Chi yxiimoy Jesús.

2

Madza' ni'ixpigüyb oy co'ixüygixy pi'c'ung

¹ Jesús yma'xung'ajty ma tüg cajp huidi yxií Belén, jim ma Judea ñaaxjot, huin'it co anajty Herodes yrey'aty ma yi jimbí naaxjot. Chi huin'it yja'ty ma Jerusalén cajp nijëjity yëdyjctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigüygixy. ² Chi ajcxy yajtiy:

—¿Ma je judíojäy yrey tüibi yma'xung'aty? Ti ich ajcxy n'ixi yi' ymadza' jim ma xii ypidzimy, e yi' ich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigüy tajpi maybi müd tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'adañ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxüybí jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti íjxcixy yi madza'. Chi tiybijcy yajxon mina anajty oga'n ti íjxcixy je madza'. ⁸ E huin'it ajcxy quejxy jim Belén. Chi jadu'n nímay:

—Nícxcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydëbi ich nícxy nañ jadu'n nhuindzigüyich.

⁹ Co jadu'n rey najtzcaxüyday, chi ajcxy choñ. E je madza' tüibi anajty íjxcixy ma xii ypidzimy, chi ajcxy ijxy jayjip je' anajty ñícxy ma je' ajcxy, ixti coní oy je madza' yhuäcixpy ma anajty je pi'c'anäg yajpaady. ¹⁰ Co je rey ixpicytjic jadu'n ijxy yi madza', chi ajcxy oy janch jotcuje ñayjihüyíi. ¹¹ Co ajcxy ytijctigüy, chi ajcxy ijxy je pi'c'anäg müd ytaj je María. Chi jada' ajcxy ñaygojxtinaydaaci huindzigüy ojadaity ajcxy je pi'c'anäg. Chi ajcxy yaj'ahuach yxuomy aguejtucy abijctucy, chi ajcxy yajpidzimy oori, poom, etz tüg tzoy huidi yxií mirra. Chi ajcxy moy je pi'c'anäg. ¹² Chi cumäjoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yqueegyñicxcixy Egipto

¹³ Co je rey ixpicytjic ajcxy yhuimbijttaayñi, chi cumäjoty José ijxy tüg Dios y'ángel, chi ñimaayi:

—Pidäg, nícx jim Egipto ñaaxjot müd yi pi'c'anäg etz müd yi' ytaj, e jim mhui'mipy ixti cooni ich miich nímahuipy. Com yi Herodes y'ixtahuamy yi' yi pi'c'anäg e yaj'öga'ñ yi'.

¹⁴ Chi huin'it José ypidigüy müd tzooñ coodz je pi'c'anäg müd ytaj, chi ajcxy ñícxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxüybí: “Jim Egipto ich n'ung ti nhuoy.”

Herodes pidacy y'ane'min co huen pi'c'anäg yaj'öctäyíi ajcxy

¹⁶ Co Herodes oy huinma'ñ yajyöy co ti anajty ooy yhuin'üñyíi je rey ixpicytjic ajcxy co ca' anajty ti ñihuimbidyíi, chi ooy yjot'ambijcy, chi ni'ane'mdüy co huen nícxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxüybí, je Jeremías, anajty ti cojaay:

¹⁸ Jim Ramá yajmıdoy co anajty chachjıy chachyäxy jäy ajcxy; yi Raquel tzachjıyb tzachyaaxp mıid y'ung ajcxy ycıxpı, ca' ajcxy anajty yjotcujc'aty mıid co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'ánel ñayguëxıci cumäyjoty ma José. Chi ñımayı:

²⁰ —Pidıg, mıidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

²¹ Huin'it José ypidıgy, mıid nicxy yi pi'c'anäg etz yi' ytaj jim ma Israel ñaaxjot. ²² Per co José nejhuiy co je Arquelao yi' anajty jim ane'mb jadu'n nej anajty je yteedy Herodes, ooy chıgy nej ñıcxıp jim. E co jadu'n anajty ti ycumäy co ca' jim ñıcxıp, chi ajcxy ñıcxı jim Galilea ñaaxjot. ²³ Co jim yjätı, chi jim chinaydacpijcy ma je cajp huidi yxı Nazaret. Jadayaabi je' jadu'n tun jajtı jadu'n nej anajty ycojaayıy ma Dios y'ayucnajtzcıpxıybi ñıcy co Jesús xı'adıyb Nazareno.

3

Juan el Bautista y'ayuc capxhuäcxy ma tıdz naax it

¹ Huin'it tiempo nañ jadu'n Juan je Bautista (huidibi jäy yajñıbejtpı) ymiñ tüg tigıdum ma Judea ñaaxjot capxhuäcx Dios y'ayuc, ² ymiñ:

—Jothuimbıjtcıx ma Dios com yi Dios y'ane'mın huingoniñ yi'.

³ Jada Juan yi' je' huidibi je profeta Isaías nigapxy ymiñ:

Jim mıjtıgıdum yajmıdoy tüg ayuc mınañ: “Ni'ixıygıxy yi mHuindzin ytü'aa, ni'ixıygıxy tüg tü'aa tıybi.”

⁴ Je Juan hue' anajty yhuit'ajtpy iyujc nıbjc (huidibi jäy ytipty camello) e hue' anajty yhuıñıp iyujc ac, e yi' anajty yjıxy'ajtpy mu' etz tijaty iyujc päg jim tüg tigıduum. ⁵ Chi choon jim Jerusalén jäy etz tüg'öcıy huidijaty tzınaayb ma Judea ñaaxjot, nañ jadu'n huidijaty tzınaayb ma Jordán mıjñıba', ñıcx ajcxy ma Juan amıdo'ıjtiy yi' y'ayuc. ⁶ Co anajty ajcxy nigapxtaaygıxy yi ypocy huidi anajty ti tundıgooygıxy, huin'it anajty ajcxy Juan yajñıbedyıi ma Jordán mıj nı.

⁷ Per yi Juan y'ix co may fariseo jäy etz saduceo jäy miñ anajty ajcxy nıbejtcıxy, chi ajcxy nımay:

—ıMiich ajcxy, m'ajuugy m'amıgüg ahua'n iyujc! ¿Pın ti xyajni'ixıygıxy nej jėbi huaad mgögueeccıxy yi ayo'n huidibi huingomb? ⁸ Yajxon jäy'ajtcıx tiydudägy huen nıguëxıgy co ti mjothuimbıjtcıxy. ⁹ Ca' jadu'n mdzachmınaangıxy co Abraham xy'ap'adyıi xy'oc'adyıi. İich miich ajcxy yam ndımnımaayb co Dios ıxtı jėbi yi' yaj'ap'adyıi yaj'oc'adyıi Abraham jada tzaajot ca'ydi miich ajcxy. ¹⁰ Yi jach ni'ixı yi' y'ıjtnı ma quipy y'ıjx, tüg'öcıy quipy huidi ca' oy ytim'aty yajpujxp yi', e chi jada' yajnögy jıñjoty. ¹¹ İich, janch yajñıbejtpıch mıid nı, yi' yi' jadu'n nej tüg ıxpejt co ti mjothuimbıjtcıxy; per jacminamb tzojc huidi ajcxy xyajñıbedıpy mıid Dios yjıhui'ñ etz mıid jıñ. Je' ymıd mıc'ajtn etz cötujcın, nıgi ca'ydi İich, ni xycapaadyıch nicxy ycıg nyajtecyjendügyıch. ¹² Ymıd mıc'ajtn pijc-huäcxamy yi jäy jadu'n nej jäy huimbojy moc, abıcy pidäga'ñ actz, abıcy moc pajc. Yujcpıga'ñ moc pajc ma tze'x nıñögıhua'ñ yi moc actz moc jaam jıñjoty ma je jıñ huidibi nıcamınaaxıı ycapıch.

Co Jesús ñıbejty

¹³ Huin'it Jesús choon ma Galilea ñaaxjot, chi ñıcxı ma Jordán mıj nı ma anajty Juan yjäyyajñıbety, nıbedam anajty yi' nañ jadu'n. ¹⁴ Juan ca'jadım'a'ıxıy, chi nımay Jesús:

—İich miich ıxyıpy xyajñıbejtpıch, ¿e miich mımb ma İchi?

¹⁵ Chi Jesús y'adzooy:

—Jadachambi oc'a'ıxı jadu'n, com ooy yi' ycopıtyıty co nguydundayım tüg'öcıy tııbi Dios xyaj'ane'mım.

Huin'it Juan a'ixi'y chi yajni'bejty Jesús. ¹⁶ Co Jesús ñi'bejttay, chi Jesús ijxy Dios yjihui'ñ ñigidägyi jadu'n nej tüg pi'cmuuxy. ¹⁷ E huin'it yajmido'y tzejpcíxy tüg ayuc ymína'ñ:

—Jada je' ñich n'ung'ajtypich huidibi ooy ndzocyich huidibi ooy mñid jotcuje nayjihui'yijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús mñitigíduum jaydēbi je ca'oybi yjot'ixi'yb yhuinma'ñ'ixi'yb. ² Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi nimay:

⁴ —Pen Dios miich xy'ung'ajtp, nima' jada tzaa huen naygojyii tzejcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzejcaagyti'ajty nitzinähui'py, nañ jadu'n nitzinähui'py tüg'óciy yi ayuc huidibi Dios ycapxp.”

⁵ Chi je ca'oybi mñidnicxy Jesús jim Jerusalén, chi ymñidpejty tzejptijc cöduum. ⁶ Chi nimay:

—Pen janch co miich Dios xy'ung'adyii, cödi'pnax jii'by naaxcíxy, ca' yi' nej mjadipy com jaybety jadu'n ymiñ co jadu'n ymína'ñ:

Dios yquexyp yi' y'á'ngelēs jigix xycuend'adipy xyhuizdipy mñid yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mñot'ixipy mhuinma'ñ'ixipy yi' mhuindzin Dios.”

⁸ Jadüg'oc je ca'oybi ymñid'ajty Jesús ma tüg copñicx janch cijxpi, e jim yajni'ixi'yday tüg'óciy naax cajp co ooy mñidity oy'ajtin etz mic'ajt. ⁹ E chi nimay:

—Ich jada miich nmoydähui'py tüg'óciy, pen miich cojxtina' xyhuindzigíyich xy'ojadatyich.

¹⁰ Huin'it Jesús y'adzooy:

—Huinhuäctutich miich mujcu', com jadu'n yjaybetyity: “Tügpa'c yi' mhuindzin Dios yi' mhuindzigíhuipy m'ojadadipy.”

¹¹ Huin'it je ca'oybi huinhuäctucy Jesús, chi Jesús ñimiini á'ngelēs ycuend'ajti.

Jesús ytung yajtzondacy jim Galilea

¹² Co Jesús nejhu'y co Juan ti anajty yajpidägy pujxtigoty, chi yhuimbijtni jadüg'oc jim Galilea. ¹³ E ni ca' yhui'mi'y jim Nazaret, chi ñicxy jim Capernaum, jim ma Zabulón etz Neftalí y'it. ¹⁴ Jada je' jadu'n tuni jajti jadu'n nej Dios y'ayucnajtzcapxi'ybi Isaías anajty ti cojaay:

¹⁵ Zabulón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij ni. Jim Galileajäy chinäy huidibi ca' yjudiojävity.

¹⁶ Yi' jäy ajcxy huidibi jim tzinaayb agootztuuby ijxpaty ajcxy tüg tñicxin jajin. Je huidijaty anajty ajcxy tzinaayb ma je jibicpi y'aniciy, chi ajcxy ycodicxiy tugi tñicxin jajin.

¹⁷ Ixti huin'it Jesús yti'giy ayuccapxhuäcxp ymínañ:

—Jothuimbijtcix, yajmingix yajmejtzcix mñot mhuinma'ñ ma Dios, com yi' Dios y'ane'min huingtonip yi'.

Jesús nimay nimidaax je acxmajtzpi: “Pajamgich”

¹⁸ Jesús tüyöyb anajty ma Galilea mejypa', co ijxpaty metz yëydijc ac tüg quëxpi, hue' anajty yi' je' je Simón, huidibi nañ jadu'n yxi' Pedro, e je jadügpi hue' je' anajty Andrés. Acxmadzi anajty ajcxy yi' ytung'ajty e jim anajty ajcxy yi' tzachnigöhuich y'acxmadzi'ñ.

¹⁹ Chi Jesús nimay ajcxy:

—Pajamgich, ñich miich ajcxy nyajni'ixi'huipy nej jäy myaj'ixpigipy je Dios yti'yajt.

²⁰ Huin'it je' ajcxy ixmajtztay tüg'óciy yi' y'acxtzaay, chi ajcxy panicxy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tög barco müd yteedy, yi' anajty ajcxy yi' jim chach'adagiïyb yi huidibi mi'acxmajtzcixy. Chi ajcxy Jesús yhuoohui. ²² E huin'it ajcxy ixmajtzay je barco etz yi' yteedy, chi ajcxy panicxy Jesús.

Jesús yaj'ixpiçy mayjäy

²³ Huidijttay Jesús ma tög'óciy Galilea ñaaxjot, yaj'ixpiçy jäy majaty je naymujctac cajt. Capxhuäçxy yi Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy ymüid. ²⁴ Chi Jesús oy yajnejhuiyñi ma tög'óciy yi Siria ñaaxjot, e chi ajcxy müidmiñ ma Jesús tög'óciy huidijaty anajty ajcxy ca'oybi müid, etz huidijaty anajty ajcxy cixuxy tecyxuxy, chi Jesús yajtzoocy. ²⁵ Huin'it Jesús ypanicxi mayjäy huidijaty anajty ajcxy tzinaayb ma Galilea ñaaxjot etz yi Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

5

Je tiy'ajt huidibi Jesús ycapx ma tög cögop

¹ Co Jesús ijxy tög'óciy je mayjäy, chi nicxy ma tög copnïcç, e chi jim y'ixtacy. E huin'it je' y'ixpiçpidiç ajcxy yjübigiïy. ² Chi Jesús ytiçgiïy yaj'ixpiçp ymïnañ jadu'n:

Je pinjaty ajcxy jotcujçip

³ —Janch jotcujc je jäy ajcxy huidibi nejhuiyç co yajmayjajtpy Dios y'oy'ajt, yi' ajcxy paatip Dios y'ane'min.

⁴ Janch jotcujc je jäy ajcxy huidi yajpatp taj may, yi' ajcxy yajmöhuam jotcujc'ajtin.

⁵ Janch jotcujc je jäy ajcxy huidibi yung naxpy jäy'ajtp, yi' ajcxy padaamb tög'óciy je huidi Dios ti yaj'ahuanïyii.

⁶ Janch jotcujc je jäy ajcxy huidibi cuydunamb huidibi Dios chojçpy, Dios yi' ajcxy pubedüçb.

⁷ Janch jotcujc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuüçb.

⁸ Janch jotcujc je jäy ajcxy huidibi huädz yjot yhuinma'ñ, yi' ajcxy y'ixipy yi Dios.

⁹ Janch jotcujc je jäy ajcxy huidibi ca' ti tzip tzojccixy, com yi' ajcxy Dios ung'adüçb.

¹⁰ Janch jotcujc je jäy ajcxy huidibi yajnixiicp yajnigapxp müid je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcujc müich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtiy müid iich ycixpi. ¹² Xondaaccix jotcuj'ajtcix co mbadaangixy tög oy'ajtin jiiby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcapxiybi jecy'ajty.

Müich ajcxy je tudägyjäy ya naaxhuiñ

¹³ Jadu'n nej caan ca' yajpüç je tzüch jicxy tim jadu'n müich ajcxy myajpaady ya naaxhuiñ. Pen je caan ca' müid ti xüçx'ajtin, ¿nej jëbi nyajtuunim? Ca' y'oc'oyyajtunity, chi yajnajtzxidiyñi, chi yhuaani tembejt hua'cejt.

¹⁴ Oc'ix tög je cajt jim copcix, ca' jëbi mhuijtzüdzim mgoyüdzim. ¹⁵ Co tög jin nyajtoyicim, ca' huaad tu'tz ngöjupim. Hue janchtiy co nyajtiçxim cix, huin'it jëbi xycodixtaayim jadu'n nej ajt nyajpaatim ma tijc. ¹⁶ Nañ jadu'n müich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi müich ajcxy mdumyb. Huin'it ajcxy ojadadipy je mDios teedy huidibi jiiby tzajpjoty.

Jesús yaj'ixpiçy nej yi' yi Dios ycötujcin

¹⁷ Ca' mhuinmay co iich ti nmiñich ya co nbigaanich je Dios y'ayuc je' huidibi anajty ti jaay Moisés etz je profetitijc. Ca' iich nyajmijaagixa'ñ je cötujcin, iich ti nmiñich co

nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nimaaygixy, je huidibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Hich miich ajcxy nimaayb, pen ca' miich ajcxy jac'oy mdungixy ca'ydi fariseos etz escribas ajcxy, ca' nimina mdigihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuigyixy jadu'n nej yi m'ap mdeedy ajcxy ayuc yajhui'my: "Ca' jäy myaj'ögip; e pin anajty jäy yaj'öcp ypaadip je tzaachypi." ²² Hich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xidijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytijc, e pen jim jäymetzgodyii co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je altar yhuinduu, e nicx jayijp nayyaj'oyihuñ mñid je migüg, huin'it mhuimbedip e chimgiyecy je mhuindzigi'ñ.

²⁵ Tzojc naygapxjotcidägi mñid je midzip, pen yam mñid tüyöy nñ'am tü'am, ca' jecyity co je midzip xcyiyegip ma juez, e je juez xcyiyegip ma je policia, e je' nicxy xypidägy pujxtigoty. ²⁶ Janch tiy'ajt hich miich nimäy co ca' jilby mbidzimipy ixti cooni mgüejtähuipy je meen.

Jesús yaj'ixpicy co ca'p ndundigóoyimipy mñid huingbi töxyjäy

²⁷ Miich ajcxy mnejhuib co jecyip tiy'ajt ymina'ñ: "Ca' mmidundigoyipy huingbi töxyjäy." ²⁸ Hich miich ajcxy nimaayb, pen ji pin huindixy tüg töxyjäy, e jot'adiyb nejaty, ti je' anajty ñitundigooyñi ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzim; jac'oy co tüg'idu'mbi mhuin ytigoyipy ca'ydi co cixyca'px mnicxipy jijnjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mminicxipy metz mgi' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: "Pin ixmajtzp ytöxyijc, huen möhuipy tüg necy ti ycixpi co ñay'ixmajtzigixy." ³² Hich miich ajcxy nimaayb, pen ji pin ixmach ytöxyijc, e ca' anajty ti ytundigooy mñid huingbi yëydijc, je yëydijc anajty nigiydeyñyb ytöxyijc co anajty ytundigooy mñid huingbi yëydijc; pin yëydijc pijcp mñid je töxyjäy huidibi anajty ti yaj'ixmach, pocytumyb je' anajty.

Jesús yaj'ixpicy nej nguyduunim tiñbi n'ahuanñiyim ma Dios yhuinduu

³³ Miich ajcxy mnejhuib nej jecy'ajty m'aptijc mdeedytjic ajcxy yajnimay: "Ca' nigo ti m'ahuanñhuipy, nguydunipy jadu'n nej anajty ti mmina'ñ." ³⁴⁻³⁶ Per hich miich ajcxy nimaayb: ni mga'ñbaadip ni mgacapxpaadip; ni mgamina'nip; "y'ijxpy tzejpjoty," com yi' Dios chinaydac. E ni mgamina'nip, "y'ijxpy naaxhuiñybi," com Dios yajpatp oy ytimymaajity. E ni mgamina'nip; "y'ijxpy Jerusalén," com jim je' Dios chajptijc; ni mga'ñbaadip ni mgacapxpaadip mgohuajc, com ca' mjayty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: "oy" o "ca'." E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuib co jecy'ajty yajmínañ: “Pen ji jäy mhuiin xyajpidzimi, nañ tim jadu'n yhuiin myajpidzimipy; pen ji migüg mdütz xyajpidzimi, nañ jadu'n myaj'ahuimbidity.” ³⁹ Per ich miich ajcxy nimaayb: Ca' myaj'ahuimbidity jibicpi ma migügtic; pen ji pin xycoxy ma mhuiñyijp tüg adu'mbi, jac tim mo' jadüg adu'm'amybi. ⁴⁰ Pen ji pin xyxiy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tizim xyajminicxa'ñ tüg kilómetro jiguemity, yajnicx jac tim jadüg kilómetro. ⁴² Pen tijaty xypijctzoohui, mo'. E pen ji pin xyminuucxa'ñ, yajnuucx.

Co ndzojcin nmidzip

⁴³ Jadu'n ymiñ jaaybety nej jecyip Moisés yjay: “Migüg'adii yi' huidibi xymigüg'ajtp, e midzip'adii yi' huidibi xymidzip'ajtp.” ⁴⁴ Ich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojib, e nañ mi'oyjäy'at yi' huidibi xyca'ixamb. ⁴⁵ Huin'it miich ajcxy xy'ung'adiiby yi' Dios tzajpjotyi' huidibi yxi' yajticxp yajjajp ma oyjäydjc etz ma jibicjäydjc, nañ jadu'n yajtüy ma jibicjäydjc etz ma oyjäydjc. ⁴⁶ Pen miich ajcxy mdzojcpy je huidibi xychojcp, ¿ti jäygidaacin yi' m'ocpadamyb? Nañ jadu'n yi' ajcxy yja'idützp yi' pocyjäydjc etz yi' yajcogüejtpidjc. ⁴⁷ Pen miich ajcxy mgapxpocxyp yi' mjugymigüg, ¿ti oybi yi'? Nañ jadu'n ajcxy yi' yja'idützp yi' huidibi ajcxy ca' Dios nejhuibgyixy. ⁴⁸ Jäy'ajtcix tudägy jadu'n nej ajcxy yi' mdeedy tzajpjotyi' ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je oybi ma jäy y'ixy yhuindicxy müd co mdzachyahuindicxaangixy co mdungixy oybi. Pen jadu'n m'idützcixy mDios Teedy huidi jilby tzajpjoty tzinaayb, ca' ajcxy xymöhua'ñ je oy'ajtin. ² Paady co mbubedipy mmigüg, je ayoobi jäy huidi yajmayajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idützp je jäy huidi mij cix nayjihuiyip huidi anidaacp co huen jäy y'ixyüi mijpidägyii co anajty jadu'n y'idich. Janch ich miich ajcxy jadu'n nimaaygix co yi' ti patcixy je oy'ajtin. ³ Co miich mmöhuipy mmigüg tijaty yajmayajtpy, hue' janchtiy mdunipy ca' myajnejhuibipy huidi müd mnaymigüg'adyii. ⁴ E co miich amon m'idipy, mDios Teedy huidi iixp co amon tijaty mduñ, je' xymöhuamb tüg oy'ajtin mayjäydum.

Jesús yaj'ixpicy nej Dios mibijctzoohuim

⁵ Co miich ajcxy Dios mibijctzoy, ca' jadu'n m'idützcixy jadu'n nej je jäy huidibi capxtacp ma Dios huin aguy ahuac aguy. Yi' ajcxy capxtacp ma Dios huactina' jilby tzajptigoty jaydebi jäy y'ixiib etz ymijpidägyib. Ich jeyi jadu'n nimaayb, co jadu'n oy'ajtin'adiiby. ⁶ E co miich Dios mibijctzoy, nicx tigoty etz m'agihuiipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mibijctzoy, e je' je m'oy'ajtin xymöhuipy mayjäydum.

⁷ Com Dios mibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idützcixy huidi ca' nejhuibgyixy Dios ytiy'ajtp. Yi' ajcxy huinma'ñypidägy co müd ajcxy ymay'ayuc huin'it ajcxy ymidoohuiyb. ⁸ Ca' jadu'n m'idützcixy jadu'n nej je' ajcxy; mDios nejhuib ti miich ajcxy yajmayajtpy ma anajty ca'ni mbijctzooyñi. ⁹ E jadu'n miich ajcxy Dios mibijctzohuiipy, jadu'n minanip:

Dios Teedy, miich huidibi tzajpjoty tzinaayb; huindziggy miich mxii y'ity.

¹⁰ Huen miñ ya miich yi' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jilby tzajpjoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy meecxyich huidibi ajcxy xymidundigooybich.

¹³ Ca' m'a'ixi co ñich ajcxy nhuinma'ñ tigoyipich. Yajñihuaatzcich ajcxy ma yi jibicpi. Co miich yi' mje' je cõtujcin, je mic'ajtin etz je oy'ajtin huinixi huinitiempo. Amén.

¹⁴ Pen miich ajcxy mhuinmeecxyp je huidibi xymidundigooygixp, je mDios Teedy huidibi tzajpjoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtim jaygaay

¹⁶ Com ajcxy m'ida'nip jaygaay jay'ügy (mina Dios mmibijctzoogixy), ca' mnaybidáaccigixy tajy may, jadu'n nej ajcxy iditzcixy yi' huidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuiñyijp jigix jäy ajcxy oc'ixiyb co jaygaay jay'ügy y'ijtcixy; jëyi jadu'n oy'ajt'adiyb. ¹⁷ Miich ajcxy co m'idipy jaygaay jay'ügy jotcuyc naybidägi, caax mgohuajc etz puj mhuin mjijp, ¹⁸ ca' ydi myajniguëxig mayjäyjoty co m'ity jaygaay jay'ügy, hue' janchtiy myajniguëxig ma je mDeedy huidibi ca' yaj'ijxy; e je mDeedy huidibi ijpg huidibi miich ajcxy ca' mduñ iixna' quëxna' yi' xymöhuipy oy'ajtin mayjäydum.

Je jugy'ajtin tzajpjotypi

¹⁹ Ca' nigi m'adzocy huidibi ya naaxhuiñ, je' co ya huindigooyb oy ytimtijity huidibi yi' huech yajhuindigooyb, huidibi tougaayip etz ma je meetzpi ajcxy meetzcixy pigiccixy tijaty. ²⁰ Je' miich nijot'ajtcixy je' oy'ajt huidibi miich ajcxy Dios xymöhuamb jilby tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigiccixy tijaty. ²¹ Ma miich ajcxy midity je oy'ajt nañ jilby ajcxy mnot mhuinma'ñ pidäg.

Yi mhuin jadu'n yi' nej tög tücxin

²² Yi mhuin yi' yi' jadu'nip nej tög tücxin jain ma mninix, e paady pen ca' miich yi' mhuin xyajtundigoy, tög'óciy mnot mhuinma'ñ huadz yi'. ²³ Pen miich mhuin xyajtundigoyb nañ jadu'n mnot mhuinma'ñ huidi miich mid ca' y'oyity, jadu'n yi' nej coodzpi jac tim nigi ca' y'oyity ca' ydi je coodzpi!

Dios etz je comeen'ajtin

²⁴ Ni tög pin ca' huaad mid tuñ metz huindzin com mijotma'ti tög je', e jadügpi chogipy; o ixtijipy tög e jadüg ymigüg'adiyb. Nañ jadu'n ca' huaad miich ajcxy metz m'ojadajtcixy, Dios etz je meen.

Dios ycuend'ajtpy yi' yjäy

²⁵ Paady ñich miich ajcxy nimaaygixy: Ca' mdzachhuinmaaygixy ti ajcxy mnitzinähuiy, ti ajcxy mgayipy m'ügipy o ti ajcxy mhuit'adiyb mducxy'adiyb. MDios yi' ti xymooygixy je mjugy'ajtin, e paady ycixpi yi' nejhuüyb ti ajcxy myajmayajtpy. ²⁶ Oc'ix miich ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjicxyp. E miich ajcxy mjactzoobatp ca' ydi yi' joon. ²⁷ ¿Pin ji ma miich ajcxy, ooy mij jahuinmay, jëbi tög nuux yjacyeegy?

²⁸ ¿E na'amy co miich ajcxy mdzachnidajy mdzachnimay mid je mhuit mducxy ycixpi? Oc'ix miich ajcxy nej yon tög je pijy huidi yajpatp tun nïgap. Ni yi' ycatuñ ni piidy. ²⁹ Per janch tiy'ajt jadu'n nej nimaaygixy, ni je comeen'yjäy huidi yxi rey Solomón, ni ycaquipxiy je' yxojxin mid je pijy. ³⁰ E pen mDios xojxpy jadu'n je aay ujtz cham etz tzojcy ytitztäy ñicxtäy, jac nigi miich ajcxy Dios xymöhua'ñ huidibi myajmayajtpy, miich ajcxy huidibi hueeni mmibijcin. ³¹ Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiyb mducxy'adiyb. ³² Yi' jäy ajcxy huidibi ca' mibicy yi' Dios oy tzach nijot'ajtcixy jadayaabi, per miich mDeedy huidibi tzajpjoty je'

ñejhuíyb ti miich ajcxy myajmayjajtpy. ³³ E pen miich ajcxy mbídacpy Dios jayíjp ma mñot mhuinma'ñ etz mguydun ajcxy yí' y'ane'mín, huin'it miich ajcxy Dios xymöhuípy tijaty myajmayjajtpy. ³⁴ Paady ca' mhuinmaaygíxy cham mñid je jabom cixpi, je' co je jabombi ymímiñ je tajin mayín. Tzoc mijotcuje'ajtim je tajin mayín huidi cham nminajx nyajnajxim.

7

Ca' mbocy ixxyi mmigüg

¹ Ca' m'ix'ixpy mba'ixpy ti mmigügtijc ytundigooyb, jigix ca' Dios xytíydunípy chaachytunípy. ² Pen miich m'ix'ixpy mba'ixpy mmigügtijc ti ytundigooyb, nañ jadu'n miich Dios xytíydunípy xychaachytunípy, e yí quipxi'ñ huidibi miich mhuamyb quipxi'ñ, nañ yí' Dios yajtunamyb ma miich. ³ ¿Nej co miich m'ixy huidibi mmigüg ytumyb e hueeni ytundigooyb, e ca' mnay'ixyíi huidibi miich jac mij mdundigooybi? ⁴ ¿Nej jébi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmñdpi jac mij pocy? ⁵ Miich ci'm mnayhuin'ññyíi. Nicx jayíjp mbocy mgaydey ocyajhuädz, huin'it jébi mbubety je mmigüg.

⁶ Ca' mmöy yí jibicjäydijc huidibi Dios yjé'ajty co nicx camij'ix camíjpidaaccixy; ni mgayegípy Dios y'ayuc ytiy'ajt ma yí jäy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yí Dios e yí' xymöhuípy ajcxy; ixtaaygix, huin'it mbáatcixipy; cogapxiygix e ahuädzip ajcxy mdijc aguu. ⁸ Com pin tijaty pijctzoob ypaatyp yí'; e pin tijaty ixtaayb ypaatyp yí'; e pin cogapxiyb ma tijc aguu, yaj'ahuaatzip ytiyc aguu.

⁹ ¿Nej jí jada' miich ajcxy nidügti co m'ung pijtzoohuipy tzajcaagy nej mmöhuípy tüg tzaají? ¹⁰ ¿O pen ypijctzooby tüg acx nej mmöhuípy tüg tza'ñi? ¹¹ Miich ajcxy oy mjibicjäyity e mñajtpy ajcxy nej m'ung m'anäg mmöhuípy je oybi. ¡Nígi Dios Teedy tzajpjotopy möhua'ñ je oybi pinjaty pijctzoob!

¹² Tzinaaygix tíydudägy mñid je mmigügtijc, pen miich ajcxy mdzojcpy co je mmigügtijc chinähuípy tudägy mñid miich ajcxy; com jadu'n y'ane'my Moisés yley etz yí Dios y'ayuc najtzcaxíyb ajcxy ñecy.

Je xützpi tü'aa

¹³ Tigíygix ma yí tigíyíydac xützpi: yí tigíyíydac etz yí tü'aa huidibi ja'tp ca'oydactuuby mij huin yí', e may jäy ajcxy oy jí ytigíyíygixy. ¹⁴ E janch je tigíyíydac etz yí tü'aa huidibi ja'tp ma je jugy'ajtin huinixíbi, xüdz je' etz tzip naxíyñi; janch tim hueeni jäy huidibi jí nicxiyb.

Yí jäy yhuinma'ñ mñid ñiguëxígy pen oyjäy o pen ca'

¹⁵ Nayguend'ájtigix mñid yí jäy aníjatypí huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejhuíy ooy oy huinma'ñ mñidity; nigoobi ajcxy jadu'n ñaybidägyíi, ymñid ajcxy jibic-huinma'ñ. ¹⁶ Miich ajcxy jébi m'ijxcapy nejaty ajcxy mñidity chinaayín yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tím tucy ma jaam'apy quipy. ¹⁷ Je quipy huidibi ooy y'oyity, oy yí' ytiim'aty. Je quipy huidibi ca' y'oyity, ca' yí' oy ytiim'aty. ¹⁸ E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹ Tüg'ócíy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jébi mnejhuíy jadu'n nej jäy yjäy'aty co m'ixípy nej chinäy.

Ca' nidüg'ócíy jäy ajcxy ytiigíhuípy ma Dios

²¹ Ca' nminaaním nidüg'ócíy jäy ajcxy ytiigíhuípy jilby tzajpjoty huidibi xyñimaaybich: “Huindzin, Huindzin”, jéda'ajty ajcxy tiigíhuamb huidibi ycapxymidooyb je Dios chojcín y'ane'mín. ²² Mayjäy oy mñina'na'ñ huin'it xí huin'it tiempo: “Huindzin, Huindzin”, ti ñich

ajcxy ngapxhuäcxy miich m'ayuc, e miid miich mxii ti ich ajcxy nyajpidzimy je ca'oybi; etz miid miich mxii ti nduñ ich ajcxy mij huinma'ñ. ²³ Huin'it nimähuipy: “Caminaabi miich ajcxy ti nga'ixy'adyii; huinhuäctutcich miich jibic tumbidijc ajcxy.”

Je mejtznajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej ich n'ane'myich yi' ajcxy quipxyjaty miid je jäy huidibi cohuinma'ñ huidibi ytijc ycojp ma yhuingixity. ²⁵ Co ymicpojtüy etz ycomy je mij ni, ca' ypadyii nigom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytijcoj ma pu' jot. ²⁷ Co ymiñ je mic poj tuu, chi ycomy je mij ni. Chi yciday je ytijc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin miid, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmiidpi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuüy ma Jesús yhuinduu. Chi minañ:

—Huindzin, pen m'a'ixiib jëbi xyajtzögyich.

³ Huin'it Jesús nidooñ je jäy. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjäy huin'ityi je ypützpa'm oy ytigooy. ⁴ Chi Jesús nimay:

—Ca' pin myajnimäy; nicx janchtiy ma je teedy. Minicx tüg huindzigi'ñ huidi Moisés y'ane'my. Huin'it jëbi yi' jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuaniiy. ⁶ Chi ñimaayi:

—Huindzin, jim ich tüg ndumbi ma ich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ich nicxy nyajtzögy.

⁸ Chi je capitán y'adzooy:

—Huindzin, ca'p ich n'oyjäyity, ca' yhuaadity mdigihuipy ma ich ndijc, jëyi miich nigoo capxy e ti anajty ich ndumbi chögy. ⁹ Ich nañ jadu'n ane'my n'ityich, e nañ nmüidich soldadtijc ci'am. Co ich nimäy: “Nicx”, nicxp; e co ich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigoobi yciixy ycuejty. Chi ajcxy nimay huidi pahuidijtip:

—Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadayaabi yëydijc. ¹¹ Ich jadu'n nimaayb co mayjäy oy miinaangixy xiipidzimy'amy xiicidägy'amy, chi ixtäga'ñ quipxyi miid Abraham, Isaac etz Jacob jiiby ma Dios y'ane'min. ¹² Je judíojäy huidibi ixipy ajcxy jëbi yjatzinäy jiiby tzajpjoty, je' ajcxy nicxamb agootztuuby, jiiby ajcxy yjihuipy yäxipy etz y tätzmúcxipy ytätzqueedipy.

¹³ Huin'it Jesús nimay je capitán:

—Nicx ma mdijc. Jadu'n nej miich xymibicyich, ti ich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymüd töxyjäybi

¹⁴ Chi Jesús nicxy ma Pedro ytijc. Chi iixy je Pedro ymüd co jim cijx'am ycöcnäy miid je toyba'm. ¹⁵ Co Jesús cñixajy huin'it je toyba'm ñajxy. Chi pidigy. Chi mic'amy ni'ixiib je caayin uucin.

Jesús yajtzögy mayba'mjäy

¹⁶ Co oy chu'ñyñi ycoodzyñi huin'it yajmimiñ ma Jesús may je hui di ca'oybi miiid. E miiid yi' y'ayuc yjeda'ajty ypidzimday je ca'oybi, e huin'it tüg'óciy je pa'mjäy chooctay. ¹⁷ Jadayaabi je' ytuni yajti jigix yajcuyduñ jadu'n nej je profeta Isaías minañ: “Yi' ci'm ajt nyuu nba'm ti xyajtzoctaayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyyi, chi nimay co huen nájxcixy jim'amy mejy nñaxy. ¹⁹ Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ype'ñ. Per ich, je jäy huidibi tzoon jilby tzajpjoty, ca' nmiiididyich ma nmähuibich ma nbócxibich.

²¹ E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigiyich huin'it nbanicxip.

²² Huin'it Jesús y'adzooy:

—Pamiingich, ixmajtzcix yi öcpi huen ymi'öcpi yajnaaxtigiyi.

Jesús jipcogapxiy je micpoj etz je mejy co anajty ooy ypidigy

²³ Huin'it Jesús oy ybarcotigiyñi. Chi ypadzooni je ydiscípulos ajcxy. ²⁴ E jim anajty ytüyöy mejyhuingixy, huin'it mic poj ñaymibidzimi. Janch mic y'ocpidicni je mejy jigo jigo je barco cayajnidigoy, pero Jesús anajty chachmaab. ²⁵ Huin'it oy ymigapxyii yajmäybidigyii je' ydiscípulos ajcxy. Chi ñimaayi:

—¡Huindzin, ocyajtzoogich ajcxy! ¡Cheeby ich ajt n'ocquiinim!

²⁶ Huin'it Jesús y'adzooy:

—¿Na'amy co mdzachtzigiygixni? ¡Miich ajcxy hueeni miiidity mibijcin!

Huin'it Jesús ypidigy. Chi migapxy je poj etz je mejy. Huin'it je mejy etz je poj yhua'cxijptay. ²⁷ E je' ydiscípulos ajcxy nigoobi y'occix y'occuejtni chachminaangixy:

—¿Pin yëydijc jada jada', co je mejy je poj ti ycapxymidoyii?

Je Gadara jäy ajcxy huidibi anajty ca'oybi miiid

²⁸ Co Jesús yja'ty ma yi ñiba' ma yi Gadara ñaax ycajp, chi metz yëydijc, hui di anajty ca'oybi miiid oy yjipcoyöyiyi anajty ajcxy, ti choon ma je öcpi jut. Yi jäy ajcxy ooy janch ahua'n, e ca' anajty huaad jim ni pin ñaxy ma je tü'aa. ²⁹ E co anajty Jesús jim ñaxy huin'it janch ahua'n ymigapxqueeci:

—¿Ti miich mdunamyb miiid ich ajcxy, Jesús, miich Dios y'ung? ¿Nej ti mmiñ jayijp co xychaachtungixich ma ca'ni xi tiempo paady?

³⁰ Jiguem ma anajty ajcxy je' yajpaady jim anajty may'idzim y'ojccixy. ³¹ Chi je ca'oybi yminañ:

—Pen miich xyajpidzim ich ajcxy, xyaj'adigiygixy xyajjottigiygixy yi may'idzim.

³² Chi Jesús ñimay yi' ajcxy:

—Nixcix.

Huin'it ñihuaatzí je yëydijc je ca'oybi. Chi oy ytigiygixy je ca'oybi ma je idzim. Huin'it je idzim oy ñigöboyictäy. Jilby ajcxy yjicxtäy.

³³ E je jäy ajcxy huidibi anajty idzim ycuend'ajtp, huin'it ajcxy yqueegy miiid je tzig'iñ. Chi co ajcxy yja'ty cajpjoty, huin'it ajcxy ytigiy mrydaacpi jadu'n nej anajty ti ytuñyii ti yjadyii. ³⁴ E huin'it chonday je mayjäy ma je cajp. Chi ajcxy ninicxy je Jesús. E co ajcxy ijxpaty, huin'it ajcxy cohuaniy co huen pidzimni ma je naax je cajp.

¹ Chi Jesús ybarcitigiŋy. Chi ñicxy jim'amy mejyñaxy. Chi oyjäty ma yci'mgajp. ² E jim yajmimiñ tüg yëydijc huidibi anajty cïmät tecymät. Yajciŋy ymiñ ma'ndzaayjoty. E co Jesús ijxy co ymiid je mibijcin, chi nimay je pa'mjäy:

—Jotcugi' miich, ti je mbocy nhuinmeecxyich.

³ Huin'it nijëjity je escribas ajcxy, je ley yhuindzin, jot'ajti: “Jadayaabi yëydijc capxtigooyb yi' ma Dios co jadu'n ymïna'ñ.” ⁴ Com Jesús ñejhuiŋy jadu'n nej anajty ajcxy je jäy tzachjot'ajtigiŋy, chi ajcxy nimay:

—¿Nej co ajcxy jibic mdzachjot'ajtigiŋy jotjoty huinma'ñyoty? ⁵ ¿Huidibi ca' chipity, co nminá'ñibich: “Ti yi mbocy nhuinmeecxyich”, o co nminá'ñibich: “Pidig etz tüyöy”?

⁶ Hich ndzojcpyich co miich ajcxy mhuinjihuŋip co ich ti ndzooñich tzajpjoty e paady nmïdich je cötujcin ya naaxhuiñ e jëbi nhuinmeecxyibich pocyjäy ajcxy.

Huin'it Jesús nimay je cïmätpi tecymätpi:

—Pidig, huijtzig yi mdögy etz nicxni ma mdijc.

⁷ Chi je cïmätpi tecymätpi ypidigy. Chi ñicxy ma ytiŋc. ⁸ E co je mayjäy jadu'n ijxy, huin'it ajcxy ooy jihuiŋy huinmay. Chi ajcxy ooy ojadaty yi Dios co anajty ti yecy je mic'ajtin ma mayjäy.

Jesús nimay Mateo: “Pajamgich”

⁹ Co Jesús oy chooni jim, huin'it ijxy tüg yëydijc, yxii Mateo, huidibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinayigy. Chi panicxy Jesús.

¹⁰ Jadu'n ytuni yjajti co Jesús jim ycaŋy ma Mateo ytiŋc, e may nañ jadu'n ymiñ yajcogüejtpidijc etz pocyjäydijc. Chi ajcxy jim tú'ciŋy y'ixtactay mïd Jesús etz mïd yi' ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi mHuindzin ycaŋmucy mïd je yajcogüejtpidijc je pocyjäydijc?

¹² Co Jesús jadu'n mïdooy huin'it nimay ajcxy:

—Ca' yajmayjaty tzoydumbi huidi ca' ajcxy ypiŋy, jëyi huidi ajcxy pijcip. ¹³ Nicx ixpiŋcxy nej ymiñ jaaybety ma Dios ñecy: “Hich ndzojcpyich co miich ajcxy mïd'adipy je pa'ayo'n, ca'ydi co myajhuindzigy tijaty iyujc.” Ca' ich ti nmiiñich ma je jäy ajcxy huidibi ca' pocy mïdity. Hich ti nmiiñich mïd yi pocyjäy ycixpi co huen jothuimbijttaaygixy ma Dios.

Amidoogixy Jesús mïd je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co ich ajcxy etz fariseo ajcxy ayuu'ijtcixy, e yi' ajcxy huidibi xymïdhuidijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huidi yajpaatpi ma je pijcipi yajnixiïduñyi, pen quipxyi yam yajpaady mïd je huidibi pijcp? Minamb je xii je tiempo mina je pijcipi yajtzoniŋyb, huin'it janchtiŋy ajcxy jëbi y'ayuu'ajtcixy.

¹⁶ Ni pin tuc huit ca' agiyiŋy mïd tüg pedas jemyhuit, com nigi je tuc huit ñajtzciïdzïy, chi nigi o'ctiy yjajtni. ¹⁷ Ca' pin pidägy vino nii ma tucpi cochac, yciïdzip je', e tüg'óciŋy anajty ti y'ayoodäy je vino nii mïd ñigochac. Pidägiŋy ajcxy jemy vino ma jemy cochac, chi jadu'n ca' ayoohuipy je vino, ni huindigoyipy je cochac.

Je Jairo ñix, etz je töxyjäy huidibi Jesús yhuut nïdoni

¹⁸ Ma anajty Jesús jim ycapxy ymiydägy huin'it ymiñ tüg mijjäy. Chi ñaygojxtinay'ahuŋy ma Jesús yhuinduu. Chi ymïnañ:

—Nnïxich ti y'ögy. Nicx ma ich ndijc etz mgïñxajipy, jugypigipy ya.

¹⁹ Huin'it Jesús ypidägy. Chi ñicxy miid je ydiscípulos ajcxy. ²⁰ Ma anajty ajcxy jim ytüyöy huin'it ymiñ jixci'py'amy tüg töxyjäy huidi yxi ybo' ti mi'ijtiyñi majmetz jimijt. Chi nïdoni Jesús yhuitpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuitpa' nñidónibich, ti ñich anajty n'agidäygiçh.” Huin'it Jesús yhuäc-huimbijty. Chi huindicxpejty je töxyjäy. Chi nimay:

—Jotcuje'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc miid je ymiguëtiyc ajcxy huidi chachyaaxcixy co anajty ti y'ögy je töxy'anäg.

²⁴ Huin'it Jesús nimay ajcxy:

—Queccix ya, yi pi'ctöxy'anäg ca' yi' ti y'ögy. Hue' yi' maab.

Huin'it ajcxy nigo nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytiçtigiiy ma anajty je töxy'anäg huijtnäy. Chi majch ma yci'. Chi ypidägy. ²⁶ Chi je jäy oy yajnejhuüйдаayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jim ti choñ huin'it metz jäy huintzpi ypamiini. Chachñimäyii jadun:

—iPa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytiçiiy tigoty, chi Jesús yajtiy:

—¿Nej mmibijcpy miich ajcxy co jëbi nyajhuindicxiçcixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nïdoñ je jäy ajcxy huintzpi ma yhuiin. Chi nimay ajcxy:

—Jadu'n nej miich ajcxy mmibicy, jadun ytunib yjadib.

³⁰ Chi je' ajcxy y'ixägy. Huin'it Jesús y'ane'min pidacy:

—Ca' huaad pin myajnejhuüygixy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ixçicigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum huidibi anajty ca'oybi miid. ³³ E co Jesús yajpidzimy je ca'oybi, chi je mayjäy ooy yciixy ycuejty ajcxy. Chi ajcxy minaangixy:

—Ni camina jadun ycayaj'ixy ya ma jada Israel naax cajp.

³⁴ Per je fariseos jadun yminaangixy co Jesús je' miid je ca'oybi ymic'ajt yajpidzimy ca'oybi ma jäy.

Jesús ymiid pa'ayo'n ma mayjäy

³⁵ Jesús jadun yhuidijty cajp cajp yaj'ixpijcy majaty tzajptijc. Yajhuingapxiy je jäy Dios y'ayuc. Etz nañ jadun yaj'agidacy huen ytim huidi yuu huen ytim huidi pa'mity. ³⁶ Co Jesús jadun ijxy je mayjäy, chi oy pa'ayooni co yi' ajcxy ca' miidity ni pin huidibi jëbi ñajtzcapxiy Dios y'ane'min. Yi' ajcxy jadun yajpatp nej cöbixy huidi ca miidity cuend'ajtpi. Ca' nejhuüygixy pin y'ane'mip e pin ypanicxiç. ³⁷ Huin'it Jesús nimay yi' ydiscípulos ajcxy:

—Ti'y'ajt yi', janch mij je tung e hueeni je tumbidijc. ³⁸ Paady pijctzou miich ajcxy ma Dios co huen quexy tumbidijc ma yi' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad yajnihuäch je huidi ca'oybi miid. Etz nañ jadun yaj'agidägiç huen ytim huidi yuu huen ytim huidi pa'mity.

² Jada je' je nimajmetzp yxi: Simón, huidi nañ jadun yajtijp Pedro, etz ymiguëx Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je

yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je cananista; e Judas Iscariote, je huidi ycïyejc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yi nimajmetzpi, e jadu'n najtzcapxiiy ajcxy:

—Ca' ajcxy mnicxipy ma je naax cajn ma ajcxy je jäy chinäy huidibi ca' ajcxy Israeljäyity. Ni mgatigihuipy ajcxy ma Samaria naax cajn. ⁶ Nigi jac'oy co ajcxy mnicxipy ma je Israeljäy huidibi ca' nejhuïy huidibi ca' paduñ Dios ytiy'ajtín. ⁷ Nicx miich ajcxy capxhuäcx Dios y'ayuc co ti yhuingtoni Dios y'ane'mín. ⁸ Yaj'agidaaccixy yuujäy pa'mjäy huidijaty pützpa'm ymïd. Myajjugypijccixy tiibi ögy. Myajnihuädzip huidi ca'oybi ymïd. Ninigoobi miich jada cötujcin ti myajmooygixy, nañ ninigoobi yejccixy.

⁹ Ca' ni ti meen mminicxcixy. ¹⁰ Ca' mbijty mminicxcixy tü'amgixpi. Mminicxcixy jeda'ajty yi mhuit huidi mïd ma mninïcx. Ni mgaminicxip huingbi mgig etz mdajc; com ycopicity co je cajnjäy xyajcáaygixipy xyaj'úuccixipy miich ajcxy.

¹¹ Co anajty mjäty miich ajcxy ma tüg cajn nidiu yajtiu pinjäy jim tudäcyip. Jim ajcxy mhui'mipy ma je' ytiyc ixti cooni ajcxy mdzoonip. ¹² Co anajty miich ajcxy mdigiy tigoty huin'it mgapxpcxcixipy je codijc jadu'n nej tzocy. ¹³ E pen je codijc ymihuaad'ajtpy, yejccixy jim hïbocxin capxpoocxin. E pen je jäy ca' ytudägyity, ñaadig'adip huidi anajty ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc, pidzimgix jim ma je tiyc o ma je cajn. Chi ajcxy mdecy huinnebipy, je' je' je tiy'ajt co ca' miich ajcxy ti pocy mïdity. ¹⁵ Janch tiy'ajt jadu'n nej nimaaygixy co anajty je xii tiempo paady ma anajty yajtiyduna'ñ je naaxhuiñjäy, jac nigi yajtzaachytuna'ñ yi' ajcxy ca'ydi yi jäy ajcxy huidibi tzinaayb ma Sodoma cajn etz ma Gomorra cajn.

Ixhuidijtín pahuidijtín

¹⁶ ¡Ocmidoogix! Ich yam miich ajcxy nguejxyp majaty yi jäy huidi jibic-huinma'ñ mïd. Jadu'n nipaady nej ich nguexyich cöbixy ma je lobi. Huijy cujc ajcxy mnaypidägiib jadu'n nej tza'ñ, per yung naxy jadu'n nej muuxy. ¹⁷ Mnayguend'adib ajcxy je' co yi jäy ajcxy xyciyegaangixy ma ajcxy mjtungmïdipi etz myajhuobaangixy ma je judíojäy ajcxy ñaymujctac, ¹⁸ ixti xyajnicxaangixy ajcxy ma je gobernador etz je reydiyc ajcxy mïd ich ycixpi; e jim ich miich ajcxy xyñigapxipy ma je jäy ajcxy yhuinduu, e nañ jadu'n majaty anajty je jäy ajcxy huidibi ca' yjudiojäyity. ¹⁹ Co anajty ajcxy xyajcidiği je mjtungmïdipi, ca' ajcxy oy mhuinmaayipy nej m'ocnimähuipy. Co anajty paady je tiempo, huin'it ich miich ajcxy myajnimähuipy nej ajcxy mgapxipy. ²⁰ E je ayuc huidibi miich anajty ajcxy mgapxpy, ca' miich anajty je' ajcxy m'ayuc'ajtigixy, je Dios Teedy anajty yjihui'ñ, je Espíritu Santo, xyajcapxp miich ajcxy.

²¹ Huin'it yi jäy ajcxy ñaygiyegaanigixy miñ xyipy tüg quëxtijc co huen yaj'ögyii. E je ungdeedy ciyega'ñ y'ung; je ung'anäg mibidiga'ñ je ytaj yteedy etz yaj'öcip ajcxy.

²² Tüg'öciy je jäy ajcxy ca' ajcxy xy'ix'anipy xychoga' nipy mïd ich nxii ycixpi. E pin xymibijcpich amumdügjot ixti mabaad y'ögy, yi' ajcxy y'alma tzögipy. ²³ E co anajty miich ajcxy jäy xy'ixhuidity xypahuidity ma tüg cajn, nicxcix ma huingbi cajn. Janch tiy'ajt jadu'n nej nimaaygixy co ca'ni anajty mgapxhuäxtäy ayuc tiy'ajt ma tüg'öciy je Israelcajn co nhuimbidityich, ich, je jäy huidibi tzoön tzajpjoty.

²⁴ Tüg yaj'ixpijcpj jac nigi mij'ajtin mïdity ca'ydi je huidi ixpijcp, e tüg huindzin jac nigi mij'ajtin mïdity ca'ydi je' ytumbi. ²⁵ Jëb jotcuyc idipy je discípulo co jadu'n yajpaadipy jadu'n nej yhuindzin, e je tumbi jotcuyc idipy nej yhuindzin. Pen jäy minamb co ich nmïdich ca'oybi, jac nigi ymina'na'ñ co miich ajcxy mïdity.

Pin jëbi yajtzigiy

²⁶ Ca' ajcxy mdzigiy yi jäy ajcxy. Ca' ji ni ti yüch ity nicx ycaniguëxgy; nañ ni ti ji ycaya-tuñ ayüch ameech nicx ycayajnejhuïy. ²⁷ Huidi ich miich ajcxy ayüch nyajnimaaayb,

capxpídzimgix miich yi' mayjäyjoty, e huidi ajcxy midooyb ameech, capxpídzimgix miich yi' mic ma tüg cögor. ²⁸ Ca' ajcxy mdzigihuip je jäy huidib ninícx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigüygixy je Dios huidib pidacp je alma etz je ninícx mijjijnjoty.

²⁹ ¿Nej ca' jäy ajcxy toogy metz pi'cjoon müd tügpi pi'cmeeni? Per ca' ni tüg huaad ycäy naaxhuiñ, pen ca' tzocy je mDios Teedy huidi jüby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigihuipy, jac nigi miich ajcxy mdzoubaady ca'ydi je joon.

Pinjaty ca'p midzöydu'ñ Jesucristo mayjäyjoty

³² Yi' jäy ajcxy huidi xymibijcpich etz xyñidiy'ajtyich ma jäy yhuinduu, nañ jadu'n iich yi' nidiy'ajtyich ma iich nDeedy huidibi jüby tzajpjoty. ³³ Per je jäy ajcxy huidi iich xycoyützpic ma mayjäy ajcxy yhuinduu, nañ jadu'n yi' ngoyützic ma iich nDeedy yhuinduu huidibi jüby tzajpjoty.

Müd Jesús ycixpi yjijity naymidzip'adi

³⁴ Ca' miich ajcxy mhuinmay co iich ya ti nmiñich müd co nmöhuaangixy jotcuyc'ajtin ya naaxhuiñ. ³⁵ Iich ti nmiiñich co nyajtziptunipyich jäy müd yteedy; töxyjäy müd ytaj etz xecy müd yxecy. ³⁶ E jadu'n miich ajcxy mdzip'adiyb mgi'mjuugy mgi'mmügü.

³⁷ Yi' jäy ajcxy huidibi tzojcp ytaj yteedy jac nigi ca'ydi iich, ca' yi' ypaadyii co njäy'adiybich; e pin ymang o ñiix tzojcp nigi ca'ydi iich, ca' ypaadyii co njäy'adiybich; ³⁸ e pin ca' yci'mdzojcin y'ijxmajtztäy etz ca' ñaybidägyii ycixjot huinijot ma iich, ca' mihuaadity nicx njäy'adiybich. ³⁹ Pin yjugy'ajtin najtztzogüyb, yajtigoyipy yi'; e pin yjugy'ajtin tigooyb müd iich ycixpi, ypaadipy jugy'ajtin huinixii tzajpjoty.

Premio nganar'ajtim

⁴⁰ Pin miich ajcxy xycöbijcp, iich yi' anajty xycöbijcp; e pin iich anajty xycöbijcp, nañ ycöbijcpy anajty je huidibi iich ti xyquejxyich ya naaxhuiñ. ⁴¹ Je huidibi cöbijcp je jäy huidibi Dios y'ayuc capxhuacxip, je' co yi' ymiñ müd Dios ycixpi, yi' jadu'mbi je oy'ajtin ypaadipy. Nañ jadu'n je huidi cöbijcp je oybi jäy müd co oy yjäyity, yi' jadu'mbi oy'ajtin ypaadipy. ⁴² Je huidi yaj'ucp tüg vaso nii ma huenyimpinjäy müd co xymibicyich, janch iich miich nimaaygixy, ypaadipy oy'ajtin.

11

Juan je Bautista yquexyöybi

¹ E co Jesús anajty ti najtzcaxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyb, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jëbi iich ajcxy huingbi n'ahuijxcixy?

⁴ Chi Jesús y'adzooy:

—Níxcix miich ajcxy nimaaygix yi' Juan, je Bautista, tijaty miich ajcxy m'ixpy mmidooyb co ndumybich. ⁵ Miich ajcxy yajmüdmüydäg je Juan, jadu'n nej je huintzpi nyajhuindicxigyich; je cümät tecymät nyajtzoocypich; je huidibi jibic nübützpa'm ymüid nyajtzoocpyich; je' ajcxy huidibi cönat nyajmidohuicpyich; je öcpi ajcxy nyajjugypijcpich; etz je ayoobtjic, je huidibi yung naxy yjothuinma'ñ nyajmüdmüydacypich Dios y'ayuc. ⁶ Jotcuyc yi' ajcxy pinjaty xymibijcpich amumdügjot etz ca' ni nej yjotmetzci' müd iich.

⁷ Co Juan je Bautista ydiscípulos ajcxy ñicxni, chi Jesús ytigüy nimüydaccoty Juan je Bautista ytung ma je mayjäy, chi ymíñañ:

—¿Ti miich ajcxy oy m'ixy jím mǝjtǝgǝduum? ¿Tǝg nǝhuaax huǝdibǝ poj xǝjǝ? ⁸ ¿Ti ajcxy oy m'ixy? ¿Ti oy m'ixy, tǝg jǝy huǝdibǝ ooy y'oyxǝyǝty? ⁹ ¿Ti miich ajcxy oy m'ixy? ¿Nej ti m'ixy tǝg Dios y'ayucnajtzcaxǝyǝbi? Janch co ti m'ǝjxcǝy tǝg jǝy jac mǝj ca'ydi tǝg Dios y'ayucnajtzcaxǝyǝbi. ¹⁰ Je' jada je jǝy huǝdibǝ Dios nigapxy ma ñecy co Dios jadu'n ymǝnañ:

Cham nguexyǝch ǝch nguexyǝyp jayǝjp ma miich. Je' yaj'oyǝhuǝp je jǝy yjot yhuinma'ñ mǝid ǝch ycǝxpǝ, tim jadu'n nipaady nej jǝhuǝy jǝy tǝ'aa yaj'oyǝ co rey ymiina'ñ.

¹¹ Co yǝ jǝy ajcxy huǝdibǝ ti chinaayǝxy ixtǝ chambaad ni pin ti ca' yajpaady mǝj jadu'n nej Juan je Bautista; per pinjaty ǝch xymǝbijcp, yǝ' jac mǝj naxam ma Dios y'ane'my ca'ydi Juan.

¹² Maabi Juan je Bautista ytundǝgǝy, ixtǝ chamni janch mayjǝy amumdǝgjot ñejhuǝhua'ñ Dios y'ayuc, je' co ajcxy ytǝgǝhua'ñ ma Dios y'ane'my. ¹³ Tǝg'ǝcǝy ajcxy je Dios y'ayucnajtzcaxǝyǝbi etz Moissés ycǝtǝjcin ñigapxy ajcxy je ané'mǝn ixtǝ coonǝ Juan oy ymǝñ. ¹⁴ Pen miich ajcxy mǝbijcǝy Moissés ycǝtǝjcin etz Dios y'ayucnajtzcaxǝyǝbi ajcxy, Juan je Bautista je' je' je Elías huǝdibǝ anajty mǝinamb. ¹⁵ Pinjaty mǝdo'n mǝid huen mǝdo'mbǝgǝpy ǝch n'ayuc.

¹⁶ Jesús yjacmǝnañ:

—¿Pin mǝid n'ocǝyjtǝgǝhuǝbyǝch yǝ jǝy huǝdi ajcxy cham tzǝnaayb? Tim jadu'n yǝ' ajcxy nej pi'ctǝjc huǝdibǝ ajcxy ǝyǝyb ma mayjǝy yjuyǝxy ytooccǝxy, mǝyaaxcǝxy mǝdǝnaayǝxy ymǝgǝgtǝjc: ¹⁷ “Ti njayajxǝxyǝch flauta e ni ca' ti m'ejtzcǝxy; ti ǝch ajcxy ǝcpǝ njahuǝnyǝch, e miich ajcxy ca' ti mǝǝxy.” ¹⁸ Chi Juan, je Bautista, anajty mǝñ, e je' ca' ycay y'ǝgǝ. E miich ajcxy mǝnaangǝxy co Juan ca'oybǝ ymǝdity. Jada pi'c'anǝctǝjc nipaady nej miich ajcxy. ¹⁹ Chi ǝch je' je jǝy huǝdibǝ tzoon tzajpjoty nmǝñǝch, e caaybǝch uucpǝch, e miich ajcxy mǝnaangǝxy: “ǝjxcǝ, cha tǝg yǝdyǝjc, janch cax janch vino'ucp huǝdibǝ mǝgǝg'ajtpy yajcǝejtpǝdyǝjc etz pocyǝdyǝjc.” Je Dios tǝy'ajt jǝ je' ñǝgǝxǝgǝ.

Je cajp huǝdibǝ ca'ycapxymǝdoogǝxy

²⁰ Chi Jesús ojcoty je maygajpjǝy ma anajty may mǝjhuinma'ñ ti tuñ, com je mayjǝy ca' anajty yjothuimbǝdaangǝxy ma Dios. Chi Jesús ymǝnañ:

²¹ —ǝAy miich ayoob ajcxy huǝdibǝ tzǝnaayb jím Corazín! ǝAy miich ayoob ajcxy huǝdibǝ tzǝnaayb jím Betsaida! Co ǝxyipy ǝch ti nduñǝch jecy'ajty je mǝjhuinma'ñ mǝjtzǝg'ajtin ma je Tiro etz Sidón cajp, jadu'n nej ti nduñǝch ma miich ajcxy, ti ǝxyipy je Tiro jǝy etz Sidón jǝy nijothuimbǝjtcǝxy etz ǝnaayǝxy sacco nǝjen nǝcuyjam ǝxcuyjam, je' je tǝy'ajt co ooy ytajcǝxy ymayǝxy mǝid ypocy ycǝxpǝ. ²² Paady miich ajcxy yam nǝmaayǝxy. Co anajty Dios tǝyduna'ñ je naaxhuǝñyǝbi jǝy, huǝn'it miich ajcxy Dios xychaachytuna'ñ jac nǝgǝ, ca'ydi je jǝy ajcxy huǝdibǝ jecy'ajty tzǝnay jím Tiro etz Sidón.

²³ Miich ajcxy, Capernaum jǝy, mǝnaybǝdǝacǝgǝxy jadu'n nej jǝhuǝy mǝdǝgǝhuaangǝxy jǝjby tzajpjoty. Per ca' yjadu'nity. Mǝdǝgǝhuam miich ajcxy ayoodactuuby. Ayo'n tzaachypǝ mbadaangǝxy. Co ǝxyipy ǝch ti nduñǝch jecy'ajty je mǝjhuinma'ñ mǝj tzǝg'ajtin ma Sodoma cajp, jadu'n nej ti nduñǝch ma miich ajcxy mgajp, chambaad ǝxyipy ǝty yǝ jadu'mbǝ cajp, ca' ǝxyipy Dios cayajtigooy. ²⁴ Paady ǝch miich yam nǝmaayǝxy. Co anajty Dios tǝyduna'ñ je naaxhuǝñyǝy, huǝn'it miich ajcxy mǝyajtzaachytuna'ñ jac nǝgǝ, ca'ydi je jǝy huǝdibǝ jecy'ajty tzǝnay ma Sodoma ñaaxjot.

Mǝngǝxy ma ǝch e mbǝocxcǝipy

²⁵ Chi Jesús ytǝgǝy Dios mǝbijctzooyb, ymǝnañ:

—Dios Teedy, ǝch miich n'ǝbaatpǝch ngapxpaatpǝch. Miich mǝid je mǝj cǝtǝjcin jǝjby tzajpjoty etz ya naaxhuǝñ. Com miich ti mǝnajtzcaxǝy yǝ m'ǝxpǝjcin ma je ayoobtǝjc huǝdibǝ tzǝnaayb jotxeemy, e ti mǝyǝch yǝ m'ǝxpǝjcin ma yǝ ǝxpǝcytǝjc cohuinma'ñdyǝjc.

²⁶ Jadu'n, Tat, ti mǝduñ, com jadu'n miich ti mǝdzocy ti mǝjǝgǝdǝgǝ.

²⁷ Jesús yjacmǝnañ:

—Hich nDeedy ti xyajcidiydyäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tüg'pajc. Ni pin ca' ijxcapy pin je' nDeedy'ájtpyich, jëyi hich, je Dios y'ung tüg'pajc, etz jacjadyii huidibi hich, je Dios y'ung, nyajniguëxigamyich. ²⁸ Min ma hich nidüg'óciy miich ajcxy huidijaty taj mayb myajpatp ma mjot mhuinma'n, hich miich ajcxy nmöhuamyb jotcuyc'ajtin. ²⁹ Cöbicy miich ajcxy hich n'ane'min hich ngötujcin, jadu'n nej huaaj yuub ajcxy cöbicy ycögi'. Ijxpicy ajcxy hich ndiy'ajt etz cuydun hich n'ayuc, com hich nmüidich mecxtujcin etz ca' hich amij agix nayjihuiyijich. ³⁰ Ca' hich n'ane'min ymicity, e hich ndung ca' nimijaajity.

12

Je discípulos ajcxy moc cojc yajmujcp pocxx#duum

¹ Chi tüg xii Jesús yhuidity müd ymigügtijc ma tüg camjot. E hue' anajty sábado xii, je poocxin xii. Chi Jesús ydiscípulos ajcxy oy anajty yubögyii. Chi ajcxy ytiigiy trigo tim nixajztutp etz yjicxy ajcxy je ypajc. ² E co je fariseos ajcxy ijxy nej Jesús ydiscípulos ajcxy y'iditczixy, chi ajcxy nimay Jesús:

—Oc'ix nej miich mdiscípulos ajcxy y'idich. Hue' ajcxy tumyb huidibi ca' huaad ma sábado xii yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymigügtijc ajcxy idich jecy'ajty co yuböccoti? ⁴ Pues yi' ajcxy tigiiy ma Dios ytiyc. Chi cay ajcxy je tzajcaagy huidibi anajty jäy ajcxy ti yajhuindzigiiy Dios. Je' je tzajcaagy huidibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytiyc sábado xii, e ca' nan tundigooyb je' ajcxy?

⁶ Hich miich ajcxy nimaaygixyp, jac nigii mij cötujcin nmüididyich, ca'ydii je cötujcin huidibi je teedy ajcxy yajtuñ ma Dios ytiyc. ⁷ Pen miich ajcxy ti mhuinjihuüy nej yhuimbizimiy jada Dios y'ayuc, co Dios jadu'n yminañ: “Hich ndzojcpy co miich ajcxy müd'idipy pa'ayo'n ca'ydii co ajcxy myegipy huindzigiiñ.” Pen miich ajcxy ti mhuinjihuüy jada ayuc, ca' ixipy mbocy'ixy ma hich nmigügtijc huidibi ca' ma ti ytundigooy. ⁸ Hich, je jäy huidibi tzoön tzajpjoty, nmüidich ane'min, jaydëbi nimäyich je jäy ajcxy ti jëbi tungixy sábado xii.

Je yëydijc huidibi anajty ycütidzip

⁹ Chi Jesús choñ jim, ñicxy ma je judíojäy ñaymujctac. ¹⁰ E jilby ma je naymujctac anajty tüg yëydijc huidibi ycütitz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiiji?

¹¹ Chi Jesús y'adzooy:

—Pen ya ma miich ajcxy ji tüg jäy huidibi cöbixy yjutcögäy sábado xii, ¿nej ca' je' nicxy yajpizimiy mic'amy? ¹² Nigii tzobaatp tüg yëydijc ca'ydii tüg cöbixy, paady Moisés ycötujcin ca' capx'aducy co tüg oy'ajtin nduunim sábado xii, je poocxin xii.

¹³ Chi Jesús nimay je yëydijc:

—Xajtiu yi' mgi'.

¹⁴ Co xajtiy yci', chi choocy, e hui'my quipxyjaty müd je yci' oybi. Chi je fariseos ajcxy yjotmätcoty, yhuinma'n ixtaaygixy ajcxy nej huaad Jesús ocyaj'o'ccixy.

Tüg ayucnajtzcaxiiy in müd Jesús ycixpi

¹⁵ E co Jesús nejhuüy nej yi' ajcxy yhuinma'n müdity, chi jim choñ. E ooy mayjäy ypanicxi Jesús, Jesús yajtzoocpy anajty tüg'óciy pinjaty pa'm müd. ¹⁶ Jesús ane'my je pa'mjäy ajcxy co ca' huaad nigapxy nimäydägy co yi' je' je Cristo. ¹⁷ Jadu'n Jesús ane'my

je pa'mjäy jigix ycixipy yca'pxipy je ayuc huidibi je profeta Isaías yjaay jecy'ajty, co Dios jadu'n ymíñañ:

¹⁸ Jada je' ñich ndumbi huidi ti nhuin'ixyich. Yi' ñich ooy ndzocyich njihuïyich etz ooy njotcujcich mïd yi'. ñich yi' nmöhuamybich ñich njihui'ñ mic'ajt. Yi' capxhuäcxip ñich n'ayuc jadu'n nej ndzaachytuna'ñich naaxhuiñjyay ajcxy mïd ajcxy ypocy ycixpi.

¹⁹ Yi' ni ymígügtijc ca' oja'ñ, ni ycayäxa'ñ, ni ycatinähua'ñ, ni pin ca' midoohuipy ma cajp cujc.

²⁰ Ca' yi' tzaachytuna'ñ ayoobitijc etz huidibi ayo'ndumb ijtp. Etz nañ ni ca' yajtigoya'ñ huidibi ayoobitijc yco'ögy'ungdijc yjijp'ijxpy. Jadu'n nej jäy cayajhuindigoy tza-jcapy huidi huindyip etz ni cayajpich je mecha huidibi uuxy uuxy tïcxp. Ixti mabaad anajty yajcopicy y'ane'min tudägypi.

²¹ E yi' mayjäy ooy yjijp'ixa'ñyii.

Xigixy Jesús co müdity mujcu' ymic'ajt

²² Chi müd miiñ ajcxy ma Jesús tüg jäy huidibi huintzip etz uum. Je' anajty müd ca'oybi. Chi Jesús yajtzoogy, e chi y'ijxigy etz ycapxigy. ²³ Co Jesús jadu'n tuñ, chi je mayjäy ytigüy huinmay'ahuidijt, chi ajcxy ymíñañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuïy nej je jäy huinmay, chi ajcxy ymíñañ:

—Jadaabi yëydijc yajpidzimy ca'oybi müd je mujcu' huindzin ymic'ajt (ca' yi' yjējity je Cristo).

²⁵ Per Jesús ñejhuïyb anajty ti je fariseos ajcxy yhuinmaayb, chi ymíñañ:

—Pen tügpicy tungmüdpí ixipy ñaybijc-huäcxigixy, etz ñaymidziptzoonigixy ixipy ac jëyi, pues cixipy yi' ajcxy y'ane'min. Pen tüg cajp o tügpicy jugymigüg ixipy ñaybijc-huäcxigixy, pues ca' ajcxy y'idaangixy tügmuçy. ²⁶ Pen Satanás, je ca'oybi huindzin, yajpidzimy ixipy ca'oybi ma je jäy ajcxy, chi ci'm ixipy je ca'oybi ti ñaybijc-huäcxigixy, e je Satanás ymic'ajt ca' y'ida'ñ. ²⁷ Miich ajcxy minamb co ñich nyajpidzimyich ca'oybi müd je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy minañ, je jäy ajcxy huidibi xymijnicxpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yejcp co miich ajcxy ti mgapxtigoy co ymíñaangixy co ñich nyajpidzimyich ca'oybi müd Satanás ymic'ajt. ²⁸ Per ñich nyajpidzimyich ca'oybi ma pa'mjäy müd Dios yjihui'ñ ymic'ajt. Paady miich ajcxy nejhuïyb co ti ymiiñ yjaty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigüy ma tüg micpi jäy ytijc etz pigaani tijaty yi' ymüd, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymüd. ³⁰ Pinjaty ca' xymijnicxpetyich, xymidzipich yi'. Pinjaty ca' tuñ müd ñich co jäy nyaj'ixpicyich, hue' je' ajcxy jäy yajhuinma'ñyidigooyb.

³¹ Janch ñich miich ajcxy nimäy co Dios jëbi huinmecxip tüg'óciy pocy huidibi jäy ytungixp etz tüg'óciy jibicpi huidibi jäy ycapxcixp. Jëyi janchtiy co pinjaty capxtigooyb müd je Espíritu Santo, je Dios yjihui'ñ ymic'ajt, ca' Dios huinmecxip nimina. ³² Pinjaty jibic xyñigapxpich xyñimiydaccpich, je' huinmecxam. Per je huidibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yi' ytiim yi' müd yaj'ijxcapy

³³ Pen miich ajcxy mnejhuïhuamy je quipy pen oy quipy, o pen ca', jëbi mnejhuïhuipy co je quipy nicxy ytiim'aty. Pen oy je ytiim, miich minañip co oy je quipy. E pen ca' oy ytiim'aty, huin'it miich ajcxy minañip co ca' y'oyity je quipy. ³⁴ Jibic jäy miich ajcxy, jadu'n nipaady nej jihuiy ahua'n iyujc xy'ung'ajtp. Pen miich ajcxy jibic jäy'ajtp, ¿nej jëbi miich ajcxy oybi ayuc mgapxipy? Jadu'n nej jäy ajcxy yjot yhuinma'ñ müdity, ac tim jadu'n ajcxy ycapxy. ³⁵ Je jäy huidibi oy ayuc ycapxpy, ymüd oyjot oyhuinma'ñ paady oy

ayuc capxy. Je jäy huiḁibi jibic ayuc capxp, ymüḁ jibic jot jibic huinma'ñ, paady jibic ayuc capxy. ³⁶ Ich miich ajcxy nimay co anajty paady je xii je tiempo mina Dios tiyduna'ñ je naaxhuiñyäj, huin'it ajcxy y'adzohuipy müḁ huen tim huiḁibi ayuc huiḁibi anajty ajcxy ti mgapxy. ³⁷ Com nejaty miich anajty ajcxy ti mgapxy je m'ayuc jadu'n miich ajcxy Dios xytiydunip. Com müḁ yi mgi'm ayuc yi' müḁ m'oybidzimipy mhuätzpıdzimipy. E nañ jadu'n müḁ yi mgi'm ayuc yi' müḁ mbocycähuipy.

Jibicjäydijc ajcxy pijctzoogixy tüg ijsxpejt mihuinma'ñybi

³⁸ Chi nijejity fariseos ajcxy etz escribas ajcxy Jesús nimayi:

—Huindzin, n'ixamy ich ajcxy miich tüg m'ixpejt.

³⁹ Chi Jesús y'adzooy:

—Yi jibic jäydijc ajcxy etz ajcxy huiḁibi ca' mibiga'ñ Dios ypijctzooyb tüg ijsxpejt huiḁibi tzomb tzajpjoty. Per Dios ca' yega'ñ jadüg ijsxpejt. Ti Dios yecy tüg ijsxpejt ma Jonás. ⁴⁰ Com jadu'n nej Jonás jecy'ajty ijsxpejt yecy co y'ijty tugüg xii tugüg tzuum mejyjoty ma acx ymoxac, nañ tim jadu'n ich, je jäy huiḁibi tsoon tzajpjoty, nyegamy ijsxpejt jadachambi tiempo co n'idipyich tugüg xim etz tugüg tzuum naaxjoty. ⁴¹ Je mayjäy huiḁibi anajty tzinaayb ma Nínive cajp, ti jothuimbijtcixy etz ti ixmach ajcxy huiḁijaty jibicpi ajcxy ytumyb co Jonás capxhuäcxy Dios y'ayuc ma yi' ajcxy. Cha ich ngapxhuäcxyich Dios y'ayuc ma miich ajcxy, etz jac nigi cötujcin nmüḁidyich, ca'ydı Jonás; e ca' miich ajcxy mjothuimbity. Paady co anajty Dios tiyduna'ñ je naaxhuiñyäj, je Nínive jäy miich ajcxy xyajpocycähuam. ⁴² Nañ jadu'n je töxyjäy reina huiḁibi tzinay jecy'ajty ma madza'cruudz ypidzimy, yi' je' xidähuam je jäy ajcxy huiḁibi tzinaayb jadachambi tiempo, etz yajpocycähuib ajcxy. Je reina tsoon jiguëgy nicxy co amıdo'ıda'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios yti'yajtmıdpi jac nigi ymijity, ca'ydı Salomón anajty, e ca' je jäy ajcxy mıpidäga'ñ.

Je jibic espıritu co jadüg'oc yhuimbity

⁴³⁻⁴⁴ Yi jäy ajcxy huiḁibi cham tzinaayb, quipxyjaty ajcxy müḁ je ca'oybi. Co je ca'oybi ypidzimy ma je jäy, chi je' ñicxy jim mıtigıduum y'ijxtacy. Co ca' paty ypocxtac, huin'it ymina'ñ: “Huimbidaambich ma je jäy yjot yhuinma'ñ ma ich ti n'octzombi.” Co je ca'oybi yjaty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzooñ jahuıxtujc ca'oybi jac jibicpi ca'ydı je'. Chi ajcxy ytigıy ma je jäy yjot yhuinma'ñ, e chinay ajcxy jıby. Huin'it je jäy jac'öctiy oy yjajtnı, ca'ydı jadu'n nej anajty jayıjp'aty.

Jesús ytaj etz y'uch mıguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch mıguëx ajcxy. Hue' ajcxy yhui'my tıba'y. Je' ajcxy anajty ymigapxamy Jesús. ⁴⁷ Chi jäy yajnimay Jesús:

—Yi mdaj etz m'uch mıguëx ajcxy, chiiby ajcxy tıba'y, miich xyjamıgapxamb.

⁴⁸ Jesús y'adzooy, nimay je jäy huiḁibi ytaj y'ayuc yajnajxi ma yi':

—¿Pın jäy miich ajcxy mdijy co ich ndaj'adyii etz ich n'uch'adyii nmıgüg'adyii?

⁴⁹ Huin'it Jesús nitziihuıy je' ydiscıpulos ajcxy e yminañ:

—Jada ich ndiscıpulos ajcxy jadu'n nipaady nej ich ndaj etz ich n'uch nmıguëx.

⁵⁰ Huen ytipinıty huiḁibi ytumyb ich nDeedy chojcin, huiḁibi jıby tzajpjoty, pues jadu'n yi' ajcxy nipaady nej ich ndaj etz ich n'uch mıguëx.

13

Je ayuccapxhuäcxi y'ixpejt (niipi ijsxpejt)

¹ Je huin'it xii Jesús choñ ma je tijc. Chi ñicxy ma je mejypa' jim oy y'ıñay'ıhuıy. ² E co mayjäy ooy ñaymujci jim ma anajty Jesús ıñay, chi Jesús ytigıy barcojoty. Per tüg'öciy je mayjäy yhui'mday ma mejypa'. ³ Jesús ytigıy jäy yaj'ixpijcp müḁ jihuimbı ayuc, yminañ:

—Tüg jäy chooñ trigotim huijp. ⁴E ma anajty jim ytimhuijy, huin'it je ytim oy naagity ycäy ma tü'aa. Chi jada' je joon ajcxy oy ymiñ etz ypiihuijy je tim. ⁵Nijëjity ytim ycäy ma tzaanïcx ma anajty hueeni naax. Jada tim tzojc ymujxy. ⁶Com hueeni anajty je naax ma je tzaanïcx, chi co oy xii'an ypadyi, chi ytitztay, com ca' anajty je ytictz yeegity. ⁷Nijëjity tim oy ycäy ma ujtz'aayjot ma apyjot, e ujtz'öctay je trigo mang. ⁸Per je tim huidibi ca'u ma oy ñaax, je' yon yajxon e tim'ajt may'amy; tüg ypi'cpajc iipxmajc oy yco'ity, jadüg pi'cpajc tugi'px oy yco'ity, jadüg pi'cpajc migo'px oy yco'ity. ⁹Pinjaty mido'n mid huen mido'mbicy jada ayuc.

Ti ycipi je ijpajt

¹⁰Chi je' ydiscípulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹Chi Jesús y'adzooy, yminañ:

—Miich ajcxy jaydeb mnejhuihuipy huidibi Dios ñigapxyp ñimiydacpy coyüch'amy ma y'ane'min. Jacjadyi jäy ca' ajcxy huinjihuipy. ¹²Pinjaty ymid yajmohuip ñigi, pinjaty hueen mid yajpigipy ñigi, oy ixipy hueen jadim midity. ¹³Paady jihuimbit'amy nyajnimaaayich; jaydebi pinjaty ijcixy, ñipaty nejhuüy ca' ti ijcixy; etz co ajcxy midoogixy, ca' ajcxy huinjihuüy, ñipaty nejhuüy ca' ti midoogixy. ¹⁴Jadayaabi ytunyii yjadyi jadu'n nej je profeta Isaías jaaybejty yajhui'my ma jadu'n yminañ:

Miich ajcxy midohuamy, per ca' mhuinjihuihuangixy. Miich ajcxy m'ixamy, nañ ca' mhuinjihuihuangixy huidibi ti m'ijcixy.

¹⁵Com jadayaabi jäy ooy ajcxy yjot yhuinma'ñ ti y'ahuimbity juuñ. Nej ajcxy yjamidoy, ca' ajcxy ymidohui'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihuüygyxy, per ca' yhuinjihuüy ma yjot yhuinma'ñ. Yi' ajcxy ca' yjothuimbidaangixy ma iich, jaydeb nyajnidzögibich ajcxy.

¹⁶Per jotcuyc miich ajcxy, co miich ajcxy ijxhui'my mid mhuin huidibi ndumybich, e mmido'mbicy ajcxy iich n'ayuc. ¹⁷Janch tiy'ajt jadu'n nej iich miich nimaaygixy. Janch tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy ixxy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcapxiy je ijpajt ma je niipi

¹⁸Amido'it miich ajcxy, jadu'n nej yhuimbizimy jada jihuimbit ayuc maabi je tim huijpi. ¹⁹Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tim huidibi cäb tügujc, e je joon ajcxy mic'amy ypiimujctay. ²⁰⁻²¹Je jäy ajcxy huidibi amido'ijtp Dios y'ayuc janch jotcuyc, per co agapxiyb paady, co tzaachypi minaxy yajnaxy mid Dios y'ayuc ycipi, chi mic'amy ajcxy ixmajtzn Dios y'ayuc, jadu'n ajcxy nej je trigotim huidibi ti ycäy ma tzaanïcx, huidibi ca' oy ytictz midity. ²²Je jäy ajcxy huidibi amido'ijtp Dios y'ayuc, e co ñicxni, chi jäydigooyñi Dios y'ayuc mid jotcuyc'ajtin tzinaayin, comeen'ajtin etz adzojcän. Jadu'n ajcxy nipaady nej trigotim huidibi ti ycäy ujtzjoty, e ca' ytim'aty mid co oy y'ujtzögy. ²³Je jäy ajcxy huidibi amido'ijtp etz cöbijcp yajxon Dios y'ayuc amumdüjot etz Dios y'ayuc ytumyb ma ajcxy yjot yhuinma'ñ, jadu'n ajcxy nipaady nej je tim huidibi ti ycäy ma oy ñaax etz ti ytim'aty may'amy. Tüg pi'cpajc iipxmajc oy yco'ity, etz jadüg pi'cpajc tugi'px oy yco'ity, etz jadüg pi'cpajc migo'px oy yco'ity.

Je ijpajt co je jibic ujtz ymuxy ma je trigo cam

²⁴Chi Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg yëdyjc huidibi trigo tim huijp ma je' ycam.

²⁵Per co ajcxy yma'öctay nidüg'óciy je cogam, chi ytiy tüg ymidzip ma je ycamjot. Chi je midzip jibic ujtz tim oy huijy ma je trigo cam. Chi ñicxñi. ²⁶E co je trigo oy yooñ,

chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzin yajnimay: “Huindzin, ¿nej ca' ti mnipy ac trigotim? ¿Nej co jim nañ jadu'n jibic ujtz yajpaady?” ²⁸ Chi je cogam yminañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojcpy co ich ajcxy nhuijxigibich je jibic ujtzi?” ²⁹ Chi je cogam yminañ: “Ca'. Pen miich ajcxy mhuijxicpy je jibic ujtz, ca' jecyity co m'ahuijxmugipy nañ jadu'n je trigo. ³⁰ Ixmatz, huen je jibic ujtz yeegy tūgmucy mīd je trigo, ixti cooni anajty ypidigy je cosecha. Co cosecha paty, huiñ'it nguexa'ñich je ndumbidijc co huen jayijp pujxigy je jibic ujtz etz axotzipy etz nōgipy. E co yajpidictay je jibic ujtz, chi yajpidigipy je trigo e pidāgipy ma je tze'x.”

Je ijsxpejt ma je mostazapajc

³¹⁻³² Nañ jadu'n Jesús yaj'ixpijcy jadūg jihuimbit ayuc, yminañ:

—Je Dios y'ane'min jadu'n nipaady nej tūg mostazapajc huidibi tūg jāy ñiip ma je' ycam. E je mostaza ytim je' jac tim mutz ca'ydi ni huidibi ujtz tim. Per co je mostaza ytim ymujx etz yooñ, chi y'ahuimbijty jac mij ca'ydi jacjadyi ujtz. E hue' nicxy yjaty janch mij, ixti joon ajcxy oy yqueec mīñ yqueec xijpy jim, pidāgy je ype'ñ ma je mostaza y'aacx.

Je ijsxpejt ma je levadura huidibi ca' y'oyity

³³ Nañ jadu'n Jesús yaj'ixpijcy jadūg jihuimbit ayuc, yminañ:

—Je Dios y'ane'min jadu'n nipaady nej levadura huidibi tūg tōxyjāy ypidacpy mīd je harina, jigix je harina oy ypidigy.

Nej anajty Jesús yajtuñ je ijsxpejt

³⁴ Tūg'óciy Jesús yaj'ixpijcy je mayjāy, jihuimbit'amy yaj'ixpijcy, e ni ti ca' jāy yaj'ixpijcy cayajnimāy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huidibi je profeta Isaías yaayhui'm jecy'ajty, co jadu'n yminañ: Ich ngapxamyich ac tim jihuimbit ayuc. Ich nigapxamybich tijaty huidibi ca' pin nejhuñy, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic ujtz ma je trigo cam

³⁶ Chi Jesús capxycijxy mīd je mayjāy, chi ñicxy ma tūg tijc. Chi ytigy tigoty mīd je' ydiscipulos ajcxy. Chi Jesús ydiscipulos ajcxy nimijhua'cy Jesús, yminañ ajcxy:

—Tun may'ajt ich ajcxy xyajhuinjihuñyg je jihuimbit ayuc co ti mnigapxy je jibic ujtz ma je trigo cam.

³⁷ Chi Jesús yajnimay:

—Ich, je jāy huidibi tsoon tzajpjoty, jadu'n ich nipaady nej je jāy huidibi niip je oybi tim ma je ycam. ³⁸ Je cam jadu'n nipaady nej tūg'óciy naaxhuiñyāy. Je oybi tim jadu'n nipaady nej je jāy ajcxy huidibi cōbijcp Dios y'ane'min. Je jibic ujtz jadu'n nipaady nej je jāy ajcxy huidibi cōbijcy ajcxy je mujcu' y'ane'min. ³⁹ Je jāy huidibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpujxigy etz yajpidacy jijnjoty, nañ tim jadu'n nicxy yjaty mīd je jāy ajcxy huidibi cōbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi ich, je jāy huidibi tsoon tzajpjoty, nguexamyich n'ángeles huen yajmujctāy je jāy huidibi je ymīgūg yajtundigooyb, etz yi' huidibi ajcxy jibic-huinma'ñ tumb. ⁴² Co yajmujctāhuipy je jibicjāydijc, chi ajcxy yajpidāgipy mijijnjoty, jibby ajcxy yāxa'ñ etz ytiitzmucxy ytiitzqueecy mīd je ayo'n ycixpi. ⁴³ Per je jāy ajcxy huidibi cuydumb Dios chojcīn, idam ajcxy mīd Dios Teedy jibby tzajpjoty. Ymī'idamy ajcxy tūg oy'ajti, jadu'n nipaadip nej je xī ytiicxin yjajin. Pen miich ajcxy mīdo'n mīd, mīdo'mbijc ajcxy ich n'ayuc.

Je y'ixpejt je meeñ huidii yūchip

⁴⁴ Je Dios y'ane'min jadu'n nipaady nej meen huidibi yuch ijtp ma tög cam. Per co tög jay paady je meen, chi mic'amy jadüg'oc yüdztigach. Chi ooy yxondägy. Chi ñicxy etz tootäy tög'óciy huidibi ymüd etz juy je naax.

Je y'ixpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tög ajuuyb adoocpi huidibi ijxtaayb tög oybi perla huidibi tzoobatp. ⁴⁶ E co anajty paady tög perla huidibi janch tzou, chi ñicxy tootigoydäy tög'óciy huidibi ymüd etz juy je perla.

Je acxmadzi'ñ y'ixpejt

⁴⁷ E nañ jadu'n Dios y'ane'min jadu'n nipaady nej tög acxmadzi'ñ huidibi jay müd ycojibüby mejyoty. Chi jüby ytigüy huen ytim huidibi acxity. ⁴⁸ E co anajty je acxmadzi'ñ y'uch müd je acx, chi je jay ajcxy yajpidzimy ma mejypa'áy. Chi ññay ajcxy jim mejypa'áy etz huin'ijxy ajcxy je oyjatypí acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty müd je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jünjoty. Jüby jünjoty ajcxy yäxa'ñ ytinähua'ñ etz ytüztmucxaangixy ytüztqueedaangixy müd je ayo'n müd je tzaachypí ycixpi.

Je jay huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhuinjihuüyb müch ajcxy tög'óciy huidibi üch ti ngapxich?

Chi ajcxy y'adzooy:

—Huindzin, ti nhuinjihuüy üch ajcxy.

⁵² Chi Jesús ajcxy nimay:

—Nidüg nidüg escriba co ti ixpicytäy tög'óciy Dios ytiy'ajt y'ane'min huidibi tza-jpjoty tzoön, hue' jadu'n nipaady nej tög codijc comeenüby huidijaty ymüd yjaty nej yajpidzimipy jemüby etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi choon jim. ⁵⁴ Co Jesús choon jim, chi ñicxy ma yci'mnaax yci'mgajp. Chi Jesús ytigüy ma je judio ñaymujctac, e ytigüy yaj'ixpijcp. Chi je mayjy jüby ooy jihuüy huinmay nej yí yaj'ixpicy, ymünañ ajcxy:

—¿Ma jada' jada yëydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E üch ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma üch ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amyty tög'óciy je mayjy ajcxy ooy yajmij'aty yí jay ajcxy huidibi najtzcapxüyb Dios y'ayuc, ca'ydi huidibi y'ayucnajtzcapxüyb ma yci'mnaax yci'mgajp yci'mjin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, müd co je jay ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huidibi anajty ane'mb jim Galilea tiy'ajt paty nej Jesús ytuñ.

² E yí nimay je ymidungmüdpidijc:

—Yijübi jay huidibi tzachtumb mijhuinma'ñ, yí je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt müd jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägi py pujxtigoty. Jadu'n Herodes tuñ miid Herodías ycxpi. Je Herodías je' anajty miid jayijp'aty ti ypicy Felipe, je Herodes y'ajch, chi ti ixmajch Felipe, chi ypijcy miid Herodes. ⁴ Juan ti anajty nimäy Herodes co ti ytundigooy co ti picy miid Herodías.

⁵ Je rey Herodes ooy anajty jayaj'öga'ñ yi Juan, per tzigüyb anajty miid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt miidpi, tüg profeta. ⁶ Co Herodes yjimijtpety, chi anajty ñayñixiduñyii, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuaic ma tüg txy. Chi Herodías ñix je rey nimay:

—Ndzojcypich co miich xymöhuip Juan, je Bautista, ycohuaic ma tüg txy.

⁹⁻¹⁰ Co jadu'n midooy je rey, chi ytigüy tajp maybi mij cajee. Per co ti anajty Dios capxpaatni, yminaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuaic, e möhuipy Herodías ñix. ¹¹ Huin'it je soldado oy je Juan ycohuaic yajminajci jiby pujxtigoty. Chi moy je töxy'anäg, e je töxy'anäg yejcnajxni ma ytaj.

¹² Huin'it xii je Juan ydiscípulos ajcxy yja'ty. Chi ajcxy oy yajnaaxtigüy je Juan ñinix. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii miid Juan, chi ytigüy ma tüg barco naydüg, e nicxni ma tüg it ma ca' pin chinäy. Co je mayjäy nejhuüy co Jesús ti ñicxy, chi ajcxy choday canaag agajp, nicxy ajcxy ma Jesús yajpaady, hue' tecygi'm ajcxy nicxy. ¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huiidibi anajty ajcxy jim ymiid miin. ¹⁵ Com ti anajty chuu'ñi, paady je' ydiscípulos ajcxy nimijhua'cy Jesús, e nimay ajcxy:

—Ti chuu'ñi, e ca' ya pin china'y, paady capxcixy miid jada mayjäy ajcxy, jaydeb ajcxy nicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyty co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy yminañ:

—Per ich ajcxy jeyi yeeby nmidity migoox tzajcaagy etz metz acx.

¹⁸ Chi Jesús yminañ:

—Mimiingix yam'amy.

¹⁹ Chi Jesús nimay je mayjäy co huen ñay'ihuiydaaygixy ma pi'cmüy'ung nix. Huin'it Jesús je migooxpi tzajcaagy congy etz je metzpi acx. Chi ypa't'ijxy jiby tzajpcixy, e yajnajxy Dioscojuyipy. Chi tujc-huäcxy je tzajcaagy etz moy je' ydiscípulos ajcxy, co huen yajhuäcxcixy ma je mayjäy. ²⁰ Nidüg'óciy je mayjäy ajcxy ycaay cüxyi. Co je mayjäy ycaayday, chi je discípulos ajcxy yajmujcy je cayduc jicxtuc, e yaj'ujch ajcxy majmetz cach. ²¹ Migoox mil anajty ajcxy je yeydijctijc huiidibi cay uuc. E ca' ajcxy michoy je töxyjäydijc ajcxy etz je y'ung y'anäg ajcxy.

Jesús yöy ñihuingixy

²² Chi Jesús ane'my yi' ydiscípulos ajcxy co huen barco tigüygixy mic'amy, jigix ñicxipy ajcxy jim mejy ninaxy. Nami yi' ydiscípulos ajcxy choñ barcojoty, Jesús ycapxycijxy miid je mayjäy huen nixcixni. ²³ Co anajty Jesús ti ycapxycixy miid je mayjäy, chi ñicxy naydüg ma tüg cögop Dios mibijctzoobi. Co ycoodziñ Jesús naydüg anajty yajpaady. ²⁴ Co ycoodziñ, mejy cujc anajty je barco cujc nicxy. E je ñi ooy anajty ymijjätzpety ma je

barco, je' co ooy anajty mic yjanchpojoy. ²⁵ E co oy ymoññy, huin'it Jesús ymijhua'cy ma je' ydiscípulos ajcxy, ñicxy adüyöyb mejyhuingíxy. ²⁶ E co je discípulos ajcxy ijxy co Jesús anajty ymiiñ mejyhuingíxy, chi ajcxy ooy ñay'adzigiñyi. Ooy ajcxy yaaxqueecy ymíñañ ajcxy:

—Hue' ñich ajt iixmanñiyim.

²⁷ Chi Jesús mic'amy ymígapxy ajcxy etz nimay:

—Huinmic jotmic naybidaacigixy, ñich yí'. Ca' mdzigñiygixy.

²⁸ Chi oy Pedro Jesús ymígapxyii, nimaayi:

—Huindzin, pen janch miichity, ane'mgich co huen ñich miich ninicxip adüyöyip mejyhuingíxy.

²⁹ Chi Jesús Pedro nimay:

—Min.

Huin'it Pedro ymíñajcy ma je barco etz ñicx ma Jesús adüyöyip mejyhuingíxy. ³⁰ Per co Pedro jihui'ñybicy jadu'n nej anajty ooy mic yjanchpojoy, chi ooy chigiy, chi oy oga'n ytigñyñi quimbi, chi yaaxqueecy, ymíñañ:

—Huindzin, ñich yajtzóocigich!

³¹ Huin'it Jesús oy yci' mímajtzi, chi nimay:

—Miich, janch hueeni mmibijcin. ¿Nej co ca' yajxon xymibicyich?

³² Co Pedro etz Jesús ytigñy barcojoty, huin'it je mic poj ñajxy. ³³ Huin'it je' ajcxy jilby barcojoty ycojxtinay'ihuiydaay ma Jesús yhuinduu. Chi ymíñañ ajcxy:

—Janch tiy'ajt co miich Dios xy'ung'adyii.

Jesús yajtzoctay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuñy co Jesús ti yjaty ma yí' ajcxy naaxjot, chi ajcxy tiy'ajt quejxy ma tüg'óciy cajp etz rancho huinduy agonbi co Jesús yjimity. Chi je mayjäy miid miñ tüg'óciy je pa'mjäy ma Jesús. ³⁶ Chi ajcxy cohuanñy Jesús, pen jeb je pa'mjäy ñidoñyii je yhuit. E tüg'óciy je huídijaty ñidonip je' yhuit, je' ajcxy choctay y'agidactay.

15

Huidi jäy yaj'ahuimbijty janch jibic

¹ Chi ymiiñ ma Jesús nijëjity fariseo jäy ajcxy, je huindzindijc huídibi tzachpadumb judío ycostumbre. Nañ jadu'n miñ nijëjity escribas, je huindzindijc huídibi ajcxy nijaydutp anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yí' ajcxy ycaaygixy y'uuccixy, e ca' jayijp ycibujcixy, ca' ixpujcixy ixjëtzcixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'mgostumbre ma yjapadyii mguydungixy ixypy Dios ycötujcin. ⁴ Com Dios ti y'ane'my ma ycötujcin: “Yajmij'at mdaj mdeedy, e pinjaty jibic nigapxy ni'ojñyb ytaj yteedy, ögipy yí’.” ⁵ Per miich ajcxy minamb co tüg je yëydijc jëbi nímäy ytaj yteedy: “Ca' ñich miich ajcxy nbubedañ, com ti n'ahuanñyich ma Dios tüg'óciy tijaty nmíidich.”

⁶ Chi huen ytimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'mgostumbre. ⁷ Miich ajcxy naybidaacip jadu'n nej jihuñy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhui'my co Dios jadu'n ymíñañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyot huinijot.

⁹ Naadigi' co ajcxy xyhuin'ñiygixyich xyhuinyáaxcixyich. Mnayyaj'ixpícgixy ayuc tiy'ajt huídibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, ymíñ:

—Amído'o'ijtcixy ñch n'ayuc etz mhuinjihuïygiñip. ¹¹ Ca' ji ni ti jñcxy huidi jäy ypidacpy ma y'ahuac ñcxy yajpocycäyí. Yí' janchtiy je jibic ayuc huidibi pidzim ma jäy ajcxy y'ahuac, yí' ajcxy yajpocycähuñb.

¹² Chi ymíñ ma Jesús je' ydiscípulos ajcxy, chi ajcxy ñimaayí:

—¿Nej miich mnejhuïyb co je fariseos ajcxy ñijotma'tpy co ajcxy midoy je ayuc jadu'n nej miich míñ?

¹³ Chi Jesús y'adzooy, ymíñ:

—Huen tim huidibi ane'mín huidibi ca' Dios ti pidägy, Dios yajtigoyam, tim jadu'n nej jäy ajcxy huijxigy ujtz huidibi ca' y'oy'ujtziy. ¹⁴ Ixmajtcix yí fariseos etz escribas ajcxy. Ca' ajcxy huijihuïy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huijtzhuidity jadüg huintzpi, chi nimetz ñcxy yjutcögägy.

¹⁵ Huin'it Pedro ñimay Jesús:

—Yajhuinjihuïyg ñch ajcxy jada jihuimbit ayuc.

¹⁶ Chi Jesús ymíñ:

—¿Nej miich ajcxy nañ jadu'n ca' mhuinjihuïy jada jihuimbit ayuc? ¹⁷ ¿Nej ca' miich ajcxy mnejhuïy co tüg'óciy huidibi tigüyb ma miich ajcxy m'ahuac, je' ñcxy ma miich ajcxy mjot etz ypidzimy ma ajcxy mninñc? ¹⁸ Per je jäy huidibi jibic capxp, capxp je' je jibic ayuc huidibi ymíñ ma yjot yhuinma'ñ. Jada jibic ayuc yajpocychimñcp je jäy. ¹⁹ Yí jibicpi huidibi tzomb ma jäy ajcxy yjot yhuinma'ñ, yí' je' jäy'aj'ögü huinma'ñ, je töxyjäy migapxtigoyí huinma'ñ, meedzi huinma'ñ, je indägi huinma'ñ, je piitz capx huinma'ñ. ²⁰ Yíjadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujciy jayíjp, ca' je' ypcycäy ajcxy ma Dios.

Tüg töxyjäy huidibi ca' judíjy mibjic Jesús

²¹ Chi Jesús jim chooñ, ñcxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíjy. Chi yí' nimíñ Jesús, chi ñimay:

—Huindzin, David y'ap y'oc, pa'ayoogich. ñch nmíñdich tüg ñix huidibi ymíñ ca'oybi etz oy tzaachypí paady.

²³ Per ca' ni nej Jesús y'adzoohi. Huin'it je' ydiscípulos ajcxy miiñ ma Jesús, e ycohuaníy, míñ ajcxy:

—Capxycix míñ jada töxyjäy, com nigo xypayaax xypadinaayim.

²⁴ Chi Jesús ymíñ:

—Dios ñch ti xyquexyich jeda'ajty ma je israelitasjäy huidibi y'alma tigoyam.

²⁵ Chi je töxyjäy ymíñhua'ci ma Jesús, e ycojxtinay'ihuïy ma je yhuinduu, chi ymíñ:

—Huindzin, tun may'ajt pubejtcich.

²⁶ Chi Jesús ymíñ:

—Ca' jadu'n y'oyty co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich míñ, per ixti ycaayb je uc je tzejcaagy y'abu'x huidibi cäb ma yhuindzin mesa.

²⁸ Chi Jesús je töxyjäy ñimay:

—Janch mij mmibjicín. ñch ndunaamybich jadu'n nej miich mdzocy.

Huin'it hori je töxyjäy ñix choocy.

Jesús yajtzögy mayba'mjäy

²⁹ Chi Jesús jim chooñ. Chi ñajxy ma Galilea mejypa'. Chi ypejty ma tüg cögop, jim ñay'ihuiy. ³⁰ E huin'it oy mayjäy müdmüñ pa'mjäy huidibi huintz, uum, cümucy tecymucy, etz huen tim huidibi pa'mjäy. Pidacy ajcxy je pa'mjäy ma Jesús yhuinduu, e yi' yajtzoocay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ixigy, je cümucpy tecymucpyi ti yöyigy. Chi je mayjäy ytigüy ñbaady capxpaady Dios, je Dios huidibi je Israel jäy ymijpidacy.

Jesús yajcay midaax mil jäy

³² Chi Jesús mijhuoy je' ydiscípulos ajcxy, nimay:

—Ooy nba'ayooyich jadayaab jäy ajcxy. Com cujc midugüig xü ijtcixy ya müd ñich etz ca' ajcxy müdity ti ycaayipy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

³³ Chi je' ydiscípulos ajcxy minañ:

—¿Per ma n'ocpatim ti jada jäy ajcxy ycaayipy yjicxipy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jüby tzajcaagy miich ajcxy mjacmüdity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen ñay'ihuiydaaygixy naaxcixy. ³⁶ Chi Jesús conigy je huixtujcpi tzajcaagy etz je hueenip acx, e yajnajx Dioscojuyip ma Dios. Chi tujc-hua'cx etz moy je' ydiscípulos ajcxy. E yi' ajcxy yajhua'cx je jicxy picy ma je mayjäy. ³⁷ Chi je mayjäy nidüg'óciy ycaay cüxi. Jesús ydiscípulos ajcxy yajpidigy huixtujc cach cayduc uuctuc tübi anajty yconaxy. ³⁸ E je huidibi ajcxy cay hue' anajty naybaatigixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxycixy müd je mayjäy huen ajcxy nícxcixyñi ma ytijc. Chi Jesús ytigüy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijxpejt mijhuinma'ñybi

¹ Chi je fariseos etz saduceos y'oy ajcxy ixxy Jesús. Yi' ajcxy ijxta'n octunaangixy müd Jesús, paady ajcxy pijctzoy co Jesús huen yaj'ixyüi ajcxy tüg ijxpejt huidibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu yi tzajp tzaptz, chi miich ajcxy minañ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy minañ co ca' y'oyity yi tiempo. Miich ajcxy ooy mnaybidägyi nejhuiy ooy m'ixpicyity ma Dios ytiy'ajt, e ca' yjanchity. Miich ajcxy jëbi yi tzajp myajcapxy, per ca' mnejhuiygixy nej yhuimbizimy yi mijhuinma'ñ ijxpejt huidibi Dios ytumyb ma jadachambi xü tiempo.

⁴ Yi jäy ajcxy huidibi cham tzinaayb, ooy yjibicjäyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com müd miich ajcxy jaybetyity je mijhuinma'ñ ijxpejt huidibi Dios ytuun müd Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijin

⁵ Co Jesús etz ydiscípulos ajcxy yja'ty ma jadüg nñiba', chi je' ajcxy yjäy digoy je tzajcaagy.

⁶ Chi Jesús yminañ:

—Naygüend'ajtigix müd yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimäayigixy miñ xyipy:

—Paady jadu'n yminañ, je' co ti ñich ajt je tzajcaagy njäy digooym.

⁸ Jesús nejhuíy nej ajcxy nayñimáayigixy miñ xyípy, chi nimay ajcxy:

—¿Na'amy co miich ajcxy mīnaangixy co ca' ajcxy tzajcaagy mīdity? Janch hueeni miich ajcxy mmibijcin. ⁹ ¿Nej ca'ni miich ajcxy mhuinjihuíy? ¿Nej ca' mjäymeçhyii co ñich migoox tzajcaagy nyajhuäcxy etz ni migoox mil je yēdyictijc anajty huidibi ajcxy cay? ¿E ni mga'ajihuíyii ajcxy naag cach cayduc uuctuc ti myajpidigy? ¹⁰ ¿E ni mga'ajihuíyii ajcxy co huixtujc tzajcaagy nyajhuäcxyich ma nimidaax mil yēdyijc ajcxy huidibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhuinjihuíy, co ca' ñich yam nigapxy yi tzajcaagy huidibi miich ajcxy ti mjäydigoy, co ti nyajnimáayigixy je levadura huidibi je fariseos etz saduceos ajcxy ymīd?

¹² Huin'it Jesús ydiscípulos ajcxy huinjihuíy co Jesús ca' anajty je' ti yajnimáyii ajcxy co huen naygüend'ájtigixy mīd tzajcaagy levadura. Hue' janchtiy Jesús yajnimay ajcxy co huen naygüend'ájtigixy mīd je fariseos etz saduceos ajcxy y'ixpijcin.

Pedro nidiy'aty co Jesús yi' je' je Cristo

¹³ Co Jesús yja'ty ma Cesarea Filipo naaxjot, chi Jesús y'amidooy je' ydiscípulos ajcxy:

—¿Nej jäy ajcxy ymīna'ñ, pīnic ñich?

¹⁴ Chi ajcxy ymīna'ñ:

—Nijējity jäy ymīna'ñ co miich je' Juan je Bautista. Nijējity jäy ymīna'ñ co miich je' Elías, e nijējity ymīna'ñ co miich je' Jeremías o jadüg profeta (huidibi tzinay jecy'ajty).

¹⁵ Chi Jesús ymīnañ:

—¿E miich ajcxy nej mīnaangixy, pīn ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pīn xycayajnimäy jada tiy'ajt, tūgpajc je Dios Teedy nDeedyich huidibi jūby tzajpjoty, yi' ti xyajnejhuíy jada tiy'ajt. ¹⁸ ñich miich nimaayb co miich mxī'adūyb Pedro, e hue' yhuimbīdzīmy tzaa (hue' je', je tzaa tija'ñ je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptijc (hue' yhuimbīdzīmy, ma ñich n'ane'mīn chondäga'ñ), e ni ca' oybi ymic'ajt ycamīmadägiy. ¹⁹ ñich miich nmöhuamyb je cōtujcin jadu'n nipaady nej tūg ahuaast huidibi mīd myaj'ahuädziy Dios y'ayuc ytiy'ajt. Tūg'óciy huidibi miich mgapx'adujcpi ya naaxhuiñ, Dios nañ jadu'n capx'adugipy jūby tzajpjoty, e huidibi miich ya naaxhuiñ ca' capx'aducy, Dios nañ ca' capx'adugipy jūby tzajpjoty.

²⁰ Huin'it Jesús nimay je' ydiscípulos ajcxy, co ca' huaad ni pīn nīmāy co yi' je' je Cristo.

Jesús nigapxy je' y'öcin

²¹ Ixti huin'itni Jesús ytiğiyy yajnimay je' ydiscípulos ajcxy co nicxamb jīm Jerusalén etz co jīm ooy y'ayoohua'ñ. Jīm Jerusalén je judío mījjäydyj, je teedytīj huidibi tungmīdipi, etz yi escribas ajcxy ooy chaachytuna'ñyii etz yaj'öga'ñyii. Per codugīg xī huin'it yjugypīga'ñ jadüg'oc. ²² Huin'it Pedro mīdnicxy Jesús ahuingujc, e oy oyy, ymīnañ:

—Huīndzīn, ca' Dios tzocy nicx jadu'n mjaty. Mīd miich ca' jēbi jadu'n mjadipy.

²³ Per Jesús yhuäc-huimbijty, chi nimay Pedro:

—Huīnhuäctuatcīch Pedro, je mujcu' miich jadu'n xyajcapxp. Ca' nigoo xy'adziyich. Ca' miich mhuīnma'ñybidägy nej Dios tzocy. Yi' janchtiy miich mhuīnma'ñ'ajtpy nej jäy ajcxy tzocy.

²⁴ Huin'it Jesús je' ydiscípulos ajcxy nīmay:

—Pen je pīnjaty xypamīna'ñich, huen yci'mdzojcin ixmajtztäy etz huen yhuīnma'ñypidägy co ayoohipy mīd ñich ycīxpi, ixti mabaad y'ögy. ²⁵ Huen pīnjäy huidibi ca' ayoohua'ñ mīd ñich ycīxpi, hue' je' yajtigoyamy yi' yjugy'ajtin. Per pīnjaty xypanīcxpīch oy nej ytimyjadipy, hue' je' ypadamyb yjugy'ajtin huidibi ca' ycīxipy ytiigoyipy nīmīna. ²⁶ ¿Ti jäygīdaacin yi' co tūg jäy y'ocnayyapadūyb yi' meēñ etz mic'ajtin

huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'ñyi jëbi jäy y'alma yjugy'ajtinoccojuyi? Nigi choohuity jäy ajcxy y'alma yjugy'ajtin, ca'ydi jac ni ti. ²⁷ Hich, je jäy huidibi tsoon tzajpjoty, miinaambich jadüg'oc ya naaxhuiñ miid je ángeles ajcxy etz miid nDeedyich y'oy'ajtin. Huin'it micuejtähua'ñ tüg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity huidibi ca' y'öga'ñ ixti cooni xy'ixipyich jadüg'oc co ich anajty nmiin ane'mbi.

17

Co Jesús ñinix yajtigach

¹ Codudujc xii huin'it Jesús miidnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ² E jim copcixy Jesús ñinix ñaygojtigajtzi ma Pedro, Jacobo etz Juan ajcxy yhuinduu. Jesús yhuiñyijp ytigüy adicxp nej je xii ytiicxin. E Jesús yhuitt y'ahuimbijty janch poob jadu'n nej tüg tiicxin. ³ E timetiini oy ixcixy Moisés etz Elías ycapxy miydägy anajty miid Jesús. ⁴ Chi Pedro nimay Jesús:

—Huindzin, oy y'oyity co ich ajt ya. Pen miich mdzojcpy jëbi ich ajcxy nyaj'oyiy tugiig tijcquemy. Tüg miich mje', tüg Moisés yje', etz tüg Elías yje'.

⁵ Pedro capxp anajty, tim huin'ity tüg joc yajnidigoyday je' ajcxy huidibi ooy adicxp anajty. E ma je joc yajmidoy tüg ayuc huidibi yminañ:

—Jadayaabi yëydijc ich je' n'ung'ajtpy huidibi ooy ndzocy njihuüyich etz yi' ich miid njotcujcity. Amidoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc choon jocjoty, chi ajcxy ooy chigüy etz ñayñitziitcidaaci ajcxy.

⁷ Huin'it ajcxy Jesús ñimiini etz nidoñ ajcxy, e yminañ:

—Pidicx, ca' mdzigüygixy.

⁸ E co ajcxy y'ixigy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimähuipy jadu'n nej ti m'ixcixy cham, ixti cooni ich anajty ti njugypicyich jadüg'oc ma anajty ti n'ögich.

¹⁰ Huin'it je' ydiscípulos ajcxy yajtiy Jesús:

—¿Nej co yi escribas, yi' ajcxy huidibi njaydutp etz yajniñuejp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiina'ñ etz yaj'oyiydähuamy tüg'óciy miid Dios ycixpi. ¹² Per ich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E nañ jadu'n ich, je jäy huidibi tsoon tzajpjoty ayooohuaambich ma yi' ajcxy.

¹³ Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmüdp

¹⁴ Co Jesús, Pedro, Jacobo etz Juan yjaty jim ma je mayjäy ajcxy, chi ñimiini tüg jäy. Chi je jäy ycoxtinay'ihuüy ma Jesús yhuinduu, chi yminañ:

¹⁵ —Huindzin, ich nmang pa'ayoohuic. Je' co ymiid mo'tpa'm etz oy yaj'iyoooyii. Canaag'oc ti ycäy jijnjoty nñjoty. ¹⁶ Paady ich ti nmüdmiiñich ma miich mdiscípulos ajcxy, per ca' ajcxy ymadacy yajtzögy.

¹⁷ Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich ajcxy mmibigañ Dios, ca' miich ajcxy mgapxymidoohua'ñ Dios. ¿Naag xii naag tiempo ich miich ajcxy njacmimexctugipy? Yajmiingix yi' yeeg'anäg.

¹⁸ Co je yeeg'anäg yajmüdjat'y ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscípulos ajcxy müdmüdac Jesús ahuingujc, chi ajcxy yajtiy ma Jesús:

—¿Nej co ich ajcxy ca' ti nmadägy nicx nyajpidziimgixyich je ca'oybi ma je yeeg'anäg?

²⁰ Chi Jesús yminañ:

—Je' co miich ajcxy hueeni mmibijcin. Janch tiy'ajt jadu'n nej nnimaaygixy, co ixipy miich ajcxy xy'ocmibicyich, ooy ixipy jedajty jadu'n nej je jac mutzpi ujtz tim, huin'it jebi ixipy mnimäy jadayaabi cop co huen jihuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy müdity mibijcin. ²¹ Jadayaabi picy ca'oybi pidzimipy co Dios nmibijctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

²²⁻²³ Co anajty ajcxy yhuidity tügmucy jim ma Galilea y'it, chi Jesús nimay je' ydiscípulos ajcxy:

—Ich, je jäy huidibi tsoon tzajpjoty, yajciyegipyich ma jäy. E yi' ajcxy xyaj'ögibich etz codugiig xi njugypigipyich jadüg'oc. Co je' ydiscípulos ajcxy jadu'n müdooy, chi ajcxy ooy yjotmaybaty.

Je cogüejtin ma je tzajptijc

²⁴ Co Jesús yja'ty müd je' ydiscípulos ajcxy jim ma je Capernaum cajp, chi huidi anajty ajcxy meen yajmujcp müd tzajptijc ycixpi, oy ajcxy ijxcixy je Pedro, chi ajcxy y'amüdooy:

—¿Nej miich mhuindzin ycuejcpy meen müd tzajptijc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytigiy tigoty, chi Jesús jayijp ymigapxy, ñimay:

—Simón, ¿nej mmina'ñ? ¿Pin je rey ajcxy yajcuejcpy? ¿Yi' yjäy o huingjäy?

²⁶ Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. ²⁷ Per ca' ndzocyich co je cogüejtpi nyajcapxmayiyim, nicx miich ma yi mij laguun e cohuidzi' jiihy mxu'ñ, e je acx huidibi anajty jayijp huomb, je' myajpidzimipy, e ma y'ahuac jiihy mbaadipy tüg meen, yajpidzim je meen e nicx cuet müd ich ycixpi etz müd miich ycixpi.

18

¿Pin je' jac nigij mijip?

¹ Je huin'it hora je' ydiscípulos ajcxy ymijhuäctay Jesús etz yajtiy:

—¿Pinjäy je'jac nig ymüd je mij'ajtin ma Dios y'ane'my jiihy tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús yminañ:

—Janch tiy'ajt ich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ müd, pues ca' mdigihuipy ma Dios Teedy y'ane'my jiihy tzajpjoty. ⁴ Paady, pinjaty müd yhuinma'ñ yung nax jadu'n nej jadayaabi pi'c'anäg müd yhuinma'ñ yung nax, je' je' je huidiib jac nigij mij'ajtin ymüd jiihy ma Dios y'ane'my. ⁵ Hueñypinity huidibi müd ich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuüy ti xycöbicyich ti xychocyich.

Je huidibi ooy ycojotmayity co nbocähüim

⁶ Hueñypinity huidibi jibic-huinma'n ymibidzimy, e yajpocycäy yí jadu'mbi pi'ctijc huidibi ajcxy xymijnicxpejtpich, jac'oy ixypy co yí jadu'mbi jäy ytimyñayyöcxodziyíi tüg paandzaa etz ñayñajtzjibibihiipy meyyjoty. ⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' tigoy y'idipy tijaty huidi yajtundigoy je jäy ajcxy. Per mij ayo'n pada'n miid yí Dios pinjaty cojp tundigooyi. ⁸ Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigi oy co mdigihuipy ciduc tecytuc jiiby tzajpjoty etz ca'ydí co mdigihuipy miid metz mgi' etz metz mdecy mijjinjoty huidibi nimina ycapich. ⁹ E pen yí mhuiin tug xyajpocycähuamb, tim yajpidzim etz ixcätz jiguem. Com jac'oy mdigihuipy miid tüg mhuiin ma jugy'ajtin huinixibi, ca'ydí co mdigihuipy miid metz mhuiin ma yí jin huidibi camina xii ycapich.

Je y'ijxpejt, je cöbixy huidibi tigooy

¹⁰ Ca' m'ixtijcixy ni tüg pi'c'anäg huidibi xymibijcpich. Yí ajcxy je' y'áñeles tim ijtib jiiby tzajpjoty ma Dios Teedy, ich nDeedy yhuinduu. ¹¹ Ich je jäy huidibi tzoön tzajpjoty, ti nmiiñich ya naaxhuiñ, je' co nyajnitzöga'ñich je jäy ajcxy y'alma huidibi tigoyam. ¹² ¿Nej miich ajcxy mina'n? Pen tüg jäy ymiid migo'px cöbixy, etz pen yöy digooyb nidügti cöbixy, ¿nej ca' jébi ixmach je nimida'px majmocx midaax cöbixy etz nicxy ixtäy je jadügpí huidibi yöy digooy? ¹³ E pen ypatpy je tügpí huidibi yöy digooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmocx midaax huidibi ca' anajty ti yöytigooygixy. ¹⁴ Tim jadu'n nipaady miid Dios Teedy jiiby tzajpjoty, ca' tzocy co ni tüg jäy y'alma tigoyipy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, miidmiydac ahuingujc e yajhuinjihui' ma ti ytundigooy, pen xy'ayuchuinjihuiyb ti anajty mminaymigüpgigyíi je mmigüg. ¹⁶ Pen ca' xy'ayuc-huinjihuiy, chi huominipy tüg o metz mmigüg huidibi jébi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihua'n, miidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymidity. ¹⁸ Janch tiy'ajt ich miich ajcxy nimäy, tüg'óciy huidibi miich ajcxy mgapx'adujcipy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jiiby tzajpjoty. ¹⁹ E nañ jadu'n ich miich ajcxy nimäy, pen ya naaxhuiñ miich ajcxy nimetz mnaygápxigixy co tijaty mmibijctzohuaangixy ma Dios, Dios, ich nDeedy huidibi jiiby tzajpjoty, xymöhuipy huidibi ajcxy mbijctzooyb. ²⁰ Com ma miich ajcxy nimetz o nidugüg naymújcigixy, jim ich n'ity cujc'amy ma miich ajcxy.

²¹ Chi Pedro y'amidooy Jesús yminañ:

—Huindzin, ¿naag'oc huaad nhuinmeecxyich yí ajcxy huidibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy midaax migo'px jamida'px majmocx midaax'oc.

Je tumbi y'ijxpejt huidibi ca'p ymigüg nhuinmeecxy

²³ Dios y'ane'min jiiby tzajpjoty jadu'n nipaady nej tüg rey huidibi huijtz'oyiib miid je ytumbidijc jajadu'ñi ajcxy yjacminucxy'adyi. ²⁴ Je rey ytimyhuijtz'oyiychondacyñi anajty cuentas, co oy yjädy tüg ytumbi huidibi anajty minuucxy'ajtip canaag millón. ²⁵ Com je' ytumbi ca' anajty miidity ti miid migüediib je' yhuindzin. Huin'it je huindzin ane'my co huen je' ytumbi yajtoocnax quipxyi miid y'ungdöxyijc etz tüg'óciy tijaty ymiid, jaydeb ñuucxy y'adujctähuipy. ²⁶ Huin'it ytumbi ycoxtinay'ihuüy ma yhuindzin yhuinduu etz nimay: “Huindzin, pa'ayoogich, etz ich miich nmigüejtähuiipy.” ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je'

ypidzimy pujxtigoty, chi yminaybatí tüg ymigüg huidibi anajty mïd quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymigüg huidibi mïd ytuñ, chi nimay: "Cuet huidibi mnuucx'ajtpy ma ñich." ²⁹ Huin'it ymigüg ycojxtinay'ihuñy ma je' yhuinduu. Chi minuucxtaacy nimay: "Pa'ayoogich. ñich miich nmigüejtähuipy." ³⁰ Chi je jadügpi ca' mecxtujcin yajtuñ. Chi oy ymigüg pidägy pujxtigoty, ixti cooni anajty micuedyïi. ³¹ Co je jacjadyïi ymidumbidijc oy ixy jadu'n nej ti yajtuñ je' ymigüg, chi ooy ajcxy jihuiy. Chi ajcxy nicx ma je yhuindzin etz yajnimayday tüg'óciy nejyaty anajty ti ijxcixy. ³² Huin'it je' ajcxy yhuindzin oy yajhuoyii je huidibi minuucx'ajtip canaag millón. Chi nimay: "Miich ooy mdzachjibicjáyty. Ti ñich miich nhuinmeecxi tüg'óciy je mnuucxy, mïd co miich pa'ayoohuin mbijctzooy ma ñich. ³³ E miich nañ jadu'n ixyipy ti mba'ayoy je migüg huidibi mïd mmiduñ, huidibi xyminuucxy'ajtp, jadu'n nej ñich miich ti nba'ayoooy." ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejttäy tüg'óciy huidibi ñuucxy'ajtpy. ³⁵ Chi Jesús ycapxycijxni, minañ:

—Tim jadu'n nej jada rey ti tuñ mïd je ytumbi, nañ tim jadu'n Dios tunipy mïd miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdügjot.

19

Jesús yaj'ixpicy mïd co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädý ma Judea it jim Jordán mij niñ nñaxy. ² Chi ooy mayjäy ypanicxi, e jim yajtzoocy huidijaty anajty yuu mïd pa'm mïd.

³ Huin'it nijëjty je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcin co jëbi tüg yëydijc ixmadzip ytöxyijc mïd tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios oga ñ yajcojy tüg'óciy tijaty huidibi ji'ajtp co "Dios yajcojy tüg yëydijc etz tüg töxyjäy"? ⁵ Nañ jadu'n Dios yminañ: "Je yëydijc y'ixmadzip ytaj yteedy etz pudigihuipy je' ytöxyijc. E je yëydijc etz ytöxyijc tú'ciy idaangixy." ⁶ Paady ca' ñimetziy ajcxy, com je yëydijc etz ytöxyijc tügmucy y'idaangixy. Com Dios ti huijtmucy je yëydijc mïd je töxyjäy, paady ca' huaadity co jäy ajcxy huijtzhuäcxyp tiibi Dios huijtmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cötujcin ti yejcy jecy'ajty co tüg yëydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸ Chi Jesús yminañ:

—Moisés jada cötujcin ti xymooygixy co jëbi m'ixmajtcixy mdöxyijc mïd co miich ajcxy mdzachcöjuuñty, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej ñich miich ajcxy nimaaygixy co je yëydijc huidibi yajjayhuäcxp mïd je ytöxyjäy, e je ytöxyjäy ca' anajty ti ytundigooyb mïd huingbi yëydijc, hue' je' yëydijc ytundigooy co ixmach ytöxyijc etz ypijctigach mïd huingbi. Nañ tim jadu'n pen tüg yëydijc ypiy mïd tüg töxyjäy huidibi ñäy ti y'ixmachyïi, hue' tundigooyb anajty je yëydijc.

¹⁰ Co Jesús ydiscípulos ajcxy mïdooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbijcim.

¹¹ Chi Jesús yminañ:

—Ca' tüg'óciy je jäy huinjihuñy jadayaabi tiy'ajt. Jëyi ajcxy huinjihuñy pñ ajcxy Dios pidaaci co huinjihuñy. ¹² Ji canaagnax je ayuc je huinma'ñ nej ca' yjëbity ypijpy

je yëdyjc. Naagity pi'ctijc yma'xung'aty e ca' yca'pxity ñinïcxy, paady ca' pïcy ajcxy. E nijëjity je yëdyjc ca' huaad ypicy, miid jëgixpi co anajty je' ti ymijaapigiyi. E nijëjity yëdyjc hui'my jaybicy miid jëgixp co ajcxy ytuñ ma Dios ytung, je Dios huidibi ane'myb tzajpjoty. Pinjaty cöbigamy ich n'ayuc huen cöbicy.

Jesús conucxy maybi'ctijc

¹³ Chi naagity je jäy miidnïcxy y'ung y'anäg ma Jesús jaydëb yajcñixajipy etz Dios mibijctzoy miid yi' ajcxy ycixpi. Chi Jesús ydiscípulos ajcxy ogy je jäy ajcxy huidibi anajty miid miimb je y'ung y'anäg, nimaaygixy co ca' jadu'n y'oyity. ¹⁴ Per Jesús yminañ:

—Huen miid miñ ajcxy pi'c'anäg ma ich, ca' mijjpcogapxiygixy. Com pinjaty ymibijcp ich ngapxy n'ayuc, jadu'n nej jadyaabi pi'c'anäg ajcxy ymibicy, je' ajcxy tighuam ma Dios y'ane'my jibby tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tüg yeeg'anägnip comeeñybi miidmïydägy Jesús

¹⁶ Chi tüg yëdyjc oy icy Jesús. Chi y'amidooy:

—Huindzin, ¿ti jada' co oy ich ndunipyich jaydëb nbaadibich jugy'ajtin huidibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin ich? Dios tügpajc oyip, ca' jac pin. Pen miich mdzojcpy co mbada'ñ jugy'ajtin huidibi ca' ycixipy ytigoyipy nimina mguydunipy je Dios ycötujcin huidibi Moisés ycojaay jecy'ajty.

¹⁸ Chi je yeeg'anäg yajtihiimbijty:

—¿Huidibi cötujcin miich mdijp?

Chi Jesús yminañ:

—Ca' migüg myaj'ögipy. Ca' migüg ytöxyjc migapxtigooyipy. Ca' mmeedzip. Ca' mmigüg mhuin'ñip. ¹⁹ Yajmij'at mdaj mdeedy. Mdzogipy mjihiuihuip miich mmigügtijc, tim jadu'n nej miich ci'm mnaychogyi.

²⁰ Chi je yeeg'anäg Jesús nimaayi:

—Ti nguydündäyich jadyaabi cötujcin ajcxy maabi ich nbi'c'atyich. ¿Ti jada nja-cyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nïcx tooctigoyda' huidijaty miich miid, etz mo' je meeñ je jäy ajcxy huidijaty ayoob. Co jadu'n mdunipy, chi mbaadipy oy'ajtin jibby tzajpjoty. Co jadu'n mdooctähuipy tijaty miich miid, chi miinip jadüg'oc ma ich nyajpaadyich, e pajamgich.

²² Co je yeeg'anäg jadu'n midooy, chi ñicxni taj may com ooy anajty chachcomeeñity.

²³ Huin'it Jesús nimay je' ydiscípulos ajcxy:

—Janch tiy'ajt jadu'n nej nimaaygixy co ooy ymijhuinma'ñity co tüg comeeñyjäy ytihiuipy ma Dios y'ane'my jibby tzajpjoty. ²⁴ Jadüg'oc nmïna'ñich co ooy chipity co tüg comeeñyjäy tighuipy ma Dios y'ane'my, ñigi ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscípulos ajcxy jadu'n midoy, chi ajcxy ooy jihuiy huinmay. Chi ajcxy ñay'amidoohui miñ xyipy:

—¿Pin jëbi paady je' y'alma nïdzoocin?

²⁶ Chi Jesús ajcxy huindixpejty etz nimay:

—Je huidibi jäy ajcxy chipijhuib, miid Dios ca' ni ti chipity.

²⁷ Huin'it Pedro yminañ:

—Huindzin, ich ajcxy ti n'ixmajtztäyich tüg'óciy huidijaty anajty ich ajcxy nmïd etz nbanïcx ich ajcxy miich. ¿E ti jada' ich ajcxy nbaadaamybich?

²⁸ Chi Jesús y'adzooy:

—Janch tiy'ajt nmina'ñich co anajty je xii je tiempo paady mina Dios yajtigajztähuiipy je tzajp etz naaxhuiñybi, co anajty ñich, je jäy huidibi tzoon tzajpjoty, n'ityich ma ngötujctacich oybi jiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. ²⁹ E tüg'óciy jäy ajcxy huidibi ti ixmajtztäy yjin ytijc, y'uch ymígüg, y'ung ytöxyijc, y'ung y'anäg, ytaj yteedy, o ycam ytu' miiid ñich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰ Mayjäy ajcxy huidibi cham ymiiid mij'ajtin cötujcin, tzajpjoty ca' ajcxy miiid'ada'ñ mij'ajtin cötujcin. E mayjäy huidibi cham ca' miiidity ajcxy mij'ajtin cötujcin, tzajpjoty ymiiid'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús yminañ:

—Je Dios y'ane'min jiiby tzajpjoty jadu'n nipaady nej tüg cogambi huidibi ooy mij cam miiidity. Chi je cogam jopyñi choñ ma oy nicxy ixtäy tumbidijc ajcxy huidibi yajpidigipy yi uva cosecha. ² Chi ycapxytuñ miiid nidüg nidüg ytumbi co mujuya'ñ tüg denario meen tüg xiiibi. Chi quejxy nidüg nidüg ytumbi ma je uva cam. ³ Chi petyxii je cogam ñicxy jadüg'oc tumbi ixtaayb. Chi paty cajp cujc nijējity tumbi huidibi ca' ti tung miiidity. ⁴ Chi je cogam je tumbi ajcxy nimay: “Nicx miich ajcxy tuñ ma ñich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxii tumbi ixtaayb. Nañ jadu'n nicxy jadüg'oc minacyxii. ⁶ Nañ tim jadu'n tzuu jadüg'oc je cogam ñicxy tumbi ixtaayb, chi paty nijējity cajpcujc huidibi ca' ti tung miiidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ñich ajcxy pin ti xycapxytuñ.” Chi je cogam ajcxy nimay: “Nicx miich ajcxy tun ma ñich nnaaxjot. Cham iya nmujuyipy jadu'n nej ypaadyii.” ⁸ Co oy ycodziyñi, chi je huindzin nimay je huidibi nigop'ajtp je tung: “Nicx mijhuoodäy je tumbidijc etz mujuyipy. Mujuy jayijp huidibi ti ymiiñ axam tumbi etz jim nicxy myajcogixiy ma huidibi anajty ti miiñ jayijp tumbi.” ⁹ Chi ajcxy jayijp yajmujuy je tumbi ajcxy huidibi anajty ti ytiğiyy tumbi axam. Chi yajmujuy ajcxy jadu'n nej anajty jäy ñaymujuyii je tüg xiiibi. ¹⁰ Co miiñ je tumbi ajcxy je huidibi ajcxy jayijp tigiiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meen nidüg'óciy je tumbidijc. ¹¹ E co ajcxy quipxyjaty yajmujuy, chi ajcxy ytiğiyy jotma'tpi. ¹² Chi ajcxy nimay je cam huindzin: “¿Na'amy co quipxyjaty ñich ajcxy ti xymujuyich miiid je huidibi ti miiñ axam tumbi? Yi' ajcxy tüg jaxigy ti ytuñ, e ñich ajcxy tüg xii je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ñich nmígüg, ca' ñich jibic ti nduñich miiid miich. ¿Nej ca' ñich ajt ngapxytuunim co jadu'n nmujuya'ñ tüg denario meeni? ¹⁴ Con yi mmeeñ, e nicxni. Jadu'n ndzocyich co quipxyjaty nmujuya'ñich miich miiid huidibi ti ymiiñ axam ma je tung. ¹⁵ ¿Nej ca' huaad ñich nduñich miiid ñich nmeeñ nej ndzócyichi? ¿O co xyajca'oy'ixyich, co ñich ooy n'oyjäyity?” ¹⁶ E huidibi ajcxy jaccogixiiyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixiihuamb. May ooy yjayjhuoomiñ e hueeni huidi huin'ijxipy.

Jesús capxyidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi miiid nicxy ahuingujc je nimajmetzpi ydiscípulos. Chi ajcxy nimay:

¹⁸ —Jadu'n nej miich ajcxy m'ijxy mnejhuñy cham ñich ajt nba'ttigiiyim jim Jerusalén. Jim Jerusalén ñich, je jäy huidibi tzoon tzajpjoty, xyajcñyegaamich je teedy miiitungmiiidpi etz escribas ajcxy. Nyajtiyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy

xyçiyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugüg xii.

Huidibi Jacobo etz Juan ytaj ypijctzou

²⁰ Chi je Zebedeo ytöxyijc nimiiñ Jesús mïd metz je ymang; Jacobo etz Juan. Huin'it je ungday huingojxtinay'ihuüy Jesús, pijctzoy may'ajt. ²¹ Chi yajtüy Jesús:

—¿Ti mdzojcpy?

Chi je ungday y'adzooy:

—Tun may'ajt möhuipy ñich metzpi yi nmang yi jacmijtung ma miich m'ane'min, jaydëb ñähuipy ma miich mmijc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhuinjihuüy ti ajcxy mbijctzooyb. ¿Nej mmínaxa'ñ myajnaxa'ñ miich ajcxy je tzaachypi huidibi ñich nmínaxamy nyajnaxamyich? Jadu'n nej jihuüy m'üga'ñ ajcxy je ta'm nñ huidibi ñich n'ügamy e mbaada'ñ je nñbejtin huidibi ñich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch tiy'ajt nej miich ajcxy mina'ñ co mmínáxcixipy myajnáxcixipy je tzaachypi huidibi nnaxa'ñich. Per ca' ñich cötujcin nmïdidyich co ñich miich ajcxy nbidägiy mijtungmïd, co myajpaadip tüg ma ñich nmijc a'oy'amy e jadüg anajty'amy. Hue' janchtiy Dios Teedy ymïd ni'ixi' pinjaty ti huin'ixy jaydëb yajnicxip je mijtung ma ñich n'ane'mdac.

²⁴ Co je nimajcpi ydiscípulos ajcxy nejhuüy jadu'n nej Jacobo etz Juan pijctzooy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuüy co yi jäy ajcxy huidibi mijtungmïdpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt mïd ma je maybi naax cajp, mic ajcxy ane'my je jäy ajcxy. ²⁶ Per miich ajcxy ca' mjadu'nity nej je mijtungmïdpi ma je maybi naax cajp. Pinjaty miich ajcxy je mij tung yajnicxip, copicy ñaybidägiyb nej tüg tumbi. ²⁷ Pen ji miich ajcxy nidüg nigohuajc'ada'ñ, copicy ñaybidägiyb nej tüg tumbi. ²⁸ Com ñich nañ jadu'n, je jäy huidibi tzoön tzejpjoty, ti nmiiñich ya naaxhuiñ jaydëbi nbubedipyich yi mayjäy ajcxy. E canan yi' ajcxy xypubedipich. Ngïyegaamyich njugy'ajtin ma yi o'cin mïd je mayjäy ycixpi, jaydëbi ngohua'ñich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzimy jim Jericó, chi ypanicxi ajcxy mayjäy.

³⁰ E jim anajty ñaay nimetz huintzpi tüba'áy. E co ajcxy nejhuüy co jim anajty ñaxy Jesús, chi ajcxy yaaxpi jojcpi:

—Huindzin, David y'ap y'oc, tun may'ajt ñich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi nigi minan'idich:

—Huindzin, David y'ap y'oc, tun may'ajt ñich pa'ayoog.

³² Huin'it Jesús ytinayxijp, e yminañ:

—Ocmín miich ajcxy ya.

Huin'it yajtüy:

—¿Ti mdzojcpy ndunipyich mïd miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nïdoni ma je' yhuiin, e mic'amy je huintzpi ajcxy y'ijxigy. Chi Jesús ajcxy panicxy.

21

Jesús ytigüy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Níxcix ma je cajp huidibi jim'amy. E jim tüg burro ycoxochity müid y'ung. Coguetjtüdi ajcxy je burro e yajmiingix ya ma ich. ³ E pen jim pin nej xyñimäy, nima' co je Huindzin yajtunam, e yajhuimbida'ñ mic'amy.

⁴ Jadayaabi oy jadu'n ytuñyii yjadyii ycixy yca'pxy jadu'n nej je profeta jecyip jaay, co jadu'n yminañ:

⁵ Yajnima' je jäy ajcxy huidibi tzinaayb jim Sión (Jerusalén), oc'ijxcix, chi miiñ ajcxy je mrey, yung nax yjot yhuinma'ñ müidity je mrey, etz burrocixy miiñ. Ma tüg burro mang huidibi ytaj tziy yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro müid ymang. Chi Jesús ydiscípulos ajcxy jibe'ñ je metzpi burro müid ajcxy yjocxhuit, chi Jesús yaj'iñay je burro mang. ⁸ E je mayjäy ooy yajhuinyëbiy ajcxy je tü'aa müid yhuít, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nicxp jayijp, e nañ jadu'n huidibi anajty mimb axam, ooy ajcxy ytigüy huambi jihuiyb, chach mīnaangixy:

—¡Hosana! ¡Gloria a Dios! ¡Ooy ycomayity Dios! Huen capxpaady idipy jada yëdyjc huidibi mimb ma yī nHuindzin Dios yxi etz müid ymic'ajt. ¡Gloria a Dios!

¹⁰ Co Jesús ytigüy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pin yī yijibi jäy?

¹¹ Chi mayjäy y'adzooy:

—Yī' je' je profeta Jesús huidibi tsoon ma Nazaret cajp ma Galilea it.

¹² Huin'it Jesús ytigüy ma Dios ytijc. Chi ixquejxtay tüg'óciy je ajuybi adoocpi huidibi anajty yajpatp jibby. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi iñaybejt. ¹³ Chi jadu'n nimay ajcxy:

—Jaaybety jadu'n ymiiñ ma Dios ñecy: “Ich ndijc je' yī' ma jäy ajcxy Dios mibijctzoy”, per miich ajcxy hue' yī' mhua'ñ meetzpi tijc.

¹⁴ E co anajty jibby tzajptigoty Jesús, chi jibby ñimiini huidijaty anajty huintz, huidijaty anajty cīma'ty tecyma'ty, chi Jesús yajtzoocay. ¹⁵ Per je teedy ajcxy huidibi mijtungmüid etz je escribas ajcxy ooy mijotma'ty Jesús co ajcxy ijxy nejhuüy jadu'n nej Jesús anajty tuñ mijhuinma'ñ. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuiygixy jibby tzajptigoty, ymīnaangixy: “¡Huen cōmay'idipy je rey David y'ap y'oc!”

¹⁶ Chi je teedy etz escribas ajcxy Jesús nimay:

—¿Nej ca' miich mmidooy nej je pi'c'anäg chach mīnaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymina'ñy?:

Ti myaj'ixpicy iyy ma je pi'ctijc ma'xungdijc jaydëbi ajcxy iibaadip capxpaadip Dios.

¹⁷ Chi Jesús ycapxycijxy müid je teedy etz escribas ajcxy etz choon jibby tzajptigoty. Chi ñicxy ma Betania cajp, e jim yajnajxy je tzumbi.

Jesús capxpojcy je higuere ca'p anajty ytīm'aty

¹⁸ E co yxiimiy ytīcxigüy, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higuere quipy. Chi ninicxy. Chi pāt'ijxy, per ca' anajty ni tüg ytīm, jēda'ajty je' y'aay. Chi Jesús nimay je higuere quipy:

—¡Ni ca mīnaa xii mdūm'adīpy!

E mīc mīciyi je higuēri quipy ytiich. ²⁰ E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amīdooy Jesús:

—¿Na'amy co yi higuēri quipy mīc'amy ti ytiich?

²¹ Chi Jesús y'adzooy:

—Janch tiy'ajt jadu'n nej nnīmaaygixy. Pen miich ajcxy mīd je mībijcin, etz ca' ajcxy mmībijcy aametz jotmetz, jēbi mījhuinma'n mdungixy nej iich ti nduñich. E nañ jadu'n jēbi jac mījpi mījhuinma'n mdunipy ajcxy. Jēbi ajcxy tun cop mnīmāy: “Quēg ya, tigi' mejyjoty” e xycapxymīdohuipy ajcxy je tun je cop. ²² E tūg'óciy tijaty miich ajcxy mbijctzooyb huen ytimyitiyity, pen mmībijcp ajcxy, mbaadip ajcxy.

Jesús ycōtūjin

²³ Co Jesús yja'ty Jerusalén, chi ytigūy jadūg'oc ma Dios ytijc. E jiihy anajty yaj'ixpiy je mayjāy, chi ñimiini je teedy mījtungmīdipi etz judío mījjāydijc ajcxy. Chi ajcxy y'amīdoohui:

—¿Ma cōtūjin ti mbaady co jadu'n mduñ tzajtigoty? ¿Pin jada cōtūjin ti xymōy?

²⁴ Chi Jesús y'adzooy:

—Nañ jadu'n iich miich ajcxy nyaj'amīdoohuamy tūg ayuc. Pen m'adzooyb ajcxy jada ayuc, huin'it iich miich ajcxy nyajnimāhuipy ti cōtūjin iich mīd nduñ huidijaty. ²⁵ ¿Pin quejxy je Juan, je Bautista, yajniibejtpi, Dios o jāy ajcxy?

Chi ajcxy ñayñimāyigixy miñ xyipy:

—Co ixyipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmībijcy Juan?” ²⁶ Per nañ jadu'n ca' huaad nmīnaanīm co jāy ajcxy yajnibijcy Juan, com nejhuiyīm co yi mayjāy mībijccixy co je' anajty Dios tūg y'ayucnajtzcaxiybi.

²⁷ E paady ajcxy jadu'n adzooy Jesús:

—Ca' iich ajcxy nejhuiyigixy.

Huin'it Jesús ymīnañ:

—Nañ jadu'n iich ca' nigapxañich pin je' ycōtūjin mīd nduñich huidijaty.

Je metzpi ung iixpejt

²⁸ Chi Jesús ymīnañ:

—¿Nej m'oc'ixy m'ocjaygugi' jadayaabi ixpejt? Tūg je yēydijc ymīd anajty metz je' ymang. Chi nīmay je mījpi: “Nīcx cham m'octuñ ma iich n'uva cam.” ²⁹ Huin'it je' ymang y'adzoohui: “¡Ca' nīcxañich!” Chi jaccōhueñyi je' ymang yhuinmaydigajch, chi ñīcxy tumbi. ³⁰ Chi je ungdeedy oy ixy je ymang mutzpi. Chi nañ jadu'n nīmaay co huen nīcxy tuñ. Chi je' ymang mutzpi y'adzooy: “Oy, cham nīcxibich.” Per ca' ñīcxy. ³¹ ¿Huidi je' nidūgti ycuyduuñ nej anajty yteedy tzocy?

Chi ajcxy ymīnañ:

—Je' ymang mījpi huidibi jayijp nīmay.

Huin'it Jesús nīmay ajcxy:

—Janch tiy'ajt jadu'n nej nīmaaygixy co je huidibi ajcxy yajcogūejtpi etz je tōxyjāy ajcxy huidibi tundigooyb mīd yēydijc, je' ajcxy tīgihuamb jayijp ma Dios y'ane'my jiihy tzajpjoty, ca'ydi miich ajcxy. ³² Paady ycixpi oy ymīñ je Juan huidibi jāy ajcxy yajniibejt, Juan yajni'ixiygixy je mayjāy nej ajcxy jēbi yjothuimbidity ma Dios. E miich ajcxy ca' mībijcy jadu'n nej Juan ymīnañ. Per je' ajcxy huidibi yajcogūejtp etz je tōxyjāydijc huidibi tundigooyb mīd yēydijctijc, ymībijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' mībigaangixy.

Je naymīduuniptijc jibicjāybi ajcxy y'ixpejt

³³ Chi Jesús ymīnañ:

—Oc'amidoo'ijtcix jadayaabi iixpejt. Ji anajty tüg je hu'idibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyi'y ma anajty jëbi je uvas ñii yajni'idägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiday, chi je cogam yejcy pijctzoy je ycam ma je jäy ajcxy hu'idibi naymidunaanip. Chi oy chooni je cogam nicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma hu'idibi anajty ti yajpijctzoy je ñaax co huen möyii je hu'idibi yi' paadaanip. ³⁵ Per je jäy hu'idibi anajty ti naax pijctzoy, chi ajcxy majch je tumbi. Chi ajcxy ooy huinhuoipy jiphuoipy tüg. Chi ajcxy huingäch jipcäch jadüg. Chi ajcxy je midugiigpi yaj'o'cy. ³⁶ Chi je conaax cogam huingbi ytumbidijc quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiyi. Hue' jot'ajti co yajmij'adiyb je' y'ung. ³⁸ Per co ajcxy je tumbidijc iixpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi ich ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús yminañ:

—Co anajty ti miiñ je conaax je cogam, ¿ti jada' y'octunipy miiid je tumbidijc ajcxy?

⁴¹ Chi je teedytjic etz mijjäydijc y'adzooy:

—Je cogam yaj'ögipy yjiibi jibicjäydijc, ca' ajcxy pa'ayoohuipy, etz yegipy je uvas cam pijctzoy ma je huingbi jäy hu'idibi yegipy je pidägy hu'idibi cogam paatip.

⁴² Chi Jesús yminañ:

—¿Nej ca'ni miich ajcxy mgapxy ma miiñ jaaybety ma Dios ñecyi? Jadu'n yminañ:

Je yëydijc hu'idibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi hu'idibi je pojtzpidijc ca' ajcxy yajtunañ, e je' je' oy ti yhui'mni ma anajty yjaccopicyty. Je Huindzin Dios jada tung ti tuñ, e ooy oy n'ixim yi' ytung.

⁴³ E paady jadu'n ich miich ajcxy nimäy co miich ajcxy myajpigañ yi' m'it mlugar jii by tzajpjoty ma Dios y'ane'my etz yajmöhuañ je huingbi jäy je hu'idibi amuumdügjet naygiyejcip ma Dios. ⁴⁴ Pinjaty ca' cöbigañ jada mij'ane'mbi, ayo'n ypadaamb, ytimnipatp nej jihuüy jim ycixciday ma je tzaa nïcx, tijhuïdz yjaitähuipy. O pen je mij'ane'mbi midziptzoñ je jäy, chi ytigoydähuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pux nicxy yjaty.

⁴⁵ Co ajcxy midooy, chi je teedytjic etz je fariseostijc huinjihuüy co yi' ajcxy yajni-gapxyp, ⁴⁶ chi Jesús ajcxy jamadzaañ. Per tzigiyb anajty ajcxy miiid je mayjäy, je' co je mayjäy anajty mibijccixy co Jesús najtzcapxiyb Dios ytiy'ajt.

22

Je iixpejt ma jäy anajty pijcpidijc nixi'uduñ

¹ Chi Jesús jadüg'oc ytiigiy capxp miiid iixpejt, yminañ jadu'n:

² —Je Dios y'ane'min jadu'n nipaady nej je rey ymang ocniixi'uduñ co ti ypicy. ³ Chi je rey quejxhuäcxtay je ytumbi co huen nicxy huoomujctaaygixy je hu'idijaty anajty ti yaj'nimaaygixy co mingixipy ma ytuna'ñyii yjada'ñyii je pijcin. Per ca' je' ajcxy ymiinañ ma je pijcin nixi'uduñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nïcxpi nyaj'ögyich. E ni'ixi' ijtaayñi, huen miiñ ajcxy ma je pijcin ytuna'ñyii yjada'ñyii.” ⁵ E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäyyaj'öcp ajcxy

etz ytoydähuip je ycajp. ⁸ Chi je rey nimay je ytumbi ajcxy: “Ni'ixi' ijtäy ma jadayaabi je pijcin yajnixidunañ. Per je huidibi ajcxy ti yajnimäy ca' ajcxy mihuaadity co ymingixipy. ⁹ Nicx miich ajcxy majaty jäy yjin ytiyc. Nimaaygixy tüg'óciy pinjaty ajcxy mbaty, co huen mingixy ma je pijcpi.” ¹⁰ Chi ñicxy je rey ytumbi ajcxy. Chi ajcxy midmiinday je mayjäy, je oyjäybi etz je jibicjäybi. Chi y'ujztay je rey ytiyc mid je mayjäy. ¹¹ Huin'it je rey ytigüy mayjäyjoty, ixa'ñ anajty huidijaty ti yajhuomiñ. E jilby tüg yëydijc ti ijxpaty huidibi ca' anajty ti ñayxoxyii, jadu'n nej jäy nayxóxigixy co ajcxy nicxy ma tüg pijcin. ¹² Huin'it je rey minañ: “Migüg, ¿nej ya ti mdigüy tigoty, e ca' mxojx midity nej ypaadyii?” E je yëydijc amoniyi je' yhui'my. ¹³ Chi je rey nimay huidibi anajty jim pubejtp: “Cixotz tecyxotz jada yëydijc etz pidäg agootztuuby. E jilby yjihuipy yaxipy, jilby ytiitz huiunqueedip mid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi minicxpejt je Herodes ytiy'ajt. Chi ajcxy Jesús nimay:

—Huindzin, nejhuiybich ich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy yminaangixy. Tú'ciy miich mduñ mid comeeniyjäy etz mid ayoobtjyc, ca' huin'ixpety myaj'ixpicy. ¹⁷ Nejhuihuamy ich ajcxy nej miich minañ pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸ Per Jesús ñejhuiyb anajty ajcxy yjibic-huinma'ñ, e chi ajcxy nimay:

—Ooy miich ajcxy naybidáacigixy nej jihuüy ooy mdudägyity, e ca' yjanchity. ¿Na'amy co ajcxy xychachjot'ixy xychachhuinma'ñ'ixyich? ¹⁹ Yaj'ijxcich tüg meen huidi mid migüéjtigixy César.

Chi ajcxy mimiñ tüg meen. ²⁰ Chi co Jesús y'ijxy je meen, chi yajtiy:

—¿Pin y'ahuinax e pin yxi cixjaay ma jada meen?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxi.

Huin'it Jesús je' ajcxy nimay:

—Mo' je César huidibi yi' yjë'ajtpy, etz mo' Dios huidibi Dios yjë'ajtpy.

²² E co ajcxy jadu'n midooy, chi ajcxy ooy jihuüy huinmay. Chi ajcxy ixmajch Jesús, e ñicxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy ixxy Jesús. Yi' ajcxy yminañ co ca' yjugypiga'ñ je öcpi ajcxy. E jadu'n ajcxy huinma'ñ pidägy, e yminaangixy:

²⁴ —Huindzin, jadu'n miiñ ma Moisés ycötújcin co je yëydijc huidibi ypijychinaayb mid ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy mid je yëydijc ymiguëx. ²⁵ Pues jii ma ich ajcxy anajty tüg quëx je yëydijc nihiuxtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch mid je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugügpí yëydijc ix'o'cy ytöxyijc. E jadu'n oytuñyii yjadyii mid je töxyjäy co ti anajty middzinay'abidzimdäy je nihiuxtujcpi yëydijc tüg quëxpi. E je nihiuxtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi' tiibi ajcxy y'ögy, ¿huidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihiuxtujcpi middzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuinjihuïy je tïy'ajt, com ca' mnejhuïygixy Dios y'ayuc ytiy'ajt, e com ni ca' mnejhuïygixy je mic'ajt huidibi Dios ymïd. ³⁰ Pues co anajty yjugypijccixy je jây tiibi y'öccixy, chi ca' ajcxy ypïga'ñ, e nañ jadu'n ni ca' ajcxy ñaymôhuïyb y'ung huen pijccixy. Hue' ajcxy yjugy'adaangixy chinähuaangixy jii by tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je tïy'ajt co jây ajcxy tiibi y'öccixy yjugypïgaangixy jadüg'oc, jëbi mbaatcixy jada tïy'ajt ma Dios ñecy. Dios ci'm jadu'n minañ: ³² “Iich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypï ajcxy.

³³ E co je mayjäy jadu'n mïdooy, chi ajcxy ooy tzachjihuïy tzachhuinmaay je Jesús y'ixpijcin.

Je ane'min huidibi ooy ycopicyity

³⁴ E co je fariseos ajcxy nejhuïy co Jesús anajty ti yaj'amoñyii je saduceos ajcxy, chi ajcxy ñayyöymujtaayi. ³⁵ E jim anajty tüg leyhuindzin huidibi Jesús anajty jot'ixyp huinma'ñ'ixyp, chi y'amïdooy:

³⁶ —Huindzin, ¿ma yi maybi Dios ycötujcin, huidibi yi' jaccopicyip?

³⁷ Chi Jesús y'adzooy:

—Tzoc jihu' etz yajmij'at nHuindzin'ajtim Dios mïd tüg'óciy m'aa mjot, etz mïd tüg'óciy m'alma, etz mïd tüg'óciy mhuinma'ñ. ³⁸ Jada je' jadu'n je Dios ycötujcin huidibi jaccopicyip, etz huidibi tim jayijpïp. ³⁹ Je mïmetzpi Dios ycötujcin jahueengi tú'ciy ñaybadyii mïd je jayijpi, yi' huidibi jadu'n minamb: “Tzojccix jihuiygix yi mmigügtijc, tim jadu'n nej mnaychogyii nayjihuiyï ci'm.” ⁴⁰ Jada Dios metzpi ycötujcin jaccopicy jacmic'ajt mïd ca' jac huidibi cötujcin huidibi Moisés etz je profetas ajcxy yejc.

¿Pin je' y'ung je Cristo?

⁴¹ E ma anajty jim tüg'mucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay mïd Cristo? ¿Pin je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty mïd je Dios yjihui'ñ ymic'ajt, ymina'ñ:

⁴⁴ Je Huindzin Dios nimay iich nHuindzin: “Iña' ma iich n'a'oy'amy, ixti cooni iich miich nyajmïmadägi ma je mmïdzip ajcxy.”

⁴⁵ ¿Nej jëbi David ymij'ap'adyii je Cristo? Com David ci'm ymina'ñ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xï tiempo yjacnicx anajty ca' ni pin ocjacyajtiyñi huidijaty ayuc.

23

Jesús xïy ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huidibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymïdoogix nej xyñimaaygixy per ca' mdungixy huidibi yi' ajcxy ytumb, com yi' ajcxy oy ycapxcixy e ca' ajcxy cuydungixy.

⁴ Yi' ajcxy nigo yajcojciy canaag costumbre huidi je jây ajcxy ca' mïmadäga'ñ, e ca' ajcxy pa'ayoy je jây, tim jadu'n nipaady nej jihuiy tüg tziy ti mooygixy jemxypi huidibi ca' je jây ajcxy mïmadäga'ñ, e yi' escribas etz fariseos ajcxy ni ca' ycihuax yajpaadaangixy je tziy. ⁵ Tüg'óciy huidi yi' ajcxy ytumyb, je' ajcxy ytumyb co huen jây ajcxy ixyii,

jaydēbi yajcōmay ajcxy. Yi' ajcxy yajhuimboc-huiniyigixy etz ñayyajcihuiniyigixy Dios y'ayuc. Nayxojxcixy miid huit yooñjatypi co chachcōmayaangixy. ⁶ Ooy ajcxy tzocy iñaybejt ma je' iñay je ane'mbi ma jāy ajcxy yxiiduiñ. Ooy ajcxy tzocy yi cōdumbi iñaybejt ma je naymujctac. ⁷ Yi escribas etz fariseos ajcxy oy tzojccixy co ajcxy yajcapxpooxip huindzigi'ñ'amy mayjāydum. Etz nañ jadu'n ajcxy tzocy co jāy ajcxy yajmij'adñyb nej huindzindijc ixpicytjic. ⁸ Miich ajcxy ca' jadu'n m'a'ixihuipy co ajcxy xytijipy huindzin com nidüg'ócay miich ajcxy mnaymigüg'ajtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adñyb co miid miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijñyb ajcxy mij ane'mbi, com yi Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtjic, je' je' mij'ajtin miid ma miich ajcxy. ¹² Pinjaty huidibi ci'm naygōmayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidaacigixy nej jihuñy ooy mdudägyjāy, e ca' yjanchity. Miich ajcxy mgoyüchpy je Dios ytiy'ajtin nej huaad jāy ajcxy ytiñy jiiby tzajpjoty ma Dios y'ane'my. Ni miich ajcxy mgatigñygixy, e nañ ni mga'a'ixñygixy co huingbi ytiñhuip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aaniidacp! Miich ajcxy myajcijxtaayi yi co'ögy ytöxyjāy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios niñi chaachytunip miich ajcxy miid mbocy yciñpi, ca'ydi jac pin jāy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpā jāy. E co ajcxy je' myajmibicy, huin'it mejtz jadu'ñyi je pocy anajty miidity je jāy, ca'ydi miich ajcxy.

¹⁶ ¡Ay miich ayoob ajcxy huidibi jadu'n idiitzp nej tügi huintzpi huinhuoy! Miich ajcxy minamb co pen tüg jāy tuñ yhuandaacin, e ñbaati capxpaati Dios ytiñ, chi ca' cuyduñ je huandaacin. Per pen ñbatpy capxpatpy je oori huidibi jiiby ma Dios ytiñ, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuñy je tiy'ajt. ¿Huidibi jaccopicyip: je oori o je Dios ytiñ ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jāy huandaacin tuñ, e capxpaady je altar ma Dios yajhuindzigiñ, chi ca' cuyduñ je huandaacin. Per pen capxpaady je huindzigi'ñ tzüch ma je altar ma Dios yajhuindzigiñ, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihuñy je tiy'ajt! ¿Huidibi jacmij'ajtin ymiid je huidibi ti yajyoxo o je altar? ²⁰ Pinjaty capxpatp je Dios ytiñ ma Dios yajhuindzigiñ y'agapxmuctaayb anajty huidijaty jiiby yajpaatp ma Dios yajhuindzigiñ. ²¹ Pinjaty capxpatp je Dios ytiñ, ca' anajty jēyi capxpaady Dios ytiñ, nañ ycapxpatp anajty Dios huidibi jiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxy miid Dios huidi tzinaayb jiiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti yi tzajnimang, yi ruda etz je pi'c'ujtz'ay ung. Per ca' ajcxy mduñcuenti je cōtujcin huidibi jaccopicyity. Miich ajcxy ca' mdzināy tiydudägy miid je migügtjic. Miich ajcxy ca' mmiidity pa'ayo'n miid je' ajcxy huidibi ayoob jottigooyb, etz ca' mmibijccixy Dios. Jada ixypy ajcxy mbaadumyib, e mooygixy Dios je tügpicy je majcpi. ²⁴ ¡Tzuudijc locitijc! Miich ajcxy ti m'anajxyp je uux, e mgoñinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jāy, e ca' yjanchity! Jiiby jotjoty huinma'ñjoty miich ajcxy miidity jibicpi. Miich ajcxy miid je ca'oy'ixñ etz je adzojcin. Tim jadu'n nipaady nej jihuñy myajhuächpy ajcxy yi tasi

ninïcx yî texy ninïcx, e chi myajhui'my jibicpi ma tasijot ma texyjot. ²⁶ ¡Tzuudijc miich ajcxy! Jayijp yajhuadz jilby jotjoty texy tasi, huin'it hui'm nañ jadu'n huadz nigix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxïgy, per jilby jutjoty utz jilby müd je öcpi pajc etz müd jibicpi. ²⁸ Jadu'n ajcxy mguëxïgy mayjäyduum nej jihuïy ooy m'oyjäyity, per jilby jotjoty müd jibic-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtzicxy yajxon je öcpi jut ma profeta ajcxy ñaaxtigïy, etz mxoxy ajcxy müd je pijy ma ñaaxtigïy je tudägy jäy ajcxy, ³⁰ e miich ajcxy nayñimaayigixy miñ xyipy: “Co ixipy anajty n'octzinaayim jecy'ajty ca' ngapubejtim co ajt nmij'ap nmijteedy yaj'ögy je profetas ajcxy etz je tudägy jäy ajcxy.” ³¹ Müd jada ycixpi miich ajcxy nejhuïyb co miich ajcxy m'ap'adyii mdeedy'adyii je jibicjäydijc ajcxy huidibi yaj'öc je profetas. ³² ¡Miich ajcxy yajcïxcixy je jibicpi huidibi ajcxy mmij'ap mmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägipy cöguëgipy je tzaachypï jilby ayoodactuuby. ³⁴ E paady nguexaamybich ma miich ajcxy profetas etz huidibi ixpicyip ma Dios y'ayuc, etz huidibi xyaj'ixpigamb ajcxy yî Dios ñecy. Per miich ajcxy myaj'ögamyb myajcruutzpedamyb nijëjity, etz nijëjity mgoxamyb mhuobamyb ajcxy jilby tzajtigoty etz m'ixhuidida'ñ mbahuidida'ñ ajcxy cajp cajp. ³⁵ Je mijpocy xyñigïdaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy müd je oyjäy Abel etz ycogixïy müd Zacarías, je Berequías y'ung huidibi miich ajcxy mmij'ap mmijteedy myaj'o'c jilby tzajtigoty ma altar. ³⁶ Janch tiy'ajt jadu'n nej nimaaygixy co je mijpocy ñigïdaccoda'ñ je jäy ajcxy huidibi tzinaayb jadachambi tiempo.

Jesús yäxy müd Jerusalén cajp ycixpi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitijc etz ycögächpy ajcxy je Dios ycogapxy. Canaag'oc ti njaya-jtügmujectähua'ñich miich ajcxy, jadu'n nej tzeydaj yajtügmujectäy je' y'ung ma yqueec päť, per miich ca' m'a'ixïygixy. ³⁸ Oc'ix miich ajcxy nej mdijc abac yhui'maangixy. ³⁹ Janch tiy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'nipy: “Cömay yî huidibi miimb müd nhuindzin Dios yxii etz ymic'ajt.”

24

Jesús ymina'ñ co Dios ytijc yhuindigoyipy

¹ Ma anajty Jesús ti ypidzimni ma Dios ytijc, nicxp anajty, huin'it Jesús ydiscípulos ajcxy ñimijhuäci. Yi' ajcxy anajty yaj'ixïydähuamyb je Dios ytijc, com ooy anajty chachmijtijcity.

² Chi Jesús ymina'ñ:

—Huindicx miich ajcxy jada maybi mijjaty ytijc. Miinipy xii tiempo mina tüg'óciy jada tijc nicxy yhui'my taj xit, ca' ma tzaamacxy. Huindigoydähuipy tüg'óciy.

Je tiy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cögop. E co anajty jim, Jesús y'iñäy, chi ñimaayi ameech je' ydiscípulos ajcxy:

—Ich ajcxy nejhuïhuamyb mina jëdu'n ytuna'ñyii yjada'ñyii. ¿Ti je' quëxïgamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adiib ajcxy, ca'ydi pin xyhuin'ïngixy. ⁵ Ooy mayjäy ñaybidägáanigixy müd ich nxii, naybidägáanigixy co je' ajcxy je Cristo, ymina'na'ñ ajcxy: “Ich je' je Cristo.”

⁶ Co miich ajcxy ayuc midohuipy co jäy ajcxy chachtziptungixy ñayñibidigigixy xi ya,

chi ca' ajcxy mdzigíygyixip, com ooy ycopicyity co jadu'n jayijp ytuníyb yjadíyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidígíib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypí ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajcīyegipy, jigix xychaachytúngixipy e xyaj'ögixipy. E tüg'óciy je maynaaxhuiñyäj xycá'ixáangixipy, miid ich nxii ycixpi. ¹⁰ Je huin'it tiempo may je jäy ajcxy yajtigoya'n ymibijcin. E nañ jadu'n ñayca'oy'ixáanigixy etz ñayñigapxáanigixy ñi'ojíhuáanigixy miñ xyipy. ¹¹ Ooy may quēxígaangixy aaniidaacpidijc mina'naangixy co Dios y'ayuc ytiy'ajt nimiydaci, e mayjäy oy huin'inaangixy. ¹² E je' co ajcxy xii jimijt ñajtninixiyñi jac tim nigi jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibijcin, je' ajcxy ypaadip y'alma nidoocin. ¹⁴ Copicy co jayijp yajcapxhuäcxa'n huindu'ñybi naaxhuiñybi Dios y'ayuc ytiy'ajt jemybi, jaydebi jäy ajcxy nidüg'ociy nejhuíy Dios ytiy'ajt. Huin'it je naaxhuiñybi ycijxni ytigooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjihuíygyixy) ma minañ: Miich ajcxy co m'ixy pinjaty jibic-huinma'n tumb nej ca' ypanyi ma Dios ytiyc, huidibi ooy ycodzigíity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytiycnicx ca' nicxy tijaty yajpidzimy ma ytiyc. ¹⁸ Yi jäy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytiyc. ¹⁹ Huin'it tiempo ayo'n ypadamy je töxyjäy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohuipy yi Dios co jada jadu'mbi ayo'n ca' ytuníyb yjadíyb ma anajty ytiichtiempoity, etz ma anajty pocxinxioty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuníyb ycajacjadíyb. ²² Pen ca' Dios capx'aduga'n yijibi ayo'n xii ayo'n tiempo, ni pin ca' chögipy. Per Dios ycapx'adugamy yijibi ayo'n tiempo miid je mibijcpidijc ycixpi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibíccixipy, pen ji pinjaty xyñimaaygyixy: "Ijxcix, cha yajpaady je Cristo", o "Jim'amy yajpaady je Cristo." Ca' mmibíccixipy. ²⁴ Pues miinip jäy ajcxy huidibi huin'inaangixy ymigügtijc. Ci'm ñayajnaxáanigixy jadu'n nej jihuíy je' yCrístity, e ymináangixipy co capxhuäcxy ajcxy Dios y'ayuc, e ca' yjánchezity. Ytunip ajcxy mijhuinma'n etz mijpi iixpejt, ixti jébi jahuin'ingixip je mayjäy huidibi Dios ti yhuin'ixyii. Per ca' Dios a'ixíhuipy co yhuin'iníyb yi' yjäy. ²⁵ Ti ich yi' jayijpni nigapxich. ²⁶ E co pinjaty ajcxy xyñimahuipy: "Chim je' je Cristo mijtigídumb", ca' ajcxy mninixip. O co pinjaty ajcxy xyñimahuipy: "Chilby je' tigoty yhuingoyüch", ca' ajcxy mmibigipy. ²⁷ Ich je' je jäy huidibi tsoon tzajpjoty, nhuimbidaambich ya naaxhuiñ miid je tixcin je jájin, jadu'n nej je huidzuc huidi tixxp xibidzimyb ixti xigídägy. ²⁸ Ma je öcp ninícx yajpaady jim ñimujctähua'n je luud ajcxy.

Nejjada' je' Dios y'ungymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodziygídäga'n, je po' ca' ytiicxa'n, je madza' ycädähua'n etz janch mic je tzajp yücxa'n. ³⁰ Co yi jadu'mbi ytuníyb yjadíyb, chi quēxíga'n tzajpjoty je iixpejt co ich, je jäy huidibi tsoon tzajpjoty, nhuimbida'ñich ya naaxhuiñ. E chi tüg'óciy je mayjäy tájip máyip yjihuíhuipy yäxipy, chi ajcxy ixipy je jäy huidi tsoon tzajpjoty miñ anajty jocjoty miid ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix yöymujctähuiipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jinboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higuere quipy jadu'n nej je xii tiempo ymiiñ cidägy. Co je higuere quipy jadüg'oc pidägipy je' y'aay'ung, huin'it miich ajcxy nejhuñhuipy co yhuingoni mina ypottigiyñi. ³³ Tim jadu'n nej tiy'ajt mbijccixy ma je higuere quipy co jada ajcxy jadu'n ixipy nejhuñhuipy co yhuingoni anajty je xii je tiempo jiiñ'aguy tijc'aguy. ³⁴ Janch tiy'ajt jadu'n nej nimaaygixy co tüg'óciy ytuna'ñyii yjada'ñyii ma ca'ni anajty je jäy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per iich n'ayuc ca' ycixa'ñ ytigoya'ñ nimina.

³⁶ Ca' ni pin nejhuñy je xii je hora mina nhuimbida'ñich ya naaxhuiñybi. Ni je ángeles ajcxy canejuñy, ni je Dios y'ung canejuñy. Tügpaic je Dios Teedy nejhuñy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huidibi tzoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñybi, hue' je' mayjäy ajcxy chinay agujc jotcujc, ycaaygixy y'uuccixy etz yajpijccixy je y'ung y'anäg, ixti cooni paty je xii tzuu co ytigiy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinahuip jac jiini co iich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixi ijtciç, xyjiip'ixipyich com ca' mnejhuñygixy mina miich ajcxy je mHuindzin ymiina'ñ. ⁴³ Mnejhuñygixy miich jada co ixipy je ungdeedy nejhuñy ti hora je meetzpi miina'ñ, ca'p je' ymähuiipy, e ca'p a'i'xihiipy co je meetzpi ytigihuiipy tigoty. ⁴⁴ Nañ tim jadu'n miich ajcxy ni'ixi ijtciç, je' co iich, je jäy huidibi tzoon tzajpjoty, nhuimbida'ñich ma ca' ni pin anajty nejhuñy.

Je tumbi tudägyi etz je huidibi ca'p ytudägyity

⁴⁵ ¿Huidibi tumbi je' ya huidibi tumb miid yhuindzin janch cixyjot huinijot huidibi miid ixpijcin, huidibi je' yhuindzin moopypy ane'min ma ytijc, huidibi yajnigidagihuiipy ma ymigügtijc caayin uucin mina ypadyii? ⁴⁶ Janch jotcujc je tumbi co yhuimbidity je' yhuindzin, e je' cuyduñ jadu'n nej je' yhuindzin ti ñimäy. ⁴⁷ Janch tiy'ajt jadu'n nej nimaaygixy co je huindzin ytumbi yajnigohuajc'adyii tüg'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñyjoty: "Huäcxijpni iich je nhuindzin." ⁴⁹ E chi ñimajztägip ymigügtijc, e ytigihuiip caaybi uucpi miid amügyjäydijc; ⁵⁰ chi je tumbi yhuindzin minipy ma ytijc huidi xii mina je tumbi ca' anajty aa'ixy jip'ixy e ni je hora anajty canejuñy. ⁵¹ Chi huindzin tzaachytunip je' ytumbi, etz ypidägipy miid je jacjadyii jäy ajcxy yajpaady huidibi naybidäacigixp nej tudägyjäyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueeda'ñ ytütz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjiipcobadihuáanigixy miid je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi co huinma'ñity etz ahuing minicxy jadüg quiiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quiiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigiyñi mä'uuybi. ⁶ E mijcuctz ajcxy midoy co tüg jäy mic mina'ñ: "Chi miiñ je yëydijc huidibi pigamb, nicx jipcobadiygixy." ⁷ E huin'it je nimajcpi töxy'anäg ajcxy ypidictay. Chi ajcxy yjin

ni'ixi'y nidüg nidüg. ⁸ Chi je nimigooxpi huiḁibi ca' ycohuinma'ñity nımay je nimigooxpi huiḁibi cohuinma'ñip: "ñich ajcxy hueeni mooygich yi m'aceite, co pıdzaanip ñich ajcxy njiin." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' ñich ajcxy nje' yhuaadĩhua'ñ. Nıcx miich ajcxy juy jım ma ytoogyii." ¹⁰ E ti anajty ajcxy ñıcxıy aceite juuyb je huiḁibi ajcxy ca' ycohuinma'ñity, co oy yjaty je yëydıjc huiḁibi pıgaanip. Chi je cohuinma'ñybi ajcxy mıd tıgıy tıgoty je yëydıjc huiḁibi pıgaanip. Chi tıjc yaj'agıy. ¹¹ E com jecyñi oy yhuimbity ajcxy je huiḁibi ca' ycohuinma'ñity. Chi ajcxy ymınañ: "ıHuındzin, Huındzin, ocyaj'ahuädz mdıjc!" ¹² Chi je' y'adzooy: "Ca' ñich miich ajcxy n'ixy'adyii."

¹³ Chi Jesús ymınañ:

—Nayñi'ixi'yıgıx, je' co ca' mnejhuıygıxy mına ñich nhuimbida'ñich jadüg'oc ya naaxhuiñ.

Je iıxpejt ma je meeñ

¹⁴ Co ñich anajty nhuimbida'ñich jadüg'oc ya naaxhuiñybi, jadu'n nipaadıp nej jadayaaıı iıxpejt, co anajty tüg comeeñyjäy chona'ñ viajetumbi, chi je' ytumbi ajcxy mooy je meeñ co huen cuend'ajtcıxy. ¹⁵ Je ymıdügpi tumbi moy mıgıox mil meeñ. Je mımetzpi moy mejtz mil. E je ymıdugıgpi moy tüg mil. E jadu'n ajcxy moy nıje' nıje' nej huaad cuend'ajtcıxy. Chi choñ je huındzin viajetumbi. ¹⁶ Je tumbi huiḁibi cıdıgıyıı mıgıox mil meeñ, ytıgıy ajuybi adoocpi. Chi je' ymeeñ y'ung'ajty jamıgıox mil. ¹⁷ Nañ jadu'n huiḁibi cıdıgıy mejtz mil, ytıgıy tumbi mıd je meeñ. Chi je' ymeeñ y'ung'ajty ja mejtz mil. ¹⁸ Je huiḁibi cıdıgıy tüg mil hue' oy pıdägy je meeñ tützjoty. Chi tajıy, e yützi je yhuındzin ymeeñ. ¹⁹ E com jecyñi oy yhuimbity je huındzin. Chi ytıgıy cuenta yaj'oyıyb mıd je ytumbi ajcxy. ²⁰ Chi miiñ jayıjp je huiḁibi anajty ti cıdıgıyıı mıgıox mil meeñ. Chi je tumbi yajcıdıgıy je' yhuındzin majc mil meeñ. Chi ymınañ: "Miich ti xymooyıch mıgıox mil meeñ, e ñich ti nyaj'ung'atyıch jamıgıox mil."

²¹ Chi je' yhuındzin mınaañ: "Janch jotcuıjc ñich cham co jadu'n ti mduñ mıd je hueenbi meeñ. Miich ooy mdudägy etz oy ti mduñ, e paady njacmöhuamyb jacmay. Tıgı' ma ñich, e xondäg mıd ñich." ²² Chi ymıñ je huiḁibi anajty ti cıdıgıyıı mejtz mil meeñ. Chi nımay je yhuındzin: "Miich xymooyıch mejtz mil meeñ, e ti nyaj'ung'atyıch jamejtz mil."

²³ Huin'it je' yhuındzin ñımaayı: "Janch jotcuıjc ñich cham, co jadu'n oy ti mduñ mıd ñich nımeeñ, e paady njacmöhuamyb jacmay. Tıgı' xondäg mıd ñich."

²⁴ E co oy yja'ty je huiḁibi cıdıgıyıb tüg mil meeñ, chi nımay je' yhuındzin: "Huındzin, hue' ndıyıch miich myëydıjc'aty janch jıbic jäy. Miich cosecha myajpıdıcpy ma ca' ti mñıpy etz miich mgosecha myajpıdıcpy ma ca' ti ti mhuıy. ²⁵ Paady ooy ndıgıyıch co je meeñ ngayaj'ung'adıpyıch. E co miich mhuimbida'ñ, mdzogamy je mımeeñ, e paady je mgi'mımeeñ ti nyüchıch, je' co ndıgıyıch co nıcxıy nyajtıgooyıch miich mımeeñ. Cha je meeñ huiḁibi ti xymooyıch."

²⁶ Chi je' yhuındzin ñımaayı: "Jıbic tumbi miich, ooy mnuuxıty. ¿Nej ti mnejhuıy miich co ñich cosecha nyajpıdıgyıch ma ca' ti ti nñıbyıch, etz cosecha nyajpıdıgyıch ma ca' ti ti nhuıyıch? ²⁷ Oy co ıxyıpy miich je ñich nımeeñ ti myejc'anıucxy, e jım ıxyıpy y'ung'at. E cham co ti nhuimbityıch cham ıxyıpy je nımeeñıch xycıdıgıyıch mıd nımeeñ'ung."

²⁸ Chi je huındzin nımay je jacjadyıı tumbıdıjc: "Pıjci ajcxy yi meeñ huiḁi ymıd, e mooygıx yi huiḁibi majc mil ymıd. ²⁹ Je huiḁibi oy tumb jacyajmöhuamb je' anaxy, e ymıd'adamy je' conaxpi. Je' huiḁibi hueen mıd yajpıgamb je' huiḁi ymıd, je' co ca' oy ti ytuñ mıd je hueenbi. ³⁰ Yi jıibi tumbi huiḁibi ca' oy ytuñ, pıdäg ajcxy agootztuuby ma yjıhuıpy yäxyıpy, ma ytıtzt huınmuucx huingueedıp mıd jotmay."

Co anajty naaxhuiñyjäy ajcxy yajtıyduñ

³¹ Co ñich, je jäy huiḁibi tzoön tzajpjoty, nhuimbity ñich anajty jadüg'oc ya naaxhuiñybi, huin'it n'ıxtäga'ñich ma ñich n'ane'mdac etz ane'ma'ñich mıd ñich nmıj'ajtin etz n'oy'ajtin.

³² Chi tüg'óciy je naaxhuiñyäjy yajtügmujectähua'ñ ma ñich. Nhuäcxamybich jadüg jadüg jadu'n nej jäy ajcxy huäcxy je cöbixy etz je chiibo ajcxy. ³³ Nbidägaamybich a'oy'amy je jäy ajcxy huidibi oy ti ytungixy müd ñich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy müd ñich. E yi' ajcxy jadu'n nipaadip nej chiibi.

³⁴ Chi nnimähuibich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuucxy ajcxy. Je'ájtigix ane'mdac huidibi ijtp ni'ixi müd miich ajcxy ycixpi maabi naaxhuiñybi chondägy. ³⁵ Ma anajty ñich nyuubögyii miich ajcxy ti xyajcaayich; ma anajty ñich ndidzïyii, miich ajcxy ti xyajñi'ügyich; ma anajty ñich nihuidityich, miich ajcxy jättac ti xymöyich; ³⁶ ma anajty ñich je nhuit ti nyajmayjatyich, miich ajcxy ti xymöyich je huit; ma anajty ñich nbigyijich, miich ajcxy ti xycuend'átyich; etz co anajty ñich pujxtigoty nyajpaady, miich ajcxy ti xycogapxiyich.”

³⁷ Huin'it ymina'na'ñ je jäy ajcxy huidibi oy ti ytungixy müd ñich: “Huindzin, ¿mina ñich miich ajcxy ti n'ixy ayuu, e ti nyajcay? O ¿mina ñich miich ajcxy ti n'ixy co mdidzïyii, e ti nyajñi'ügy? ³⁸ ¿Mina ñich miich ajcxy ti n'ixy co miich mnihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñich miich ajcxy ti n'ixy, co miich mbigyii, e oy ti ngüend'aty? etz ¿mina ñich miich ajcxy ti n'ixy co pujxtigoty myajpaady, e oy ti ngogapxiy?” ⁴⁰ ñich, je mij'ane'mbi, n'adzohuimbidityich: “Janch tiy'ajt jadu'n nej nnimaaygixy co yi jäy ajcxy huidibi oy ti ytungixy müd pinjaty huidibi xymijnicxpejtpich, nañ jadu'n oy ti ytungixy müd ñich. Ca' ñejity co jäy ajcxy ymina'ñ co ca' ypinity je jäy huidibi xymijnicxpejtpich.”

⁴¹ Chi ñich, je mij'ane'mbi, nimähuibich je jäy ajcxy huidibi yajpatp: “Huinhuaäctuatcich miich ajcxy jibicjäydijc. Nicxy miich ajcxy mijjinjoty, huidibi ijtp ni'ixi müd je mujcu' ycixpi etz müd je' y'angeles ajcxy ycixpi. ⁴² Ma anajty ñich nyuubögyii, ca' miich ajcxy xyajcaayich; ma anajty ñich ndidzïyii, ca' miich ajcxy xyajñi'ucyich; ⁴³ ma anajty mnihuidityich, ca' miich ajcxy xyajjättägyich; ma anajty ñich nhuit xytigoy'jtgich, ca' miich ajcxy huit xymooyich; etz ma anajty ñich nbigyii e nyajpaadyich pujxtigoty, ca' miich ajcxy xycogapxiyich.” ⁴⁴ E chi je' ajcxy ymina'na'ñ: “Huindzin, ¿mina ñich ajcxy miich ti n'ijxcixy co anajty miich yubögyii tidzïyii, o co anajty mnihuidity? ¿Mina ti n'ijxcixy co ca' mhuit müdity, o co mbigyii, o co anajty pujxtigoty myajpaady, e ca' ñich ajcxy miich nbubejty?”

⁴⁵ Chi ñich, je mij'ane'mbi, n'adzohua'ñich: “Janch tiy'ajt jadu'n nej nnimaaygixy. Huen tim pinity huidibi ca' müdity pa'ayo'n müd je' ajcxy huidibi xymijnicxpejtpich, oy jäy yjamina'ñ co ca' ypinity, ñich miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodactuuby, e yi tudägyi ajcxy nicxip ma yi jugy'ajtin huinixiibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'óciy jadayaabi ayuc, chi nimay yi' ydiscípulos ajcxy:

² —Miich ajcxy mnejhuiyb co huixtic je amayxi, je pascua xi. Pascua xijoty ñich, je jäy huidibi tsoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'oga'ñich ajcxy.

³ Je huin'it xi je teedy huidibi tungmüd ajcxy, je escribas, etz je mijjäydijc ajcxy ñayyöymujtayi ma je' ytiba' je teedy huidi jacmijtungmüd huidi anajty yxi Caifás. ⁴ E jim ma Caifás ytiba' jim ajcxy huinma'ñyixtay nej jebi yajmachycägixy Jesús müd anñ etz yaj'ogaangixy. ⁵ Chi ajcxy ñayñimaayi miñ xyipy:

—Ca' y'oyity co xijoty nmajtzim Jesús. Ca' jecyity co je mayjäy xymijotma'ttayim etz ytigihuip ajcxy huambi jihuüybi.

Tüg töxyjäy pidacy aceite ma Jesús ycohujc

⁶ Jesús anajty yajpaady Betania ma Simón ytijc, je Simón huiðibi anajty ymïd je jibic nïbüdz pa'm. ⁷ E ma anajty Jesús yca, huin'it ymïñ tûg töxyjäy mïd tûg quiig ujtz mïd perfume huiðibi ooy oy yxuugy, jada perfume ooy anajty choohuïty. Chi je töxyjäy yaj'ahuäch je quiig, e yajcöyogiy Jesús je perfume huiðibi ooy oy yxuugy. ⁸ Co Jesús ydiscípulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñimaayi mïñ xyipy:

—¿Ti co jada perfume huiðibi ooy oy xuugy ayoy? ⁹ Tzou ixypy ooy jada yajtoocy, jayðebi ixypy mïd yajpubet je ayoobitijc.

¹⁰ E co Jesús nejhuiy nej ajcxy ymïnañ, chi nimay:

—¿Na'amy co m'amayiy jadayaabi töxyjäy? Yi' huiðibi ti tuñ, je' yi' tûg oybi. ¹¹ Je ayoobtijc ca' ytigoy'ida'ñ ma miich ajcxy nimina. Huen huiðibi xii huen huiðibi tiempo jëbi miich ajcxy mbubedipy ayoobtijc. Hich ca' n'ida'ñich jecy ya mïd miich ajcxy. ¹² Jada töxyjäy ti pidägy ma ich nninïcx perfume huiðibi ooy oy xuugy, jayijp ca'ni nnaaxtigïyich. Jadu'n je' jïp'ijxpy mïna nnaaxtigïhua'ñich. ¹³ E huentimma'amyty je Dios y'ayuc anajty yajcapxhuächy huindu'my naaxhuiñ jim yajnigapxa'ñ jadu'n nej je töxyjäy ti tuñ cham mïd ich, e jadu'n je mayjäy jäymedzipy jada töxyjäy.

Judas cïyecy yi Jesús ma ymidzip agojix

¹⁴ Chi nidüg je' ydiscípulos huiðibi yxii Judas Iscariote oy nimäy je teedy mijtungmïdpi, ¹⁵ nimay ajcxy:

—¿Ti ajcxy xymöhuibich co ngïyegipyich Jesús?

Chi ajcxy moy iipxmajc plata meen. ¹⁶ Co ajcxy meen ymooy, chi mic'amy Judas yhuinma'ñixtay nej jëbi cïyecy Jesús ma ymidzip.

Jesús y'adzuu'ajty pascua xijoty

¹⁷ Je ymidügpi xii, je amayxii, je pascua xii ma anajty yajcay je tzajcaagy huiði ca' levadura mïdity, huin'it je' ydiscípulos ajcxy nimïñ Jesús. Chi ajcxy yajtiy:

—¿Ma mdzocy co ich ajcxy ni'ixihuip huiði mgayamy je pascua xii cixpi?

¹⁸ Chi Jesús y'adzooy:

—Nïcx miich ajcxy jim Jerusalén ma tûg jäy ytijc, e mnimähuip: “Ich nHuindzin jadu'n minamb co yhuingoñ je' yxii yhora, e paady ma miich mdijc yi' tuna'ñ je pascua xii adzu'ajtin mïd ydiscípulos ajcxy.”

¹⁹ Huin'it Jesús ydiscípulos ajcxy cuyduñ jadu'n nej Jesús anajty ti ñimäy. Chi ni'ixiiy ajcxy je pascua adzuu'ibi.

²⁰ E co chu'iy, chi Jesús y'ixtacy ma je mesa mïd je nimajmetzpi ydiscípulos. ²¹ E ma anajty ycaagyixy, huin'it nimay je nimajmetzpi:

—Nidügti miich ajcxy huiðibi xycïyegaambich ma nmidzipich.

²² Huin'it ajcxy yajtay taj may. Chi ajcxy yajtiy:

—Huindzin, ¿nej ich jada'ji?

²³ Chi Jesús y'adzooy:

—Yi huiði mïd ndocxmucyich, yi' je' jadu'n xycïyegaambich ma nmidzipich. ²⁴ Janch tiy'ajt co ich n'öga'ñich, jadu'n nej je profeta jaay jecy'ajty. ¡Ay ayoob je yëdyjc huiði xycïyegaambich! Jac'oy co ca' ycama'xung'aty je huiðibi xycïyegaambich.

²⁵ Chi Judas ymïnañ:

—Huindzin, ¿nej ich jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy yca, huin'it Jesús tzajcaagy conïgy. Chi yajnaxxy Dioscojuyip. E chi jada' tujchuächy je tzajcaagy. Chi moy je nimajmetzpi ajcxy je tzajcaagy, e ymïnañ:

—Cay miich ajcxy jadayaabi tzajcaagy, yi' je' ich je nninïcxich.

²⁷ Huin'it Jesús cıyıgy je y'ügy. Chi yajnajxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yı' je' ich je nni'pyich. Yı' ñigapxy co Dios ti yaj'aducy je jemybi ayuc. E ich nni'py ytemañ yoga'ñ mıid je mayjäy ycıxpi, jaydëbi ajcxy paadip je huinmeecxın mıid je ypocy ycıxpi. ²⁹ Janch tiy'ajt jadu'n nej nnımaaygıxy, co ca' n'oc'ügaanich jadüg'oc je pascua xıi ügy, ixti cooni je xıi tiempo paadip co ich ajt n'uucım huinjemybi je pascua xıi ügy ma ich nDeedy y'ane'mın.

Jesús nigapxy co Pedro ycoyütza'ñyii

³⁰ E co ti y'ıdäy, chi ajcxy choon'ñıxy ma Olivos cögop. ³¹ Chi Jesús je' ydiscıpulos ajcxy nımay:

—Nıdüg'ócıy miich ajcxy xy'ixmajtztähua'ñich cham coodz. Je' co jaaybejty jadu'n miiñ ma je Dios ñecy: “Ögıp je cuend'ajtpi, huin'it je cöbıxy yöyhuäcxtähua'ñ.” ³² E co anajty ich njugypıcyich jadüg'oc ma anajty ti n'ögyich, chi jayıjpnı nıicxa'ñich ma Galilea, e jım naybaatım nıdüg'ócıy.

³³ Chi Pedro yminañ:

—Oy yı' jacjadyıibi mıgügtıycich xyjadım'ixmajtztäy, per ni camına xıi ich miich n'ixmadzipy.

³⁴ Chi Jesús Pedro nımay:

—Janch tiy'ajt jadu'n nımäyich, cham coodz ca'ni anajty je tzey yaxıgy, miich tugıg'oc mına'nıp co ca' xy'ixy'adyııjich.

³⁵ Chi Pedro yminañ:

—Oy ich ndım'ögıp mıid miich, ni camına ngaminá'nıbich co ca' miich n'ix'adyıi. E nıdüg'ócıy je' ydiscıpulos ac tım jadu'n yminañ.

Jesús mıbijctzoy Dios jım Getsemanı

³⁶ Chi Jesús ñıxy mıid je' ydiscıpulos ajcxy, oy yja'tcıxy jım Getsemanı. Chi jım Jesús nımay je ydiscıpulos ajcxy:

—Ya miich ajcxy oc'ıña', mıın ich n'ocnıxyıch jım'amy Dios mıbijctzoobi.

³⁷ E chi Jesús ñıxy mıid Pedro etz nañ jadu'n mıid je Zebedeo ymang nımetzpi. E jım Jesús ñayjihuiıy janch tajy may mıj cajee. ³⁸ E chi jım yajnimay je nıdugıgpi discıpulos:

—Nayjihuiıybich taj may ma njot nhuinma'ñ, ixti mabaad anajty n'ögıch mıid tájın máyın. Hui'm miich ajcxy ya mıid ich etz ca' mmaagıxy.

³⁹ Huin'it Jesús ñajtzyöyıy mıjci'm jahui'. Chi jım ñaygojxtınaydacı naaxcıxy, e ytıgıy Dios mıbijctzoobi, yminañ:

—Dios Teedy, ich nDios, pen jëbi jadu'n, mduñ may'ajt pıjcıgıch jadayaabi tzaachypı ayo'n, per ca' yjadu'nıty nej ich ndzojcin mdunıpy, jadu'n mdunıpy janchtıy nej miich mdzojcin.

⁴⁰ Huin'it Jesús yhuimbijty jım ma anajty ti yajhui'my je nıdugıgpi. E oy paady ac tım maab anajty ajcxy. Chi nımay je Pedro:

—¿Nej ca' madäga'ñ miich ajcxy co m'idıpy juugy tüg hora mıid ich ycıxpi? ⁴¹ Hui'mı' ya, juugy m'idıpy etz mıbijctzoo Dios, jaydëb ca' je ca'oybi xymımadägıp. Janch tiy'ajt co jotjoty ooy mnıjot'ajtcıxy com tunaangıxy yı oybi. Per yı mnınıcx ca' ymadäga'ñ nıxy tuñ oybi.

⁴² Chi mımetz'oc Jesús ñıxy oy Dios mıbijctzoy, yminañ:

—Dios Teedy, pen copıcy co ich nbaadıbich je ayo'n, huen jadu'n yjadııyb mıid ich nej miich mdzojcin.

⁴³ Chi jadüg'oc Jesús huimbijty ma je nıdugıgpi discıpulos, e oy pátnıbi maab ajcxy, je' co ca' anajty ajcxy mımadägy mähuıı. ⁴⁴ Chi yajhui'my ajcxy, e mıdugıg'oc ñıxy Dios mıbijctzoobi. E nañ tım jadu'n oy mınaanıp jadu'n nej anajty ti y'ocmınamb. ⁴⁵ Chi jadüg'oc huimbijtnı jım ma je nıdugıgpi, chi nımay ajcxy:

—¿Máagixni? Pócxci x jadachambi. Ti je tiempo yhuaad'ajtni mina ich, je jäy huiðibi tzoon tzajpjoty, nyajciyegañich ma yi jibicjäydijc ajcxy. ⁴⁶ Pidiccix, tzoc jámim, chi ymiñ je huiðibi xyciyegaambich ma nmidzipich.

Tzумы mach ajcxy Jesús yajnicxy

⁴⁷ Jesús capxni anajty jim co yjäty je Judas. Judas hue' je' nidügti je majmetzpi discipulos huiðibi Jesús yhuin'ijx. E je Judas müd ja'ty mayjäy, je huiðibi anajty ti quexy je judío teedy mïjtungmüdpï etz je mijjäydijc. E je mayjäy hue' anajty ajcxy müd ypujx etz quipy. ⁴⁸ Judas, je huiðibi anajty ciyejcp Jesús, ti anajty jayijp yecy tüg ixcpejt huiðibi müd jëbi ajcxy ixcapy Jesús. Jadu'n jayijp Judas ycapxtuñ müd je' ajcxy, e yminañ:

—Je jäy huiðibi anajty ndzücxpich, yi' je' Jesús. Májtzcix.

⁴⁹ Huin'it Judas nimijhuägy Jesús co capxpocxa'ñ, chi yminañ:

—¡Huindzin!

Chi tzücx.

⁵⁰ Chi Jesús ñimay:

—Migüg, ¿na'amy co xyñimijhuägyich?

E co jadu'n nimay, chi mic'amy yi' ajcxy majch Jesús. Chi ajcxy yajnicxy tzумы mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy mïjtungmüdpï ytumbi. ⁵² Chi Jesús nimay je' ydiscípulo:

—Pidäg yi mbujx ma ytijc. Com pinjaty tziptumb müd pujx, nañ jadu'n y'ögipy müd pujx. ⁵³ ¿Nej ca' mnejhuüy co ich jëbi nbijctzooyich cham adzu'x may ángeles, je huiðibi xyñihuá'nibich ma nmidzipich? ⁵⁴ ¿Per nej ycixipy yca'pxipy nej miiñ jaaybety, jadu'n nej cham ytuñyii yjadyii müd ich ycixpi?

⁵⁵ Chi Jesús nimay je mayjäy:

—Miich ajcxy ti xyñidzonüyich müd je pujx müd je quiipy. ¿Nej mdijy ich meetzpi o jäy yaj'öcpich? Ich jabom jabom anajty iñäyich nyaj'ixpicyich miich ajcxy jii by ma Dios ytijc. E ca' miich ajcxy xymajchich. ⁵⁶ Huinjihu'i' miich ajcxy co tüg'óciy yam ytuñyii yjadyii ca'px tim jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhui'my naydügpajc.

Jesús ma naymujcpidijc yhuinduu

⁵⁷ Je' ajcxy huiðibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayyöymujctáayigixy je escribas etz je mijjäydijc ajcxy. ⁵⁸ E je Pedro anajty axam nicxy jiguëgy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy müd je cuend'ajtpi ajcxy, je' co oc'ixa'ñ ocnejhuñhua'ñ nej Jesús yjada'ñ.

⁵⁹ Je teedy ajcxy mïjtungmüdpï etz tüg'óciy je judíojäy mïjtungmüdpï ajcxy huinma'ñ ixtaaygixy nej jëbi Jesús yajpocycägixy müd ajcxy xihuin, e jadu'n jëbi mooygixy yi o'cin.

⁶⁰ Mayjäy ñihuambejty Jesús müd aani, per ni pin anajty ca' müdity tiy'ajt co Jesús anajty ti ytundigooy müd judíojäy ajcxy ycötujcin. Jac com jecy miin metz testigos müd aani.

⁶¹ Je' ajcxy yminañ:

—Jadayaabi yëydijc mina co jëbi nyajhuindigooyich Dios ymïjtazajptijc, e codugüg xii ti anajty nyaj'oyiyich jadüg'oc.

⁶² Huin'it je teedy mïjtungmüdpï ytinayigy, e nimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³ Per Jesús ca' y'adzooy. E huin'it je teedy mïjtungmüdpï ñimaay:

—Nimaayg ich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n ich miich ajcxy nimäy, co ich je jäy huiðibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuiñ.

⁶⁵ Chi je teedy jacmijtungmüdpí oy yhuít huindzecxy huinma'ch, chi ymíñañ:
 —Jadayaabi yéydíjc tí capxtigooy Dios. ¿Tí testigo njac-huaanim? Miich ajcxy cí'm tí mmidoogixy co yí' tí ycapxytígooy ma Dios, e minañ: ⁶⁶ ¿Nej miich ajcxy mínaangixy?
 Chi ajcxy ymíñañ:
 —Tí ycapxytígooy, copícy co y'ögípy.
⁶⁷ Chi ajcxy huindzuýj jíjptzuýj etz cojxy ajcxy. Chi jacjadyíi huingojxy jíjpcójxy. ⁶⁸ E chi ajcxy nímay:
 —Pen janch co miich je' je Cristo octiygapx pín tí xycoxy.

Pedro ymíñañ co ca'p Jesús íxy'adyíi

⁶⁹ Je huín'ít moñí Pedro anajty íñay tíbägujc. Chi nímiini tüg töxy'anäg tumbí, chi nímaayi:
 —Miich nañ jadu'n tí mhuidity müd Jesús je Galilea jäy.
⁷⁰ Chi Pedro ymíñañ mayjäyjoty:
 —Ca' nhuínjihuíyích tí mgapxpy.
⁷¹ Pedro hue' anajty pídzimníp co nímiini huingbí töxy'anäg. Chi je töxy'anäg nímay je' ymígügtíjc:
 —Jadayaabi yéydíjc tí yhuidity nañ jadu'n müd Jesús je Nazaretpí.
⁷² Chi Pedro jadüg'oc coyüch je Jesús cíxyjot huíníjot ymíñañ:
 —Ca' n'íxy'adyíijích yíjibí yéydíjc.
⁷³ Jac co hueení, je jäy huídibí anajty ajcxy jíimíp nímay ajcxy je Pedro:
 —Janch co miich nañ jadu'n anajty müd mhuidity yí Jesús, com yí m'ayuc yí' xya-níquëxícp.
⁷⁴ Chi Pedro tígíy capxpí janch oy nínej minañ huíníjot:
 —Ca' n'íx'adyíijích yí yéydíjc.
 E tím huín'ítíy je tzey yaxígy. ⁷⁵ Chi Pedro jäymejtzcoody jadu'n nej anajty Jesús tí nímayíi: “Ma ca'ní anajty tzey yaxígy cham coodz, miich tugíg'oc xycoyützibích.” Chi Pedro pídzimíy tíba', e jíiby oy yäxy míbaad yjotcidägy.

27

Chi Jesús yajcíyeycy ma Pilato

¹ E co oy yxímíy yticíy, chi je teedy míjtungmüdpí etz je míjjäydíjc ajcxy quípxycapxy co yaj'ögaangixy Jesús. ² Chi ajcxy yajnícxíy cíxoch oy ajcxy cíyeycy ma Poncio Pilato je gobernador.

Judas ñayöctíyí

³ Co je Judas je huídibí anajty tí cíyeycy Jesús, co íjxy co yaj'ögaaníp Jesús, chi oy yjotmaybaatní. Chi conhuimbíjty je íipxmájcpi plata meení ma je teedy míjtungmüdpí etz míjjäydíjc ajcxy. ⁴ Chi Judas nímay je teedy míjtungmüdpí etz je míjjäydíjc ajcxy:
 —Ích tí ndundígooyích co tí ngíyeycíy yí tudägyjäy ma miich ajcxy.
 Chi je' ajcxy y'adzooý:
 —Tí ích ajcxy n'occuent. Miich yí' mnígíxp tíbí mduñ.
⁵ Huín'ít Judas cohújyíy je meení jíiby tzajtígoty. Chi nícxíy. Chi ñayöctíyí.
⁶ Huín'ít je teedy míjtungmüdpí yajpídígy je meení. Chi ajcxy ñaynímaayi míñ xyipy:
 —Jadayaabi meení ca' yjébity co nbídaacím ma ofrenda nígidägy. Je' co yí' yjéjity je huídí ní'py tí tzoo'adyíi.
⁷ Huín'ít je teedy ajcxy tuñ je quípxycapxy co júyaangixy müd je meení tüg naax huídibí jäy ytíjp, tútznaax ít, ma ajcxy yajnaxtígíhuipy pínjaty ca' ycogajpíty jíim Jerusalén. ⁸ Íxtí chambaad jadu'n xí'adyíi jejímí it: Ní'py naax. ⁹ E jadu'n ycíjx yca'px nej je profeta Jeremías ymíñañ: “E jadu'n ajcxy je' yajpídígy meení íipx májcpi plata meení (je' choou

nej anajty ajcxy Israeljäy ti yajnegödugäy), ¹⁰ e mäd je meen ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmädpi etz je mijjäydijc tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxiyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocnejhuñyi ti ycapixy.

Jesús ycödujcy y'o'cin

¹⁵ Je gobernador jadu'n anajty ycostumbre mädity co jimijt jimijt najtzmazäy tüg machyjäy pascua xijoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'yajtaayb, e yxiijity Barrabás. ¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pin miich ajcxy mdzojcpy co ich nnajtzmazäyhuibichi? ¿Najtzmazäyich Barrabás o Jesús huidibi jäy ajcxy ytipty je Cristo? ¹⁸ Pilato ñejhuñyb anajty co mañ'ajtingix anajty ti cäyeyccixy Jesús.

¹⁹ Jimni anajty inäy Pilato me je ycotujctac co je ytöxyijc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co ich amygoodz ti ngumäyich janch jibic mäd yi' yciapi.”

²⁰ Per je teedy ajcxy etz je mijjäydijc ti anajty capxyjotcädaaccixy je mayjäy co huen yajnajtzmazäy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazäyhuibichi?

Chi je mayjäy y'adzooy:

—Najtzmazäy Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huidibi jäy ytipty Cristo?

Huin'it ajcxy nidüg'öciy y'adzoday:

—¡Yajcruutzpet yi Jesús!

²³ Chi Pilato yminañ:

—Pues, ¿nej ti ytundigooy?

Per je mayjäy nigoob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuñy co je mayjäy ca' ni nej niducy. Hue' ajcxy oy ytiñy huambi jihuñyi, chach ñayñajtztijyigixy mäd jot'an. Huin'it Pilato capxyñiguejxy je huädz ni. Chi ytiñy cibujp ma je mayjäy yhuinduu, e yminañ:

—Ca' ich ngo'adzohuipyich jadyaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ich ajcxy ngo'adzohuipyich yi' y'o'cin mäd n'ung anäg etz n'ap n'oc.

²⁶ Chi Pilato najtzmazäy je Barrabás. Per Pilato ane'my co huen Jesús yajhuojp. E co yajhuojptay, chi cäyeycy, co huen yajcruutzpedyii. ²⁷ Chi Pilato ysoldados ajcxy yajnicxy Jesús ma agujctijc. E jiiby tüg'öciy soldadtijc ñayyöymujci ma Jesús. ²⁸ Chi je

soldado ajcxy je' yhuít yajniñenducy. Chi ajcxy yajniñeniy je tzapx huit huídibi je rey ajcxy yajtuumyb. ²⁹ Chi ajcxy tacy tüg corona mïd apy. Chi ajcxy yajcöjeniy ma Jesús. E huín'it ajcxy a'oy'amy yajcigabiiy tüg je paxy. Chi ajcxy huingojxtinay'ahuíy. Chi ajcxy nixiicy yajxiicy, e ymínaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huíndzuju yijptzuju. Chi ajcxy yajcigajptucy je paxy, e yajcöhuojpígy ajcxy. ³¹ E co ajcxy nixiictay yajxiictay, chi yajniñenducy je rey yhuít etz yajniñeniy je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejti

³² E jim ma anajty hueeni ti ytüyöy, jim ti paty tüg Cirene yëydijc anajty yxiiñity Simón. Chi ajcxy adzip nimay Simón co huen jaccapi Jesús ycruidz.

³³ E co ajcxy yja'ty ma tüg je it yxiiñip Gólgota, jadu'n yhuimbídzim Öcpi Cohuajc Cögop. ³⁴ E jim ajcxy Jesús jayaj'üga'ñ vino temhuidity mïd tzooy, jigix ca' jihuihuip je tzaachypi. Per co uucmajch, chi jihui'ñybijc co ca' y'oy'uucnity.

³⁵ E co anajty ajcxy yajcruutzpety Jesús, chi je soldadtijc suerte ijxy, pin jëbi ocjé'adyii Jesús yhuít, chi ycijxy yca'pxy jadu'n nej je profeta cojaay jecy'ajty: “Yajhuäcxipy ajcxy ñich nhuit e mïd ñich nhuit ycixpi ixipy ajcxy suerte.” ³⁶ E jim anajty ajcxy ñaaygixy cuend'ajtcixy. ³⁷ Je xihuín ayuc huídibi ajcxy yjaay ma Jesús ycöduu jadu'n ymíñañ: “Jadayaabi je' Jesús, je judíos ajcxy je yrey.”

³⁸ Quipxy mïd Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huídibi ajcxy naxiiyb anajty ma Jesús, ooy anajty oy ycöjigíñ, nixigy yajxigy ajcxy Jesús, ⁴⁰ ymíña'ñ ajcxy:

—Bah, miich huídibi Dios ytijc jidaanip, e codugig xii huingbi myajpidíga'ñ. Miich ci'm cham naygohuäñii, e minac cruudzcíxy, pen janch miich Dios xy'ung'adyii.

⁴¹ Nañ jadu'n je teedy ajcxy huídibi mijtungmïdpi, etz je escribas, etz je fariseos ajcxy etz je mijjäydijc nixiicy yajxiicy ajcxy Jesús, ñayñimáayigixy miñ xyipy:

⁴² —Huingbi ti cohua'ñ, e ca' jaty nej ci'm ñaygohua'ñiiyb. Pen janch co yi' jëjity je Cristo je Israel jäy rey, huen minacy jadachambi ma cruudz, huín'it nmibijcin. ⁴³ Yi' ti pidägy ymibijcin ma Dios; huen jadachambi je Dios yajniñdzögyii, pen janch Dios chogyii; yi' ti ymíña'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huídibi cruudzpejt quipxy mïd Jesús nixiicy yajxiicy ajcxy ooy Jesús.

Jesús y'ögy cruudzcíxy

⁴⁵ Co ycuicxiiñiy, chi ycoodziyday tüg'óciy naaxhuiñybi. E jadu'n je naaxhuiñybi y'ijty coodz, ixti minacy yxií. ⁴⁶ Huín'itiy Jesús ycapxyqueecy janch mic ymíñañ:

—Elí, Elí, ¿lama sabactani? —yi' jadu'mbi ayuc hue' yhuimbídzim: Dios Teedy, Dios Teedy, ¿ti co ti xy'ixmachich?

⁴⁷ Nijëjity jäy huídibi anajty jim yajpatp huingon ma Jesús co jadu'n midoogixy Jesús y'ayuc, chi ajcxy ymíñañ:

—Jadayaabi yëydijc cham yaaxtaayb je profeta Elías.

⁴⁸ Huín'it nidüg jäy ñicxy janch poyígy etz oy yajtzoón je pixy. Chi je pixy yajxoogy mïd je xun vino. Chi pidacy je pixy ma je paxyijp. Chi yujctijy ma Jesús y'ahuac co huen ügy.

⁴⁹ Huín'it nijëjity ajcxy ymíñañ:

—Ixmatz, tzoc ajt oc'ijxim, pen nimiinip Elías, pen janch yajniñdzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tim huín'itiy jim ma Dios ytijc je mapxy yhuít yci'tzhua'cxy tinä'amy. E nañ jadu'n je naaxhuiñybi ooy chuyuy mïd ujx micpi etz je mijjatychaa oy jiitzhua'cxy. ⁵² May öcpi jut y'ahuach etz yjugypijcy mayjäy tiibi anajty y'o'ccixy tiibi anajty mibijccixy Dios. ⁵³ Co Jesús yjugypijcy,

chi je may'öcpi tiibi anajty jugypijccixy etz tiibi anajty pidzimgixy ma öcpi jut, chi ajcxy ytigüy ma je Dios ycajp, je Jerusalén. E mayjäy ajcxy ijxy. ⁵⁴ Co je mic ujx oy ñaxy etz jac tijaty anajty ti ytuñyii ti yjadyii, chi je capitán etz müd jadyii ymigügtijc huidibi anajty cuend'ajtp Jesús ooy ajcxy chigiy yjihuiy, e minaangixy:

—Janch tiy'ajt co yijiibi yëydijc Dios yi' anajty y'ung.

⁵⁵ May anajty nañ jadu'n töxyjäydijc ymij'ijxcixy jiguem huidibi anajty ajcxy Jesús ti müddzoon jim Galilea. Yi' anajty ajcxy Jesús ypubejtp. ⁵⁶ E ma je' ajcxy jim anajty chooñity, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtigüy

⁵⁷ Co oy chuu'üyñi ycoodzüyñi, huin'it chooñ ma Arimatea tüg comeeñyjäy huidibi yxii José. E je' ymijnicxpejty anajty Jesús. ⁵⁸ Chi José ninicxy Pilato oy pijctzou Jesús ñinïcx. Huin'it Pilato pidacy y'ane'min co huen möyü. ⁵⁹ Chi José ycüdigüy Jesús ñinïcx. Chi huinmojch müd tüg poob sábana. ⁶⁰ Chi yajnaaxtigüy ma je yci'm jut jemybi huidibi anajty ti yajtzejtztüty ti yajpädüty ma tüg tzahuingueetz. Chi adiguejctujcy je öcpi jut müd tüg tzaa. ⁶¹ Chi José ñicxni. E jim yhui'my María Magdalena etz je jadügpí María, y'inäy ajcxy ymihuingon öcpi jut.

Je cuend'ajtpi ajcxy ma Jesús ñaaxtigüy

⁶² E com jabom ma anajty Jesús ixüybi ti y'ögy, ma anajty ti ni'ixiydäy müd je sábado xii ycxipi, chi je teedy ajcxy huidibi tungmüd etz je fariseos ajcxy ñayyöymujci ma je Pilato.

⁶³ Chi ajcxy ymínañ:

—Huindzin, yi' ich ajcxy njäymejchpyich co je anüdacpi ymínañ ma anajty yjuugyity co codugüg xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigüy huen cuend'ajtcixy ixti cooni tugiig xübi paadipy. Ca' yjegyity co ñiminiib adzuum agoodz je' ajcxy huidibi mijnicxpejtíp etz tzinguëgipy ajcxy Jesús ñinïcx. E chi nicxy jäy ymína'ñ: “Ti yjugypicy je öcpi.” Chi anajty jac'anaxy je anü ti yjajtni ca'ydí je jayijpi.

⁶⁵ Chi Pilato ajcxy nimay:

—Miich ajcxy müd tüg picy soldados huidib cuend'ajtp ma miich ajcxy. Nicxcix miich ajcxy yaj'adujccixy je öcpi jut, jadu'n nej m'a'ixüygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

28

Co Jesús yjugypicy

¹ E com jabom co yximüy yticxügy je domingo xii, huin'it ñicxy María Magdalena etz je jadügpí María ma Jesús ñaaxtigüy. ² Chi tüg mij ujx ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa ñicx. ³ Janch adücxp je ángel anajty yhuinjíp jadu'n nej huidzuc, e je yhuit janch poob'ögy. ⁴ E co je soldados ajcxy ijspxty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzigüy. Ich nejhüybich co miich ajcxy m'ixtäy Jesús je huidibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej ymínañ. Min miich ajcxy oc'ix ma ñaaxtigüy. ⁷ Nicx miich ajcxy jottigooyb ma je ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mmüdnaybadüyb.” Ich miich ajcxy yam nnimaaygixy.

⁸ Huin'it je töxyjäy ajcxy chooñ janch poyügy ma anajty ti ñaaxtigüy Jesús. Chi ajcxy ñicxy müd tzigüñ, per agujc jotcujc. Poyügy ajcxy oy tiy'ajt yecy ma je discípulos ajcxy.

⁹ E jim anajty je metzpi töxyjäy ytüyöy, timetini Jesús ñayguëxíci ma je' ajcxy yhuinduu. Chi Jesús ajcxy capxpocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigíygixy. ¹⁰ Jesús minañ:

—Ca' mdzigíygixy. Nícx miich ajcxy nima' je nmigügtijcich co huen ajcxy nícxxy jim Galilea, e jim naybadíybiich mñd yi' ajcxy.

Huidibi ajcxy je soldadotijc ñigapx

¹¹ E tüyöybñi anajty je töxyjäy nimetzpi co nijējity je soldados ajcxy chooñ ma Jesús ñaaxtigíy nícxxy jim Jerusalén, mñdmíydäga'ñ je teedy huidibi tungmñdipi nej anajty ti ytuñyii ti yjadyii ma Jesús ñaaxtigíy. ¹² E huin'it je teedy ajcxy ñayyöymujctayi mñd je mijjāydijc, tunaangixy quipxy capxy. Huin'it je teedy ajcxy etz je mijjāydijc moy ajcxy je soldados may meen. ¹³ Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzingueeci Jesús ñinícx. ¹⁴ Etz pen ymidooyb anajty yi gobernador, íich ajcxy ngapxjotcidāgich, jigix ca' nej xytúngixipy.

¹⁵ E huin'it ajcxy je soldados ycidigíyí je meen. Chi ajcxy nícxxy cuyduñ jadu'n nej anajty ajcxy ti ñimāyii. E ixti chambaad jadu'n judíojāy capx je ayuc.

Huidibi Jesús yajnībījc ydiscípulos ajcxy

¹⁶ E jadu'n ajcxy nícxxy je nimajctügpí Jesús ydiscípulos ajcxy jim Galilea. Chi ajcxy nícxxy ma je cōgop jadu'n nej anajty Jesús ti ñimāyigixy. ¹⁷ E co ajcxy ijspxty Jesús, chi ajcxy oy huindzigíy. Per jim nijējity huidibi ca' mibijcy co anajty yjējity. ¹⁸ Huin'it Jesús ymijhua'cy ma yi' ajcxy, e nimay:

—Íich ti nyajmöyich je cōtujcín jiiby tzajpjoty etz ya naaxhuiñ. Íich ti nyajmöyich je mij cōtujcín, jaydēbi n'ane'myich jiiby tzajpjoty etz ya naaxhuiñ. ¹⁹ E paady nícx miich ajcxy huindu'my naaxhuiñ capxhuāxcix je ayuc, jaydēbi jāy ajcxy xymibigipyich. Tüg'óciy jāy ajcxy huidibi xymibijcpich myajñibedipy ajcxy mñd Dios yxíi, Dios y'ung yxíi, etz mñd je Espíritu Santo yxíi. ²⁰ Miich ajcxy myaj'ixpigipy je mayjāy co copicy cuydunipy ajcxy íich ngōtujcín tüg'óciy jadu'n nej ti n'ane'myich miich ajcxy. E miich ajcxy mnejhuñyb co nmñd'ityich miich ajcxy huinixíi huinítiempo, ixti mabaad naaxhuiñybi anajty ycixpi ytigooy. Jibaad ycixy. Amén.

SAN MARCOS Jaayhui'my Jadu'n Nej Jesucristo Ytun Yjajti

¹ Jadu'n oga'ñ chondacy je oybi ayuc tiy'ajt jadun nej Jesucristo, je Dios y'ung ytun etz yjajti.

² Je Dios y'ayucnajtzcaxhiybi je Isaías jecy'ajty jayhui'my jadun nej Dios nimay je Cristo:

Nguexaamyich ich ngogapxy jayijp ma nidüg nidüg caxp ma miich mnicxa'ñ jac'axam, jigix jëb je cogapxy nimähuipy je jäy ajcxy co huen nayñi'ixiiyigixy ma yjot yhuinma'ñ miid miich ycixpi, jadun nipaady nej jihuüy jäy ajcxy ni'ixiy tü'aa co tüg rey yjädä'ñ.

³ Nañ jadun jadüg it Isaías jayhui'my jada ayuc ma jadun yminañ:

Jim mijtigüduum jäy ajcxy midoy co tüg jäy y'ayuccapxhuäcxy, jadun yminañ: "Nayñi'ixiiyigix ma mjot mhuinma'ñ ajcxy jaydëb naybaatim miid ajt nHuindzin Dios. Ixmájtzcixy yi mjibicjot mjibic-huinma'ñ. Jadun nipaady nej jäy ajcxy yajtiy tü'aa huidibi ooy y'adijy y'a'och."

⁴ Jim mijtigüduum anajty Juan je Bautista miñ e ytigiiy mayjäy yajniibejtpi. Chi Juan capxhuäcxy Dios y'ayuc ma je mayjäy ajcxy huidibi anajty mimb niibejtp. Juan ayuc capxhuäcx co copicy co jäy ajcxy huen jothuimbijtcixy etz ixmájtzcixy ajcxy je yjibichuinma'ñ, etz niibéjtcixy, jigix jëbi Dios yhuinmecxiib ajcxy ypocy. ⁵ Tüg'óciy je mayjäy ajcxy huidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je y'ayuc. Co je jäy ajcxy capxpudzhiy nej anajty ypocytungixy, chi Juan yajniibejty ajcxy ma je Jordán mijni.

⁶ Juan hue' anajty yhuít'ajtpy camello niibijc, e nañ jëyim anajty miid ñayhuüñyii, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e yminañ:

—Ich jayijp ti nmiñich ngapxhuäcxy Dios y'ayuc. Jac'axam minipy tüg jäy huidibi jacniigi mic'ajt miidity ca'ydi ich, ca' xypaadyich nicxy nguejyich yi' ycighuin. ⁸ Ich ti nyajniibetyich miich ajcxy miid ni. Per je jäy huidibi yjacmiid Dios ymic'ajt, ca'ydi ich. Yi' xyaj'adigihuip xyajjotigihuip Dios yjihuüñ ymic'ajt, jadun nipaadip nej jihuüy xyajniibedip miid Dios yjihuüñ ymic'ajt.

Co Jesús ñiibejty

⁹ Je huin'it xii huin'it tiempo Jesús chooñ ma je caxp huidibi yxii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xii Juan yajniibejty Jesús ma je Jordán mijni. ¹⁰ Pidzimb anajty Jesús ma je mijni, e tim huin'ityi Jesús iix co je tzajp anajty y'ahuäch, e iix je Espíritu Santo chooñ tzajpjoty, e ycidägy ma yi'. Jadun je Espíritu Santo yquëxigy anajty nej tüg muuxy. ¹¹ Chi Jesús midooy capxy ayuc choñ tzajpjoty, nimäyii:

—Ich miich n'ung'ajtpy. Ooy ich miich ndzocy njihuüy. Ooy jotcuyc nayjihuüyijich miid miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajnicxy Jesús mijtigüduum. ¹³ E hue' Jesús yhuü'miy jim mijtigüduum huixchigülp xii ahua'n iyujc agujc. Huin'it je mujcu' jot'ijxy yhuinma'ñ ijxy je Jesús. Chi je ángeles ajcxy miñ ypubejty ypudigiiy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'ñ yi' y'ané'min ya naaxhuiñ. Jothuimbijtcix ajcxy, etz ixmajtzcix ajcxy mjibicjot mjibic-huinma'ñ. Mibijccix Dios y'ayuc jadu'n nej jëb ajcxy m'alma ñidzögiipy.

Jesús huodzooñ mīdaax jāy huiḁibi anajty acxmajtzp

¹⁶ Jesús huiḁijtp anajty ma je mejypa' huiḁib yxi Galilea mejy, co oy'ijxpaady Simón etz y'uch Andrés. Simón etz Andrés acxmadzi anajty ytung'ajtpy, ytimpidacpy anajty y'acxmadzi'ñ mejyjoty co ajcxy Jesús ixpaty. ¹⁷ Chi Jesús nimay Simón etz Andrés:

—Min mīd iich. Iich miich ajcxy huingbi tung nmöhuipy. Jadu'n mdung nipaadip nej jihuīy mjāymājtzcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy mīd Jesús.

¹⁹ Chi Jesús yjacyöy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen ñicxy mīd yi'. Mic'amy je' ajcxy ixmajch yteedy, je Zebedeo, barcojoty mīd ytumbi, chi ajcxy ñicxy mīd Jesús.

Tüg jāy huiḁibi anajty jibic espíritu mīd

²¹ Huin'it Jesús mīd ymigügtijc yja'ty jim Capernaum. Je huin'it sábado, je poocxin xii, Jesús ytiḁiy ma je judío jāy ajcxy ñaymujctac jim Capernaum, chi yjāyay'ixpijctzondacy.

²² Je mayjāy ooy ajcxy jihuīy huinmay je ayuc huiḁibi Jesús anajty ajcxy yaj'ixpijcp. Com Jesús hue' anajty yaj'ixpiy jadu'n nej jihuīy yci'm'ané'min mīdity. Ca' Jesús anajty yaj'ixpiy jadu'n nej je jāy ajcxy huiḁibi yaj'ixpijcp anajty Moisés ycötújcín je jécyip.

²³ E ma je naymujctac tüg yēdiyc huiḁibi mīd anajty ca'oybi. Chi je ca'oybi ooy mic ycapxcoody, e ymīaḁi:

²⁴ —¿Ti co xy'amayiy iich ajcxy, Jesús huiḁibi tzomb jim Nazaret? ¿Nej ti mmiñ co xyajhuindigoyāangixyichi? Iich n'ijxajpy miich, e nejhuīybich co miich je' je Huätzpi Dios.

²⁵ Chi Jesús ix'ojy je ca'oybi, e nimay:

—Amon miich, e pidzimb ma jada yēdiyc.

²⁶ Huin'it je ca'oybi yajyajch yajquidy je yēdiyc, e mic yaaxqueegy, e ypidzimy ma je yēdiyc. ²⁷ Tüg'óciy je mayjāy jilby ma je naymujctac ooy ajcxy ñay'adziḁiyi, e ñayñimaayī ajcxy miñ xyipy:

—¿Ti jada' yi'? Jada yēdiyc ymīd jemybi ixpijcin. Yi' mīd mic'ajt etz ane'm'ajt, paady yciḁi yi' ane'my yi' ca'oybi, e ycapxmīdoohuip.

²⁸ Mic'amy je mayjāy ajcxy huiḁijaty tzinaayb ma tüg tüg cajp jim Galilea nejhuīy ajcxy nej Jesús ytuñ, e cōmaaygixy Jesús.

Jesús yajtzögy Simón Pedro ymīd töxyjāybi

²⁹ Tim huin'itij Jesús ypidzimy ma je naymujctac, chi ñicxy mīd Jacobo etz Juan jim ma Simón etz Andrés ytijc. ³⁰ Simón ymīd töxyjāybi píjcp anajty. Cijx'am anajty y'ity, e mic anajty ooy ytoyii. Tim huin'itij Jesús ñimaayī co Simón ymīd ooy mic ypigyii. ³¹ Chi Jesús nimijhuägy je pa'mjäy. Chi majtzi yci', e huijtziḁy. Tim huin'itij yi' toyi y'ixmajtzi, e chi yajcay yaj'uucy Jesús etz ymigügtijc.

Jesús yajtzögy may pa'mjäy

³² Co xii oy ycidacni, e chuu'iñyñi, chi je mayjāy mīd miñ ajcxy ma Jesús tüg'óciy pa'mjäydiyc, etz huiḁijaty ajcxy ca'oybi ymīd. ³³ Tüg'óciy je mayjāy ajcxy ma je jimbij mij cajp nimujcy je tijc ma Jesús anajty ti yjättägy. ³⁴ Jesús yajtzoocay tüg'óciy je may pa'mjäy huenytimytiibá'mity, etz yajpidzimy may ca'oybi majaty jāy ajcxy. Per Jesús ca' anajty a'ixiy ñicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc tìy'ajt capxhuäcxy jìm Galilea

³⁵ Tim mooñi Jesús ymaybidìgy, ca' anajty yxiimiiyñi, e ypidzimy ma je cajp. Chi ñicxy ma tüg migtigiduum Dios mibijctzoobi. ³⁶ Huin'it je Simón etz je ymigügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymigügtijc ajcxy:

—Tzoc ajt jámim ma yì jacjadyi cajp huinduy agonbi, jaydëb ngapxhuäcxibich Dios y'ayuc nañ jadu'n ma yì jäy ajcxy jìm. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jìm Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nübützpa'mmüdpì

⁴⁰ Tüg jäy huidibi ymüid anajty jibic pützpa'm, je micpi, chi nimijhuägy Jesús, e ycojtinay'ahuüy ma Jesús yhuinduu, ymïnañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinïcx, e ymïnañ:

—Ndzojcpyich, cham nyajtzögy.

⁴² Co Jesús jadu'n ymïnañ, chi mic'amy je jäy huidibi anajty müid je jibic püdç chögy.

⁴³⁻⁴⁴ Mic'amy Jesús ycapxcíjxy müid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jiiby ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötüjcin ane'my, jigix jëbi huädz mbidzimipy ma Dios ycötüjcin. Cuydun miich huidibi Moisés ñajtz'ane'müy jecy'ajty, jigix jëbi je mayjäy ajcxy nejhuïhuip co ti mdzögy.

⁴⁵ Per je yëydijc ca' capxymidoy Jesús. Co ñicxy, chi ytigüy capxy yajyöybi jadu'n nej anajty ti yajtzögyi. Com je mayjäy nejhuïyb huidibi anajty Jesús ti tuñ, paady ycixpi Jesús ca' anajty ocjajtni nej ytigühuipy iixna' jigüe'xna' majaty cajp. Hue' anajty huidity ma ca' pin chinäy. Per miñ anajty y'oy'ixyüi huenyümypinjäyity, chooñ ma nidüg'óciy cajp huinduy agonbi.

2

Jesús yajtzögy tüg jäy cïma'tpì tecyma'tpì

¹ Ti anajty xii tiempo ñajtninïcxüyñi co Jesús yhuimbijty jadüg'oc jìm Capernaum. Je mayjäy ñejhuïyb anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigüydac ma je tijc, müid co tzach mayjäy anajty ti miingixy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midaax yëydijc cïymiñ cijx'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oyüy nej yajjädp ajcxy ma Jesús je pa'mjäy, je' co anajty chach üjtzyt je tijc müid je mayjäy, chi ajcxy yajcöhuaach hueeni je tijcnïcx ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymibijcin, chi nimay je pa'mjäy:

—Migügich, yì mbocy ti yajhuinmecxtäy.

⁶ Per nijëjty huindzindijc huidibi ajcxy nijaydutp anajty Dios ñecy co ajcxy midoy nej Jesús ymïna'ñ, chi ajcxy ymïna'ñ jotjoty huinma'ñjoty: ⁷ “¿Nej co jada jäy jadu'n ymïna'ñ co ti yajhuinmecxy jada pa'mjäy ypocy? Capxtigooyb yì müid Dios. Com ca' nipinjäy jëb ypocyhuinmecxy. Tügpaic Dios yì huidibi jëb ypocyhuinmecxy.” ⁸ Per Jesús ñejhuïyb anajty nej je' ajcxy chachmïna'ñ jotjoty huinma'ñjoty, paady mic'amy ymïnañ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yì pa'mjäy: “Ti mbocy yajhuinmecxytäy.” O jac'ooy co nnimähuibich: “Pidig, e yajpidig yì mdögy, e tüyöy?” Tú'ciy yì.

¹⁰ Chi Jesús yjacmíñ:

—Jadachambi janchtiy nyajquëxíga ñich co ñich, je jāy huidibí tzoon tzajpjoty, e huidibí cham yajpaady ya naaxhuiñ, nmíidich mic'ajt jaydëb nhuinmecxyich jāy ypocy.

Co Jesús jadu'n ymíñ, chi nímāy je pa'mjāy huidibí yci' ytecy anajty xuxy:

¹¹ —Ñich miich yam jadu'n nímāy: “Tinayig, yajpidig yi mmabejt e nícx ma mdíjc.”

¹² E mic'amy je pa'mjāy ypidig, e yajpidig ymabejt, chi ytüyöychoñ jiiby ma je mayjāy ajcxy anajty y'ixy yhuindíxcy. Paady ycixpi tüg'óciy je mayjāy ooy jihuiy huinmay etz jāymejch ojadajty ajcxy Dios, ymíñangíxy:

—Nimíñabi ajt jadu'n nga'íxim mǐjhuinma'ñ jadu'n nej cham ti n'íxim.

Jesús nímāy je Leví: “Pajamgich”

¹³ Chi jadüg'oc Jesús ycajppídzímy, ñícxy jím ma mejypa'. E co mayjāy ñayöymujcy jím ma Jesús anajty yajpaady, chi Jesús yaj'ixpijc je mayjāy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ññaayb anajty ma je yajcogüejttac jāy yajcogüejtp anajty. Chi Jesús nímāy Leví:

—Pajamgich.

Tim huin'ítíy Leví ytinayígy, ixmajch ytung, e panícxy Jesús.

¹⁵ Jadu'n yjajti co tüg xí Jesús caayb anajty me Leví ytiyc. Mayjāy huidibí ytung'ajtpy anajty yajcogüedí, etz jacjadyí jāy huidibí anajty tundígooyb mǐd judío jāy ycostumbre y'ññaaygíxy ma je caydac quípxy mǐd Jesús etz je' ydiscípulos ajcxy. Com may jāy anajty ooy Jesús tzach mǐd huidítcíxy. ¹⁶ Jím anajty ma Leví ytiyc nijējity fariseojāy, je huindzindíjc huidibí tzach padumb judío jāy ycostumbre. E co je' ajcxy íjxy co Jesús caayb uucp anajty tūgmucy mǐd tüg'óciy je mayjāy ajcxy huidibí tundígooyb mǐd judío jāy ytiy'ajt ycötújcín, etz yajcogüejtpídjic, chi ajcxy mǐgapxy Jesús ydiscípulos, je' ajcxy huidibí mǐjñíxcpejtp anajty Jesús, nímāy ajcxy:

—¿Nej co Jesús miich ajcxy mHuindzín ycaymucy y'ucmucy mǐd yí yajcogüejtpídjic ajcxy, etz jacjadyí jāy ajcxy huidibí tundígooyb mǐd judío jāy ycötújcín?

¹⁷ Co Jesús jadu'n mǐdoy nej je fariseo jāy nǐgapxyí, chi ajcxy nímāy:

—Ca' tzocy tzoydumbí yí jāy ajcxy huidibí mic'ajtp oy'ajtp. Yí' janchtiy yí huidibí ajcxy yuuba'm ymǐd chojcpy ajcxy tzoydumbí. Nañ tim jadu'n yí jāy ajcxy huidibí ca' ypocymǐdity, ca' ajcxy tzocy pocyhuinmeecxín. Ñich ti nmiñich co nyajjothuimbídyíych pocyjāyídjic. Ñich ca' ti nmiñich co nyajjothuimbídyíych oyjāyídjic tudāgyjāyídjic.

Jesús yaj'amídoogíxy nej co jāy y'ity jaygay

¹⁸ Jadu'n yjajti tüg tiempo ayuu'íjtp anajty je jāy ajcxy huidibí mǐjñíxcpejtp anajty Juan je Bautista. Nañ jadu'n ayuu'ajtp anajty je fariseojāy ajcxy. Chi nijējity ajcxy ymíñ ma Jesús e amídooy:

—¿Nej co yí jāy ajcxy huidibí mǐjñíxcpejtp ajcxy Juan etz nañ jadu'n yí fariseojāy ajcxy ayuu'ajtp ajcxy, e je jāy ajcxy huidibí miich xymǐjñíxcpejtp, ca' y'ayuu'ajtcíxy?

¹⁹ Chi Jesús y'adzooy:

—Co ya nyajpaadyíych ya naaxhuiñ, ca' ycopícity co ñich ndiscípulos ajcxy y'ayuu'adíp. Jadu'n nipaady nej jāy ajcxy huidibí píjcín nixíidumy ca' ajcxy y'ayuu'aty ma yam yí píjcín nixíiduñ, e pení ca'ni je píjcpí ymǐgügtíjc y'ixmajtztāyí. Namí je píjcpí ca'ni choñ, chi ca' pín y'ayuu'ada'ñ huidibí nixíidum je píjcín. ²⁰ E paadíp je xí je tiempo mǐna ca' nmíid'ida'ñich ya naaxhuiñ yí' huidibí ajcxy xymǐjñíxcpejtpíych, e huin'it ajcxy y'ayuu'adaangíxy.

²¹ Com jemybí Dios y'ayuc nyaj'ixpicpyíych, paady ca' ytügíy mǐd je jécyp ayuc huidibí je fariseo jāy ajcxy yaj'ixpijcpy. Jadu'n nej miich ajcxy mnejhuiy co ní pín ca' agiyíy tuc huit mǐd tüg pedaas jemy huit, con je' co je jemy huit nímujcp je', e chi nǐgí najtzcídzíhuíp je tuc huit. ²² E nañ ní pín ca' jēb huaad pídagy jemy vino ma tuc cochac.

Je' co je vino jemybi yciidzamy je tuc cochac, e chi y'ixyojctähuip je vino etz je cochac ñitigoydähuip. Hue' janchtiy jëb ajcxy pidacy jemy vino ma jemy cochac.

Je discipulos ajcxy yajmújicxy je moc cojc sábado xii

²³ Tüg sábado xii Jesús miid ydiscipulos ajcxy ñaxiiy ma tüg trigo cam. E huin'itiiy je ydiscipulos ajcxy ytigiiy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscipulos ajcxy anajty tujcmujc trigo tiiim, chi ajcxy nimay Jesús:

—Ix miich. ¿Na'amy co miich mdiscipulos túngixy huidibi judío ycötújcín capx'adujcpy sábado xii?

²⁵ Per Jesús yminañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymígügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar mǎitungmiidpi anajty ma Dios ytijc, chi David ytigiiy ma Dios ytijc, e caay je tzajcaagy huidibi ti anajty yoxy ma Dios yhuinduu. Dios ycötújcín yminañ co je teedy ajcxy ycaagy'ajtpy jada tzajcaagy, ca' jac'ooyñipin. Nañ jadu'n David moy je tzajcaagy je jäy huidib anajty ajcxy ymiid.

²⁷ Nañ jadu'n Jesús yjacminañ:

—Ich, je jäy huidibi tzoön tzajpjoty, nmíidich ané'mín, jaydëb nimäyich je jäy ajcxy ti jëb túngixy sábado xii. ²⁸ Com Dios ti ixmach je sábado xii, paady ycixpi, ich je jäy huidibi tzoön tzajpjoty, nmíidich ané'mín jaydëb nimayich jäy ajcxy co jëb tijaty tuñ sábado xii.

3

Je yëydijc huidibi anajty yci' tǎdzip

¹ Jesús ytigiiy jadüg'oc ma je judío naymujctac. Jiiby anajty tüg yëydijc huidibi anajty ymiid tüg yci' tǎtz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuñhua'ñ pen Jesús yajtzögamy je pa'mjäy sábado xii, jigix jëbi ajcxy xihuip Jesús co ti ytundigoy miid judíojäy ycötújcín. ³ Jesús nimay je jäy huidibi miid tüg yci' tǎtz:

—Pidig, min ya ma ich.

⁴ Huin'it Jesús y'amidoy je jäy ajcxy e nimay:

—¿Nej miich ajcxy mǎnaangixy: Nej jëbi jada nduñich je oybi o je jibicpi sábado xii joty? ¿Jëbi nyajtzögich jäy o jëbi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy. ⁵ Huin'it Jesús huindixpejty je jäy ajcxy miid chip y'ahua'n, e miid jotmay, je' co ooy ajcxy jotjuuñity, e chi nimay je yëydijc:

—Xajtiu yi mgi'.

Chi je yëydijc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip miid je jadügpicpy judío huindzindijc huidibi ymijnicxpejt je rey Herodes. Huinma'ñ ixtaayb anajty ajcxy nej jëb ocyaj'ögip Jesús.

Mayjäy ma tüg nǎba'

⁷ Per Jesús chooñ miid yi' ydiscipulos ajcxy, ñicxy ma mejypa'. E ooy mayjäy huidibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huidibi ajcxy tzomb jim Jerusalén, huidibi ajcxy tzomb jim Idumea ñaaxjot, huidibi ajcxy tzomb jim Jordán mǎjnii nǎnaxy ma xii ypidzimyb, huidibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñyb anajty ajcxy je mǎjhuinma'ñ huidibi Jesús anajty ytumyb. ⁹ Com tzach mayjäy anajty ymiingixy, paady Jesús ni'ane'mdiy ma yi' ydiscipulos ajcxy tüg barco ma jëb iñäy, ca'ty je mayjäy ooy y'adijiiy y'agodiiy. ¹⁰ Com Jesús ti anajty yajtzögy may jäy, paady ycixpi tǎg'óciy je pa'mjäy nimujcxy Jesús, adzip tzachnidonaangixy. ¹¹ Co je jäy ajcxy huidibi ca'oybi ymiid ijxpaty Jesús, chi ajcxy ñayhuijojtaci ma Jesús yhuinduu, e mic ycapxcooty, ymǎnaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiydaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yi' je ymügügtijc huidibi yhuin'ixamy co ytunam miid yi'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huidibi ymiid'idamy, e huidibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huidibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxii nidüg nidüg: Simón, je huidibi Jesús yxii moy Pedro; Jacobo miid y'uch Juan, yi Zebedeo y'ung y'anäg, je huidibi ajcxy Jesús yxii moy Boanerges (je ayuc Boanerges jadu'n yhuimbizimy: "Enee ymang"). ¹⁸ E jacjadyii huidib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huidibi Alfeo ymang'ajtpy; Tadeo; e je jadügpí Simón, je cananista. ¹⁹ Nañ jadu'n Jesús huin'ijxy Judas Iscariote, je huidibi agojix cäyejc Jesús ma ymidzip.

Yajniibjccixy Jesús co miidity mujcu' ymic'ajt

(Co jadu'n huin'ijxtaay je majmetzpi discípulos ajcxy), Jesús ytiigiiy ma tügtijc miid yi' ajcxy. ²⁰ Huin'itiy tzach mayjäy ñayyöymüjcigixy ma je tijc ma Jesús y'ity, ixti Jesús etz ymügügtijc ca' y'oyiy nej jëb ycaaygixy y'uuccixy. ²¹ Co Jesús y'amügügtijc jadu'n nejhuüy, chi ajcxy nimiiñ Jesús yajnicxaangixy anajty mach, com hue' anajty tijcixy co Jesús ylociib.

²² Nijëjity escribas ajcxy, je huindzindijc huidibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yi' yajpidzimy je ca'oybi ajcxy ma jäy ajcxy yjothuima'n miid Beelzebú ymic'ajt.

²³ Chi Jesús huoomiñ ma yi' je escribas ajcxy, e yajmiidmiydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy mina'n co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mina'n. ²⁴ Pen tügpicy tungmiidpi ixypy ñaybiyc-huá'cxigixy, etz ñaymidziptzoonigixy ixypy ac jëyi. Pues cixip yi' ajcxy y'ané'min. ²⁵ Nañ jadu'n pen tügpicy tüg juugy tüg migüg ixypy ñaybiyc-huá'cxigixy, ca' ajcxy y'idaangixy tügmucy. ²⁶ Nañ jadu'n pen Satanás ixypy ti ñaybiyc-huäcxii, e ci'm ixypy ti nayñibidigyii, ca' ixypy yi' ymic'ajt ida'n. Hue' janchtiy Satanás cixipy tigoyipy. (Paady ca'tiy'ajtiy nej miich ajcxy yminañ.) ²⁷ Ca' ni pin jëb huaad ytiigihui'p ma tüg micpi jäy ytiyc etz meedzipy tijaty ymiid, pen ca' jayijp cixoch tecyxoch je jäy micpi. Pen ti cixoch tecyxoch ixypy je micjäy, huin'it janchtiy mimadägipy, e pijcip tijaty ymiid.

²⁸ Janch ich miich ajcxy nimäy co Dios jëb huinmeecxip tüg'óciy pocy huidibi jäy ytúngixp etz tüg'óciy jibicpi huidibi jäy ycapxp. ²⁹ Jëyi janchtiy co pinjaty capxtigooyb miid je Espíritu Santo, je Dios yjihuñ ymic'ajt, ca' Dios huinmecxi nimina. Huinixii y'ida'n pocymiid.

³⁰ Miid co jäy ajcxy chach yminaangixy co Jesús anajty miidity ca'oybi, paady Jesús jadu'n yminañ.

Jesús ytaj etz y'uch miguëxy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capxñiguejxy Jesús. ³² Je mayjäy huidibi anajty ajcxy iñaayb jühuiditi ma Jesús, yminañ ajcxy:

—Miich mdaj etz m'uch cheeby ajcxy tiba'y miich ixtaayb.

³³ Chi Jesús yminañ:

—¿Pinjäy miich ajcxy mdijy co ñich ndaj'adyii etz ñich n'uch'adyii?

³⁴ Huin'it Jesús huindixpejty je jäy ajcxy huidibi anajty ñaayb ajcxy jühuidity ma je', e yminañ:

—Tüg'óciy jada jäy ya jadu'n ajcxy nipaady nej ñich ndaj etz ñich n'uch.

³⁵ Huenyitimypinity huidibi ajcxy cuydumb yi Dios chójcin, yi' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

4

Je niipi y'ixpejt

¹ Jadüg'oc Jesús ytigüy yaj'ixpijcpí ma mejypa'. E ooy mayjäy ymujcpejty ma anajty Jesús yajpaady. Miid co ooy anajty chachmayjäyity, paady Jesús ytigüy ma tüg barco jahuengi mejyjoty. Jesús ñaayb anajty barcojoty, e je mayjäy ñaayb anajty ajcxy ma mejypa'. ² Huin'it Jesús yaj'ixpijcy je mayjäy miid canaag jihuimbit ayuc. Co yaj'ixpijcy, chi yminañ:

³ —Amidoo'ijtcix miich ajcxy ñich jada n'ayuc. Tüg jäy chooñ niipi. ⁴ Co je niipi yhuijpy anajty trigo tiim, chi je trigo tiim nijejity oy ycäy tim tügujc. Chi je joon ajcxy ymiñ jicxy je trigo tiim huidibi tügujc ti ycäy. ⁵⁻⁶ E nijejity trigo tiim oycäy ma tzaanícx, ma nihueeñ oyñaax yajpaady. E je trigo tiim ca' tzip mujx je', je'co ca'anajty ooy naax mápxity. E co je xii ypidzimy, chi no'cy je trigo mang, com ca' anajty ytictz miidity naaxjoty, chi ytich. ⁷ E nijejity trigo tiim oycäy ma apyjot. Co jada trigo tiim ymujxy, chi y'ujtz'ögtäy je trigo mang, e ca' ytiim'ajty. ⁸ Per jacjadyii trigo tiim oycäy ma oyñaax, chi ymujxy, e ytiim'ajt may'amy: tüg pi'c pajc iipxmajc oyco'ity, jadüg pi'c pajc tugi'px oyco'ity, jadüg pi'c pajc migo'px oyco'ity.

⁹ Co Jesús je miydägi yajmay, chi yminañ:

—Pinjaty miid ytätzac, pin midohuamy, huen mido'mbicy jada ayuc.

Ti yi' ñigapxyp yi ixpejt

¹⁰ Co je mayjäy ñicxni, e Jesús yhui'my naydüg, chi je nimajmetzpi ydiscípulos ajcxy etz jacjadyii huidib mijnicxpejt Jesús ñimijhua'cy, e amidoy nej yhuimbizimy je jihuimbit ayuc. ¹¹ E Jesús yminañ:

—Miich ajcxy jaydéb mnejhuihuipy huidibi Dios ñigapxyp ñimiydacpy coyüch'amy ma y'ané'min ycötújcín. Jacjadyii jäy ajcxy jihuimbit'amy nyajmídmíydaacyich. ¹² Jadu'n jihuimbit'amy nyaj'ixpijcpyich je mayjäy, jaydéb co pinjaty iixp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiy nej yhuimbizimy je niipi y'ixpejt

¹³ Chi Jesús yjacminañ:

—¿Nej ca' miich ajcxy mhuinjihuüy jada jihuimbit ayuc? Pen ca' miich ajcxy mhuinjihuüy jada jihuimbit ayuc, ca' miich ajcxy mhuinjihuüip yi jacjadyii jihuimbit ayuc. ¹⁴ Je huidibi capxhuäcxp Dios y'ayuc, jadu'n yi' nipaady nej je huidibi niip trigo tiim. ¹⁵ Je jäy ajcxy huidibi amidoo'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tiim huidibi cáb tügujc, e je joon ajcxy mic'amy piimujctay. ¹⁶⁻¹⁷ Je jäy ajcxy huidibi amidoo'ijtp Dios y'ayuc janch jotcuje, e mibíjccixy tzojccix, chi ajcxy ixmajtzi Dios y'ayuc co agapxiyb paady, e co tzaachypi minaxy yajnaxy miid Dios y'ayuc ycixpi. Jadu'n ajcxy nipaady nej je trigo tiim huidibi ti ycäy ma tzaanícx. ¹⁸⁻¹⁹ Je jäy ajcxy huidibi amidoo'ijtp Dios y'ayuc, e co ñicxni, chi jäy digooyni Dios y'ayuc miid jotcuje'ájtín tziinaayín, etz comeeñ'ájtín etz adzójcín. Jadu'n ajcxy nipaady nej trigo tiim huidibi ti ycäy ujtzjoty, e ca' ytiim'aty miid co oy y'ujtz'ögy. ²⁰ Je jäy ajcxy huidibi amidoo'ijtp etz cöbijcp Dios y'ayuc amumdüjot etz Dios y'ayuc

tumb ma ajcxy yjot yhuinma'ñ, jadu'n ajcxy nipaady nej je trigo t̃im huiḍibi ti cāb ma oyñaax etz ytiim'aty may'amy: t̃üg pi'cpajc iipxmajc, etz jadüg pi'cpajc tugi'px, etz jadüg pi'cpajc migo'px.

Je lámpara ñi'ijxpejt

²¹ Chi Jesús yjacmíñ:

—Co jāy ajcxy j̃indicxi'ñ nōctzoy, chi canan ajcxy cōjuppy m̃id tu'tz, ni ca' ajcxy p̃idacy cijxpa'tci'py, hue' janchtiy p̃idaaccixy ma j̃indicxpejt jaydēb mij ytiicxy. ²² E nañ ni ca' ni pin ni ti jēb ameech tunipy, e nicxy ycayajnejhuīy. E ca' ni pin ni ti ayūch tunipy, e nicxy ycayajnejhuīy. ²³ Pinjaty ytātzac ym̃id, pin m̃idoohuamb, huen m̃ido'mb̃ijccixy iich n'ayuc.

²⁴ Nañ jadu'n Jesús ym̃inañ:

—Cuendtúngix jada ayuc huiḍibi miich ajcxy yam mm̃idooyb. Yi quipxi'ñ huiḍibi ajcxy myajquipx̃iyb, nañ jadu'n yi' m̃id Dios ajcxy xyquipxyhuimbidiy, e ixti jacyajm̃ohuip ajcxy huiḍijaty m̃idoob iich n'ayuc. ²⁵ Pinjaty ym̃id, yajm̃ohuip ñigi, pinjaty hueen m̃id, yajp̃igipy ñigi (oy ixyipy hueen jad̃im m̃idity).

Je t̃im huiḍibi yeecp ñi'ijxpejt

²⁶ Nañ jadu'n Jesús ym̃inañ:

—Yi Dios y'ané'min jadu'n yi' nej co t̃üg jāy nicxy ñipy ma ycamjot. ²⁷ Chi jada' co ñiip̃tay ñicxni ma ytiic e ymi'o'cni ym̃äybiḍ̃igni com jabom, e jadu'n yajnaxy canaag x̃i tzuu. E je moc pajc mujxp je' etz yomb. Per je cogam ni ca' nejhuīy nej je moc yoñ, ma mic'ajt paady. ²⁸ Je' co yi naax ci'm mic'ajt m̃idity jaydēb yajyoñ je moc. Jayijp yp̃idzimy je moc ung, jac'axam yp̃idzimy yi moc pijy, e chi jada' ytiim'ajtni. ²⁹ Co je moc ymajaani, chi je jāy ajcxy nicxy moc tzijcp, com ti yhuindiy je moc.

Ijxpejt ma je mostaz̃i pajc

³⁰ Nañ jadu'n Jesús ym̃inañ:

—¿Nej m'oc'a'ix̃iygixy yi Dios y'ané'min? ¿Ti m̃id n'ocyajquipyx̃ihuibich? ³¹ Jadu'n Dios y'ané'min nipaady nej mostaza pajc huiḍibi t̃üg jāy nicxy ñipy ma ycam. Yi mostaza pajc jacñigi ym̃útzity ca'yd̃i jacjadyi ujtzpajc huiḍibi yajpatp ya naaxhuiñ. ³² E co yajnipy je mostaza pajc, chi yoñ, e chi yeegy ooy janch mij, ca'yd̃i jacjadyi ujtz. E janch mij yeegy t̃üg'óc̃iy yci' y'aacx, ixti joon ajcxy pe'mb ma je yci'y'aacx y'anic̃iy.

Nej anajty Jesús yecy je tiy'ajt m̃id je ijxpejt yci'pxi

³³ Jadu'n anajty Jesús yaj'ixp̃icy je mayjāy ajcxy Dios ytiy'ajt m̃id canaag jihuimbit ayuc, ixti m̃ibaad ajcxy jēb huinjihuīy. ³⁴ Ac jihuimbit ayuc Jesús yajnimay je mayjāy. Per m̃id yi'ydiscípulos Jesús ycapxt̃icxtaayb anajty je jihuimbit ayuc.

Jesús capxt̃icx nej huimb̃idzimy je ijxpejt

³⁵ Je huin'it x̃i co ycoodz̃iy, chi Jesús nimay yi ydiscípulos ajcxy:

—Tzoc ajt j̃am̃im j̃im'amy ahuin ma yi jadügpi mejypa'.

³⁶ Huin'it Jesús ydiscípulos ajcxy ixmajtztay je mayjāy, e m̃id tzooñ Jesús barcojoty. Nañ jadu'n jacjadyi barco ajcxy choñ quipxy m̃id Jesús ydiscípulos ajcxy ybarco. ³⁷ Je huin'it coodz̃ t̃üg poj m̃iñ janch mic. E je mejy ñigoo anajty y'ocpiḍ̃igni. Janch tig̃iyb anajty ñi barcojoty, jagoo jagoo yca'ujtztay je barco m̃id ñi. ³⁸ Jesús maab anajty ma je barco iix ma t̃üg mabejt. Chi yajm̃äybiḍ̃igi, e nimay ajcxy:

—Huindz̃in, ¿nej ca'mduñcuend co iich ajt yam nguinaañim?

³⁹ Huin'it Jesús ym̃äybiḍ̃igy, e jip̃cogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús ym̃inañ:

—¿Na'amy co mdzacht̃ig̃iygixy ajcxy? ¿Nej ca' mm̃ib̃ijccixy co nm̃idich Dios ymic'ajt?

⁴¹ Jesús ydiscípulos ajcxy ooy chig'iy, e ñayñimaayi ajcxy miñ xy'ipy:
—¿Pin jäy jada' jada Jesús? Ooy chachmijhuinma'ñ co yi poj etz je mejy ycapxymidooyi.

5

Je Gadarajäy huidibi anajty ca'oybi müd

¹ Chi Jesús müd ydiscípulos ajcxy oyja'tcixy ma je mejypa' ma je Gadara jäy ñaaxjot.
² Tim mic'amy co Jesús ybarcobidzimy, chi nimiiñ tüg jäy huidibi ca'oybi müd anajty. Hue' anajty choon ma öcpi jut. ³ Je yëydijc, ca'oybimüdpí, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cixoch tecyxoch jada je ca'oybimüdpí, e ni ca' ajcxy mimadacy müd cadena. ⁴ Canaag'oc ajcxy jac'xojch jatecyxojch müd cadena, e ypojtayb anajty je cadena. Ni pin camihuinma'ñybaady nej jëb ocmimadaaccixy je ca'oybimüdpí. ⁵ Je ca'oybimüdpí xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayyajtzaachiyii anajty müd tzaa.

⁶ Jiguëgy anajty je ca'oybimüdpí ymiiñ, co ijxpaty Jesús, chi poy'gy ninicxy Jesús, e ycojxtinay'ahuíy ma Jesús yhuinduu. ⁷ Je ca'oybimüdpí mic migapxcooty Jesús, e nimay:
—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' iich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzim ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je "ni may", com ni may iich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yi may idzim, jigix jëbi n'adigiyich njottigiyich yi may idzim.

¹³ Chi Jesús jadu'n a'ixiy co jëbi adigiyigixy jotigiyigixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylociydaay, e ycögänaxtaay ajcxy ma tüg tzajijp, e oy ycädaaygixy nijoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiyi, e nicxtay ajcxy poy'gy ma ytijc. E oy nimiydaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy ijxcixy nej anajty ti ytunyii ti yjadyii. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymüd. Ijxy ajcxy co iñäy huit müd etz huijycujc, ti anajty y'oy'iy. E huin'it ooy ajcxy je mayjäy ñay'adzigiyi.
¹⁶ Je jäy ajcxy huidibi anajty huindixp co anajty je ca'oybimüdpí ti y'oy'iy, etz ijxcixy nej ti ytunyii ti yjadyii müd je may idzim, chi yajmiydactay je maycajppäy jadu'n nej anajty ti ijxcixy. ¹⁷ Huin'it ajcxy pijctzoy may'ajt ma je Jesús, co huen tzooñ ma ajcxy je ñaaxjot.

¹⁸ Co Jesús ytig'iy jadüg'oc ma je barco, chi je yëydijc huidibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixiy möhuip co huen müd'idyii Jesús.

¹⁹ Per Jesús ca' a'ixiy co ymüd'idyii, chi nimay:

—Huimbit ma mdijc etz mjugymigüg, e yajmüdmüydäg jada mijpi tung mijpi huinma'ñ huidibi je Huindzin Dios ti tuñ müd müich. Müdmüydägipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuíy huinmay.

Je Jairo ñix etz je töxyjäy huidibi Jesús yhuít nïdoni

²¹ Co Jesús huimbijty barcojoty ma je mejypa' ma anajty ti chooñ, chi mayjäy ymiiñ ma Jesús yajpaady, chi Jesús yhuäcxijpy ma je mejypa'. ²² Huin'it Jesús ñija'ti tüg mijtungmüdpí ma yí judíojäy ajcxy ñaymujctac. Je yëydijc hue' anajty xijity Jairo. Co Jairo ijxpaty Jesús, chi ñayhuijojtac ma Jesús yhuinduu. ²³ Jairo may'ajt pijctzoy, ymíñañ:

—Huindzin, ögaanip ich nñix. Tun may'ajt nicxy ma ich ndijc, e mgñíxájip ma ich nñix, jigix jëbi mayjtzögip, e yjactzinähuip.

²⁴ E Jesús nicxp anajty müd Jairo, e mayjäy panícxxy anajty Jesús. E je mayjäy ooy anajty tzach'adiji'y tzach'agodi'y Jesús. ²⁵ E ma je mayjäy ymiiñ anajty tüg töxyjäy pa'm müd, jécyiñ anajty ymijtacni. Majmetz jimijt yxi ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ müd may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigi anajty ypa'm mijhua'ñ.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiiñ etz nimijhuaägy jixci'py'amy, chi nidooni Jesús yhuitpa'. ²⁸ Jada töxyjäy nayñimaayi jotjoty huinma'ñyoty: “Co nnidónibich Jesús yhuitpa', müd tim yí'yí ndzögibich.” ²⁹ Co je töxyjäy nidoñ Jesús yhuitpa', tim huin'ítíy mic'amy yhuäcxijp je ni'py. Huin'it je töxyjäy jihuiy co anajty ti chögy.

³⁰ E Jesús jihuiy co anajty ti yajtzögy tüg jäy müd ymic'ajt, paady ni'ijxhuimbijty je mayjäy huidibi anajty pamíinip, y'amidooy ajcxy:

—¿Pin ich nhuit ti xyñidoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yí mayjäy xychach'adijy xychach'agodiy, e miich mína'ñ: “¿Pin ti xyñidónich?”

³² Per Jesús huindicxypejty je mayjäy jühuidity ma yí, oc'ixa'ñ ocnejhuihua'ñ pin anajty ti ñidonyi. ³³ Huin'it je töxyjäy, com ñejhuiyb anajty jadu'n nej Jesús ti yajtzögyi, paady nimijhua'cy Jesús janch tziyuuyb müd tzigí'ñ ñayhuijojtaci ma yí yhuinduu.

³⁴ Jesús ymíñañ:

—Töxyjäy huidibi ooy ndzócyich, ti mdzögy müd co ti xymibícyich. Nicx agujc jotcujc, ti mba'm ñaxy.

³⁵ Capxp miydacp anajty Jesús müd je töxyjäy co nijëjity jäy ñimiini, choñ ma je judío jäy ñaymujctac mijtungmüdpí ytiyc, e nimay je töxy'anäg yteedy:

—Yí mñix ti je y'ögy. Ca' huaad mjac'amayiy nüg yí Huindzin Jesús.

³⁶ Per Jesús ca' tuñcuend jadu'n nej ajcxy yjamína'ñ, chi nimay je naymujctac huindzin:

—Ca' mdzigiy, mibic nigoda'ajty.

³⁷ E ni ca' jac'a'ixiy nicxy yjacmüdnicxyi jacinjaty. Jëda'ajty müdnicxy je Pedro, Jacobo etz Juan, je Jacobo y'uch. ³⁸ E co Jesús ytiçtigüy ma yí naymujctac huindzin ytiyc, chi ijxy jadu'n nej jäy jiiy chachne'mgixy chachjiygixy chachyaaxcixy. ³⁹ Co Jesús tiçtigüy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yí pi'c töxy'anäg ca' yí ti y'ögy, maab yí'.

⁴⁰ Per nigoo ajcxy Jesús nixiicy co jadu'n ymína'ñ. Huin'it Jesús yajpidzimday tüg'óciy pinjaty anajty jiiy tigoty, e müd tiyc tigi y jëda'ajty je ungdeedy etz ungday, e nañ je tugügpí ydiscípulos huidibi anajty ti müd miiñ. Chi ajcxy ytiçtigüy jiiy ma anajty je töxy'anäg yajpaady. ⁴¹ Chi Jesús májtziiy yí töxy'anäg yci', e chi nimay:

—Talita, cumni —jadayaab ayuc hue' yí yhuimbizimy: Töxy'anäg, ich miich yam nimaayb, pidig.

⁴² Huin'ítíy je töxy'anäg, je huidibi anajty majmetz yjimijt, ypidigy e ytüyöychoñ. E tüg'óciy yí mayjäy ooy ajcxy jihuiy huinmay. ⁴³ Huin'it Jesús najtzcapxiy co ca' huaad pin

yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

6

Jesús yajpaady jim Nazaret

¹ Huin'it Jesús choon ma je jimbi it lugar, e yhuimbijty ma yci'mgajp. E müd ñicxy yi' ydiscípulos ajcxy. ² Sábado xijoty Jesús ytigiy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidoo'ijtp anajty ooy jihuüy huinmay ajcxy, e ñayñimaayi ajcxy miñ xyipy:

—¿Ma jada' jadayaab jäy ti ni'ixpigiy jadayaab ixpijcin? ¿Ma ti paady jada huijy'ajt cujc'ajt huidibi ymüd? ¿Ma jada' ti paady yi mic'ajt huidibi müd mijhuima'ñ tumyb? ³ Je' jada je tzejtzpi, yi María y'ung. Yi' y'uch ymigüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quipxy müd ñich ajt.

E je mayjäy ca'ajcxy anajty ixa'ñ cöbiga'ñ Jesús. ⁴ Huin'it Jesús nimay je mayjäy ajcxy:

—Huenma'amyity tög'óciy je mayjäy ooy yajmij'aty je jäy ajcxy huidibi najtzcapxüyb Dios y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ ytim jadu'n yi' y'amigügtijc etz ymijün ymidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy müd co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy. ⁶ Jesús ooy jihuüy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús choon jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcxy nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jëyi jëb miníxcixy tög tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jëyi je ycig etz je yhuit huidibi anajty ajcxy ymüd huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tög tijc, jim ajcxy mhuí'mipy ixti coon mdzoonip ma yijimbi cajp. ¹¹ Pen mdigüygixp ma tög cajp, e je jäy ajcxy ca' ajcxy xycöbiga'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuinhuópcixipy mgig. Jada je' je tiy'ajt co ca' ajcxy mjotcúcity. Janch ñich miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paada'ñ yi jäy ajcxy huidibi ajcxy anajty ca' xycöbúccixy, ca'ydi je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcxy co huen jäy ajcxy jothuimbújtcixy, huen ixmajtzaaygixy yi pocyatunü. ¹³ Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzóoccixy anajty.

Co Juan je Bautista y'ögy

¹⁴ Huin'it je rey Herodes nejhuüy co Jesús canaag mijhuinma'ñ tzachytuñ anajty, com tög'óciy je mayjäy anajty nimiydaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt müdity jaydeb mijhuinma'ñ tuñ.

¹⁵ Nijëjity jäy yminaangixy:

—Jesús yi' je' Elías.

E naagity jäy yminángixy:

—Yi' je' tög Dios tiy'ajtmüdpí huidibi quipxyüby müd je Dios ytiy'ajtmüdpí huidibi tzinay jecy'ajty.

¹⁶ Co Herodes nejhuüy nej je mayjäy nimiydaaccixy Jesús, chi yminañ:

—Janch jada co Juan ti yjugypicy, je huídibi nni'ane'mdiyich co huen yajminagyii ycohuajc.

¹⁷ Miid Herodías, Herodes ytöxytjic ycixpi, Herodes n'ane'mdiy co Juan yajmach, e pidägyii pujxtigoty. Jada Herodías jayijp ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich miiddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuiyb co tudägy jäy huädz jäy anajty je Juan, e tzigüyb anajty miid Juan. Paady ycixpi anajty je rey Herodes Juan miidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcujc anajty amido'ijty.

²¹ Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydijc huídibi ajcxy tzinaayb naag naag cajn jim Galilea. ²² Xiiduñyoty anajty co Herodías ñix oy y'ech ma je rey anajty yajpaady miid je may jäy huídibi anajty yajcaayb yaj'uucpy. E jadu'n nej je Herodías ñix y'ejch, ooy je rey jadu'n jäygidacy, etz tüg'óciy je jäy je huídijaty anajty miid ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojcyp, ich miich nmöhuipy.

²³ Je rey ñigi capxcödujcy janch cixyot huinijot co möhua'ñ ti ytimy ypijctzooyb, ixti jëb jamöy cujuhäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuipich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcypich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytiüy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanüy je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajcidiy je töxy'anäg, e je töxy'anäg yajcidiy ytaj.

²⁹ Co je jäy ajcxy huídibi anajty mijnicxpejtp Juan ñejhuiy ajcxy co je rey ti yaj'ögy Juan, chi ajcxy y'oy e yajpidici Juan ñinix, e yajnaaxtiy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huídibi anajty Jesús ti quexy y'ayuccapxhuäcxi ma canaag cajn, chi ajcxy yajmmdmtydacy Jesús tüg'óciy tijaty anajty ti tüngixy, etz tüg'óciy ayuc huídijaty ti yaj'ixpijccixy. ³¹ Huin'it Jesús nimay je nimajmetzpi huídibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty miidity mina ycaaygixipy y'uuccixipy miid je mayjäy ycixpi. ³² E Jesús miid ydiscipulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy miid nicxy. ³³ E mayjäy ijxy co Jesús ajcxy choñ, e nañ ixcajpy pin anajty tzoñ barcojoty. Paady mayjäy choñ ma canaag cajn tegyi'm, ñicxixy poygy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yömujectay. ³⁴ Co Jesús ybarcopizimy, chi ixxy janch mayjäy, e Jesús ooy pa'ayoy je mayjäy, com jadu'n anajty

ajcxy nej maycöbixy huidibi ca' mïidity ycuend'ajtpi. Chi Jesús ytigiy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'hiyñi, chi Jesús ydiscípulos ajcxy ñimaayi:

—Ca' ni pin chinäy ma jadaayaabi it lugar, e ti chu'hiyñi. Capxycix mïd jada mayjäy ajcxy, jaydëb ñicxcixyñi ma yi cajp huinduy agonbi, huen nicxy júygixipy ycaayin y'uucin.

³⁷ Huin'it Jesús y'adzooy yi' ydiscípulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad ich ajcxy nicxy njuy mejtz migo'px denario tzajcaagy, jigix ycaayipy y'ügipy jada mayjäy?

³⁸ Chi Jesús y'amidooy ydiscípulos ajcxy:

—¿Naag tzajcaagy miich ajcxy mïidity ya? Nicx íxcix.

Co ajcxy tiy'ajt paty, chi ajcxy Jesús ñimay:

—Ich ajcxy nmïd migoox tzajcaagy etz metz acx.

³⁹ Chi Jesús ni'ane'mdiy co je mayjäy huen ixtaaccixy naaxcixy tügpicyjaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huix-chiguïpxmajjatypi.

⁴¹ Chi Jesús conïgy je migooxpi tzajcaagy etz je metzpi acx, e ypa't'ijxy tzajpcixy, e yajnajxy Dios cojuyp ma Dios mïd je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcïdigiy je' ydiscípulos ajcxy, jaydëb ajcxy yajhuäcxip ma je mayjäy. Nañ jadu'n Jesús yajcïdigiy je metzpi acx je' ydiscípulos ajcxy, jaydëb yajhuäcxip ma je mayjäy. ⁴² Nidüg'óciy je mayjäy ajcxy ycaay y'uucy cüxyi. ⁴³ Co je mayjäy ycaayday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yëydijctijc huidibi cay uuc.

Jesús yöy ñihuingíxy

⁴⁵ Huin'it Jesús ane'my je' ydiscípulos ajcxy co huen barcotigiygixy mic'amy. Huen nicxïccixy jayijp jim Betsaida jim mejy ñinajxy. Co yi discípulos ajcxy ybarcotigiyday, chi Jesús ycapxycijxy mïd je mayjäy. ⁴⁶ Co anajty Jesús ti ycapxycixy mïd je mayjäy, chi ñicxy ma tüg cögop Dios mibijctzob. ⁴⁷ Co ycoodzïyñi je discípulos ajcxy anajty yajpaady mejyjoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscípulos ajcxy anajty ti y'anucxiygixy mïd mejycabii, je' co je barco anajty chachijpcoboñy. E co oy moñy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiygixy. ⁵⁰ Com tüg'óciy yi discípulos ajcxy anajty ti íxcixy Jesús, e ooy ajcxy chigiiy, paady mic'amy Jesús migapxy je' ydiscípulos ajcxy, e ñimay:

—Jotmic naybidáacigixy, ca' mdzigiiygixy. Ich yi'.

⁵¹ Huin'it Jesús ybarcotigiy, e mic'amy je poj yxeemy, e je discípulos ajcxy ooy jihuïy huinmay. ⁵² Ooy ajcxy jihuïygixy huinmaaygixy, com ca' ajcxy huinjihuïygixy anajty nej Jesús je mayjäy yajcay mïd je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim ijxcajpy Jesús. ⁵⁵ Poyigy je jäy ajcxy choon, e yajyöyñajxtay je cajp ajcxy huinduy agonbi, capxhuäccixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyty anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij

tüba', e cohuaníygixy Jesús co huen nidoñyí yí yhuitpa', e tüg'óciy huidijaty anajty ajcxy nĩdomb, najxp ajcxy anajty je' ypa'm.

7

Huidi jāy yaj'ahuimbijť pocyjayĩty

¹ Huin'it ymiiñ ma Jesús nijějity fariseojāy ajcxy, je huindzĩndijc huidibi tzachpadumb judío ycostumbre. Nañ jadu'n mĩd miiñ nijějity escribas, je huindzĩndijc huidibi ajcxy nijaydutp anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytigĩy caaybi uucpi jaygĩbujy, ca' anajty cuydũgixy judíoāy ycostumbre. ³ (Com yí fariseojāy etz jacjadyi judíoāy ajcxy cuydumb y anajty ajcxy ñi'ap costumbre, e ixpocypũjciy jayijp ma ca'ni ytigĩygixy caaybi uucpi. Com yí judíoāy ajcxy co ajcxy ñicxy mayjājoty etz yhuimbĩjciy jadũg'oc ma ytiyc, ca' ajcxy yca yxti cooni jayijp ajcxy ycĩbũjciy canaag'oc. ⁴ Yí judíoāy ymĩd canaagnax costumbre huidibi cuydũgixyp jadu'n nej ajcxy yajhuaatzciy ajcxy ytaasi ytexy ytũtz etz ypujxtexy.) ⁵ Chi je fariseos etz escribas ajcxy y'amĩdooy Jesús, nimaayi:

—¿Na'amy co miich mdiscípulos ajcxy ca' cuydũgixy judíoāy ñi'ap costumbre? ¿Na'amy co ajcxy ycaaygixy y'ũccixy, e ca' jayijp ixpũjciy yí' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmĩdpi Isaías jayhui'my jecy'ajty mĩd miich ajcxy ycixpi. Miich ajcxy huidibi naybĩdaacip jadu'n nej jihuĩy ajcxy tudāgyjāy, e ca' yjānchĩty. Com jadu'n Isaías jaybejty co Dios jadu'n ymĩnañ:

Jada jāy jadu'n ajcxy ycapxcixy ymĩydaaccixy jadu'n nej jihuĩy xyajmij'atyich. Per ca' ajcxy xyajmij'atyich cixyjot huinĩjot.

⁷ Naadĩgĩ co ajcxy xyhuin'ĩgĩxich xyhuinyáaxcixich. Ñayyaj'ixpĩjciy ayuc tiy'ajt huidibi jāy ajcxy ti cojy ti macxy.

⁸ Chi Jesús ymĩnañ:

—Miich ajcxy ti m'ixmājtcixy Dios ycõtũjcin, e myajmij'ajtcixy ayuc huinma'ñ huidibi jāy ci'm ti cojy ti macxy. ⁹ Miich ajcxy ca' mgũendtũgixy Dios ycõtũjcin Dios ytiy'ajt jigix jēbi cuydũgixy mgi'm costumbre. ¹⁰ Com Moisés je cõtũjcin ypidac jecy'ajty: “Yajmij'at mdaj mdeedy”, e “Pĩnjaty jibic nigapx ni'ojĩyb ytaj yteedy, copicy y'ögip.” ¹¹ E miich ajcxy mĩnañ co tũg jāy nimāhuip ytaj yteedy co ca' pubeda'ñ ajcxy jadu'n nej padyii, mĩd co tũg'óciy tijaty yí' ymĩd huidibi ytaj yteedy jē'adānĩp, hue' ti ahuanĩy nigoo ma Dios. ¹² E pen jadu'n mĩnañ, chi miich ajcxy mĩnaangixy co ca' copĩcyity mbubějtcixipy mdaj mdeedy. ¹³ Miich ajcxy mĩdundigooyb Dios ycõtũjcin mĩd mgostumbre huidibi myajnaxyp myajtigĩyb, etz jacjadyi jibic-huinma'ñ myaj'ixpĩjccixy.

¹⁴ Jadũg'oc Jesús mĩjhuoy yí mayjāy ajcxy, e chi nimay:

—Mido'mbĩjccix miich ajcxy iich n'ayuc, e mhuinjihuĩhuip ajcxy. ¹⁵ Ca' yí' yajpocycāhuĩyb huidibi jāy ajcxy ypidacy ma yhuin y'ahuac. Yí' janchtiy huidibi pidzim ma jāy ajcxy yjot yhuinma'ñ, yí' yí' yajpocycāhuĩb. ¹⁶ Miich ajcxy mmĩd mdātzac, mido'mbĩjccix iich n'ayuc.

¹⁷ Co Jesús ixmajch je mayjāy, e ytiťtigĩy, chi je discípulos ajcxy yaj'amĩdoohui nej yhuimbĩdzĩmy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuinjihuĩy jada ayuc? ¿Nej ca' mhuinjihuĩygixy co huidibi tigĩy ma yí jāy y'ahuac (yí caayĩn uucĩn), ca' yí' yajpocycāy yí jāy? ¹⁹ Yí caayĩn uucĩn hue' yí jāy ypidāgy ma y'aa ymoox ca' nan ma yjot yhuinma'ñ, e co ñax ma y'aa ymox, chi ypidzimni.

Co Jesús jadu'n ymína'ñ, chi nejhuiyim co Dios ca' capx'aducy ni ti caayin ni ti uucin.
²⁰ E Jesús yjacmínañ:

—Dios yajpocycähuip jäy ajcxy müd huidibi pidzim ma ajcxy yhuinma'ñ. ²¹⁻²² Ma yi jäy ajcxy yhuinma'ñ jiiby choon jibic-huinma'ñ; jiiby choon migapxtigoyi töxyjäy yhuinma'ñ; jiiby choon je tundigooyi yëydijc müd töxyjäy etz töxyjäy müd yëydijc huinma'ñ; jiiby choon jäyyaj'ögi huinma'ñ; jiiby choon meedzi huinma'ñ; jiiby choon mügi huididi huinma'ñ; jiiby choon jibic-huinma'ñ; jiiby choon je huin'ini huinma'ñ; jiiby choon nayca'oy'ixi huinma'ñ; jiiby choon je piitzcapxi huinma'ñ; jiiby choon je amij agix huinma'ñ; jiiby choon je tzuu huinma'ñ je loci huinma'ñ. ²³ Yi jadu'mbi jibicpi jiiby choon ma jäy ajcxy yjot yhuinma'ñ, paady jibicpi jäy ajcxy túngixy, e ypocycäy ajcxy ma Dios.

Tüg töxyjäy huidi ca' yjudiojäyity mibijc Jesús

²⁴ Choon Jesús ma yijimbi it, e ñicxy jim ma Tiro etz Sidón ñaaxjot. Jesús ytigi ma tüg jäy ytijc, e ca' anajty tzocy co je mayjäy ñejhuiy ma y'ity. Per ca' jajty nicx yhuingoyüch.
²⁵ Mic'amy tüg töxyjäy nejhuiy ma Jesús anajty yajpaady. Hue' je töxyjäy ypi'cnix ymüd anajty ca'oybi. Je töxyjäy ymüñ ma Jesús, e ycojxtinay'ahuíy ma yi' yhuinduu. ²⁶ Je töxyjäy hue' anajty ycocájpity Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimy je ca'oybi ma ypi'cnix yjot yhuinma'ñ. ²⁷ Chi Jesús je töxyjäy nimay:

—Ooy ycopicyity co nbubedipyich jayijp Dios yjäy (yi judíojäy). Jadu'n nipaady nej tüg ungdeedy. Tim copicy co je ungdeedy yajcayipy jayijp yci'm ung, e ca' möhuip uc je huidibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej müch mmina'ñ, per nañ jadu'n yi uc ajcxy yjicxyp je caagy abu'x huidi cäb naaxcixy ma mesipa't ma je jäy y'ung ajcxy ycaay.

²⁹ Chi Jesús je töxyjäy nimay:

—Tiy'ajt jadu'n nej ich müch ti xy'adzooy, paady ycixpi jëb mhuimbidity ma mdijc jotcujc, je ca'oybi ti ypidzimy ma mnix yjot yhuinma'ñ.

³⁰ Co je töxyjäy huimbijty ma ytijc, chi paty ypi'cnix cijx'am, ti anajty je ca'oybi ñibidzimyi ycöbidzimyi.

Jesús yajtzögy tüg jäy huidibi cönat etz ahuí'mb

³¹ Chi Jesús jim tzojci chooni Tiro ñaaxjot. Chi choon jim ñicxy anajty Galilea, e nicxy ma je tü'aa huidibi najxp Sidón etz je cajp huidibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy müd müñ tüg jäy huidibi cönatip etz aahuí'mb. Chi ajcxy may'ajt pijctzooy ma Jesús huen cñixajy je pa'mjäy. ³³ Chi Jesús müdnicxy je pa'mjäy ahuingujc ma ca' mayjäy, e pidacy ycíhua'x ma je pa'mjäy ytätzac. Chi chujy, e huin'it nïdoni je ytoodz. ³⁴ Chi Jesús ypa't'ijxy tzajpcix, e ymicxejy, e chi ymínañ Aramaico'amy:

—Efata —jada ayuc hue' yhuimbidity: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungiy etz ycapxni yajxon.
³⁶ Chi Jesús ane'my je pa'mjäy etz ymügütiyc co ca' huaad ni pin yajmüdmüydägiy jadu'n nej anajty ti chögy. Co Jesús jadu'n mictägy ane'my co ca' huaad ni pin yajmüdmüydägiy je mijhuinma'ñ huidibi ytumy, chi ñgi je pa'mjäy etz ymügütiyc müdmüydaaccixy hueñypinity. ³⁷ Je mayjäy ooy tzachjihuiy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymimadactaayb yi'huenyitimytijity, ixti yajmidohuicpy yi' yi cönatpi etz yajcapxigy yi uumbi.

8

Jesús yajcay mɨdax mil yēydijc

¹ Je huin'it xii je huin'it tiempo mayjäy anajty ti ñaymújcigixy ma Jesús yajpaady, e ca' anajty je mayjäy ajcxy mɨdity ti ycaaygixipy y'úuccixipy. Jesús capxyñiguejxy je' ydiscípulos ajcxy, co huen miingixy ma yi' yajpaady. Co ajcxy ymiñ, chi nimay:

² —Ooy nba'ayooyich yi mayjäy. Yi' co cham mɨdugüig xii maabi ya mɨd y'ityich je mayjäy, e ni ca' ajcxy mɨdity ti ycaipy. ³ Co ixipy nguexhuimbityich ajcxy ma ytijc ayuu, ca' yjēcyity yajpa'mgójipy ajcxy tü'am, com nijējity ajcxy jiguēgy ti choongixy.

⁴ Chi je discípulos ajcxy Jesús adzooy:

—¿Ma ñich ajt nbaatim je caayin uucin huidibi jēb mɨd nyajcaayim nyaj'úucim jada mayjäy? Com mɨjtigɨduum ya nyajpaatim ma ca' pɨn chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy mɨdity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen ñay'ahuiygixy naaxcixy. Huin'it Jesús congy je huixtujcp tzajcaagy, e yajnajxy Dioscojuyip ma Dios mɨd tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymɨd anajty nijējity pi'c acx. Chi Jesús yajnajxy Dioscojuyip ma Dios mɨd je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'ócxy ycaay cüxyi, e co ajcxy ycaayday, chi je Jesús ydiscípulos ajcxy yajpidigy huixtujc cach cayduc jücxatuc tübi anajty yconaxy. ⁹ Jahueeni anajty ycamidaaxmility je jäy huidibi ajcxy cay uuc cüxyi. Chi Jesús ycapxy ycixy mɨd je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy mɨd ydiscípulos ajcxy, e chi ñicxy ajcxy jɨm Dalmanuta ñaaxjot.

Yi fariseos ajcxy tüg iixpejt pijctzoob mɨjhuinma'ñybi

¹¹ Nijējity fariseos ajcxy, je huindzɨndijc huidibi padumb judío ycostumbre, ymiñ ajcxy ma Jesús yajpaady, e ytigiy ajcxy iixquípcixy y'ixpijcin mɨd Jesús. Pijctzoogixy co Jesús huen yaj'ixyii ajcxy tüg iixpejt huidibi tzomb tzajpjoty. Ijxta'n octunaangixy mɨd Jesús. ¹² Chi Jesús tajy may ñayjihuiy jotjoty huinma'ñyoty, chi ymicxejy, e ymɨnañ:

—¿Na'amy co jada jäy ajcxy huidibi jugy'ajtp cham, pijctzoogixy iixpejt huidibi tzomb tzajpjoty? Janch ñich miich nimaaygixy co ca' nyaj'ixaangixy iixpejt huidibi tzomb tzajpjoty.

¹³ E Jesús ytimycapxycixy mɨd je fariseos ajcxy, e chi puyöyduuty ajcxy. Chi Jesús ybarcotigiy, e ñicxy mɨd ydiscípulos ajcxy ma mɨj laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jücxxy pi'cy co ajcxy ybarcotigiy. Jēyi ajcxy mɨmiñ tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e ymɨnañ:

—Ca' mmɨjpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huidibi ca' y'óyity.

¹⁶ E je Jesús ydiscípulos ajcxy nimydaaccixy Jesús y'ayuc ñayñimáayigixy ajcxy miñ xyipy:

—Je' co ca' ñich ajt nmɨmiinim caayin uucin.

¹⁷ E Jesús ñejhuiyb anajty nej je' ydiscípulos ajcxy ñayñimaayi miñ xyipy, paady ymɨnañ:

—¿Na'amy co mdzachnimydaaccixy je caayin uucin huidibi ti mjäy digooygixy? ¿Nej ca' mhuinjihuigixy e ca' mguenditungixy ñich n'ayuc? ¿Nej co ajcxy mdzachcöjuuñity?

¹⁸ Miich ajcxy mɨd mhuiin: ¿Nej co ca' m'ijxcixy huidibi ndumyich? Miich ajcxy mɨd

mdädzac: ¿Nej co ca' mmido'mbíjccixy ñich n'ayuc? ¿Nej co ca' mjäyméjtzcxixy ti ti nduñich?
¹⁹ Jayhuin co ndujc-huäcxyich je migooxpi tzajcaagy e nyaajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' ñich ajcxy nyaajpidígyich majmetz cach cayduc jicxtuc.

²⁰ Chi Jesús yminañ:

—E jayhuin co ndujc-huäcxyich je huixtujcpi tzajcaagy, e nyaajcaayich mīdaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' ñich ajcxy nyaajpidígyich huixtujc cach cayduc jicxtuc.

²¹ Chi Jesús yminañ:

—¿Nej chambaad miich ajcxy ca' mhuinjihuñy?

Jesús yajtzögy tüg jäy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijējity jäy mīd mīñ ma Jesús tüg huintzpi, e pijctzoy ajcxy may'ajt co huen nīdoñ jigix je huintzpi y'ijxigipy.
²³ Huin'it Jesús huijtztzooñ je huintzpi ma yci', chi mīd cajppidzimy. E chi Jesús yajjaaxy yi chujyñi je huintzpi yhuiin, etz cñixajy, e chi amīdoy pen y'ijxpy anajty tigati yinjaty huenjaty. ²⁴ Chi je huintzpi huindixpejty Jesús, e nīmay:

—N'ijxypich yēydijectijc, e jadu'n ajcxy yquēxígy nej quipy, per yöyp ajcxy.

²⁵ E jadüg'oc Jesús yci' pidacy ma je huintzpi yhuiin, e chi je huintzpi yhuindixpejtpy anajty, e chi yhuiin y'oyñy yajxon, huin'it oy huädz y'ijxy. ²⁶ E Jesús ycapxycíjxy mīd je', e quejxhuimbijty ma ytijc. Chi yminañ:

—Ca' mdigihuip cajpjoty, e ni pin jada mgayajmīdmīydägy.

Pedro capxypidzimy co Jesús y' je' je Cristo

²⁷ Chi Jesús ñicxy mīd ydiscípulos ajcxy jim ma nijējity mutz cajp mihuingon je mij cajp Cesarea Filipo. E tü'am Jesús amīdoy ajcxy ydiscípulos, nīmay:

—¿Nej jäy yminaangixy pin ñich?

²⁸ Chi ajcxy je' ydiscípulos y'adzooy:

—Nijējity jäy yminaangixy co miich je' je Juan, je Bautista. E nijējity yminaangixy co miich je' je Elías. E jacjadyi yminaangixy co miich je' tüg Dios y'ayucnajtzcaxñybi huīdibi tügñyb mīd nijējity Dios ytiy'ajtmīdipi huīdibi tzinaay jecy'ajty.

²⁹ Jesús y'amīdooy je' ydiscípulos ajcxy:

—Miich ajcxy, ¿nej miich mīnaangixy pin ñich?

Chi Pedro y'adzooy:

—Miich je' je Cristo.

³⁰ Chi Jesús nīmay je' ydiscípulos ajcxy co ca' huaad ni pin nīmaaygixy, co y' je' je Cristo.

Jesús capxypidzimy co y'öga'ñ

³¹ Chi Jesús jacyaj'ixpijcy je' ydiscípulos ajcxy, e yminañ:

—Copicy co ñich, je jäy huīdi tzoön tzajpjoty, nyajñaxipyich mij tzaachpyi etz mij ayo'n. Yi mijjāydijc ajcxy, yi judío teedy mījtungmīdipi, etz yi escribas, je huīdzindijc huīdibi nījayduutcxyp Dios necy, ca' ajcxy xy'ixa'ñich, e xyaj'öga'ñ ajcxy, e codugñig xñ njugypigipyich jadüg'oc co ñich anajty ti n'ögy. ³² Co Jesús jadu'n nīgapxy nīmīydacy huädz huädz nej yjada'ñyī anajty, chi Pedro huobībzimy Jesús ahuingujc, chi ooy ogy. ³³ Chi Jesús nī'ijxhuimbijty ydiscípulos ajcxy, e ogy je Pedro, ñīmay:

—Huīnhuāctuutcih, miich Satanás. Com miich ca' mhuīnma'ñ mīdägy nej Dios tzocy. Yi' janchtiy miich mhuīnma'ñ'ajtpy nej jäy ajcxy tzocy.

³⁴ Huin'it Jesús huoomiñ y' ydiscípulos ajcxy etz yi mayjäy, e chi nīmay:

—Pen ji pinjaty xypanicxa'ñich, huen jäydgoydäy yci'mdzócin etz huen xypanicxich jabom jabom. Oy nej ytimyjadipy ytimy'ayoohuipy. Jadu'n nipaady nej jihuiy ajcxy anajty mgruudz mgabiccixy, etz naygiyéjigixy ma yi ó'cin huen ytimyñejity mïd ñich ycixpi. ³⁵ Huenpinjäy huidibi ca' yega'ñ yi yjugy'ájtín ma yi ó'cin mïd ñich ycixpi, hue' je' yajtigoyamy yi'yjugy'ájtín. E huenpinjäy huidibi yegamy yjugy'ájtín ma yi ó'cin mïd ñich ycixpi etz ñich y'ayuc oybi ycixpi, hue' je' ypadamyb yi jugy'ájtín huidibi ca' cixipy tigoyipy ni minaa. ³⁶ ¿Ti oy'ájtín yi' co tüg jäy y'ocnayyapadüyb yi meen etz mic'ájtín (huidi yajpaatp ya ñaaxhuiñybi) e y'alma yjugy'ájtín cixipy tigoyipy tügciy? ³⁷ ¿Jadu'ñyi jëb jäy y'alma yjugy'ájtínoccojuyi? Nigi tzoohuin mïdity jäy ajcxy y'alma yjugy'ájtín, ca' jac ti. ³⁸ Huentimpínity yi huidibi xymidzo'ydúnibich yi n'ayucich ndiy'ájtich ma yi pocyjäydijc yhuinduu huidibi tzinaayb cham ma jada naaxhuiñybi. Pues nañ jadu'n ñich, je jäy huidibi tsoon tzajpjoty, nmidzo'ydúnibich yi jadu'mbi jäy co ñich anajty nhuimbity ya naaxhuiñybi mïd ñich nDeedy, je Dios Teedy, ymic'ajt y'oy'ajt etz mïd tüg'óciy yi may'ángeles ajcxy tudägyipi.

9

¹ Jadu'n Jesús yjacminañ:

—Janch tiy'ajt jadu'n nej ñich miich ajcxy cham nimäy, co nijëjity miich ajcxy huidibi cham ma ñich yhuinduu, ca' m'ögaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinïcx yajtigajch

² Co tuctujc xii naxy, chi Jesús mïd tzoön Pedro, Santiago etz Juan, e mïdpa'ttigiiy ma tüg mijcop ma tüg it ooy ycixity. E jim copcixy Jesús ñinïcx naygojtigajtzní ma Pedro ajcxy yhuinduu. ³ Chi Jesús yhuít oy y'ahuimbity janch poob, e janch adicxp. E ni pin jadu'n yhuít cayajhuäch janch poob jadu'n nej je' anajty yhuít mïdity. ⁴ E chi oy nayguëxgyii ma ajcxy yhuindu Elías etz Moisés. Elías etz Moisés mïydacp anajty ajcxy mïd Jesús. ⁵ Huin'it Pedro nimay Jesús:

—Huindzin, janch oy jadu'n co ñich nyáajity. N'occojyich ajcxy tugiiq tijcquemy: tüg miich mje'; tüg Moisés yje'; etz tüg Elías yje'.

⁶ Com Pedro, Jacobo etz Juan ooy anajty chigiigixy, paady Pedro ca' anajty nejhuüy ti ycapxyp. ⁷ Tim huin'ítiiy tüg joc yajnïdigoy je' ajcxy, e mïdooy ajcxy ayuc jocjoty, e je ayuc yminañ:

—Jada je' ñich n'ung, huidibi ooy ndzocyich. Mïdo'mbic miich ajcxy Jesús y'ayuc.

⁸ E tim huin'ítiiy Pedro, Jacobo etz Juan ajcxy yujc'ijxy, e yja'ijxhuidijty ajcxy, e ca' ni pin ma ocjac'ijxni, jëda'ajty Jesús naydügpajc.

⁹⁻¹⁰ Ti anajty choongixy copcixy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmïdmiydaaccixy pinjaty huidibi ajcxy anajty ti ijxcixy, ixti cooni ñich, je jäy huidibi tsoon tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmïydägy mïd jacinjaty huidibi anajty ti ijxcixy. Per ooy ajcxy huinmay etz naymïdmiydaacigixy miñ xyipy ti Jesús ytijamy co yminañ: “N'ögibich etz njugypigipyich jadüg'oc.” ¹¹ Huin'it ajcxy Jesús y'amïdooy:

—¿Na'amy co yi escribas yminañ co yi Elías huidibi chinay jecy'ajty jayijp miina'ñ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydi je Cristo, e yaj'oyidähuipy huinjemybi tüg'óciy mïd Dios ycixpi. E nañ tiy'ajt jadu'n co jaybety ymiñ ma Dios ñecy co je Cristo, je jäy huidib tsoon tzajpjoty, yajnaxa'ñ ayo'n etz tzaachyp etz mayjäy ca' y'ixa'nüby. ¹³ ñich miich ajcxy nimaayb co je Elías ti je'

yhuimbity ya naaxhuiñ, e je mayjäy ti túngixy mïid Elías nej anajty tim tzójcixy. E cuyduñ ajcxy nej jaybety miiñ ma Dios ñecy mïid Elías ycíxpi.

Jesús yajtzögy tüg mutz'anäg huidibi ca'oybi mïid

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhui'mïy, chi ajcxy ijxy mayjäy jühuidity ma Jesús ydiscípulos ajcxy. Etz ijxy ajcxy nijëjity escribas huidibi ayuc tzachyajtziyb mïid Jesús ydiscípulos ajcxy. ¹⁵ E co je mayjäy íjxcixy nejhuigixy co Jesús ti yhuimbity anajty, chi mic'amy ajcxy ninicxy Jesús poyïgy, e capxpocxcixy, e may je' ajcxy ooy jihuïy huinmay. ¹⁶ Chi Jesús y'amidooy je mayjäy, nimay:

—¿Ti ayuc miich ajcxy mdzachyayjomyb mïid ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmïidmiiñ ñich nmang huidibi ymïid ca'oybi, e je ca'oybi ti yaj'umïyii.

¹⁸ E janam jadozje je ca'oybi yajyachyii yajquïdyii ñich nmang, e oy cäy naaxcíxy, e ooy y'aa'opy ypidzimy, e nañ jadu'n oy ytítz queety etz ñinícx janch ögy yhui'my. Ti nbijctzoyich may'ajt mïid miich mdiscípulos ajcxy co huen yajpidzimigixy je ca'oybi ma ñich nmang, e ca' ajcxy ymadacy nicxy yajpidzimigixy.

¹⁹ Jesús nimay je mayjäy:

—Miich ajcxy huidibi jugy'ajtp jadachambi xñ tiempo huidibi ca' mijpidägy Dios y'ayuc, ¿naag xñ naag po' ñich njac-hui'mmïhuibich mïid miich ajcxy? ¿Naag xñ naag po' n'ocmímecxtuguipich miich ajcxy? Mïidmiin yi mmang ya ma ñich nhuinduu.

²⁰ Chi ajcxy mïidmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquïdy je pa'mjäy, e chi oy ciday naaxcíxy, e ooy yajch yquïdy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimíjt cujc yöy maabi mmang ypa'mbety?

Chi je ungdeedy y'adzooy:

—Ma'xung anajty co pa'mbedyii. Canaag'oc je ca'oybi yajyachyii yajquïdyii ñich nmang, ixti ti oy ycogidahuïy jijnjoty etz nijoty. Je ca'oybi canaag'oc jayaj'ögy ñich nmang. Pen miich mïid tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

²³ Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

²⁴ Mic'amy je pa'mjäy yteedy mic ycapxy ymíñañ:

—Nmibijcyich, pubéjtcich nej huaad jacmij nmibicyich.

²⁵ E co Jesús ijxy co ñgi mayjäy chach ymiiñ poyïgy ma yi', chi ix'ojy je ca'oybi, e ymíñañ:

—Miich ca'oybi huidib ti yajhui'my jada pi'c'anäg uum etz nat, ñich miich yam n'ane'myb: “Pidzim ma yi pa'mjäy, e ca' mjactigihuiipy ma yi' yjot yhuinma'ñ jadüg'oc.”

²⁶ Jayijp je ca'oybi yaaxqueecy janch mic, yajyajch yajquïdy je pa'mjäy. Co jadu'n tuñ, chi ypidzimy. Je pa'mjäy oy ñinícx yhui'my nej jihuïy ti y'o'cni. Je mayjäy huidibi anajty ajcxy jim huindicxp ymínaangixy:

—Ti ayoob y'ögy.

²⁷ Chi Jesús majtz je pa'mjäy yci', e yajpidígy e huin'it je pa'mjäy ytinayígy mic oy.

²⁸ Co Jesús ytigíy ma tüg tíjc, chi je' ydiscípulos ajcxy y'amidou ameech, minañ ajcxy:

—¿Na'amy co ñich ajcxy ca' ti nmadägyich nej nyajpidzimip ñich ajcxy yi ca'oybi?

²⁹ Chi Jesús y'adzooy:

—Yijiibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmibijctzoohuim n'íjtim ayuu.

Jesús capxpídzimnip jadüg'oc co y'öga'ñ

³⁰ Chi Jesús miid yi' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuihuiyb ma yi' ñicxy. ³¹ Com Jesús hue' anajty yaj'ixpicy yi' ydiscípulos ajcxy, co ooy ycopícyity co yi' jäy huidibi tzoon tzajpjoty, yajciyegipy ma yi' ymidzip, etz yaj'ögiyb, e co anajty ti y'ögy codugüig xii jadüg'oc yjugypigipy. ³² Jesús ydiscípulos ajcxy ca' huinjihuüy anajty Jesús y'ayuc, e nañ jadu'n tzigüyb anajty ajcxy co Jesús yaj'ójip, paady ca' ajcxy amidoy nej huimbizimy yjiibi ayuc.

¿Pin je' nigi jacmíjip?

³³ E Jesús miid ydiscípulos ajcxy oyjaty jim Capernaum. Co ajcxy ytijectigüy, chi Jesús yaj'amidoy ydiscípulos ajcxy, nimay:

—¿Ti ayuc miich ajcxy naymídmíydáacigixy jim ma anajty mdüyöyigixy?

³⁴ Per amonday ajcxy, com jëgixpi co anajty ajcxy ooy ti ñaymídmíydáacigixy tüyöyjoty co pin jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pin nayyajnaxaanip mij, huen ity nej jihuüy ca' ytiijity e huen capxmídy ymigügtijc.

³⁶ Chi Jesús tzenügy tüg pi'c'anäg, e chi pidacy cujc'amy ma yi' ydiscípulos ajcxy. Chi tzenügy jadüg'oc, e nimay ajcxy:

³⁷ —Pin cöbije tügpajc pi'c'anäg jadu'n nej jada pi'c'anäg miid iich nxii ycixpi, iich yi' anajty ti xycöbicyich, e pin iich xycöbijcpich, ca nan iich anajty naydügpajc ti xycöbijcyich, nañ jadu'n anajty ti cöbicy huidi ti xyquejxich.

Pin iich ajt xycamidzip'ájtím, iich ajt je' míd y'ity

³⁸ Juan Jesús nimay:

—Huindzin, ti iich ajcxy n'ijxpaady tüg jäy co ca'oybi yajpidzimy miid miich mxii, e ti ngapxaducyich miid co ca' yi' iich ajt xypahuidíjtim.

³⁹ Per Jesús yminañ:

—Ca' mgapxadugipy yi' jadu'mbi jäy, com huenpínity huidibi mijhuinma'ñ tumb miid iich nxii, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' miid iich ajt nbídzímim. ⁴¹ Janch janch iich miich ajcxy jadu'n nimäy co huenpinjäy huidibi ixyipy miich ajcxy xyajni'uucp tüg vaso nii miid co miich ajcxy ti mmijnicxpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáyity co nicxy nbocycähuim

⁴² Huenpínity huidibi jibic-huinma'ñ mibidzim, e yajpocycäy yi' jadu'mbi pi'ctijc huidibi ajcxy xymijnicxpejtpich, jac'oy ixyipy co yi' jadu'mbi jäy ytimyñayyayjöcxodzyii tüg paandzaa etz ñayñajtzjibibihuiyb mejyjoty. ⁴³ Pen miich mgi' xyajtundigoyamb jac'oy co mdim'ixpuxipy, com jac'oy co mdigihuipy ma yi' jugy'ájtín huinixibi ciduc, ca'ydi co Dios xypidägip miid metz mgi' jiiby jijnjoty ca'oydactuuby, ma yi' jijn ni camina ycapich. ⁴⁴ Jiiby ca'oydactuuby yi' ucxyting ca' y'ögy etz ni jijn ycapich nicaminaaxii. ⁴⁵ E pen miich yi' mdecy xyajpocycähuamb, ixpux, com jac'oy co mdigihuip ma yi' jugy'ájtín huinixibi tecytuc ca'ydi co mdigihuip miid metz mdecy jiiby ca'oydactuuby, ma yi' jijn ni camina ycapich. ⁴⁶ Jiiby ca'oydactuuby yi' ucxyting ca' y'ögy etz ni jijn ycapich ni caminaaxii. ⁴⁷ E pen yi' mhuiin tüg xyajpocycähuamb, tim yajpidzim, jac'oy yi' co mdigihuip ma yi' Dios y'ane'mdac miid tügpajc mhuiin, ca'ydi co mdigihuip ca'oydactuuby miid metz mhuiin. ⁴⁸ Ma yi' ucxyting ni caminaaxii yca'ögy etz yi' jijn ni caminaaxii ycapich, ⁴⁹ e ma nidüg'ócüy ñi'cägooda'ñ jijn xut jijn ye'n tim jadu'n nej jäy tzüch caan xiducy. ⁵⁰ Yi' caan ooy yi' y'óyity, pen ymiid xücx'ájtín. Co je caan ytigoy yxücx'ájtín, ca' ji ni ti huidibi jëb miid

nyajxücxiiyim. Müd'ájtci x ñch n'ayuc ma mjot mhuinma'ñ, jadu'n ñch n'ayuc nipaady nej caan, e tzina' miich ajcxy jotcuje müd mmigügtijc nidüg nidüg.

10

Jesús yaj'ixpijcy müd co jäy ytöxyijc ixmach

¹ Chi Jesús choon jim Capernaum, nicxy jim Judea ñaaxjot ma je it lugar Jordán mijñiñ nñaxy xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpijcy je mayjäy jadu'n nej anajty yaj'ixpijcy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jëb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiy nej jëb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín müd miich ajcxy ycixpi, co ooy miich ajcxy mdzach-capxycömidodaaccixy ca' mgapxymidohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'óciy tijaty huiði ji'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytaj yteedy etz pudigihuipy yi' ytöxyijc. ⁸ E je yëydijc etz ytöxyijc tú'ciy idaangixy. Paady je yëydijc tügmucy yajpaady müd ytöxyijc. ⁹ Com yi' huiðibi Dios ti huijtmucy, ca' ni pin huaad huijtzhuägy.

¹⁰ Co Jesús müd ydiscípulos ajcxy yhuimbijt ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huiðibi anajty ti yaj'ixpijcy ma je píjcín. ¹¹ Chi Jesús yminañ:

—Je yëydijc huiðibi ti ixmach yi' ytöxyijc, e pícy müd huingbi, hue' yi' anajty ymidundigooyb yi' ytöxyijc huiðibi müd jayijp ypijcy. ¹² Nañ tim jadu'n co tüg töxyjäy ixmach je yëydijc huiðibi müd ti ypijcy jayijp, e ypijctigach müd huingbi yëydijc, hue' ymidundigooyb je yëydijc huiðibi müd ti ypijcy jayijp.

Jesús conucxy pi'ctijc

¹³ Je huin'it tiempo jäy ajcxy müd miñ pi'ctijc ma Jesús, jaydëb cñixajy etz conuucxip. Co Jesús ydiscípulos ajcxy jadu'n ijxy co jäy ajcxy nimijhuägy Jesús müd ajcxy ypi'c'ung, chi je' ydiscípulos ajcxy ix'oje je jäy ajcxy. ¹⁴ Co Jesús jadu'n ijxy nejhuüy nej yi' ydiscípulos ajcxy y'idich, chi oje ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapx'aducy. Com yi' jäy ajcxy huiðibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ñch miich ajcxy nimäy co pinjaty huiðibi ca' cöbiga'ñ Dios y'ané'min, jadu'n nej pi'ctijc cöbójccixy Dios y'ané'min, hue' yi' jadu'mbi jäy ajcxy ca' ytigihua'ñ ma yi' Dios y'it lugar.

¹⁶ Chi Jesús aminenmujctay je pi'ctijc ajcxy, e chi cñixajiy etz conuucxcixy.

Tüg mutz'anäg comeeñybi ymïydägy müd Jesús

¹⁷ Co Jesús choon jadüg'oc, chi ñimiini poyigy tüg yëydijc, ycojxtinay'ahuüy ma Jesús yhuinduu, e yminañ:

—Miich, oybi Huindzin, ¿ti huaad ndunipyich jigix jëbi nbadipyich jugy'ájtín huiðibi ca' ycixipy ytigoyipy?

¹⁸ Chi Jesús yminañ:

—¿Na'amy co xyñimäyich co oy huindzin ñch? Dios tügpajc óyip, ca' jac ni pin. ¹⁹ Miich mnejhuüy Dios ycötújcín huiðibi jadu'n minaam: “Ca' mmigapxtigoyip töxyjäydijc; ca'

mjäyyaj'ögipy; ca' mmeedzip; ca' m'indaacip; ca' p'in mhuin'inip; etz myajmij'adip mdaj mdeedy."

²⁰ Chi je jäy Jesús nimay:

—Huindzin, ti nguydundäyich jadayaab cötújcín ajcxy maabi ich nbi'c'atyich.

²¹ Chi Jesús huindixpejty je yëdyjc mïd tzójcín jihuiyín, e chi nimay:

—Per jactigoy'ijtni jadügnax. Nicx toog tüg'óciy huidijaty miich mïd, etz mo' yi ayoohtijc. Co jadu'n mdunipy, chi mbaadipy oy'ájtín jüby tzajpjoty. Co jadu'n mdooctähuipy tijaty miich mïd, chi minip jadüg'oc ma nyajpaadyich, e xypanícxibich, e mnaybidägiib cixyot huinjot oy nej mdimyjadipy mïd ich ycixpi.

²² Co jadu'n je yëdyjc midoy nej anajty Jesús ti ñimäyí, chi yhui'my taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixty co je comeeñybi taj may yhuimbijtni, chi huindixpejty je' ydiscípulos ajcxy huidibi tinaayb jühuidity ma yi', e ymíañ:

—Ooy chachtzípity co tüg comeeñybi ytigihuipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuidity mïd jada ayuc nej Jesús anajty ti ymíañ. Paady Jesús yjacmíañ jadüg'oc:

—Miich ajcxy migügtijc huidibi ooy ndzocyich, ooy chachtzípity co ytigihuip ma Dios y'ane'mdac tüg comeeñjyay huidibi tzachnijot'ajt ycomeeñ'adi. ²⁵ Nigi chípity co tüg comeeñ jäy ytigihuip ma Dios y'ane'my, ca'ydí co tüg camello ñaxipy ma tüg xu'ñ'ijx yxútity.

²⁶ Co jadu'n ajcxy midoy nej Jesús ymíañ, chi ooy ajcxy yhuinmay'ahuidijty, e nayñimáayigixy mñ xyipy:

—Pen janch tiy'ajt jadu'n, ¿pínjy jada' huaad jëb y'alma ñídzögipy?

²⁷ Je huidibi jäy ajcxy ca' ni minaxii huaad ca' yaj'oyíy, Dios yi' yaj'oyihuip, com mïd Dios ca' yi' ni ti chípity.

²⁸ Chi Pedro ymíañ:

—Huindzin, occuendtun, ich ajcxy ti n'ixmajtztäyich tüg'óciy tijaty anajty nmíidich, e ich ajcxy nbanícxpich miich.

²⁹⁻³⁰ Chi Jesús y'adzooy, minañ:

—Janch tiy'ajt nej ich miich ajcxy nimäy co huenpínity huidibi mïd ich ycixpi ti ixmach ytijc, ti ixmach y'uch ymigüg ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti ixmach ycam ich ycixpi, etz ich n'ayucich etz mïd Dios ytiy'ajt ycixpi, yi' ypadamy nigi oy'ájtín ya naaxhuiñ, ixti ypadamy migo'px jadu'ñyi ytijc ajcxy, y'uch ajcxy, ytaj ajcxy, y'ung ajcxy, etz ypadamy nigi ymij cam, mïd tzaachypi mïd ayo'n mïd ich n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtín huidibi ca' ycixipy ytigoyipy. ³¹ Ji yajpaady ya naaxhuiñ nijëjity jäy huidibi cömay ijtp, e co yjaty ajcxy tzajpjoty, chi ca' ajcxy cömay ida'ñ. Nañ jadu'n ji yajpaady ya naaxhuiñ nijëjity huidibi ca' cömay y'ity, e co ajcxy yjadipy tzajpjoty, chi jüby ajcxy cömay y'idipy.

Jadüg'oc Jesús capxidzímñip co y'ögañ

³² Jesús mïd ydiscípulos tüyöyp anajty ajcxy, hue' anajty ypättigüygixy jim Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjäy panícxxy anajty ajcxy Jesús. Je Jesús ydiscípulos ajcxy ooy chachhuinmay'ahuidijtcixy, e jacjadyii jäy huidibi anajty ypanícxxy Jesús ooy ajcxy chígiygixy. Chi Jesús huodzooñ abícy je majmetzpi ajcxy, e yajmídmíydactay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuíyb co nnícxim cham jim Jerusalén. E jim Jerusalén, ich je jäy huidibi tzoon tzajpjoty, nyajciyega'ñich mach ma yi Teedy mijtungmíidpi, etz ma yi escribas ajcxy. E chi ajcxy ane'mín pídagá'ñ co huen xyaj'ócixich. Nañ jadu'n

xyçiyegaangixich mach ma yi' ajcxy huidibi ca' yjudiojäyity. ³⁴ Yi' ajcxy xyñixigipy xyajxigibiyich, xyhuobipyich ajcxy müd coochac, xyhuindzuj xyjijptzújibich ajcxy, e xyaj'ögibich ajcxy. Codugig xii maabi anajty xyaj'öccixiyich, chi njugypigipyich jadüg'oc.

Jacobo etz Juan pijctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuägy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaaygixy.

³⁶ E Jesús yminañ:

—¿Ti mdzojcpy co ndunipich müd miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuibich yi mij tung ma m'ané'min jaydéb n'iñähuibich ma miich mmijc. Nidügti ich ajcxy n'iñähuipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuüy ti ti mbijctzoogixy. ¿Nej myajnaxamyb miich ajcxy je tzaachypi ayo'n huidibi nyajnaxaamybich, jadu'n nej jihuüy m'üga'ñ ajcxy ich n'ügy e mbaada'ñ ajcxy ich nnibéjtín?

³⁹ Jacobo etz Juan y'adzooy:

—Ich ajcxy nmimadägibich minaxipyich nyajnaxipyich ajcxy yi tzaachypi huidibi mminaxamyb myajnaxamyb.

Chi Jesús yminañ:

—Janch tiy'ajt jadu'n nej miich ajcxy mina'ñ co mminaxaangixy myajnaxaangixy yi tzaachypi jadu'n nej ich mminaxaamyich nyajnaxaamyich yi tzaachypi, tim jadu'n nej jihuüy m'ügaangixy ich n'ügy, e mbadaangixy ich nnibéjtín. ⁴⁰ Per ca' ich cötújcin nmüdidyich co ich miich ajcxy nbidägipy tungmüd, co myajpaadip tüg ma ich nmijc a'oy'amy, e jadüg anajty'amy. Hue' janchtiy Dios Teedy ymüd ni'ixi' pinjaty ti huin'ixy jaydéb yajnicxip je mijtung ma ich n'ané'min.

⁴¹ Co je jacjadyii Jesús ydiscípulos ajcxy nejhuüy jadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan. ⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuüygyixy, yi jäy ajcxy huidibi mijtungmüd ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt müd ma je maybi naax cajp, mic ajcxy ane'my je jäy ajcxy. ⁴³ Per miich ajcxy ca' mjadú'nity nej mijtungmüdpi ma je maybi naax cajp. Pinjaty ma miich ajcxy mijtung yajnicxaamb, copicy ñaybidägiyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägiyb nej tüg tumbi. ⁴⁵ Com ich nañ jadu'n, je jäy huidibi tzoon tzejpjoty, ti nmiiñich ya naaxhuiñ jaydéb nbubedipyich yi mayjäy ajcxy, e ca' nan yi mayjäy ich xypubedipy. Ti nmiiñich jaydéb nyegipyich njugy'ájtín ma yi o'cin. E co jadu'n nyegipyich njugy'ájtín ma yi o'cin, chi ngohua'nañich yi jäy ajcxy y'alma.

Jesús yajtzögy Bartimeo huidi anajty huíntzip

⁴⁶ Chi oy jäty Jesús müd ydiscípulos ajcxy jim Jericó. E co Jesús tzooñ Jericó ytübijcy jadüg'oc, chi yi' ydiscípulos ajcxy etz janch mayjäy ñicxcixy anajty müd Jesús. Co ajcxy ycajp pidzimy, chi tüba'ay anajty yajpaady tüg huíntzipi huidibi limosna anajty ypijctzooyb jabom jabom. Hue' anajty yxii Bartimeo, e Timeo anajty xijity yi' yteedy.

⁴⁷ Co Bartimeo nejhuüy co Jesús je Nazaretpi najxp anajty ma je tü'aa, chi mic yaaxqueegy yminañ:

—Jesús, David y'ap y'oc, tun may'ajt ich pa'ayoog.

⁴⁸ Chi je mayjäy ajcxy oyy je huíntzipi, nimay ajcxy co huen amoñ. Per je huíntzipi nigí yminan'idich:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxijpy, e yminañ:

—Huomiingix yi huintzpi.

Chi je jäy ajcxy oy yajtzoongixy je huintzpi, nimaaygixy:

—Jotcugi', e pidig, com Jesús xyaaxtzoob.

⁵⁰ Chi mic'amy je huintzpi, najtz'oxiyy je ñibe'ñ, chi ypidig, e ninicxy Jesús. ⁵¹ Chi Jesús je huintzpi y'amidooy:

—¿Ti mdzojcpy ndunipyich mñd miich ycixpi?

Chi je huintzpi yminañ:

—Huindzin, ndzójcpyich co xyajhuindicxigibich.

⁵² Chi Jesús je huintzpi nimay:

—Jëb mnicxy ma mdijc. Com ti xymibicyich, paady ti mhuindicxigy.

Tim huin'it je huintzpi yhuin'oyiyy, e yhuindicxigy, e panicxy Jesús co ytübijcy jadüg'oc.

11

Jesús ytigüy jim Jerusalén

¹ Co Jesús etz je mayjäy oyjá'tcixy huigon ma je Jerusalén cajp ma yajpaady mejtz mutz cajp huidi xijipy Betfagé etz Betania, huigon ma je cop huidibi xijip Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nix miich ajcxy ma yijimbi cajp huigonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'ñayñi chambaad. Coguejtuutxix je burro e yajmiingix ya ma ñich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähuipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huigonbi, e oypaatcixy tüg burro ycoxóchity huigon ma tüg tijc'aguu. Chi ajcxy coguejtuuty je burro.

⁵ Ycoguejtuutyp anajty ajcxy je burro co nijëjity jäy jim huigon yminañ:

—¿Ti mdungixyp? ¿Na'amy co mgoguejtuutxixy yi burro?

⁶ Chi je metzpi Jesús ydiscípulos je jäy ajcxy yajmñdmíydacy Jesús y'ayuc nej anajty ti ñimäyii. Je jäy ajcxy yminaangixy co jëb yajñicxcixy je burro. ⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jibe'ñ je burro ajcxy mñd yjocxhuit, chi Jesús yaj'ñay je burro. ⁸ Mayjäy ajcxy ooy yëby yhuit tügujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tügujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigüy capxp mic, yminaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idipy jada yëydijc huidibi mimb mñd yi nHuindzin Dios yxi etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymñd. Hosana, huen je tzajpjoty tzinaayb ajcxy ñbaatcixy capxpaatcixy jada mij'ane'mbi.

¹¹ E jadu'ñyi Jesús ycajptigüy jim Jerusalén, e ytigüy tigoty ma Dios ytijc. Co huindicxtay tüg'ócixy tijaty jiihy tzajtigoty, chi chooñ jiihy, e ñicxy jim ma je cajp huidibi yxi Betania. Chi Jesús je majmetz ydiscípulos ajcxy mñdnicxy.

Jesús capxpocy je higueri ca'pi anajty ytim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jigüëgy tüg higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymñd ytim. Co Jesús ymech ma je higueri, chi ijxy co je higueri ca' anajty ytim mñdity, jëyi mñdity anajty y'aay, com ca' anajty ni tiempity mina higo ytim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tim ma miich.
Chi Jesús ydiscípulos ajcxy midoy nej Jesús nimay je higuera.

Jesús que xpídzimday ajuybi adoocpi ma Dios ytiyc

¹⁵ Co ajcxy oy yjady jim Jerusalén, co Jesús ytiyc jadüg'oc jibby ma Dios ytiyc, chi Jesús yajpídzimday je ajuuybi adoocpi ajcxy jibby tzajptigoty. Chi Jesús tijhuimbijty je mesa ajcxy me je meen yajhuäcxpi ytuñ ajcxy. Nañ jadu'n tijhuimbijty je jäy ajcxy inaybejt huidibi muuxy toocp. ¹⁶ Jesús ca' anajty tzocy co pinjaty midigihuipy juydoogy ma Dios ytiyc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “Ich ndiyc hue' je' tzajpcapxapxtac ma tüg'óciy jäy ajcxy choon ma nidüg'óciy naax cajn ymingixy Dios ojadajp”, per miich ajcxy hue' yi' mhuañ meetzpitijc.

¹⁸ Co ajcxy je teedy mjtungmüdpí etz je escribas nejhuñy nej anajty Jesús ti y'idich jibby ma Dios ytiyc, chi ajcxy ooy ixtaaygixy nej ajcxy jeb yaj'ögipy Jesús. Per ca' ajcxy yhuinmañybaady mic'amy nej yaj'ögipy, tzigñyb ajcxy müd je mayjäy com je mayjäy ooy tzachjihuiy huinmay jadu'n nej Jesús yaj'ixpijcgixy. ¹⁹ Co oycoodzñyñi, chi Jesús ycajppídzimay.

Je higuera ytiizni

²⁰ Je com jabom Jesús müd ydiscípulos ajcxy najxp anajty tim jopyñi ma je higuera anajty ytinäy. E je higuera ti anajty ytiiztay mabaad ytictz. ²¹ Huin'it Pedro jäymejtzcooty nej Jesús nimay je higuera, chi Pedro Jesús nimay:

—Huindzin, ix jada higuera huidibi ixixy mgapxpoj, ti yi' ytich.

²² Chi Jesús Pedro nimay:

—Mibic yi' Dios. ²³ Janch ich miich ajcxy nimäy, co ixipy pin mgapxy jada huingonbi cop, e nimäy ixipy: “Miich cop pidig, e nicx cidäg mejyoty”, pen ca' ti mjtmetzcñy, e mibicy co jadaanip nej yi' ti ane'my je cop, chi jadu'n ytunñyb yjadiyb. ²⁴ Paady ich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huidibi ti mbijctzoogixy. Pen janch miich ajcxy mibicy co Dios ti xymoogixy ajcxy je huidibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy müd tüg jäy, huinméxcix yi' mmidzip tim jayjp, jigix jebi Dios Teedy huidib jibby tzajpjoty xyhuinmeecxp miich ajcxy ma ti mdundigoogixy. ²⁶ Pen ca' miich ajcxy mhuinmecxy yi' mmidzip huidibi ti xymidundigoogixy, ca' miich ajcxy xyhuinmecxañ Dios Teedy huidibi yajpatp tzajpjoty.

Jesús je' ycotújin

²⁷⁻²⁸ Je huin'it tiempo Jesús müd je' ydiscípulos ajcxy yhuimbijty jim Jerusalén. E co Jesús anajty yhudity tzajtigoty, chi nijety huindzindijc huidibi nigohuajc'ajtp anajty je teedytiyc etz escribas ajcxy huidibi nijayduutpi Dios ñecy, nimiiñ ajcxy Jesús, e yminañ ajcxy:

—¿Pin cotújin ti xymöy huidibi ti mduñ ya tzajtigoty? ¿Ma cotújin ti mbaady co jeb m'ane'my ya tzajtigoty?

²⁹⁻³⁰ Chi Jesús yminañ:

—Ich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimahuipy ma ich ti nbaady yi' mic'ajt etz yi' cotújin, co jadu'n nduñich jibby tigoty ma Dios ytiyc. ¿Pin yajñibijc Juan, je Bautista, co huen jäy yajñibety? ¿Dios, o naaxhuiñyay? Adzoogich ajcxy.

³¹ Chi ajcxy ytiñy huinmay'ahuidijtpi, ñayñimáayigixy miñ xyipy:

—Pen minaanim co Dios tzajpjoty ti yajñibicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³² Nañ ni ca' jebi ich ajt minaanim co jäy ajcxy ti quejy Juan.

Com chigüyb anajty jäy com ñejhuüyb anajty ajcxy co Juan je Bautista Dios anajty ytiy'ajt ymüid. ³³ Chi ajcxy Jesús nimay:

—Ca' ich ajcxy nejhuiy pin ti yajnibicy Juan.

Chi Jesús yminañ:

—Ich nañ jadu'n ca' nnigapxa'ñich pin ti xycötujcmöyich co jëb nduñich huidibi ndumyich.

12

Je naymidúntijc jibicjäybi ajcxy y'ijxpejt

¹ Je huin'it xii Jesús jacmígapxy je mayjäy müid jihuimbit ayuc, yminañ:

—Ji yajpaady tüg yëydijc huidibi camuuxy ti cojy ma ycam, e ti co'aguemy je camuuxy cam, e yaj'oyiyy tügi tang ma huinmicxa'ñ je camuuxy. Nañ jadu'n je yëydijc tüg poch yajpidägy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijëjity tumbidijc. Chi choon viaje tumbi jigüëgy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéccixy je cosechi, jadu'n nej anajty ti ycapxytuñ müid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jiphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy oyy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugügpi quexyöpy. Chi je cogam jac tim quejxy jadyi ytumbi. Chi je tumbidijc ajcxy je cogam ytumbi huinhuojpi jiphuojpi nijëjity, e nijëjity ajcxy yaj'o'cy.

⁶ Je cogam ymüid anajty tügpajc ymang huidibi anajty ooy tzocy jihuüy. Je' oy quejxcogixiyy ma je ycam yajpaady. Je cogam huinmay jadu'n co je tumbidijc ajcxy yajmij'adiyyb je' ymang. ⁷ Chi je tumbidijc ajcxy ñayñimaayi miñ xyipy: “Jada yëydijc je cogam jada ymang huidibi jë'adaanip je yteedy ypidägy. Tzoc yaj'ó'cim, e jadu'n je cam një'ajtim.” ⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi yminañ:

—¿Ti ytunamyb je cogam müid je tumbidijc ajcxy? Hue' min ci'm ma je' ycam, e yaj'öctähuipy je tumbidijc ajcxy huidibi tundigoy. E yegipy pijctzoy je' ycam müid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n yminañ?

Je yëydijc huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huidibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopicyty.

¹¹ Jada tung je Huindzin Dios ti tuñ, e ooy oy n'ixim njäygidaacim.

¹² E huin'it je judíojäy ajcxy ytungmüidpi ooy jamadzaañ anajty Jesús, com ñejhuüyb anajty ajcxy co Jesús ñigapxyi yi' ajcxy. Com tzigüyb anajty ajcxy müid je mayjäy, chi ajcxy tim huinyöyducy, chi ñicxcixni.

Yajnidügyixy pen jëbi cogüéjtin yajyecy o pen ca'

¹³ Jac'axam je judíojäy ajcxy ytungmüidpi quejxy ajcxy ma Jesús yajpaady mejtzpicy ixpicytijc. Tügpiy anajty ñaygomajtzigixy müid yi fariseos ajcxy, etz jadügpicy ma je rey Herodes. Hue' anajty ajcxy huinma'ñ ixtaayb nej ajcxy ocxihuipy Jesús. ¹⁴ Jada mejtzpicypi ixpicytijc ñicxy ajcxy ma Jesús, e yminañ ajcxy:

—Huindzin, ich ajcxy nejhuiyb co myaj'ixpijcy je tiy'ajt, ca' jäy mdzigüy, com ca' huin'ixpety myaj'ixpicy. Tú'ciy miich mduñ müid mic jäy, müid comeñjy, etz müid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios

ytiy'ajt. Nejhuñhuaamybich ajcxy nej miich yaj'ixpijcpy je mayjäy. ¿Nej tundigooyim miid yi Dios ycötújcín co nmigüéjtim César, je romano jäy mij'ane'mbi, o ca'ji? ¿Nej jëb nmigüéjtim, o ca'ji?

¹⁵ Per Jesús ñejhuiyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'ixyich? Yajmiingix tüg meen jigix n'oc'ixipyich.

¹⁶ Chi ajcxy mimiiñ tüg meen e co Jesús ijxy je meen, chi yminañ:

—¿Pin y'ahuanax etz pin yxii ijtp ma jada meen?

Chi ajcxy y'adzooy:

—Hue' yi' César.

¹⁷ Chi Jesús yminañ:

—Mo' je César huídibi yi' yjé'ajtpy, e mo' Dios huídibi Dios yjé'ajtpy.

Chi ajcxy ooy jihuïy huinmay jadu'n nej anajty Jesús ti y'adzooy.

Yajnidíygixy pen je tiibi öccixy jugypigipy jadüg'oc

¹⁸ Je huin'it tiempo nijëjty saduceos ajcxy ymiiñ ma Jesús. Yi saduceos ajcxy yminaangixy co ca' pin yjugypiga'ñ tiibi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcín co tüg yëydijc y'ögy, e co'ögy yhui'my je ytöxyijc e ca'ni ytöxyijc ung'ixy. Pues copicy je co'ögy ytöxyjäy ypigipy miid ña'y y'uch yëydijcpi jigix jëbi je töxyjäy y'ung'ixipy huídibi hui'mihuip jadu'n nej codijc cobidägy ma je yteedy y'ajch ypidägy. ²⁰ Pues jim ma tüg cajn anajty chinäy huixtujc yëydijc tüg que'x. Je ungoob ypijcy, e chi ix'o'cy ytöxyijc, e ca' ni tüg y'ung yajhui'my. ²¹ Je mimetzpi yëydijc ypijcy miid je co'ögytöxyjäy, e nañ jadu'n ix'o'cy ytöxyijc e ca' ni tüg ung yajhui'my. E nañ jadu'n je midugigpi miid ypijcy je töxyjäy, e nañ jadu'n ix'o'cy je ytöxyijc, e ca' ni tüg y'ung yajhui'my. ²² E jadu'n oytuñyii yjadyii miid je töxyjäy co ti anajty mïddzinay'abidzimdäy je nihiuxtujcpi yëydijc tüg que'xpi. E je nihiuxtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tiibi ajcxy y'ögy, ¿huídibi jada' ajcxy nidücti je yëydijc töxyijc'adaanip je töxyjäy? Com ti ajcxy jadu'n nihiuxtujcpi miid tzinay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhuinjihuïy je tiy'ajt, com ca' mhuinjihuïygixy Dios y'ayuc ytiy'ajt, e com ni ca' mnejhuïygixy je mic'ajt huídibi Dios ymiid. ²⁵ Pues co anajty yjugypijccixy je jäy tiibi y'ó'ccixy, chi ca' ajcxy ypiga'ñ, e nañ jadu'n ni ca' ajcxy ñaymöhuiyb y'ung huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángel ajcxy chinaaygixy yjugy'ajtcixy. ²⁶ Per je tiy'ajt co jäy ajcxy tiibi y'o'ccixy yjugypigaangixy, ¿nej ca'ni mgapxyini Moisés ytiy'ajt ma anajty Dios ymïgapxyii co je aay ujtz anajty chachtoy? Chi yminañ: “Ich je' je Dios huídib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huídibi y'alma ti ycixy ti ytigoy. Yi Dios Dios'ajtp yi' ma yi juugypi ajcxy. Paady miich ajcxy ooy mij mdundigooygixy co ca' mhuinjihuïygixy Dios ytiy'ajt.

Je ané'min huídibi ooy nigi ycopicyity

²⁸ Nañ jadu'n je huin'it tiempo nimiiñ Jesús tüg escriba. E yi' anajty y'amido'ijtpy co Jesús adzooy je jäy huídibi ca' mibicy co yi öcpi yjugypigipy ajcxy jadüg'oc. Jada escriba ñejhuiyb co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huídibi je' Dios y'ané'min jacmijpi?

²⁹ Chi Jesús y'adzooy:

—Yi Dios ycötújcín huídibi jaccopicyip, yi' je' huídibi minamb: “Midoogix Israel jäy, je Huindzin Dios huídibi nDios'ajtim, yi' je' ajt nHuindzin Dios tügpajcpi. ³⁰ Tzoc jihuï' etz yajmij'at mHuindzin Dios miid tüg'óciy m'aa mjot etz miid tüg'óciy m'alma, etz

müid tüg'óciy mhuinma'ñ, etz müid tüg'óciy mmic'ajt.” Jada je' je jaccopíciy ané'mín.
³¹ Je mímétzpi Dios ycötújcín jahueengi tú'ciy ñaybadyi müid je jayijpi, yi' huidibi jadu'n minamb: “Tzojccix jihuüygix yi mmigügtijc tím jadu'n nej mnaychogyi mnayjihuiyí ci'm.” Jada metz Dios ycötújcín jaccopícy jacmic'ajt müid ca'ydi jac huidibi cötújcín.

³² Chi je escriba ymíñañ:

—Ooy oy ti m'adzooy. Janch tiy'ajt jadu'n nej müich mína'ñ, co ji yajpaady tügpajcpi Dios, e ca' ji jadüg Dios mic'ajt müidpi. ³³ E janch tiy'ajt co copícy nmíjpídaacím nyajmíj'ájtím Dios cixyot huiníot müid tüg'óciy ajt nhuinma'ñ, müid tüg'óciy ajt n'alma, etz müid tüg'óciy ajt nmic'ajt. E copícy ndzójcím njihuüyím nmigügtijc tím jadu'n nej naychójcím nayjihuiyím ci'm. Jactzoobatp jada ca'ydi co tüg'óciy yi huindzigi'ñ huidibi anajty yajno'cpi müid Dios ycixpi.

³⁴ Co Jesús íjxy jadu'n nej je escriba tiydudägy anajty ti y'adzoyi, chi ymíñañ:

—Jahuenjaty müich mmíbíjcín ytigoy'ityñi jaydeb mdigíhuipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amídoohui.

¿Pin je' y'ung je Cristo?

³⁵ Jesús yaj'ixpijcpy anajty je mayjäy jiihy ma Dios ytijc, e ymíñañ:

—¿Na'amy co yi escribas ajcxy ymíñangíxy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n ymíñañ:

Yi Huindzín Dios nímáy íich nHuindzín: “Íña' ya a'oy'amy ma íich nmíjc, íxti cooní anajty müich mmídzíp ti nmímadactäyich, jadu'n nipaadípy nej jihuüy ti nbídägyich müich mmídzíp jadu'n nej tüg tinaybejt.”

³⁷ ¿Per nej co yjadu'níty co jäy ajcxy ymíñangíxy co je Cristo David je' y'ap y'oc? ¿E David ci'm ymíñañ co je Cristo yi' yHuindzín'ajtpy?

Jotcuyc anajty je mayjäy amídoo'íjti Jesús y'ayuc.

Jesús ca'p jäygidaci leyhuindzín ajcxy yhuinma'ñ

³⁸ Jesús yaj'ixpijcpy anajty je mayjäy, e ymíñañ:

—Naycuend'ájtigix müid yi escribas ajcxy. Com yi escribas ajcxy ooy jotcuyc co nayxóxigíxy müid yhuít oyjatypí yoñjatypí. Ooy ajcxy tzocy co yajcapxpóxcixípy huindzigi'ñ'amy mayjäyduum. ³⁹ Yi escribas ooy ajcxy tzójjcixy yi cödumbi íñaybejt ma je naymujectac, etz ooy ajcxy tzójjcixy íñaybejt ma yi cömaybi jäy íñay ma jäy ajcxy yxííduñ.

⁴⁰ Yi escribas ajcxy yajcixtaayípy yi co'ögy ytöxyjäy ypidägy müid ajcxy y'adzójcín. Yi' ajcxy ooy túngíxy jecy tzajpcapxycapxi jígix ajcxy capxpaady idípy. Dios nígi tzaachytunípy yi escribas ajcxy müid ypocy ycixpi, ca'ydi jac ní pin.

Je ayoobi töxyjäy y'ofrendi

⁴¹ Tüg xí anajty Jesús íñay jiihy tigoty ma Dios ytijc. Íñayb anajty ma je limosna caja huinduu. Jesús yhuindícxyp anajty je jäy ajcxy huidibi meen pídaaccíxp ma je ofrenda caja. E maycomeñyjäy ooy ymeen pídaaccíxy janch may. ⁴² Tím huín'ítíy yja'ty tüg co'ögy töxyjäy janch ayoob pídacíy metz pí'c meenhuäcxy, huidibi ca' ooy choobaady.

⁴³ Chi Jesús huomujcy je' ydiscípulos, e nímáy ajcxy:

—Janch tiy'ajt jadu'n nímáygyíxy co jada co'ögy ytöxyjäy ayoob jac'anaxy jada ti pídagy ofrenda, ca'ydi jac ní pin. ⁴⁴ Tüg'óciy comeñydiyc ajcxy ypidacpy ma y'ofrenda yi meen huidibi yajconajxyp. Jadayaabi co'ögytöxyjäy ti pídacíy tüg'óciy huidibi anajty ymíñ, je meen tüg'óciy huidibi anajty ñigayamy yi' ymooyb Dios.

Jesús ymíñañ co Dios ytijc yhuindígooyípy

13

¹ Co Jesús ypidzímy ma Dios ytijc, chi nidügti ydiscípulos ñímáy:

—Huindzin, ix jada maychaa mijjatypi etz jada maybi tijc ooy y'oy'oydúñity.

² Per Jesús y'adzooy, ymínañ:

—Huindicx miich ajcxy jada maybi mijjaty ytijc. Minip tiempo mina tüg'óciy jada tijc nicxy yhui'my taj xit, ca' ma tzaa macxy. Huindigoydähuip tüg'óciy.

Je tiy'ajt ma ca'ni naaxhuiñybi ycíxa'ñi ytigoya'ñi

³ Jesús miid ydiscípulos ajcxy ñicxy ma je cop huidibi xijip Olivos. Jim ajcxy co'ijxnaxy je Dios ytijc. Ññaayb anajty Jesús jim copcíxy co Pedro, Jacob, Juan etz Andrés ameech migapxy Jesús, ymínaangixy:

⁴ —Tun may'ajt ich ajcxy yajnimaayg mina jada ytuna'ñyii yjada'ñyii co huindigoydähuip Jerusalén cajn. ¿Ti ijxpejt'adam co anajty jadayaabi jadu'n ytuna'ñyii yjada'ñyii?

⁵ Chi Jesús y'adzooy ajcxy je' ydiscípulos ymínañ:

—Ix pinjaty xyhuin'ingixy. ⁶ Ooy jäy may ymínañ miid ich nxii. Ñaydíjánigixy co je' ajcxy je' je Cristo, ymína'na'ñ ajcxy: “ñich je' je Cristo.” E ooy jäy may huin'inaangixy.

⁷ Co miich ajcxy ayuc mmidohuipy co jäy chachchiptúngixy xii ya, ca' mdzigíygixip, com ooy ycopícyity co jada jadu'n jayip ytuníyb yjadíyb. Ca' nan hue' je' anajty tim cijxp tim tigooyb je xii je tiempo. ⁸ Nayñibidígíib tüg naax cajn miid huingbi naax cajn, e gobierno miid huingbi gobierno. E minipy mic ujx canaag'it etz mij yuu mijpa'm xii ya. E jäy ajcxy ooy yhuániipy yjihuíhuipy ycanaymijotcuic'ájtigixipy. Jada tzaachypi ayo'n tzondacni yi' anajty.

⁹ Chi Jesús yjacmínañ:

—Nayguend'ájtigix miich ajcxy, com yi mmidzip ajcxy xymájtzcixip, e xycíyéjccixip ma tungmídpídjic, e xychachytúngixip xyhuójpíxip ma yi judíojäy ñaymujctac ajcxy. Xyajníxcixip mach ma rey etz ma gobernador ajcxy yhuinduu miid ich ycíxpi com miich ajcxy xymibícyich. E miich ajcxy tiy'ajt myegipy miid ich ycíxpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xii tiempo paady mina ycíxa'ñ naaxhuiñybi, chi ajcxy capxhuäcxtähuipy ich n'ayuc huindu'myb ñaaxhuiñ ma tüg'óciy naax cajn. ¹¹ Co jäy ajcxy xyajníxcip mach ma codungdjic co xytíydúngixipy, chi ca' ni nej mjet'adíyb, ni ca' mhuinmayipy nej m'adzógixipy. Mgápxcixipy je ayuc huidibi Dios xymóoygixipy, com je ayuc huidibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydijc ajcxy ycíyegamyb ma tungmídpí yci'm y'uch ajcxy co huen yaj'ögyii. E nañ jadu'n je ungdeedy ycíyegamy yci'm y'ung ajcxy ma tungmídpí. Nañ jadu'n yi' y'ung ajcxy cíyegipy yci'mdeedy co huen yaj'ögyii. ¹³ May naaxhuiñjäy ca' xychogipy xyjihuíhuipy miich ajcxy miid ich ycíxpi. Pen miich ajcxy mmíctínaayb ma mmíbíjcín, ypaadip miich ajcxy m'alma nídzoocín.

¹⁴ Chi Jesús yjacmínañ:

—Co anajty m'íjxcixy je huidibi Daniel ñimíydac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huidibi ooy ycodzigíjity. Miich ajcxy huidibi tzinaayb jim Judea, co jadu'n m'íjxcixipy, chi nicx mgueectzooccix ma tungop. ¹⁵ Yi jäy ajcxy huidibi yajpatp ma ytícníxcy ca' ñícnity tigoty ma ytijc. E ni ti jiiby cayajpídzimipy. ¹⁶ Yi jäy ajcxy huidibi yajpatp camjoty, ca' ajcxy nihuimbídy je' yjocxy huit huidibi ymíid. ¹⁷ Huin'it xii huin'it tiempo ayo'n pada'ñ je töxyjäy huidibi anajty ti y'ungtzimígy, e nañ jadu'n yi' ajcxy huidib miid y'ung ma'xung yajtíztp. ¹⁸ May'ajt ajcxy mbíjctzoohuipy ma Dios, co jada jadu'mbi ayo'n ca' ytuníyb yjadíyb ma anajty ytích tiempity. ¹⁹ Yi jadu'mbi xii tiempo jäy ajcxy ayo'n tzaachypi minaxipy yajnaxipy. Ni camínaaxii jäy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E camínaaxii jadüg'oc ycajadíyb jadu'n. ²⁰ Pen ca' Dios capx'aduga'ñ yjiibi

ayo'n xii ayo'n tiempo, ca' ni pin chögipy. Per Dios ycapx'adugamyb yjiibi ayo'n tiempo miiid je mibijcpidijc ycixpi huidibi Dios ti huin'ixy.

²¹ Co yi jadu'mbi xii tiempo anajty ymiiñ, ca' mmibigipy, pen ji pinjaty xyñimaaygixy: "Ijxcix, cha yajpaady je Cristo", o "jim'amy yajpaady je Cristo." Ca' mmibijccixipy jäy y'ayuc. ²² Minip jäy ajcxy huidibi ñayyajnaxáanigixy nej Cristo, e ymináangixipy co capxhuäcxy ajcxy Dios y'ayuc, e ca' yjanchity. Ytunipy ajcxy mij huinma'ñ etz mijpi ijxpejt, ixti jahuin'ina'ñ je mayjäy ajcxy huidibi Dios ti yhuin'ixy. ²³ Nayquend'ájtigix miiid yi jadu'mbi jäy ajcxy, com jayijp iich miich ajcxy yi' ti nyajmiiidmiydägy.

Nejjada' je Dios y'ung yminipy jadüg'oc

²⁴ Chi Jesús yjacminañ:

—Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycähuip, e nañ yücxip huidijaty mic'ajt miiid tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, iich je jäy huidibi tzoon tzajpjoty, co iich anajty nmiiñich jocjoty miiid tüg'óciy nmic'ajt n'oy'ajtich. ²⁷ Co jadu'n anajty nmiiñich, chi mic'amy nguexipyich iich n'ángeles ajcxy ma xii ypidzimy, ma xii ycidägy, ma jiiimboj ypidzimy etz ma tichpoj ypidzimy. N'ángeles ajcxy yajmuga'ñ tüg'óciy iich njäy, huidibi ti nhuin'ixyich, xim yam ma ajcxy yajpaady ya naaxhuiñ, etz jiiby tzajpjoty.

²⁸ Chi Jesús yjacminañ:

—Jëb miich ajcxy tiy'ajt mbigipy ma yi higuere jadu'n nej je xii je tiempo mimb cidaacni. Co je higuere jadüg'oc ñihuamiy, chi miich ajcxy mnejhuüy co ti yhuingoni mina ypottigiiyñi. ²⁹ Nañ tim jadu'n co m'ixipy tuniyyb yjadiyyb tüg'óciy ijxpejt nej ti nnimaaygixy, chi mnejhuühuip co ti yhuingoni je tiempo mina nhuimbidipyich jadüg'oc ya naaxhuiñybi. ³⁰ Janch iich miich ajcxy nimäy co jada huidibi ti nnimiydacyich tuniib jadiib ca'ni anajty y'öctay je jäy ajcxy huidibi jacjugy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. Iich n'ayuc huidibi ngapxyich, ca' ycixipy ytigoyipy ni caminaxii. ³² Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti iich miich ajcxy nnimaaygixy. Ni je ángeles ajcxy jiiby tzajpjoty ca' nejhuüygyx, nañ ni iich, Dios y'ung', ca' nejhuüyich. Jëyi Dios Teedy tügpajc nejhuüy.

³³ Ni'ixi' ahuijxcix. Mibijctzoogix Dios jabom jabom, com ca' mnejhuüygyx mina anajty ytuna'ñyii yjada'ñyii yi huidibi ti nyajnimaaaygixy. ³⁴ Yi xii yi tiempo huidibi minip jadu'n nipaady nej tüg comeenyyäy huidibi ñicxa'ñ ma tüg it lugar huidibi jigüegy yajpatp. Jayijp ca'ni anajty chooñ, chi yajniibjcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc'aguu. ³⁵ Ni'ixi' m'idipy miich ajcxy. Com ca' mnejhuüygyx mina je codijc yhuimbida'ñ ma ytijc, pen namgodziy, o mij coodz, o moñi, o ma anajty ti yximiiyñi. ³⁶ Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi iich miich ajcxy ti nyajnimaaaygixy, nañ jadu'n nimäyich tüg'óciy jäy co huen ajcxy nidüg'óciy ahuijxcixip ni'ixi' je xii je tiempo mina nhuimbidipich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tigoy'ijtni anajty mejtz xii co judíojäy ajcxy nixiiduna'ñ je pascua xii, mina ajcxy tzajcaagy cay huidibi ca' levadura miiidity. Je judío teedy ajcxy huidibi jacmijtungmiiid etz je escribas ajcxy huinma'ñ'ixtaaygixy nej jëb ameech májtzciixipy Jesús, e yaj'ögaangixy, ca'ydi je mayjäy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzim Jesús xiioty. Com ca' yjécyity co je mayjäy yjotmätcottähuipy, e ytigihuip huambi jihuüyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymüd nibüdz pa'm. Jesús iñaayb anajty ma caydac co ymiñ tüg töxyjäy müd tüg tzaadüdz quiig ujtz müd perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁴ E nijëjity jäy ajcxy huidibi anajty jim, ca' anajty ajcxy yjotcújcity müd huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixypy yajtoogy yi perfume tugig migo'px peexy, jigix yajpubedipy ayoobtijc.

E ca' jadu'n ajcxy tim jäygidacy nej je töxyjäy ytuuñ müd Jesús, chi ix'ojy ajcxy je töxyjäy ayooob.

⁶ Chi Jesús yminañ:

—Ixmajtzci x jada töxyjäy. ¿Nej co m'amayiygixy? Yi huidibi ti tuñ müd ich, ooy yi' y'óyity. ⁷ Je ayoobtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoobtijc. Per ich ca' n'ida'ñich ya jecy müd miich ajcxy. ⁸ Jada töxyjäy ti tuñ müd ich jadu'n nej ti ymadägy. Yi' ti pidägy ma ich nninix perfume huidibi ooy oy yxuugy. Yi' jip'ijxpy mina naaxtigihua'ñich. ⁹ Janch ich miich ajcxy nimaaygixy co huen yma'ámyity ya naaxhuiñ ma anajty yaj'ihuäcxy yajcapxhuäcxy jada ayuc jada tiy'ajt huidibi nidzoocin müd, yajnimiydägiipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy müd ñaygapxyii je teedy mijtungmüdpí nej jëb cïyecy Jesús ma yi teedy ajcxy. ¹¹ Co je teedy mijtungmüdpí ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugixy. Chi ajcxy Judas meen yajhuinhuanixy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xiioty

¹² Chi paty je mij xii mina je xii'ajtpidijc tzajcaagy cay huidibi ca'p levadura müdity, e yaj'öccixy je cöbixy huidibi ajcxy yajhuindzigixy anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiym je pascua xii adzu'ájtín?

¹³ Chi Jesús quejxy metz ydiscípulos ajcxy cajpjoty, chi nimay:

—Jim müd mnaybadixy tüg yëdjic huidibi nii tzmnicxp ma tüg majt. Miich ajcxy mbanicxiyb je yëdjic. ¹⁴ Mbanicxiy ajcxy je yëdjic, ixti coon mbajädipy ma ytijc. E miich ajcxy mnimähuipy je codijc: “Je Huindzin Jesús ñejhuñhuam ma miich müdity tüg cuarto ma je Huindzin Jesús müd ydiscípulos ajcxy jëb caaygixy yi pascua xii adzu'ájtín.” ¹⁵ Je codijc ci'm xyajni'ixiygixyip tüg cuarto mijpi ma je mimetz piso huidibi ti yajni'ixiy. Ma yijimbi cuarto miich ajcxy mni'ixihuipy yi pascua xii adzu'ájtín.

¹⁶ Chi je metz Jesús ydiscípulos ajcxy tüyöychoon. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixiy je pascua xii adzu'ibi.

¹⁷ Nam coodzixyñi anajty co Jesús yja'ty ma je cuarto müd jacjadyii ydiscípulos ajcxy.

¹⁸ Co anajty jim ycaaygixy ma je caydac, chi Jesús yminañ:

—Janch ich miich ajcxy nimay co nidüg miich ajcxy huidibi cham caayb müd ich, xycïyegaambich ma nmidzipich.

¹⁹ Co je Jesús ydiscípulos jadu'n midooy, chi ooy ytigixy tajpi maybi ajcxy, e ñay'amidóohuigixy miñ xyipy, e tüg yminañ:

—¿Nej ich jada'ji?

E jadüg yminañ:

—¿Nej ñich jada'ji?

²⁰ Chi Jesús ymíñañ:

—Yi' yi' nidügti yi nimajmetzp huidibi tocxmujcp mñid ñich ma tügpi texy. ²¹ Pues janch ñich je', je jäy huidibi tzoön tzajpjoty, nbadaamybich tzaachypi ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huidibi xycíyegaamich ma ñich nmídzip. Jac'oy co ca' ycadimma'xung'ajty jada yëydijc.

²² Caayb ajcxy anajty, co Jesús conígy tüg tzajcaagy, e jayijp yajnajx Dioscojuyip ma Dios, e chi tujc-huäcxy je tzajcaagy, moy je' ydiscípulos ajcxy. E co Jesús jadu'n tuñ, chi ymíñañ:

—Caaygix jada tzajcaagy. Jada tzajcaagy ñich jada nninícx.

²³ Chi Jesús conígy je ügy vaso, e co Dioscojuyip yajnajxy, chi moyday ajcxy je ügy, e nidüg'ócíy ajcxy uucy je ügy. ²⁴ Chi Jesús ymíñañ:

—Jada ügy ñich nni'py'ajtpy huidibi temamb yogamb. Je' jada jemybi Dios ycötújcín huidibi Dios yejc mñid jäy ajcxy ycíxpi. ²⁵ Janch tiy'ajt jadu'n nej ñich miich ajcxy nimaaygíxy, co ca' jadüg'oc n'üga'ñich vino ñi, ixti cooni anajty njädyich tzajpjoty ma yi Dios y'ane'my.

Jesús capxpídzimy co Pedro ymíña'na'ñ co ca'y'ixy'adyii

²⁶ E co Jesús etz ydiscípulos ajcxy ñy tüg himno, chi ñícxíy ajcxy ma je cop huidibi xñijip Olivos. ²⁷ Chi Jesús ymíñañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n ymíñañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.” ²⁸ Per co ñich anajty njugypícyich jadüg'oc, co ñich anajty ti n'ögyich, nícxibich jim Galilea jacjayijp, ca'ydí miich ajcxy.

²⁹ Chi Pedro Jesús nimaayi:

—Oy ixipy yi jacjadyii miich mdiscípulos ajcxy xycöguetäy, per ñich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeyyaxígy mejtz'oc miich xycoyüdzá'ñich tugí'g'oc, míña'na'ñ co miich ca' xy'ixy'adyiijich.

³¹ E Pedro ca' anajty cöbiga'ñ nej Jesús ymíñañ, chi mictägy míñañ:

—Ca' ñich miich ngoyüdzá'ñ, oy ixipy ndim'o'cich quipxy mñid miich.

E nañ actim jadu'n jacjadyii Jesús ydiscípulos ajcxy ymíñañ nej Pedro ti ymíñañ.

Jesús mibijctzoy Dios jim Getsemaní

³² Jesús mñid ydiscípulos ajcxy oyja'ty ma tüg it huidibi xñijip Getsemaní, chi Jesús je ydiscípulos ajcxy nimay:

—Ñña' miich ajcxy ya, nami n'ocnícxyich jim'amy Dios mibijctzoob.

³³ Chi Jesús mñid nícxy jëda'ajty Pedro, Jacobo etz Juan ma tüg it ahuingujc. Chi Jesús ytigíy tajpi maybi jihuñy jotmay. ³⁴ Chi Jesús ymíñañ:

—Njihuñybich tüg jotmay nej n'öga'ñich. Huí'mgíx miich ajcxy ya etz juugy m'íjtcíxipy, ca' mmáagíxipy.

³⁵ Chi Jesús ñícxíy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je tzaachypi huidi anajty ypadamy je huin'it hora. ³⁶ E Jesús anajty Dios mibijctzoy ymíñañ:

—Dios, mñid miich ca' ni ti chípity. Píjcígich jadayaabi tzaachypi ayo'n, per ca' yjadú'nity nej ñich ndzójcín, huen tuñyii jadu'n nej miich mdzójcín.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccíxy. Chi Jesús Pedro nimay:

—Simón, ¿nej ti mm'ögy? ¿Nej ca' mmadäga'n m'idipy juugy tüg hora? ³⁸ Jugy'íjtcix, e mibijctzoogix Dios ca'ydi jibictuuyb mdigüygixy. Janch tiy'ajt co jotjoty ooy mnijot'ájtciyx mdunaangixy yi oybi. Per yi mninícx oy amaayity.

³⁹ Chi Jesús jadüg'oc huinhuäctuuty je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayijp'atypí anajty ti ymína'n. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mímädägy mähuii, e ni ca' ajcxy jajty nej adzohuipy Jesús. ⁴¹ Midugüig'oc Jesús ñicxy ma je' ydiscípulos ajcxy, e ymína'n:

—¿Nej ya mjacmáagixp mjacpooxcixp? Maagix pooxcix jadachambi. Ti mñid jadu'ñyi. Ti je tiempo huaad'ájtñi mña ñich, je jáy huidibi tzoon tzajpjoty, xyciyegipy ajcxy ma yi jibic jáydiyc. ⁴² Maybiðgicx, tzoc jámim. Chi ymiiñ je jáy huidibi xyciyegaambich ma nmídzípich.

Mach ajcxy Jesús yajñicxixy

⁴³ Capxp anajty Jesús, co Judas oyjáty ma Jesús yajpaady. Judas hue' je' nidügti je majmetzpi huidibi Jesús yhuin'ijx. Judas mñid miiñ mayjáy huidibi ajcxy mñid pujx etz quipy. Je teedy mñitungmñidpi, je escribas ajcxy, etz je mijjáydiyc ajcxy ti anajty quexy je mayjáy huidibi anajty madzamb Jesús. ⁴⁴ Judas, je huidibi anajty cñyegamb Jesús, hue' anajty jayijp ti moy je mayjáy tüg iixpejt huidibi mñid jéb ajcxy iixcabip Jesús. Jadu'n jayijp Judas ycapxytuñ mñid yi' ajcxy, e ymína'n:

—Je jáy huidibi anajty ndzücxypich, yi' je' anajty Jesús. Madzípy ajcxy, e myajñicxip miich ajcxy yajxon cuend'aty.

⁴⁵ Mic'amy co Judas oyjády ma Jesús yajpaady, chi nimijhua'cy, e nimay:

—Huindzin, Huindzin.

E co jadu'n ymína'n, chi Judas Jesús tzücx. ⁴⁶ Chi mic'amy je mayjáy Jesús mach, e yajñicxy ajcxy mach.

⁴⁷ Per nidügti Jesús ydiscípulos juudy ypujxy ma ytijc, chi je teedy mñitungmñidpi tüg ytumbi yajtzaachüyi, quejtzpujxi tüg ytätzac. ⁴⁸ Chi Jesús je mayjáy nimay:

—¿Ti co miich ajcxy xyñimiiñich mñid pujx etz quipy, jadu'n nej jihuüy ñich tüg meetzpi?

⁴⁹ Jabom jabom nyaj'ixpijcyich jáy jiihy ma Dios ytijc ma miich ajcxy myajpaady, e ni ca' miich ajcxy xymajchich. Paady jadu'n ytunyii yjadyii jigix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jáy mutz'anägnip huidibi quectzög

⁵¹ Per tüg yujcyeeeg anäg huidibi anajty payöy Jesús nímóchity anajty mñid tüg sávana. Chi Jesús ymidzip ajcxy majch je yujcyeeepi. ⁵² Chi je yujcyeeepi cñqueegtuty je mayjáy, yajhui'my ysávana, e yquecytzögy niñuädz ixhuädz.

Jesús mij juntijoty

⁵³ Chi ajcxy yajñicxy Jesús mach ma je teedy mñitungmñidpi yajpaady. Chi mic'amy ñaymujci tüg'óciy teedy ajcxy huidibi mñitungmñidpi, e tüg'óciy mijjáydiyc, etz tüg'óciy escribas ajcxy. ⁵⁴ Chi Pedro jiguëgy anajty panícx je mayjáy ajcxy ixti oy yja'ty ma je teedy mñitungmñidpi ytíba'. E jím ixtacy quipxy mñid policía ajcxy agujc, yxaamgixy anajty ma jñinba'.

⁵⁵ Je teedy ajcxy mñitungmñidpi etz tüg'óciy je judíoáy ytungmñidpi ajcxy yhuinma'n'ixtaaygixy nej ajcxy jéb Jesús yajpocyc'a' mñid ajcxy yxihuín, e jadu'n jéb mooygixy yi öcín. Per ca' ajcxy paady huinma'n. ⁵⁶ Mayjáy niñuambejty Jesús mñid anñi, e ca' ajcxy y'ayuc ytügiy. ⁵⁷ Nijējity jáy ytínayigy juntajoty, e niñuambety ajcxy Jesús, ymínaangixy:

58 —Hich ajcxy amido'ijt Jesús y'ayuc tüg tecz, co jadu'n ymíañ: “Njidaamybich jada Dios ytijc huidibi jäy ti cójxicy, e codugig xii gojtigadzipich huingbi huidibi ca' jäy cojy.”

59 Per ni ca' ytügiy ajcxy y'ayuc nej ajcxy Jesús nihuambejty, ac tigachjaty nidüg nidüg ymíañ ajcxy.

60 Chi je teedy huidibi je jacmijtungmüid ytínayigy juntajoty, chi y'amidooy Jesús e nimay:

—Jesús, ¿ca' nej m'adzohua'ñyi? ¿Ca' mmidooy nej xychachxigixy?

61 Per Jesús amon y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

62 Chi Jesús ymíañ:

—Janch jadu'n, ich je' je Cristo, je jäy huidibi tzoön tzajpjoty, e miich ajcxy xy'ixipich iñäyich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuiñ.

63 Chi je teedy huindzech huinhuocy yci'm yhuit, je' je' tiy'ájtíp co ca' anajty yjotcúcity müid Jesús y'ayuc, chi ymíañ:

—¿Ti testigo njac-huaanim? 64 Miich ajcxy ci'm ti mmidoogixy yi' y'ayuc, jadu'n nej ycapxtigoy müid Dios. ¿Nej miich ajcxy mīnaangixy?

Chi nidüg'ócīy ajcxy ymíañ co janch jadu'n Jesús mij oy ti ycapxtigoy müid Dios ytiy'ajt, paady huaad mooygixy yi' o'cīn.

65 Chi nijējity jäy yhuindzujigy Jesús. Chi ajcxy huingoxodziy, cójxcicy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuiñyijp.

Pedro ycoyüch Jesús

66 Pedro tibäy anajty y'ahuixy. Chi ñimijhuäci tüg tumbi töxyjäybi huidibi anajty tumb ma je teedy ytijc. 67 Co je töxyjäy ijxpaty Pedro iñäy anajty jīnba'áy, yxaamb anajty. Chi huindixpejty Pedro, e nimay:

—Miich nañ müidhuidijty anajty je Jesús yi Nazaretpi.

68 Per Pedro ca' cōbijcy je töxyjäy y'ayuc, e ymíañ:

—Ca' n'ixy'adyiijich jada Jesús. Ni ca' nhuinjihuīyich ti miich nimīydacpy.

E mic'amy Pedro ypīdzīmy jīiby, e tim huin'itīy tüg tzeyñi'aa oy yaaxigy. 69 Chi jadüg'oc je tumbi töxyjäybi huindixpejty Pedro, e nimay je jäy ajcxy huidibi jīm yajpatp huingon, e ymíañ:

—Jada je' nidügti huidi anajty müid huidity Jesús.

70 Chi Pedro jadüg'oc ymíañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmidooybich miich m'ayuc nej Galileo jäy ycapxcicy.

71 Co ajcxy jadu'n ymíañ, chi Pedro mictägy ñaygogapxi co ca' yi' müidhuidity Jesús, ymíañ:

—Dios y'ijxpy ñejhuīyb co tiy'ajt ngapxyich, co ca' n'ixy'adyiijich yi Jesús huidibi miich ajcxy mnigapxyp.

72 Co Pedro ycapxymaayi tim huin'itīy tüg tzeyñi'aa yaaxigy mīmejtz'ocpi. Huin'it Pedro jäymetzcoody nej Jesús ñīmāyīi: “Cham coodz jayijp ca'ni anajty tzeyñi'aa yaaxigy metz'oc, ti anajty miich mīna'ñ tugig'oc co ca' xy'ix'adyiijich.” Co Pedro jadu'n jäymejtzcoody Jesús y'ayuc, chi tajy may ñayjihuiyi, e ytigīy yaaxpi.

¹ Co yximíy, chi je teedy ajcxy huidibi mij tung mîd, je mijjâydîc, je escribas ajcxy, etz tûg'óciy judíoJay huidibi mij tung mîd yôymujctay ajcxy. Chi nidûg'óciy ajcxy yajnicxcixy Jesús cîxoch ma Pilato, je gobernador. ² Pilato Jesús y'amîdooy, nimay:

—¿Nej miich rey'ajtp ma yî judíoJay ajcxyî?

Chi Jesús ymînañ:

—Miich jadu'n mînamb.

³ Je judío teedy ajcxy huidibi mijtungmîdipi mîctâgy tzachxîgixy Jesús mîd canaagnax xîhuin. ⁴ Chi Pilato jadûg'oc Jesús y'amîdooy, nimay:

—¿Ca' nej m'adzohua'ñî? Ix nej yî mmîdzip ajcxy xychachxîgixy.

⁵ Chi Jesús ca' ni nej y'adzooy. E Pilato ooy chachhuinmay'ahuîdijty.

Jesús yajmoy sentencia co y'ôgîpy

⁶ Com xîjoty anajty, je gobernador Pilato najtzmazîy tûg machyJây, je huidibi je mayJây anajty ypijctzoogixyp. ⁷ Pujxtîc îñaayb anajty jîm Jerusalén tûg machyJây huidibi anajty yxî Barrabás. Barrabás pujxtîc îñaayb anajty quipxy mîd jacjadyî jây huidibi anajty tî mîdziptzoon je gobierno romano, e tî anajty yJâyaj'ó'ccixy. ⁸⁻⁹ Co anajty je may yxî'ajtpîdîc may'ajt pijctzoogixy ma Pilato co najtzmazîhuip tûg machyJây, chi Pilato ymînañ:

—¿Nej mdzojccixyp co nnajtzmazîhuibîch je judíoJay ajcxy yrey?

¹⁰ Pilato ñejhuîyb anajty co mañ'ajtingîxy anajty ajcxy je teedy mijtungmîdipi tî cîyejccixy Jesús. ¹¹ Per co Pilato jadu'n ymînañ, chi je teedy ajcxy mijtungmîdipi ooy ajcxy yajhuamgoty yajîhuîygoty je mayJây co huen je Pilato najtzmazîy je Barrabás.

¹² Chi Pilato y'amîdooy je mayJây jadûg'oc:

—¿Nej miich ajcxy mdzocy ndunîpyîch mîd jada yêydîc huidibi jây ajcxy ytiJpy co yrey'aty ma yî judíoJay ajcxy?

¹³ Chi je mayJây mîc ymînangottay:

—Yajcruutzpet.

¹⁴ Chi Pilato ymînañ:

—Per ¿tî yî tî tundigoy?

Huin'it je mayJây nîgi mîc ymînañ:

—¡Yajcruutzpet!

¹⁵ Co jadu'n je mayJây ajcxy mîctâgy ymînanday, chi Pilato anajty yajjotcuJc'adaangîxy je mayJây, chi najtzmazîy je Barrabás. E co yajcî'ajttay yî Jesús, chi cîyejcnî co huen yajcruutzpedyî.

¹⁶ Chi je soldados ajcxy yajnicxy Jesús ma je agujctîc tîba', e jîm ñaymujci tûg'óciy soldados ajcxy huidibi yajpatp anajty jîm Jerusalén. ¹⁷ Chi ajcxy yajnîjenîy je Jesús tûg rey yhuît, color ucypî e yajcojenîy ajcxy apy corona. ¹⁸ Chi je soldados ajcxy ymînañ:

—¡Viva jada judío rey!

¹⁹ Chi je soldados ajcxy huoJpy Jesús ma ycohuajc mîd paxy, e huîndzuj jîptzujcixy ooy, e huîngoJxtînay'ahuîygîxy janch ypaad nej jîhuîy ooy huîndzigîygîxy. ²⁰ Co je soldados ajcxy nîxiictay yajxiictay Jesús, chi ajcxy jeenî je yreyhuît color ucypî, e yajnîjenîy ajcxy yci'm yhuît jadûg'oc. Chi ajcxy Jesús mîdcajppîdzîmy co anajty yajcruutzpedaangîxy.

Co Jesús yajcruutzpejti

²¹ Tû'am ajcxy tûg jây mîdnaybatî, hue' anajty yxî, Simón, ycoGáJpîty jîm Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccaJpi Jesús ycruudz.

²² Chi ajcxy yajnicxy Jesús ma tûg it lugar huidibi yxî Gólgota, je ayuc Gólgota jadu'n yhuîmbîdzîmy o'cpi cohuajc. ²³ Chi ajcxy moy Jesús vino huen ügy tem huîdity mîd

mirra tzoy. Per ca' Jesús cöbijcy je vino nñ. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuít yajhuäcxaani, oc'ixaangixy pin anajty ocjè'ajtíp.

²⁵ Petyxii anajty co ajcxy yajcruutzpejty Jesús. ²⁶ Je ayuc huídibi ajcxy yjaay ma Jesús cruudz, jadu'n ymínañ:

—Je judíojäy ajcxy yRey. ²⁷ Quipxy mñd Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymíjc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n ymínañ: “Yaj'amichoomujc je Cristo mñd je pocyjäy ajcxy.”

²⁹⁻³⁰ Je mayjäy huídibi ajcxy naxiiyb anajty ma Jesús yajpaady cruutzcíxy, ooy anajty ajcxy ycöjigiiyñ, nixiicy yajxiicy ajcxy Jesús, ymínañ ajcxy:

—Bah, miich huídibi Dios ytíjc mjidaanip, e codugüg xii huingbi myajpidíga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy mñtungmñdipi etz je escribas ajcxy nixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacjadyii jäy, e ca' jaty nej ci'm ñaygohua'niiyb. Pen janch, co jada Jesús yjējity je Cristo huídibi rey'adamb ma yi judíojäy ajcxy, ymñd ixipy mic'ajt jaydēb ci'm yminagipy cruutzcíxy. Co jadu'n ixipy n'íjxim co ci'm ti yminacy cruutzcíxy, huin'it mibíjxim co janch jada jējity je Cristo huídibi rey'ajtp ma yi Israel jäy.

Nañ jadu'n je metz meetzpi ajcxy huídibi cruutzpejt quipxy mñd Jesús nixiicy yajxiicy ajcxy je Jesús.

Co Jesús y'ögy

³³ Co ycuycxiiy, chi ycoodzygíday tüg'óciy naaxhuiñ. E jadu'n je naaxhuiñ y'ijty coodz ixti minacyxii. ³⁴ Minacyxii Jesús mic ymínañ mñd aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbídzimy: Tat Dios. Tat Dios. ¿Na'amy co ti xy'ix'ixyich?

³⁵ Nijējity jäy huídibi anajty jim yajpatp huingon ma Jesús, co mñdoo jadu'n ajcxy Jesús y'ayuc, chi ajcxy ymínañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyígy, ti anajty yajxoogy pixy mñd vinonii ta'mbi, e yajjipxodzyy je pixy ma tüg paxy, e jadu'n yajja'ty je vino nñ ta'mbi ma Jesús y'ahuac, huen muucip je vino nñ ta'mbi. Co jadu'n tuñ, chi ymínañ:

—Tzoc oc'ahuíxim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit ycñtzhua'cxy tinä'amy huídibi anajty mñd y'adiydútyty je Dios ycuarto ma je teedy mñtungmñdipi ytigíy tüg tecypajc jimíjt jimíjt. ³⁹ Je soldado huindzin huídibi anajty tinaayb ma Jesús yhuinduu, co jadu'n mñdoy nej Jesús mic yaaxqueegy, e ijxy nej y'ögy, chi ymínañ:

—Janch co jadayaabi yēydíjc anajty Dios ung'adyii.

⁴⁰ Nañ jim anajty nijējity töxyjäydíjc ymí'íjxcixy jiguēgy. Jim anajty yajpaady María Magdalena, etz je jadügpí María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadayaabi töxyjäy ajcxy mñdhuídijt Jesús, e ti anajty pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydíjc ajcxy huídibi anajty ti ycoody jim Jerusalén quipxy mñd Jesús.

Jesús yajnaaxtigíyii

⁴²⁻⁴³ Paady co chu'iiyñi hue' anajty viernes mina judíojäy ñayyajpocyñíhuáatzigixy, jaydēb anajty amay'adaangixy je sábado xii je com jabom. Chi José huídibi anajty cogajp Arimatea yjotmictuñ, chi ytigíy ma je gobernador Pilato, pijctzooy may'ajt co yajnaaxtigíhuaani Jesús ñinícx. E hue' je' José anajty tungmñd ma yi judíojäy ajcxy.

José yjijp'ijxpy anajty mina Dios pidäga'ñ yí' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzoy je soldado huindzin, e tiy'ajt pijctzoy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuiipy Jesús. ⁴⁶ Chi José juy poob huit, e co yajminajcy Jesús ñinícx, chi mo'ñ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjäy María Magdalena etz je jadügpí María huidibi José ytaj'ajtpy huindicxp anajty ajcxy co Jesús ñaaxtigiiy.

16

Jesús yjugypicy jadüg'oc

¹ Com jabom jopy, domingo, chi je tugüg töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinícx. ² Je tugügpi töxyjäy chooñ domingo, semaan ixtigi', tim jopyñi. Ti anajty ypidzimni je xii co ajcxy ooyjady ma je öcpi jut. ³ Chi je tugügpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huidibi miid agiiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytiguejcnäy huidibi je öcpi jut anajty agiiydujcp. ⁵ Chi ajcxy ytigiiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n ijxy je yeeg'anäg jilby jutjoty, chi je töxyjäy ajcxy ooy chigiiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'íxcix ya ma ajcxy pidaacci. ⁷ Níxcix, nimaaygix Pedro etz yí jacjadyi Jesús ydiscípulos ajcxy co Jesús níxcip jayijp jim Galilea, e jim Galilea ñaybadiiyb ajcxy miid Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy miid tzig'iñ. E ni ca' ajcxy nimay ni pin nej anajty ti íxcixy, com ooy anajty chigiiygixy.

Jesús ñayguëxici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi miid yhuidijty, e nimaaygixy nej anajty yí' ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús ñayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyi discípulos ajcxy co ti íxcixy Jesús. E je jacjadyi discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajnibijc

¹⁴ Jac com jecy, Jesús ñayguëxici ma je majctügpi discípulos ajcxy ma anajty y'íñaaygixy ma caydac. Chi Jesús ooy ajcxy co ca' ajcxy mibijccixy co ooy ajcxy yjot yjuuñity, ca' ajcxy mijpidägy jacjadyi pin anajty ti y'íxcixy Jesús. ¹⁵ Jesús je' ydiscípulos ajcxy nimay:

—Níxcix miich ajcxy ma tüg'óciy naaxhuiñyjäy, ma tüg'óciy naax cajn, e capxhuäxcix ajcxy je oybi ayuc nej jäy ajcxy jeb y'almanidzögipy. ¹⁶ Pinjaty mibijc etz ñibejtciy, ypaadip ajcxy y'almanidzoocin. Per, pinjaty ca' mijpidägy tiy'ajt hue' ajcxy y'alma tigoyip miid ypocy ycixpi. ¹⁷ Yí jäy ajcxy huidibi mibijcp, ooy ajcxy ijxpejt túngixipy. Miid iich

nxii ñich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycapxgixipy huingbi ayuc. ¹⁸ Ymadzipy ajcxy tza'ñ, e ca' nej yjátcixipy. E co ajcxy veneno ügip, ca' ajcxy ypa'mduniib. E co ajcxy cinixáipy pa'mjäy, tzögip je pa'mjäy.

Jesús ypätigiyñi tzajpjoty

¹⁹ E co je Huindzin Jesús ycapxy ycijxy mïd je' ydiscípulos ajcxy, chi ypätigiyñi tzajpjoty. Jiiby tzajpjoty Jesús yajpaady ma Dios ymijc a'oy'amy, mïd mij'ane'min.

²⁰ Chi Jesús ydiscípulos ajcxy chooñ ñíxcixy cajn cajn capxhuäcxy ajcxy Jesús y'ayuc ma nidüg'óciy naax cajn. E je Huindzin Jesús ooy ajcxy ypubejti ypudigiyi, mic'ajt moy je' ajcxy mïd je ijsxpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhui'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi ñich ajt nejhuüym co janch ytiy'ájtity, tüg'óciy jadu'n nej Jesús chondacy yjugy'ájtín ya naaxhuiñ ixti mabaad ycogixiyy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycogixiyy, je' ajcxy huidibi capxhuäcxy Jesús y'ayuc ytiy'ajt. ³ ñich nañ jadu'n ti nyajciyöyich ti nyajtecyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycogixiyy. Paady ycixpi ñich nhuinmañ pidägy co ñich miich nyajnijayihuañ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuühuipy yajxon je tiy'ajt, jadu'n nej miich ti m'ixpicy.

Tüg'ángel nigapxy co Juan el Bautista ypi'c'adañ

⁵ Jadu'n ytuni yjajti co anajty Herodes yrey'aty ma Judea naax cajn, jim anajty tüg'judío teedy hue' anajty yxi Zacarías. Je' anajty semandumb miid Abías y'ajugytijc y'amigügtijc. Je Zacarías ypijcy miid Aarón y'ocniix, hue' je' anajty yxi Elisabet. ⁶ Dios y'ijxyp ñejhuüyb co je' anajty ajcxy ytudägyjäyity nimetz. Je' ajcxy ycuydumyb tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyñ nimetz.

⁸ Chi tügtecy Zacarías miid y'ajugy y'amigüg yteedy'ájticy anajty ma Dios ytiyc. ⁹ Jadu'n nej teedy ajcxy ycostumbre miidity, chi ñigooti tung je Zacarías mina ypoomjogipy jiiyby ma yi Huindzin Dios ytiyc. ¹⁰ Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹ co ñayquëxi Huindzin Dios y'ángel tüg ytinäy a'oy'amy ma je poomjoctac. ¹² Co Zacarías ijxy je ángel, chi ooy chigiy. ¹³ Chi je ángel nimaay Zacarías:

—Ca' mdzigiy, ti Dios midooy yi mjuydácín mnucxtácín. Yi mdöxyijc Elisabet ypaadipy tüg ung yëydijcpi, e mximöhuipy Juan. ¹⁴ Mjotcuyc'adip mxondägiip miich etz mdöxyijc, nañ may yi jäy yjotcugihuipy co anajty m'ung ti ypi'c'aty. ¹⁵ Chi yi m'ung ycomay'idañ ma Dios. Ni ca' ügiipy vino ni jocni. Ma ca'ni anajty yma'xung'aty ymiid'adipy yi Dios yjihuiñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycogapxy'aty ma yi jäy ajcxy huinmic jotmic miid Dios yjihuiñ ymic'ajt, tim jadu'n nej Elías jecy'ajty ycogapxy'ajty huinmic jotmic miid Dios yjihuiñ ymic'ajt. Je' m'ung yajjothuimbidipy je ungdeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycöbicy yi Dios, jigix ajcxy paadipy oyjot oyhuinmañ. Nañ m'ung ñimähuipy je jäy ajcxy huen nayñi'ixiyyigixy miid yHuindzin Dios ycixpi.

¹⁸ Chi Zacarías nimay je ángel:

—¿Nej jada ñich nejhuühuipy peni janch huidibi xyajnimaybich? Ti nmijjäyñich, cham ndöxyijcch nañ ti ymijjäyñi.

¹⁹ Chi je ángel y'adzooy:

—Ñich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhuimipy uum, ni ca' m'ocjátnip nej mgápipy, miid co ca' mmibicy jada ñich n'ayuc huidibi yajcuynip co anajty tiempo patni.

²¹ Yam je mayjäy ooy ja'ahuixcixy Zacarías, ooy anajty ajcxy tzachhuinmaaygixy ti co chachhuäcipy jiiyby ma Dios ytiyc. ²² Co Zacarías ypidzimy, chi ca' anajty y'occapxni. Chi je jäy ajcxy huinjihuüy co ti anajty ixy tijaty jiiyby ma Dios ytiyc. Hue' je' yjacmiydacy a'ixiy'amy, e oyhui'miy uum.

²³ Co je semandung yajmay, chi Zacarías ñicxni ma ytiyc. ²⁴⁻²⁵ Co jadu'n yjajty, chi Elisabet jihuüy co ti anajty y'ung tziñgy ciy gy. Chi yüch'ijty migoox po', e yminañ:

“Jadu'n yí Huindzin Dios ti ytuñ mïd ñich jadachambi tiempo, ti xyjäymeich ti yajquëgy ñich ndzöydu'n ma yí mayjäy ajcxy.”

Tüg ángel nigapxy co Jesús ypi'c'adañ

²⁶ Co tudujc po' maabi Elisabet anajty y'ungtzimïgy, chi Dios quejxy je' y'ángel Gabriel jim Galilea naaxjot ma je cajp huidi anajty yxii Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co pigañ mïd tüg yëydijc huidi yxii José. José hue' anajty David y'ap y'oc. Je töxy'anäg hue' anajty yxiiyity María. ²⁸ Co je ángel ytigiiy ma anajty María, chi nïmay:

—María, Dios ti xy'ijxtiy, je Huindzin Dios y'oy'ajt mïd miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigiiy mïd je' y'ayuc, chi huinmay ooy mïd jada copxpócxin nej co yjadú'ñity. ³⁰ Chi je ángel ymïnañ:

—María, ca' mdzigïy, miich Dios ti xy'ijxtiy. ³¹ Jadachambi, m'ungdzimïgip, myajpi'c'adipy tüg mang, huidibi mxii möhuipy JESUS. ³² Je Jesús mij y'idipy, hue' je' yajtíipy Dios tzajpjotipi y'ung. Chi je Huindzin Dios möhuïyb je ané'min huidi yí ymij'ap ymijteedy David ymïd anajty. ³³ Je Jesús ané'mip huinixii ma yí Jacob y'ap y'oc. Je' y'ané'min camina ycixipy.

³⁴ Chi María je ángel nïmaay:

—¿Nej jada co yjadú'ñity? ñich ca'ni nyëydijc mïd tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma miich, je Dios tzajpjotipi ymic'ájtín xya-jnïdujttähuip, je oyjäybi jäy huidi pi'c'adam, hue' yajtíipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäyñi. Cham midudujc po'bi maabi y'ung tzimïgy je huidibi jäy ytiipy ca' y'ung'ixaani, ³⁷ com mïdi Dios ca'ni ti chípity.

³⁸ Chi María ymïnañ:

—Jotcuyc nguydunipyich yí Huindzin Dios chójcin, huen jadu'n tuñyí jadyí ma ñich jadu'n nej miich m'ayuc xymöyich.

Chi je ángel ñicxni.

María y'oy cogapxy Elisabet

³⁹ Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigiiy ma Zacarías ytiyc, e capxpocxy Elisabet. ⁴¹ Chi jadu'n yjajty co Elisabet midoohui María ycapxpócxin, chi jihuiy co y'ung yücxy ma yjot. E chi je Elisabet ooy yjotcugiy mïd je Dios yjihui'ñ ymic'ajt. ⁴² Chi ymïnañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb. ⁴³ ¿Nej ñich jada co jadu'n ti n'ahuägiy co nHuindzinich ytaj miñ xycó'ixiyich? ⁴⁴ Co ti nmïdooyich yí mgapxpócxin, ti ñich n'ung yücxy ma ñich njot co chachjotcújcity. ⁴⁵ Jotcuyc'adip pinjaty ti ymibicy, co cuyduñ y'ida'ñ je ayuc mïd je Huindzin Dios ycixpi. ⁴⁶ Chi María ymïnañ: Ooy mij n'ojadatyich yí Huindzin Dios.

⁴⁷ Ooy nxondägyich mïd Dios ycixpi, ñich nnihuambi nyajtzoocpi,

⁴⁸ co yí ti xyñi'ixcidägyich, co ñich ayoobi xytumbi'adyijich. Jadachambi etz jacnicxp xii tiempo, tüg'óciy jäy ajcxy oy mïna'nip co jotcuyc'ájtich.

⁴⁹ Yí Dios tügpajc míjip, tiibi tun mïd ñich, ooy yí yxii ymijity.

⁵⁰ Dios ypa'ayooyb hueñypinity huidibi huindzigiiyip jadachambi etz jacnicxni xii tiempo.

⁵¹ Dios ti ooy tuñ mijpi huinma'ñ, ti jibicy pinjaty amij agix nayjihuiyip ma yjot yhuinma'ñ.

⁵² Dios ti yajpidzimy yí mijpi rey ma y'ane'my, ti mij'ajt möy ayoobidijc.

⁵³ Pinjaty ayuu'ijtp anajty ymooy ti m̄id yjotcujc'adip, etz yī comeeñyājyājy ajcxy ti ixmach ca' ni ti.

⁵⁴ Dios ti pubety yī Israel jāy, yī' ajcxy ytumbi, m̄id co anajty ti pa'ayogoty je' ajcxy,

⁵⁵ jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb m̄id je' ajcxy huinixi.

⁵⁶ Chi María tugig po' jīm y'ijty m̄id Elisabet, chi yhuimbijtni ma ytijc.

Juan el Bautista co ypi'c'ajty

⁵⁷ Co je Elisabet oy yajhuaad'ajtni xi tiempo, chi yajpi'c'ajty tūg ymang. ⁵⁸ Chi ayuc m̄idooy ajcxy je ym̄ijin ym̄idijc etz y'ajugy y'amigūg jadu'n nej Dios may'ajt ti tuñ m̄id Elisabet. Chi ajcxy ooy yjotcugiy m̄id je' ycixpi. ⁵⁹ Chi jadu'n yajty coductujc xi je ym̄ijin ym̄idijc etz y'ajugy y'amigūg miñ ma Zacarías ytijc co anajty tiy'ajttihuaangixy je pi'c'anāg. Chi ajcxy yajxi'ada'ñyii anajty jadu'n nej yteedy yxi Zacarías. ⁶⁰ Chi ytaj ym̄inañ:

—Ca' xi'adiyib Zacarías, hue' yī' huen xi'adyii Juan.

⁶¹ Chi je' ym̄igūgtijc ajcxy ym̄inañ:

—¿Na'amy? Ni tūg miich m'amigūg jadu'n ca' xiijity.

⁶² Chi ajcxy y'am̄idoohui je' yteedy jadu'n a'ixiy'amy, nej yī' yajxi'ada'ñyii. ⁶³ Chi Zacarías pijtzooy tūg necy, e jaay jadu'n: “Juan huen xi'adyii.” Chi je ym̄igūgtijc ajcxy nidūg'óciy ooy jihuīy huinmaay. ⁶⁴ Chi mic'amy Zacarías y'ahuac ahua'cxy e ytoodz yungiy, chi oy ycapxigy e jāymejch cōmay yī Dios. ⁶⁵ Chi tūg'óciy ym̄ijin ym̄idijc ooy chigiy. Chi ajcxy nimiydactay nej Zacarías ti yjaty ma tūg'óciy jāy huidibi tzinaayb Judea yuugjotypi tzinaaydac. ⁶⁶ Tūg'óciy pinjaty anajty m̄idoob je ayuc, chi jāymejtzhui'm ajcxy ma yjot yhuinma'ñ, chi ñayñimāayigixy:

—¿Ti jada' ytunamyb jada pi'c'anāg?

Com je Huindzin Dios je' m̄id y'ity.

Je Zacarías y'iy

⁶⁷ Chi je ungdeedy Zacarías m̄id je Dios yjihui'ñ ymic'ajt Dios y'ayuc najtzcapxiyi ym̄inañ:

⁶⁸ Cōmay yī Israel jāy yHuindzin Dios, co ti ni'ijxcidāgy, ti cohua'ñ yī' ñaax ycajp,

⁶⁹ Dios ti quexy tūg mij nihuaambi yajtzoocpi, ma yī' ytumbi, David y'ap y'oc ajcxy.

⁷⁰ Com Dios jadu'n ym̄inañ jecy'ajty m̄id yī' y'ayuc najtzcapxiyb huidibi huätzjäyip;

⁷¹ je' xyñihuānaanim ma ich ajt nm̄idzip, nañ xypubedaanim xypudigihuaanim ca'ydi xycigāhuīyim huidibi ca' xy'ixaanim xychogaanim.

⁷² Jaydēbi pa'ayoohuipy ich ajt nm̄ij'ap nm̄ijteedy, etz jāymedziyb jadu'n nej ayuc ahuanīy m̄id je' ajcxy.

⁷³ Jadu'n nej Dios janch huinijot y'ayuc ahuanīy m̄id ich ajt nm̄ij'ap nm̄ijteedy Abraham jecy'ajty huidi anajty xymōhuaanim.

⁷⁴ Co nihuätzictuutim ma nm̄idzip, huin'it jaydēbi miyaaxim n'ojadājtīm ca' ma tzigi'ñ jihui'ñ,

⁷⁵ m̄id huätzhuinma'ñ etz tudāgy huinma'ñ ma yī' yhuinduu jabom jabom ixti mibaad ndzinaayim.

⁷⁶ Miich ma'xung, jāy hue' myajtijip mijpi Dios y'ayucnajtzcapxiybi. Miich nīcxip cogapxy, nīcx yajni'ixi jāy m̄id Huindzin Dios ycixpi.

⁷⁷ Yajni'ixi' yī' cajpjāy jadu'n nej huaad ajcxy y'alma paadipy nihuāanin yajnīdzoocin, etz jadu'n nej huaad ajcxy ypocy huinmecxiyb.

⁷⁸ Jadu'n nej Dios ich ajt ti xypa'ayoohuim co ti xyñi'ijxcidaacim etz xymooyim tiicxin jājin huidibi tzomb tzajpjoty,

⁷⁹ jaydēbi yajmōhuipy jāy ajcxy Dios ytiy'ajt huiḁibi ajcxy tzinaayb agootztuum etz o'c jipp'am, jigix ajcxy xytūmooyim ma je tudāgypi tū'aa.

⁸⁰ Je pi'c'anāg yeeg yjodijy huinmic jotmic miid yi Dios yjihu'iñ ymic'ajt. Chi chinaay adūgtuum ma ca' pin, ixti cooni xii tiempo paty mina ñicxipy cogapxy ma Israeljāy ajcxy.

2

Jesús yma'xung'ajty

¹ Huin'it xii Augusto César pidacy y'ané'min huen tūg'óciy jāy nicxy necypejttaaygixy. ² Je jayijp'atypi padrón hue' je'yaj'oyi Cirenio huiḁibi anajty gobernador'ajtp jim Siria ñaaxjot. ³ Chi jāy ajcxy nidūg'óciy ñicxtay yajcojayiibi nidūg nidūg ma yci'mgajp. ⁴ Chi José choon jim Galilea naaxjot ma je cajp huiḁi yxi Nazaret, ñicxy ajcxy jim Judea naaxjot ma je David ycajp, huiḁi yxi Belén. Yi José ñicxy jim Belén com ymij'ap'ajtpy ymijteedy'ajtpy je David. ⁵ Chi José yajcojayi padrónjoty miid María, je tōxyjāy huiḁibi anajty ymiid capxytuñ, huiḁi anajty ung tzim'ijtp. ⁶ Chi jadu'n yjajty co ajcxy anajty yjimity Belén, chi oyhuaad'aty co María paadipy y'ung. ⁷ Chi yma'xung'ajty je ungoob, e chi nibe'ñ nīmūxy miid ymotz, e chi agōgiy ma iyujc pēcx'iñ, co ca' anajty ti paady jāttac.

Je ángeles ajcxy etz je cōbixycuend'ajtpi ajcxy

⁸ Chi mihuingon je cajp anajty jāy ycōbixycuend'aty. Hue' anajty ajcxy yhuin'iñaayb huintzuumnajxyp je' ycōbixy ajcxy. ⁹ Chi Huindzin Dios tūg y'ángel ñigidaaci je' ajcxy, e yi Huindzin Dios y'oy'ájtín y'adicxcoody jūhuidity ma je' anajty ajcxy ymijc, chi ajcxy ooy chigi. ¹⁰ Huin'it je ángel yminañ:

—Ca' mdzigiygixy, cham iich miich nyajnimaaaygixy oybi ayuc huiḁibi yajjotcugihuipy tūg'óciy naax cajp. ¹¹ Miid miich ajcxy ycixpi ti ypi'c'aty cham ma je David ycajp tūg jāy huiḁibi miich ajcxy xyñihuānaam xycōhuānaam ma ajcxy mmidzip. Hue' je' je CRISTO, je Huindzin Dios. ¹² Yi' je' iixpéjtip huiḁi miid m'ijxcabipy. Mbáadipy ajcxy je ung ma'xung ñimóchity miid ymotz, ycōcnāy ma iyujc pēcx'iñ.

¹³ Chi janch mic'amy ñayguēxi miid je ángel may yi tzajpjotychinaaybi, chach Dios ojadájtciy ymināangixy:

¹⁴ ¡Ooy ycōmáyity ooy ymijity yi Dios tzajpjotypi, ji naaxhuiñ jotcuje'ajt miid jāy ajcxy ycixpi huiḁibi Dios yjāygidacpy!

¹⁵ Jadu'n yjajty co je ángel ajcxy ñicxtay tzajpjoty, chi je cōbixy cuend'ajtpi ajcxy ñayñimayi:

—Tzoc jámim jim Belén, jaydēbi n'íxim ti ti ytunyii ti yjadyii huiḁibi nHuindzin'ájtím Dios ti xyajnimáayim.

¹⁶ Chi ajcxy ñicxy jottigoy, chi oy pátcixy María, José etz je ung ma'xung y'agōgiyity ma je iyujc pēcx'iñ. ¹⁷ Co ajcxy ijxy je María etz je ung ma'xung, huin'it ajcxy nigapxtay nimíydactay jadu'n nej je ángel ajcxy ñimayi miid je pi'c'anāg ycixpi. ¹⁸ Tūg'óciy jāy huiḁi midou ooy jihuuy huinmay jadu'n nej je cōbixycuend'ajtpi ajcxy yminañ. ¹⁹ Chi María mido'mbijctay, e yajhui'my ma yjot yhuinmañ. ²⁰ Chi yhuimbijty je cōbixycuend'ajtpi ajcxy cōmay jāymech ajcxy yi Dios, etz ooy alabanza ajcxy iij miid Dios ycixpi miid tūg'óciy jadu'n nej anajty ti íjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquēxiy ma Dios ytiyc

²¹ Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxiimoy JESUS, jadu'n nej je ángel anajty jayijp ti yminañ ca'ni anajty chimigiyii yciyigiyii.

²² Co je xii oypaatni mina je María anajty yhuätzpidzimaamni, jadu'n nej Moisés ycōtújcín je jécyp yminañ. Chi ajcxy miidnicxy je ung ma'xung jim Jerusalén

capxquëxigaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy unggoob yëydijcpi huidi ma'xung'ajtp, abicy yhuí'mipy mïd je Huindzin Dios ycixpi.

²⁴ José etz María oy yéjccixy huindzigi'ñ jadu'n nej Huindzin Dios ñecy ymina'ñ co jëbi yecy metzc jam muuxy o pajtza'm muuxy.

²⁵ Jim Jerusalén anajty chinäy tüg jäy huidi anajty yxii Simeón, tudägyjäy je', etz ooy Dios jäymeç. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e mïd je' anajty Dios yjihuí'ñ ymic'ajt. ²⁶ Dios yjihuí'ñ ymic'ajt ti anajty yajnejhuíyii co ca' chojc öga'ñ, jayijpni oc'ixipy je Huindzin Dios yCristo. ²⁷ Je Dios yjihuí'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymïdnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mibijctzoy mïd je' ycixpi, chi ymina'ñ: ²⁹ Jadachambi capxcix jotcujc, Huindzin Dios, mïd ñich miich mdumbi, com ti mguyduñ jadu'n nej ti xyñimäyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huidibi ti mni'ixiy ma tüg'óciy jäy ajcxy yhuinduu.

³² Jada ung ma'xung ytiy'ajt yegip ma yi jäy ajcxy huidi ca' yjudiojäyity. Jadu'n yi' nipaady nej tüg jün huidi codiicxp je jäy. Cömay y'idipy yi Israel jäy mïd yi' ycixpi.

³³ José etz Jesús ytaj ooy jihuüy huinmaay jadu'n nej Simeón ñigapxy je pi'c ma'xung.

³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jäy yjothuinma'ñ yaj'oyihuipy mïd yi Dios etz nañ jadu'n may Israel jäy yjothuinma'ñ ca' yaj'oyihuipy mïd yi Dios. Yi' je' tüg iixpejt co ca' jäy y'ixa'nüyb choga'nüyb, e jadu'n tüg'óciy yajnejhuíhuipy nej ajcxy nidüg nidüg yjothuinma'ñ mïdity. E miich m'idipy jotmaymïd jadu'n nejihuüy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjäy huidibi anajty yxii Ana, Dios je' anajty y'ayucnajtzcaxxiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jëyi huixtucj jimijt chinay mïd yña'y, mada'px midaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzejtigoty xim tzuum jopy ayuu anajty ycapxtägy. ³⁸ Chi Ana nimiñ José etz María jiiy ma Dios ytijc, e quipxy mïd ajcxy huingapxtacy je Huindzin Dios. Chi je Ana nimiydacy je pi'c Jesús mïd tüg'óciy jäy jim Jerusalén huidi anajty ajcxy jip'ijxp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñicxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy mïd huijy'ajt cujc'ajt, etz ymïd je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungday ungdeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigüy jim Jerusalén jadu'n anajty ajcxy costumbre mïdity co xii paady. ⁴³ Co je xii ñaxtäy, chi ajcxy huimbíjtcixni, e Jesús yhuí'müy je' jim Jerusalén. Ca' José etz ytaj nejhuüy ajcxy co ti anajty yhuí'miy. ⁴⁴ Hue' ajcxy anajty tijy je' ymiñ axaam mïd ymügügtijc. Co tüg xii yöyigixni, chi ajcxy ixtay je' y'ung ma y'amügügtijc ajcxy, etz huidi mïd ñay'ixy'adyii ñaymügü'adyii. ⁴⁵ Co ca' ajcxy y'ung paady, chi yhuimbíjtcixni jim Jerusalén ung ixtaaybi.

⁴⁶ Chi jadu'n yajty codugüg xii oypaatcixy jim ma Dios ytijc, Jesús y'ñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ

yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihu'y jadu'n nej je Jesús huinjihu'yday etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiy. Chi ungday ymíañ: —Aay ung, ¿nej co miich jadu'n xytúngixyich? Yi mdeedy etz ich yam tzachjottigooyb nay'adzigi'yijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnejhu'iygixy co copity n'ida'ñich ma nDéedyich ytung?

⁵⁰ Chi ajcxy ca' huinjihu'iyi Jesús y'ayuc huidibi ycapxy.

⁵¹ Chi Jesús miid nicxy je' ajcxy jim Nazaret. Chi Jesús capxymidooy ytaj yteedy. Chi yi' ytaj yajhui'mday ma yjot yhuinma'ñ түг'óciy nej ytunyii yjadyi. ⁵² Chi Jesús ixpijc'adiitzp anajty ooy, etz yeegy yjāygojy huijycujc. E yi Dios etz jāy ajcxy ooy anajty jāygidaaccixy.

3

Juan el Bautista y'ayuccapxhuäcxy mijtig'iduum

¹ Ma anajty je Tiberio César yjimijjtoty, mimajmocx jimijt anajty maabi y'ane'mtig'iy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisantias anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmiid ma Dios ytijc. Je huin'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtig'iduum. ³ Chi Juan choñ ñicxy ma түг'óciy cajp mihuingon je Jordán mijñi, capxhuiy je jāy ajcxy, co huen jothuimbijttaaygixy etz huen niibejtcixy jigix ajcxy ypocy yajhuinmeecxip. ⁴ Jada jadu'n tuni jajtí nej je ayucnajtzcaxi'ybi Isaías anajty ti cojaay: Jim mijtig'iduum yajmidooy түг jāy mīañ: “Yaj'oyi'yigix yi Dios ytū'aa, tim jadu'n nej jāy ajcxy yaj'oyi'yigixy yi jibic tū'aa co түг rey mīañ.” Yajti'yigixy yi tū'aa huidibi ooy y'adijy y'a'och.

⁵ Tüg'óciy añi ahuoc huen joyi'yday, түг'óciy tungop huen nañ jadu'n joyi'yday. Tüg'óciy ni'aa tū'aa huidibi tijmin tijxi'p huen ti'yday. Yi tū'aa huidibi ca' quipxyjatyity huen quipxyjaty ti'yday.

⁶ Tüg'óciy yi jāy ajcxy ixipy ñejhuihipy nej Dios yega'ñ je nihuambi cohuambi.

⁷ Chi Juan oiy ajcxy je jāy pinjaty anajty miimb niibejtpi, ymíañ:

—¿Miich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quäg ma yi ayo'n huidibi Dios yquexaamy? ⁸ Túngix oybi, jothuimbijtcix, ca' ajcxy mīaangixy miñ xyipy: “Abraham ich ajcxy n'ap'ajtpy ndeedy'ajtpy”. Ich miich ajcxy nimaayb co Dios ixti jēbi yi' yaj'ung'adyii yaj'anäg'adyii Abraham jada tzaa ca'ydi miich ajcxy. ⁹ Dios ni'ixi y'ity jaydēbi yajcōdigoyipy jāy ajcxy y'alma huidibi jibic-huinma'ñ miid. Tim jadu'n nipaady nej jāy ni'ixi y'ity miid jacha co pujxiga'ñ түг quipy huidi ca' oy ytiim'aty, etz yajnōgtāhua'ñ.

¹⁰ Chi je mayjāy ajcxy y'amidooy je Juan:

—¿Ti ich ajcxy jēbi nduñ?

¹¹ Chi je Juan y'adzooy, ymíañ:

—Pinjaty yhuít miid metz, jaydēbi möy pin ca' miidity ni түг. Etz pinjaty caagy miid nañ jadu'n möhuipy pinjaty ca' miidity.

¹² Chi miñ jadyii yajcogüejtpi co anajty ñiibedaangixy, ymíañ ajcxy:

—¿Ti huaad ich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' ñigi anaxy myajcogüety jadu'n nej je cōtújcín y'ane'my.

¹⁴ Chi soldado ajcxy ymíañ:

—¿Ti ich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapíjciy, ni mganíhuambedípy ajcxy. Nañ jadu'n mijotcujc'ájtciy nej myajmujuuygíxy.

¹⁵ Je mayjáy yjíp'íxyp anajty ajcxy ooy, etz ooy jihuíy huinmaay nejhuíhuaangíxy pen yi Juan je' anajty Cristo. ¹⁶ Chi Juan nimay ajcxy nidüg'óciy:

—Íich janch nyajníbéjtypich jáy mîid nîi. Miimb je' axaam huidibi jacmij ca'ydi íich, ca' huaad yi' ycíghuin ngejich. Je' miich ajcxy xyajníbedípy mîidi Dios yjihuí'ñ ymic'ajt etz mîidi jîin. ¹⁷ Je Cristo ni'ixi' y'ity co oybi mîhua'ñ je jáy huidibi ajcxy oyhuinma'ñ mîid, etz ymîhuaamy tzaachypi je jáy ajcxy huidibi jîbic-huinma'ñ mîid, tzaachypi huidibi nicamina ycíxipy. Tîm jadu'n nipaady nej tûg jáy ni'ixi' y'ity co ymoc-huimboja'n, e chi je oybi mocpajc pidäga'ñ ma che'x, etz je mocjaam ninöghua'ñ, e caminaxîi ycapîdza'ñ je jîin.

¹⁸ Je Juan ooy jáy capxhuijy, etz canaagnax oybi ayuc capxhuäcxy. ¹⁹ Chi yi' ooy je rey Herodes, co y'uch Felipe ytöxyijc Herodías mîid tzînaayi, etz jacjaydiybî jîbic-huinma'ñ tîibi Herodes anajty tuñ. ²⁰ Chi je rey Herodes nîgi pocytuñ co Juan pidacy pujxtigoty.

Je Jesús ñîbejtîin

²¹⁻²² Chi jadu'n yjaity co jadu'n tûg'óciy jáy ñîbejttay nañ jadu'n Jesús ñîbejty. Yam anajty Jesús ycapxtägy co je tzejp y'ahuaach, etz je Dios yjihuí'ñ ymic'ajt yminajcy ma Jesús ycöduu mîid ñîinîcx jadu'n nej muuxy ñîinîcx. Nañ jadu'n yajmîdoy tûg ayuc choñ tzejpjoty yminañ:

—Miich n'ung'ajtpy, ooy íich miich ndzocy ooy njihuíy, ooy njotcújcidyich mîid miich.

Jesús ymij'ap ymijteedy

²³ Jesús hue' anajty yjimijt oy ni iipxmajc co ytungtigíy. Hue' je' anajty jadu'n jáy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je'

Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

4

Je mujcu' tuñ ijxta'ni ma Jesús

¹ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij niñ, chi je Dios yjihui'ñ ymic'ajt yajnicxi mijtigiduum. ² Jesús y'ijty huixchigui'px xii jim mijtigiduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyi. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' miidpejty Jesús ma tüg cop janch cixpi, chi tüg jaxigy yajni'ixiiy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—Ich miich möhuipy tüg'óciy mic'ájtín ané'mín etz oy'ájtín, com ich ngi'am y'ity tüg'óciy, e nmöhuibich hueñtimpñity. ⁷ Pen xyhuingoxtinaybich xy'ojadajtpich miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuägtuutcich miich mujcu', com jadu'n jaybéty y'ity: “Co yi Huindzin miich mDios mhuingoxtinahuipy m'ojadadipy, etz yi' je' tüg pajc myajmij'adipy.”

⁹ Chi je mujcu' miidnicxy Jesús jim Jerusalén, chi miid pejty ma Dios ytiyc coduu, e nimay:

—Pen Dios miich xy'ung'ajtp cödiypnax naaxcíxy, ¹⁰ com jaybety jadu'n y'ity ma Dios ñecy co quexipy Dios yi' y' ángeles ajcxy e xycuend'adipy. ¹¹ Cigíxy ajcxy xyhuidziy, ca'ydi mdzaachiy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' mjot'ixipy mhuinma'ñ'ixipy yi mHuindzin Dios.

¹³ Co je mujcu' yajciyxy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpiy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymiñ Nazaret ma anajty ti yeegy. Chi Jesús ytiy ma naymujctac, jadu'n nej costumbre anajty miidty pocxxiduum. Chi ytinaay'ahuíy, chi ytiy necycapxi.

¹⁷ Chi ajcxy mooy je necy huidibi je Dios y'ayucnajtzcapxiybi Isaías yjaay. Chi ciyhuäcxy je necy, paty jiiy tüg it ma anajty yjaybétyity jadu'n:

¹⁸ Je Huindzin Dios yjihui'ñ ymic'ajt xymiid'ajtpich, co xyajniñbicyich co nyajnimähuibich ayoobitijc je oybi ayuc. Ti xyquexyich co nyajjotcugihuibich je jäy ajcxy huidi jotmay ymiid, etz nhuinméecxibich huidibi ajcxy pujxtigótyip, nañ jadu'n ajcxy je huidibi huiintzip nyajhuindicxigibich, e nbidägbich ahuätztuum huidibi yajtza-achytumb.

¹⁹ Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'ñ miid je jäy ajcxy ycixpi.

²⁰ Chi jada' Jesús abidiŋty je ñecy, yajcidiŋty je tungmĩdpi, huin'it y'ixtacy. Chi tũg'óciy mayjāy jĩby ma naymujctac ooy ajcxy huindicxy je Jesús. ²¹ Chi Jesús ymĩnandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmĩdooy.

²² Chi nidũg'óciy ajcxy ooy jāygidacy nej Jesús mĩna'ñ, etz huinmay ajcxy ooy je ayuc huidibi Jesús ycapxy, chi ñayñĩmāayigixy:

—¿Nej ca'y José jada jada' y'ung?

²³ Chi Jesús ymĩnaañ:

—Ca' yjēcĩty miich ajcxy xyajnimāhuibich jada ayuc: “Tzoydumbi naychoyĩhuĩ cĩ'm. Tũg'óciy jadu'n nej iich ajcxy nmĩdooyich ti mduñ jĩm Capernaum, nañ jadu'n miich octun ma mgi'mgajp.”

²⁴ Chi Jesús yjacmĩnañ:

—Janch iich miich ajcxy nnĩmāy co ni tũg jāy huidibi Dios y'ayucnajtzcaxĩyb ca' jāy ajcxy cōbicy ma yci'mgajp. ²⁵ Janch iich miich ajcxy nimāy co ooy anajty may co'ōgy ytōxyjāy ya Israel jecy'ajty co Elías chinaay, co je tzajp adujcy tugĩg jĩmĩt jatudujc po', co oy yuu miĩn ma tũg'óciy naax cajp. ²⁶ E Dios ca' quejxy je Elías ma yĩ Israeljāy co'ōgy tōxyjāy ajcxy. Hue' janch quejxy huinduum jĩm Sarepta ma Sidón naaxjot ma tũg co'ōgy tōxyjāy huidi jĩm. ²⁷ Nañ jadu'n anajty ooy mayjāy pũdz pa'm mĩdity ya Israel jecy'ajty co je Dios y'ayucnajtzcaxĩybi Eliseo chinay. Chi ni tũg jāy huin'it catzoocy, jēyĩ tũgpajc choocy pa'mjāy huidibi anajty yxĩ Naamán huidi tzoon Siria naaxjot.

²⁸ Huin'it tũg'óciy jāy huidi anajty jĩby ma naymujctac ooy yjotma'tcoty co jadayaab ayuc ajcxy mĩdooy. ²⁹ Chi je mayjāy ajcxy nibidiŋy Jesús etz yajpidzĩmy ma je cajp. Chi ajcxy yajnicxy jĩm ma je tzaahuingueetz, co je cajp copcĩxy anajty yajpaady, e jĩm anajty cōdĩpnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tũg yēydĩc huidibi anajty mĩd jibic espĩritu

³¹ Chi Jesús y'idacy jĩm Capernaum, tũg cajp jĩm Galilea naaxjot, chi Jesús jāy ajcxy yaj'ixpijcy pocxxĩduum. ³² Huinmay ooy ajcxy jadu'n nej je' yaj'ixpicy. Ñayñĩmāayigixy co je Jesús yaj'ixpicy nejĩhuĩy mĩtung mĩj'ané'mĩn mĩdity.

³³ Jĩby ma je naymujctac jĩby anajty tũg yēydĩc huidibi mĩd tũg ca'oybi, chi je ca'oybi mic yaaxqueecy ymĩnañ:

³⁴ —Ixmajtzcich ajcxy, ¿ti mdunamy mĩd iich ajcxy Jesús je nazaretpi? ¿Nej ti mmiñ co xyajhuindigoyāanigixyich? Iich miich n'ijxcapy co miich je' je Huātzipi Dios.

³⁵ Chi Jesús je ca'oybi ojy, nimay:

—Amon, pidzim ma yĩ jāy.

Chi je ca'oybi najtztĩjy je yēydĩc agujc'amy ma je jāy ajcxy, huin'it ypidzĩmy, e ca' ni nej jactuuñ. ³⁶ Tũg'óciy jāy jĩm ooy ajcxy ñay'adzigĩyĩ miñ xyĩpy yjanayñĩmāayigixy:

—¿Ti ayuc jada' yĩ? Co mĩd y'ané'mĩn etz mic'ajt ane'my ca'oybi etz yajpidzĩmy ma jāy.

³⁷ Chi Jesús capxpaady y'ĩjty ma tũg'óciy cajp huidi huinduy agónip.

Jesús yajtzoocy Pedro ymĩd tōxyjāybi

³⁸ Chi Jesús ypidĩgy choñ ma naymujctac, ytigĩy ma Simón ytĩc. Jadu'n anajty Simón ymĩd tōxyjāybi mic ytoyĩ. Chi ajcxy cohuanĩy Jesús mĩd je' ycĩxpi. ³⁹ Chi Jesús yhuindacy ma je' yhuinduu, ix'ojy je toyĩ, e jadu'ñi ñajxy. Chi je' mic'amy ypidĩgy, yajcay yaj'uucy ajcxy.

Jesús yajtzoocy mayba'mjāy

⁴⁰ Tzuu tzuu anajty jāy ajcxy yajnicxy tũg'óciy jāy ajcxy pa'mmĩdpi ma Jesús. Chi Jesús cĩñaxay nidũg nidũg, e jadu'n anajty ajcxy chōgy. ⁴¹ Chi nañ jadu'n je' ca'oybi yajpidzĩmy ma mayjāy, mic je ca'oybi anajty yhua'ñ yjihuiy, ymĩna'ñ:

—Miich je' Dios xy'ung'ajtp.

Chi Jesús ñigi ix'ojy, ca' anajty yajhuäcxipy ñicxy yjaccapxy, com ti anajty nejhuiyigixy co yi' je' je Cristo.

Jesús y'ayuccapxhuäcxy jim Galilea

⁴² Co yximñy, chi chooñ Jesús, ñicxy migtigiduum. Ooy jäy yja'ixtäyii, chi ajcxy oy paatcixy, yajhuäcxipy ajcxy ooy, ca' anajty oc'ixmadzáangixni. ⁴³ Chi Jesús yminañ:

—Ooy jada chachcopícyity co canaag agajp iich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuiñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

¹ Tügtecy jadu'n yjajti, jim anajty Jesús ma je Genesaret mejypa', co jäy ñimiini janch ñay'adiñy ñay'agodiñyigixy, tzach'amidohuaangixy Dios y'ayuc. ² Chi yi' iixpaty mejtz barco jahueengi mejypa'áy. Je acxmajtzpidijc ti anajty ypidzimgixy ma je barco, jim anajty y'acxxuumy púccixy. ³ Chi Jesús yajtigiyñy tüg barco huiñ Simón anajty je'ajtpy. Chi may'ajt pijctzoy co huen yajjiñuägy hueeni yi' barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴ Co ycapxymaayí, chi Jesús Simón ñimay:

—Ñicx pidäg m'acxmadzi'ñ mejyjoty, jaydëbi májtzcixipy acx.

⁵ Chi Simón y'adzooy:

—Huindzin, ti iich ajcxy ooy njatuñ tüg tzuum, ni ti ti ngapáatcixyich. Per müd müch m'ayuc ycixpi yi' acxmadzi'ñ nbidägbich mejyjoty.

⁶ Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycacñich müd je may acx ycixpi. ⁷ Chi Pedro yemi ymígügtijc huiñ anajty jim ma je jadügpí barco, huen miñ ajcxy pubeñy. Chi ajcxy ymiñ pubeñtp, yaj'ujch ajcxy metzpi barco müd may acx, jagoo jagoo ycaquiñ je barco müd may acx ycixpi. ⁸ Co Simón Pedro ijxy jadu'n, chi ycojxtinaay'ahuñy ma Jesús yhuinduu, ñimay:

—Huñhuäctúutñich, Huindzin, com iich pocyjäy iich.

⁹ Com Pedro janch tzigñyb anajty, etz nañ tzigñyb tüg'óciy huiñ anajty müd ti ytuñ, co anajty ooy may acx tzachyajnibéjtcixy. ¹⁰ Nañ jadu'n tzigñyb anajty je Jacobo etz Juan je Zebedeo ymang ajcxy huiñibi Simón anajty ti pubety. Chi Jesús ñimay Simón:

—Ca' mdzigñy, jadachambi etz jacñicñi xñ tiempo mdunipy jäymadzñ.

¹¹ Co je barco yajmejpídzimy, chi ajcxy y'ixmajch tüg'óciy, chi ajcxy panicxy Jesús.

Jesús yajtzögy tüg jäy nübützpa'mmñdpi

¹² Chi jadu'n yjajti co anajty Jesús yjímity ma tüg cajp, co ñimiini tüg yëydijc ymñd anajty pützpa'm. Co je pa'mjäy ijxy Jesús, chi niñuindacy ma yhuinduu, minucxtacy, ñimay:

—Huindzin, pen mdzojcpy jëbi xyajtzögibich.

¹³ Chi Jesús yci' najtzxajñy nñdooñ, ñimay:

—Ndzojcpyich, hui'm huädz.

Chi mic'amy je jäy choocy. ¹⁴ Chi Jesús ane'my, ñimay:

—Ca' ni pin myajnimähuipy, ñicx janchtiy nayguëxigñib ma teedy, jaydëbi möhuipy Dios huindzigi'ñ, jadu'n nej Moisés ycötújcin je jécyp y'ane'my, müd yi' ycixpi co ti mhuäatzpidzimy, jaydëbi jäy ajcxy nejhuihuipy co ti mdzögy.

¹⁵ Je capxy'ayuc ñigi y'oc-huäcx'adñtzní, e janch mayjäy y'ocnimújcin, jim pin ayuc midohuaam, e jim huiñi tzögaam. ¹⁶ Jesús ycögueecpy anajty je mayjäy, ñicxy anajty migtigiduum Dios ojajajtpi.

Jesús yajtzögy tüg jäy cñuxypi tecyuxypi

¹⁷ Tüg tecz yjãiti, Jesús anajty yaj'ixpijcp, e jim anajty ajcxy iñây ma Jesús yhuinduu fariseojây ajcxy, etz huidi jây yaj'ixpijcp Dios ñecy huidijaty anajty ti choongixy canaag agajp ma Galilea naaxjot Judea naaxjot, etz cham huidijaty anajty ti choon Jerusalén. E Jesús ymïid anajty Huindzin Dios ymic'ajt co jây yajtzögipy. ¹⁸ Chi nijëjty jây yajja'ty cijx'am tüg pa'mjäy yëydijcpi huidi ca' anajty yci' ytecy yücxy. Chi ajcxy ixtaay ma yajtijctigihuiipy pidäga'ñ anajty ajcxy je pa'mjäy ma Jesús yhuinduu. ¹⁹ Com ca' anajty ni ma tigiyiydac müid co je tijc anajty ooy y'újtzy müid mayjäy. Chi ajcxy müidpejty tijc nigixy, chi ajcxy tijc yajcöhuach, e chi ajcxy cödiyñajxy cijx'am je pa'mjäy ma Jesús yhuinduu. ²⁰ Co Jesús ijxy jadu'n nej je' ajcxy ymibicy, chi nimay:

—Yëydijc, yajmeecxp mbocy.

²¹ Chi je' ajcxy huidi yaj'ixpijcpy Dios ñecy etz je judío ixpicytijc huidi naydíjigixp fariseojây huinmaygoty, ñayñimáayigixy: “Jada Jesús ooy ycapxtigoy müid Dios. Ni pin yëydijc huaad ca' ti pocymeecxy. Tügpajc nHuindzin'ájtım Dios huidi pocyhuinmecxp.”

²² Jesús ñejhuüiy je' ajcxy yjot yhuinma'ñ, paady ajcxy nimay:

—¿Ti mdzachuinmaayb ajcxy ma mjot mhuinma'ñ? ²³ ¿Ti jactzip co minaanım co ti mbocy yajmeecxy o minaanım: “Pidíg etz nicxni”? ²⁴ Jaydëbi müich ajcxy mnejhuüihuiipy co iich je' je jây huidi tzoon tzajpjoty, nmüidich ané'mın etz mic'ajt ya naaxhuiñ jëbi jây nbocyhuinmeecxyich, paady cham nnimäyich yi pa'mjäy: “Pidíg etz yajpidíg mmaabejt, nicx ma mdijc.”

²⁵ Chi mic'amy je pa'mjäy ytinayigy ma je jây ajcxy yhuinduu, etz yajpidigy je' ymaabejt ma anajty ycögnây. Chi ñicxni ma ytijc, chi ooy cömay jäymejch Dios. ²⁶ Huin'it nidüg'óciy je mayjäy ooy ajcxy jihuiy, e chi ajcxy ooy cömay etz jäymejch Dios. Chi ajcxy ooy chigiyigixy, yminaangixy:

—Cham janchtiy n'íxim mijhuinma'ñ.

Jesús huodzoon je Leví

²⁷ Co jadu'n ytuni yjãiti, chi Jesús jim choñ, chi ijxy tüg yajcogüejtpi huidi anajty yxii Leví. Leví jim anajty iñây ma yajcogüejttac. Chi Jesús nimay je Leví:

—Pajaamgich.

²⁸ Chi je Leví ixmajtztay huidi anajty ytuumyb etz padzoon je Jesús.

²⁹ Chi Leví mayjäy yajcay yaj'uucy ma ytijc, cham may yajcogüejtpi ajcxy etz jacjadyii jây huidi iñayb ma yi mesa müid Jesús etz yi' ydiscipulos ajcxy. ³⁰ Chi je' ajcxy huidibi yaj'ixpijcp Dios ñecy etz je ixpicytijc huidi naydíjigixp fariseojây tzachni'ameechycápxcixy ni'ojigixy je Jesús ydiscipulos ajcxy, yminaangixy:

—¿Na'amy co mgaaygixy m'uuccixy müid yajcogüejtpi etz müid pocyjäy ajcxy?

³¹ Chi Jesús yminañ:

—Ca' yajmayjaty tzoydumbi huidibi ca' ajcxy ypigyii, jëyi huidi ajcxy pijcip. ³² Ca' iich ti nmiñich ma je jây ajcxy huidibi ca' pocy müidity. Iich ti nmiñich müid yi pocyjäy ycixpi co huen jothuimbijttaaygixy ma Dios.

Yaj'amidooy ajcxy Jesús ti co jây ajcxy y'ayunas'ájtixy

³³ Chi je mayjäy ajcxy Jesús nimay:

—Nej co yi' (Juan) ydiscipulos ajcxy janam jadojc jaygay y'íjtixy etz ycapxtáccixy, nañ jadu'n je fariseojây ydiscipulos ajcxy janam jadojc jaygay y'íjtixy. Chi müich mdiscipulos ajcxy ca' ajcxy jaygay y'íjtixy, caaby uucp ajcxy jabom jabom.

³⁴ Chi Jesús yminañ:

—¿Nej jëbi yaj'ayuu'aty jây ajcxy huidi yajpatpi ma je pijcpi yajnixiuduñ, pen quipxyi yam yajpaady müid je huidibi pijcp? ³⁵ Minamb je xii je tiempo mina je pijcpi yajtzoniib, huin'it janchtiy ajcxy jëbi y'ayuu'ájtixy.

³⁶ Nañ jadu'n ajcxy yajnimay tüg jihuimbit ayuc:

—Ni pin ca' huaad agi'yíy Tuc-huit miid jemyhuit, canaan jëyi yci'dzip yi jemybi, nañ jadu'n je tucpi ca' oy yhui'ma'ñ miid je jemyhuit agi'yi'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi yci'dzip je tucpi cochac, chi y'ixyojctähuipy je vino etz je cochac ñitigoydähuipy. ³⁸ Pidägy ajcxy jemy vino ma tüg jemybi cochac, chi jadu'n ca' ytigoyipy je vino ni je cochac. ³⁹ Ca' ni pin tzocy vino jemybi, pen ti anajty ügy vino tiibi yjejcni, co jadu'n ymina'ñ co jac oy je tiibi yjejcni.

6

Je discípulos ajcxy yajmújccixy trigo cojc pocxx#duum

¹ Chi jadu'n yajti tüg pocxx#duum co Jesús oy ñaxy ma tüg trigo cam, e yi' ydiscípulos ajcxy oy anajty yajminájccixy trigo tiim, chi ajcxy nixajztüdy, e chi ajcxy jüxcy. ² Chi nidügti fariseojäy yminañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin xiiduum?

³ Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñyi? ¿Nej ca' mnejhuuygixy ti David ytuun co anajty yuubögyii etz nañ co ymigügtijc anajty yuubögyii? ⁴ David ytigüy ma Dios ytiyc, chi conígy je tzajcaagy huidibi anajty jiihy ma Dios yhuinduu, chi caay, nañ jadu'n moy je ymigügtijc ajcxy. Je' tzajcaagy ca' anajty ypadyii nixcy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Íich je' je jäy huidibi tzoön tzajpjoty, jëbi nnimäyich je jäy ajcxy ti jëbi huaad ytúngixy sábado xii.

Je yëydijc huidibi anajty yci' tädzip

⁶ Chi jadügtecy yajti tüg pocxx#duum, co Jesús ytigüy ma tüg naymujctac, chi jäy yaj'ixpijcy. Jiihy anajty tüg yëydijc huidi y'a'oygi' anajty tädzip. ⁷ Chi huidi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögam pocxx#duum, e je' ajcxy anajty miid yci'xi xihua'ñ. ⁸ Jesús ñejhuuyb je' anajty ajcxy yjot yhuinma'ñ. Chi Jesús nimay je yëydijc huidibi anajty yci' tädzip:

—Pidig, tinayig mayjäy'agujc.

Chi je' ytinaayigy. ⁹ Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy ymina'ñ, jëbi oybi nduunim pocxx#duum o jëbi jibicpi nduunim, nyajtzoocim jäy o nyajtgooyim jäy yjugy'ajt?

¹⁰ Chi Jesús ajcxy huindicxpejttay nidüg'óciy, chi nimay je pa'mjäy:

—Xajtiu mgi'.

Chi je' yci' xajtiy, huin'it je' yci' choocy. ¹¹ Chi je' ajcxy huidi yaj'ixpijcp Dios ñecy etz je ixpijctijc huidi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yajti huin'it xii Jesús ñicxy mijtigüduum Dios ojadajtpi. Tüg tzuum ooy Dios mijijctzooy. ¹³ Co yximüy, chi Jesús huoomiñ yi' ydiscípulos ajcxy. Chi huin'ijxy je majmetzpi, etz yximoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huidi yximoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huidi jäy ytiipy Zelote; Judas, Jacobo y'uch; etz Judas Iscariote huidibi nañ jadu'n Jesús cïyejc ma ymidzip.

Jesús yaj'ixpijcy mayjäy

¹⁷ Chi Jesús m̄id'idacy je disc̄ipulos ajcxy, chi oy yhuäcxipy ma t̄üg ajoy m̄id ydisc̄ipulos ajcxy etz mayj̄äy huidi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayj̄äy co am̄idoo'idáani Jesús y'ayuc etz nañ chōgaangixy je pa'm huidi ajcxy ym̄id. ¹⁸ Cham je huidi anajty ayo'n tzachpaatp m̄id ca'oybi, nañ tzoocp je' anajty ajcxy. ¹⁹ Chi t̄üg'óciy je j̄äy ajcxy janch ñ̄idonamy anajty ajcxy je Jesús, co ym̄id mic'ajt co j̄äy t̄üg'óciy yajtzög.

Je jotcuyc'ajt etz je cajotcuyc'ajt

²⁰ Chi Jesús huindicxpejtay je mayj̄äy huidi ajcxy ixpigaam yi' y'ayuc, e ym̄inañ:

—Jotcuyc miich ajcxy ayoobt̄ijc, com miich ajcxy cham xypaat Dios y'ané'm̄in.

²¹ Jotcuyc miich ajcxy huidi cham yuubó'c̄ip, co mḡüxiib miich ajcxy. Jotcuyc miich ajcxy huidi cham jotmay m̄id, co ypáadip x̄i tiempo mina mxondáaccixipy.

²² Jotcuyc miich ajcxy mina anajty j̄äy ca' xy'ixáangixy, co p̄in xy'ixt̄ijcixipy, e co j̄äy ajcxy j̄ibic xyñigapxa'ñ xyñix̄iga'ñ m̄id ñ̄ich yc̄ixpi, je j̄äy huidi t̄zoon tzajpjoty. ²³ Mxondäg miich ajcxy huin'it x̄i, etz m̄jotcuḡīygixip, com ooy chachm̄ij̄jity huidi ajcxy mbadaamy tzajpjoty. Com jadu'n anajty jecy'ajty miich mm̄ij'ap mm̄ijteedy ca' ixaangixy je huidi anajty Dios y'ayucnajtzcax̄iipy.

²⁴ Miich ayoob ajcxy comeñj̄äy, com ca' ti jotcuyc'ajt̄in m̄jacpadaangixy huin'it x̄i (co Dios t̄yduñip je naaxhuiñj̄äy).

²⁵ Miich ayoob ajcxy huidi cham oc'agujc'ajtp oc̄jotcuyc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajnigapxipy myajnim̄iydägipy, com jadu'n jecy'ajty miich ajcxy mm̄ij'ap mm̄ijteedy n̄imay je j̄äy ajcxy co ooy y'oyj̄äy huidi ajcxy anajty najtzcax̄iib ayuc huidibi ca' ytiy yj̄anchity.

Nej huaad nmigüg ndzójc̄im

²⁷ Chi Jesús yjacm̄inañ:

—Miich ajcxy huidi cham am̄ido'ijtp ñ̄ich n'ayuc, ñ̄ich miich ajcxy n̄imaayb: Tzójcc̄ix mm̄idzip, m̄i'oyj̄äy'ajt̄c̄ix huidijaty ca' xy'ixaangixy. ²⁸ Migapx je j̄äy ajcxy m̄id oyjot oyhuinma'ñ huidi ajcxy j̄ibic xyñigapxp xyñi'oj̄īyb. Mib̄ijctzoogixy yi Dios m̄id je' ajcxy yc̄ixpi huidibi xyñigapxp xyñi'oj̄īyb. ²⁹ Pen ji p̄in xycojxy ma yi m̄huinj̄ijp, mo' jadüg adu'm'amy ahuin hueñ coxy. Pen ji p̄in xyp̄igaani yi m̄jocxhuit, jact̄immo' m̄ñ̄jen huen yajnicx. ³⁰ P̄in xyp̄ijctzohuip tijaty, mo'. P̄in xyp̄ijc̄ip huidi miich m̄jē'ajtpy, ca' m̄b̄ijctzohuipy jadüg'oc. ³¹ Nej mdzocy tunipy j̄äy m̄id miich ajcxy, nañ jadu'n miich ajcxy mdunipy m̄id yi' ajcxy.

³² Pen miich ajcxy j̄eyi mdzojcc̄ixpy p̄injaty xychojcc̄ixp, ¿ti oyj̄äy'ajt̄in jada' miich ajcxy m'ocpaadipy? Nañ jadu'n je pocyj̄äy ajcxy chojc̄py p̄injaty yi' ajcxy tzójc̄ip. ³³ Pen mdumyb oybi huidijaty mm̄id ooy mnaym̄igüg'adyi. ¿Ti oyj̄äy'ajt̄in jada' miich ajcxy m'ocpáadip? Nañ jadu'n je pocyj̄äy ajcxy tuñ oybi m̄id ym̄igügt̄ijc. ³⁴ Pen myejc̄pijctzou m̄id je j̄äy huidibi miich ajcxy m̄j̄ijp'ijxpy co nañ jadu'n xym̄ohuipy tigat̄i, ¿ti oyj̄äy'ajt̄in miich ajcxy mdumyb? Nañ jadu'n yi j̄ibic j̄äyd̄ijc j̄ayejc̄pi tijaty p̄ijctzoy co nañ jadu'n j̄ijp'ijxcixy co ym̄ohuipy tigat̄i. ³⁵ Miich ajcxy, tzójcc̄ix mm̄idzip, m̄i'oyj̄äy'ajt̄c̄ix mm̄idzip, yajp̄ijctzoogix tijaty, e ca' ni ti m̄j̄ijp'ijxcixipy co ajcxy jac m̄ij mbaadip. Jadu'n miich ajcxy m̄ij mbaadip oy'ajt̄in e mnayd̄ij̄īyb ajcxy je m̄ijpi Dios y'ung. Com Dios pa'ayoodaayb t̄üg'óciy yi j̄äy ajcxy huidibi ca' ti j̄äyḡidägy, etz huidi j̄ibicj̄äy. ³⁶ Miich ajcxy pa'ayoo migügt̄ijc ajcxy, jadu'n nej m̄Dios Teedy tzajpjoty p̄i ypa'ayoo huenȳt̄im̄p̄inity.

Ca' mmigüg ni ti myaj'ix'ixipy myajpa'ixipy

³⁷ Ca' mmigüg ni ti myaj'ix'ixipy myajpa'ixipy, huin 'it ca' p̄in xy'ix'ixipy xypa'ixipy. Ca' mmigüg mbocy'ixipy, e huin'it ca' p̄in xypocy'ixipy. Huinmecx mmigüg, e huin'it nañ jadu'n Dios myajhuinmeec̄ip. ³⁸ Mo' mmigüg etz huin'it miich ajcxy Dios xym̄ohuipy

quipxy ooy tijtäch etz janch yajxon y'újtzy cödinaayb. Com yi quipxi'ñ tiibi myajquipxy, nañ yi' mïd xyquipxhuimbidity.

³⁹ Chi Jesús yajnimay je mayjāy tūg jihuimbit ayuc:

—¿Nej jēbi tūg jāy huintzpi ymīgūg huintzpi huijtzyōyñi? ¿Nej ca' mdijy nimetz yjutcōgāgixipy? ⁴⁰ Ca' ji ni tūg ixpijcpī huīdi nīgī xpīcyip ca'ydi yhuindzin, pen ji pīn huādz yjadīm'ixpicy najtzpadīhuipy yhuindzin.

⁴¹ ¿Na'amy co mic'amy mbocy'ixy mmīgūg co hueeni ytundigoy, e miich jac mij ooy mdundigoy, e ca' mjihui'ñybicy? Tīm jadu'n nipaady nej jihuīy ti m'ixy pi'cpūx ma mmīgūg yhuīn, e ma miich mgi'mhuīn jac jiiby mij quipy, e ca' m'ixy je quipy ma mgi'mhuīn. ⁴² Ca' huaad mñimāhuipy mmīgūg: “Nayyegī miñich pūx n'ocyajpidzim maabi mhuīn”, e miich ca' m'ixy mij quipy ma mgi'mhuīn. Jibicjāy miich. Jayijp miich myajhuādzip mjot mhuīnma'ñ, huīn'it jēbi mmīgūg m'ihuījip mgapxhuījip, jadu'n nipaady nej jihuīy ti myajpidzimy je quipy maabi mhuīn, jachuādz m'ixīgipy e chi jēbi yi pi'cpūx myajpidzimipy maabi mmīgūg yhuīn.

Je quipy je ytim, yi' mïd ycixpi yaj'ijxcapy

⁴³ Ca' yi' y'oyjāyity huīdi jibic tuumb, nañ jadu'n ca' jibicjāy huīdi oy tuum, tīm jadu'n nipaady nej tūg quipy. Ca' ji yi' oyguipy huīdi jibic tīm'ajt, nañ jadu'n ni ca' yjibicquipyity huīdi oy tīm'ajtp. ⁴⁴ Com ni je' quipy yaj'ijxcap mïd ytim ycixpi. Ca' pīn higeri tīm tucy ma quipy apymīdpi. Nañ ni pīn ca' uvas cha'm piy ma aadz apymīdpi. ⁴⁵ Je jāy oyjāybi ma yjot yhuīnma'ñ yajpidzimy oybi. Je jibicjāybi ma yjot yhuīnma'ñ yajpidzimy jibicpi. Huīdibi yhuīnmaayb jotjoty huīnma'ñjoty yi' ycapxyp.

Je mejtnajxpi poch y'ijx

⁴⁶ Chi Jesús yjacminañ:

—¿Nej co nigo minangixy: “Huindzin, Huindzin”, ni ca' ajcxy mdūngixy huīdi nyajnimaygixpy? ⁴⁷ Tūg'óciy jāy huīdi xyñimimbich etz xymidoohui ñich n'ayuc etz cuyduñ, ñich nyajni'ixihuipy pīn je' ymīdūgnax. ⁴⁸ Quipxyiyb tūg yēydijc huīdibi ytiijcojp ma tzaa nīcxy, chi nidajīy ooy cīcy, chi pidāgy poch'ijx tzaa nīgīxy, co mijñi ycomy nimiñ je tijc, mïd tūg'óciy ymījaa jayajpidga'ñ je tijc, e ni ca' jadu'ñyi yajyūcxy, com tzaagīxy anajty ypojtztzooñity. ⁴⁹ Yi jāy huīdi mīdoob ñich n'ayuc e ca' cuyduñ, mīdquipxy jadu'n yi' nej tūg yēydijc co ti ytiijcojy. Ni ca' poch cīcy ypojtztzooñity, jēyi naaxhuingīxy nidajīy hueeni. Co je mijñi ymīñ mīd ymījaa, chi yajpidgy je tijc, chi oy yhuindigoydāy.

7

Jesús yajtzōgy tūg mijtungmīdpi Romano ytumbi

¹ Co Jesús ycapxtaay ymīydactaay mīd je mayjāy huīdi anajty jīm amido'ijtp, chi ytiigīy jīm Capernaum. ² Jīm anajty tūg Capitán tūg ytumbi hue' anajty píjcp, janch tīm ōgaanip anajty, e je soldado huindzin ooy anajty tzocy je ytumbi. ³ Co je capitán ayuc mīdooy jadu'n nej Jesús ytuñ, chi quejxy judío mijjāydijc, huen nīcxy minucxtaaccixy Jesús co je' ymīnipy ma ytiijc yajtzōgyiyb je' ytumbi. ⁴⁻⁵ Chi je mijjāydijc ajcxy ymīñ ma Jesús, chi ajcxy cohuanīy ooy, pijctzou may'ajt, nimay:

—Jadayaabi capitán ymīhuaad co mbubedipy, com yajmīj'ajtpy ñich ajcxy ngajp, ti cojy ñich ajt naymujtac.

⁶ Chi Jesús nīcxy mīd je' ajcxy. Co ajcxy mīhuingooñ je tijc, chi je capitán quejxy ymīgūg huen nīcxy jipcobadiy Jesús, nīmāhuipy:

—Huindzin, ca' nej mnayjihuiyī, ca' ñich mīhuaadity co mdigīhuipy ma ñich ndijc.

⁷ E paady ca' ñich njot ti mīctuñ co ñich miich ci'm nīcx n'ixtāy. Jēda'ajty miich nīgoo capx, e ti anajty ndumbich chōgy. ⁸ Nañ jadu'n ñich nmīdich soldados ajcxy huīdi

ajcxy xycapxcöbicipich. Nimäyich tög: “Nicx”, e nicxp; nimäyich jadüg: “Min”, e mimb; nimäyich ndumbi: “Tun jada”, e ytumyb.

⁹ Co Jesús midoy nej je capitán ymīnāñ, chi jihuīy ooy, chi ni'ijxhuimbijty nimay ajcxy huīdi pamiinip:

—Ich miich yim nimaaygixyp co ca' nbaadyich Israel jāy huīdibi xymibījcpich jadu'n nej jadayaab agatz jāy.

¹⁰ Co ajcxy je quexyöybi yhuimbījtcixni ma je tijc, chi oy páatcixni je tumbi ti anajty y'agidägy.

Jesús yajjugypijcy tög co'ögytöxyjäy y'ung tibi anajty y'ögy

¹¹ Chi jadu'n yajty huin'it xi co Jesús anajty ñicxy ma tög cajp huīdi anajty yxi Naín. Miid anajty ñicxy jadyi ydiscípulos ajcxy etz mayjäy. ¹² Co yhuingooñ ma anajty ycajp tigihuaani, chi minaybaati jāy ajcxy, ñicxy anajty ajcxy tög öcpi yajnaaxtigīygyxy, huīdi anajty ungday tögajc y'ung'ajtpy. Hue' je' anajty co'ögy je tögxyjäy, e miid anajty ñicxy maycajpyjäy. ¹³ Co je Huindzin Jesús ijxy, chi pa'ayogoty je tögxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huīdi anajty ajcxy öcpi ciyñicxp. Chi Jesús ymīnāñ:

—Yēydijc, ich miich yam nimaayb, pidīg.

¹⁵ Chi je yēydijc iñayīgy huīdi anajty ti y'ögy, e ytiģīy miydaacp. Chi Jesús yajcīdigīyñi je' ytaj. ¹⁶ Chi ajcxy nidüg'óciy ooy ñay'adzigīygoti, e Dios jāymejch cōmay, ymīnaangixy:

—Tög mijpi Dios tiy'ajtmītpi cham yajpatp ma ich ajt.

Nañ jadu'n ajcxy ymīnaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcōmay ma tög'óciy Judea naaxjot, etz ma tög'óciy jac huīduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jāy ajcxy huīdi anajty Juan je Bautista yaj'ixpijcpy nimīydactay jadu'n nej miid ytunī yajti Jesús. Chi Juan huooy metz yi' ydiscípulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huīdi anajty miinaam, o pen n'ahuījxpy ajcxy huīngbi. ²⁰ Chi je Juan yquejxyöybi miin ma Jesús nimay:

—Yi Juan je Bautista ich ajcxy ti xyquéxyich ma miich amīdohua'ñ pen miich je' je Cristo huīdi minaaamb, o ¿n'ahuījxypich ajcxy huīngbi?

²¹ Tim huin'itīy Jesús ooy mayba'mjäy yajtzoocy. Yajtzoocy nañ jadu'n huīdi anajty ajcxy ooy mij yuu mij pa'm yaj'ayoyi, etz nañ yajtzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—Nicx nimaaygix je Juan jadu'n nej ti m'ijxcixy ti mmidoogixy, co yi huīntzpi ti yhuīndicxīgy, yi tecyma'tpi ti yōyīgy, yi nībūtzpa'mmiīdpi ti chōgy, je cōnatpi ti ymīdohuīccixy, je öcpi ajcxy ti yjugypijcy, e ngapxhuācxyich oybi ayuc ma ayoohtijc.

²³ Jotcuyc yi' ajcxy huīdi ca' huīnma'ñyitigooygixy miid ich ycixpi.

²⁴ Co je Juan yquexyöybi yhuimbijttay, chi Jesús nimīydaccoty je Juan ma je mayjäy ajcxy, ymīnāñ:

—Co ajcxy ti m'oy mijtigīduum, ¿ti ti m'ijxcixy? ¿Nej ti m'ijxcixy tög jāy ametz jotmetz, jadu'n nejhuīy tög nāhuaax huīdi pojmiimb pojxiyp? ²⁵ Chi jada', ¿ti oy ti m'ijxcixy? ¿Tög yēydijc huīdi miid oy yhuīt yxōxyity? Yi jāy ajcxy oy yxojxyp huīdi agujc jotcuyc tzinaaygixp hue' ajcxy yajpaady ma yi rey ytijc. ²⁶ ¿Ti ajcxy ti m'ixy jīm mijtigīduum? ¿Tög jāy huīdi Dios ytiy'ajt miid? Janch ti m'ijxcixy tög Dios ytiy'ajtmīdpi, etz jacnīgī

ymíjity je' ca'ydi Dios y'ayucnajtzcaxi'bi huidi jecy'ajty tzinay. ²⁷ Je' jada je jäy huidi Dios ñigapxyp ma ñecy ma Dios jadu'n ymíñañ:

Cham nguejxyich ñich nguexyöybi jayijp ma miich, je' yaj'oyíhuip je jäy ajcxy yjot yhuinma'ñ mñd ñich ycixp, tim jadu'n nipaady nej jihuñy jäy tü'aa yaj'oyíy co rey ymina'ñ yjáda'ñ.

²⁸ ñich miich ajcxy yam nimaayb co huidijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxi'bi huidibi jacnñgi ymí jity ca'ydi Juan, je Bautista. Chi jada' je jac mutzpi huidi jiiby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty ñibéjtcixy ma Juan, chi ajcxy minañ co Dios ytudägyity. ³⁰ E je fariseos ajcxy etz je escribas ajcxy huidi anajty ca' ñibéjtcixy ma Juan, ca' ajcxy mijpidacy huidi anajty Dios ytunamy mñd je' ajcxy ycixpi. ³¹ Chi je Huindzin Jesús ymíñañ:

—¿Ti mñd nyajquipxi'huibich jadayaabi jäy huidi tzinayb ma jadachambi tiempo? ¿Huidi mñd nyajtügíhuibich? ³² Jadu'n nej pi'ctijc huidi ajcxy iyíyb ma jäy yjuygixy ytooccixy. Mijhuan mijjihuñygixy ymígütiyc: “Ti njayajxüxich flauta e ni ca' ti m'éjtcixy; ti nja'ñhui ajcxy ñy jotmaymñdpi, e ca' ti myaaxcixy.” ³³ Chi Juan je Bautista ymíñ, e je' ca' anajty cay, ni ca' vino ügy, chi miich ajcxy minangixy co Juan ymñd ca'oybi. ³⁴ Chi ñich, je jäy huidi tzoön tzajpjoty, nmiñich, chi caaybich uucpich, e miich ajcxy minangixy: “Ijxcix, cha tüg yéydijc janch cax janch vino uucp, huidi migüg'ajtpy yajcuéjtpidijc etz pocyjäydijc.” ³⁵ Je tiy'ajt ji je' ñiguëxígy ma je pinjaty nigapxp nimíydaacp tiy'ajt.

Jesús ma Simón je fariseojäy ytijc

³⁶ Chi tüg fariseojäy may'ajt pijctzoy, co Jesús anajty mñd ycaya'ñ. Chi Jesús ytiñy ma je fariseojäy ytijc, chi ññay'ahuñy ma mesa. ³⁷ Chi jim anajty tüg töxyjäy huidibi anajty jibic tzinaayb jibic jugy'ajtp ma je jimbi cajp. Co je' nejhuñy jiiby Jesús ma fariseojäy ytijc ññay ma mesa, chi mimiñ tüg quilig aceite huidibi ooy oy xuugy, chi midigíy tigoty. ³⁸ Chi ypiquetz'ahuñy ma Jesús ytecy ymíj, e chi yajxooci Jesús ytecy mñd huinnñ e yajpöt mñd ycöhuay, chi yajjaaxy je aceite huidi ooy oy xuugy. ³⁹ Co jadu'n ijxy je fariseojäy, je' huidibi anajty ti huoy Jesús, chi jot'ajti ymíñañ:

—Co ixyipy jada Jesús y'ocjéjity Dios ytiy'ajtmñdpi, y'ijxcajpy ixyipy pin jäy nejpy jäy yi töxyjäy huidibi nidoonip co yi' yjibictzinäy yjibicjugy'aty.

⁴⁰ Chi Jesús ymíñañ:

—Simón, cham ñich tüg ayuc nmñdidyich huidi nyajnimähuamy.

Chi je' y'adzooy:

—Yajnimaaaygich, Huindzin.

⁴¹ Chi Jesús ymíñañ:

—Tüg comeeñyjäy ymñd anajty metz jäy huidi ti ñuucxy. Tüg jäy anuucxy migoox migo'px denario meeñ, e je jadügpi anuucxy huixchigui'px majc. ⁴² Com je' ajcxy ca' anajty mñdity ti mñd cuedip, chi je comeeñyjäy huinmecxy nimetz. Miich ocnímaaygich, ¿je metzpi jäy huidi nuucxy, huidibi je' nñgi chojpy?

⁴³ Chi Simón y'adzooy:

—Hue' n'a'ixíyich je tiibi huinmecxy jac'anaxy.

Chi Jesús ymíñañ:

—Ti mdiygapxy.

⁴⁴ Chi Jesús ni'ijxhuimbijty je töxyjäy, e nimay Simón:

—¿Nej m'ijxyp jadayaabi töxyjäy? Co ndigíyich ma mdiyc, ca' miich nñ xymooyich co ndecy nbújibich. Jadayaabi töxyjäy ñich ndecy ti xypújip mñd yhuinnñ, e ti xyméexyich ndecy mñd ycöhuay. ⁴⁵ Ca' ñich miich ti xychüxcy. Jada töxyjäy jadu'n nej ti ytijc tigíy, xychüxtíyb ñich ndecy. ⁴⁶ ñich miich ca' aceite mbidägy ma ñich ngohuajc. Jada töxyjäy ti xyajjaaxi ndecyich aceite huidi ooy oy xuugy. ⁴⁷ Paady ñich miich nyajnimäy co jada

töxyjäy huinmeecxi yi' ymaybocy, co tiibi oyhuinma'n yajtuñ cixyjot huinijot. Pinjaty hueeni ypocy yajhuinmecxi, hueeni yi' chójcin yajniquëxigy.

⁴⁸ Chi Jesús je töxyjäy nimay:

—Ti miich mbocy yajhuinmecxtäy.

⁴⁹ Pinjaty anajty iñaayb ma je mesa ñayñimáayigixy miñ xyipy:

—¿Pin jäy jada jada' co nañ yhuinmeecxiy jäy ypocy?

⁵⁰ Chi Jesús nimay je töxyjäy:

—Ti m'alma ñidzögy co ti xymibicyich. Nicx jotcuyc.

8

Töxyjäydijc huidibi anajty Jesús pubejtp

¹ Co jadu'n yjajti, chi Jesús ñicxy ma tüg'óciy je mij cajp etz mutz cajp, capxhuäcxy je oybi ayuc maabi Dios y'ané'min. Je nimajmetzpi ydiscípulos ajcxy miid ñicxy. ²⁻³ Etz nañ ymiidnicx nijëjity töxyjäydijc huidi anajty Jesús ti yajtzögy huidi ca'oybi anajty ymiid etz jac tijaty pa'm. Hue' je' ajcxy anajty je María je töxyjäy huidi anajty xijip Magdalena, je huidibi Jesús yajpidzimi huixtujc ca'oybi ma je'; etz Juana, je huidibi ñäy anajty xijip Chuza, e je Chuza hue' je' je rey Herodes ytungmiidpi; etz Susana, etz jacjadyii ajcxy huidi anajty ajcxy pubejt Jesús miid tijaty anajty ajcxy ymiid.

Je niipi y'ijxpejt

⁴ Co mayjäy ooy ñayyöymujc ma Jesús yhuinduu huidi tsoon ma tüg tüg cajp, chi Jesús nimay je mayjäy ajcxy:

⁵ —Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tiim huijpi. Co je trigo tiim huijy, chi nijëjity ypajc oy ycäy mjtügujc, chi je jäy ajcxy yajhuägpejty, e huidi ca' yajhuägpejty, chi joon piihuigy. ⁶ Chi nijëjity trigo pajc oycäy ma tzaa ñicx. Co ymujxy chi je' ytich, je' co anajty naax ca' yxoogity. ⁷ Chi nijëjity trigo pajc oycäy ma apyot, chi ymujxy quipxy miid apy'ung, chi y'ujtz'o'ctay. ⁸ Chi nijëjity trigo pajc oycäy ma je naax oybi huinnätzcujc, chi ymujxy, chi yeectzoon, ytüm'ajty oyjaty, tüg trigo pajc migo'px oyco'ity.

Co Jesús je miydägi yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbizimiy je niipi y'ijxpejt

⁹ Chi je discípulos ajcxy y'amidooy:

—¿Nej jada jadu'mbi jihuimbit ayuc yhuimbizimiy?

¹⁰ Chi Jesús yminañ:

—Miich ajcxy jaydëbi mnejhuihuipy huidi Dios ñigapxpy ñimiydacpy coyüch'amy ma y'ané'min ycötújcín. Jacjadyiibi jäy jihuimbit'amy nyajnimayich, jaydëbi pinjaty huidi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbizimiy: Je trigo pajc Dios je' y'ayuc. ¹² Je trigo pajc tiibi tügujc ycäy, je' je' jadu'n nej jäy huidi midoob Dios y'ayuc, chi mic'amy ñiminyii je ca'oybi, e piibidzimday je Dios y'ayuc ma yjot yhuinma'n, ca'ydi mibic etz ca'ydi y'alma yajnidzögyii. ¹³ Je trigopajc huidi cähui ma tzaajot, je' yi' ajcxy huidi je ayuc midoob, chi cöbicy jotcuyc, chi je' ca' ytictztigiy, tzojccixy y'ocmibicy, co agapxiyb paaty chi ixmajtzní. ¹⁴ Je trigo pajc huidi ti cähui apy'agujc, je' je' ajcxy huidibi midoob, chi co ñicxni jäy digooyni Dios y'ayuc miid jotcuyc'ajtín tzinaayin etz jugy'ajtín etz comeen'ajtín, e chi ca' Dios y'ayuc yhui'my ma yjot yhuinma'n. ¹⁵ Je trigo pajc huidi cähui ma oyñaax huinnätzcujc, je' ajcxy huidi oy etz tudägy yjot yhuinma'n midity. Chi je Dios y'ayuc midohui'my, e oñdägy'amy Dios y'ayuc ymayiy ma yjot yhuinma'n.

Je lámpara ñi'ijxpejt

¹⁶ Co jāy ajcxy jündicxi'ñ nōctzoy, chi ca' ajcxy cōjupy mūd tu'tz, nañ ca' huaad pidāgy cijx pātcī'py, hue' janchtiy pidaaccixy ma jündicxpejt, co pīn ytiḡiy jēbi ixy je jūn. ¹⁷ Ca' ni pīn ayūch tunipy e nīcxy ycayajnejhuīy, ca' ni pīn ti tunipy ameech e nīcxy ycaniquēxīgy. ¹⁸ Paady miich ajcxy mīdoogix yajxon co pīn tijaty mūd, jacyajmōhuip yī'. Pīn ti camūd, yajpīgipy je' huīdi anajty yjamūd.

Jesús ytaj etz je jugymigūg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon mūd mayjāy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tība'y, miich ajcxy xyjamīgapxam.

²¹ Chi Jesús ymīnañ:

—Yī jāy ajcxy huīdibi Dios ayuc mīdoohuipy etz cuyduunip, yī' īich ndaj'ājtypich etz n'uch'ājtypich.

Jesús yajxemy je poj etz je nū co anajty chachpidīgy

²² Chi tūg tēcy yajti Jesús ytiḡiy ma tūg barco mūd ydiscīpulos ajcxy, chi Jesús ymīnañ:

—Tzoc jīm'amy ñīnaxy nāxīm.

Chi ajcxy chooñ. ²³ Chi nūguj anajty nīcxcixy co Jesús ymī'ōgy. Chi tūg mīc poj mīñ ma je mejy. Chi je barco ñī yajtiḡiyīyī, janch yinjayt jahueenjaty ycaquīñ. ²⁴ Chi ajcxy Jesús nīmījhuāgy, tiyūcxy ajcxy nīmaaygīxy:

—¡Huīndzin! ¡Huīndzin! Cham ajt n'ocquīnim.

Co Jesús oy ymāyhuiy, chi jīpcogapxīy je poj etz je mejy co anajty chachmījjētzpety ma barco. Chi je poj yhuācxīptay, y'amoonday. ²⁵ Chi Jesús ymīnañ:

—¿Ma miich ajcxy je mmībīcin?

Chi ajcxy yjanchchīgygoty janch yhuīnmay ajcxy ñayñīmāayīgīxy mīñ xyīpy:

—Pīn yēyījc jada jada' co je poj etz nū jīguexy, etz yajhuācxīpy, etz ycapxycōbīgyīi.

Je Gadarajāy huīdibi anajty ca'oybi mūd

²⁶ Chi ajcxy ymejch ma je gadarenos naaxjot, huīdi hui'm jīm'amy ñīnaxy ma je Galilea mījlaguunba'. ²⁷ Co Jesús ñībīdzīmy, chi jīpcobadiy tūg yēyījc huīdi anajty ti choñ ma je Gadara cajp. Je' anajty ymūd ca'oybi, ti anajty yjeicni maabi ypadyīi. Ca' je' anajty huit yajtuñ, nañ ni ca' anajty chīnāy ma ytiyc, ōcpījut anajty yajtzīnāhuīyb. ²⁸ Co je' ixpaty Jesús, chi yaaxqueecy, e ycoxtīnay'ahuīy ma Jesús yhuīnduu, ymīnañ janch mīc:

—¿Ti īich miich co xyñīmīīñich, Jesús, tūgpajc mīppi Dios y'ung? Tun may'ajt ca' nijot xychachchaachytūñich.

²⁹ Jadu'n mīnañ com co anajty Jesús ixquexy je ca'oybi ma je jāy, ti anajty yjeicni ma je ca'oybi anajty tzach'ane'my je jāy. Coxoch anajty ymīgūgtījc ymūd'adyīi mūd cadena. Janch ypojtpy cadena, chi ca'oybi anajty yajnīcxyīi mījtīgīdūm. ³⁰ Chi Jesús y'amīdooy je locījāy:

—¿Ti miich mxī?

Chi je ca'oybi ymīnañ:

—īich nxī Legiōn (hue' yhuīmbīdzīmy nīmay).

Jadu'n mīnañ com nīmay anajty ca'oybi ti ytiḡiygīxy ma je jāy. ³¹ Chi je ca'oybi may'ajt pījctzoy ma Jesús co ca'ydi yquexyīi ma ayoodactuuby. ³² Jīm anajty tūg quepy īdzīm chachjīcxcixy ma je ujtzjot. Chi je ca'oybi may'ajt pījctzoy co huen yajtiḡiyīhuipy je' īdzīm. Chi Jesús nī'adzooy. ³³ Co je ca'oybi ypidzīmy ma je jāy, chi ytiḡiy ma je may'īdzīm. Huīn'it je may'īdzīm ñayñajtzībībīydaayi ajcxy ma tūg ahuoc, chi oy ajcxy ycādāy nījoty, chi y'ōgtay.

³⁴ Chi je idzim cuend'ajtpi ajcxy co ixy jadu'n nej ti yjadyii mïid ajcxy y'idzim, chi ajcxy yqueecy, oy nimiyaaccixy cajpjoty etz majaty tundac. ³⁵ Chi mayjây ajcxy choon oy ijxcixy jadu'n nej anajty ti ytunyii ti jadyii, oyja'tcixy ma Jesús. Chi je mayjây ajcxy paty je yëdyjc, tiibi anajty ca'oybi ñibidzimyii ycöbidzimyii, iñây ma Jesús yhuinduu, huit mïid etz huijy quejy, chi ooy je jây ajcxy chigïy. ³⁶ Chi pinjaty ajcxy ixx mïid miydacy jadu'n nej yi' choocy, je jây huidi anajty ca'oybi mïid. ³⁷ Huin'it tüg'óciy je mayjây ma gadarenos naaxjot etz jadyii cajp huinduy agonbi, chi ajcxy may'ajt pijctzoy ma Jesús co huen jihuägy ma je' ajcxy, co anajty ooy chigïygixy. Chi Jesús ytigïyñi barcojoty yhuimbijtni. ³⁸ Chi je jây tiibi anajty ca'oybi ñibidzimyii ycöbidzimyii pijctzoy may'ajt co mïid'idan Jesús. Chi Jesús mïid capxycijxy, nimay:

³⁹ —Nihuimbit mdiç, etz nimiydäg jada mijpi tung huidibi Dios ti tuñ mïid miich ycixpi.

Chi je' ñicxy capxhuäcxy je tiy'ajt cajp cajp jadu'n nej anajty mijhuinma'ñ Jesús ti tuñ mïid je' ycixpi.

Je Jairo ñixx etz je töxyjây huidibi Jesús yhuitpa' nïdoni

⁴⁰ Jadu'n yjajti co Jesús yhuimbijty co choon Galilea, chi je jây ajcxy cöbijcy Jesús janch agujc jotcujc, com nidüg'óciy anajty ooy jïjp'ijxcixy. ⁴¹ Chi tüg yëdyjc huidi anajty yxii Jairo huidibi anajty mijtungmïid ma judiojây ñaymujctac ymiiñ ma Jesús, chi minucxtacy Jesús pijctzoy may'ajt co huen nicxy ma je' ytijc. ⁴² Jairo ymïid anajty tügpaic ñixx, hue' anajty yjimijt majmetz, janch tim ögaanip anajty. Co Jesús ñicxy mïid je', chi janch mayjây anajty chach'adijïy chach'agodïy.

⁴³ Chi tüg töxyjây huidi anajty yxii ybo', ca' anajty y'oc-huäcxijpni, mimajmetz jimijt anajty cujc jadu'n mï'ijtni. Ti anajty ymeeñ yajtundây ma je tzoydumbi ajcxy, etz ni pin anajty ycayajtzögyii. ⁴⁴ Chi je töxyjây nimijhuägy je Jesús, chi nïdoni yhuitpä. Janch mic mic je yxii ybo' oy yhuäcxipy.

⁴⁵ Chi Jesús yminañ:

—¿Pin xyñidoñ ich nhuit?

Chi ajcxy y'adzooy co ca' pin. Chi Pedro etz tüg'óciy mïid je' yminañ:

—Huindzin, jây ti xy'adijïy ti xy'abodïy etz miich mina'ñ: “¿Pin ti xyñidoñich?”

⁴⁶ Chi Jesús yminañ:

—Nidügti ti xyñidoñich. Nnejhuïybich co mïid nmic'ájtich ti nyajtzögyich pinjaty.

⁴⁷ Co je töxyjây jihuïy co ca' coyüch yhui'ma'ñ, chi nimiiñ janch tziyuuyb. Chi yhuindacy ma Jesús yhuinduu, chi capxpïdzimay mayjây'agujc ti ycixpi anajty co ti nïdooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjây:

—Töxyjây, ti mdzögy co ti xymibicyich, nicx jotcujc.

⁴⁹ Yam Jesús anajty ycapxpy, co ymiiñ tüg jây huidi anajty ti choon ma Jairo ytijc; je Jairo nihuindzin'ajtp anajty je judiojây naymujctac, chi nimaayi:

—Ti y'ögy miich mnïx, ca' mjac'amayïy nïgi yi Huindzin Jesús.

⁵⁰ Co Jesús jadu'n mïdooy, chi yminañ:

—Ca' mdzigïy, mibijcich janchtiy, etz tzögip yi mnïx.

⁵¹ Co Jesús ytigïy ma je tijc, chi ca' a'ixïy nicxy ytigïy hueñypinity mïid je'. Jëyi Pedro, Jacobo, Juan etz je töxy'anäg ytaj yteedy ytigïy mïid Jesús. ⁵² Chi tüg'óciy je mayjây ajcxy janch yaaxp, janch ñé'mgixy mïid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³ Chi nigoob ajcxy nixiicy com ti anajty nejhuïygixy co ti y'ögni. ⁵⁴ Chi Jesús majch je töxy'anäg ma yci', chi migapxy mic, yminañ:

—Töxy'anäg pidig.

⁵⁵ Chi je' yjugypicy, e mic'amy ypidägy. Chi Jesús yminañ co huen yajcaaygixy yaj'uuccixy. ⁵⁶ Chi ytaj yteedy ajcxy ooy chigiiy yjihuiy. Chi Jesús nimay co ca' huaad pinjaty miidmiydägipy jadu'n nej ti ytuñyii yjadyii.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyöymujctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújcín co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzooccixy pa'mjäy.

³ Chi Jesús yminañ:

—Ca' ni ti tü'amgixpi mminíxcixy; ni mgaminícxip mdajc, ni mmorral, ni mgaagy, ni meen, e ni mgaminíxcixipy ajcxy metz mhuit. ⁴ Huen tim huidi tijc ma anajty mdigiiygixy, jim ajcxy hui'mgixipy, e jim ajcxy nayoöyhuäcxiiyb. ⁵ Hueñyma'amyity ma ca' jäy xycöbójccixy, co ajcxy mbidzimgixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jäy ajcxy.

⁶ Chi ajcxy ñayoöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzooccixy pa'mjäy hueñytimma'ámyity.

Co Juan el Bautista y'ögy

⁷ Je rey Herodes co nejhuuiy jadu'n nej Jesús anajty mijhuinma'ñ tuñ, chi ooy anajty tzachnejhuñhua'ñ pin je' anajty. Com nijëjity jäy anajty yminaangixy co ti Juan jugypicy.

⁸ Chi jacnaagity yminaangixy co Elías ti ñayguëxigyii, e jacnaagity yminaangixy co tüg Dios y'ayucnajtzcaxiiyb je' ti yjugypicy huidi jecy'ajty octzinaybi. ⁹ Chi Herodes yminañ:

—Ich yi' ni'ane'mdiy co huen ajcxy Juan ycohuajc yajminajci. ¿Pin jada jada' huidi ich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmüdmíydactay ajcxy Jesús tüg'óciy tiibi anajty túngixy. Chi ac jëyi ydiscípulos müd'ajty Jesús migtigíduum huingon ma tüg cajp huidi yxii Betsaida. ¹¹ Co je mayjäy ajcxy nejhuuiy, chi ajcxy panícxxy Jesús. Chi Jesús je mayjäy cöbijctay etz yajmüdmíydacy ajcxy Dios y'ayuc ytiy'ajt nej ané'mín cötújcín müidity. Jesús nañ yajtzöcpy anajty huidijaty yajtzoñhuaam.

¹² Co oy chu'iiyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycijxni müd jadayaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaaygixy jättac etz jim ajcxy paadipy caayin uucín. Com hue' jada it ma ich ajt yam nyajpaatim migtigíduum.

¹³ Chi Jesús yminañ:

—Mooygix miich yi' ajcxy ycaayin y'uucín.

Chi je' ajcxy y'adzooy:

—Jëyi ich ajcxy nmüdidyich migoox tzajcaagy e mejtz acx, nigo co ca' ich ajcxy njuy caayin uucín müd jadayaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduuñ, yaj'ixtactay ajcxy je mayjäy. ¹⁶ Chi Jesús conígy je migooxpi tzajcaagy, etz je metzpi acx, chi ypa't'ijxy tzajpcixy conuucxy je tzajcaagy etz acx, huin'it tujc-huäcxxy moy je' ydiscípulos ajcxy, huen yajhuäcxixy ma tüg'óciy mayjäy.

¹⁷ Chi ajcxy ycaý cüxyi, huin'it ajcxy yajmujcy je tzejcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸ Chi jadu'n yjajti co Jesús anajty ycapxtägy ahuingujc müd je' ydiscípulos ajcxy, chi Jesús je' ajcxy y'amidoy:

—¿Pin ich jäy xytijy?

¹⁹ Chi ajcxy y'adzooy:

—Nijëjity jäy xytijy co müich je Juan je Bautista; nijëjity ymınaangixy co müich je' Dios y'ayucnajtzcaxiıybi huidi jecy'ajty tzinay e ti yjugypicy.

²⁰ Chi Jesús ymınañ:

—¿Müich ajcxy, pin ich müich ajcxy xytijcixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹ Chi Jesús pidacy ané'mın etz cötújcin co ca' ajcxy ni pin yajnimähuip co yi' je' Cristo.

²² Chi Jesús ymınañ:

—Ooy ycopıcyıty co ich, je jäy huidi tzoön tzejpjoty, canaag nax ayo'n nbáadibich, ca' xymıjpıdägıbich je mıjıyadıjı, je teedy tungmıdpi, etz je' ajcxy huidi yaj'ıxpıcy Dios ñecy, e co n'ögıp njugypıgıpyıch codugıg xıı.

²³ Chi Jesús nımay ajcxy nidüg'óciy:

—Pen jı pin xypanıcxá'ñıch, huen jäydgoydäy yci'm tzójcin etz huen xypanıcxıyıch jabom jabom, oy nej ytımyjadıpy ytımy'ayoohıpy, tım nıpaady nej jıhuıy ti cabıgy mgruudz jabom jabom etz pajamgıch. ²⁴ Huen pinjäy hıdibı ca' yega'ñ yi yjugy'ájtin ma yi o'cin müd ich ycıxpi, hue' je' yajtigoyamy yi' yjugy'ájtin. E huen pinjäy hıdibı yegamy yjugy'ájtin ma yi o'cin müd ich ycıxpi hue' je' ypadamy yi jugy'ájtin. ²⁵ ¿Ti tüg jäy ypatpy, pen ti paady tüg'óciy cohuit'ájtin comeeñ'ájtin ya naaxhuiñ e nıyyajtigoyıı, etz ca' y'alma yajnidzögy? ²⁶ Yi jäy ajcxy pinjaty xymıdzöydúnıbıch n'ayuc, ich je' je jäy huidi tzoön tzejpjoty, nañ nmıdzöydunııybıch je' ajcxy co anajty nhuımbıtyıch ya naaxhuiñ, müd ich n'ané'mın etz nmıc'ajtıch etz nDéedyıch y'ane'm'ajtı, etz ymıc'ajtı, etz müd je ángeles ajcxy ymıc'ajtı hıdibı huädz yjot yhuınma'ñ. ²⁷ Janch ich müich ajcxy nımäy co jı jäy ma müich ajcxy hıdibı ııpy Dios y'ané'mın jayıjp ca'ni anajty y'ögy.

Jesús yajtıgach je ñinıcx

²⁸ Chi mıductujc xııbı maabi anajty jada ayuc jadu'n capxy, Jesús huodzooñ Pedro, Juan etz Jacobo, chi müd'ajtpy jım ma tüg copjıjp Dios mıbıjctzoob. ²⁹ Yam anajty Dios ooy mıbıjctzoy, co Jesús yhuiñyıjp oytıgach, e je yhuıt yajty janch poob janch adıcxp.

³⁰ Chi metz jäy ñayguëxıci, müdgapxy müdmıydägy Jesús, Moisés je' anajty etz Elías.

³¹ Huidi ajcxy naygëxıci janch jühıdityı anajty ajcxy je tücxın jájın müdity, nıgapxcıxy nımydaaccıxy je o'cin huidi Jesús ypadamy jım Jerusalén. ³² Pedro, Jacobo etz Juan ooy anajty ajcxy chachmähuani, chi ajcxy mıögtıgooy. Co oy ymäyhııcıxy, ııxy ajcxy Jesús y'adıcxın y'ajajın, etz nañ jadu'n ııxy ajcxy je nımetzpi jäy ajcxy huidi anajty Jesús müdmıydäcpy. ³³ Jadu'n yajty co yi jäy ajcxy puyöyduutni Jesús. Chi Pedro Jesús nımay:

—Huındzın, jotcujc ich ajtı ya. Tzoc tugıg tıjc yaj'oyııym, tüg müich mjëdıby, jadüg Moisés jëdıby, etz jadüg yi Elías jëdıby.

Pedro ca' anajty nejhuıy ti ycapxpy. ³⁴ Yam nıgi anajty ycapxy co joc ñaaxcıdacy huidi yajnidıgoy je' ajcxy. Chi ajcxy ooy chıgıy co oy joc yajnidıgoydáayıgıxy. ³⁵ Chi tüg ayuc yajmıdooy ma je joc ymınañ:

—İch jada n'ung'ajtpy, ooy ndzocyıch njıhuıyıch. Amıdo'ıjti müich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhui'my, chi ajcxy nañ jadu'n amoñ. Huin'it xii ni ca' ajcxy miydacy mïd ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi mïd

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy choon oyjijpcobadiyii. ³⁸ Chi nidügti jäy ycapxy janch mic, yminañ:

—Huindzin tun may'ajt ix iich n'ung, yi' iich tügpajc n'ung'ajtpy. ³⁹ Huen mináajity ca'oybi ymachyii, chi timetiini yaaxquëgy yajyachyii yajquidyii, etz yajpidzimy oy yhuin'opy y'aa'opy e adzaach y'ixmachyii. ⁴⁰ Ti iich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús yminañ:

—Miich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! ¿Naag xii iich njac'idipy ma miich ajcxy nmimecxtújccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ooy je ca'oybi, e yajtzoocy je yeeg'anäg, chi yteedy yajcidiigyñi. ⁴³ Chi tüg'óciy je mayjäy ajcxy ooy chigiyy mïd je mijhuinma'ñ huidi Dios ytuun.

Jesús capxpídzimy jadüg'oc co y'öga'ñ

Jesús ydiscípulos ajcxy ooy jihuiyigixy huinmaaygixy co Jesús jadu'n yminañ:

⁴⁴ —Miich ajcxy yajxon mïdo'mbijccix jada ayuc. Iich je' je jäy huidi tzoon tzajpjoty, hue' nyajciyega'ñich ma pocyjäydijc ajcxy yci'am.

⁴⁵ Je' ydiscípulos ajcxy ni ca' anajty huinjihuiyigixy, tzigiiyb anajty ajcxy, paady ca' ajcxy jaty nej yaj'amidóogixipy.

¿Pin je' nigi jacmijip?

⁴⁶ Chi Jesús ydiscípulos ajcxy ytigiiy huinmay'ahuidijtp, nejhuinhuaangixy pin je' jacmij'idam. ⁴⁷ Jesús nejhuiiy je' ajcxy yjot yhuinma'ñ huidi nayyajmïdmíydáacip ajcxy, chi tüg pi'c'anäg huijtzigy, ypidacy ma ymijc. ⁴⁸ Chi Jesús yminañ:

—Pinjaty xycöbicipich jadu'n nej jada pi'c'anäg xycöbicyich mïd iich nxii ycixpi, iich yi' anajty ti xycöbicyich; je huidibi iich xycöbicipich, cöbigiib je huidi ti xyquexyich ya naaxhuiñ. Yi' huidibi jacmútzip ma miich ajcxy, yi' je' jacmijpi.

Pin iich ajt ca'p xymijotma'tim, je' ajt xymijnicxpejtim

⁴⁹ Chi Juan yminañ:

—Huindzin, ti iich ajcxy n'ijxcixy co tüg jäy ti yajpidzimy ca'oybi mïd miich mxii miich mmic'ajt. Ti iich ajcxy yi' nyaj'ooyich com ca' yi' iich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, iich ajt yi' nmïd.

Jesús jijpcogapxiy Jacobo etz Juan

⁵¹ Jadu'n yjajti co tiempo yhuingoni mina Jesús ñicxip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytigiiy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuuiygixyp co Jesús etz ymigügtijc ñicxy anajty ajcxy jim Jerusalén. ⁵⁴ Co jadu'n Jesús ymigüg ajcxy nejhuiiy co je samaritano jäy ca' jättac yega'ñ, chi Jacobo etz Juan nimay Jesús:

—Huindzin, ¿nej m'a'ixiiyb iich ajcxy n'ocni'ane'mdiyich huen jün cäy huidibi tzomb tzajpjoty, jigix yi' samaritano jäy ajcxy ycixtähuipy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, ooy Jacobo etz Juan, nimay:

—Miich ajcxy ca' mnejhuiygixy ti jot ti huinma'ñ miich ajcxy mñid. ⁵⁶ Hich, je jäy huidi tzoön tzajpjoty, ca' ti nmiñich ya naaxhuiñ co jäy yjugy'ajt miñ nyajtigooyich, hue' jánchtiy ti nmiñich co jäy yjugy'ajt nyajtzóogibich.

Chi ajcxy ñicxni huingbi cajp jättacp.

Je pinjaty anajty Jesús panícxam

⁵⁷ Jadu'n yjajti co anajty ñíxcixy ma tüg tü'aa, chi tüg jäy Jesús nimay:

—Huindzin, ñich miich nbanícxamy oy tim ma'amy miich mñicxy.

⁵⁸ Chi Jesús y'adzooy:

—Yi huaax ymñid yí' ajcxy yjut, etz yí' joon ajcxy ymñid ajcxy ype'ñ, ñich je jäy huidi tzoön tzajpjoty ca' nmñididyich ma nmähuiñich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayíjp ñich ndeedy n'ocyajnaaxtigíhuipy.

⁶⁰ Chi Jesús ymñañ:

—Jëbi yajnaaxtigíhuipy huidibi ca' xypanícxañich. Nícx miich capxhuäcxi Dios y'ayuc y'ané'min.

⁶¹ Chi jadüg jäy ymñañ:

—Huindzin, nbanícxamy yam. Tun may'ajt ocnajtmadzíygich nícx y'ocmñidcapxycíxyich njuugy nmigügich huidi jim ma ñich ndijc.

⁶² Chi Jesús ymñañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadun nipaady neihuñy tüg jäy ti ytigíy naaxjdzijtzpi mñid arado, e ca' huaad y'ijxhuimbity com co huinduum arado nícxíhuipy.

10

Jesús quejxhuäcxy je nidugí'pxmajcpi

¹ Huin'it co jada jadun ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxígy cogapxy metz metz ma tüg tüg cajp majaty ñicxañ. ² Chi Jesús nimay yí' ajcxy:

—Janch je cosecha ooy ti yhuindíy, yí' midumbi janchtiy hueeni. Chojcpy co nbijctzóohuim ma nHuindzin Dios co huen quexy ytumbidijc ma yí' cosecha. ³ Níxcix, ñich miich ajcxy nguejxpy jadun nej cōbixy y'ung yhuidity pa'uc agujc. ⁴ Ca' mminíxcixy mbijty, ni mxäcxuuny, ni mgig, e ni pin ca' mgapxpócxixipy tü'am. ⁵ Co ajcxy mdigíhuipy huenytimtitíjcity, jayíjp ajcxy mináangixipy: “Ji jotcujc'ájin ma jada tijc.” ⁶ Pen yung naxy je' ajcxy yajpaady, miich ajcxy je mgapxpooxin jotcujc'ajt myegipy ma je' ajcxy; pen ca' ajcxy yjadúnity, naadigí'adip huidi anajty ti mgápíxcixy. ⁷ Nañ hui'mgix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjin jaydijc. ⁸ Huenytimyhuidi cájpity ma anajty mdigíygixy, pen je jäy ajcxy xycōbijcp, caaygix uuccix huidi anajty jäy ajcxy xymooyb. ⁹ Yajtzóoccix yuujäy pa'mjäy huidijaty jim ma je' ajcxy yajpaady, etz yajnimaaaygix: “Je Dios y'ané'min huingóniñ yí' ma miich ajcxy.” ¹⁰⁻¹¹ Huenytimyhuidicájpity ma anajty mdigíygixy, e ca' anajty jäy xycōbigaangixy, co ajcxy mdzonaanip, nimaaygix: “Yí' mgajp naaxjoc huidi ti ypety ma ñich ndecy nhuinnebáamyich, yí' je' iixpejt co Dios ajcxy xyhaachytunipy. Chi neihuñygix miich ajcxy jada co je Dios y'ané'min ti ymihuingoni.” ¹² Hich miich ajcxy nimayb co huin'it xñ co anajty yajhuaad'aty, Dios nigi tzaachytunaangixy je jäy huidi ajcxy ca' miich ajcxy xycōbigañ, ca'ydi Sodoma cajpjäy.

Je cajp huidijaty ca'p ycapxymidoy

¹³ Chi Jesús yjacmíñañ:

—¡Miich ayoob ajcxy Corozín jáy! ¡Miich ayoob ajcxy Betsaida jáy! Co jím ma je Tiro cajt etz Sidón cajt caytuni cayjajti je Dios ymíhuinma'ñ huidi ti ytunyí ti yjadyí ma miich ajcxy, jécyípxy ajcxy yjothuimbijtni, etz ti yajniquëxëccíxy ixyípy míd je yhuít iñaaygíxy saci nñen nñcuyjam ixcuyjam (je' je tíy'ajt co ooy ytajcíxy ymaygíxy míd ypocy ycíxpi). ¹⁴ Janch jadu'n yjadípy co anajty Dios yajniögödugíy, nñgi o'ctíy miich ajcxy ayo'n mbaadíyb ca'ydi jadu'n nej Tiro jáy etz Sidón jáy. ¹⁵ E miich ajcxy Capernaum jáy ajcxy, ¿nej mminaangíxy mjátcíxipy tzejpjoty? Hue' m'idaaccíxyp miich ajcxy ma yí ayoodactuuby.

¹⁶ Je jáy ajcxy huidi miich ajcxy m'ayuc xymídoohuíp, nañ xymídoohuíb yí' ajcxy íich n'ayuc. Je jáy ajcxy huidíbi miich ajcxy ca' xy'íxa'ñ, nañ ca' je' ajcxy xy'íxa'ñich; e pinjaty ca' xy'íxa'ñich, nañ ni ca' yí' íxaangíxy je Dios je huidi ti xyquexyích ya naaxhuíñ.

Chi ajcxy je nidugí'pxmajcpi yhuimbíjtcíxni

¹⁷ Chi je nidugí'pxmajcpi huidi Jesús yquejx ayuccapxhuäcxpi yhuimbijttay ajcxy janch jotcujc, ymínaangíxy:

—Ixti je ca'oybi ti íich ajcxy xycapxycöbíjccíxy míd miich mxíi.

¹⁸ Chi Jesús ymíñañ:

—Ti n'íxyích nej je ca'oybi yhuindzín ti ycäy, jadu'n nej jihuíy ti ycäy ti ycödigíy tzejpcíxy, jadu'n nej tüg huídzuç. ¹⁹ Íich miich ajcxy mic'ájtín ti nmooygíxy, jaydëbi ca'oybi ca' xymímadáaccíxipy, tím jadu'n nipaady nej jihuíy tza'ñ etz ca'ty myajhuäcpéjtcíxy e ca' nej mjátcíxy. ²⁰ Nñgi miich ajcxy jotcujc'ájtíx co ajcxy mxíi y'íjtcíxy cojay jilby tzejpjoty, ca'ydi co ajcxy ca'oybi xycapxymídoogíxy.

Chi ooy Jesús yjotcugíy

²¹ Huín'it Jesús yjotcugíy míd je Dios yjihuí'ñ ymíc'ajt, ymíñañ:

—Nyajnajxypích Dioscojuyip ma miich, Dios Teedy, tzejpjotyí Huindzín etz je naaxhuíñybi Huindzín, co ti myüch jada mihuínma'ñ ma yí cohuínma'ñ jáydíjç, etz ti myajnejhuíy je jáy huidi ca' y'íxpícyty. Dios Teedy, jadu'n miich ti mduñ com jadu'n miich ti mjäygídacý.

²² Ndéedyích ti xyajcídígíydäyích tüg'ócy tíjaty mic'ajt oy'ajt. Ni pín ca' íjxcajt pín je' Dios y'ung'ajtpy, jëyi nDéedyích tügpaíci pín xy'íjxcajtích. Ni pín ca' íjxcapy pín je' nDéedy'ájtípyích, jëyi je Dios ung tügpaíci huidi íjxcajt, etz jacjadyí ma je ung yajniquëxíga'ñ.

²³ Chi Jesús ni'íjxhuimbijty yí' ydiscípulos ajcxy, ahuingujc ajcxy nímáy:

—Jotcujc ajcxy je jáy ajcxy huidi íjxcíxp jadu'n nej miich ajcxy ti m'íjxcíxy. ²⁴ Íich miich ajcxy nímáy co ooy may Dios y'ayucnajtzcápíxyb etz rey ajcxy ja'íxa'ñ huidíbi miich ajcxy m'íjxpy, e ni ca' ajcxy íxy; etz jamídoó'ída'ñ huidi miich ajcxy mídooyb, e ni ca' ajcxy mídooy.

Íjxpejt ma tüg samaritano oyjäybi

²⁵ Chi tüg jáy huidi yaj'íxpíjçp Dios ñecy ytínaay'ahuíy jot'íxy huínma'ñ'íxy Jesús, chi y'amídooy:

—Huindzín, ¿ti huaad ndunípy co íich jugy'ajtín huínixíbi nbáadibích?

²⁶ Chi Jesús y'adzooy:

—¿Ti jaybétyí ma yí Dios ñecy? ¿Nej mhuínjihuíy co mnecycapxy?

²⁷ Chi je ley huindzín y'adzooy:

—Mdzogípy mjihuíhuípy mHuindzín Dios míd tüg'ócy m'aa mjot, míd tüg'ócy m'alma, míd tüg'ócy mmíjaa, etz míd tüg'ócy mjot mhuínma'ñ, e mdzogípy yí mñjín mídíjç jadu'n nej miich c'i'm nychogyíi.

²⁸ Chi Jesús y'adzooy:

—Ti ooy yajxon m'adzooy. Tun yi', e mdzinähuip huinixii.

²⁹ E je' nañ jadu'n tim tiy ñejhuñhua'ñ, nimay Jesús:

—¿Pin ich nmidijc'ajtpy?

³⁰ Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy yhuít e tijaty yi' anajty ymíid pijctaayi. Chi ajcxy ooy huínhuojpy jipphuojpy huingojxy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiiy ma je jimbí tü'aa. Co y'ijxy je tzaachijäy, chi jüyöyñajxy. ³² Nañ jadu'n yminagiiy ma je jimbí tü'aa tüg levita jäy huídi tuumb ma Dios ytijc, co jim yjaty mihuingon je tzaachijäy, co oy ixy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxiy, co mihuingon je tzaachijäy, co oy ixy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaach'au, nañ tzooyi chaach'au míid aceite etz vino. Chi yaj'iyujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meen, moy je codijc nimay: “Cuend'at jadayaabi tzaachijäy, jadu'n nej anajty mjacmeeñyajuñ, co ich anajty nhuimbityich huin'it nmigüedipy.” ³⁶ ¿Ma je nidugigpi jäy pin je oybi ti tuñ míid je jäy huídi anajty je meetzpi ti ymeechyii ti yajtzaachiyii?

³⁷ Chi je jäy huídi Dios ñecy yaj'ixpijcp Jesús y'adzooy:

—Je huídi ti yajtuñ je pa'ayo'ñ.

Chi Jesús yminañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajaty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huídi anajty yxii Marta, yi' yajjättaci ma ytijc. ³⁹ Je Marta ymíid anajty tüg y'uch töxyjäybi huídi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihuñyijji co ich naydüg yam tzach nayyajuñyijjichi? Nima' yi María co huen xypubétyich.

⁴¹ Chi Jesús yminañ:

—Marta, Marta, yi maytung miich mdzachmijottigooyb. ⁴² Tügpaic ji, huídibi ooy ycopícyip. Yi María ti yi' huin'ixy je oybi huídi ni pin ca' ypigiiyb.

11

Jesús yaj'ixpij nej jēbi mibijctzoohuim Dios

¹ Jadu'n yajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiiygich ajcxy tzajcapxycapxi, jadu'n nej Juan yajni'ixiiy yi' ydiscípulos ajcxy.

² Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huídi tzajpjoty tzinaayb, huindzigiiy miich mxii y'ity. Huen miñ ya miich yi m'ané'mín. Huen mdzójcín yajcuyduñ ma je jäy yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucín jabom jabom.

⁴ Méecxibich ajcxy nbocy ngaydey huídibi ich ajcxy ndundigooyb, jadu'n nej ich ajcxy nmeeexyich huídibi ajcxy xymidundigooybich. Ca' m'a'ixiiy co ich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacminañ:

—Pinjaty ji ma miich ajcxy huidi tög ymögüg mïd, co ninícxipy mijcoodz e mnimáhuipy: “Migüg, tun may'ajt yajpijctzoogich tugüg mdzajcaagy. ⁶ Tög ñich nmögüg ti xyñimiñich huidi tüyöyp, etz ca' nmïdidyich ti nmöhuibich.” ⁷ Chi je jäy y'adzooy jilby tigoty, ymïnañ: “Ca' xy'amayiyich. Ti ñich ndijc n'agüyñi, etz n'ungich yam nmïdich cijx'am; ca' njatyich nej nbidigibich etz nmöhuipy huidi mbijctzooyb.” ⁸ ñich miich nimaayb, oy ca' tzojc nipidigañ ymöhuamy huidi pijctzou co migüg'adyii, hue' ymöhuamy jaydëbi ca'ydí yjac'amayiyii, chi yegipy tög'óciy huidi yajmayjajtpy. ⁹ ñich miich ajcxy nimaayb: Pijctzóogix, e myajmöhuipy ajcxy. Ixtaaygix, e mbaadipy ajcxy; cogapxiygix, ahuädzip ajcxy mdijc'aguu. ¹⁰ Tög'óciy je' pin pijctzoob tijaty ma Dios, cidigihuib; pin y'ixtaayb, ypaadipy; pin cogapxiyb, yaj'ahuatzib ytijc'aguu.

¹¹ ¿Pin ungdeedy ji ma miich ajcxy pen y'ung ypijctzoob tzajcaagy, nej mmöhuipy tög tzaaji? ¿E pin ypijctzooyb acx, nej jëbi mmöhuipy tög tza'ñi? ¹² ¿Pen ypijctzooyb tzeydüty, nej jëbi mmöhuipy ca'ty? ¹³ Pen miich jibicjäy ajcxy mnejhuib nej oybi m'ung móoygixipy, ¿nej ca' mdijy yjáncity co mDios Teedy tzajpjotipi xymóoygixipy je Espíritu Santo, pen miich ajcxy mmibijctzohuipy?

Yajñibijccixy Jesús co mïdity mujcu' ymic'ajt

¹⁴ Chi Jesús anajty yajpidzimy tög ca'oybi ma tög jäy huidi anajty uumip. Jadu'n yjajty co je ca'oybi ypidzimy, chi je uum ycapxiy. Chi je mayjäy ooy jihuüy huinmay. ¹⁵ Nijëjity jäy ymïnaangixy:

—Jesús mijhuinmañ ytumyb mïd je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jäy ajcxy co jot'ixaangixy huinmañ'ixaangixy Jesús, pijctzooy ajcxy Dios tög ymijhuinmañ. ¹⁷ Co Jesús nejhuib nej je' ajcxy jot'adyii huinmañ'adyii, chi nimay:

—Co tög gobierno ñaybijc-huäcxyii, chi ñaychiptünigixy miñ xyipy; ñayyajcixigixy ñayyajtigóoyigixy; co tög quëx jäy ñaybijc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybijc-huäcxip, ¿nej jada je mujcu' y'ané'min yjac'idipy? Miich ajcxy minamb co ñich mïd ndüñich je Beelzebú ymic'ajt co ñich ca'oybi nyajpidzimy. ¹⁹ Pen jadu'n yi', ¿pin je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy ci'm yajniquëxícp co miich ajcxy mdundigooygixy mgapxtigooygixy. ²⁰ Pen ñich mïd Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tög micjäybi mïdity maydujt, e ñaycuend'adyii yajxon, ca' je' ytigoyipy tijaty ymïd. ²² Co yjaty jadüg jäy jacmicpi ca'ydí je', chi ymïmadägyii, e ypijctäyii tög'óciy ytujt huidi anajty ooy jot'amij'adyii, e yajhuäcxipy tijaty anajty ymïd.

²³ Pinjaty ca' xymijnicxpétyich, nmidzipich yi'. Pinjaty ca' ytuñ mïd ñich co jäy nyajixpicyich Dios ytiy'ajt, hue' je' ajcxy jäy yajhuinmañyidigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim títznaax ijxtägy co ypocxa'ñ. Co ca' paty ypocxtac, huin'it ymïnañ: “Huimbidaambich ma je jäy yjot yhuinmañ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinmañ janch yhuädzity janch ooy jadu'n nej tög tijc huidi janch huädz pedigity. ²⁶ Chi je ca'oybi ñicxy, e mïd miñ jahuixtujc ca'oybi jacjibicpi ca'ydí je'; chi ajcxy ytigüy ma je jäy yjot yhuinmañ, e chinay ajcxy jilby; huin'it je jäy jac'o'ctiy oy yjajtni ca'ydí jadu'n nej anajty jayijp'aty.

Huidi ajcxy janch jotcúcip

²⁷ Co Jesús jadu'n anajty ymïnañ, chi tög töxyjäy mayjäy agujc mic ymïnañ:

—Jotcuyc je töxyjäy huidi ti xyajpi'c'aty etz huidi xyajyeegy.

²⁸ Chi Jesús ymïnañ:

—Je' jacjotcuyc pinjaty Dios y'ayuc mïdoohuip etz cuyduunip.

Jibicjäydijc pijctzoogixy tüg tiy'ajt mijhuinma'ñybi

²⁹ Co je mayjäy ajcxy jübigiyy, chi Jesús yminandacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuüyb ijxpejt, jëyi tügpajc Jonás y'ijxpejt yajmöhuij. ³⁰ Com jadu'n nej je Jonás jecy'ajty ijxpejt yejcy ma je Nínive jäy, nañ jadu'n ñich, je jäy huidi tzoon tzajpjoty, nyegaamyich ijxpejt jadachambi tiempo müd jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'ñ mayjäy, etz yajpocycähuipy ajcxy. Ixti ma naaxhuiñybi ycoxixy jim je reina choon co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmüdpj jacniği ymijity ca'ydi Salomón anajty. ³² Co anajty Dios tiyduna'ñ yi may naaxhuiñyjäy, chi je jäy ajcxy huidibi anajty cogajpaj jim Nínive pidägaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijt je' ajcxy co Jonás Dios y'ayucnajtzcaxxiyi. Ji jadachambi tüg Dios y'ayucnajtzcaxxiybi jacniği ymijity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninïcx

³³ Ni pin ca' yüch je jün huidi ti nögpity, ni ca' pidägy jilby cajón pa'tci'py, jëyi janchtiy pidägy je jün ma jündicxpejt, jaydëbi co pinjaty ytiğihuipy tigoty, codicxiib je jün. ³⁴ Je jün ma miich ajcxy mninïcx je' yi' miich ajcxy mhuin. Pen oy miich ajcxy mhuin, nañ jadu'n tüg'óciy miich ajcxy mninïcx ymüd yi' tücxin. Pen ca' y'óyity mhuin, nañ jadu'n ajcxy yi mninïcx yajpaty agootztuum. ³⁵ Cuend'ájtciy yi tiy'ajt huidi miich ajcxy müd, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codicxxy y'ity müd Dios ytiy'ajt, tüg'óciy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy müd cayii. Co Jesús ytiğtiğiyy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyhuächyii müd ni jayijpni ma anajty ca'ni ycaayñi. ³⁹ Chi je Huindzin Jesús yminañ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjanchity; chi jada' ma mjot mhuinma'ñ miich ajcxy ooy m'adzocy, etz müd ajcxy jibic-huinma'ñ; tim jadu'n nipaady nej myajhuäch ajcxy yi tasi ninïcx, yi texyñinïcx e chi ajcxy yajhuí'ngixy jibicpi je tasioty je texyjoty. ⁴⁰ ¡Miich ajcxy ca' Dios y'ayuc huinjihuüybi! ¿Ca' mnejhuüygixy co yi pin ti texyñinïcx yajcojy nañ ti yajcojy texyjot? ⁴¹ Tun miich ajcxy oyjäy'ájtin, huin'it janchtiy anajty ajcxy mhuädzity ma mjot mhuinma'ñ.

⁴² ¡Ay miich ayoobi ajcxy fariseojäy! Com mbidaaccixy abicy tüg picy je majcpi müd yi Dios ycixpi ixti yi tzajnimang, yi ruda, etz tüg'óciy aay ujtz. Chi jada' ca' mduñ je oyjäy'ájtin etz tiy'ájtin jadu'n nej Dios tzocy. Hue' je' oy mduñ co tijaty abicy mbidägy müd Dios ycixpi, nañ jadu'n copicy oyjäy'ájtin mdunipy etz Dios ytiy'ajt mguydunipy.

⁴³ ¡Ay miich ayoobi fariseojäy ajcxy! Co ooy m'adzójccixy je ñaybejt huidi cöduum ma naymujctac, etz ooy m'adzójccixy co huen jäy ajcxy xycapxpooxcixy oy huindzigiy mayjäy agujc.

⁴⁴ ¡Ay miich ayoobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidaacigixy oyjäy e ca' yjanchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxigy, chi jäy yöy nigix, com co ca' ñiguëxigy.

⁴⁵ Chi tüg jäy huidibi yaj'ixpijcp Dios y'ayuc yminañ:

—Huindzin, co jadu'n miich mina'ñ, nañ jadu'n ñich ajcxy ooy jibic nayjihuiyigixy.

⁴⁶ Chi Jesús yminañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costum-bre huidi je jäy ajcxy ca' mimadäga'ñ, e ca' ajcxy mba'ayoogixy, tim jadu'n nipaady nej

jihuïy tüg tzimý ti mmooygixy jemxypí huïdi ca' je jáy ajcxy mímadağa'ñ, e miich ajcxy ni ca' mgihuäx jëda'ajty mgayajpadaangixy je tzimý.

⁴⁷ ¡Ay miich ayoob ajcxy! com myajcojci xy je ögpí jut ma je Dios ayucnajtzcapxiybi naaxtigíy, je huïdi m'ap mdeedy ajcxy yaj'o'c. ⁴⁸ Jadu'n yajhuinjihuïy nej jihuïy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcapxiybi, e miich ajcxy myajcoj je öcpí jut ma ajcxy je' ñaaxtigíy.

⁴⁹ Paady yi' Dios jadu'n huinmay, e minañ: Nyajniguxipyich miich ajcxy profetas etz y'ayuccapxhuäcxpi, e miich ajcxy myaj'ögip nijëjity, etz jacnaagity mbahuïdijttäccixipy.

⁵⁰ Dios yajcomidohuipy jadachambi tiempo jáy ajcxy je ypocy huïdi y'ap yteedy ajcxy ytuñ, com maabi naaxhuiñ chondägy, yi' ajcxy yaj'ögy Dios ytiy'ajtmüdpí. ⁵¹ Janch nimaaybich miich ajcxy co Dios yajcomidohuipy jadachambi tiempo jáy ajcxy je y'ap yteedy ypocy co ajcxy yaj'o'cy Dios ytiy'ajtmüdpí chondägy ma Abel, ixti Zacarías huïdi jáy yaj'o'c ma Dios ytiyc tiba'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi' jáy ajcxy ixpígipy; tim jadu'n nipaady nejjihuïy ti mbicy je tiyc ahuaast e ca' miich ajcxy mdigihua'ñ, e ni mgatzojccixy co huingbi nicxy ytigíy.

⁵³ Co Jesús anajty jadayaab ayuc yajnimaygixy, chi je Dios y'ayuc huindzin etz yi' fariseojäy ajcxy jotmätcooty chi yaj'amidogoty ajcxy may ayuc. ⁵⁴ Ñayñimáayigixy miñ xyipy co huen amido'ijt Jesús y'ayuc, jigix jëb páatcixipy huïdi jëb müd xigixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjánchity

¹ Chi je mayjäy ooy nimujcy Jesús, janch jadu'n ñay'adijy ñay'agodiiygixy, chi Jesús nimaydacy je' ydiscípulos jayijp:

—Nigüendi müd yi' fariseojäy ajcxy nej ajcxy yjäyyaj'ixpijccixy. Yajxon yi' ajcxy ycapxy ymüydägy, chi ca' cuydungixy. ² Ca' ji ti huïdi ijtp ayüch nicxy ycayajnejhuïy, nañ ni ca' ji ti huïdi ijtp ameech nicxy ycanigüëxígy. ³ Huen huïdi ayuc miich ajcxy ameech mgapxy, yajnejhuïhuip yi'. Huen huïdibi ayuc huïdi ti mnayyajnimáayigixy ameech jüby tigoty, mic yajcapxhuäcxip tiyc nigíxy.

Pin jëbi huaad ndzigíyim

⁴ Chi Jesús yjacminañ:

—Miich ajcxy nmigügtijc, ich miich ajcxy nimaayb co ca' mdzigíygixy yi' jáy ajcxy huïdibi ninícx yaj'o'cp, com ca' jac ni ti ajcxy tunipy. ⁵ Ich miich ajcxy nyajni'ixihuipy pin huaad jëbi mdzigíygixy. Yi' janch mdzigíygixy yi' Dios huïdibi jugy'ajt pijcp, e huin'it müd je' ymic'ajt jëbi quexipy m'alma ma je mij jün. Yi' janch mdzigíygixy yi'.

⁶ ¿Nej ca' jáy ajcxy ytoogyii migoox joon müd metz pi'cmeen? Dios ni tüg yi' ajcxy ca' jáydigooity. ⁷ Ixti mgöhuay ajcxy ac michoy Dios müdity. Ca' mdzigíygixy, jactzou nigi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyjoty

⁸ Ich miich ajcxy nimaayb co pinjaty ma miich ajcxy huïdi capxpídzimp mayjäyjoty co xymibícyich xymijpidägyich, ich, je jáy huïdi tzoon tzajpjoty, ngapxpídzimipyich co ti ngöbicyich jadu'mbi jáy ma Dios y'ángeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n ich yi' ca' ngöbigipyich jüby ma Dios y'ángeles ajcxy yhuinduu.

¹⁰ Tüg'óciy jáy huïdi jadu'n ich, je jáy huïdi tzoon tzajpjoty, xyñigapxp xyñi'ojíybi Dios huinmecxiib. Chi jada' pinjaty nigapxp ni'ojíybi je' Dios yjihuï'ñ (je Espíritu Santo), yi' janchtiy Dios ca' yhuinmecxiyb.

¹¹ Co mmidzip ajcxy xyajnícxip ma naymujctac, ma codungdijc, etz tungmídpi yhuindu, ca' mdájip mmáyip nej m'adzóogixipy, e ca' mhuinmayipy nej ajcxy m'adzohuipy.
¹² Com je Dios yjihui'ñ huin'ítíy ajcxy xyajni'ixíhuip nej huaad m'adzoogixy.

Naygüend'ajtigixy ca'p adzojccixy comeen'adii

¹³ Chi nidügti je mayjäy ymíñañ:

—Huindzin, nima' n'ajchich co huen yajhuäcxy míid íich huidi ndaj ndeedyich ñidungiy.

¹⁴ Chi Jesús ymíñañ:

—Yëydijc, ca' íich ni pín ti xypidägyich ane'mbi ma miich ajcxy etz yajhuäcxpi.

¹⁵ Chi Jesús nímáy je jäy ajcxy:

—Ijxcix naygüend'ajtigix, ca' m'adzojccixy comeen'adii, com je m'alma yjugy'ájtín ca' je' nídzoocin'adyii huidijaty miich ajcxy míid.

¹⁶ Chi ajcxy yajnimay tög ayuc, ymíñañ:

—Jim anajty tög comeen'yäy huidibi anajty ooy mij ypidägy yajpidägy. ¹⁷ Je comeen'yäy anajty ooy ci'm huinmay ma yjot yhuinma'ñ, ymíñañ: “¿Ti n'octunipich com ca' nmíididyich ma nyajnígidägibich yi tiibi y'ity?” ¹⁸ Chi ymíñañ jotjoty huinma'ñyoty: “Nyajpidicnibich ndzëx, e ngójbich jacmíjpi, chi tög'óciy jiihy nídactähuibich tiibi y'ity.”

¹⁹ Co jadu'n ndunipyich, chi jëbi jotcuyc ndzinähuibich, com ooy anajty nmíididyich pidägy yujcpicy, jëbi canaag jimíjt niboocxyich etz jëbi ngay n'ügyich jotcuyc. ²⁰ Chi Dios nímáy je comeen'yäy: “Ooy jibic-huinma'ñ miich mídity. Cham coodz íich miich nibijctzohuñhuaan'y yi m'alma (m'ögip), e co anajty ti m'ögy yi huidibi ti myujcpicy, ¿pín yi' je'adiib?” ²¹ Jadu'n yjaty yi' ajcxy huidibi ymeen'idi'ñ ci'm yujcpijcp, ca' yi' ajcxy jiihy ycomeen'yity ma Dios yhuindu.

Dios ycuend'ajtpy y'ung y'anäg

²² Chi Jesús nímáy je y'ixpijcpidijc:

—Paady ajcxy nimaaygixy co ca' huaad mjottigooygixy ma yi mdzináayín yi mjogy'ájtín, huidi mjíicxcixipy mgáaygixipy, huidi míid mninícx mxójxcixipy. ²³ Yi jugy'ajt jacnigi tzou yi', ca'ydi yi caayín uucín, etz je mninícx jacnigi choohuity ca'ydi huit. ²⁴ Ijxcix yi joogy ni ca' ñípy, ni ca' chijccixy, ni ca' mídity ytíj ni chëx, e Dios yi' ajcxy mooyipy huidi yjicxcixyp, ¿nej cayjacnigi miich ajcxy mdzoohuity ca'ydi joon ajcxy? ²⁵ Ca' ji ni pín ma miich ajcxy pín jadipy nej ñayjijptzomíhuib jadüg cínuux. ²⁶ Pen ca' mjaajtcixy nej mdúngixipy huidi hueen huinma'ñ, ¿nej co mdzachmijottigooygixy yi tzinaayín yi comeen'ájtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Íich miich ajcxy nimaayb, co ni je rey Salomón míid tög'óciy ymeen' ca' ñayxoixi jadu'n nej jada aaybijy ujtzipiy.

²⁸ Pen jadu'n Dios xoxy yi aay yi ujtz huidibi cham jajtip ma yi tungop, e com jabom ti anajty ñíicxni, Dios xypubedipy xypudigíhuipy nígi miich ajcxy huidi hueen mibijcp.

²⁹ Ca' miich ajcxy mhuinmay'ahuidíjtcixipy ajcxy ti mgáaygixipy m'úuccixipy. ³⁰ Yi naaxhuiñyäy ajcxy ymijottigoyb anaxy tög'óciy caayín uucín, huit etz tijaty. Miich ajcxy huidi mijpidacp Dios, Dios Teedy ñejhuiyb co copicy ajcxy míid'adipy caayín uucín etz huit tucxy. ³¹ Jayijp mijottigooygix Dios y'ayuc ytiy'ajt, chi jada' tög'óciy huidi ajcxy myajmayjaty mbáatcixipy yi'.

Jugy'ájtín mijpi jiihy tzajpjoty

³² Chi Jesús yjacmíñañ:

—Ca' miich ajcxy mdzigíygixy, miich ajcxy mnihueen'ity, per mDios Teedy yega'ñ ane'mdac tzajpjoty míid miich ajcxy ycixpi. ³³ Tooccix tijaty miich ajcxy míid, nimooygix ayooobitijc. Yaj'oyíygix meen'idi'ñ huidi ca' y'amijíhuipy ni camína. Yaj'oyíygix tög pidägy, janch mij e janch oy, jiihy tzajpjoty huidi ca' ycixipy ytigoyipy, ma ca' meetzpi huaad ytigíy, ni ucxyting ca' yajhuindigoyipy. ³⁴ Pen miich ajcxy míid mgomeen'ájtín

ya naaxhuiñ, yaayi je mjet mhuinma'ñ ajcxy. Pen mdzojcpy ajcxy je oybi huidibi Dios yegamy, nañ mñid'ájtci xy jim jabom jabom mjet mhuinma'ñ ajcxy ma Dios.

Tzoc ítim ni'ixi'

³⁵ Chi Jesús yjacmínañ:

—Ni'ixiigyix mjet mhuinma'ñ jadu'n nej jihuïy mhuit myujc'ameetcixy co mdunaangixy, etz jadu'n nej jihuïy lámpara mnögpíjccixy co mdzumnaxaangixy m'ahuixaangixy je huindzin. ³⁶ Ni'ixi'íjtci xy jadu'n nej jáy huidi yhuindzin ahuijxp, co anajty yhuimbity co anajty ti y'oy ma jáy ti ypi xy, chi co anajty minipy ycgapxiy, mic'amy myaj'ahuädzi tytjc. ³⁷ Jotcuyc ajcxy je tumbi co je yhuindzin anajty yjady, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjady, chi yhuít yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy minipy je huindzin mijcoddz o moñyi, e páadip je tumbidijc ajcxy jim chumnáxcixy juugy, jotcuyc je' ajcxy je jadu'mbi tumbidijc. ³⁹ Nejhuigyix jada co je codijc ixypy nejhuíhuipy ti hora ymina'ñ je meetzpi, chi juugy ixypy chuumnaxa'ñ, e ca' ciyegipy ytjc nicxy jáy tigoty ymeech. ⁴⁰ Miich ajcxy nañ jadu'n íjtci xy ni'ixi', mina anajty ca' ti mhuinmaaygixy, huin'it miina'ñich ich, je jáy huidi tzoon tzejpjoty.

Je tumbi tudägyi etz je tumbi ca'pi ytudägyity

⁴¹ Chi Pedro Jesús nimay:

—¿Pin jada ti myajnimayb jada ayuc huidi ti mgapxy, ich ajcxy, o nidüg'óci xy jáy?

⁴² Chi je Huindzin Jesús yminañ:

—Huidibi tumbi je' ya huidi tumb mñid yhuindzin janch cixyjot huinijot huidi mñid yhuijy'ajt ycuyc'ajt huidi je yhuindzin mooyip ané'min ma ytjc, huidi yajnigidägyib tumbidijc nej ypaadyii. ⁴³ Jotcuyc je tumbi co anajty je' yhuindzin yhuimbity e padiiyb ti cuyduñ jadu'n nej anajty ti ñimäyii. ⁴⁴ Janch ich miich ajcxy nimäy co je tumbi huindzin yajmihui'mdähuipy jada ytumbi tüg'óci xy pidägy huidi ymñid. ⁴⁵ Pen je tumbi yhuinmaayb jotjoty huinma'ñjoty co je yhuindzin yhuäcxijpni mina ymiina'ñ, chi midziptzooni jacjadyii tumbidijc ajcxy, huojpni, cojxni, nañ yti gyiñi caayb uucp anaxy etz ymügyii. ⁴⁶ Chi je tumbi yhuindzin minipy ma je xii hora anajty ca' jip'ixy e ni canejhuíy anajty, e huin'it ooy tzaachytunipy yi tumbi e chi pidägyi ma je huidi ajcxy ca' ytudägyity.

⁴⁷ Je tumbi huidi nejhuíyb nej yhuindzin chójcín, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' nigi yajtzaachytunip. ⁴⁸ Je tumbi huidi ca' yajxon huinjihuíy nejji huíy yhuindzin chójcín, hueeni je' yajtzaachytunipy. Huenpínity huidi may yajmooyb, may yi' yajmibijctzohuiyb; etz huenpínity huidi ti mihui'my ooy, yajmibijctzohuiib nigi.

Jesús yci xpi ñaybijc-huäcxii jáy

⁴⁹ Chi Jesús yjacmínañ:

—Ich ti nmiiñich ya naaxhuiñ co jin nbidägi bich. ¡Ooy njadzocyich ji ixypy ñitooyñi! ⁵⁰ Nyajnaxipyich tüg tzaachypi, e ¡ooy ndajy nmayich ixti mabaad yajcuyduñdäy! ⁵¹ ¿Nej miich ajcxy mdiy co ti nmiiñich ya naaxhuiñ co nyajcixipyich je tzipi? Ich miich ajcxy nimaayb co ca'. Hue' janchtiy nyajnaybijc-huäcxáanibich jáy ajcxy. ⁵² Jadachambi etz yjacnicxni xii tiempo ji migoox tüg quëxjädijc huidibi ajcxy ñaybijc-huäcxii b, tugig mñid je metzpi, e metzpi mñid je tugigpi. ⁵³ Je ungdeedy tziptunip mñid ymang etz je mang mñid yteedy. Nañ je ungday tziptunip mñid yñix etz je nix mñid ytaj. Nañ jadu'n je xecy tziptunip mñid yxecy.

Je xii tiempo yti y'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi minaangixy co tühuaam, e janch jadu'n yjadyii. ⁵⁵ Co ymiiñ je jinboj, chi miich ajcxy minaangixy co ambigaamb, chi

janch jadu'n yjadyii. ⁵⁶ ¡Miich jibic jäy ajcxy! Ooy mjaajtcixy nej myajcapxcixy yi xii tiempo huidi ajcxy m'ijxpy tzajpcixy etz ya naaxhuiñ: ¿Nej co ca' mjaajtcixy nej myajcápcixipy xii tiempo ymiñ ycidägy?

Naymi'oyihui müid midzip

⁵⁷ ¿Nej co miich ajcxy ca' ci'm mnaydiydúunigixy nej ytudägyity je tiy'ajt? ⁵⁸ Co mnícxipy ma yi codung müid yi mmidzip jac'oy co mnayyaj'oyihuipy müid yi mmidzip tü'am, ca'ydi müid mjädip ma yi codung, e chi je codung xyciyegipy ma je xueetz, e je xueetz xypidägy pujxtigoty. ⁵⁹ Ich miich nimaayb co ca' jiiby mbidzimipy, ixti cooni mgüejttähuipy tüg'óciy.

13

Ooy ycopícyity nyajtigajtzim nhuinmañ

¹ Huin'it jäy müidmiydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidijti ajcxy ñi'py müid iyujc ñi'py huidi je' ajcxy müid huindzigi'ñ tuuñ.

² Chi Jesús y'adzooy nimay ajcxy:

—¿Nej mdiyy, nigi anajty ypocymüidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Ich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigiyyigixy ma Dios, nidüg'óciy miich ajcxy mgijxtähuip mdigoydähuip. ⁴ E je' ajcxy je majmocxtugigpi huidi je mijtjc jim Siloé nigidaagootti, yaj'öci ajcxy. ¿Nej mdiyy nigi ajcxy ypocymüidity, ca'ydi nidüg'óciy je jäy huidi tzinayb jim Jerusalén? ⁵ Ich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuip mdigoydähuip miich ajcxy nidüg'óciy, jadu'n nej je' ajcxy.

Ijxpejt ma je higuere ca'pi anajty ytiim'aty

⁶ Chi Jesús yajnimay ajcxy jada ayuc:

—Tüg jäy anajty müidity higuere cojy ma y'aguemy, chi ñicxy jiiby ma y'aguemy higuere tiim ijxtaaybi, ni ca' paty. ⁷ Chi nimay je' ytumbi: “Cham midugüg jimijt müiñich ya higuere tiim ijxtayb ma jada higuere cop, ni tüg ngapaadyich. Huen yajpujxciday jada higuere cop, nej co nigoobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayijp yi naax jühuidityi, etz oc'abonijyich. ⁹ Pen tiim'ajt ca' nyajpuxipy, pen ca' ytiim'aty jëbi nbújxigipy.”

Jesús yajtzögy pocxxiduum tüg töxyjäy jigojoipyi

¹⁰ Chi Jesús anajty yaj'ixpicy ma tüg naymujctac pocxxiduum. ¹¹ Jim anajty tüg töxyjäy huidi anajty mimajmocxtugüg jimijt cujc mi'ijtni yjibojpa'm, agojojy anajty yöy, ni nej anajty yca'oyiy nej ytinaaygugihuipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjix, e chi je' yjix ytiy, huin'it ytigüy Dios ojada-jtpi. ¹⁴ Huin'it je naymujctac huindzin ooy yjotmäty müid co anajty Jesús jäy ti tzojy pocxxiduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ semaanjoty pin yajtzoyihuam, ca' ypocxxiduumity.

¹⁵ Chi je huindzin Jesús yminañ:

—¡Miich ajcxy naybidaacip nej tudägyjäy, e ca' yjanchity! ¿Nej ca' miich ajcxy mmiguejy mhuajyuubi, etz mburro ma ypécxtac pocxxiduum, e myajnicxy ajcxy nñ'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugüg jimijt, ¿nej ca' ypadyii nyajtzögibich pocxxiduum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugiiygixy miid je oybi huidi Jesús ytuun.

Ijxpejt ma je mostaza pájc

¹⁸ Chi Jesús yminañ:

—¿Nej m'oc'a'ixiiygixy yi Dios y'ané'min? ¿Huidi miid n'ocyajquipxiñhuibich? ¹⁹ Jadu'n Dios y'ané'min nipaady nej mostaza pajc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc yminañ:

—¿Huidibi miid n'ocyajquipxiñhuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytiyhuidijt miid tugüg quipxi'ñ harina ixti cooni yaxxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nïdzögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügijot, jëbi ajcxy m'alma ñïdzögipy, jadu'n nipaady nej jäy ajcxy ñaymic'ijxigixy co ytigihuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixiy ytigihuaangixy ma Dios y'ane'my e ca' ajcxy jadipy nej ytigiiygixipy. ²⁵ Co je codijc ypidgipy etz agiiyñip ytiyc, huin'it miich ajcxy pinjaty tibäy hui'm, chi jiiby tibäy miich ajcxy mmïnandägipy: “Huindzin, yaj'ahuädz”, e chi je tijc huindzin miich ajcxy xy'adzohuipy: “Ca' ñich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmïdgaaygixy ti nmïd'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “Ñich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdájcixipy mmáygixipy, myáaxcixipy mdützquéetcixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxxiybi jiiby ma Dios y'ane'my, e miich ajcxy tibäy anajty ti mhui'mgixy. ²⁹ Minip yi jäy ajcxy huidibi tzoomb ma xii ypidzimy, ma xii ycidägy, ma jayhuixtujc ypidzimy, etz cham ma madzäcruudz ytinaay'ahuüy, chi y'ixtáaccixipy ma je caydac jiiby ma Dios y'ane'my. ³⁰ Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nixc nimaaygix yjiibi huaax co nyajpidzimybich ca'oybi etz nyajtzoocypich jäy cham etz jabom, codugüg xii ti ndung mayíijich. ³³ Ooy ycopicyity co ñich njactüyöyibich cham, jabom etz huixtic. Com ypaadyii co Dios y'ayuccapxhuäcxpi y'ögip ajcxy jim Jerusalén.

Chi Jesús yjacminaañ:

³⁴ —¡Jerusalén jáy! ¡Jerusalén jäy! huidibi yaj'o'cp Dios y'ayucnajtzcaxxiyb ajcxy, etz ycögädz ajcxy je jäy huidibi Dios ti xyajnigüéjx ajcxy. Janch canaag'oc ñich miich ajcxy njahuijtmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixiiygixy. ³⁵ Chi jada' iijxcix cuenditungix, com jadachambi mgajp yhui'my najtz'ixi'.

hich miich ajcxy nimayb co ca' xy'ixipyich jadügtecy, ixti cooni anajty tiempo paaty mina mminángixipy: “Capxpaaty je' huidi miimb miid Huindzin'ájtín Dios ycixpi.”

14

Jesús yajtzögy tüg yëydijc quixypa'mmüdpí

¹ Chi jadu'n yajti co tüg pocxxüduum Jesús ytigiy ycayañ anajty ma tüg fariseojäy ytiyc, hue' anajty judío tungmüdpí. Chi yi judío ixpiytyijc ajcxy tzach'ix'ijtcixy Jesús, amídooy'ijtcixy Jesús y'ayuc. ² Huin'it tüg jäy huidibi ymüdpí anajty quixypa'm miñ ma Jesús yhuinduu. ³ Chi Jesús ymígapxi je' ajcxy huidibi yaj'ixpiyc Dios ñecy etz yi fariseojäy ajcxy, nimay:

—¿Nej je Dios ytiy'ajt ymíñañ? ¿Huaad o ca' huaad chögy jäy pocxxüduum?

⁴ Chi ajcxy y'amonday. Huin'it Jesús cñixajñiy je pa'm jäy, chi yajtzoocy. ⁵ Chi Jesús nimay je fariseos ajcxy:

—¿Nej miich ajcxy pen ñijutcögäp ajcxy mhuajyuubi o mburro pocxxüduum, nej ca' mic'amy nicxy yajpidzimgixy oy ypocxxüduumi?

⁶ Chi ca' ajcxy jaty nej y'adzohuimbíjtcixipy.

Je pinjaty huodzooñiy ma je pijcpi yajnixüduñiy

⁷ Co Jesús ixxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaañ, je tiibi anajty yajhuomiingixy:

⁸ —Co miich myajhuoohuipy ma pijcpi yajnixüduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaybejt ymíhuaad. ⁹ Chi jada' xyñimähuipy je huidibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n miid mñicxpy ma je' iñaybejt axambi. ¹⁰ Co jäy xyhuoohuipy ma je pijcpi yajnixüduñ, jim m'ixtägip ma je axambi iñaybejt, e co ymíñipy je huidibi anajty ti xyhuoomiñ, chi xyñimähuipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu miid miich. ¹¹ Pinjaty ci'm naygömáñip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñiy:

—Co miich mxüduunipy ca' mhuoohuipy je jäy ajcxy huidibi ooy miid mnaymigüg'ájtigixy, ni mmidügquëx, ni m'ajuugy m'amigüg, ni mmidijc comeñiybi, ca' jécyity co nañ jadu'n xyhuoohuipy, e chi anajty jac mij yejc-huimbijty. ¹³ Co mxüduunipy, chi huoohuipy ayoobitijc, tzaachijäy ajcxy, tecymätpi ajcxy, etz jäy huiintzpi. ¹⁴ Huin'it miich mjetcuyc'adipy co yi' ajcxy ca' jadipy nej yejc-huimbidipy. Jiini Dios xymigüedipy co anajty yajjugypicy je tudägypi jäy ajcxy.

Je ijxpejt ma tüg adzoo'ájtín mijpi

¹⁵ Tüg jäy huidi anajty iñayb miid Jesús ma caybejt huinduu co midooy nej Jesús ymíñañ, chi nimay Jesús:

—Jotcuyc je jäy ajcxy huidi cayip jiiy ma Dios y'ane'my.

¹⁶ Chi Jesús y'adzooy:

—Tüg jäy may anajty jäy yaj'adzu'adañ, chi jayijpni oy mayjäy nimay co anajty yaj'adzu'adañ. ¹⁷ Co je adzoo'íbi paty, chi quejxy tüg cogapxy huen nicxy huogixy je tiibi anajty ajcxy yajnimäy, nimay ajcxy: “Jámgiç, ti jim yajni'ixiy je caayin uucin.” ¹⁸ Chi ajcxy nidüg'ócay ymíñandacy: “Tun may'ajt meecxcich, ca' y'oyiy nej nyajnícxibich.” Chi je' jayijp jäy y'adzoy: “Ti njuyich tüg rancho je' copicy jayijp nicxy n'ixyich, paady ca' nicxañich; tun may'ajt meecxcich.” ¹⁹ Chi jadüg jäy ymíñañ: “Ti njuyich migoox par huaj yuubi, nicxy n'oc'ijxmadzañich jayijp, paady ca' y'oyiy nej nícxibyich, tun may'ajt meecxcich.” ²⁰ Chi jadüg jäy ymíñañ: “Tim chamni nbicyich, paady ca' oyiy nej nícxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy

ajcxy y'adzooy huiidi anajty oy ti huoy. Huin'it je huindzin ooy yjotmätcoty, chi nimay je ytumbi: "Nícx tzojcyi cajpjoty ma yi jáy ajcxy yöygixy ñajxcixy etz ma yi mij tü, e chi huomiinipy pin mdimypaatyp ayooobitijc, yi tzaachijäy etz huiintzpi." ²² Chi je' ytumbi ymínañ: "Huindzin, ti nduñich jadu'n nej ti xyñimäyich, etz jac chiini ññaybejt." ²³ Chi je huindzin nimay je' ytumbi: "Nícx ma yi mij nñ mij tü yajmin je jáy ajcxy adzip, huen ñich ndijc uch. ²⁴ Chi ñich miich nimäy co ni tüg yi jáy ajcxy huiidi jayijp yajnimay, ca' ajcxy y'adzuu'adipy miid ñich."

Nej ooy chípity co Cristo nbanicxim

²⁵ Chi may anajty jáy ñícx mñid Jesús, chi Jesús yhuäc-huimbijty, nimay ajcxy:

²⁶ —Pen ji pin xypamiñich, e ooy nñgi tzocy yi' ytaj yteedy, yi' ytöxyijc, yi' y'ung, y'ajch o chi', etz nañ ooy nñgi tzocy yi' yjugy'ájtín, ca' ñich yi' huaad ndiscípulo'adyiijich. ²⁷ Yi jáy ajcxy huiidi xypamiimbich huiidi ñich ndiscípulo'adaanip, copicy yajnaxipy ajcxy ayo'n, jadu'n nipaady nejjiñuñ ycrudtz ti cabíccixy e nícx yajcrudtzpeda'ñyí. ²⁸ Co miich ajcxy mmijtijc mgoja'ñ, chi miich ajcxy jayijp m'ixtaaccixy e m'a'ixiyyigixy jadu'ñyi meeñydunaangixy, nej pen miid ajcxy huiidi jébi miid myajmaaygixy je mmijtijc, o peni ca'. ²⁹ Ca' yjécyity co anajty je tijc ti yajpojtzigy, chi anajty ca' m'ocajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jáy ajcxy ymína'nip: "Jadayaabi yéydijc nígoo ti yajtzondägy tijc poch, e ca' ti ocyajmaayñi." ³¹ O huiidi rey ji co chona'ñ tziptumbi miid huingbi rey, ¿ca' jayijp huinmayipy pen jébi chiptuñ miid majc mil jáy, pen je ymidzip miimb miid iipx mil jáy? ³² Ca' yjécyity co je tügpi rey jiguemni anajty miiñ, chi quexipy tüg huingapxpi pijctzohuipy may'ajt ca'ydí yi tzip yjadyí. ³³ Hueñypínity ma miich ajcxy pen ca' m'ixmájtzcixy tüg'óciy tijaty miich ajcxy mmñid, ca' ñich yi' huaad ndiscípulo'adyí.

Co je caan ytamtz'ajt ytigooyñi

³⁴ Yi caan ooy yi' y'óyity pen ymñid ytamtz'ájtín. Co je caan ytigoy ytamtz'ájtín ca' ji ni ti xücx'ájtín yegipy. ³⁵ Yi caan huiidi ti ytigoy ytamtz'ájtín ni ca' y'oybidägnity ma je naax, ni ma je püx huiidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcujtpidijc etz pocyjäydijc nimijhuägtay ajcxy Jesús tzach'amídooidaani ajcxy je' y'ayuc. ² Chi ajcxy huiidi ooy tzachmijpidägy judíojäy ytiy'ajt etz huiidi ajcxy yaj'ixpijc Dios ñecy ameech nigapxcixy ni'ojiiygixy je Jesús, chi ajcxy ymínañ:

—Yi Jesús pocyjäydijc ajcxy ymígüg'ajtpy, e yi' miid ycaaygixy.

³⁻⁴ Chi Jesús jadayaabi ayuc ajcxy yajnimay:

—Huiidi jáy ji ma miich ajcxy pen ymñid migo'px cöbixy co ytigoy nidügti, ¿nej ca' yajhui'mipy je mada'px majmox mídaaxpi jim ma chinaaydac, chi nícx ixtäy huiidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcuyc. ⁶ Co yajjädip ma ytiyc, chi huomucy ymígügtijc etz ymijjin ymidijc, nimähuipy ajcxy: "Jotcugiiygix miid ñich, ti ñich ngöbixy nbaady huiidi anajty ti ytigooy." ⁷ ñich miich ajcxy nimaayb co nañ jadu'n tzejpjoty ooy jotcuyc'ájtín nñgi miid co tüg pocyjäy yjothuimbity, ca'ydí miid mada'px majmox madaax tudägypi jáy huiidi ca' ytundigoy.

Ijxpejt ma je meeñ huidibi tigoy

⁸ Chi Jesús yjacmínañ:

—¿Huiidi töxyjäy ji pen ymñid majc ymeeñ, co ytigooy tüg meeñ, nej ca' jin nöctzohuipy, e ytiñihuipy pedigpi ixtähuipy ymeeñ oñydägy ixti cooni paadipy? ⁹ Co paady, chi huomucy

ymigügtijc etz ymijün ymidijc, e chi nimähuipy: “Xondaaccix müd ich, ti ich nmeen nbaty huidibi ich anajty ti nyajtigoy.” ¹⁰ Jadu'n ich miich ajcxy nimäy co nañ jadu'n Dios y'ángeles ajcxy ooy yjotcúcity co yjothuimbity tüg pocyjäy.

Ijxpejt ma je ung huidibi ymeen yajticxtay

¹¹ Nañ jadu'n Jesús yjacminañ:

—Tüg yëydijc ymüd anajty metz ymang. ¹² Chi je jacmutzpi nimay yteedy: “Tat, mooygich yi pidägy huidi xypaatpich.” Chi je' yteedy je pidägy yajhuäcxy. ¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huidi yi yjé'ajtpy, chi choon ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymüd. ¹⁴ Co anajty ymeen tüg'óciy yajtundäy, chi miiñ tüg mij yuu ma je cajp. Chi ooy je mang mutzpi caayin uucin huit meen jayajmayajtni. ¹⁵ Chi je' ninicxy tüg jäy ma je jimbi naaxjot ymidunañ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii müd je pëtztiim huidi anajty idzim y'ojcxy. Chi ni pin anajty ni ti ycamöy. ¹⁷ Co yhuinmañ yajmejch, chi yminañ ma yjot yhuinmañ: “Jim janch maytumbi ma ich ndeedy ytijc, ymüd ajcxy jicxy picy janch may'amy. Ich ya tzach'ayoob müd yuu xii. ¹⁸ Tzonaambich ya, nicxa'ñich ma ich ndeedy, nimähuibich: Tat, ti ndundigóyich müd Dios tzajpjotypi etz müd miich. ¹⁹ Cham ca' ypadyii miich minañ co miich xy'ung'adyijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jeguëgyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jipcobadiy. Chi yögminennajxy etz tzücxy. ²¹ Chi je ung yminañ: “Tat, ti ndundigooyich müd Dios tzajpjotypi etz müd miich. Cham ca' ypadyii nicxy miich minañ co ich miich xy'ung'adyii.” ²² Chi je ungdeedy nimay je' ytumbi: “Yajpidzim je huit oybi, mic'amy yajnñeniygix jada n'ungich, chi mooygix yi cjiitz etz ycig. ²³ Nicx yajtzoongix yi huaj mang nicxpi, yaj'öccix, chi ngaayim n'uucim e nxiduunim. ²⁴ Jada n'ungich jadu'n nipaady nejjiñiñ anajty ti y'ögy, e chi ti yjugypicy. Tigooy yi' anajty e ti yjady.” Chi ajcxy ooy yjotcugiiy.

²⁵ Chi je ymang mijpi camjoty je' anajty. Co yja'ty mihuingon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' túnip jajtíp?” ²⁷ Chi je tumbi y'adzooy: “Ti yjady m'uch, ti mdeedy yaj'ögy tüg huaj nicxpi, co ymang ti huimbity juugy.” ²⁸ Chi je ungoob ooy yjotmäty, ca' anajty ytiñhuañ tigoty. Huin'it je yteedy ñibidzimi, ycohuanii co huen tigiy tigoty. ²⁹ Chi je' y'adzooy, nimay yteedy: “Janch micanaag jimijt ich miich müd nduñ, ni ca' ngapxhuimbityich. Ca' chambaad miich ni xycamooyich tüg pi'ccöbixy jaydeb njotcuyc'adipyich nxiduunipyich müd nmigügtijc. ³⁰ Per co yi mmang ti yjady huidi oy ti yajtundäy yi ymeen müd jibic-huinmañ müd jibic töxyjäydijc ajcxy, chi ti myaj'ögy huaj mang nicxpi müd yi' ycixpi.” ³¹ Chi je ungdeedy nimay je' ymang: “Miich ung huinixi ya müd n'ity. Tüg'óciy huidi nmüdich miich yi' mje'. ³² Ooy ycopicyity co nxiduunim etz njotcugiiy, co yi m'uch jadu'n anajty nej ti y'ögni, e jadachambi ti yjugypicy, ti anajty ytigoy, e cham ti yajpaady.”

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscipulos:

—Jim anajty tügjäy comeñybi, ymüd tüg ytumbi huidi yi' ypidägy cuend'ajtpi. Chi oy nimäy co tüg je ytumbi nigoo anajty tzachyajtuñ je meen ma ycapaadyii. ² Chi je huindzin oy yajhuoyii je' ytumbi, chi nimay: “¿Nej jada co ich jadu'n nimäyijich müd miich ycixpi? Ya yi cuenti cimoydaaygich nej ti mduñ, etz ca' ich miich n'ocjactumbi'adaañin.” ³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzimañich ma yi ytung. Juttajii ca' njatyich, co limosna nbijctzohuipyich tzöydümbich. ⁴ Nejhuibich ti ndunipich jaydeb jäy ajcxy xycöbigipyich

ma ajcxy ytiyc.” ⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñi miich minuucxy'adyii ich nhuindzin?” ⁶ Chi je' y'adzooy: “Migo'px garafón aceite.” Chi nimay: “Matz mnecy, iña' mic'amy, e cojayi' huixchiguipxmajc.” ⁷ Chi jadüg nimay: “¿Miich jadu'ñi mminuucxy'adyii?” Chi je' y'adzooy: “Migo'px quipxi'ñ trigo.” Chi nimay: “Matz mnecy, cojayi' mida'px.” ⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäj huidi ca' mibicy Dios, ñgi ajcxy ypëgyity mïd yhuinma'ñ, ca'ydi yi jäy ajcxy huidi huinjihuñyb Dios ytiy'ajt.

⁹ Ich miich ajcxy yam nimaayb migüg'ájtigixy yi jäy ajcxy mïd yi meen huidibi ca' ytimytiyity, jigix co je meen anajty myajmayajtcixy ji pin miich ajcxy xycöbigip ma jugy'ajttac huinixibi.

¹⁰ Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min. ¹¹ Pen ca' majtcixy nej mgüend'ájtixipy yi jugy'ájtín huidibi ya naaxhuiñ yajpatp, ¿pin miich ajcxy m'ocyajmihui'mamy je jugy'ájtín je riqueza oybi janchypi? ¹² Pen ca' majtcixy nej mgüend'ájtixipy tiibi mihui'mgixy huidi huingjäy yje'ajtpy, ¿pin miich ajcxy xymöhuip huidibi ajcxy yje'ajtpy?

¹³ Ni tüg tumbi ca' jëbi ytuñ mïd metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägy Dios etz nañ jadu'n mijpidägy yi comeen'ájtín.

¹⁴ Nañ jadu'n mïdooy jada ayuc yi fariseojäy ajcxy, com ooy anajty ajcxy meen adzóccixy. Chi ajcxy ooy nixiici yajxiici Jesús y'ayuc. ¹⁵ Chi Jesús yminañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjihuñy ajcxy ooy m'oyjäyity. Dios ñejhuñydaayb co miich ajcxy mïd jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ijxyp, Dios ca' yi' oy'ixy.

Je Dios ycötújcín etz je Dios y'ane'mdac

¹⁶ Chi Jesús yjacminañ:

—Je taabi je Juan anajty yjiijity, jii'ajtp anajty Moisés ycötújcín etz je y'ayucnajtcapxñybi ajcxy y'ixpíjcín. Huin'it tiempo etz ixti jadachambi jadu'n yajnajtzcapy je Dios y'ané'min, e mayjäy ooy ñaybidáacigixy co ytiñhuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuipy, pero je Dios ycuydundähuamy tüg'óciy jadu'n nej ñecy ymina'ñ. Ni tügi letra oy mabaad ymúdzity nicxy ycayajcuyduñ.

Jesús capxticxy nej ypöcyity co jäy ytöxyijc ixmach

¹⁸ Chi Jesús yjacminañ:

—Huenpinjäyity co ytöxyijc ixmach etz ypicy mïd huingbi töxyjäy, ooy anajty mij pocy tuñ. Nañ huenpinjäyity huidibi pijcp mïd je töxyjäy huidi ñäy ti y'ixmachyii, nañ mij anajty ypocytuñ.

Je comeñyjäy etz je Lázaro

¹⁹ Chi Jesús yjacminañ:

—Ji anajty tüg jäy comeñybi ñayxoxyii anajty janch ooy mïd oyjatypi huit, etz janch oy ycay y'ügy jabom jabom. ²⁰ Nañ ji anajty tüg ayoobi jäy huidi limosna pijctzoob, hue' anajty yxi Lázaro. Lázaro jabom jabom anajty ycögnäy ma je comeñyjäy ytiyc'aguu, janch nibuutzp anajty ooy. ²¹ Lázaro ooy anajty jani'ixy caya'ñ je cayduc tzütztuc huidibi cäb ma je comeñyjäy ycaybejt. Oy uc anajty ymiñ yhueyii je ñibüdz. ²² Chi jadu'n yjajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeñybi nañ jadu'n y'o'cni, e oy yajnaaxtigiyii.

²³ Chi je comeñybi jiihy ca'oydactuuby tzaachypi anajty jihuñy, chi mij'ijxy jigüegy

je Abraham etz je Lázaro. ²⁴ Chi je comeeñybi ycapxy janch mic, yminañ: “Apteedy Abraham, ich pa'ayoog. Tun may'ajt quex Lázaro, huen yi' ycihuax yajxoogy miid nii etz xyajtíztibich ndootz, co ich ooy ayo'n nbaadyich ma jada mij jin.” ²⁵ Chi Abraham y'adzooy: “Oc'ungich, ajihuñhuñ co ti mdzinäy ti mjugy'aty miid mhuit mmeeñ agujc jotcuyc, e yi Lázaro ooy ayo'n paty. Jadachambi Lázaro yjotcuyc'aty, etz miich jiiby mbatpy tzaachypi. ²⁶ E jadügnax, ji tüg mij huoc ma ich ajcxy etz miich ajcxy. Pen ich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ich nyajpaadyich.” ²⁷ Chi je comeeñybi jacnimay Abraham: “Apteedy Abraham, tun may'ajt quex yi Lázaro ma ich ndeedy ytijc. ²⁸ Jim ma ich ndeedy ytijc jim migoox miguëx nmídidyich, huen nicxy yajmídmíydaaccíxy, ca'ydí je' ajcxy nañ jadu'n ya minípy ma jada ayoodac.” ²⁹ Chi Abraham y'adzooy: “Yi' ajcxy ymídmí necy huidibi Moisés etz Dios y'ayucnajtzcaxíybi ycojaay, huen cuydungíxy.” ³⁰ Chi je comeeñybi yminañ: “Janch jadu'n apteedy Abraham. Pen nidüg yi ögpi ñicxy ma je' ajcxy, jothuimbídy yi ajcxy.” ³¹ Chi Abraham yminañ: “Pen ca' je' ajcxy mijpidägy Moisés y'ayuc je jécyp etz huidi ajcxy jecy'ajt Dios y'ayucnajtzcaxíy, nañ ni ca' mibíjccíxy pen nidüg ögpi yjugypícy.”

17

Huidibi ooy ycodzigíjity co n'agánáxim ma pocy

¹ Chi Jesús nimay yi' ydiscípulos:

—Janch tiy'ajt jadu'n co yminípy jäy ajcxy huidi yajhuinma'ñydgoyip yi mayjäy ajcxy miid aaní. ¡Ay yi' ayooob ajcxy! pinjaty jäy ajcxy yajhuinma'ñydgoyaangíxy. ² Nígi y'óyity co íxyipy yajyo'cxodzíyí tüg tzaa janch mijpi, e chi yajcöjibípnaxípy mejyjoty, ca'ydí co yajhuinma'ñydgoyípy jada jäy ajcxy huidibi íxpíjcin hueení miid ma Dios ytiy'ajt. ³ Naygüend'ájtígíx miich ajcxy co ca' mgapxtígóoygíxy.

Co m'uch xymidundígooyípy, e chi mgapxhuíjip, e pen jothuimbíjty, chi mbocymeecípy. ⁴ Pen m'uch huixtújc'oc xymidundígooy tüg xíibi, nañ huixtújc'oc xyñimíñ tüg xíibi, e ymina'nípy: “Ti njothuimbítyich”, huinmeecípy miich yi', chi jada' miich huixtújc'oc mbocymeecípy.

Je mibíjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ich ajcxy nmibíjcin.

⁶ Chi je Huindzin Jesús y'adzooy:

—Co íxyipy miich ajcxy mmibícy Dios jadu'n nej tüg pi'c mostaza pajc, e mníma' íxyipy jada paadzím quipy: “Nayyajpidígi, nicx tina' mejyjoty, e xycapxymídohuip yi'.”

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymídmí tüg ytumbi huidi tumb ñaaxjidzitzí o yhuaj cuend'aty, co yja'ty ma mdíj, ¿nej jébi nimay: “Tígi', íxtäg ma mesa etz adzu'at?”

⁸ Hue' janchtiy mnímáhuípy: “Yaj'oyíyígíx n'adzúu'íbi, co'amedí' mhuit, e xymooygíx ngaayín n'uucín. E huin'it miich mgayípy m'ügípy.” ⁹ ¿Nej yajnaxípy je' Dioscojuyip miid co je' anajty ti tuñ huidibi yaj'ane'my? Ich minamb co ca'. ¹⁰ Nañ jadu'n miich ajcxy co ti mguydungíxy tüg'óciy tíbi Dios xyaj'ane'mgíxy, chi mmináangíxy: “Je' ich ajcxy je tumbi huidibi ca'p ycapxpaadyity, jéyi ti ndúngíxich huidibi ich ajcxy huaad ndungíxy.”

Jesús yajtzögy majc jäy jibic pützpa'mmídpi

¹¹ Nicxp jim Jerusalén anajty Jesús, chi ñaxíy ma Samaria etz Galilea ñaymidziba'n'ájtígíxy. ¹² Co anajty mihuingoñ tüg cajp, chi jipcoyöyíy majc jäy pützpa'mmídpi. Chi ajcxy yhuäcxípy jiguëgyñi. ¹³ Chi ajcxy mic ycapxcoody yminaangíxy:

—Huindzin Jesús, pa'ayoog ñich ajcxy.

¹⁴ Co Jesús je' ajcxy ijxy, chi nimay ajcxy:

—Nícx nayguëxícigix ma yi teedy ajcxy.

Chi jadu'n yjajti, co ajcxy ñícx, chi tüyöyjoty oy chooccixy. ¹⁵ Nidügti je' ajcxy co ñay'ijxi co ti anajty chögy, chi nihuimbijty Jesús, ooy Dios jäyme ch cömay janch cixyot huinijot.

¹⁶ Chi je' ycojxtinay'ahuüy ma Jesús ytecymijc, chi pidacpy yhuiñyjip naaxcíxy yajnaxy Dioscojuyipy. Samaritanojäy je' anajty. ¹⁷ Chi Jesús yminañ:

—¿Nej ca' nimajc miich ajcxy huidi ti mdzooccixy? ¿Ma ajcxy je' janidaxtujcpi? ¹⁸ ¿Nej ca' pin jac yhuimbijty miiñ jäymedza'ñ cömayañ Dios, jëyi tügpajc ti yhuimbity jada samaritanojäy?

¹⁹ Chi Jesús nimay je jäy:

—Pidäg, nicxni. Yi mmibíjcin ti xyajtzögy.

Nej je' yminipy Dios y'ané'min

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'min ca' je' yminipy jadu'n nej ti yaj'ixy o yajmidoy. ²¹ Ni mgamináangixipy co cha je' o jim'amy je'. Dios y'ané'min ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamíid'idáangixich tüg xii, e ca' ñich miich ajcxy xy'ixipy, ñich je jäy huidi tzoön tzajpjoty. ²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, ñich, je jäy huidi tzoön tzajpjoty, co ñich anajty nmimiñ n'ané'min, jadu'n je' yjadipy nej huidzuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopícyty co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty ñich, je jäy huidi tzoön tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigüy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytiijcojciy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa miiid conhuidity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadiyb ayo'n co anajty nmiñich jadüg'oc ya naaxhuiñ, ñich je jäy huidi tzoön tzajpjoty.

³¹ Je huin'it xii huin'it tiempo pin anajty iñaayb ma ytiijccop, e ymiid anajty ypidägy jii by tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytiic. ³² Ajihuüygix jadu'n nej Lot ytöxyijc ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (miiid ñich ycixpi), hue' je' yjugy'ajt ypaadipy chögipy.

³⁴ ñich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'müyb. ³⁵ Nimetz töxyjäy anajty yjiitzciy, tüg yajnicxiyb, etz jadüg yajhui'müyb. ³⁶ Nimetz yëydijc anajty ytungixy camjoty, tüg yajnicxiyb etz jadüg yajhui'müyb.

³⁷ Chi je jäy ajcxy huidi ixpijcp Jesús y'ayuc yminañ ajcxy:

—¿Ma jadu'n yjadiyb nej miich ti mina'ñ, Huindzin?

Chi Jesús yminañ:

—Ma anajty je ögpi yajpaady, jim yi luud ajcxy ñümuga'ñ.

18

Je ijxpejt ma je ayoobitöxyjäy etz je juez

¹ Chi Jesús yajnimay ajcxy tüg ayuc huindijaty ixiijcp ma yi' co ooy ycopícyity Dios nmibijctzoohuim jabom jabom, ni ca' nmidziipim. ² Chi Jesús yminañ:

—Ji anajty tüg juez ma tüg cajp, ni Dios anajty ca' tzigíy, etz ni jäy ajcxy anajty ca' huindzigíy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadojic ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, yminañ jotjoty huinma'ñyoty: “Oy Dios ca' ndzigíyich, ni jäy ca' nhuindzigíyich, per com jada co'ögytöxyjäy nīgi xychach'amayíyich, miñ n'ocnihua'ñich, ca'ydi jadüg'oc ymiñ e xyajcijxich anajty nmecxtújcín.”

⁶ Chi je Huindzin Jesús yminañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibyyi. ⁷ ¿Nej ca' Dios ñihuaanip yi' huindibi ti huin'ixy, huindibi mibijctzoob xim tzuum? ¿Huäcxibip, nicx ca' tzojc adzooyi? ⁸ Ich miich ajcxy nimaayb co Dios ñihuänamy mic'amy yi' yjäy. Co anajty nhuimbity ya naaxhuiñ, ich, je jäy huindi tsoon tzajpjoty, ¿nej nbáadibich mibijcin ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huindi ci'm ooy ñaygömayyii co ooy y'oyjäyity, etz pejxy yi' jacjadyiibi jäy ajcxy, chi yajnimay ajcxy tüg jihuimbity ayuc:

¹⁰ —Mejtz jäy ajcxy ytigíy ma Dios ytijc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuiy ycapxtägy, chachmina'ñ jadu'n: “Dios Teedy, Dioscojuyip yajnaxpich com co ca' ich nbocytuñich jadu'n nej jacjadyiibi jäy ypocytünngixy, ca' nmeechich, ca' njibicjäyidyich, ca' nmigapxich huingjäy ytöxyijc, ca' nbocytuñich jadu'n nej jada yajcogüejtpi. ¹² Mejtz xi' n'ityich jaygay tügpí se-maan. Chi huen ytim ti nmüidich ngüejtpyich ma Dios majcjaty.” ¹³ Per je yajcogüejtpi jiguem ytinay'ahuiy, ni ycapät'ixy tzajpcijx, jëyi ycaachtzachcoxy ymina'ñ: “Dios Teedy, pa'ayoogich, ich pocyjäyich.” ¹⁴ Ich miich ajcxy nimaayb co jada yajcogüejtpi y'idacy ma ytijc ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huindi ci'm naygömayipy, Dios yajtzöydunib; e pinjaty ca' ñaygömayyii ci'm, Dios ycömayib.

Jesús conucxy je pi'ctijc ajcxy

¹⁵ Chi jäy ajcxy müidmiñ pi'c'anäg ma Jesús huen nidoñy. Co je' ydiscípulos ajcxy ijxy, chi ajcxy ogy ungday. ¹⁶ Chi Jesús yaaxi ymügütiyc nimay ajcxy:

—Ixmatz, huen yi' pi'ctijc xyñimiñich, ca' ajcxy mijpcogapxiygixy, com yi' jäy ajcxy huindibi yajpatp ma Dios y'ané'min, jadu'n ajcxy nipaady nej pi'ctijc. ¹⁷ Janch ich miich ajcxy nimäy co hueñpínity huindi ca' cöbijci yi' Dios y'ayuc ytiy'ajt jadu'n nej yi' pi'ctijc ajcxy cöbijcy Dios y'ayuc ytiy'ajt, ca' yi' ajcxy ytiğihiipy ma Dios y'ané'min.

Tüg comeen'anäg ymüydägy müid Jesús

¹⁸ Chi tüg micjäy y'amidooy Jesús, nimay:

—Miich oyjäybi Huindzin, ¿ti huaad nduñich co ich n'alma nidoocin paadipy?

¹⁹ Chi Jesús y'adzooy:

—¿Nej co xytíjich oyjäy? Ni pin ya yca'oyjäyity, je'yi Dios tügpajc y'oyjäyity. ²⁰ Miich mnejhuiyb yi' Dios ycötújcín. Ca' mmigapxtigoyipy huingbi töxyjäy, ca' jäyyaj'ögipy, ca' mmeedzip, ca' mmigüg nihuambedipy, yajmij'at mdaj mdeedy.

²¹ Chi je' y'adzooy:

—Ti tüg'öciy nguydundäyich jada cötújcín maabi nyeecpidzimyich.

²² Co Jesús jadu'n midooy, chi nimay:

—Tigoy'ijtni ja tög huidi ca' mduñi. Toocta' tög'óciy tijaty miich miid, e mo' je meen ayoobtijc, huin'it mgomeen'adipy jiiby tzejpjoty; miin, e pajamgich.

²³ Co je comeen'bybi jadu'n ayuc midoy, chi ooy yjottigoygoty com ooy anajty ycomeen'ity. ²⁴ Co Jesús ijxy co je comeen'bybi anajty ti yjotmaybicy, chi minañ:

—Ooy chachchípity ytigihuipy tög comeen'jyay ma Dios y'ané'min. ²⁵ Jac ca' chípity co ñaxipy tög camello ma yi xu'ñ yxútity, ca'ydí co tög comeen'jyay ytigihuipy ma Dios y'ané'min.

²⁶ Chi je jay ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jébi y'alma paadipy nidzoocin?

²⁷ Chi Jesús y'adzooy:

—Huidibi naaxhuiñjyay ajcxy ca' jaty nej yaj'oyihuipy, Dios jébi yaj'oyi.

²⁸ Chi Pedro yminañ:

—Ich ajcxy ti nbidägy n'ixmajtzaaygixy, co nbanicxaangixy.

²⁹⁻³⁰ Chi Jesús y'adzooy:

—Janch ich miich ajcxy nnimaaygixy co yi jay ajcxy huidi ytiyc ixmajtz etz ytaj yteedy, ymiguex, etz y'ung y'anäg miid Dios y'ané'min ycixpi, ypáadipy ajcxy ya naaxhuiñ nigi oy'ajtin, etz ypaadipy ajcxy tzejpjoty tzinaayin huidi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tög'óciy jadu'n nej yi Dios y'ayucnajtzcaxiibi ajcxy jaybejty jecy'ajty miid ich ycixpi, ich, je jay huidi tsoon tzejpjoty. ³² Chi nyajciyega'ñich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyijptzújibich ajcxy. ³³ Xychaachytunipyich ajcxy, xyaj'ögibich ajcxy, e codugüg xii njugypigipyich jadüg'oc.

³⁴ Chi yi majmetzpi ajcxy ni jadu'ñyi ca' huinjihuüy ajcxy nej yhuimbidzimy Jesús y'ayuc. Yüch anajty jada ayuc miid yi' ajcxy ycixpi, paady ca' huinjihuüy nej anajty yajnimaaaygixy.

Jesús yajhuindicxigy tög huintzpi jim Jericó

³⁵ Chi jadu'n yjati co Jesús mihuingoñ je cajp huidi yxi Jericó, chi tög huintzpi anajty iñay tüba'áy pijctzoy anajty limosna. ³⁶ Co midooy mayjyay ñaxy, chi je' yajtiy:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, ich pa'ayoog.

³⁹ Je jay ajcxy huidi anajty jayijp nicxp ooy ogy je huintzpi, nimay co huen amoñ. E je' nigi mic yminan'idich:

—David y'ap y'oc, ich pa'ayoog.

⁴⁰ Chi Jesús ytinayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxíccich.

⁴² Chi Jesús minañ:

—Huindicxig, yi mmibíjcín ti xyajtzögy.

⁴³ Chi je huintzpi mic'amy yhuin y'ixxigy, chi panicxy Jesús, chi ooy jäymejch cömay yi Dios. Cham tög'óciy je cajp jay co ajcxy jadu'n ijxy, nañ ycömay yjäymejtz yi ajcxy Dios.

¹ Co Jesús ytiŋy jím Jericó, ñajxy cajpcujc anajty. ² Chi jadu'n yjajty jím anajty tüg jáy hue' anajty yxii Zaqueo. Hue' je' anajty yajcogüejtpi huindzin, e comeen anajty. ³ Ooy yí' anajty tzach'ixa'ñ Jesús, nejhuíhua'ñ pín jáy je', chi ca' jajty nej ixipy, je' co anajty ñaxity, etz co anajty ooy mayjáy jím. ⁴ Chi je' ñicxy poyigy jayijp, chi ypejty ma tüg sicómoro quipy, yco'ijxnaxa'ñ co anajty Jesús jím ñaxy. ⁵ Co Jesús jím ymejch, chi pát'ijxy je Zaqueo, e ñimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcujc cöbijcy Jesús. ⁷ Co jadu'n ijxy, chi je mayjáy ajcxy nigapxy ni'ojyigyxy Jesús, yminaangixy:

—Ti ñicxy jättacpi ma tüg pocyjáy ytijc.

⁸ Chi Zaqueo ytinayigy, ñimay Jesús:

—Huindzin Jesús, cha je' je njugy'ajtich huídi cup nbijc-huäcxaamyich nmöhua'ñich ayoobitijc. Pen ti ñich nyajcuetnaxy, nyajhuimbidityich mídaax jadu'ñyi.

⁹ Chi Jesús yminañ:

—Jadachambi jada jáy ma jadayaabi tijc ti y'alma ñidzögy, com co yí' nañ jadu'n Abraham y'ap'adyii y'oc'adyii. ¹⁰ ñich, je jáy huídi tzoon tzajpjoty, ti nmüñich ya naaxhuiñ co n'ixtähuibich etz nyajnidzögibich tiibi anajty ytigooy.

Je ijpajt ma je majci meen

¹¹ Co je jáy ajcxy midooy jadu'n, chi Jesús jacyajñimay ajcxy tüg ayuc, com ytimymihuingónip anajty Jerusalén, etz je jáy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús yminañ:

—Tüg micjáy, comeenýjáy anajty, ñicxy ma tüg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjáy mijhuooy nimajc ytumbi, chi moy ajcxy majc meen nidüg nidüg, chi ajcxy ñimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymígogajp ajcxy ca' anajty ixa'ñyii ajcxy je comeenýybi, chi ajcxy yajpaguejxy huingapxpi ma anajty je comeenýybi ñicxy, chi je huingapxpi yminañ: “Ca' ñich ajcxy ndzocy co jada comeenýjáy rey'adipy ma ñich ajcxy.”

¹⁵ Chi jadu'n yjajty co je comeenýjáy yhuimbijty ti anajty yreytigíy. Chi oy yajhuoyii je ytumbi ajcxy, je huídi anajty je meen ti yajmihui'mgixy, nejhuíhua'ñ anajty jadu'ñi ti yaj'ung'ajtcixy je meen nidüg nidüg. ¹⁶ Chi tüg jayijp ymiñ yminañ: “Huindzin, yí meen majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxycöbicy müd huídi hueeni, cham m'ané'mipy majc ciudad.” ¹⁸ Chi je mimetzpi ymiñ, yminañ: “Huindzin, yí mmeen migoox jadu'ñyi ti nyaj'ung'atyich.” ¹⁹ Chi je rey ñimay je mimetzpi: “Cham m'ane'mipy migoox ciudad.” ²⁰⁻²¹ Chi je midugigpi ymiñ, yminañ: “Huindzin, cha je mmeen huídi ti nmi'ityich, ti nyujpcicyich ma tüg paayi. Ndzigüybich miich co miich mjáy'aty ahua'ñ, myajpidigtáy huídi ca' mjé'adyii, nañ mdzijcpi huídi ca' ti mnípy.” ²² Chi je rey yminañ: “Miich jibic ti mduñ, cham ndiyduna'ñ müd mgi'm'ayuc ycixpi. Miich mnejhuib co nyajpidigyich huídi ca' njé'adyiijich, e ndzicyich huídi ca' ti nníbyich. ²³ ¿Nej co ca' ti mbidägy ñich mmeen ma je banco, jigix co ixipy nhuimbityich, may meen ixipy xycidigíyich müd meen'ung?” ²⁴ Chi je rey ñimay huídi anajty ajcxy jímip: “Pijci ajcxy yí ymeeñ, etz mooygixy yí tiibi meen yaj'ung'aty majc jadu'ñyi.” ²⁵ Chi je jáy ajcxy y'adzooy: “Huindzin, ymüd yí cham majc jadu'ñyi meen.” ²⁶ Chi je rey y'adzooy: “Ñich minaaam co tüg'óciy pinjaty müd, jacyajmöhup; e huídi ca' ti müdity, oy jamüdity yajpictähup huídi ymüd. ²⁷ Nañ jadu'n ajcxy je nmidzipich huídi ca' anajty tzojccixy co ñich nrey'adipyich ma yí ajcxy, yajmiingix ya, yo'cpujxtutaaygix ma ñich nhuinduu.”

Jesús ytiŋy Jerusalén

²⁸ Co Jesús jadu'n yminanday, chi choñ jím, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjajty co jím yja'ty mihuingon Betfagé etz Betania ma je cop huidi yxii Olivos, chi Jesús quejxy metz ydiscípulos, nimay ajcxy:

—Ñicxcix ma yijibi cajn huidi ji huingon. Co ajcxy mgajptugihuij mbáatcixipy tüg burro mang ycoxochity, huidi ca' ni pín yaj'ñaayñi. Mgoguejtútcixipy, etz mmimíngixipy. ³¹ Pen jím pín xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jím tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäy. ³³ Jím anajty ajcxy je burro mang coguejtuutcixy, co ñihuindzin ñimaayí ajcxy:

—¿Nej co yi burro mang mgoguejtuutcixy?

³⁴ Chi je' ajcxy y'adzooy:

—Je nhuindzinich jím tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ mäd yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügüj. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytigüy ajcxy ooy alabanza iibi Dios ojadajtpi mäd je mij huinma'ñ ycixpi co anajty ti ijxcixy huidi anajty Jesús ti tuñ. ³⁸ Chachmínaangixy:

—¡Capxpady je rey huidi miimb mäd Huindzin Dios yxii ycixpi! ¡Jotcujc'ajt jilby tzajpjoty etz cömáyin ma Dios!

³⁹ Huin'it nijējity fariseojäy huidi anajty ajcxy jilby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Ích miich ajcxy nimaayb pen yi' ajcxy amomb, yi tzaa tigihuij mic capxp.

⁴¹ Co Jesús yja'ty jím mihuingon Jerusalén cajn, e co ijxy, chi yaaxy mäd je cajnjäy ycixpi. ⁴² Chi Jesús ymíañ:

—¡Pen mhuinjihuüyby ixipy miich ajcxy nej mbáatcixipy mjetcujc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'íxcixy. ⁴³ Minip je xii je tiempo ma miich ajcxy je mmidzip ajcxy xyajjüdugipy mgajp mäd tzaamacxy, e tziptunipy ajcxy mäd miich, yajxon xyajco'adugipy ajcxy jühuidity ma je mgajp.

⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuüy je tiempo mña je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytigüy ma Dios ytijc yajpidzimday tüg'óciy jäy huidi anajty jilby ajuuyb adoocp. ⁴⁶ Chi Jesús nimay je jäy ajcxy:

—Jadu'n mña'ñ ma jaybétyity: “Ích ndijci tzajpcapxycapxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmädpi, etz huidi ajcxy yaj'ixpijcp anajty Dios ñecy, etz mijjäydijc ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'ñybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcín

¹ Chi jadu'n yjajty tüg xii anajty Jesús yaj'ixpijcy je cajnjäy ma Dios ytijc, capxhuäcxy anajty oybi ayuc. Chi ñimiini je teedy tungmädpi ajcxy etz huidi ajcxy yaj'ixpijc Dios ñecy etz mijjäydijc ajcxy. ² Chi ajcxy migapxy Jesús nimay:

—Yajnimaaaygich, ¿ma cötújcín ti mbaady co jäy myaj'ixpijcy ya ma Dios ytijc? ¿Pín je' tiibi xycötujc möy?

³ Chi Jesús y'adzooy:

—Íich nañ jadu'n nyaj'amídohuamy íich miich ajcxy tüg ayuc, e m'adzóogixip. ⁴ Co Juan (je Bautista) jáy yajniibejty, ¿pín je' cötújcin moy, je Dios tzajpjotypi o jáy ajcxy?

⁵ Chi ajcxy ytigíy huinmay'ahuidijtpi ñayñimáayigixy miñ xyipy:

—Pen minaaním co tzajpjoty choñ je Juan ycötújcin, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶ Pen minaaním ajt co jáy cötújcin moy je Juan, chi tüg'óciy cajpjáy tzojc xycögädzim, com ymibijcxy ajcxy co yi Juan, Dios yi' y'ayucnajtzcaxíybi.

⁷ Chi ajcxy y'adzooy co ca' ajcxy nejhuíygixy pín Juan ti quexyii. ⁸ Chi Jesús nimay je' ajcxy:

—Íich nañ jadu'n ca' nigapxa'ñich pín ti xycötujcmöyich.

Je íjxpejt ma je tumbidijc ajcxy jibicjáybi

⁹ Chi Jesús yminandacy yajnimay tüg'óciy je jáy ajcxy tüg ayuc, ymínañ:

—Tüg jáy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen címöyíi huidibi je' anajty paatip. Chi je ytumbidijc huinhuoipy jiphuoipy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'ojy jip'ojy ajcxy, yajhuimbijty ajcxy, ca' ajcxy ni ti mooy. ¹² Chi midugügpí ytumbi quejxy, nañ jadu'n ajcxy je' yajtzaachíy etz yajhuimbijty ajcxy.

¹³ Huin'it je camuuxycam huindzin ymínañ: “¿Ti ndunipyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adípy ajcxy.” ¹⁴ Chi je ytumbidijc co ajcxy íjxy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymíñ je cogam ymang, yi' je' jada cam jédaanip. Tzoc yaj'o'cim jigix íich ajt jada cam njé'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy miid huingbi tumbi.

Co je jáy ajcxy jadu'n midoy, chi ajcxy ymínañ:

—Ni catzogipy Dios, nícxy jadu'n njajtim.

¹⁷ Chi Jesús huindicxpejty je mayjáy nimay ajcxy:

—¿Ti tijamy huidi yjaybétyip ma Dios ñecy?

Jadu'n:

Je yëydijc huidi je jáy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejihuíy je tzaa oyjatypi huidibi je pojtzpidijc ajcxy ca' yajtuna'ñ, je' oy ti yhuimni ma anajty yjaccopícyity.

¹⁸ Pínjaty ca' cöbiga'ñ jada mij'ane'mbi, ayo'n ypadamy, tim jadu'n nipaady nejihuíy jim yciyxciday ma je tzaa nícx e tijhuítz yjajtáhuipy; e pen je tzaa nigídagoty, je' ajcxy janch jaam püx nícxy yjajtcíxy.

Yajnidíygixy pen jébi cogüéjtin yajyecy o pen ca'

¹⁹ Je teedy tungmídpí etz huidi ajcxy yaj'ixpijc Dios ñecy ooy anajty nihuinmayíygixy madzaangixy je Jesús mic'amy, co ajcxy huinjihuíy co Jesús nimíydáacigixy miid je jihuimbit ayuc, e chigíyib anajty ajcxy je cajp jáy. ²⁰ Chi ajcxy chachhuinma'ñ'ixtaaygixy nej huaad xígixy Jesús, chi quejxy ajcxy íjx'ijtpi ma Jesús yajpaady huidi naybidaacip janch ypaat tudägyjäy; chi amídoó'íjtcíxy Jesús y'ayuc huidi miid xíhuaangixy, chi cíyegaangixy ma je gobernador. ²¹ Chi je íjx'ijtpi ajcxy y'amidooy Jesús nimay ajcxy:

—Huindzin, nejhuíyb íich ajcxy co miich m'ayuc ooy y'óyity, etz myaj'ixpícy yajxon, ca' huin'ixpety jáy myaj'ixpícy, etz myaj'ixpícy Dios ytiy'ajt nej jáy jébi huaad chinaaygixy.

²² ¿Nej copícy íich ajcxy migüedipy je César je romanojáy mij'ane'mbi, o ca'íji?

²³ Chi Jesús huinjihuïy yi' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich? ²⁴ Yaj'ijxcich tüg meen. ¿Pin y'ahuinax etz pin yxi mimb ma jada meen?

Chi ajcxy y'adzooy:

—Yi César.

²⁵ Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶ Ca' mimadacy ajcxy nej tzu'ijxcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

Yajnidüygixy je jugy'ájtín ycixpi

²⁷ Chi ñija'tti Jesús tüg saduceojäy, e yi saduceojäy ajcxy yminañ co jäy ögy ca' y'ocjuycni. Chi je' yajtiy:

²⁸ —Huindzin, Moisés jaybety ma yi' ñecy, je jécyp, co tüg yëydijc ytöxyijc ya-jhui'my ix'ögp, e ca' ymang ti paatcixy. Jëbi je yëydijc y'uch müdtzinäy je töxyjäy jaydëbi yaj'ung'ixip müd y'ajch ycixpi. ²⁹ Jadu'n anajty tügpicy jäy, nihiuxtujc ajcxy ytügquëx'ájtixy, ac yëydijc ajcxy. Je mijpi müdtzinay töxyjäy, chi ix'o'cy, e ca' ymang paty.

³⁰ Chi je mimetzpi ypicy müd je töxyjäy, e ni ca' ajcxy ung paty. ³¹ Chi je midugügpí ypicy müd je töxyjäy, e jadu'n je nihiuxtujcpi müdtzinay ajcxy je töxyjäy, ix'o'cy ajcxy, ni ca' ajcxy ung paty. ³² Chi nañ jadu'n je töxyjäy y'ögni. ³³ Co anajty je nihiuxtujcpi jugypijccixy, ¿huidi jada' octöxijc'adüyb je töxyjäy? Com nihiuxtujc ajcxy ti töxyijc'ájtigixy.

³⁴ Chi Jesús y'adzooy:

—Jadachambi jäy pijccixp, ñaymooyigixy y'ung huen pijccixy. ³⁵ Je jäy ajcxy huidibi paatip anajty chinähuiip ma je tiempo huidi mimb co ögpí yjugypijccixipy, ni ca' ajcxy ypigipy, ni ca' ajcxy ñaymóoyigixipy y'ung huen pijccixy. ³⁶ Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy müd je ángeles ajcxy, e Dios yi' ajcxy ung'adüib co yjugypigipy müd jemybi jugy'ájtín. ³⁷ Janch co yi' ögpí yjugypigipy, jëbi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “Iich Abraham yDios, Isaac yDios, Jacob yDios.” ³⁸ Je ögpí ca' müdity Dios. Je jäy ajcxy huidi juugyp janchtiy ajcxy ymüid Dios, com co müd Dios ycixpi tüg'óciy jäy ajcxy ymüid yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je'y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mina'ñ co Cristo David y'ap y'oc? ⁴² David ci'm mina'ñ ma je Salmo necy:

Yi Huindzin Dios nimay ich nHuindzin: “Iña' ya a'oy'amy ma ich.

⁴³ Ixti cooni anajty miich mmidzip ti nmimadactäyich, jadu'n nej jihuïy ti nbidägyich yi mmidzip ma miich mdécypocxpejt.”

⁴⁴ Co David yximoy Cristo ich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix müd yi' escribas ajcxy ydiscípulos, co ajcxy ooy tzojccixy yhuididaangixy müd yhuít oyjatypi, ooy ajcxy tzojccixy co huen capxpocxyii ma jäy y'amugiy, e ooy ajcxy tzojccixy yi cödumbi ñaybejt ma naymujctac, etz ooy ajcxy tzojccixy cödumbi ñaybejt ma jäy ajcxy yxidungixy. ⁴⁷ Chi ajcxy yajcijxtay yi co'ögytöxyjäy ypidägy,

e tungixy ooy jecy tzajpcapxycapxi ma jäy yhuinduu. Yi jadu'mbi jäy ajcxy nigi ajcxy Dios chaachytunib miiid ypocy ycixpi ca'ydi jacnipin.

21

Je ayoobitöxyjäy co'ögypiy'ofrenda

¹ Jiiby anajty Jesús ma Dios ytiyc co ijxy comeeniyjäy may'amy ofrenda pidaaccixy ma meeniygaax. ² E nañ ijxy co tüg co'ögytöxyjäy pidägy anajty metz pi'cmeen. ³ Chi Jesús yminañ:

—Janch ich miich ajcxy nimäy co jadayaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeeniydijc ajcxy ypidacyp ma ofrenda je meen huidi conajxp. Jadayaabi co'ögytöxyjäy ti pidägy huidi anajty nigayamy.

Jesús yminañ co je Dios ytiyc yhuindigoyañ

⁵ Nijējity jäy co ytiği ma Dios ytiyc nimiydacy ajcxy co Dios ytiyc ooy chach'oy'oydúñity miiid tzaa oyjatpyi, e miiid tiibi jiiby yojxcixy. Chi Jesús yminañ:

⁶ —Tüg'óciy jada huidi ajcxy m'ixpy ma Dios ytiyc, minip xii tiempo mina jada nicxy yhuim'y taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytunib yjadiyb nej miich ti mminañ? ¿Ti tiy'ajt ji vaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'ingix. Ooy mayjäy yminañ ñaybidägaanigixy co je' ajcxy je Cristo, yminañ ajcxy: “Ich je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachchiptungixy, e ñayñibidicigixy, ca' mdzigigixipy, com ooy ycopicity co jada jadu'n jayip ytunib yjadiyb, ca'nan hue' je' anajty tim cixp tim tigooyb (je naaxhuiñybi).

¹⁰ Chi Jesús yjacminañ:

—Nayñibidägiib naax cajp miiid huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadiib mij'adzigi'ñ, etz ooy ixpejt huidi qüexigip tzajpcixy.

¹² Ma ca'ni anajty jadu'n jadyii, xypahuidijtcóotcixipy jäy, xymájtzcixipy, xyciyéjcixipy ma judíojäy ñaymujctac. Chi jäy ajcxy xypidägiy pujxtigoty, xyajnicxixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy miiid miich ajcxy com co anajty ti xymijpidáaccixyich. ¹³ Miich ajcxy tiy'ajt myegipy miiid ich nxii ycixpi. ¹⁴ Co jäy ajcxy yxihiipy ma codungdijc, ca' ni nej ajcxy mjet'adiyb, ni ca' ajcxy mhuinmayipy nej m'adzógixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadyi nej xy'adzógixipy, e nej xyjacxigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm'ajuugy amigüg xyciyéjcixipy ma cötujctac. Nijējity miich ajcxy m'ögipy miiid co anajty ti mmijpidaaccixy ich n'ayuc. ¹⁷ Mayjäy ajcxy ca' xy'ixaanipy xychogaanipy miiid co anajty ti mmijpidaaccixy ich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy miiid ymidzip, huin'it ajcxy mnejhuihiipy co huingon je'anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yquéccixipy ñicxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiñi ma je Jerusalén cajp. ²² Je tiempo mina yjadiyb ayo'n miiid co anajty judío jäy ti ytundigooygixy, je' jada yajcuydundaayb jadu'n nej yjaaybétyity ma Dios ñecy. ²³ ¡Ayoob yi töxyjäy ajcxy huidi anajty ung tzim'ijtp huin'it xii, etz huidi anajty miiid y'ungma'xung! Ooy jadiib mij ayo'n ya naaxhuin etz tzip écin ma jada cajp. ²⁴ Nijējity ajcxy y'ögipy tzipjoty, e nijējity

yajniɕɪp tɕumy mach ma huingbi ɕajp huingbi naax. E Jerusalén naxmihuägydähuib yi jäy huidi ca' yjudiojäyɪty, minipy je tiempo mina anajty Dios yajɕixaani yajtigoyaani yi' ajɕxy y'ané'min.

Nejjada' yminipy je Dios y'ung

²⁵ Huin'it xii huin'it tiempo quëxigip iɕxpejt ma xii po' etz ma yi madza', ya naaxhuiñ ooy jäy ajɕxy jotmay miidipy. Je jäy ajɕxy ooy chigihuipy yjihuihuipy yhuinmay'ahuididipy ajɕxy ooy, miid je meyy yɕixpi co anajty chachpidigy chachnögy chachminañ. ²⁶ Yi jäy ajɕxy anucxiñ yajɕidahuib co anajty ajɕxy ɪxy nej yjadyii huindu'mybi naaxhuiñ; e huɪdijaty mic'ajt yajpatp jiiɪby tɕajpjoty yüxtähuipy yi'. ²⁷ Huin'it miich ajɕxy xy'ixipyich, iich je jäy huidi tɕoon tɕajpjoty, nmiiñich jɕjoty miid je nmic'ajtich, nmiiñich miid iich ngötújcin etz iich n'oy'ájtin mijpi. ²⁸ Co je ayo'n tiempo jadu'n yjatzondägipy, chi mba't'ijɕɪxipy com huingoniñ anajty mina Dios xyñihuángixipy ycohuángixipy.

²⁹ Chi Jesús yajnimay ajɕxy tüg ayuc, yminañ:

—Ijɕɪx yi higuerti etz tüg'óciy quipy, ³⁰ co yhuamigy huin'it miich ajɕxy nejhuüy co ti yhuingoni mina ypottigüyñi. ³¹ Tim jadu'n nej miich ajɕxy iɕxpejt mbicy ma higuerti quipy co pottitempo ytigüyñi, nañ jadu'n co miich ajɕxy m'ixipy je iɕxpejt tɕajpɕɪxy jadu'n nej yam nyajnimaygyxy, mnejhuihuipy ajɕxy co huingónip je tiempo mina Dios y'ane'mañ ya naaxhuiñ.

³² Janch nimaaybich miich ajɕxy co jadu'n yjadüyb ytunüyb jayijp, ca' anajty o'ctäy je jäy ajɕxy huɪdibi tɕinaayb jugy'ájtɕixyp jadachambi xii tiempo. ³³ Yi tɕajp etz naaxhuiñybi naxip tigoyip yi'. Iich n'ayuc ca' ñaxipy ytigoyipy ni camina.

³⁴ Naygüend'ájtigix miich ajɕxy ca' mnijot'ájtɕixy yi jocni yi mügi, etz yi tɕinaayin jugy'ájtin, jigix ca' ajɕxy xyniminipy jotcömoñyi je ayo'n xii je ayo'n tiempo. ³⁵ Timetiini minipy je ayo'n tiempo miid jäy ajɕxy yɕixpi huidi ya tɕinaayb ma tüg'óciy naaxhuiñybi. Tim jadu'n nej tüg iyujc ayo'nbaady co timetiini yajtüxuuch. ³⁶ Ni'ixi' ijtɕɪx, mibijctzoogix Dios, ca'ydi ayo'n ajɕxy mbaatɕixy huidi jadaanip, jigix jiiɪby myajpáatɕixipy tɕajpjoty ma iich nhuinduu, iich, je jäy huidi tɕoon tɕajpjoty.

³⁷ Xim anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huidi yxii Olivos. ³⁸ Jabom jabom jopy jopy ñiminyii tüg'óciy ɕajpjäy jiiɪby ma Dios ytijc tibäy co y'amidoo'idaani ajɕxy Jesús y'ayuc.

22

Xiicyögyxy ɕapxyögyxy nej huaad Jesús májtɕixy

¹ Huingon anajty je xii mina jäy tɕajcaagy ɕaaygyxy huidi ca' ylevadura miidity, huidi jäy ytippy pascua xii. ² Chi je teedy mijtungmiidpi etz je escribas yhuinma'ñ'ixtaaygyxy nej ajɕxy ocyaj'ögipy Jesús. Chigüyb anajty ajɕxy je ɕajpjäy.

³ Chi je mujcu' ytigüy ma Judas yjot yhuinma'ñ. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mijtungmiidpi etz tɕajptijc soldado huindzin, e ycapxytuñ miid je' ajɕxy nej jëbi ɕiyecy Jesús. ⁵ Huin'it je Jesús ymidzip ooy ajɕxy yxoondaccottay. Chi ajɕxy ñaygapxi co meen möhuangixy je Judas. ⁶ Chi Judas cöbijcy je meen, chi yhuinma'ñ'ixtay nej jëbi ɕiyegipy Jesús ma ca'p mayjäy y'ixyii yhuindɕixyii.

Je huindzin Dios y'adzu'ájtin

⁷ Chi paty je xii mina jäy cay je tɕajcaagy huidi ca' ylevadura miidity com huin'it anajty ajɕxy yaj'ögy cöbixy ymang pascua xiigixp. ⁸ Chi Jesús quejxy Pedro etz Juan, nimay:

—Nɪɕx miich ajɕxy yaj'oyi' je pascua adzu'ibi, jaydëbi ajt ngaayim.

⁹ Chi ajɕxy y'amidooy:

—¿Ma mdzocy co nyaj'oyihuibich ajcxy?

¹⁰ Chi Jesús yminañ:

—Co mdigihuipy ajcxy cajpjoty, mbaadipy tüg yëydijc huidi yajnicxp tüg majt nii. Mbanicxyp ajcxy je yëydijc cooni yjadipy ma ytiyc. ¹¹ Co miich ajcxy mjädipy ma je jäy ytiyc, chi ajcxy mnimähuipy je codijc: “Nhuindzinich jadu'n minaam: ¿Ma yaj'ahuädz yajpaady ma ngayipyich je pascua adzu'ibi miid ich ndiscípulotijci?” ¹² Je codijc miich ajcxy xyajni'ixihuip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiy je pascua caayin uucin.

¹⁴ Co je hora paty, chi Jesús y'ixtacy ma je mesa miid je' ydiscípulos ajcxy. ¹⁵ Chi Jesús yminañ:

—Ti ooy nijot'atyich co nmüdgayaangixy jada pascua adzu'ibi ma ca'ni n'ögyñich. ¹⁶ Ich miich ajcxy jadu'n nimaayb co ich ni mina ca' njaccayipyich jadüg'oc je pascua adzu'ibi, ixti cooni yajcuydundähuipy je pascua xii ytiy'ajt ma Dios y'ané'min.

¹⁷ Chi Jesús conigy je ügy co Dioscojüyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸ Cham ich miich ajcxy nimäy co jadu'n nej yajnicxa'ñ xii tiempo ca' vino nii üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huäcxy moy discípulos ajcxy, e chi ajcxy nimay:

—Jada tzajcaagy ich nninix'ajtpyich huidi ngiyejcpyich ma yi o'cin miid miich ajcxy mbocy ycixpi. Jada iixpejt miich ajcxy mi'idipy oy jäymech miid ich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej ich nni'py huidi temam yogam miid miich ajcxy ycixpi.

²¹ Jadachambi yi jäy huidi xyciyegaambich ma nmidzipich, ya je' cham miid'inäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnigodugiyijich. ¡Ayo'n padamy je jäy ayoob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma ich ajt huidi jadu'n tundigoyam?

Yajcapxcójcixy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiyi pin jada' jac mijpi oc'idipy. ²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtijycixy co ooy oytuungixy. ²⁶ Miid miich ajcxy ca'ydi yjadú'nity. Hue' janchtiy je mijpi ma miich ajcxy huen ñaybidägyii nej jihuüy ymútziy. E je huidi nigohuajc'ajtp huen ñaybidägyii nej jihuüy je' je' je tumbi. ²⁷ ¿Pin je' jacmíjip? ¿Huidi iñaybi ma mesa, o huidi ni'ixiyb a'ixiyb caayin uucin? Yi' je' jacmíjip huidi iñayb ma mesa. Per ich ijtpich miid miich ajcxy jadu'n nej huidi ni'ixiyb aa'ixiyb caayin uucin.

²⁸ Miich ajcxy ti m'ijtcixy miid ich ma anajty ayo'n ti nyajnaxyich. ²⁹ Paady ich miich ajcxy tüg ané'min nmooyb, jadu'n nej ich ndeedy ti xymöyich. ³⁰ Jaydëbi miich ajcxy mgáaygixipy m'uuccixipy ma ich nmesa jiiby ma ich n'ané'min e m'inähuipy ajcxy ma je ane'mdac, e mdiydúngxipy m'ané'mgixipy je nimajmetz picy Israel ñaax ycajp.

Jesús capxpizimy co Pedro ymina'nañ co ca'p Jesús ix'y'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jäy trigo huimbojy co yajhuätzaangixy. ³² Per ich Dios nmibijctzooyich miid miich

ycixpi, jigix miich ca'ydi mmibíjcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro ymíñañ:

—Huindzin, jotcuyc ich nnícxanñich mñd miich oy pujxtigótyity, etz oy ndimyo'ögibich mñd miich.

³⁴ Huin'it Jesús nímay Pedro:

—Ich miich nimaayb co ca'ni anajty tzey yaxígy jabom jopy co miich miná'nip tugiig'oc co miich ca' xy'ix'adyiijich.

Huingomb horí ma Jesús y'ocyaj'ijxmadza'ñ

³⁵ Chi Jesús nímay ydiscípulos ajcxy:

—Co ich miich ajcxy jayhuin nguejxy, ni mmoral, ni ca' mmeenýdjic, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús ymíñañ:

—Jadachambi pin ymeeñydjic etz ymorral mñd, huen minícx; nañ pin ca' mñdity y'espada, huen toogy yjocx huit, chi juyipy y'espada. ³⁷ Ich miich ajcxy nimaayb co copícy jada yajcuydunipy huidibi mimb jaybety mñd ich ycixpi ma Dios ñecy ma jadu'n ymíñañ: “Yaj'amíchomujc (je Cristo) mñd yi' ajcxy huidi jibicjáyip.” Tüg'óciy mimb jaybéty ma Dios ñecy mñd ich ycixpi, yajcuydunipy yi'.

³⁸ Chi Jesús ydiscípulos ajcxy ymíñañ:

—Huindzin, cha metz espada.

Chi Jesús y'adzooy:

—Huen mñd yi'yi.

Jesús Dios mibijctzoy jim Getsemani

³⁹ Chi Jesús jim choñ ñícx ma je cop huidi yxií Olivos, com jim anajty nícx coodz coodz, chi je' ydiscípulos ajcxy ypanícxí. ⁴⁰ Co ajcxy yja'ty ma je cop, chi Jesús ymíñañ:

—Mibijctzoogix Dios huen xypubedipy xypudigihuipy ajcxy ca'ydi mdigíygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuíy ytigíy Dios mibijctzoob. ⁴² Chi Jesús ymíñañ:

—Dios Teedy, pen miich m'a'ixíyb píjigíx jada tzaachypi, ca' ich huaad nyajnaxyich, per ca' ich huaad ngí'mdzójcin nguyduñich, miich mdzójcin huen myajcuyduñ.

⁴³ Chi ñayguëxíci tüg ángel tzejpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitnii ypidzimy janch jadu'n yi' anajty nej ni'py janch mijjaty y'ocnajtztacxiyñi.

⁴⁵ Co ypidígy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy mñd jotmay. ⁴⁶ Chi Jesús nímay ymígügtijc ajcxy:

—¿Ti co mdzachmaagixy? Pidíccix mibijctzoogix Dios, ca'ydi jibic tuum mdigíygixy.

Yajñíxcixy mach je Jesús

⁴⁷ Jim Jesús anajty ymígügtijc ajcxy mñdcapxy mñdmíydägy, co je mayjäy oy yjäty. Jayip anajty ymiñ je huidi anajty xiip Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxanñ. ⁴⁸ Chi Jesús ymíñañ:

—Judas, ¿nej mñd tüg tzücxin mgíyecy ma ymidzip, je jäy huidi tzoön tzejpjoty?

⁴⁹ E je' ajcxy huidi anajty Jesús ymñd, co ajcxy ijxy jadu'n nej ytuñyí yjadyí, chi ajcxy ymíñañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachüy je teedy mįjtungmįdpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús ymınañ:

—Ixmajtcix, huen jadu'ñyi.

Chi nıdoni je jäy ytätz'ac, e jadu'n yajtzoocy. ⁵² Chi Jesús nımay ajcxy huıdi nımiini, yi teedy tungmįdpi ajcxy, yi Dios ytıjc policıa huındzın etz mįjjäydıjc:

—¿Nej co xyñimıngıxyıch mıid pujx etz mguipyıjıpxu'ñ jadu'n nej jıhuıy ıch tüg meetzpi? ⁵³ Jiıby ıch anajty jabom jabom ma Dios ytıjc, e ca' mııch ajcxy ti ti mduñ mıid ıch. Per cham jėdu'n je tiempo mına mııch ajcxy xy'ane'myıch etz je jıııcpı xymımadägyıch.

Pedro ymınañ co ca' ıxy'adyıi Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mįjtungmįdpi ytıjc. Je Pedro jıguėgyıhui' anajty ypanıxyıi. ⁵⁵ Jım ajcxy jın yajmıjıy tıbägujc chi ajcxy y'ıxtactay nidüg'ócy. Pedro y'ıxtacy nañ jadu'n ma je jäy ajcxy. ⁵⁶ Huin'it tüg pödumbi ıjxy Pedro ıñäy ma jımba', chi huındıcxpejty nımay:

—Jada yėydıjc nañ ymıid anajty Jesús.

⁵⁷ Chi Pedro ca' cöbijcy, ymınañ:

—Töxyjäy, ca' ıch yi' n'ıxy'adyıi.

⁵⁸ Nañ jahueengi huin'it jadüg jäy Pedro yhuındıcxpejti, ñımaayi:

—Mııch, yi Jesús ajcxy anajty mıid m'ıty.

Chi Pedro ymınañ:

—Ca' n'ıchıty.

⁵⁹ Ti anajty tüg horı nınaxni co oy huingbi ymınandägy:

—Janch co jada yėydıjc yi' anajty mıid y'ıty Jesús. Com nañ galileojäy yi'.

⁶⁰ Chi Pedro ymınañ:

—Ca' ıch nhuinjıhuıy nej mııch mına'ñ.

Capxni anajty je Pedro co tzey oy yaaxıgy. ⁶¹ Chi je Huındzın Jesús ni'ıjxhuimbıjty je Pedro. Huin'it Pedro jäymetzcootti je' ayuc nej anajty yHuındzın Jesús ti ñımäyıi: “Ni ca'ni anajty tzey yaaxıgy cham coodz co mııch tugıg'oc xycoyüdzıbyıch.” ⁶² Chi Pedro ypidzımy tıbäy, oy jiıby yäxy mıid tájın máyın.

Nıxiıccıxy yajxiıccıxy yi Jesús

⁶³ Je jäy ajcxy huıdi anajty Jesús cuend'ajtp, ooy ajcxy nıxiıcy nıyaaxy, etz nañ ooy ajcxy huingojxy jıjpcıjxy. ⁶⁴ Chi ajcxy huingoxodzy, e cojxy ajcxy ma yhuıñyıjıj, nımaaygıxy:

—Octıygapx, ¿pın ti xycoxy?

⁶⁵ E ooy anajty mıid yjıııc ayuc cıxy cuety nımaaygıxy.

Jesús mįjjuntajoty yajpaady

⁶⁶ Co yxımıy, chi yöymujcy yi teedy mįjtungmįdpi ajcxy, yi mįjjäydıjc ajcxy, etz yi escribas ajcxy, chi ajcxy y'amıdooy:

⁶⁷ —Nımaaygıch ajcxy ¿nej mııch je' je Cristo?

Chi Jesús y'adzooy:

—Co ıxyıpy nnıgapxıch, ca' mııch ajcxy mııbigıpy. ⁶⁸ E pen ıch mııch ajcxy n'amıdooyb, ca' mııch ajcxy xy'adzohıpyıch, etz canan huin'it xyñajtmadzıhuıııch mııch ajcxy.

⁶⁹ Jadachambi e ñıcx'a'ñı ıch, je jäy huıdi tzoön tzejpjoty, n'ıxtäga'ñıch a'oy'amy ma Dios mııc'ajtmıdpi.

⁷⁰ Chi nidüg'ócy je' ajcxy y'amıdooy:

—¿Nej janch co mııch Dios xy'ung'adyıi?

Chi Jesús y'adzooy:

—Mııch ajcxy jadu'n mınamb co ıch njėjıty.

⁷¹ Chi ajcxy ymınañ:

—¿Ti ajt njac-huáanim testigo? Ti ajt yam ci'm nmidoohuim nej mina'n.

23

Jesús ma Pilato yhuinduu

- ¹ Chi tüg'ócay je mayjäy ajcxy ypidigy, chi yajnicxy ajcxy Jesús ma je gobernador Pilato.
² Chi ajcxy ytigüy xibi yminaangixy:
 —Jada jäy naax cajn yaj'ixpijcp huidi ca' ytiy'ájtity. Yi' adujctáhuam co ca' huaad nmigüéjtim César, e ymina'n ci'm co yi' je' je Cristo huidi rey'ajtpi.
³ Chi Pilato y'amidooy Jesús:
 —¿Nej miich je' judío jäy xyrey'ajtp?
 Chi Jesús y'adzooy:
 —Miich jadu'n minamb.
⁴ Chi Pilato nimay je teedy tungmüdpí ajcxy etz je mayjäy:
 —Ca' ich ti pocy nbaadyich ma jadayaabi yëydijc.
⁵ Chi Jesús ymidzip nigi anajty ajcxy yminan'adütcixy:
 —Jada Jesús naax cajn tzachyajqueec-huäcxtayb je judíojäy müd yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

- ⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuiy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xü.
⁸ Co Herodes ijxy Jesús, chi oy jotcugüy com tüyip anajty ooy ja'ixa'n, ti anajty may ayuc midoohui, e ahuixy anajty co mijhuinma'n tunipy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmüdpí etz je escribas ajcxy, tzachnigibéjtcixy mictägy. ¹¹ Chi Herodes müd yjäy ooy nixiicy yajxiicy Jesús, ca' mij'ijxy mijpidacy. Chi xojxy müd oyhuit etz quejxhuimbijty jim ma Pilato. ¹² Huin'it xü Herodes etz Pilato ajcxy ñaymigügpíci, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

- ¹³ Chi Pilato huomujcy yi' teedy mijtungmüdpí, yi' cajptungmüdpí, etz yi' naax cajn.
¹⁴ Chi ajcxy nimay:
 —Ti miich ajcxy xyajnimíngixyich jadayaabi yëydijc, jadu'n miich ajcxy minamb co ooy jäy yajqueec-huäcxtay. Ti ich yi' jatiyduñich ma miich ajcxy mhuindu, ca' ich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniquexyich, ni ti pocy jada Jesús ca' ti tuñ huidi huaad nyajco'ögiyich. ¹⁶ Miñ n'octzaachytuñich, jaydëbi nnajtmadzihuibich.
¹⁷ Jadu'n je gobernador anajty costumbre müdity co najtmadzïy tüg machyjäy mijxüjoty. ¹⁸ Chi je mayjäy tügmucy ajcxy yminaandacy:
 —¡Yaj'ög jadayaab Jesús! ¡Najtmadzi' yi' Barrabás!
¹⁹ Je Barrabás anajty pujxtigoty ti ypidägyii co anajty ti nibidigy je gobierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtmadzihua'n Jesús. ²¹ Chi je mayjäy janch mic yminañ:
 —¡Yajcruudzpet miich yi'! ¡Yajcruudzpet miich yi'!
²² Chi Pilato yminañ je midugüg'ocpi:
 —¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtmadzihuibich.
²³ Je jäy ajcxy nigi anajty yminaan'adütcixy janch mic, co huen yajcruudzpejty. Chi ajcxy jadu'n mimadacy Jesús co chachne'mgixy je teedy tungmüdpí, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato

najtzmadziy je Barrabás huidi anajty pujxtigótyip, co anajty chach jäy yajqueec-huäcxy, etz yjäyyaj'ögy, je' huidi yi jäy ajcxy ypíjctzou. Chi Pilato ciyejcy Jesús ma yi' ajcxy huen tungixy nej tzojccixy.

Jesús yajcruudzpejti

²⁶ Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti chooñ camjoty, huidi anajty yxi Simón, e ycogájpity anajty Cirene. Chi adzip ajcxy Simón yajquejcycabi Jesús ycruudz, e yajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjäydijc ajcxy chachyaaxcixy miid jotmay miid yi' ycixpi. ²⁸ Chi Jesús ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymína'nipy: “Jotcuje je töxyjäy ajcxy huidi ca' y'ung ixty, huidi ca' ti y'ungtzimígy, etz huidi ca' ti y'ung yajtzitzcixy.” ³⁰ Chi je jäy ajcxy nimaydagipy mijtun mijcop: “Nigídagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios y'ung, nigi ajcxy jaciiini ytundigoya'n miid Dios yjäy, tim jadu'n nipaady nej pin puxam tzuxy quipy nañ puxamy quipy títzpi.

³² Nañ jim anajty yajnicxcixy miid Jesús jametz pocyjäy. Tú'ciy miid Jesús anajty yaj'ögaangixy. ³³ Co ajcxy ojjäty jim ma tüg it huidi jäy ytiipy ögpi cohuaic, chi ajcxy jim Jesús yajcruudzpejty miid metz pocyjäy: tüg pocyjäy a'oy'amy, jadüg anajty'amy. ³⁴ Chi Jesús ymínañ:

—Dios Teedy, mecxi ajcxy ypocy, com ca' nejhuíygixy ti ytungixyp.

Co je soldados anajty ajcxy yajhuäcxaani ac je'y Jesús yhuít, chi ajcxy ijxy suerte pin ocjediib. ³⁵ Jim je cajpjäy anajty yhuindicxcixy, yam je tungmiidpi nixígy yajxígy Jesús, ymínañ ajcxy:

—Jada Jesús huíngjäy ti yajtzögy, huen cham ci'm nayyajtzögyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy nixiicxcixy yajxiicxcixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy ymínañ:

—Pen miich Rey'ajt ma yi judíojäy ajcxy, nayñihuäñi ci'm.

³⁸ Ma Jesús ycödu jim anajty yjaayity griego'amy, latin'amy, etz hebreo'amy: JADA JE' YI JUDIOJÄY AJCXY YREY.

³⁹ Chi tüg pocyjäy huidi anajty cruudzcixy ooy nixiicy yajxiicy Jesús ymínañ:

—Pen miich je' je Cristo, naygohuäñi ci'm, e cohuaangich ich ajcxy nañ jadu'n.

⁴⁰ Chi je jadügpi pocyjäy oy y'adzooy, ogy ymígüg, nimay:

—¿Nej ca' miich Dios mdzigíy. Ca' m'ixy co tú'ciy ti nbócycähuim? ⁴¹ Ich ajt janch paatip jadu'n, co jadu'n jada ngöbícim tzaachypi je tübi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjäy nimay Jesús:

—Tun may'ajt xyjäymedzipich co anajty mjäty jiihy ma m'ane'mdac.

⁴³ Chi Jesús oy y'adzooy:

—Janch ich miich yam nimäy co cham ich miich miid'ítnipy ma je oybi it.

Jesús y'o'cni

⁴⁴ Co cujcxiibi paty, chi oy ycöodziy tüg'óciy naaxhuiñ ixti minacyxiini. ⁴⁵ Chi xii ca' y'oc'ani. Chi je huit oy yciitzhuäcxy huidi anajty adiyydujcp je Dios y'it jiihy ma Dios ytiyc.

⁴⁶ Huin'it Jesús mic ypätcapxy ymínañ:

—Dios Teedy, cham nyajcídigiíy ich n'alma.

Co Jesús jadu'n ymínañ chi y'ögy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jäymejch yi Dios yminañ:

—Janch co jadayaabi yëydijc anajty tudägy yjäyity.

⁴⁸ Chi je mayjäy tiibi anajty jim yöymújccixy yhuindicxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachcójxcixy mïd jotmay ycixpi. ⁴⁹ Cham tüg'óciy Jesús ymígügtijc ajcxy huidi anajty mïd ñay'ixy'adyii, etz töxyjäydijc ajcxy huidi anajty Jesús ti ypadzonyii jim Galilea, jiguëgy je' anajty ajcxy yhuindicxcixy.

Yajnaaxtigiy ajcxy Jesús

⁵⁰ Jim anajty tüg yëydijc huidi anajty yxi José, hue' anajty ycocájpity Arimatea ma Judea naaxjot. Je' anajty judío mïjtungmïdpi, e je' ooy anajty chach'oyjäyity etz ytudägyjäyity. ⁵¹ Je' nañ yijp'ijxy anajty co yminipy je Dios y'ané'min, e ca' je' anajty jijptigiyi mïd jacnaagity mïjtungmïdpi co ajcxy yaj'ögy Jesús. ⁵² Chi José ñicxy ma Pilato oy pijtzoohui Jesús ñinïcx. ⁵³ Chi yajminajcy ma cruudz, e mo'ñ mïd tüg sábana, chi pidacy ma ögpi jut, ma tüg tzaahuinguetzmijc ma ca'ni anajty ni tüg ögpi jiiby yajpidägy. ⁵⁴ Je' anajty ajcxy ni'ixiyb a'ixiyb je pascua xi e je' anajty tim tzondägan je pócxin xi.

⁵⁵ Chi je töxyjäydijc huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpi jut, etz je ninïcx jadu'n nej jiiby yajpidacy.

⁵⁶ Chi ajcxy yhuimbijttay cajpjoty. Chi ajcxy yaj'oyi yjtz xuucpi, tzoy, etz ungüento, chi amay'ajty je pocxinxi, jadu'n nej anajty cötújcín y'ane'my.

24

Co Jesús y'ögy chi yjugypicy

¹ Co je seamaan y'ixtigiy janch tim ticxïc je töxyjäydijc ajcxy ymiiñ ma je o'cpi jut, chi mïmiiñ ajcxy yjtz xuucpi, etz tzoy huidibi anajty ti yaj'oyiygixy. Nañ jadu'n mïdjadyii töxyjäydijc miiñ. ² Chi ajcxy paty je tzaa ti anajty yjidiguegyii ma je o'cpi jut'aguu. ³ Co ajcxy ytigiy jutjoty, chi ca' ajcxy paty je Huindzin Jesús ñinïcx. ⁴ Chi jadu'n yjajty, jiiby anajty ajcxy jutjoty huinmaaygixy, co ñayguëxgi ma ajcxy ymijc metz yëydijc janch adicxp anajty yhuit. ⁵ Chi ajcxy ooy chigiy, chi ajcxy yhuindactay, chi je metzpi yëydijc yminañ:

—¿Na'amy co m'ixtaaygixy yi jugypi ma yi tiibi y'ögy? ⁶⁻⁷ Ca' je' ya, ti je' yjugypicy. Jäymejtzcix jadu'n nej mina'ñ jim Galilea, co yminañ:

—Ooy ycopicyty co ich, je jäy huidi tsoon tzajpjoty, nyajcïyegipy pocyjäy cï'am. Yi' ajcxy xyajcruudzpedipyich, chi njugypigipyich codugig xi.

⁸ Chi ajcxy oy jäymejtzcooty nej anajty Jesús ti ymina'ñ. ⁹ Chi je töxyjäydijc ajcxy yhuimbijttay ma o'cpi jut. Chi ajcxy yajmïdmïydactay jadu'n nej anajty ti ijxcixy ti mïdoogixy mïd Jesús ydiscípulos ajcxy je nimajmetzpi etz jacjadyii jäy huidi yajpaatp ma je' ajcxy. ¹⁰ Je töxyjäy ajcxy huidi ooy ma Jesús ñaaxtigiy, je' je' anajty ajcxy: María Magdalena, Juana, etz María Jacobo ytaj, e cham jacnaagity ymïdöxyjäydijc. ¹¹ Chi Jesús ydiscípulos ca' ajcxy tim mïjpïdacy je töxyjäydijc ajcxy ayuc, hue' ajcxy tijy nigo y'occapxcixy y'ocmïydaaccix, paady ca' ajcxy mibijcy.

¹² Chi Pedro ypïdïgy ñicxy poyïgyi ma anajty Jesús ti ñaaxtigiy. Chi Pedro yco'ixiy ma je o'cpi jut, chi ijxy co ca' jiiby ni ti, jëyi Jesús yhuit abicy y'ooxnäy. Chi Pedro yhuimbijty ma ytiyc jihuïy ooy jadu'n nej ti ytuñyii yjadyii.

Ma Emaús tü'aa

¹³ Huin'it xi metz Jesús ydiscípulos ajcxy ñicxy ma tüg cajp mutzpi hue' anajty yxi je cajp Emaús, hue' yjiguemyty mïd Jerusalén tugi'px estadios (majmetz kilómetro). ¹⁴ Chi amïydaacip anajty ajcxy ñicxy. Nigapxcixy nimïydaaccixy nej Jesús ti yjaty ti y'ayoy. ¹⁵ E jadu'n yjaty ma anajty ycapxcixy ymïydaaccixy je nimetzpi, chi Jesús ci'm nimijhua'cy

je metzpi, chi m̄id ñicxy ajcxy yquipxyi. ¹⁶ Oy anajty ja'ijxcixy, ca' ajcxy tuñcuend pin je' anajty. ¹⁷ Chi Jesús y'amidooy je' ajcxy:

—¿Ti miich ajcxy miydacpy ma yam mdüyöygixy? ¿Nej co mdájcixy mmáygixy?

¹⁸ Chi tüg huidi anajty yxii Cleofas y'adzooy:

—Janch tüg'óciy mayjäy nejhuiydäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuïy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy yminañ:

—Jesús Nazaretpi, huidi Dios y'ayucnajtzcaxxiyip, yi' anajty mij jánchip ma yi ayuc etz huinma'ñ ma Dios yhuinduu, etz cham ma tüg'óciy naax caxp. ²⁰ Chi yi' ajcxy je teedy m̄itungm̄idpi etz ñich ajt ndungm̄idpi Jesús yajc̄idiḡiiy je gobernador co huen yaj'ögyii. Chi ajcxy yajcruudzpejty. ²¹ Hue' ñich ajcxy anajty ndzach'ahuijxyp co yi' je' huidi Israeljäy ajcxy cohuánaam ma ymidzip. Jadachambi jada' ymiduḡigxi ma jadu'n ti ytunyii ti yjadyii. ²² Cham ñich ajcxy ndöxyjäydijc ajcxy ooy xy'adziḡiiygixyich. Ti y'oygixy janch ticxiçp ma o'cpi jut. ²³ E com ca' ajcxy paaty je ñaaxñicx, chi ajcxy yhuimbijtni yminaangixy co ti ñjxcixy yi' ángeles ajcxy, hue' je ángeles ajcxy yminañ co Jesús yjuugyity. ²⁴ Huin'it nijējty nmiḡgtijcich ooy ma o'cpi jut, paty ajcxy janch jadu'n nej töxyjäydijc anajty yminaangixy. Ca' je' ajcxy ijxy Jesús.

²⁵ Chi Jesús yminañ:

—¿Miich jäy ajcxy ooy ajcxy m'aajuuñity m̄jotjuuñity, ca' ajcxy ti mdzojcm̄ibijccixy co ajcxy m̄jam̄bigá'n̄ip huidibi y'ayuc najtzcaxxiybi ajcxy ycapxy! ²⁶ ¿Nej ca' anajty ycop̄icyity co je Cristo ayo'n paadip, e huin'it ytiḡihuip tzajpjoty ma yi' y'it oybi?

²⁷ Chi Jesús yajn̄imaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajtzcaxxiybi yjaay, yajxon ajcxy yajni'ixiyday jadu'n nej yjaybétyity m̄id je Cristo yciçpi.

²⁸ Chi ajcxy m̄ihuingoñ je mutz caxp ma anajty ñicxcixy, je Jesús jadu'n ñaybidaaci jadu'n nej jihuïy jacjiguem ñicxy. ²⁹ Huin'it ajcxy nimay adzip:

—Hui'm miich m̄id ñich ajcxy, ñigi jada chuu'ñy'ad̄ich.

Chi Jesús ytiḡiiy caxpjoty yhui'my m̄id je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg tzajcaagy con̄gy, e yajnaxxy Dios cojuyip, huin'it tujc-huäcxy moy ajcxy. ³¹ Huin'it ajcxy ijxcaxpy Jesús. Chi Jesús m̄ic m̄iciy yaj'ijxtigoy. ³² Chi ajcxy ñayñimaayi:

—¿Nej ca' yjānchity co ñich ajt ooy njihuïyim jotjoty huinma'ñjoty co anajty ajt jim xym̄idm̄iydacim tū'am, etz co ajt xyñajtzcaxxiyim je huidi jaybety ma Dios ñecy?

³³ E tim huin'it̄iy ajcxy tūb̄ijccixy, chi ajcxy ñicxcixni jim Jerusalén. Ni'amugi' ajcxy paty je majctügpi Jesús ydisc̄ipulos ajcxy e jacjadyii jäy ajcxy. ³⁴ Chi ajcxy m̄inaangixy:

—Janch yi' co ti yjugypicy je Huindzin Jesús, com ti oy ñayguëx̄igyii ma Simón.

³⁵ Chi Cleofas nim̄iydacy jadu'n nej tū'ay anajty ajcxy ti ñaybátigixy m̄id Jesús, etz jadu'n nej ajcxy Jesús ijxcaxpy co tzajcaagy ti tujc-huäcxy.

Jesús ñayguëx̄ici ma je' ydisc̄ipulos ajcxy

³⁶ Jiiby anajty ajcxy tzachnim̄ydaaccixy co Jesús oy ñayguëx̄igyii ma je' ajcxy. Chi ytinay'ahuïy cujc'amy ma je' ajcxy, chi yminañ:

—Jotcugi' miich ajcxy.

³⁷ Chi je' ajcxy ooy ñay'adziḡiyi ooy huinmaaygixy, hue' ajcxy tijy ijxmaññyb. ³⁸ Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin ñich? ³⁹ Ijxcix miich ajcxy ñich ngi' ñich ndecy, ñich jëni ñich. Nidongich etz íjxcich ajcxy. Tüg espíritu ca' mñidity chüch ni ypajc, jadu'n nej m'ijxcixy ñich nmñidity.

⁴⁰ Co Jesús jadu'n ymíñañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy mñid co anajty ajcxy chachjotcújcity, chi Jesús ajcxy nimaayí:

—¿Mñid ajcxy ti ii mgayipy?

⁴² Chi ajcxy moy Jesús acxtzäy, etz tüg jüidy serpäg. ⁴³ Chi cöbijcy, chi ycaay y'uucy jim ma je' ajcxy yhuinduu. ⁴⁴ Huin'it Jesús ymíñañ:

—Huidi m'ijxyp cham je' je' huidi nyajnimay jayhuin, co ñich miich ajcxy anajty mñid'ijtcixy, co copicy nguydundähuibich jadu'n nej yjaybétyity ma je Moisés ñecy je jëcyip, etz jacjadyü Dios y'ayucnajtzcaxiybi ñecy, etz yi salmo necy.

⁴⁵ Huin'it je' ajcxy yjet yhuinma'ñ ymíñ ymejch, jaydëbi huinjihuüygixipy huidi jaybétyip. ⁴⁶ Chi Jesús yjacmíñañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugüg xü, maabi anajty y'ögy. ⁴⁷ Huen ajcxy yajcapxhuäcxy Dios ytiy'ajt huindu'my naaxhuiñ, chondägip Jerusalén, co ooy ycopícyity huen jäy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuüygixy. ⁴⁹ Jadachambi nguexipyich ma miich ajcxy je huidi nDeedyich ti xyaj'ahuaniygixy. Hui'mgix ya Jerusalén ixti cooni ajcxy xyñidigihuip xycödigihuip je Dios yjihuñ ymíñ'ajt huidi tzonam tzajpjoty.

Jesús ypa'ttigüyñ tzajpjoty

⁵⁰ Huin'it xü Jesús mñid tzoñ je' ydiscípulos ajcxy, chi ajcxy ycajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios mñid je ymígügtijc ajcxy ycixpi. ⁵¹ Chi jadu'n yajty ma anajty Dios mibijctzoy mñid yi' ajcxy ycixpi, chi abicy yajhui'mni je' ajcxy e je' ypättigüyñi jüby tzajpjoty. ⁵² Chi yi' ajcxy jim yjac-huäcxijpy Dios ojadaajtcixy. Chi ajcxy yhuimbijttaayñi jim Jerusalén janch jotcujc. ⁵³ Chi ajcxy jabom jabom anajty ñicxcixy ma Dios ytiyc chajpcapxycapxcixy, ojadaajtcixy jäymejtzcixy yi Dios, Janch jadu'n jada. Amén.

SAN JUAN

Jaayhui'my Jadu'n Nej Jesucristo Ytun Yjajti

Dios y'ung huiḁibi y'oy ya naaxhuiñ yejci Dios y'ayuc tiy'ajt

¹ Co naaxhuiñybi oga'n chondacy jiiyim anajty Dios y'ung, e yi' yajnejhuiy jây ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy huiḁijaty yaj'ijxp yajpatp ya naaxhuiñ, yi' yaj'oyiḁday yajcojty. Tüg'óciy huiḁijaty Dios yajcojy, tú'ciy ytuñ m̃id y'ung. ⁴ Dios y'ung yi' jugy'ajtyejctaayb ma tüg'óciy naaxhuiñyây. M̃id co jugy'ajtyejctây ma tüg'óciy naaxhuiñyây, je' je' tiy'ajt co Dios y'ung ym̃id Dios ymic'ajt. Jadu'n nipaady nej tüg j̃in huiḁibi jây codiḁcxp. ⁵ Ya naaxhuiñ yajpaady añi. Yi añi jadu'n yi' nej coodzpi. Yi Dios y'ung ti m̃imiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jây yjot yhuinmañ nej tüg j̃in ytiḁcxy agoodztuuyb. Yi añi ca' ñaygodig̃iyi m̃id Dios ytiy'ajt.

⁶ Ma'xung'ajt tüg yëydijc huiḁibi Dios anajty ti yajniḁicy. Hue' anajty yx̃i Juan. ⁷ Yi' oga'n tiy'ajt yejci co Dios ymic'ajt etz ytiy'ajt yajpaady ma Dios y'ung, jigix tüg'óciy je jây ajcxy camibijctâhuipy je Dios y'ung. Dios y'ung jadu'n nipaady nej tüg j̃in huiḁibi codiḁcxp ma jây ytüyöy. ⁸ Je Juan ca' je' anajty yjējity je Cristo, je huiḁibi capxhuäcxp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ym̃id, je janchypi, ma jëb tüg'óciy jây ya naaxhuiñ patcixy Dios ytiy'ajt.

¹⁰ Je Dios y'ung ya anajty yhuidity naaxhuiñyḁixy. E jada naaxhuiñ yi' yaj'oyiḁday. E may je naaxhuiñyây ca' ajcxy ijxcajpy. ¹¹ Je ym̃igügtijc, je judiojây, je' ajcxy nimiini, e may ajcxy je ym̃igügtijc ca' ajcxy ycöbijci. ¹² Tüg'óciy je jây ajcxy pinjaty mijpidac yi' yx̃i yi' ymic'ajt, yi' ajcxy yajmoy Dios ymic'ajt, e jadu'n nipaty nejjiḁiḁy ajcxy Dios y'ung'adyi. ¹³ Canan hue' je' co naydij̃iyb Dios y'ung co ti yma'xung'aty jadu'n nej jây ajcxy y'ocma'xung'aty. Nañ ni ca' yjadu'nity nej jây tijy, nej jây j̃ijp'ixy, ni canan jây jadu'n ti huinmay. Hue' janchtiy Dios jadu'n ti huinmay.

¹⁴ Je Dios y'ung ya naaxhuiñ je' yma'xung'ajty m̃id ñiñcx etz chinay m̃id naaxhuiñyây. E ḁch ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tūgpajc oy'ajt etz mic'ajt m̃idity. ¹⁵ Juan ñidiy'ajt'ajt je Dios y'ung, e chi capxypidzimy, e jadu'n yminañ:

—Jada je' je jây huiḁibi ḁch jadu'n nim̃ydaacich ma miich ajcxy. Je huiḁibi miimb jac'axam ma ḁch, jac mic'ajt m̃id yi' ca'ydi ḁch, com jacjayijp yi' jugy'ajt paty ca'ydi ḁch.

¹⁶ Je Dios y'ung oy xychojcm xyjihuiỹim mijcjee, paady je' tuuñ may'ajt oy'ajt mijcjee m̃id ḁch ajt ycixpi. ¹⁷ Com Dios y'ané'm̃in ycötujcin micpi hue' Dios yajnigüeḁx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ m̃id je jây ajcxy ycixpi, e nañ je' ytiy'ajt yajnigüeḁx je Jesucristo. ¹⁸ Je Dios ni caminaabi pin ca'ixyñi, je y'ung tūgpajci yajpatp ma Dios Teedy ity. Je Dios y'ung ti xyajnejhuiỹim nej Dios yajpaady.

Juan el Bautista je' tiy'ajt yejci co Jesús je' anajty Dios y'ung

¹⁹ Jadaabi je' je tiy'ajt huiḁibi Juan yejci, co judío jây ajcxy quejxy nijējity teedytiḁc etz tzajptijc tungm̃idpi. J̃im ajcxy chooñ Jerusalén nicxy ma anajty Juan yajpaady, chi ajcxy y'amidooy:

—¿M̃in miich? ¿Nej miich je' je Cristo huiḁibi Dios yquexamy?

²⁰ Je' ñigapx je tiy'ajt, ca' ñaygoyützi, chi yminañ:

—Ca' ḁch njējity je Cristo.

²¹ Chi ajcxy jac'amidooy:

—¿E pín miich mnaydijyii? Pen ca' mjējity je Cristo. ¿Nej miich je' je Elías?

Chi Juan y'adzooy:

—Ca' je' n'ichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amidooy ajcxy jadüg'oc:

—¿Mbin miich? Jigix ich ajcxy tiy'ajt nyajñicxibich ma yi tibi ich ajcxy xyquexyich. ¿Ti miich nayxiigoyäxyii?

²³ Chi Juan yminañ:

—Ich je' je jäy huidibi Dios y'ayuccapxhuäcxip ma tüg mijtig'duum, tim jadu'n nej jilby jaybety ymiiñ ma Isaías ñecy, nañ tim jadu'n ich nmına'ñich co copicy nayñi'ixíyigix ma yi mjot yi mhuinma'ñ, jēbi naybáatigixy mūd mHuindzin Dios. Jadu'n nej jäy ixypy tü'aa yaj'oyi co tüg huindzin ymiina'ñ.

²⁴ Je teedytjc etz tzajptjc tungmūdpi huidibi oy migapxy Juan, hue' anajty ajcxy fariseojäy ti yquexyii. ²⁵ Chi ajcxy jactim'amidooy Juan:

—¿Ti miich co mjäyyajñibety? Peni ca' miich mjējity je Cristo, ni mgajējity je Elías, ni mgajējity huidibi Dios y'ayuc najtzcaxiyp.

²⁶⁻²⁷ Chi Juan y'adzooy:

—Ich hue' jäy nyajñibetyich mūd nii. Ya naaxhuiñ ji tüg jäy huidibi miich ajcxy ca' m'ixy'adyii. Je' huidibi jac'axam mimb ma ich, je huidibi ca' mihuaadity nicxy yi' xytumbi'adyiijich, nicxyich ycighuin nguejich.

²⁸ Jadu'n ytuni yjajti jim Betábara, jim'amy ahuin ma Jordán mij nii, jim anajty Juan jäy yajñibety. Juan tiy'ajt yejc co Jesús je' anajty yjugy'ajt yegam mūd ich ajt nbocy ycixpi.

Jesús nayyajhuindzigihuaanip ma Dios mūd jäy ajcxy ypocy ycixpi

²⁹ Chi je com jabom co ixxy Jesús anajty ñimiñyii, chi Juan nimay je jäy ajcxy:

—Cha je' ymiñ je Dios yjäy huidibi Dios nayyajhuindzigihuaanip mūd naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzigiy mūd ypocy ycixpi.

³⁰ Jada je' huidibi ich nnigapxypich co jac'axam ymiina'ñ ma ich tüg yēdyjc huidibi ñigi Dios ymic'ajt y'oy'ajt mūdity ca'ydí ich. Com jiiyim anajty yi' yjugy'aty co oga'n naaxhuiñybi chondacy. ³¹ Oy ich anajty ca' yi' n'ixy'adyiijich huingíxy jipcíxy, nyajñibejtich jäy, jigix yi judíojäy nejhuñhuip ajcxy co ji yajpaady je Cristo je huidibi Dios ymic'ajt mūd.

³² Chi Juan nigodiy'ajt'ajty je Cristo co ymina'ñ:

—Ich ti n'ixyich yi Espíritu Santo jilby choñ tzajpjoty, jadu'n yquēxgy nej tüg muuxy, e chi y'ixtacy ma Jesucristo. ³³ Tiydudägy ca' ich anajty n'ixy'adyiijich. Je Dios huidibi xyquejxich jäy yajñibejtpi, je' ich anajty jadu'n ti xyñimäyich co je jäy ma anajty n'ixyich je Espíritu Santo ñigidägyii anajty etz yhui'my ma je'. Je' je' jadu'n anajty huidibi y'adigihuipy yjottigihuipy Dios yjihui'ñ ymic'ajt ma je jäy ajcxy. ³⁴ Cham nnigapxpetyich co ich ti n'ixyich je jäy, e nyejcpyich tiy'ajt co je' je' je Dios y'ung.

Jesús yhuin'ixx nijējity jäy huidibi anajty ydiscípulo'andaanipy

³⁵ Chi je com jabom jopy jim anajty Juan yajpaady mūd metz jäy huidibi ixpijcp ma yi'.

³⁶ Chi anajty ajcxy tzachhuindicxy Jesús co anajty jim ñaxy, chi Juan nimay je metzpi jäy:

—Oc'ijxcix ocnejhuñyigix, cha je jäy huidibi Dios nayyajhuindzigihuaanip mūd naaxhuiñyjäy ypocy ycixpi.

³⁷ E je metzpi jäy huidibi anajty ajcxy ixpijcp ma Juan, co jadu'n ajcxy midoy nej Juan ymíñañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanicxyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicxy, e chi ajcxy ijxy ma anajty ti yja'ttägy. Je huin'it ximbi chi jim je' mid yhui'miy, com mijminacyxi anajty co ajcxy jim ymejch.

⁴⁰ Andrés, je Simón Pedro ymiguex, je' anajty tüg tzoonip huidibi nimetz ajcxy midou jadu'n nej Juan ymíñañ, etz je' anajty ajcxy ti padzooñ Jesús. ⁴¹ Chi jada' Andrés oy ixtäy y'uch Simón tim jayijp, chi nimay:

—Ti ich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés midnicxy Simón ma Jesús, e chi Jesús huindicxpejty, nimay:

—Miich je' Simón, Jonás miich xy'ung'ajtp. Miich je' mxii'aduyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choon ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je cajt ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibixxi Natanael, chi jadu'n nimay:

—Ti ich ajcxy je' nbaadyich je jäy huidibi yajni gapxp yajnimiydacp ma Moisés ñecy, etz yi Dios y'ayucnajtzcaxxiybi ñecy. Yi' je' je Jesús, José y'ung huidibi cogajpip jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäy? Com ac jadu'n jäy ymíñañ co ac jibicjäydijc jim tzinaayb.

Chi Felipe ymíñañ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n ymíñañ:

—Cha tüg judíojäy huidibi ca' pin huin'inipy.

⁴⁸ Chi Natanael ymíñañ:

—¿Nej miich ti xy'ijxcapyich pin jäy ich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich jiiy'emy ma je higueri quipypa't, huin'it ich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Mid co ti nnimäy co jiiy'emy anajty miich ma je higueri quipypa't co ich miich ti n'ijxcapy. ¿E ti mdimjanimibicy? Jactimmijhuinma'ñ etz jactimmij'oy'ajt m'ixamyb mbadamyb.

⁵¹ Chi Jesús jadu'n ymíñañ:

—Janch tim tiy ich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'ángeles ajcxy choon tzajpjoty xyñigidägyich, e ypa'ttigiygixy jadüg'oc tzajpjoty. Choongixy yja'tcixy ma ich je jäy huidibi tzoon tzajpjoty.

2

Jesús y'oy ma anajty jäy nix#duñ tüg pijcin jim Caná

¹ Midugixibi anajty maabi ajcxy Jesús minaymígapxigixy, ma je cajp huidibi yxi Caná ma je Galilea naaxjot jim anajty huinxidungixy tüg jäy huidibi anajty ti ypicy. E jim anajty nañ jadu'n Jesús ytaj. ² Chi Jesús miid je' ydiscípulos ajcxy yajhuooy jim ma je xii anajty ytuñyí yjadyí. ³ Ti anajty vino ycijxtaayñí, huin'it Jesús ytaj ñimayñí:

—Ca'p ajcxy miidiñ vino.

⁴ Chi Jesús y'adzooy ytaj nimay:

—Ca' ti jotmay nmiididyich miid miich töxyäy. Hich nhorí ca'ni paady mina jäy ajcxy nyajnejhuíhuibich pin ich.

⁵ Chi je ytaj nimay je tumbidijc ajcxy:

—Mdúngxipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty nii y'ity. Je nii anajty ajcxy yajtumyb co anajty ajcxy yciubujcixy jadu'n nej ypocy ixpujicixy, jadu'n anajty ajcxy judíojäy costumbre miidity. Tügpi tzaadu'tz ymiid anajty yjot metz majt tugig majt nii. ⁷ Chi Jesús nimay je tumbidijc ajcxy:

—Yaj'ujtzicix yi tzaadu'tz miid nii.

E chi ajcxy yaj'ujztay mabaat y'a'ujtnaxy je tzaadu'tz. ⁸ Chi Jesús yminañ:

—Yajpidzimigix cham yi nii, e yajnicxcix jiiyby ma huidibi ane'mb ma yi caydac uuctac.

Chi ajcxy yajnicxy je nii. ⁹ Co jada' je ane'mbi jihuiymajch je nii ti anajty yvinocojy, chi mihuoy je yëydijc huidibi anajty ti ypicy. Je ane'mbi ca' anajty nejhuíy ma anajty je vino ti choñ. Jëyi anajty je ytumbidijc ñejhuíyb co nii anajty ajcxy yajpidzimigixy ma je tzaadu'tz. ¹⁰ Chi je ane'mbi nimay je huidibi anajty ti ypicy:

—Tüg'óciy jäy ajcxy huidibi xiidumb, hue' ajcxy yajtumyb jayijp je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mihuima'ñ huidibi Jesús ytuun jim Caná ma Galilea ñaaxjot. Chi yajniguëxigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹² Co jadu'n tüg'óciy ytuni yajti, chi Jesús y'idacy jim ma je cajp huidi yxi Capernaum miid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³ Tim huingon anajty je pascua xii huidibi judío ajcxy ytumy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huidibi anajty ajcxy ajuuybi adoocpi, jadu'n nej ma ymiñ huaj, borregi, etz muuxy (huidibi jäy ajcxy Dios yajhuindzigíyb). Nañ jim meënyhuingogombidijc anajty ajcxy y'íñaaygixy ma ymesa. ¹⁵ Chi Jesús yaj'oyiiy tüg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meënyhuingogombidijc ymeëñ cöxijtnajxtayi, e chi ymesa tijhuimbijttaayi. ¹⁶ Chi nimay je muuxytoocpidijc ajcxy:

—Yajpidzimigix jada muuxy ya. Ca' ich nDeedy ytijc yhuaani ajcxy ajuydac adooctac.

¹⁷ Je' ajcxy huidibi anajty Jesús yaj'ixpijcpy chi ajihuigooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuíyich Dios ytijc, paady ooy nnijottigoyich Dios ytijc.”

¹⁸ Chi je judío ixpijctijc ajcxy y'amidooy Jesús:

—¿Ti mihuima'ñ miich xy'ocyaj'ixambich ajcxy nej tüg iixpejt, pen janch miidity cötujcin co m'ixhuojppidzimday yi ajuuybi adoocpi ajcxy?

¹⁹ Chi Jesús y'adzooy:

—Yajhuindigooygix jada Dios ytijc, e codugig xii ich yi' jadüg'oc nyajpidigipy.

²⁰ Chi jada' je judío ixpijctijc ajcxy y'adzooy:

—Huixchigüipx tudujc jimijt yhuäcxijpy co jäy cojy jada Dios ytijc. ¿E miich tijy myajpidigamy codugüigxii?

²¹ Per ca' je' anajty nigapxy je Dios ytijc. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugüig xii. ²² Chi jada' co Jesús yjugypijcy codugüig xii maabi anajty y'ögy, je huidibi anajty ajcxy ti yaj'ixpicy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuiy nej jäy ajcxy yjot yhuinma'ñ müidity

²³ Co anajty Jesús yjimity Jerusalén pascua xijoty, mayjäy ooy ymibijci co ajcxy ijxy je mijhuinma'ñ huidibi anajty ytumyb. ²⁴ Jesús ca' anajty yjaty ñaygïyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuiydaayb anajty nej jäy ajcxy nidüg nidüg yjot yhuinma'ñ müidity ca' tzocy pin yajnimähuiyb ti anajty ajcxy ytunamy, com ñejhuiydaayb nej jäy ajcxy yjot yhuinma'ñ müidity.

3

Nicodemo oy ytiy'ajtpicy ma Jesús

¹ Jim anajty tüg yëdyjc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtp ma je judíojäy ajcxy ymiiñ. ² Chi jada' Nicodemo ymiñ coodz ma Jesús anajty y'ity, chi nimay:

—Huindzin, nejhuiyb ich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'ñ huidibi miich mdumyb, pen ca' Dios ymic'ajt müidity.

³ Chi Jesús y'adzooy:

—Janch janch ich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tiibi ymij'anäcciiyñi y'ocnima'xung'ajttigájtzpity jadüg'oc? ¿Nej jëbi jadüg'oc ytigïy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ich miich yam jadu'n nimäy pen ca' jäy yjothuimbity etz ñibety, pen ca' Dios yjihui'ñ ymic'ajt y'adigïyii yjottigïyii, ca' jëbi ytigïy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymüd ajcxy ñinïcx yjugy'ajtin. Je jäy ajcxy huidibi Dios yjihui'ñ ymic'ajt adigïyipy jottigïyipy ymüd ajcxy Dios yjugy'ajtin. ⁷ Ca' nej mnayjihuihuïyb co ti nnimäy co copicy mma'xung'adipy huinjemy, co Dios yjihui'ñ ymic'ajt xy'adigïhuipy xyjottigïhuipy. ⁸ Com je poj miinïyb hueñytimyma'amyity, e nmidoohuim co y'a'ich, e ca' nnejhuiyim ma choñ e ma ñicxy. Jadu'n nej je poj ypojoy e nganejhuiyim ma choñ, nañ tim jadu'n yjaty müd je Espíritu Santo, ca' nejhuiyim nej yjaty co adigïy jottigïy jäy.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhuinjihuiyich.

¹⁰ Chi Jesús y'adzooy:

—Miich huindzin'ajtp ma yi judíojäy, ¿ti co ca' mhuinjihuiy jadayaabi tiy'ajt? ¹¹ Janch janch ich miich yam jadu'n nnimäy co ich etz nDeedich ngapxyp yi huidibi nejhuiygixypich, e nyejcpyich ajcxy tiy'ajt yi huidijaty ich ti n'ïjxcixyich. Miich ajcxy judío ixpicytjic ca' ajcxy mgöbijccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydägibich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ich je jäy tügpajc huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'ñ, e chi yajcruudzpety jim

mijtig'iduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'ñich. ¹⁵ E tüg'óciy jäy ajcxy pinjaty xymijpidaacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuüy yi naaxhuiñjyäj

¹⁶ Ooy mijcajee Dios tzocy jihuüy yi naaxhuiñjyäj co yecy y'ung tügpaicpi mïd jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy.

¹⁷ Dios ca' quejxy y'ung ya naaxhuiñ co tzaachytunipy yi naaxhuiñjyäj ajcxy mïd ypocy ycixpi. Paady y'ung quejxy co yajpocynñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy mïd ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuiipy ajcxy ma Dios, co ca' mijpidaci ajcxy Dios y'ung tügpaicpi. ¹⁹ Paady ycixpi Dios tzaachytunañ mayjäy mïd ypocy ycixpi, com co Dios quejxy y'ung mïd ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jïin huidi codicxip jäy ajcxy ma chinaayin yjugy'ajtin. Per ca'p ajcxy je naaxhuiñjyäj mijpidacy je jïin, jadu'n nej jihuüy ajcxy anajty yjacotcujcity co chinaaygixy agoodztuuyb, com je' co nigi tzachnijot'ajtcixy jibic-huinma'ñ. ²⁰ Com je jäy ajcxy huidibi jibic-huinma'ñ tzach nijot'ajtcixp, ca' ajcxy tzojci Dios ytiy'ajt, jadu'n nej jihuüy ca' chinähuaangixy ma jïin ytiicxin. Ca' ajcxy y'amidoo'idani Dios y'ayuc, ca'ydi ñiguëxigy je jibicpi huidibi ajcxy ytumyib. ²¹ Je jäy ajcxy huidibi cuydumb Dios ytiy'ajt, je' ajcxy ñiminipy Dios y'ung ytiy'ajt, jadu'n nej jihuüy jïin nimiingixy ma ytiicxy, huen jatyimy niguëxigy co oy ytungixy etz co Dios ytiy'ajt ajcxy mïdity ma yjot yhuinma'ñ.

Juan (el Bautista) tiy'ajt yejc ma jäy ajcxy mïd Jesús ycixpi

²² Co jadu'n ytuni yjajti, chi Jesús ñicxy jim Judea naaxjot mïd ydiscípulos ajcxy. Chi ajcxy jim yhuäcxipy. Jim ajcxy jäy yajnñibety. ²³ Nañ jadu'n Juan anajty yjāyayñibety jim Enón, com jim anajty ooy comñi, e jim anajty jäy ymingixy etz ññibetcity. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuüy ni jējity huidibi anajty Juan yaj'ixpijcyp etz tüg jäy nej jēbi huaad ypocy ñayayñihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty miich jim mïd jim'amy Jordán mijñnaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäyayñibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt mïdity, pen ca' Dios ni ti mic'ajt ymöyii. ²⁸ Miich ajcxy mnejhuüyb co nmīnaañich co ñich ca' nējity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypicy je yēydijc je' je' mïd'idam je ytōxyijc. E je tōxycapxpi huidibi ti yaj'oyiy je pijcin, ca' je' mïd'idañ je tōxyjäy, jēyi co yjotcugiy co yōcmidoohui je tōxyjäy ñay co yjady ma je' ytiyc co ypigaani. Cristo jadu'n je' nipaady nej tüg tōxyjäy ñay, e je tōxyjäy jadu'n je' nipaady nej Dios yjāy. Je Cristo ymïd'idaanipy Dios yjāy. Jadu'n ñich nipaady nej tüg tōxycapxpi, ti Dios yjāy nyajni'ixiyyich jigix mijpidáaccixipy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopicyity co Jesús ymij'ajt paatnipy, e ñich ndung ycixnipy ymayñipy.

Dios y'ung tzoön jüby ma Dios

³¹ Chi Juan yjacmīnañ:

—Je Cristo huidibi jüby tzoön ma Dios jacmij xpijcin mïdity ca'ydi naaxhuiñjyäj ajcxy. Je jäy ajcxy huidibi ya naaxhuiñ ijtp, ymīnaaxhuiñjyäj ti yaj'ixpijigixy, e je' ajcxy

ñidiy'ajt'ajtpy je naaxhuiñjyā y'ixpijcin. Je Cristo tzoon jiihy tzajpjoty, jacmijcajee yi' ma y'ayuc ytiy'ajt ca'dyi pin. ³² Je Cristo ñigapxyp huidibi ti ixy e ti midooy, e yi'y'ayuc ytiy'ajt ca' jay ajcxy cōbigaangixy. ³³ Je jay ajcxy huidibi cōbijcp Dios y'ung y'ayuc ytiy'ajt, je' ajcxy ñigapxpejtyp co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt ñigapxpejti, com Dios ti möy yi' y'ung yi' yjihui'ñ ymicc'ajt mijcajee. ³⁵ Dios Teedy chojcyp yjihuiyb y'ung, e tüg'óciy ymic'ajt ytiy'ajt yi'ti yajmigo'ixiidyā. ³⁶ Je jay ajcxy pinjaty mibijcp Dios y'ung, ymiid'ajtpy ajcxy y'alma je jugy'ajtin huidibi ca' ycixy ytigooy. Je jay ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je yi' ypaadipy ajcxy Dios chip y'ejcín.

4

Jesús ñaybaati miid tüg töxyjāy jim Samaria

¹ Chi je Huindzin Jesús ayuc midoy jadu'n nej anajty je fariseojāy ajcxy ycapxcixy ymiydaaccixy co je Jesús jacmayjāy anajty yaj'ixpiy etz yajñibety ca'ydi Juan. ² Oy Jesús ca' anajty jāy yajñibety ci'm. Hue' janchtiy je' ydiscipulos anajty ajcxy jāy yajñibejtp. ³ E co Jesús jada nejhuñy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxihuañ jim Samaria. ⁵ Chi jada' yja'ty huington ma je mij cajp huidi xijip Samaria, jim ma anajty tüg pi'ccajp huidi xijip Sicar, mihuington je naax huidibi Jacob anajty ti möy y'ung José. ⁶ Jim anajty Jesús yajpaady ma je Jacob ñigondac. Com ti anajty Jesús y'anucxiiyñi miid je tüyöyñi, chi y'ijxtacy jim ma je ñigondac anajty. Hue' anajty xii jim cugihuaanip. ⁷ Chi jim yja'ty ñigombi tüg töxyjāy. Chi Jesús yminañ:

—Ich yajñi'uucc. ⁸ Com je' ydiscipulos ajcxy huidibi anajty Jesús yjaymiid'ajtip, ti anajty ñicxcixy cajpjoty juuyb pijcp.

⁹ Chi je töxyjāy y'adzooy huidibi anajty cogajpjp Samaria:

—¿Na'amy co ich ñi xypijctzoohuich? com miich hue' miich judío jāy, e samaria jāy ich. (Co yi judío jāy etz samaria jāy ca' ajcxy ñaygodigiyiigixy.)

¹⁰ Huin'it Jesús y'adzooy:

—Co ixipy m'ocnejhuñy je oybi huidibi Dios yejcyp miid miich ycixpi, e m'ocnejhuñy ixipy nañ jadu'n pin xypijctzoohuipy yi ñi, janch co miich ixipy xyñimāyich: “Ich yajñi'uucc”. E ich miich ixipy nmooyb ñi huidibi jugy'ajt yegipy huinixii.

¹¹ Chi je töxyjāy y'adzooy nimay Jesús:

—Huindzin, miich ca' mmidity ti miid myajpidzimipy yi ñi, e yi ñijut cicy yi' ooy. ¿Ma tijy m'ocpadañ yi ñi huidibi yajjugy'ajtp? ¹² ¿Nej jacñigi tijy miich mij mnayyajnaxyii, ca'ydi ich ajt n'apndeedy Jacob? Je'je' huidibi jada ñigop yaj'oyñy. Jacob etz y'ung y'anäg ñi'uuc ma jada ñigop, e nañ jadu'n yajñi'uucy yhuaj y'iyujc ajcxy ya.

¹³ Chi Jesús y'adzooy nimay je töxyjāy:

—Tüg'óciy pinjaty ñi'uucp ma jada ñigop tidzi huñb ajcxy jadüg'oc. ¹⁴ Yi jāy ajcxy pinjaty ñi'uucp huidibi nmooybich, ca' ni mina ytidzihuñyb, com hue' yi ñi huidibi nyejcypich, ahuimbidity ma je jāy jadu'n nej tüg ñigop huidibi yegam jugy'ajtin huidibi ni ca' ycixy ytigooy.

¹⁵ Chi je töxyjāy y'adzooy:

—Huindzin, ich mooyg yi ñi, ca'ydi jabom jabom ndidziyijich, e ca'ydi n'ocjacmíinibich ma jada ñigop ñi yajpidzimbi.

¹⁶ Chi Jesús y'adzooy:

—Nix yajtzon mñāy, e miid miin.

¹⁷ Chi je töxyjāy y'adzooy:

—Ca' nmidityich nñāyich.

Chi Jesús y'adzooy:

—Janch tiy'ajt jadu'n nej miich mīna'ñ, co ca' mīdity mñāy. ¹⁸ Com ti mīddzināy migoox yēdyjc, e huidibi cham mīd, ca' mñāy'adyii. Janch tiy'ajt jadu'n nej ti m'adzooy.

¹⁹ Chi je töxyjäy ymīnañ:

—Huindzin, cham nhuinjihuīyich co miich je' tūg huidibi Dios yhuij'ajt ycujc'ajt mīd. ²⁰ Ich ajcxy n'ap ndeedyich hue' je' ymīnañ co jēbi ya huaad ich ajcxy nDios'ojadajtcixyich ma jadyaabi huingombi copjiip. E miich ajcxy judíojäy ymīnaangixy co jim Jerusalén je' ma huaad jēbi nDios'ojadajtim, ca' jac ma.

²¹ Chi Jesús y'adzooy nimay je töxyjäy:

—Töxyjäy mīpidäg ich n'ayuc. Co ypadamy je xī je tiempo co ni ya ma miich ajcxy mDios'ojadajttac, e ni jim Jerusalén jāy ca' ojadadipy ajcxy yi Dios Teedy. ²² Miich ajcxy ca' tiy'ajt mnejhuīygixy nej jēbi huaad mDios'ojadajtcixipy. Ich ajcxy judíojäy nejhuīybich ajcxy je tiy'ajt nej jēbi huaad nDios'ojadajtim. Com tūg judíojäy je huidibi yajnidzooctāhuam je jāy ajcxy y'alma ma Dios. ²³ Ypadamy je xī je tiempo, e jada jēdu'n je tiempo co je huidibi ajcxy tydudägy Dios ojadajtp, y'ojadadipy ajcxy Dios mīd oyjot oyhuinma'ñ etz mīd Dios ytiy'ajt. Com yi Dios Teedy y'ixtaayb yi jadu'mbi jāy huidibi ojadadib mīd oyjot oyhuinma'ñ. ²⁴ Dios ca' ñinīcx mīdity, jadu'n je' nej poj ca' yaj'ixy. Je jāy ajcxy pinjaty ojadajtp Dios, copicy co huen ojadajtcixy mīd tudägyjot tudägyhuinma'ñ, etz mīd Dios ytiy'ajt.

²⁵ Chi je töxyjäy ymīnañ:

—Ich nejhuīyb co je Mesías ymīna'ñ huidibi naydijaanip Cristo, co je' ymīnipy, huin'it xyajni'ixihuaanim tūg'óciy tiy'ajt.

²⁶ Chi Jesús y'adzooy:

—Ich jēdu'n je Cristo huidibi miich mīdmīydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihuiy ti anajty co Jesús je töxyjäy mīdmīydägy, e ni pin ca' yaj'amidooy ti anajty chojcyp ti anajty yñimīydacyp mīd yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tūg yēdyjc ixcim. Ti ich yi' xyajnimaydäyich tūg'óciy tijaty ti nduñich. ¿Nej ca' jada' yi' jējity je Cristo?

³⁰ Chi choñ ooy mayjäy cajpjoty, ninīcxy ajcxy Jesús. ³¹ Yam anajty ajcxy Jesús ydiscípulos chachnimāyii adzip:

—Huindzin, occaay.

³² Chi Jesús y'adzooy:

—Ich nmīdich tūg caayin uucin huidibi miich ajcxy ca' mnejhuīygixy.

³³ Paady je' ydiscípulos ajcxy tzachhuinmay, ac jēyi ajcxy, nayñimayigixy mīñ xipy:

—¿Nej ti pinjaty yajcayyii yaj'ügyii?

³⁴ Chi Jesús ymīnañ:

—Jotcuyc nayjihuijich co ti nguydunich Dios chojcīn. Com yi' ti xyquexyich ya naaxhuiñ, e nguydūunibich yi' y'ané'mīn. ³⁵ Miich ajcxy mīnaangixp co jactigoy'ijtni jamīdaax po' mīna cosecha nyajpidīcim. Oc-huinmay miich ajcxy, ich nmīna'ñich, jēbi nyajpidīcim yi cosecha cham cham. Huindīcxcix yi mayjäy huidibi xyñigīdaacim chooñ cajpjoty. Ni'ixi yi' ajcxy y'ity co amīdo'idaangixy Dios y'ayuc. Jadu'n ajcxy nipaty nej tūgi cosecha huidibi ti ymījaani, jēbi nyajpidīcim. ³⁶ E pinjaty cosecha yajpidīcp ypaatyp ajcxy ymuju'ñ. Nañ tim jadu'n miich ajcxy huidibi myajmībijcy yi jāy ajcxy co ich je' je Cristo, mbaadipy ajcxy jotcuyc'ajtin, etz huidibi ajcxy xymībījcpich xymījpīdaacpich ypadamy ajcxy y'alma jugy'ajtin huidibi ca' ycixy ytigooy. Tim jadu'n nej je jāy ajcxy huidibi niip etz huidibi cosecha yajpidīcp yjotcugīygixy mīd co je cosecha ti y'ity, nañ tim jadu'n je jāy ajcxy huidi cojaay jecy'ajty jada Dios y'ayuc etz miich ajcxy jotcugīygixy aguipxy co yi jāy ajcxy xymīpidägyich. ³⁷ Paady tiy'ajt je ayuc huidibi mīnam: “Tūg jāy niip etz jadūg jāy cosecha yajpidīcp.” ³⁸ Ich ti nguexyich miich ajcxy myajmībīgipy jāy huidibi ti paady

Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ñich je' je Cristo.

³⁹ Mayjäy huidibi cogajpîp jim Samaria ymîpîdac ajcxy je Jesús co je' je' je Cristo, miid co je töxyjäy anajty ti ymîna'ñ: “Ti yi' xyajnimäyich tijaty ñich ti nduñich.” ⁴⁰ Co je samariajäy ajcxy yjädy ma Jesús yhuinduu, chi ajcxy cohuanîy huen hui'my. Chi Jesús jim yhui'mîy mejtz xîi. ⁴¹ Janch mayjäy ooy nîgi mîbijcy mîpîdacy Jesús, co je' je' je Cristo co ajcxy ci'm midomîydacy je Jesús. ⁴² Chi ajcxy nimay je töxyjäy:

—Canaan jëyi co miich ti xyajnimäy ñich ajcxy, paady ycîxpî ñich ajcxy yam nmîbicyich. Nañ ti ñich ajcxy yam ci'm n'amîdo'ityich, paady ñich ajcxy nejhuîy co janch jada yjējity je Cristo huidibi yajnidzögam yi naaxhuiñyjäy ajcxy y'alma ma Dios.

Jesús yajtzooc tûg gobierno mîjtungmîdpi ymang

⁴³ Mîmejtz xîibi anajty co Jesús chooñ jim, nicxy jim Galilea. ⁴⁴ Jesús ci'm anajty ti ymîna'ñ:

—Co jäy ajcxy huidibi miid Dios yhuij'ajt ycujc'ajt yajpaady ma yci'mgajp, ca' pîn yajmîj'adyi. ⁴⁵ Co Jesús yja'ty jim Galilea naaxjot, huidi anajty ajcxy jimîp agujc jotcuyc ajcxy cöbijcy Jesús, com ti anajty ajcxy ixcixy tijaty mîjhuinma'ñ anajty ti tuñ jim Jerusalén xîjoty, com nañ ti je' anajty ajcxy jim y'oygixy xîi'ajtpî.

⁴⁶ Chi yhuimbijty Jesús jadüg'oc jim Caná ma Galilea ñaaxjot, ma je nîi yajvinocojy. Jim Capernaum anajty tûg rey mîjtungmîdpi huidibi anajty y'ung pîjcîp. ⁴⁷ Co je' nejhuîy co Jesús anajty ti yhuimbity Galilea co anajty ti y 'oy Judea, chi nînicxy, e chi cohuanîy co Jesús huen nicxy y'ung tzoyîyîi huidibi anajty ögaanîp. ⁴⁸ Huin'it Jesús ymînañ:

—Pen ca' ixyipy ti m'ixy mîjhuinma'ñ etz tijaty ixcpejt, ca' ixyipy mmîbicy.

⁴⁹ Chi y'adzoy je rey ymîjtungmîdpi:

—Huindzin, tun may'ajt nînicx ñich n'ung ma ca'nî y'o'cyñî.

⁵⁰ Chi Jesús ymînañ:

—Huimbit ma mdîjc, je m'ung jugy'ajtnî je'.

Chi je yëydîc mîbijcy Jesús nej anajty ti ñîmäyîi, chi ñîcxy jadüg'oc ma ytiyc. ⁵¹ Nîcxiñîp anajty co ytumbî ajcxy oy yjîpcobadîyîi, e chi ñîmaayî co je' y'ung ti anajty y'agîdägy.

⁵² Chi yaj'amîdooy ajcxy ti hora anajty ti yhuaadjihuîy, chi ajcxy y'adzooy:

—Ixîy cujc yxîi naxy je toyîi y'ixmajtnî.

⁵³ Paady je ungdeedy jihuî'ñybijcy co huin'it je' jada' je tiempo co anajty Jesús ti ñîmäyîi: “Je m'ung jugy'ajtnî je'.” Chi jada' mîbijcy mîpîdacy Jesús miid tûg'óciy jäy huidijaty anajty yajpat ma yjîin ytiyc.

⁵⁴ Je' je' je mîmetzpî mîjhuinma'ñ mîj'oy'ajt huidibi Jesús ytun co chooñ jim Judea ñîcxy jim Galilea ñaaxjot.

5

Jesús yajtzooc tûg jäy huidibi anajty yci' ytecy xuuxy

¹ Co jadu'n ytunî yajti jim Jerusalén anajty ajcxy judíojäy tungixy tûg mîjxîi. Huin'it Jesús jim ñîcxy jim Jerusalén. ² E jim Jerusalén jim anajty nîi abojtzîg y'ity, mîhuington je poch aguu huidi xîjîp puerta de las ovejas. Je it hue' anajty yajtijy hebreo'amy Betesda, e ymîid anajty mîgoox it yhuinguembetpa't. ³ Ma je huinguembetpa't mayba'mjäy anajty jim chachcöгнаaygixy; je huintzpi, cîducpc tecytucpi, cîxuxy tecyxuxypî, huidibi anajty ajcxy jim tzach'ahuijxp mîna je nîi y'ocpu'xhuimbity. ⁴ Com tûg ángel anajty yhuimbety y'adijy ma je nîi abojtzîg y'ity, chi je nîi yajyücxy. E je jäy pînjaty anajty yajîp jîiby nîjoty tigîyb co je nîi yücxy, huin'it anajty ajcxy chooccixy, oy ixyipy ti pa'm ajcxy tim mîidîty. ⁵ Jim anajty tûg yëydîc hue' anajty ti ypa'mgögnây îîpx majmocx tugîg jimîjt. ⁶ Co Jesús îjxy jim ycögnây, îjxcajpy co anajty je' jecyîp chachmîjtacnî, chi nimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmüdidyich tög yëdyjc pin ñich xypidägy jüby nüjoty co anajty nü y'ahuidijtcoty. E paady ycixpi co oy ñich jim njamechich ma yi nü, ti huingbi ñitigüyñi.

⁸ Chi Jesús ymíañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigüy yöybi najxpi janch mic oy. Hue' anajty tög sábado xü co choocy. ¹⁰ Paady je judíojäy xpicityjc ajcxy nimay je huidibi anajty ti chögy:

—Hue' yam sábado xü, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tübi ñich xyajtzögy, yi' ñich jadu'n ti xyñimäy: “Yajpidig yi mmaabejt etz tüyöychon.”

¹² Chi ajcxy y'amidooy:

—¿Pin müich jadu'n ti xyñimäy: “Yajpidi yi mmaabejt etz tüyöychon?”

¹³ Per je tübi anajty chögy, ca' anajty je' nejhuü pin je' anajty. Com ti anajty Jesús niyöydogooyñi ma je mayjäy huidibi anajty ajcxy jim tzachajtip ma je it. ¹⁴ Chi jada' jacomjocy minaybaatti Jesús jim ma Dios ytijc, e chi Jesús ymíañ:

—Cuentipic nej ti mdzögy, ca' ni ti bocy mjactunipy. Co pocy mjactunipy ca' yjocy co tim nigü jibic nicxy mjaty.

¹⁵ Chi je yëdyjc ñicxy oy je' yajnimäy je judío xpicityjc co hue' je' anajty Jesús, je huidibi anajty ti yajtzögyi. ¹⁶ Paady ycixpi je judío xpicityjc anajty tzach'ixhuidijtcixy tzachpahuidijtcixy je Jesús, e yaj'ögaangixy müd co anajty jäy ti yajtzögy sábado xü. ¹⁷ Chi Jesús ymíañ:

—Ñich nDeedy tumb je' cham, ca' ypooocy, paady ycixp ñich nañ jadu'n nduñich cham ma müich ajcxy sábado xü.

¹⁸ Co Jesús jadu'n ymíañ, paady ycixpi je judío y'xpicityjc ajcxy nigü yjactotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xü yajmij'ajtcixy, etz co jadu'n ymíañ: “Dios yi' nDeedy'ajtypich.” Paady ycixpi ajcxy judío y'xpicityjc ymíañ co Jesús ci'm anajty ytüghuañ müd Dios.

Dios ymooy je y'ung ymic'ajt

¹⁹ Chi Jesús ymíañ:

—Janch janch ñich müich ajcxy yam jadu'n nimaaygixy co ñich Dios nDeedy'ajtypich. Ca' huaad ti nduñich müd ngi'mjot ngi'mhuinmañich. Jëbi janchtiy nduñich huidibi n'ixxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi' Dios Teedy ooy yi' tzocy jihuü yci'm'ung, paady xya-jni'ixiydaaybich tög'óciy yi' huidibi ytumyb. E nañ xyajni'ixihuaambich jacmijjatypí mijhuinmañ, ca'ydi jadayaabi mijhuinmañ nej ajcxy ti m'ixxycixy nej jada pa'mjäy ti chögy, paady ycixpi nigü mhuinmayipy ajcxy. ²¹ Jadu'n nej Dios Teedy yajjugypicy yi' o'cpi, e chi yajtzinäy jadüg'oc. Nañ jadu'n ñich anajty ndimymöhuamyb. ²² Com je Dios Teedy ca' je' ci'm ocyajciyöyaani ocyajtecyöyaani jäy ajcxy ypocy. Hue' tög'óciy je ymic'ajt xyajcidiydaayich co ñich ndiydunipyich tög'óciy naaxhuiñjäy, com Dios nDeedy'ajtypich. ²³ Hue' tög'óciy je ymic'ajt xyajcidiydaayich, jigix tög'óciy jäy xyajmij'adipyich. Je jäy ajcxy huidibi ca' xyajmij'adañich, nañ ca' ajcxy yajmij'adañ Dios Teedy huidibi xyquejxich ya naaxhuiñ.

²⁴ Janch janch ñich müich ajcxy yam jadu'n nimaaygixy: Co hueñypinjäyity, pinjaty xy'amido'ijtibich n'ayuc, e ymibijcyp ymijpidacyp je tübi xyquejxyich ya naaxhuiñ, ymüd je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytunañyü müd

ypocy ycixpi. Hue' janchtiy co y'ögipy, chi janchtiy jadügtecy yjugypigipy. ²⁵ Janch janch ñich miich ajcxy jadu'n nimaaygixy co yi xii tiempo paatnipy, e cham jëdu'n ti paady, co yi jäy ajcxy tiibi y'o'ccixy ymidohuipy yi n'ayucich, co anajty ngapxyich, com Dios yi nDeedy'ajtpyich. Pin jäy anajty midoob n'ayucich jugypigip jadüg'oc ajcxy. ²⁶ Com yi Dios Teedy mic'ajt miid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios ñich nDeedy'ajtpyich. ²⁷ Ti Dios xymöyich ymic'ajt jëbi ndiyduñich je jäy ajcxy miid ypocy ycixpi, com ñich je' je jäy huidibi tzoon tzaipjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co ñich anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi miid ypocy ycixpi.

Dios tiy'ajt yejc co Jesús ymiid anajty mic'ajt

³⁰ Ca' ni ti huaad nduñich miid ngi'mmic'ajtich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt miid nyajcüyöya'ñich nyajtecuyöya'ñich jäy ajcxy ypocy. Jadu'n tiydudägy nduna'ñich, com ca' ñich nduñich ngi'mdzójcinich. Yi' ñich ndumyb nej Dios Teedy tzocy, yi huidibi xyquejxich ya naaxhuiñ. ³¹ Co ixypy ñich ci'm nayñigodiy'ajt'adyiijich, ca' ixypy miich ajcxy mmijpidägy n'ayuc ndiy'ajtich. ³² Com huingbi yi' huidi xyñigodiy'ajt'ajtpich co ñich Dios ymic'ajt nmüdidyich, e nejhuüybich co janch yi' huidibi xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypi pin ñich. ³⁴ Co jadu'n nmüna'ñich co Juan xyajnidiy'ajt'atyich co ñich je' je Cristo, ca' jadu'n nmüna'ñich co ooy ycopicyity co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nüdzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jün huidibi tixcp jajp, e miich ajcxy tüg jaxigy ti mxondaaccixy miid yi' y'ayuc ytiy'ajt. ³⁶ Nigi ñich Dios y'ayuc ytiy'ajt nmüdidyich ca'ydü Juan. Yi' mijhuinma'ñ huidibi ndumybich miid Dios Teedy ymic'ajt. yi' xyajnigüexigibich co ñich ya naaxhuiñ Dios Teedy xyquejxich. ³⁷ Yi' Dios Teedy tiibi xyquexyich, yi' ci'm yejc tiy'ajt co ñich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuñyijp maga'ijxi. ³⁸ Ni ca' miich ajcxy nmüdity yi' y'ayuc ma mjot mhuinma'ñ, miid co miich ajcxy ca' xymijpidägyich co ñich je' je jäy huidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiby mdiy miich ajcxy mbaadipy tiy'ajt nej jëbi ajcxy mjogy'adipy co anajty ti m'o'ccixy, e yi' Dios ylibro nañ ñich yi' xyñigapxp. ⁴⁰ E ca' miich ajcxy mgöbigaangixy ñich n'ayuc ñich ndiy'ajt, jigix ajcxy jugy'ajti mbaadipy huidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjäy ajcxy xycömayipyich. ⁴² Nnejhuüybich, nej miich ajcxy mjot mhuinma'ñ nmüdity, co ca' ajcxy Dios ytiy'ajt mguyduuni. Ca' ajcxy migüg mdzojccixy mijhuüygixy jadu'n nej Dios tzocy jihuüy jäy ajcxy. ⁴³ ñich ti nmüñich miid nDeedyich ymic'ajt. Miich ajcxy ni ca' xycöbicyich. Pen ji huingbi jäy ymiñ miid yci'mmic'ajt, ca' müdity Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjaıtcixipy nej ñich miich ajcxy xymijpidägyibich, miid co ajcxy ci'm mdzachnaygömayáangixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy nmüna'nipy co ñich miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je huidibi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jadu'n ixypy ñich miich ajcxy xymijpidägyich. Com Moisés ñich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjaıtcixipy nej ajcxy mijpidäaccixy ñich n'ayuc.

6

Jesús ymoy jāy jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy nīnaxy, huidibi nañ jadu'n xīijip Tiberias mejy. ² Janch mayjāy anajty Jesús ypanicxyii axam co anajty ajcxy ixy je mijhuinma'ñ tijaty anajty Jesús ytumyb ma mayba'mjāy. ³ Chi Jesús ypejty ma tūg cōgop, chi jim y'ixtacy mīid je' ydiscípulos ajcxy. ⁴ Tim huingonip anajty je pascuaxii huidibi anajty judío jāy ajcxy ytumyb. ⁵ Chi Jesús ijxy co janch mayjāy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjāy huidibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuīyb yajxon ti anajty ytunamy. ⁷ Chi Felipe y'adzooy:

—Ni ycahuaadihuip mejtz mil peso meēñ, co ixyipy ajt n'ocjuyaanim caayin uucin, e nmōhuaanim cijp tūg'aa cijp mejtz'aa jēyi.

⁸ Tūg Jesús ydiscípulo, hue' anajty yxii Andrés, Simón Pedro y'uch, je' jadu'n nimay Jesús:

⁹ —Cha tūg pi'c'anāg huidibi mīid migoox cebada tzajcaagy, e mejtz acx ung. E ni ycatijity yi' yi migooxpi tzajcaagy, etz mejtz acx ung mīid jada mayjāy.

¹⁰ Chi Jesús nimay je' ydiscípulos ajcxy:

—Yaj'ixtacta' yi mayjāy.

Mīijyot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yēdyictijc, abicy yi tōxyjādyijc etz y'ung y'anāg ajcxy. ¹¹ Chi Jesús je tzajcaagy conīgy, chi yajnajxy Dioscojuyip, chi yajnidagīyday je jāy ajcxy huidijaty anajty jim iñāayb, mooy jadu'n nej pin tim tzocy je tzajcaagy etz je acx. ¹² Co je mayjāy cayday, chi Jesús nimay je' ydiscípulos ajcxy:

—Yajmujcta' ajcxy yi cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach mīid je tūbi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ijxy je mijhuinma'ñ huidibi anajty Jesús ti tuñ, chi je jāy ajcxy ymīañ:

—Janch jēdim jada je yēdyijc huidibi Dios y'oy'ajt ymic'ajt mīid, je huidibi anajty mīinam ya naaxhuiñ.

¹⁵ Co Jesús nejhuīy co ajcxy anajty yajrey'ada'ñyīi, chi jada' jadūg'oc huinhuāctuttay je mayjāy. Chi ñicxy naydūg ma tūg yuugjot.

Jesús yōy nīhuingīxy

¹⁶ Co oy chu'īyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigīy, ñicxy ajcxy jim Capernaum jadūgpi mejypa'. E ti anajty ycoodzīyñi, e ca'ni anajty Jesús ajcxy ñihuimbidiini. ¹⁸ Chi tūg mijpoj ymīñ, chi je mejy ytigīy oy yūcxpi. ¹⁹ Ti anajty ajcxy ytūyōy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytūyōy mejyhuingīxy. Chi ajcxy ooy ñay'adzigīy. ²⁰ Chi Jesús ymīañ:

—Ich yi', ca' mdzigīygyxy.

²¹ Chi ajcxy jotcuyc Jesús yajbarcotigīy. Chi tim mic'amy ajcxy ymejch jim ma mejypa' ma anajty ajcxy ñicxcīxy.

Mayjāy ixtaay Jesús

²² Je mayjāy huidibi anajty ajcxy ti yhui'mīy jim'amy y'ahuin, y'ijx ajcxy co ac jēyi Jesús ydiscípulos ajcxy ytigīy ma tūg barco, e Jesús ca' anajty ti ytigīy barcojoty mīid je' ajcxy. Ac jēyi anajty ajcxy ti choongīxy barcojoty. ²³ Je com jabom nīejity barco huidibi anajty jim tzomb Tiberias, ti anajty yjādy mīhuingon ma je it, ma anajty Jesús ti yajcaagyxy je mayjāy mīid je Huindzin Dios ymic'ajt, huin'it co Dios mībijctzoy. ²⁴ Chi je mayjāy ajcxy

ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiyday, chi ajcxy oy ixtaaygixy Jesús jim Capernaum.

Jesús ymōhuamy jāy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús mejy ñinaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjāy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yi' ycixpi co ajcxy ti m'oc'ixy yi mijhuinma'ñ huidibi ti nduñich, paady ycixpi miich ajcxy xy'ixtāyich co ajcxy nyajcay cūxyi mīd tzajcaagy.

²⁷ Chi Jesús yjacminañ:

—Ca' myajjotmaygojcixy yi jicxy picy huidibi cijxp tigooyb. Yi' janchtiy mijottigooygixy yi jicxy picy huidibi xymōhuipy yi jugy'ajtin huidibi ca' ycixipy ytigoyipy tücci'yi. ñich miich ajcxy je jugy'ajtin nmōhuibich huidibi ca' ycixipy ytigoyipy tücci'yi, com ñich je' je jāy huidibi tzoon tzajpjoty, e Dios Teedy xymic'ajtmooyich, jēbi ñich miich ajcxy nmōy jugy'ajtin huidibi ca' ycixipy ytigoyipy tücci'yi.

²⁸ Chi ajcxy nimay Jesús:

—¿Ti ñich ajcxy jēbi huaad nduñ, nej jēbi ñich ajcxy Dios xymijotcuyc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy mīd ñich ajcxy, jēbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinma'ñ mdunamy? ³¹ ñich ajt nmij'ap nmijteedy ajcxy jecy'ajty yjicxy pijc ajcxy je maná jim ma tītznaax'it. Jadu'n ymiñ jaybety ma jadu'n ymina'ñ: “Dios yejcpy jicxy picy huidibi tzoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jicxy picy janchypī huidibi tzomb tzajpjoty. ³³ Je jicxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jāy huidibi ca' ycixipy ytigoyipy tücci'yi.

³⁴ Chi ajcxy nimay Jesús:

—Huindzin, ñich ajcxy mooyg je jicxy picy janchypī jabom jabom huinixi.

³⁵ Chi Jesús yminañ:

—Ñich jēdu'n je jicxy picy huidibi miich ajcxy xymōhuip jugy'ajtin huidibi ca' ycixipy ytigoyipy tücci'yi. Co jāy ajcxy xyñimiinich, e xymijpidāgyich, huin'it ca' yi' ajcxy yuböccoda'ñyii niminaxi, e co jāy ajcxy xymibicyich, ca' yi' ajcxy ytidzihua'ñyii niminaxi.

³⁶ Com ti ñich miich ajcxy nimāy, oy ñich miich ajcxy ti xyja'ijxycixy, per ca' mibijccixy.

³⁷ Tüg'óciy pinjaty ñich nDeedy yquexyp ma ñich, xyñimimbich yi' ajcxy. E pinjaty xyñimimbich etz xymijpidaacpich, ca' ñich yi' ajcxy n'ixtijy. ³⁸ Canan paady ycixpi ñich ti ndzooñ tzajpjoty ngidāgich ya naaxhuiñ co nduna'ñich ngi'mhuinma'ñ. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹ Yi' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yi' huidijaty xymooybich. Hue' janchtiy yi' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yi' jadu'n tzojcp co pin jāy ñich anajty xy'ijxpich, e xymijpidaacpich, ymīd'adipy je' ajcxy jugy'ajtin huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtni mina anajty ytigadza'ñ.

⁴¹ Chi je judío jāy ajcxy ooy yajtzibiy yajcapxiy co anajty Jesús jadu'n ti ymina'ñ: “Ñich je' je jicxy picy huidibi tzoon tzajpjoty.” ⁴² Jadu'n anajty ajcxy chachmina'ñ:

—¿Nej ca' je' yjadaaajty je Jesús, je José y'ung, je huidibi ajt ytaj yteedy n'ixy'ajtim? ¿Nej co jadu'n ymínañ: “ñich ti ndzooñich tzajpjoty”?

⁴³ Chi Jesús y'adzooy:

—Ca' myajtzibíygyxy myajcapxíygyxy ac miichíy ajcxy. ⁴⁴ Ni pin jáy xycaniminípyich, pen ca' jayíjp Dios Teedy huinma'ñ ymóyí co xymíjpidägibich. E co xymíjpidägibich, chí nyajjugypigípyich jadüg'oc co anajty naaxhuiñbyi ti yhuaad'ajtni mína ytigadzípy. ⁴⁵ Com jadu'n ymíñ jaybety ma Dios ñecy huidibi je jáy ajcxy anajty Dios ytiy'ajt míd huidibi jecy'ajty yjaay co Dios yaj'ixpigamy je jáy ajcxy tüg'óciy. Paady ycíxpi tüg'óciy jáy huidibi mídoob Dios y'ayuc etz y'ixpijcp Dios ytiy'ajt xymíjpidägibich ajcxy.

⁴⁶ Ca' ni tüg jáy ti íxy yí Dios Teedy. Jéyí je jáy tügpaic huidibi ti choñ ma Dios, yí je' ti íxy yí Dios. ⁴⁷ Janch janch ñich miich ajcxy yam jadu'n nimaaygíxy co pinjaty xymibíjcpich xymíjpidaacpich, ymíd yí' ajcxy yjugy'ajtn huidibi ca' ycíxípy ytigoyípy tüccí'yí. ⁴⁸ ñich jédu'n je jüxcy pícy huidibi jugy'ajt mooyb je jáy huidibi ca' ycíxípy ytigoyípy tüccí'yí. ⁴⁹ Miich ajcxy mmíj'ap mmíjteedy yjüxcy'ajti ycaagy'ajti ajcxy je maná jim títznaaxtuum'it jecy'ajty. E chí ajcxy y'o'ctay. E ni ca' ajcxy jugy'ajtn paty huiníxíbi. ⁵⁰ Je jüxcy pícy huidibi nnigapxypich huidibi tzoon tzajpjoty, co jáy ajcxy jüxcípy, ymíd'adípy ajcxy je jugy'ajtn huidibi ca' ycíxípy ytigoyípy tüccí'yí. ⁵¹ ñich jédu'n je jüxcy pícy huidibi ti choñ tzajpjoty, etz ti ycidägy ya naaxhuiñ huidibi jugy'ajtn yejcp. Co jáy ajcxy jüxcyp je jüxcy pícy, ymíd'adípy ajcxy je jugy'ajtn huidibi ca' ycíxípy ytigoyípy tüccí'yí. Je jüxcy pícy huidibi nyegaamyich míd naaxhuiñjáy ajcxy ycíxpi, je' je' je nninícxich.

⁵² Chi je judío y'ixpícytíjc ajcxy ooy yaj'ayucyooñ yajcapxyooñ, ac je'yí ajcxy ñayñimáayigíxy:

—¿Nej jada yéydíjc tíjy yí' ñinícx njüxcy'ajtim?

⁵³ Chi Jesús ymínañ:

—Janch janch co ñich miich ajcxy yam jadu'n nimaaygíxy, pen ca' miich ajcxy mdzüdzcíxy ñich nninícx, e pen ca' m'uuccíxy ñich nní'py, ñich je jáy tügpaic huidibi tzoon tzajpjoty, ca' miich ajcxy míd'adípy yí Dios yjugy'ajtn. ⁵⁴ Com pinjaty ñich nninícx xychu'tzíp etz ñich nní'py xy'uucibich, ca' je ajcxy yjugy'ajtn ycíxípy ytigoyípy tüccí'yí, oy ajcxy yja'o'ccíxy. Nyajjugypigípyich je' ajcxy jadüg'oc co anajty naaxhuiñbyi ti yhuaad'ajtni mína ytigadzípy. ⁵⁵ ñich nninícx janchypi jüxcy pícy yí', etz ñich nní'py janchypi ügy yí'. ⁵⁶ Co yí jáy ajcxy xymibícyich xymíjpidägyich jadu'n ni paady nej jihuíy ñich nninícx xychüdzí, etz ñich nní'py xy'uuci. Chí y'idípy ajcxy huiníxí ma ñich, etz ñich n'idípyich huiníxí ma je' ajcxy. ⁵⁷ Dios Teedy huidibi xyquejxich ya naaxhuiñ ymíd jugy'ajtn huidibi ca' ycíxy ytigooy. ñich ti nbaadyich ma Dios Teedy je jugy'ajt huidibi ca' ycíxy ytigooy. Nañ mbadamy miich ajcxy jugy'ajtn huidibi ca' ycíxy ytigooy ma ñich. Co miich ajcxy xymíjpidägíbyich, jadu'n anajty nipaady nej jihuíy mjüxcy'ajtigíxy ñich nninícx. ⁵⁸ Je jüxcy huidibi tzoon tzajpjoty, e ycidacy ya naaxhuiñ co jáy ajcxy jüxcy'adyí, yajtzínáhuíb je ajcxy, ca' ajcxy yjugy'ajtn ycíxípy ytigoyípy tüccí'yí. Yí mmíj'ap mmíjteedy huidibi jücx'ajtigíxy je maná jecy'ajty, o'ctay ajcxy, ca' ajcxy paty je jugy'ajtn huiníxíbi.

⁵⁹ Jadu'n Jesús ymíydacy jim ma je judío jáy ajcxy ñaymujctac jim Capernaum co anajty jim yaj'ixpícy.

Mayjáy ca' mijotcujc'ajty Jesús y'ayuc

⁶⁰ Co ajcxy Jesús y'ayuc mídodaayi, nigujc-huäcxy je huidibi anajty íxpíjcp ma Jesús. Chí ajcxy capxpídzímy, e jadu'n ajcxy ymínañ:

—Ooy chachchípy je Jesús y'ayuc. Ca' huaad jí pin huinjihuíyday.

⁶¹ Com Jesús ñejhuíyb nej ajcxy anajty yajtzibíy yajcapxíy, chí ymínañ:

—¿Nej ca' miich ajcxy mijotcuje'aty je tzip ayuc jadu'n nej cham ajcxy ti nyajnimäy?
⁶² ¿Nej xymijpidägbich ajcxy, pen m'ixpy ixipy ajcxy co anajty nba'ttigiyich jadüg'oc
 jiiby tzajpjoty ma ndzooñich? Com ich je' je jäy huidibi tzoon tzajpjoty. ⁶³ Je jäy ajcxy
 yjihui'ñ, yi' je' ñinix yajjugy'ajtip, e je jäy ajcxy ninix ca' yi' ni ma chobaady, pen ca'
 midity yjihui'ñ. Co miich ajcxy mgöbigipy yi ayuc tibi ngapxyich, huin'it ajcxy mbaadipy
 Dios yjihui'ñ (je Espíritu Santo), etz mbaadipy ajcxy jugy'ajtin huidibi ca' tücci'yi ycixy
 ytiгоoy, oy mja'o'ccixy. ⁶⁴ Per nigujc-huäcxy ma miich ajcxy pinjaty ca' mibicy ich n'ayuc.

Com Jesús ñejhuib anajty jayijpni pinjaty ca' ymibigyii y'ayuc, etz pinjaty anajty
 ceyegaanip ma ymidzip. ⁶⁵ Chi Jesús yjacminañ:

—Paady yci xpi jayijp ti mñina'ñich, co ca' ni pin jebi ich xymijpidägy, pen ca' Dios Teedy
 jayijp yhuinma'ñ ymoyii co cöbiga'ñ ymoyii co cöbiga'ñ ich n'ayuc.

⁶⁶ Huin'it mayjäy ajcxy, je huidibi anajty xpijcp ma Jesús, chi ajcxy huinhuäctut
 ixmajtzn ajcxy Jesús. Ca' ajcxy y'ocjacpanicxni. ⁶⁷ Chi jada' Jesús nimay je nimajmetz
 discípulos ajcxy:

—¿Nej nañ xy'ixmadzaambich miich ajcxyi?

⁶⁸ Chi y'adzooy Simón Pedro:

—Huindzin, ca' jac ni pin ich ajcxy jebi huaad nmijpidägyich, com miich tügpajc mñid
 je ayuc huidibi xyajni'ixiyich ajcxy nej jebi huaad ich ajcxy nbaadipy jugy'ajtin huidibi
 ca' yci xpy ytiгоyipy tücci'yi. ⁶⁹ Ich ajcxy nmibijcypich e nnejhuibich co miich je' je jäy
 huidibi tzoon ma Dios huidibi huädz yhuinma'ñ ymñid.

⁷⁰ Chi Jesús yminañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ
 mñidity.

⁷¹ Je Judas Iscariote, Simón ymang, anajty yti py. Com je' je' anajty ceyegam Jesús ma
 ymidzip, oy je' anajty yajejity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yjaajtaayi, jim anajty Jesús yhuidity Galilea naaxjot, ca' anajty
 ñicxa'ñ jim Judea naaxjot, co anajty yi judíoäy ajcxy huidibi midzip'ajtip yaj'öga'ñyii.

² Tim huingon anajty je judíoäy yxi, hue' anajty ajcxy yxi goyaxy Tabernáculo xi. ³ Chi
 Jesús ñimaayi y'amigüg y'uch yëdijcpi:

—Tzon miich ya, nicx jim Judea naaxjot nayguëxigi mayjäyjoty. ⁴ Com huenpinity
 huidibi nayguëxigaanip mayjäyjoty, ca' ajcxy naygoyüchyii. Mdunipy miich mijhuinma'ñ
 xijoty, jigix je mayjäy xycömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy:

—Ich nxi ndiempo ca'ni paty mina ndigihua'ñich jim Jerusalén jadu'n nej je Mesías.
 Janch miich ajcxy oytimyminaajity jebi mnayguëxigixy ma je mayjäy ajcxy. ⁷ Ca' huaad
 jebi miich ajcxy, naaxhuiñyay ajcxy, xymidziptzoñ. Janch ich xymidzip'ajtpich ajcxy
 yi', je' co ngapxpizimyich yi yjibic-huinma'ñ huidibi ajcxy ytumyib. ⁸ Nicx miich ajcxy
 jim ma xi yjadyii. Ich ca' nñicxa'ñich cham, com ca'ni ich ndiempo yhuaad'aty mina
 ndigihuiyich jim Jerusalén jadu'n nej je Mesías.

⁹ Jadu'ñyidi jëda'ajty yminañ, chi yhui'miy jim Galilea.

Jesús ñicxy jim Jerusalén xijoty

¹⁰ Co Jesús y'amigügtijc ajcxy jayijp ñicxtay xi'ajtpi jim Jerusalén, chi Jesús nicxy nañ
 jadu'n ayüch ameech ma anajty xi yjadyii. ¹¹ Xijoty je judíoäy ooy ajcxy ja'ixtay Jesús, e
 chi ajcxy yminañ:

—¿Ma jada' je Jesús?

¹² Ma je mayjäy ajcxy may anajty ajcxy tzachnigapxcixy tzachnimydaaccixy Jesús. Nijëjity anajty yminaangixy: “Tüg yëydijc oyjäybi yi’”; e nañ nijëjity yminaangixy: “Ca’p yi’ y’oyjäyity, nigo jäy tzachhuin’iñ.”

¹³ E ni pin anajty ca’ capxpídzimay mayjäyjoty co y’oyjäyity anajty Jesús, müd co anajty ajcxy je judío xpicityijc ajcxy tzachtzigiygixy.

¹⁴ E mijxiijoty Jesús ñicxy jim ma Dios ytijc, chi jim ytigiy yaj’ixpijci. ¹⁵ Je judío y’ixpicityijc tzachmaañyhuindicxcixy anajty je Jesús, chachmínaangixy anajty:

—¿Nej jada’ tijy jada chach’ixpicityi? e ca’ ni ma ti y’escuel’aty.

¹⁶ Chi Jesús y’adzooy:

—Jada ixpijcin ca’ ich jada një’adyii. Yi’ jada yje’ je huidibi xyquejxich ya naaxhuiñ.

¹⁷ E pen ji pinjaty cuydunaani yi’ ytiy’ajt je huidibi xyquejxich, huinjihuipy yi’ jada ixpijcin, pen janch Dios yi’ ytiy’ajt, o pen ich yi’ ngi’m ayuc huidibi ngapxypich. ¹⁸ Je jäy huidibi yci’m’ayuc yci’mdiy’ajt müd yaj’ixpicy, ci’m je’ ñaygömaya’ñyii. Janch pinjaty tzojcp co ycömayiyb je’ yhuindzin huidibi ti yquexyii, tiydudägy je’, ca’ je’ y’anijity.

¹⁹ Janch co Moisés miich ajcxy xymoy Dios ytiy’ajt. E ni tüg miich ajcxy mgacuydungixy je tiy’ajt. ¿Ti ycixpi co miich ajcxy xyaj’öga’nich?

²⁰ Chi je jäy ajcxy y’adzooy:

—Mujcu’ miich müd ma mjot mhuinma’ñ. ¿Pin miich yam xyaj’ögam?

²¹ Chi je’ ajcxy nimay:

—Müd tügpajc mijhuinma’ñ tiibi nduñich sábado xii, yi’ miich ajcxy mij mdzachjihuuyb mdzachhuinmaayb. ²² Moisés miich ajcxy xyajnajtz’ane’miy je cötujcin co ajcxy m’ung mdiy’ajttiyyigixy (oy je’ ca’ yajtzondac, miich janchtiy ajcxy mmij’ap mmijteedy Abraham yajtzondac), e paady ycixpi miich ajcxy m’ung mdiy’ajttiyyigixy oy yjapocxxiidumity.

²³ E chi jada’ ca’ydi miich ajcxy Moisés ytiy’ajt mnixiici myajxiici, paady ajcxy m’ung mdiy’ajttiyyigixy oy sábado xijoty. ¿Ti miich ajcxy co xymijotma’tcixich co tüg jäy ti nyajtzögyich sábado xijoty? ²⁴ Ca’ m’ix’ijxcixy mba’ijxcixy mmigüg müd anii. Yajciyöyi yajtecyöyi miich ajcxy jäy ypocy müd tiy’ajt.

Ooy ajcxy tzachhuinmay je jäy, peni Jesús je’ je’ anajty je Cristo

²⁵ Chi ajcxy nijëjity Jerusalénjäy yminañ:

—¿Nej ca’ jada jada’ yjëjity je huidibi ajcxy yjayaj’ögamyi? ²⁶ Oc’ix ajcxy, ta ycapxy ymiydägy ixna’ que’xna’, e ca’ ajcxy huam nimäy. ¿Nej ti jada ajcxy ixcajpcixy yajxon tungmüdpí ajcxy co jada yjëjity je Mesías? ²⁷ Ich ajt nnejhuuyim ma jada yëydijc chooñ. Per je Cristo co anajty je’ ymiñ, ni pin je’ canejhuipy ma je’ anajty choñ ma ycogajpity.

²⁸ Co Jesús jadu’n midooy, co anajty yaj’ixpicy ma Dios ytijc, huin’it Jesús mic yminañ:

—Mnejhuuyb miich ajcxy pin ich, e ma ndzooñich. Per ca’p ich ti nmiñich ya naaxhuiñ müd ich ngi’mdzojcin. Yi’ huidibi ich ti xyquexyich, tiydudägy yi’ ytuñ, e ca’ miich ajcxy yi’ m’ixy’ajtigixy. ²⁹ Ich janchtiy n’ixy’ajtypich je’. Je’ co jim ndzooñich ma je’, e je’ ich xyquejxich.

³⁰ Huin’it ajcxy jamadzaañ, per ca’ ni pin cñixajiy, com ca’ni anajty paady je xii je tiempo mina ñaygiyegiyb ma ymidzip ajcxy. ³¹ Per mayjäy ooy mibijcy je Jesús y’ayuc, e yminañ ajcxy:

—Co anajty je Cristo ymiñ, ca’ jada’ nigi mijhuinma’ñ tuna’ñ ca’ydi jadayaabi yëydijc.

Je teedy mijtungmüdpí yquejx ajcxy soldadotijc huen majtcixy Jesús

³² Co je fariseojäy ajcxy ayuc midooy co jäy chachmínaangixy jadu’n co je Jesús je’ je’ je Cristo, chi ajcxy quejxy tungmüdpí huen Jesús yajmach. ³³ Paady Jesús yminañ:

—Ich jac-huäcxijpich hueeni ma miich ajcxy, chi nñicxa’ñich jadüg’oc jiiby tzajpjoty ma huidibi xyquejxich. ³⁴ Xy’ixtähuibich miich ajcxy, e ca’ ich miich ajcxy xypaadipy. Ma anajty ich nñicxyich, miich ajcxy ca’ jaydëbi jiiby mñicxcixy.

³⁵ Huin’it je judíojäy xpicityijc acjëyi ajcxy ñay’amidoohui:

—¿Ma jada jada' y'ocnicxa'ñ, e nicxy iich ajt ngapaatim? ¿Nej nicxiib jada' ma je judíojäy ajcxy huiðibi yajpaatcixy yxi yaa ma yi griegojäy ajcxy, e yaj'ixpiigaangixy yi griegos ajcxyi? ³⁶ ¿Nej jada' yajhuimbizimy? co ymina'ñ: “Xy'ixtähuibich miich ajcxy, e ca' xypaadibich, e ma anajty iich nyajpaady, ca' miich ajcxy jayðebi jiiby mnicxcixy.”

Je nñ huiðibi jugy'ajt yejcp huiðibi ca' ycixy ytigoy

³⁷ Co je mijxi ycodicxni, chi Jesús ytinay'ahuiy, chi mic ymina'ñ:

—Pen ji pinjaty tiy'ajt nejhuihua'ñ jadu'n nej ixypy jäy ytidziyi tzocy yi nñ, huen xyñimiiñich, etz nmöhuibich tiy'ajt. ³⁸ Je jäy ajcxy pinjaty xymibijcpich xymijpidaacpich, ytinipy ajcxy jadu'n nej Dios ñecy ymina'ñ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcuyc'ajtin etz jugy'ajtin pada'ñ huinixi, ytimyñipaaty jadu'n nej nñ ypidzimy janch com ma tüg niigop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigihuaanip jottigihuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzajpjoty.

Jäy ajcxy ca' ñay'ayuc-huinjihuixi mñd Jesús ycixpi

⁴⁰ Je mayjäy ajcxy huiðibi anajty ti midooy nej Jesús anajty ti ymina'ñ, nidüg nimetz ymina'ñ:

—Jadaabi je' je tiydudägypi jäy huiðibi Dios y'ayuc najtzcaxxiyip.

⁴¹ Jacjadyi ymina'ñ ajcxy:

—Je' yi' je Mesías.

Per nijëjity ajcxy huiðibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huiði xiijp Belén ma David ycogajpity.

⁴³ Je mayjäy ca' anajty ajcxy ñay'ayuc-huinjihuixigy mñd Jesús ycixpi. ⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidaacy Jesús

⁴⁵ Chi ajcxy policías huiðibi tumb ma tzajptjic nihuimbijty ajcxy je teedy mijtungmñdpi etz je fariseojäy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxi tüg yëydijc jadu'n ti ymïdägy jadu'n nej yijibi yëydijc.

⁴⁷ Chi je fariseojäy ajcxy ymina'ñ:

—¿Nej nañ ti miich ajcxy myajhuin'ñigixy? ⁴⁸ Ca' nminaanim ti ajcxy teedy mijtungmñdpi o fariseojäy ajcxy mibijccixy Jesús. ⁴⁹ Je mayjäy huiðibi mijpidaaci Jesús y'ayuc, ca' ajcxy y'ixpicyity ma Dios ycötujcin. Dios yi' ajcxy tzaachytunib.

⁵⁰ Nidügti ajcxy je' anajty je Nicodemo huiðibi oga'n'aty ni'oy Jesús coodz, je' ymigügtjic jadu'n nimay:

⁵¹ —Jadu'n iich ajt ngötujcin xy'ane'mim co ca' huaad ndzaachytuunim pinjäy, pen ca'p jayijp n'ixyöyim nbayöyim ti anajty ti tuñ.

⁵² Chi ajcxy ymigügtjic y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jiiby mnejhuihuipy co jim Galilea ca' jim chona'ñ pinjäy huiðibi Dios y'ayucnajtzcaxxiyip.

⁵³ Chi ajcxy ñicxtay nidüg nidüg ma yjin ydijc.

8

¹ Chi Jesús ypa'ttigüy ma je cögop huiðibi xiijp Olivos. ² Com jabom jopyñi Jesús yquidacy jadüg'oc ma Dios ytiyc. Chi mayjäy ñimiini. Chi y'ixtacy, e chi ytigüy yaj'ixpijci.

³ Je jāy ajcxy huiḁibi Dios ycōtujcin yaj'ixpijcp etz je fariseojāy ajcxy m̄idmiiñ tūg tōxyjāy ma Jesús huiḁibi anajty ti ytundigooy m̄id huingbi yēydijc. Chi ajcxy p̄idacy cujc'amy ma je mayjāy. ⁴ Chi ajcxy n̄imay Jesús:

—Huindzin, jadaayaabi tōxyjāy huingbi yēydijc m̄id ti ytundigoy. ⁵ Moisés ytiy'ajt iich ajcxy xyñajtz'ane'miy jecy'ajty co yajtzaagögädzipy jada jadu'mbi tōxyjāy. ¿Nej miich m'ocminambi?

⁶ Jadu'n ajcxy n̄imay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jēbi huaad yajpocycāy Jesús. Chi Jesús yhuindacy, chi jada' ytiḡiy jaaybi m̄id ycīhuāx naaxcīxy. ⁷ Com je' anajty ajcxy chachyaj'amidooyb, chi Jesús ytinayḡy. Chi ajcxy n̄imay:

—Pin jāy ji ma miich ajcxy ca' ti pocy m̄idity, huen yi' jayijp tzaagäch jada tōxyjāy.

⁸ Chi Jesús yhuindacy jadüg'oc. Chi ytiḡiy jaaybi jadüg'oc naaxcīxy. ⁹ Co ajcxy jadu'n ayuc yajhuinjihuiydaayi, chi ajcxy ooy chōyduñ, com yjihuiy ajcxy ypocy. Chi ajcxy yjihuaēctay. Chi je mijjāydyjc ajcxy ñaybattzondayi. Jesús yhui'm̄iy nimetz m̄id je tōxyjāy huiḁibi j̄im anajty tinaayb huingon. ¹⁰ Chi Jesús yhuāccugiy jadüg'oc n̄imay je tōxyjāy jada':

—¿Ma ajcxy je jāy? ¿Ca' ni pin ti xychaachytuñ m̄id mbocy ycixpi?

¹¹ Chi je tōxyjāy y'adzooy:

—Huindzin, ca' ni pin.

Chi Jesús ym̄inañ:

—Ni iich miich ngatzaachytunipy m̄id mbocy ycixpi. Nicx, e ca' m'ocjacpocytuunip.

Jesús jadu'n nipaady nej tūg j̄in huiḁibi t̄icxp̄i

¹² Chi jadüg'oc Jesús yjactigiy miydacp ym̄inañ:

—Iich je tiy'ajt nm̄id ya ma naaxhuiñyāy, jadu'n iich nipaady nej tūg j̄in huiḁibi t̄icxp̄i ma jāy ajcxy. Pinjāy xymijp̄idaacp̄ich ym̄id tiy'ajt nej jēbi huaad tudāgy chināhuipy, jadu'n nipaady nej jihuiy ytūyōy ma j̄in yt̄icxin.

¹³ Chi je fariseojāy ajcxy n̄imay Jesús:

—Miich ci'm nayñidiy'ajtip co miich je' je Cristo, e ca' m̄diy'ajt chobaady.

¹⁴ Chi Jesús y'adzooy:

—Janch co iich ci'm nayñidiy'ajt'adyiijich co iich je' je Cristo. E iich ndiy'ajt janch yi'. Com nnejhuiybich ma ti ndzooñich, e ma nnicxa'ñich. E miich ajcxy ca' mnejhuiygixy ma ndzooñich, e ma nnicxa'ñich. ¹⁵ Miich ajcxy mm̄igüg mbocy'ijxyp m̄id mgi'mhuinma'ñ. Ca' ni pin nbocy'ixyich m̄id ngi'mhuinma'ñich. ¹⁶ Pen iich anajty nyajciyōybich nyajtecyōybich jāy ypocy, tiydudāgy anajty jadu'n nduñich. Com iich ca' nyajpaadyich naydüg. Je' xym̄id'ijtp̄ich je Dios Teedy huiḁibi ti xyquexyich. ¹⁷ Com cojaay jadu'n y'ity ma miich ajcxy mgōtujcin ñecy: “Pen nimetz jāy nigodiy'ajt'aty huentiijity, tzoobatp ajcxy y'ayuc.” ¹⁸ Iich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtp̄ich, co je' ya ti xyquexyich.

¹⁹ Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' iich miich ajcxy xy'ijxcapy co iich je' je Cristo, nañ ca' ajcxy m'ixy'adyii iich nDeedy. Co ixypy ajcxy xy'ijxcapyich, nañ jaydēbi ixypy ajcxy nejhuiy pin iich nDeedy'ajtyp.

²⁰ J̄im jadu'n Jesús ycapxy ymiydacy ma je meeñ'ijttac, co anajty yjāy yaj'ixpicy ma Dios ytiyc. E ca' ni pin ymajtzi. Com ca'ni anajty yxi yhora anajty paadyñi m̄ina ñayḡiyeḡiyb ma ymidzip.

Jesús ñimay ym̄igūgtijc co ca' huaad ñicxy ma je' anajty ñicxy

²¹ Chi Jesús yjacnimaayi ajcxy:

—Ich nnicxaanip ich, miich ajcxy xy'ixtähuibich. Mïd ajcxy mbocy ycixpi m'ögaangixy, com ma nnicxa'nich ca' huaad miich ajcxy jëbi nnicxcixy mïd mbocy ycixpi.

²² Huin'it je judíojäy ajcxy ac jëyi ñayñimaayi:

—¿Nej nicxy jada' ci'm ñayyaj'öga'ñiyiji? Com jadu'n ymïna'n co ma yi' ñicxy, ca' huaad ich ajt jëbi nnicxim.

²³ E Jesús nïgi nïmay'idich anajty:

—Miich ajcxy ya naaxhuiñ mmïdity ndiy'ajtcop. Ich tzajpjoty nmïdidyich ndiy'ajtcopich. Miich ajcxy naaxhuiñjy äy ajcxy ytiy'ajt mmijpidaacipy. Ich ca' mmijpidägyich naaxhuiñjy äy ytiy'ajt. ²⁴ Ich miich ajcxy jadu'n nnïmaayb co m'ögam miich ajcxy, e ca' ajcxy Dios mbocy xyhuinmeecxip. Copicy ajcxy m'ögipy, e ca' Dios mbocy ajcxy xyhuinmeecxip, pen ca' xymibigáangixyich co ich je' je huidibi jëbi mbocy ajcxy xyhuinmeecxip.

²⁵ Chi ajcxy nïmay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaigyixy pin ich, co oga'n ndigiiyich jäy yaj'ixpijcpï. Cham jadüg'oc nyajnimaaigyixy. ²⁶ May ooy tijaty ayuc nyajnimähuaangixy nej ti mdundigoogyixy ma Dios ytiy'ajt. Cham ca' ajcxy nyajnimaydähuipy. Je huidibi ti xyquexyich ya naaxhuiñ je' tüg'óciy tiy'ajt mïd. E ngapxpïdzimiyich je ayuc je tiy'ajt jëyi huidibi ti nmïdooyich ma je'.

²⁷ Je jäy ca' ajcxy huinjihuïy co Dios Teedy anajty Jesús ñigapxyp. ²⁸ Paady Jesús nïmay ajcxy:

—Co anajty miich ajcxy ti xyajcruudzpetyich, ich je jäy huidibi tzoön tzajpjoty, huin'it miich ajcxy mnejhuïhuïp co ich je' je Cristo. E co ich ca' ngi'mhuinma'n nduñich. Yi' ich ya nmiydacypich huidibi Dios Teedy ti xyaj'ane'myich. ²⁹ Je Dios Teedy huidibi ti xyquexyich, yi' ich mïd n'ityich. Ca' ich yi' xy'ixmachich. Com co ich njatytumyubich jabom jabom huidibi yi' chojcyp.

³⁰ Co Jesús jadu'n ymïnañ, chi mayjäy ooy ymibijcy.

Jäy huidibi mibijcp Jesús ycuychinaayipy yi' ytiy'ajt

³¹ Chi Jesús nïmay je judíojäy ajcxy huidijaty anajty ti ymibicy:

—Pen mmibijc ajcxy cixyjot huinijot tüg'óciy ich n'ayuc, e ca' m'ijxmadzipy ajcxy ich n'ayuc, huin'it ich miich ajcxy jëbi njäy'adyii. ³² Huin'it jëbi ajcxy mnejhuïhuïpy Dios ytiy'ajt. E. Dios ytiy'ajt xyñihuaángixip ma je mjibic-huinma'n ooy xy'ané'mgixy.

³³ Chi ajcxy y'adzooy:

—Abraham ich ajcxy nmij'ap nmijteedy'ajtpy. Ca' ich ajcxy huaad ni pinjäy xy-jac'ane'my. ¿Nej co miich jadu'n mïna'n: “Dios ajcxy xyñihua'nip ma yi' mjibic-huinma'n xy'ane'mgixy”?

³⁴ Chi Jesús y'adzooy:

—Janch janch ich miich ajcxy jadu'n nïmaagyixy co tüg'óciy pinjaty pocy ytundib, jibicp yi' ane'mip. Tim jadu'n nipaady nej tüg tumbi huidi codoogï y ijtp, yi' yhuindzin jatytim'y'ane'mip. ³⁵ Yi' tumbi huidibi codoogïy ijtp, ca' yhui'ma'n ma je jäy ytiyc huinixii. Yi' jäy y'ung janchtiy hui'mam huinixii ma yteedy ytiyc. ³⁶ Pen Dios y'ung miich ajcxy xyajpïdzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ané'mgixnipy. Tim jadu'n nej Dios y'ung y'ity, ca' ti jibicpi y'ane'myii.

³⁷ Nejhuïybich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ögaambich. Je' co ca' mijpidaaccixy ich n'ayuc huidibi njayajnimaaigyixyp.

³⁸ Ich miich ajcxy nyajmïdmïydaacyp tïbi n'ixyich huidibi ndeedyich ytumyb. E miich ajcxy yi' mdumyb nej m'ap mdeedy ti xyajnimaaigyixy.

³⁹ Chi ajcxy y'adzooy:

—Hue' ñich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixyipy ajcxy mdungixyp jadu'n nej Abraham tuuñ. ⁴⁰ Janch ñich miich ajcxy xychachyaj'ögáangixyich, e ti ajcxy njayajnimäy je huidibi ñich ti nmidooyich ma Dios. Ca' Abraham yaj'ögy je jäy ajcxy huidijaty anajty Dios ytiy'ajt mïd, jadu'n nej miich ajcxy m'iditzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'ñich ajcxy ndigoy'ungity. Je' tügpajc ñich ajcxy ndeedy'ajtyp Dios Teedy.

⁴² Chi Jesús yminañ:

—Peni Dios ixyipy ajcxy mdeedy'ajtyp, xychojcpich xymijpidaacpich ixyipy ajcxy. Com Dios ti xyquexyich ya naaxhuiñ, e jii by ndzooñich ma Dios. Ca'ñich ngi'mdzojcin ycixpi nmiiñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuñ ñich n'ayuc? Je' co ca' ajcxy midohuaangixy ñich n'ayuc. ⁴⁴ Je' miich ajcxy mdeedy'ajtyp je mujcu'. Mïd mgi'mdzojcin mguydungixy je mujcu' chójcin. Je mujcu'yaj'öctiib y'i jäy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je' mujcu' ñindaacp je', chi ci'm ooy nijot y'idich. Je' ooy indacy, e je' oga'n anii yajtzondac. ⁴⁵ Com miich ajcxy mujcu' yhuinma'ñ mïd, paady miich ajcxy ca' xymibijci xymijpidaaci n'ayucich co ñich tiy'ajt njamiydägy. ⁴⁶ Ni pin miich ajcxy xycayajpocycähuipy. Peni tiy'ajt ñich miich ajcxy nyajnimaaayb, ¿ti co ca' mmijpidaaccixy ñich n'ayuc? ⁴⁷ Je' jäy ajcxy huidibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ájtigixy.

Jesús jiiyim anajty yjugy'aty ca'ydí Abraham

⁴⁸ Chi je judío ixpiytyijc ajcxy y'adzooy:

—Ti ñich ajcxy yajxon nmïna'ñ co miich mgogajpity jim Samaria, e mujcu' miich mïd ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmidity ma njot nhuinma'ñ, com nyajmij'ajtypich nDeedy, e miich ajcxy xy'ixtiypich. ⁵⁰ ñich ca' ci'm naygömayiijich. Dios Teedy ñich xycömaayb, com yi' je' huidibi ixyöyp payöyp jäy ajcxy ypocy. ⁵¹ Janch janch ñich miich ajcxy nimaaygixy co ji nijëjity jäy huidibi ñich n'ayuc cuydumb, e ca' yi' ajcxy yjugy'ajtin ycixipy ytigoyipy tücci'yi co y'ó'ccixipy.

⁵² Chi je judío ixpiytyijc ajcxy y'adzooy:

—Cham ñich ajcxy janchtiy ti nnejhuñyich tiydudägy co miich mujcu' midity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capxhuäcxip, e miich mmïna'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmïd miich mic'ajt, ca'ydí Abraham, ñich ajt nmij'ap nmijteedy huidibi o'ci? ¿Nej mjacmïd miich mic'ajt, ca'ydí ajcxy huidibi Dios y'ayucnajtzcaxiy, huidibi ajcxy o'ci? ¿Pin miich mdimnaydijyii?

⁵⁴ Chi Jesús y'adzooy:

—Pen ñich nnaygömayibich ci'm, ca' n'ayucich chobaadipy. ñich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixyipy nmïna'ñich co ca' ñich Dios n'ixy'adyii, ñindaacpich ixyipy, jadu'n nej miich ajcxy m'ñindaaccixy. Janch ñich n'ixyich Dios, e nguydumyibich yi' y'ayuc. ⁵⁶ Je' Abraham, miich ajcxy mmij'ap mmijteedy, jotcujc ooy ñayjihuñy co anajty ixa'ñ ñich nxii ndiempo ya naaxhuiñ. E co ijxy co ñich nmiiñich, chi ooy yjotcugiiy.

⁵⁷ Chi je judío ixpicytjic ajcxy nimay Jesús:

—Ni mgamíidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch ich miich ajcxy jadu'n nimäy co ji anajty ich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagäda'ñ anajty ajcxy. Chi Jesús yhuingoyüch, e ypidzimy ma Dios ytijc.

9

Jesús yajtzooc tüg huintzpi

¹ Hue' anajty Jesús huídijtp co ijxy tüg huintz, jadu'n anajty huíintz ti yma'xung'aty.

² Chi ydiscípulos ajcxy y'amídoohui:

—Huindzin, ¿pín pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yajty, jigix Dios ymic'ajt ñiguëxigity ma yi'. ⁴ Copicy njactúunibich yi' ytung huídibi ti xyquexyich ya naaxhuiñ. Miinip je xii tiempo ma ca' pín Dios y'ayuc tunaani. Jadu'n nej jihuüy ixypiy je ximbi ti ñaxy etz je coodzpí ti ymiiñ. ⁵ Jadu'n nej n'ityich ya naaxhuiñ nmíidich Dios ytiy'ajt, jadu'n ich nipaady nej tüg jín huídibi codícxp yi' naaxhuiñyäjy.

⁶ Co Jesús jadu'n yminanday, chi nidzujíy naax, chi mo'ntz yaj'oyíy míd chujñi, chi jada' yajjaaxi je jäy yhuin míd je mo'ntz. ⁷ Chi nimay jada':

—Nícx quejtzpuj yi' mo'ntz jim ma yi' Siloé nñ y'abojtzigity —je ayuc Siloé jadu'n yhuimbídzimy: quexyöybi.

Chi je jäy huintzpi ñícx yim, chi oy quejtz puji je mo'ntz, chi oy huimbity ti anajty yhuindícxígy. ⁸ Je ymíjín ymídjic ajcxy etz tüg'ócíy huídijaty anajty ajcxy ti ixí je huintzpi co jabom jabom iñäy limosna yajmucy, chi ajcxy ñay'amídoohui miñ xyipy:

—¿Nej ca' jada yjéjity je huintzpi huídibi anajty jabom jabom limosna yajmujcpi?

⁹ Nijéjity ajcxy ymíñañ:

—Je' yi'.

E jacjadyii ajcxy ymíñañ:

—Huingbi yi', nigoob jadu'n yquëxígy nej je'.

E je' ymíñañ ci'm:

—Ich jédu'n huídibi anajty huintz.

¹⁰ Jadu'n anajty ajcxy tzach'amídooy:

—¿Nej yi' mhuin ti ñay'ahuäcxyii?

¹¹ E je' anajty y'adzooy:

—Yi' yéydíjic huídibi ajcxy ytiyyp Jesús, yi' mo'ntz yaj'oyíy xyajjaaxích nhuín, e chi xyñímaayích: “Nícx quejtzpuj ma yi' Siloé nñ.” Chi nnícxích, e oy nguejtzpujyích, e chi nhuindícxícyích.

¹² Chi ajcxy je' nimay:

—¿Ma je' je yéydíjic?

Chi je huintzpi y'adzooy:

—Ca' nnejhuíyích.

Fariseojäy tiy'ajt pijcy nej je huintzpi anajty ti chögy

¹³ Chi ajcxy yajnícxíy ma fariseojäy ajcxy yhuinduu, je huídibi anajty huintz yajpatp.

¹⁴ Hue' anajty tüg sábado xii (judíojäy ajcxy amayxii) co Jesús mo'ntz yaj'oyíy, e ya-jhuindícxígy je huintzpi. ¹⁵ Chi je fariseojäy ajcxy jadüg'oc yajtiy nej anajty je jäy ti yhuindícxígy. Chi je jäy y'adzooy:

—Mo'ntz ti pidägy ma ñich nhuiin, chi ñich ti nguejtzpujy, e cham n'ijxnibich.

¹⁶ Nijëjity fariseojäy ajcxy yminañ:

—Yi yëdyjc huidibi jada jadu'n ti tuñ, ca' yi' Dios ytiy'ajt müdity, com ca' yi' amay'aty sábado xii.

Chi ajcxy jacjadyii y'adzooy:

—¿Nej tijy jada mijhuinma'ñ octuñ, pen hue' yi' pocyjäy?

Ca' ajcxy nay'ayuc-huinjihuüygixy. ¹⁷ Chi ajcxy jadüg'oc nimay je jäy huidibi anajty ti y'ijxigy:

—E miich, ¿nej m'ocminambi? ¿Pin jäy yi' tiibi xyajhuindicxigy?

Chi je jäy y'adzooy:

—Tüg jäy huidibi Dios y'ayuc etz ymic'ajt müd.

¹⁸ Chi je judío ixpicytije ajcxy ca' anajty tim mibigaangixy co je yëdyjc anajty huintz yajpaady, e co anajty ti yhuindicxigy, ixti cooni ajcxy ytaj yteedy mijhuoohui. ¹⁹ Chi ajcxy amidoohui ytaj yteedy:

—¿Nej je' jada miich ajcxy m'ung huidibi huintz ma'xung'ajti? ¿Nej jada ti yhuindicxigy?

²⁰ Chi je' ytaj yteedy ajcxy y'adzooy:

—Ich ajcxy nnejhuüyb co ñich ajcxy yi' n'ung, e co yma'xung'ajty huiintz. ²¹ Per jadu'n nej cham ti yhuindicxigy, e pin yi' yhuiin ti yajhuäcxyii, ca' ñich ajcxy yi' nnejhuüygixy. Amidoo miich ajcxy yi' ci'm. Mij'anäciñ yi', ñigapxipy yi' ci'm.

²² Jadu'n ajcxy ytaj yteedy y'adzooy, müd co ajcxy tzachtzigüygixy je judío ixpicytije ajcxy. Com je judío ixpicytije ajcxy ti anajty ñaygäpxigixy co anajty yajpidzimaangixy ma ajcxy ñaymujtac je jäy ajcxy pinjaty anajty mibijcp co Jesús anajty yjëjity je Cristo.

²³ Paady ajcxy ytaj yteedy yminañ:

—Mij'anäciñ yi', amidoogix miich ajcxy yi' ci'm.

²⁴ Chi ajcxy y'amidooy mimejtz'oc je yëdyjc huidibi anajty ti y'ijxigy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com ñich ajcxy nejhuüyb co yi' Jesús, tüg yi' pocytumbi. Ca' yi' Dios y'ayuc ytiy'ajt müdity.

²⁵ Chi je jäy y'adzooy:

—Pen tüg pocytumbi yi' Jesús, ca' nejhuüyich. Huidibi janchtiy nnejhuüybich, co anajty ñich nhuintzity etz co cham huindicxnibich.

²⁶ Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ijxici yi' mhuin?

²⁷ Chi je' y'adzooy:

—Ti ajcxy nyajnimaygixy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yi'ji?

²⁸ Chi ajcxy je' ogy, nimay ajcxy jadu'n:

—Miich ixpijc ma yi', ñich ajcxy n'ixpijcpich ma Moisés ytiy'ajt. ²⁹ Ich ajcxy nejhuüyb co Dios Moisés migapxy. Janch yi' Jesús ca' ñich ajcxy nnejhuüygixy ma yi' chooñ (ma mic'ajt ti paady).

³⁰ Chi je jäy y'adzooy:

—Ooy yi' y'oychigüyñity y'oyhuinma'ñity co miich ajcxy ca' mnejhuüygixy ma yi' chooñ (ma mic'ajt ti paady), e ti ñich yi' xyajhuindicxigyich. ³¹ Yajxon yajnejhuüy co Dios ca' yi' midoohui pocyjädyjc y'ayuc. Pen oy jäy ñich ajt, e nguyduunim Dios ytiy'ajt, huin'it ajt Dios n'ayuc xymidoohuim. ³² Ni caminaaxii ycayajmidoy, co pinjäy tüg huintzpi ti yaj'ijxigy huidibi jadu'n ti yma'xung'aty huintz. ³³ Co ixypy je Jesús ca' jilby chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymüd. Ca' miich huaad ti xyaj'ixpijccixyich.

E chi ajcxy yajpidzimy tībäy'tücci'yī (ma ajcxy ñaymujctac etz ma Dios ytijc).

Je jāy ajcxy huidibi ca' cōbijccixy Dios ytīy'ajt jadu'n nipaady ajcxy nej jihuīy huintzity

³⁵ Chi Jesús nejhuīy jadu'n co anajty ti yajpidzimy tība'y tücci'yī ma Dios ytijc. Co minaaaybaati chi nimay:

—¿Nej mmibijcyp mījpidaacyp miich je jāy huidibi tzoön tzajpjoty?

³⁶ Chi je' y'adzooy:

—Huindzin, nīmaaygich pīn je', jīgix nmibicyich.

³⁷ Chi Jesús je' y'adzooy:

—M'ijxyp yī'du'n yam. Yī je' je huidibi xymīdmiydacp.

³⁸ Chi jada' huingoxtinay'ahuīy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús ymīnañ:

—Ich ti nmiñ ya naaxhuiñ co n'ixyöyaanich nbayöyaanich jāy ypocy, jīgix nya-jpocycāhuībich pīn ca' ypocymīdity, etz nyajpocyñihuādzibich pīn ypocy mīd. Jadu'n nej jihuīy nyajhuindzīyich je jāy huidibi iixp, etz jadu'n nej jihuīy nyajhuindicxīgīyich yī huintzpi.

⁴⁰ Chi nijēity fariseojāy huidibi anajty jīm ma Jesús ymījc jadu'n mīdoy nej Jesús ymīnañ, chi ajcxy nimay Jesús:

—¿Nej nañ jadu'n mīch mīdijy īch ajcxy ca' Dios ytīy'ajt nejhuīyich, jadu'n nej jihuīy īch ajcxy nhuintzity?

⁴¹ Chi Jesús y'adzooy:

—Co ixyipy mīch ajcxy janch janch ca' mnejhuīyīgīxy Dios ytīy'ajt, ca' ixyipy ti pocy ajcxy mīdity. Per mīch ajcxy mīnam co Dios ytīy'ajt mguyduunīy, e ca' yjanchity. Paady ajcxy mbocymīdity. Nīpaatyp jadu'n nej jihuīy mīch ajcxy mhuintzity, e mīnaangīxy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnimay je judío y'ixpicytījc, je fariseojāy ajcxy:

—Janch janch īch mīch ajcxy yam jadu'n nīmaaygīxy co je jāy ajcxy huidibi ca' ytīgīhuaangīxy ma borregī agaj aguu (ma je cuend'ajtpī ycuend'aty), huidibi huingduum ameech tzach tīgīhuaam ma yborregī agaj, je' je' je meetzpi huidibi meedzam je borregī ajcxy ameech. ² Je jāy huidibi tīgīhuam ma yborregī agaj aguu, je' je' je borregī cuend'ajtpī. ³ Co je borregī cuend'ajtpī ymīñ ma agaj aguu, chi je agaj aguu cuend'ajtpī yaj'ahuāch je agaj aguu. Chi yborregī ajcxy yōcmīdoyīi, chi je' mīgapxy xībety xībety, chi yajpidzimy ajcxy. ⁴ Co ajcxy yajpidzimdāy, ac je' yje', chi jayījp ñīcxy, e axam ajcxy ypanīcxyīi, com je' co yōcmīdoyīi. ⁵ Ca' je borregī ajcxy jēbi panīcxy tūg huingjāy. Nīgī ajcxy cōguēgy, com yōcmīdooyb ajcxy co yhuingjāyity.

⁶ Jadu'n Jesús mayjāy yaj'ixpijcy jihuimbit'amy, jaygue' ajcxy ca' huaad huinjihuīy nej anajty Jesús yjamīnāna'ñ.

Jesús je oybi cuend'ajtpi

⁷ Chi ajcxy Jesús jadūg'oc ñīmaayī:

—Janch janch īch mīch ajcxy yam jadu'n nīmaaygīxy, co je Dios nDeedy'ajtypich. Jēbi jāy ajcxy paady Dios ytīy'ajt ma īch, e huin'it ytīgīyīgīxipy ma Dios y'it. Jadu'n nipaady nej jihuīy īch je agaj aguu ma borregī ajcxy ytīgīyīgīxy. ⁸ Tūg'ócy je huindzīndījc huidibi ajcxy mīn jayījp ca'ni īch anajty nmiñich, e ymīnaangīxy anajty co ajcxy mīd'ajti Dios ytīy'ajt, jadu'n je' anajty ajcxy nej meetzpi huidibi meedzaanīp Dios yjāy. Per je Dios yjāy

ca'p je' ajcxy tuuñ cuendi, jadu'n nej je borregi ca' yöcmidoogixy je meetzpi. ⁹ Jadu'n nej je borregi ajcxy ytigiiygixy ma agaj aguu, nañ tim jadu'n jäy ajcxy paady Dios ytiy'ajt ma iich. Je jäy ajcxy huidibi ypaatyp Dios ytiy'ajt ma iich, nañ ypadaamy jugy'ajtin huidibi ca' ycixipy ytigoyipy tücci'yi. E huidibi je' ajcxy yajmayajtyp ma yi chinaayin, nmöhuibiyich. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. Iich ti nmiiñich, jigix miich ajcxy mbáatcixipy jugy'ajtin mijcajee huidibi ca' tücci'yi ycixipy ytigoyipy.

¹¹ Chi Jesús yjacmíñ:

—Iich jadu'n nipaady nej tög borregi cuend'ajtpi oybi. Je oybi borregi cuend'ajtpi yciyejtyp yi' yjugy'ajt ma yi o'cin müd yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajējity je borregi yhuindzin, co ixycaa ymiñ, chi cöguēgy je borregi, e yajqueec-huäcxtäy. ¹³ Com je' co mujuy ytuñ, paady cöguēgy je borregi ajcxy, ca' tzocy jihuñ borregi.

¹⁴ Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n iich n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi yciyegamy yjugy'ajtin müd yborregi ycixpi. Nañ tim jadu'n iich ngiyeegamyich njugy'ajtin müd iich njäy ajcxy ycixpi. ¹⁶ Nmüidich jadügpicy jäy, ca' ajcxy yjudiojäyity, je' ajcxy nañ jadu'n nmüid'idaamyich tügmucy (müid je judío jäy ajcxy huidibi xymijpidaacpich). Tim jadu'n nej je cuend'ajtpi ymüid'ajtyp je' yborregi ajcxy tügmucy. E je' ajcxy y'amidoo'idaamy iich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tög cuend'ajtpi (iich jēdu'n).

¹⁷ Chi Jesús yjacmíñ:

—Paady ycixp Dios Teedy ooy xychocyich xyjihuiyich, co ngiyeegaamyich njugy'ajtin ma yi o'cin (müid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, iich yi' ci'm ngiyeegamy. Nmüidich mic'ajt nej ngiyeegipyich njugy'ajtin, etz nañ nmüidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuñyi je judíojäy ajcxy müd Jesús y'ayuc ycixpi.

²⁰ Mayjäy ymíñ:

—Ca'oybi yi' ymüid, locjiyb yi', ¿nej co ajt n'amido'ijtim y'ayuc?

²¹ E jacjadyi ajcxy ymíñangixy:

—Jadayaabi tiy'ajt etz mic'ajt ca' yajpaady ma tög jäy huidibi mujcu' ymüid. Ca' jēbi tög mujcu' jäy huintzpi yaj'ixgy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixidumyib jimijt Dios ytiyc. ²³ E hue' anajty tüch tiempo. Chi jim anajty Jesús yhuidity ma Dios ytiyc, ma je Salomón ytiyc-huinduu. ²⁴ Chi ajcxy je judío y'ixpicytiyc nimujcy ooy Jesús, nimay ajcxy:

—¿Ixti míñani miich iich ajcxy tiydudägy xyajhuinjihuñhuáangixyich pen miich je' je Cristo? Yajhuinjihuñgyich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaaygixy, e ca' miich ajcxy ti nmibijccixy. Je mijhuinmañ huidibi ndumyibich nmüidich nDeedy ymic'ajt, yi' je' nidiy'ajt'ajtp co iich je' je Cristo. ²⁶ Paady ycixp miich ajcxy ca' mmibijccixy, com ca' miich ajcxy njäy'adyiijich. ²⁷ Iich njäy ajcxy ymijpidaacyp iich n'ayuc, e n'ijxcajpich ajcxy je', e je' ajcxy xypanixpich. Tim jadu'n nej je borregi ajcxy yöcmidoy je yhuindzin, jadu'n nej je huindzin ijxcapy je' yborregi,

e jadu'n nej yi yborregi ypanicxyii. ²⁸ Hich njäy ajcxy nmooybich yi jugy'ajtin huidibi ca' tücc'i'yi ycixa'ñ ytigoya'ñ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmiididyich. ²⁹ Yi Dios Teedy huidibi ich njäy ti xymöy, tügpajc yi' ymijity, e ni pin huaad ni ti capijciy huidibi Dios Teedy ymiid ci'am. ³⁰ Dios Teedy etz ich tú'ciy ich ajcxy.

³¹ Chi je judío jäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti ich ooy mij oybi nduñich ma miich mhuinduu miid je nDeedyich ymic'ajt ycixpi. ¿Huidi ycixpi miich ajcxy xychaagädzaangixyich?

³³ Chi je judío ixpiicytijc ajcxy y'adzooy:

—Ca' nmīnaanīm paady ich ajcxy miich ndzaagädzaangixy miid je oybi tiibi mduñ, hue' janchtiy ycixpi ndzaagädzaangixy miid co ooy Dios myajjotmädy. Com miich nañ jäy, e mnayyajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judío jäy ajcxy ytiy'ajtnecy, ma Dios jadu'n ymīna'ñ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huidibi Dios y'ayuc cöbicip (e ca' huaad pinjäy ymīna'ñ co Dios ñecy ca' yjanchity). ³⁶ Dios ti xyajñibicyich jada tung, e xyquejxyich ya naaxhuiñ. ¿Nej co mmīnaangixy co ich ngapxtigooyich co nmīna'ñich co Dios xy'ung'adyiijich?

³⁷ Pen ca' nduñich nDeedyich ytung, ca' ich ajcxy huaad n'ayuc xymibijcich. ³⁸ E pen ndumybich nDeedyich ytung, oy ixyipy miich ajcxy ca' xymijpidaacich n'ayuc, jēbi ixyipy mijpidägy ajcxy je mijhuinma'ñ huidibi ndumybich. E chi mnejhuñhuipy miich ajcxy, etz mmijpidägyipy miich ajcxy co je Dios Teedy yajpaady ma ich, e ich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij nñi nñaxy ma Juan yjäy yajñibejty oga'n'aty, chi jim yhui'miyy. ⁴¹ Mayjäy Jesús ooy ñimujci, e ymīnañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'óciy yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibijcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxiñ Lázaro. Hue' je' anajty chinäy ma María etz Marta ycogajpity. ² María je' anajty huidibi je Huindzin Jesús anajty ti yajjaxy je ujtzipijyñi huidibi ooy oy yxuugy, etz po'ti Jesús ytecy miid ycöhuay. Hue' je' anajty María etz Marta ymidügquëx Lázaro huidibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajñimäyii:

—Je mmigüg huidibi ooy mdzocy, pijcip je'.

⁴ Co Jesús jadu'n midooy, chi ymīnañ:

—Je' ypa'm ca' yaj'öga'ñyii tücc'i'yi. Je' ypa'm hue' yajñiguëxigamy Dios ymic'ajt, jaydëb Dios ycömaybidzimipy, e nañ ich nyajcömayipyich, ich je jäy huidibi tzoön tzajpjoty.

⁵ Jesús ooy anajty tzocy jihuñy je Marta, María etz je Lázaro. ⁶ Oy jadu'n Jesús nejhuñy co anajty Lázaro ypigyii, jamejtz xiñ jim yjacxñnaxxy ma anajty yajpaady. ⁷ Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸ Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg ximbi müdity. Pinjäy müd Dios ytiy'ajt, ca' ayo'n pada'ñ, tim jadu'n nej jihuïy yhudity xim, e ca' ycönepy, com co xim codicxy jada naaxhuiñybi. ¹⁰ Pinjäy ca' müdity Dios ytiy'ajt, ca' je' nejhuïy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy müd co ca' anajty ixy ma ñicxy.

¹¹ Huin'it Jesús je' ajcxy nimay:

—Ich ajt nmigüg Lázaro maab je', nicxy nyajpidiga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuïjhuip yi', ci'm yi' ymäyhuijipy.

¹³ Je' Jesús anajty ñimiyaacyp je o'cin, e je' ajcxy tijy Jesús ñimiyaacyp je mähuii. ¹⁴ Chi Jesús yajmüdmüdyacy ajcxy tiydudägy, ymíñañ:

—Lázaro ti je' y'o'cy. ¹⁵ E ooy njotcúcidyich müd miich ajcxy ycixpi co anajty ich ca' njimity, jigix ajcxy mmibigipy co Dios ymic'ajt nmüdidyich. Tzoc ajt jamim jim Betania.

¹⁶ Tomás huidibi anajty ajcxy yxigoyaaacyp Dídimó, huidi ayuc-huimbídzim: cuate, nimay jacjadyi Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy müd Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mímidaaxxiibi anajty maabi Lázaro ñaaxtigíy. ¹⁸ Betania ca' anajty ooy yjiguëgyity müd Jerusalén, jëyi jada' anajty müdity tugig kilómetro. ¹⁹ May judíojäy ajcxy anajty ti ymíñgixy ma Marta etz María, yajjotcugihua'ñ ajcxy müd je' ymiguëx ycixpi co anajty ti y'ögy. ²⁰ Co nejhuïy Marta co Jesús anajty jim ymiñ, chi nidzooñ oy jipcobadiy. E María jim yhui'müy ma ytijc, tigoty anajty iñäy. ²¹ Chi Marta Jesús nimay:

—Huindzin, co ixypy miich ya anajty myajpaady, ca' ixypy ti y'ögy nmiguëxich. ²² Per nnejhuïybich co miich cham jëbi Dios mmibijctzoy, e xymöhuip ti mdimdojcyp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuïybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Ich je' nyajjugypigipyich je jäy ajcxy, e nmöhuibyich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'öciy pinjaty ajcxy xymibijcp xymijpidaacpich juugyñi, ca' y'ögipy ajcxy tücciyi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy müd Lázaro ycixpi

²⁸ Co Marta jadu'n ymíñañ, chi jada' oy huoy y'uch María, e yajnimay ameech:

—Je Huindzin chiiy je', e miich jiiy xymüdmüydägamb.

²⁹ Co María jadu'n midooy, chi ypidigy mic'amy, e chi ñicxy ma Jesús. ³⁰ Ca'ni anajty Jesús yja'ty cajpjoty. Jimni anajty yhuäcxip ma anajty Marta ti yijpcobaadiyi. ³¹ Co ajcxy ixy co María ypidigy, e ypidizimy janch mic'amy, je judíojäy huidibi anajty ajcxy jim ma je tijc müd je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panicxy.

³² Co yjädy María ma je it ma anajty Jesús, co ixxpaty, chi ycojxtinaay'ahuïy ma Jesús yhuinduu, chi nimay:

—Huindzin, co ixyipy miich anajty m'ocyaaajity, ñch n'ay ca' je' ixyipy y'ögy.

³³ Co Jesús ijxy yäxy je María etz je judíojäy ajcxy huidibi anajty yjaym'id'ajtip, chi ooy jihuüy etz ytaj ymaay. ³⁴ Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam iJimmy.

³⁵ Chi Jesús yaaxy. ³⁶ Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijējity ajcxy yminañ:

—Jadayaabi jäy huidibi huintzjäy yajhuindicxigy, ¿nej ca' jada' ixyipy mic'ajt m'idity jēbi ixyipy ti yajtzögy je Lázaro, e ca'ydi ixyipy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang m'id tüg mij tzaa y'agiyducity je jut aguu. ³⁹ Chi Jesús yminañ:

—Jügi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

⁴⁰ Chi Jesús yminañ:

—¿Nej cay ti jadu'n nnimäyi? Pen xymibíjcibich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jügüy, chi Jesús cix ypa't'ijxy, yminañ:

—Dios Teedy, jäygidaacin nyajnajxypich ma miich, co miich xymidoohui n'ayucich

⁴² Yajxon nnejhuüyich co miich xy'amido'ijtpich jabom jabom, paady ycixp miich jadu'n ti nnimäy m'id jadayaabi jäy ajcxy ycixpi ma ñch nhuinduu, huen ajcxy mibicy co miich xyquejxich ya naaxhuiñ.

⁴³ Co Jesús jadu'n yminañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidzimy ymo'nity yajxon tüg'óciy ñinícx etz huingoyebíyity m'id huit, chi Jesús yminañ:

—Huimbidiittuutcity, e najtzmazzygix, huen yöychooñ.

Judío xpiyityc ymadzamy anajty Jesús

⁴⁵ May je judíojäy ajcxy ymibijcy huidibi anajty María yjaym'id'ajtyp, co ajcxy ijxy je huidibi anajty Jesús ti tuñ. ⁴⁶ Per jadyi judíojäy ajcxy oy ixtäy je fariseojäy ajcxy, chi ajcxy yajm'idm'idacy huidibi anajty Jesús ti tuñ. ⁴⁷ Je teedy tungm'idpi ajcxy, etz je fariseojäy ajcxy, chi ajcxy ñayhuoomujctayi je tungm'idpi ajcxy nidüg'óciy, chi ajcxy yminañ:

—¿Nej ajt Jesús n'octuunim? Yijiibi yēydijc ooy yi' mihuinma'ñ tzachtuuni. ⁴⁸ Pen nnajtz'ixiym jadu'ñyi, tüg'óciy jäy mibijctähua'ñ yi'. Chi ajcxy ymiinipy je Romano tungm'idpi huidibi ajt xy'ané'mim, e chi yajhuindigoyipy ñch ajt nDios y'it, e nañ yajhuindigoyipy ñch ajt ndzinaayin njugy'ajtin.

⁴⁹ Nidügti ajcxy je jäy, hue' anajty yxi Caifás, hue' anajty miltungm'id, je' anajty teedy huindzin, je' jadu'n jäy nimayday:

—Miich ajcxy ca' ti mhuinjihuüygyxy. ⁵⁰ Ca' ajcxy mnejhuüy co jac'oy nyaj'o'cim je Jesús tügpaic, huen yi' codinaydähup naax cajn, jigix ca'ydi ñch ajt nnaax ngajp yhuindiooyim.

⁵¹ Canan yci'mhuinma'ñ jadu'n ycixpi yminañ je'. Hue' janchtiy com je' anajty ymiltungm'idity je huin'it jimijt ma teedy ajcxy ymiñ, paady Dios huinma'ñ jadu'n yejcy, co jadu'n najtzcapxy co Jesús anajty y'öga'ñ m'id tüg'óciy ajcxy naax cajn ycixpi.

⁵² E ca' nminaanim m'id jēda'ajty m'id je judío ajcxy ñaax ycajn ycixpi, nañ jēgix co huoomujctähua'ñ tüg'óciy Dios y'ung huidijaty anajty ajcxy yajpatp xi ya. ⁵³ Huin'it oga'n ajcxy je tungm'idpi yajnigodugíy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäjyoty ma je judíojäy ajcxy. Chi jada' ñicxy jiguem mihuingon ma je títznaax'it, ma anajty tüg cajp xijity Efraín. Chi jim yhui'miy miid ydiscípulos ajcxy.

⁵⁵ Huingoonip anajty je pascua xii huidibi anajty judíojäy ytumyb. Ti anajty may judíojäy ajcxy ñinicxni jim Jerusalén xii'ajtp huidibi anajty jiguëgyjaty tzomb. Jayijpni ajcxy ñicxy ca' anajty xii paady, co anajty ajcxy ñayyajpocyñihuädza'nyii. ⁵⁶ Ooy anajty jäy ajcxy ixtäy Jesús huiñ'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuiy ma Dios ytijc, jadu'n ajcxy ymíñañ:

—¿Nej m'ocmíñangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpíñity huidibi anajty nejhuiyb ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxñi anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjugypicy jadüg'oc. ² Chi ajcxy jim yaj'oyiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús iñäy ma je mesi. ³ Chi María conigy tüg libra ujtzipijyñii huidibi anajty ooy oy yxuugy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttich. Chi ac ujtzipijyñii yxuugítay tigoty. ⁴ Huiñ'it je Judas Iscariote je Simón ymang huidibi anajty yhuindzin cïyegam ma ymidzip, je' jadu'n ymíñañ:

⁵ —Jac'oy co ixypy ti ndoocim jada ujtzipijyñii oy migo'pxpeexyti jadiib ixypy ajt ayoobtijc nbubejtim.

⁶ Canan paady Judas jadu'n ymíñañ co ayoobitijc tzachpa'ayoy. Paady jadu'n ymíñañ co ajcxy chachmeedza'ñ. Com je' anajty meeniybijty cuend'ajtp, e chachpuugomyb huidijaty anajty jiiy ajcxy yjapidaacyp. ⁷ Chi Jesús ñimay je Judas:

—Ixmatz miich yi', hue' yi' yi' María ti yujcpicy jada ujtzipijyñii co yajtuna'ñ co anajty naaxtigíyich. ⁸ Com yi' ayoobitijc ajcxy huiñixii yi' miich ajcxy miid'idipy. Janch ich ca' ich miich ajcxy miid n'idipy huiñixii (ya naaxhuiñ).

Judío ixpicytijc yaj'ögamy anajty Lázaro

⁹ Co ajcxy nejhuiy may judíojäy ajcxy co anajty Jesús yjimity Betania, chi ajcxy nimíñ. E canan miid Jesús ycixpi jeda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijcixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuiy ajcxy co Jesús anajty ymíñañ jim Jerusalén. ¹³ Chi ajcxy cabigy may ytixy y'aacx, chi ajcxy nidzooñ Jesús, chachmíñangixy:

—¡Dios ajt xyñihuaanim xyajtzoocim! Mimb tüg jäy huidibi Dios ti yconucxyii. Ymíñ yi' Dios ymic'ajt, je' je' je' judíojäy yrey.

¹⁴ Co Jesús paty tüg burro mang huidibi ca' ni pin yaj'iñaañi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n ymíñañ:

¹⁵ —Ca' mdzigíy miich ajcxy huidibi tzinaayb ma Sión cajp (Jerusalén). Cha je mrey ymiñ y'iñäy ma tüg burro mang.

¹⁶ Je huidibi anajty ajcxy Jesús discípulo'ajtyp, ca' anajty ajcxy huiñijhuiygixy ixti cooni Jesús paty jadüg'oc yi' y'oy'ajtin ymij'ajtin jiiy tzajpjoty. Huiñ'it ajcxy ajihuiygooti co

jadu'n anajty ycojaayity müd Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷ Je jäy ajcxy huidibi anajty ajcxy ymiñ Jesús, huin'it co Lázaro ypidzimy ma yaj-naaxtigiiyi, e yajjugypijci jadüg'oc, chachyejcyp anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸ Nañ paady ycixpi je mayjäy oy nañ jadu'n yijpcobadiiyi, co ajcxy nejhuüy je mijhuinma'ñ huidibi anajty Jesús ytumyb. ¹⁹ Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' panixcixy.

Nijëjity anajty griegojäy müdmiydägaangixy Jesús

²⁰ Nijëjity griegojäy nañ ti anajty ñicxcixy jim Jerusalén Dios ojadaajtpi xijoty. ²¹ Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ñich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús ymiñ:

—Ti je tiempo paady co ñich je jäy huidibi tsoon tzajpjoty nyajcömayipyich. ²⁴ Janch janch ñich miich ajcxy jadu'n nimaaygixy co jäy nıby tüg mopcajc, e co je mopcajc ymuxy, huin'it yhuindigoy, e chi ytiim'ajtni may'amy. Pen ca' ni pin nıby jada mopcajc, ca' ytiim'ada'ñ. Jadu'n ñich nipaady nej je mopcajc. Copıcy n'ögıbyich, huin'it mayjäy jugy'ajtn paadaangixy huidibi ca' ycixipy ytigoyipy ni mina. ²⁵ Je jäy huidibi ooy nıgi nixondägy yi chinaayın ya naaxhuiñ, yajtigoyamy je' yjugy'ajtn tüccı'yi. Per je pin ca'p ooy nijot'aty je chinaayın ya naaxhuiñ, e nixondaaci ooy nıgi Dios y'ayuc, je' y'alma nıdzoocın paadip ma Dios. ²⁶ Pen ji jäy huidibi naybıdaacip ma ñich, copıcy ajcxy xypanıcxıbyich. Ma ñich nyajpaady, nañ jim yi' yajpaadipy nañ jadu'n. Yi jäy pinjaty naybıdaacip ma ñich, Dios Teedy yi' cömayıb.

Jesús capxpıdzımy co y'öga'ñ

²⁷ Chi Jesús yjacmiñ:

—Tájñıbyich mayñıbyich cham jotjoty huinma'ñjoty. ¿Nej nmımähuıbyich nDeedyıch? ¿Nıhuaangıch ma jada ayo'n tzaachypı huidibi ti yhuaad'ajtnı? Ca' yjadu'nıty. Com paady ycıxp ti nmıñıch ma jada xıı tiempo, jėbi ayo'n nyajnajxıch müd jäy ajcxy ypocy ycıxpı. ²⁸ Dios Teedy tun huidibi copıcy, jėbi jäy ajcxy ijxcixy miich mmıc'ajt etz miich m'oy'ajt.

Huin'it je jäy ajcxy hıdi anajty jim ma Jesús yajpaady mıdooy tüg ayuc choñ tzajpjoty ymiñ:

—Ti nduñıch mijhuinma'ñ, e ti jäy ıxy ñich nmıc'ajt n'oy'ajt. E nañ jadüg'oc ndunıpyıch mijhuinma'ñ, jıgıx jäy ajcxy ıjxcıxıpy jadüg'oc ñich nmıc'ajt ñich n'oy'ajt (jadu'n Dios y'adzooy y'ung Jesús).

²⁹ Je mayjäy huidibi anajty ajcxy jim, je tiıbi anajty ajcxy mıdoogıxy je ayuc huidibi tsoon tzajpjoty, ymiñ ajcxy:

—Enee yi' ti yjıdity.

Jacjadyii ajcxy ymiñ:

—Tüg ángel ti ymıgapxyii.

³⁰ Chi Jesús nımay je mayjäy ajcxy:

—Ca' nmınaanım müd ñich ycıxpı jadu'n ti yajmıdoy jadayaabi ayuc huidibi ti chooñ tzajpjoty. ³¹ Jadachambi jada' Dios yajpocycähua'ñ naaxhuiñjıy, e nañ ypıgaanıpy je mujcu' ymıc'ajt huidibi ane'mb naaxhuiñjıy ajcxy. ³² Co ñich anajty jäy ti xyajcru-udzpetyıch, e co ñich anajty ti njugypıcyıch jadügtecy, e co ñich anajty ti nhuımbıtyıch tza-jpjoty, huin'it tüg'óciy jäy ajcxy huidibi xymıbjıcpıch, nyajpa'ttıgıhuıbyich jııby tzajpjoty ma nyajpaadyıch.

³³ Paady jadu'n Jesús ymínañ, jëbi huaad tüg'óciy jáy ajcxy huinjihuïhuip ti o'cin anajty ypadamy. ³⁴ Chi je mayjáy ajcxy ymínañ:

—Ma Dios ñecy jilby jadu'n ymíñ jaybety co je Cristo huinixii je' y'ida'ñ. E ¿nej miich co cham jadu'n mína'ñ co copicy co yi jáy huídibi tzoon tzajpjoty, huimbídam jadügtecy tzajpjoty? ¿Pin jëdu'n mdijyp huídibi tzomb tzajpjoty?

³⁵ Chi Jesús nímáy je jáy ajcxy:

—Jahueeni xii tiempo njac'ida'ñich mïd miich ajcxy. Jadu'n ñich ndiy'ajt nej tüg jïin huídibi codiicxp jáy co ytüyöy. Cuychinäy ñich ndiy'ajt, co tzojc nhuimbida'ñich tzajpjoty, e miich ajcxy mhui'ma'ñ jadu'n nej jáy huídibi ca' jïin mïdity. Je jáy ajcxy huídibi ca' cuychinaaygixy ñich ndiy'ajt, ca' ajcxy nejhuïygixy ma ñicxcixy. Jadu'n ajcxy nej jihuïy yöygixy coodz, e ca' ijxcixy ma ñicxcixy. ³⁶ Com occhaani ñich ma miich ajcxy, nyaj'ixpijcy ñich miich ajcxy Dios ytiy'ajt. Pen xymibíjccixpich, m'íjtcixip ixpiy ma Dios ytiy'ajtin.

Co Jesús jadu'n je jáy ajcxy nímáyday, huin'it Jesús je' ajcxy puhua'ctuutni, chi ñicxni, e ca' ma y'ocjac'ijxin.

Je judíoáy ca' mibiga'ñ Jesús

³⁷ Ooy anajty canaag mijhuinma'ñ Jesús ti jatuuñ ma jáy ajcxy yhuinduu, e ca' anajty ajcxy ni ti tim mibíjccixy. ³⁸ Huídibi Jesús ytun ycapx, jilby anajty jadu'n ycojayity ma je Dios y'ayuc necy, je Isaías ñecy, co Isaías jadu'n ymínañ:

Huindzin, ca' ni pin ajt n'ayuc ndiy'ajt ti xymibíjcm. Ca' ni pin huídibi huinjihuïyb je Huindzin Dios ymic'ajt.

³⁹ Ca' anajty ajcxy huaad ymibíjccixy, com nañ ti anajty jadu'n Isaías jay ma jadu'n ymínañ:

⁴⁰ Jadu'n yi' ajcxy nej jihuïy Dios ti yajhuindziygixy, e ti yajjotjuníygixy, jigix ca' y'íjxcixipy mïd yhuin, e mïd yjot yhuinma'ñ ca' huinjihuïyigixyipy, ni yca-jothuimbíjtcixipy nej jëbi Cristo yajtzóocigixy.

⁴¹ Paady jadu'n Isaías ymínañ je' co anajty ti ijxi Cristo y'oy'ajt, e chi cojay nej anajty ti ixy.

⁴² Ca' nidüg'óciy judío ixpiyitjc mijotmädy anajty Jesús. Jim anajty nijëjity huindzindijc huídibi mibíjcp Jesús. Per mïd je fariseojáy ycixpi co chachjotma'tcixy, paady anajty ajcxy ca' capxpídzimgixy co mijpidaaccixy Jesús. Je' co chigíygixy co jim yajpidzimíyb ajcxy tüccí'yi ma Dios ytiyc, etz ma yi judío ñaymujctac. ⁴³ Jacnigi anajty tzojccixy co huen jáy cômáayigixy, ca'ydi co ajcxy Dios ycômáyíyb.

Dios yajpocycāhuip je mayjáy mïd Jesús y'ayuc

⁴⁴ Chi jada' Jesús ymínañ mic:

—Je jáy ajcxy huídibi xymibíjcpich xymijpidaacpich, caminaanim ñich naydüg xymibíjcpich xymijpidaacpich, nañ ymibíjcy ymijpidacy ajcxy je tiibi ñich ya naaxhuiñ xyquexyich. ⁴⁵ E je jáy huídibi xy'ijxpich, tim jadu'n nipaady nej jihuïy ti ixy je huídibi ti xyquexyich. ⁴⁶ ñich ti nmimíñich ya naaxhuiñ Dios ytiy'ajt, jadu'n ñich nipaady nej jihuïy tüg jïin huídibi codiicx je jáy ajcxy. Je jáy ajcxy huídibi xymibíjcpich ca' ajcxy yhui'mipy jibictuuby, jadu'n nej jihuïy ca' ajcxy chinaaygixy agootztuuby. ⁴⁷ Je jáy ajcxy huídibi mïdoob ñich n'ayuc, e ca' cuydungixy, ca'p je' ñich je' ypocy ajcxy n'ixyöyaani nbayöyaani cham. Ca'p ñich ti nmíñich ya naaxhuiñ mïd co jáy ajcxy ndzaachtunipyich mïd ypocy ycixpi. Paady ñich ti nmíñich ya naaxhuiñ co nyajpocyníhuädza'ñich yi jáy ajcxy. ⁴⁸ Je jáy ajcxy huídibi xycapxhuimbíjtibich n'ayuc, e ca' xycöbígá'ñich, ymïd ajcxy huídibi yajpocycāhuib. Yi ayuc huídibi ti ngapxyich, yi' yajpocycāhuib ajcxy co anajty naaxhuiñbi ti yhuaad'ajtni co Dios anajty yajtigatzaani. ⁴⁹ Com ñich ca' ngi'm'ayuc ngapxhuäcxyich. Je' je' Dios Teedy y'ayuc, je huídibi ti xyquexyich, yi' ngapxhuäcxyibich y'ayuc. Je huídibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc

ngapxhuäcxypich nyajnimaaygixyp. ⁵⁰ E nejhuüybich co Dios y'ayuc ytiy'ajt ymimimyb yi' tzinaayin jugy'ajtin huidibi ca' tücci'yi ycixy ytigoy. Paady ycix je ayuc huidibi ajcxy nyajmüdmıydacyp, jadu'n nyajmüdmıydaaccixy nej Dios Teedy ti xyajnajtz'ane'mıyich.

13

Jesús ypuji ydiscípulos ajcxy ytecy

¹ Ca'ni anajty xii paady, pascuaxii anajty ajcxy tijy. Chi Jesús nejhuüyb co anajty yxii ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuüy ymıgügtıjc ajcxy huidibi ya naaxhuiñ anajty ajcxy hui'mañ. Jadu'n tzocy jihuüy huinixii.

² Chi jada' Jesús etz ymıgügtıjc ytiıy ajcxy adzuu'ajtp (je pascuaxii adzu'ajtin). Ti anajty je mujcu' huinma'ñymöy Judas Iscariote, Simón ymang, co anajty Jesús cıyega'ñ ma ymıdzip ajcxy. ³ Nejhuüyb anajty Jesús co je Dios Teedy ti yajcıdıgıyüi tüg'óciy ymıc'ajt, e Jesús nañ nejhuüyb anajty co je' ti choon ma Dios y'it, e nañ jııby anajty jadüg'oc yhuimbida'ñ. ⁴ Chi ypıdıgy ma mesi, chi je yoñybi yhuıt ñayyajmıjenduutti. Chi huijtıgy tüg huit huidibi müd ñaymextıtzi nayböttıtzi, ñayyajmıjxojtzpejti yhuındıy. ⁵ Co jadu'n ñayñı'ixıyı, chi pıdacy nıı ma tüg cıbuji'ñyoc. Chi nihuägıyı ydiscípulos ajcxy ytecy. Chi yajtzondacy tecypujıı tüg tüg, e mextıch pöttıch müd je huit huidibi anajty ti ñayyajhuındıyıı.

⁶ Co nihuägıyı Simón Pedro ytecy, chi Pedro ymınañ:

—Huındın, ca' huaad miich ndecy xypujich.

⁷ Chi Jesús y'adzooy:

—Huidibi ich ndumyb ca' yi' miich ajcxy mhuinjihuüygıxy jadachambi, jaccomjey miich ajcxy mhuinjihuııpy.

⁸ Chi Pedro y'adzooy:

—Miich ca' huaad ich ndecy xypujich ni camınaabi.

Chi Jesús y'adzohuımbıjty:

—Pen ca' mdecy nbuji, ca' ich miich jėbi njäy'adyıı.

⁹ E huın'ıt Pedro nımay Jesús:

—Huındın, ca' ich jėda'ajty ndecy xypıjııch, hue' janchtıy tüg'óciy ngıjıch etz ngo-huajcich.

¹⁰ Chi Jesús nımay Pedro:

—Com tııbi mjet mhuinma'ñ yajhuäch, ca' yi' ocjactzojcnı yajhuädzıpy mjet mhuinma'ñ jadügtecy. Tım jadu'n nej jihuüy naamni chıy, e cham ca' tzojcnı yajtzıhuıbyıch jadügtecy. Jėda'ajty mdecy nbujıch cham. Miich ajcxy huädz mjet mhuinma'ñ ajcxy mııdıñ, oy ca' miich ajcxy nidüg'óciy.

¹¹ Com Jesús nejhuüyb anajty pınjäy cıyegaanıp ma ymıdzip, e paady jadu'n ymınañ:

—Ca' ni tüg'óciy miich ajcxy mjet mhuinma'ñ yhuädzıty.

¹² Chi jada' co yajtecypujtay, chi jada' yoñyhuit yajtıgıy jadüg'oc. Yıxtacy ma mesi, e chi jada' nımay ajcxy:

—¿Nej mhuinjihuüyb ajcxy ti ich ti nduñıch müd miich ajcxy? ¹³ Miich ajcxy jadu'n mınamb co ich miich ajcxy myaj'ıxpıjcy, etz ich miich xyhuındın'ajtpıch. E tıydudägy miich ajcxy mına'ñ com ich jėdu'n miich ajcxy mHuındın. ¹⁴ Pen ich miich ajcxy nyaj'ıxpıjcy etz xyhuındın'ajtpıch, e ti ich miich ajcxy nyajtecypujy, nañ jadu'n miich ajcxy myajtecypujıy miñ xyıpy. ¹⁵ Ich miich ajcxy ti nmöy tüg ıjxpejt, jıgıx ajcxy jadu'n mdunıpy jadu'n nej ti nduñıch, e huın'ıt ca' amıj agıx nayjihuııyb ajcxy. ¹⁶ Janch janch ich miich ajcxy yam jadu'n nımıy co je huındın jac mıj je' ca'ydı yi' ytumbı. E nañ je' huidibi yajquejxyöyb jac mıj je' ca'ydı huidibi quejxyöyb. ¹⁷ Co ajcxy tıy'ajt mnejhuııpy, chi jotcujc ajcxy m'ıdıpy, pen mbadumyb ajcxy jadu'n nej nduñıch.

¹⁸ Ca' nminañich co nidüg'óciy miich ajcxy mbocymiidity. Ti ich yi' nnejhuüy pín ti nhuin'ixyich. Ti nhuin'ixyich tüg huidibi pocymiid, jigix cuyduunip nej anajty yjay-betyity ma Dios ñecy ma je Cristo jadu'n yminañ: “Yi' huidibi caymujcp miid ich, ti ich yi' xymibidigy.” ¹⁹ Ti ich yam miich ajcxy jayijp nyajnamaaygixy, jigix co anajty jadu'n ytunyii yjadyii, mmibigipy ajcxy co ich jëdu'n je Cristo. ²⁰ Janch janch yam ajcxy jadu'n nnimaaygixy co je jäy ajcxy huidibi cöbijcp je huidibi anajty nguejxypich, tim jadu'n nipaady jadu'n nej ich anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xyquejxich ya naaxhuiñ.

Jesús ñimay ymigügtijc co je Judas anajty cïyegaanip ma ymidzip

²¹ Co jadu'n Jesús yminañ, chi tajnip mayñip anajty ooy jotjoty huinma'ñyoty, chi capxypidzimy:

—Janch janch ich miich ajcxy yam jadu'n nimäy co nidügti miich ajcxy xycïyega'ñich ma nmidzipich.

²² Chi Jesús ydiscípulos ajcxy ñayhuindixpejttaayi nidüg nidüg. Ca' anajty ajcxy nejhuüy pín anajty jëdu'n Jesús ytiyyp. ²³ Nidügti je' ajcxy huidibi anajty Jesús ooy miid ñaychogyii iñäy anajty ma mesi tim huington ma Jesús yhuinduu. ²⁴ Chi Simón Pedro yci' yaj'ijxy yajhuinjihuüy co huen yaj'amidooy Jesús pín anajty jadu'n ytiyyp. ²⁵ Chi je discípulos ajcxy huidibi anajty iñaa'yb ma Jesús yhuinduu nimay yhuindzin:

—¿Pín jadu'n mdiyyp?

²⁶ Chi Jesús y'adzooy:

—Yi' je' pín anajty ich nmooybich yi' tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'itiy co Judas je tzajcaagy cöbijcy, chi je mujcu' ytigüy ma je' y'ay yjot. Chi Jesús nimay Judas:

—Yi huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pín cahuinjihuüy je ayuc huidibi Jesús yajnimay Judas, nej je ayuc yhuimbidzimy. ²⁹ Com je Judas anajty miid je meeñybijty, paady ajcxy nijëjity huinjihuüy co anajty tijy ñimäyii:

—Nícx juy yi' huidibi ajt nyajmayjajtim yi' xügixpi.

Jacjadyii ajcxy anajty tijy ñimäyii:

—Mo' tigatii ayoobitijc. ³⁰ Tim huin'itiy co je tzajcaagy cayday, chi ypidzimy Judas tiba'y, e ti anajty ycoodzïyñi.

Jesús ñajtz'ane'miy jemybi cötujcín

³¹ Co Judas ypidzimy, chi Jesús yminañ:

—Cham je jäy ajcxy ixa'ñ ich nmic'ajt ich n'oy'ajt, ich je jäy huidibi tzoon tzajpjoty. Etz nañ ma ich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ich, nañ tim jadu'n Dios yajniguëxigipy yi' nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy miid miich ajcxy. Xy'ixtähuibich miich ajcxy. Jadu'n nej ti nnimáaygixyich yi' jacjadyii judíojäy ajcxy, nañ jadu'n ich miich ajcxy yam njacnamaaygixy co ma nnicxa'ñich, ca' huaad miich ajcxy jiiby mníxcixy. ³⁴ Cham ajcxy nmöhua'ñ tüg ané'mín huinjemybi. Cham miich ajcxy nyajnajtz'ane'míhuaangixy jadüg'oc jadayaabi tiy'ajt: Naychójcigix nayjihuíyigix ajcxy nidüg nidüg, tim jadu'n nej ich miich ajcxy ti ndzocy ti njihuüy. Naychójcigix nayjihuíyigix aguipxyi. ³⁵ Miid jada ycixpi ñejhuíhuipy tüg'óciy jäy co ich miich ajcxy ti nyaj'ixpijccixy co ajcxy nidüg nidüg mnaychogüyb mnayjihuíhuíyb.

Jesús ñimay ymigügtijc co je Pedro anajty coyüdzaanip

³⁶ Chi Pedro nimay:

—Huindzin, ¿ma miich mnícxan?

Huin'it Jesús y'adzooy:

—Ma ñich nnicxa'ñich miich ca' huaad xypanicxyich. Jac'axam xypanicxyibych.

³⁷ Chi Pedro yminañ:

—E ¿nej co ca' huaad jëbi ñich miich nbanicxy? com ñich ngïyegamyich njugy'ajtin ma yi o'cin müd miich ycixpi.

³⁸ Chi jada' Jesús y'adzooy:

—¿Nej janch co mgïyega'ñ yi mjugy'ajtin ma yi o'cin müd ñich ycixpi? Janch janch ñich miich ajcxy yam jadu'n nimäy, co ni ca'ni anajty jabom tugig'oc tzey yaaxigy, co ñich miich anajty tugig'oc ti xycoyüchich.

14

Pinjaty mibijcp Jesús nicxip ma Dios Teedy yajpaady

¹ Chi Jesús yjacminañ:

—Ca' ajcxy jotmay mjihuïy ma m'aa mjot müd jada ayuc. Mibic ajcxy Dios etz ñich nañ jadu'n mibijccich. ² Jiiby ma ñich nDeedy chinäy, jiiby mïtigiydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac müd miich ajcxy ycixpi. ³ E co ñich anajty ti nba'ttigïyich, e ti ni'ixiyich tzinaaydac jayijp müd miich ajcxy ycixpi, huin'it ajcxy nihuimbidity, jëbi ñich ajt naydügmujcim, jigix ma anajty n'ityich, nañ jiiby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nnicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuïygixy ma miich nnicxa'ñ, e ca' ñich ajcxy nnejhuïygixy nej jëbi njá'tcixibych jiiby.

⁶ Chi Jesús y'adzooy:

—Jadu'n nej ti ndzinäyich jada je' je iixpejt nej Dios tzocy co miich ajcxy mdzinähuipy. Nyejcpyich je tiy'ajt huidibi jëbi huaad mguychinaaygixy. Co jadu'n mgyundäygixipy ñich ndiy'ajt, chi mja'tcixipy ma Dios. Nyejcpyich je jugy'ajtin huidibi ca' tücci'yi ycixy ytigoy. Ca' ni pinjäy yjadipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnicxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e müd tim yi'yi jotcuyc'adipyich ajcxy.

⁹ Paady Jesús nimay je Felipe:

—Cham xii jimijt ñicxni maabi ñich nja'ityich müd miich ajcxy, e ¿ca'ni miich xytimy'ijxhui'myich Felipe? Yi jäy ajcxy tiibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huidibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'ñ huidibi ajcxy m'ijxyp ndumyibich, yi Dios Teedy huidibi ijt ma ñich, yi' jadu'n tumb.

¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibigaangixy, mibic ajcxy müd je mijhuinma'ñ ycixpi huidibi ti nduñich.

¹² Janch janch ñich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ñich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy müd ñich nxii, ndunipyich yi'. Dios Teedy huidibi nDeedy'ajtypich, je' cōmay y'idip müd huidibi miich anajty ajcxy mdumyb müd ñich nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huidibi anajty ti mbijctzoogixy.

Jesús yquexamy Dios yjihuĩ'ñ ymic'ajt

¹⁵ Peni xychojcpich miich ajcxy, cuydúnigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'mi'yich. ¹⁶ E co ndzóonibiyich, chi nbijctzóohuibiyich yí Dios Teedy jadüg yjaymĩd huidibi ajcxy xyjaymĩd'adiib. Dios ajcxy xymöhuipy jadüg jaymĩd huidibi ajcxy xycapxhuijp, je huidibi ajcxy mjot'amij'adiyb, e je' xymĩd'idipy ajcxy huinixi. ¹⁷ Je huidibi xycapxhuijp, je' jada'ajty Dios yjihuĩ'ñ ymic'ajt, je Espíritu Santo. Je' Dios ytiy'ajt ymĩd. Dios yjihuĩ'ñ ymic'ajt ca' adigihua'ñ yí naaxhuiñyäj huidibi ca' xymibicyich. Com ca' ajcxy ixy, e nañ ca' ajcxy ixy'adyii je Espíritu Santo. Miich ajcxy m'ixy'ajtyp je Espíritu Santo, com je' tzinaayb ma miich ajcxy, e nañ xy'adigihuipy xyjottigihuipy ajcxy. ¹⁸ Ca' miich ajcxy nyajhuĩ'maangixy naydüg jadu'n nej co'ögy'ung. Nnihuimbidityich miich ajcxy jadügtecy. ¹⁹ Tim huingónip yí xii tiempo mina yí jac-jadyii naaxhuiñyäj ajcxy ca' xy'ocjac'ixnibich. Com jadu'n nej iich njactzinähua'ñ, ca' iich njugy'ajtin yciixipy ytigoyipy tücci'yí. Nañ jadu'n miich ajcxy mjactzinähua'ñ, ca' mjugy'ajtin ajcxy yciixipy ytigoyipy tücci'yí. ²⁰ Co anajty Dios yjihuĩ'ñ ymic'ajt ajcxy xy'adigiy xyjottigiy, huin'it ajcxy mnejhuĩhuipy co nyajpaadyich ma nDeedyich, yí Dios Teedy, e miich ajcxy myajpaady ma iich, e iich nañ jadu'n yajpatpich ma miich ajcxy. ²¹ Je jay ajcxy huidibi iich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogüib je' iich nDeedy. E iich nañ jadu'n ndzogipy njihuĩhuibiyich je' ajcxy, e nnayyajniguëxigiybich ma je' ajcxy.

²² Je jadügpí Judas, ca' nmīnaanīm Judas Iscariote, nīmay Jesús:

—Huindzin, ¿nej co mnayyajniguëxiga'ñyii ma iich ajcxy, e ca' mnayyajniguëxiga'ñyii ma je jay ajcxy huidibi ca' xymijpidägy?

²³ Chi Jesús je' y'adzooy:

—Yí jay ajcxy huidibi xychojcpich xyajmij'ajtpich, xycuydúunibich yí ajcxy iich n'ayuc ndiy'ajt. E huin'it yí ajcxy chogiiyb iich nDeedy. Je nDeedyich etz iich miinip iich ajcxy ma je jay ajcxy huidibi xycuyduunip iich ndiy'ajt, e tzinaydacpigipyich ma yí ajcxy yjot yhuinma'ñ. ²⁴ Je jay ajcxy pinjaty ca' xychocyich, nañ ca' ajcxy iich n'ayuc xycuyduunich. Paady ca' nnayyajniguëxiga'ñyijich ma je' ajcxy. Com yí ayuc huidibich miich ajcxy nyaj'amido'ijtyp, ca' yí iich ngi'm'ayuc'adyii. Yí je' Dios Teedy y'ayuc ytiy'ajt, com yí iich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimayb, jadu'n nej njacyaanigyich ya naaxhuiñ mĩd miich ajcxy, ma ca'ni ndzooñich. ²⁶ Per je Espíritu Santo huidi miinam, je' ajcxy xycapxhuijp. Dios Teedy yquexamy je Espíritu Santo mĩd iich nxi. Je Espíritu Santo xyajnejhuĩydähuipy miich ajcxy tüg'óciy tiy'ajt, e nañ xyaj'ajihuĩhuib tüg'óciy jadu'n nej iich miich ajcxy nnimaaygixy.

²⁷ Iich miich ajcxy nyajmihui'my jotcuje'ajtin. Jadu'n nej iich njotcuje'atyich, nañ nya-jjotcuje'adipyich miich ajcxy. Yí jotcuje'ajtin huidibi nyajmihui'maamyich miich ajcxy, ca' yí yjadu'nity nej je jotcuje'ajtin huidibi yajpaatp ya naaxhuiñ. Ca' mdajcixy maygixy, nañ ca' mdzigiygixy. ²⁸ Ti iich miich ajcxy nnimaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nnicxa'ñich ma Dios Teedy, com yí Dios Teedy jac mij yí ca'ydi iich. ²⁹ Ti iich jada tiy'ajt jayijp nimiydägyich ma ca'ni ndzooñich, jigix co anajty je tiempo paady mina jadayaabi ytuniyb yjadiyb, huin'it ajcxy mmibigipy iich n'ayuc.

³⁰ E ca' iich miich ajcxy mijcajee ooy njacmĩdmĩydägaangixy yam. Com tim huingónip mina je mujcu' huidibi ane'mb ya naaxhuiñ xyñimina'ñich. Ca' iich yí huaad jēbi xymĩmadägyich. ³¹ Per copicy yí nguydunipyich Dios Teedy y'ayuc nej xyaj-najtz'ane'mi'yich, jigix je naaxhuiñyäj nejhuĩhuipy co nyajmij'atyich yí Dios Teedy. Pidccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ich nipaady nej camuux'aadz ma tüg muuxy'aadz cam. Ich nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jäy jadu'n ajcxy nipaady nej muuxy'aadz y'aacx. Je jäy ajcxy huidibi ca' cuychinäy ich ndiy'ajt, yi Dios Teedy yajcödigoyib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jäy ajcxy huidibi cuydundaayb ich ndiy'ajt, Dios yaj'oyib je' ajcxy yjot yhuinmañ, jëbi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jëbi nigi ytiim'aty. ³ Yi ayuc huidibi ti nyajnimaygixy, yi' ti yajhuäch yi jibicpi ma miich ajcxy mjot mhuinmañ. ⁴ Mibijccich ajcxy, panícxigich ajcxy ndiy'ajt huinixi. Co ajcxy jadu'n mdunipy, ich miich ajcxy miid'idipy huinixi. Jadu'n nej ixipy camuuxy'aadz y'aacx co ca' ytiim'aty co ahuinggujc y'ity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma ich, ca' mmimadaccixipy mguychinäyagixipy ich ndiy'ajt.

⁵ Jadu'n ich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma ich, e ich nyajpaady ma je' ajcxy, je' ajcxy oyhuinmañ tunam mij cajee, tim jadu'n nej camuuxy'aadz huidibi tiim'ajtp may'amy. Co ixipy ich ca' nyajpaady ma miich ajcxy, ca' miich ajcxy huaad ti mdungixy. ⁶ Co jäy ajcxy ndiy'ajt xy'ixmájtziwich, Dios ajcxy yajcödigoyib, tim jadu'n nej jäy yajcödigoy miid jin yi muuxy'aadz y'aacx huidibi ymibuxiyb co ca' ytiim'ajtni. Co je y'aacx ytidzity, chi ajcxy yajmucy, e pidaaccixy jinjoty, e jadu'n jibby ñidooyiy jinjoty.

⁷ Co miich ajcxy m'ijtcixy ma ich, e co ich n'ayuc nañ jadu'n ijtp ma miich ajcxy mjot mhuinmañ, jëbi mbijctzoogixy ti ajcxy mdzojcyp ma Dios, e nguydunipyich miid miich ajcxy ycixpi. ⁸ Chi je jäy ajcxy cömayipy Dios co miich ajcxy mguydunipy ich ndiy'ajt tiydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixipy nej tudägy mguydungixy ich ndiy'ajt, chi je jäy ajcxy tiydudägy nejhuihuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuiyich, nañ tim jadu'n ich miich ajcxy ti ndzocy ti njihuüyich. Ndzogipy njihuihuibyich miich ajcxy huinixi co ca' ajcxy xy'ixmájtziwyich ndiy'ajtich. ¹⁰ Co mguydundähuipy ajcxy jadu'n nej nyajnajtz'ane'müygixy, ndzogipyich njihuihuibyich miich ajcxy huinixi. Tim jadu'n nej nguyduñich yi huidibi Dios Teedy xyajnajtz'ane'müybich, e yi' xychojcpich xyjihuiybich huinixi.

¹¹ Cham jadayaabi ayuc nyajnajtz'ane'müygixy, jigix jotcuyc m'ijtcixipy. Jadu'n nej jotcuyc ti n'ityich, e nañ jadu'n miich ajcxy mjotcuyc'adipy anaxy. ¹² Jadaabi ayuc ich miich ajcxy nyajnajtz'ane'müybich co naychójcigix nayjihuiyigix nidüg nidüg, tim jadu'n nej ich miich ajcxy ndzocy njihuüy. ¹³ Je tiy'ajt jac'oybi co migügtijc ajcxy naychogüyb nayjihuihuüy, co tüg jäy cýegipy yjugy'ajtin miid ymigügtijc ycixpi. ¹⁴ Ich miich ajcxy migüg'ajtyp, pen mguydumyb nej ajcxy nyajnajtz'ane'müygixy. ¹⁵ Jadu'n nej xii tiempo yjacnicxañ, ca' miich ajcxy n'ocnaydijnip ich ndumbi. Com je tumbi ca' huinjihuüy huidibi yhuindzin ytumyb. Hue' miich ajcxy nyajnaxyich nmigügtijcich, com tüg'óciy tiy'ajt tiibi nmidooyich ma ich nDeedy, yi Dios Teedy, ti ich miich ajcxy nnimaaygixy. ¹⁶ Ca' nminaanim ich miich ajcxy ti xyhuin'ixy. Ich miich janchtiy ajcxy ti nhuin'ixy. E ti ich miich ajcxy nyajnibicy co nicxy mgapxhuäxcixy ich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ ich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinmañ huinixi. Paady ycix tüg'óciy tijaty miich ajcxy mbijctzooyb ma Dios Teedy miid ich nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'müyb co ajcxy mnaychogüyb mnayjihuihuüy miñ xyipy.

Je maybi naaxhuiñjäy ca' ajcxy ixaangixy Jesús etz cham je' yjäy

¹⁸ Co je may naaxhuiñjāy ca' xy'ixaangixy miich ajcxy, ca' ajcxy ooy mhuinmayipy, com mnejhuiyb ajcxy co ñich nañ jadu'n jac jayijp ca' yi' ajcxy ti xy'ixáangixyich. ¹⁹ Co ixyipy ytügüy miich ajcxy m'ayuc mdiy'ajt mñid je jacjadyii naaxhuiñjāy y'ayuc ytiy'ajt, huin'it ixyipy ajcxy xychojccixy xyjihuiygyxy, com tú'ciy miich ajcxy mhuinma'ñ ixyipy mñid yi' ajcxy yhuinma'ñ. Janch com co ca' ytügüy miich ajcxy m'ayuc mdiy'ajt mñid je jacjadyii naaxhuiñjāy y'ayuc ytiy'ajt, paady je jacjadyii naaxhuiñjāy ca' ajcxy xy'ixa'nip. Com ñich miich ajcxy ti nyajjihuijtztüdy, jadu'n nej yi' jacjadyii naaxhuiñjāy ajcxy chinaaygixy yjugy'ajtcixy. ²⁰ M'ajihuihuiyb ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydi miich ajcxy. Jadu'n nej naaxhuiñjāy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jāy huidibi ca' ti xycapxymidooyich, nañ jadu'n may je jāy huidibi miich ajcxy ca' xycapxymidohuaangixy. ²¹ Nijot ajcxy y'iditzaangixy mñid miich ajcxy ycixpi, com ca' ajcxy ixy'adyii Dios Teedy huidibi xyquejxyich ya naaxhuiñ.

²² Co ixyipy ca' ti nmiiñich ya naaxhuiñ nyajnimäyich je jāy ajcxy Dios ytiy'ajt, ca' ixyipy ajcxy pocy mñidity. Per com ti nmiiñich ya naaxhuiñ, paady cham ypocy ajcxy mñidity co ca' ajcxy xy'ixa'ñich. ²³ Je jāy ajcxy huidibi ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi' ajcxy yhuinduu mijhuinma'ñ, huidibi ca' ni pin jāy tuñi, ca' ixyipy ajcxy pocy mñidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judío jāy ajcxy ley ñecy, ma jadu'n ymína'ñ: "Ni ti tiy'ajt ycaca'ty, co ñich yi' ajcxy ca' xy'ixa'ñich."

²⁶ E co anajty xyñigidaaccixy yi' Espíritu Santo, yi' huidibi xycapxhuijip ajcxy, je huidibi miich ajcxy nyajniguexam, chon ma Dios Teedy, je huidibi Dios ytiy'ajt mñid. Yi' xyñidiy'ajt'adaambich co Dios ytiy'ajt nmñidityich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmñidityich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuägipy. ² Com judío jāy ajcxy xy'ixhuidzipy ajcxy ma ajcxy yi' ñaymujctac. Ypadaamy yi' xii tiempo co miich ajcxy jāy xyaj'ögipy, hue' ajcxy tijipy co Dios anajty ooy jadu'n jāygidägy tñibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ixy'adyii yi' Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuihuiyb ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

Dios yjihui'ñ ymic'ajt tunam ma jāy yjot yhuinma'ñ

Ca' anajty ajcxy jada ti nyajnimäy mñid jëgix nmñidity ajcxy. ⁵ E cham janchtiy nnicxáanibich ma yi' huidibi ti xyquexyich ya naaxhuiñ. E ni tüg miich ajcxy xyca'amidooyich: "¿Ma mñicxa'ñ?" ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuiygyxy. ⁷ Oy ixyipy miich ajcxy cham mjatajy mjamay, tiy'ajt nej nmína'ñich co jac'oy mñid miich ajcxy ycixpi co nhuimbidityich ma Dios Teedy. Co ixyipy ca' jiiby nnicxa'ñich tzajpjoty, ca' ixyipy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajniguexipy. ⁸ E co anajty je Espíritu Santo miiñ ya naaxhuiñ, huin'it yi' yajjihui'ñybigipy jāy ajcxy ypocy. E nañ yajni'ixihuipy je jāy ajcxy co Dios tiydunib mñid ypocy ycixpi. ⁹ Yi' Espíritu Santo yajjihui'ñybigipy jāy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuihuipy jāy ajcxy nej huaad cuychinaaygixy Dios y'ayuc ytiy'ajt. Com co ñich

nba'ttigihua'ñich ma Dios Teedy, e miich ajcxy ca' xy'ocjac'íjxnibich. ¹¹ Je Espíritu Santo yajhuinjihuip je jāy ajcxy co Dios tiydunib ajcxy mīd ypocy ycixpi huidibi ajcxy ca' tiydudāgy chinaaygixy. Com yi Dios ti yi' mujcu' tiyduñ mīd ypocy ycixpi.

¹² Ooy may ayuc ich nmiidity huidibi njayajnimāhuaamyich ajcxy per ca' miich ajcxy mhuinjihuipy cham. ¹³ Jaciini mhuinjihuipy ajcxy je ayuc huidibi njayajnimāhuamy ajcxy, co Dios quexipy je Espíritu Santo ya naaxhuiñ huidibi tiy'ajt mīd. Yi' je' miich ajcxy xyajhuinjihuipydāhuipy tūg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtāhuipy tūg'óciy ayuc tiy'ajt huidijaty anajty ymidooyb ma Dios Teedy, e nañ yajniguēxictāhuipy tūg'óciy tiy'ajt huidibi mimb cidaacp. ¹⁴ Je Espíritu Santo ich yi' capxpaady xyaj'idipyich, com yi' ich ndiy'ajt miich ajcxy xyajhuinjihuipyaam. ¹⁵ Tūg'óciy huidibi Dios Teedy ymīd, nañ njē'ajtypich yi', paady jadu'n ti mīna'ñich co je Espíritu Santo xyajhuinjihuipydāaygixipy ajcxy ich yi' n'ayuc yi' ndiy'ajtich.

Jesús ñimay ymigügtijc co ajcxy yjotmay ahuimbidity jotcuyc'ajtin

¹⁶ Tim huaad'ajtp xii tiempo, co ich miich ajcxy ca' xy'ocjac'íjxi. Chi co xii tiempo yjacnajtznīcxihiip, huin'it ich miich ajcxy xyjac'ixipy jadūg'oc.

¹⁷ E huin'it ajcxy nijējity Jesús ydiscípulos ajcxy ñayñimaayi miñ xyipy ac jēyi:

—¿Ti jadu'n ytiyp? Co jadu'n ymīna'ñ, co tim huaad'ajtnip xii tiempo mīna ich miich ajcxy ca' xy'ocjac'íjxnibyich, e co yjacnajtznīcxihiip xii tiempo, huin'it miich ajcxy xyjac'ixipyich jadūg'oc, com nñicxaamich ma Dios Teedy. ¹⁸ Chi ajcxy jadu'n ñayñimaayi miñ xyipy:

—¿Ti jadu'n ytijamy? Co jadu'n ymīna'ñ co tim huaad'ajtnip xii tiempo. Ca' ich ajt nhuinjihuipyim ti jadu'n ytijamy.

¹⁹ Com Jesús ñejhuib anajty nej ajcxy yja'amidoohua'ñyii, chi ñimay ajcxy:

—Yi' miich ajcxy ooy mjayajtihua'ñ. ¿Nej co jadu'n ti mīna'ñich? Tim huaad'ajtnip xii tiempo co ich miich ajcxy ca' xy'ocjac'íjxnipy. E chi yjacnajtznīcxihiip xii tiempo, e chi miich ajcxy xyjac'ixipyich jadūg'oc. ²⁰ Janch janch ich miich yam nñimaaygixy co mjetmaybaadip ajcxy, e nañ myāxip ajcxy mīd jotmay. Chi je naaxhuiñyāy ajcxy huidibi ca' xymijpidāgyich, xondāgam ajcxy, e miich ajcxy nañ mjetmaybaadip. Per yi' mjetmay ajcxy ahuimbidity tūg xondaacin. ²¹ Jadu'n ajcxy mjada'ñ jadu'n nej tūg tōxyjāy tzaachypi jihuīy co y'ung yma'xung'ada'ñ. E co ti yma'xung'aty ypi'c'ung, chi jāydīgoy yi' tzaachypi mīd xondaacin co tūg jāy ti ymīñ ya naaxhuiñ. ²² Tim jadu'n nej yjaty mīd je tōxyjāy, nañ jadu'n yjada'ñ mīd miich ajcxy. Cham ajcxy jotmay mjihuīy ma m'aa mjet, e chi co xy'ixipyich jadūg'oc miich ajcxy, huin'it ajcxy m'aa mjet yxondāga'ñ. E ni pin huaad mxondaacin ajcxy xycapijciy.

²³ Je huin'it ximbi (co anajty je Espíritu Santo ti ymīñ ya naaxhuiñ) ca' ich miich ajcxy ni ti xyjacyajmbijctzohuipyich, com janch ich miich ajcxy yam jadu'n nimaaygixy co tūg'óciy huidijaty myajmayajtcixyp, chi ajcxy mbijctzohuipy ma Dios Teedy mīd ich nxi, e xymōhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios mīd ich nxi. Pijctzoogix, e xymōhuipy ajcxy yi', jigix mjetcugihuip ajcxy anaxy.

Jesucristo ymīmadac je jibic-huinma'ñ ya naaxhuiñ

²⁵ Tūg'óciy jada ayuc tiy'ajt ac jihuimbit miich ajcxy ti nyajnimāy. Huingomb xii tiempo mīna tiydudāgy ajcxy nyajmīdmīydactāhuipy yi' Dios Teedy y'ayuc ytiy'ajt ya-jxon, e ca' y'ocjihuimbitiñ. ²⁶ Je huin'it xii co anajty ich ti nhuimbityich ma Dios Teedy, jēbi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzōogixipy mīd ich nxi, xymōoygixipy yi' Dios Teedy. Ca' ycopicyity co ich yi' nmībijctzohuipy mīd miich ajcxy ycixpi. ²⁷ Com yi' Dios Teedy nañ xychojcp xyjihuīyb yi' miich ajcxy. Com miich ajcxy jayijp ti xychocyich ti xyjihuīyich, e ti

mmibicy ajcxy co ti ndzooñich ma Dios Teedy, paady Dios miich ajcxy xymöhuipy tijaty anajty myajmibijctzooyb. ²⁸ Jiiby ñich ndzooñ ma Dios Teedy yajpaady, co nmiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy ymíñañ:

—Cham janchtiy tudägy miydägy, ca' m'ocyajtuuni jñhuimbit ayuc. ³⁰ Cham ñich ajcxy nnejhuiy co miich mnejhuiyday tüg'óciy tiy'ajt. E ti xyajnimaydäyich co anajty ca' ti tiy'ajt ñich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nnimáaygixy? ³² Jihui'ñybijccix co huingonip je xñ tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhui'mgixich naydüg. Per ca'p ñich nnaydügity, com yi Dios Teedy yí' ijtp mñd ñich. ³³ Miich ajcxy yam jada ayuc nyajnimayyb, jigix ajcxy jotcujc'ajtn mbaadip ma ñich. Ya naaxhuiñ mbadamy ajcxy ayo'n etz tzaachypi. Jotcugñygix, ca' mdajcxy maygixy, com ti nmimadägyich yi jibicpi ya naaxhuiñ.

17

Jesús ymibijctzou Dios mñd ydiscípulos ajcxy ycixpi

¹ Co Jesús jadu'n ymíñañ jayijp, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayñy. Yajniguëxig ñich nmic'ajt ñich n'oy'ajt, com ñich miich nDeedy'ajtypich, jigix ñich nañ jadu'n nyajniguëxigibyich miich nmic'ajt miich m'oy'ajt ma yi jäy ajcxy.

² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtn huidibi ca' ycixipy ytigoyipy. Nmöhuibyich jada jugy'ajtn tüg'óciy jäy ajcxy huidibi miich ti xymöyich. ³ Je jäy ajcxy huidibi ixy'ajtp je Dios janchypi, je Dios tügpajcpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymñd ajcxy jugy'ajtn huidibi ca'ycixipy ytigoyipy nimíña.

⁴ Ti ñich nyajniguëxigyich miich ajcxy yi nmic'ajt ya naaxhuiñ, co ñich ti nduñ yi mdung huidibi miich xyajñibicich. ⁵ Jadachambi Dios Teedy yajmijtiygyich miich, mñd je mic'ajtn huidibi anajty mñdich ma miich mhuinduu co anajty ca'ni naaxhuiñybi chondacyñi.

⁶ Ti ñich miich ya naaxhuiñ nyajniguëxici yi nmic'ajt ma yi jäy ajcxy huidibi miich xymooyich, huidibi miich mhuin'ijx ma naaxhuiñyjäy ajcxy. Miich yí' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi ñejhuiyñip yí' ajcxy, co tüg'óciy tijaty tiy'ajt ñich miich yí' xymooyb, jiiby yí' choon tzajpjoty ma miich. ⁸ Com yi ayuc huidibi miich ti xymöyich, ti ñich yí' ajcxy nyajnimaydäy, e ti yí' ajcxy cöbijccixy. E nañ ti ajcxy huinjñiyygixy tiydudägy co ñich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejxyich.

⁹ Mñd yí' ycixpi ajcxy miich Dios Teedy nmibijctzooy, ca' nmíñaanim mñd jacjadyii naaxhuiñyjäy ajcxy ycixpi nmibijctzoy. Mñd yída'ajty ycixpi ajcxy huidibi miich ti xymöyich, com nañ mjé'ajtyp miich yí' ajcxy. ¹⁰ Tüg'óciy tijaty ñich njé'ajtyp, nañ mjé'ajtyp miich yí', e tijaty miich mjé'ajtyp nañ njé'ajtyp ñich yí'; e ñich nmic'ajt niguëxi'cp yí' ma yí' ajcxy chinaayin yjugy'ajtn.

¹¹ E ca' n'ocjacyajpadaanich ya naaxhuiñ. ñich njäy ajcxy jacyajpadam ya naaxhuiñ. Nñicxnibich jiiby tzajpjoty ma miich. Dios Teedy, cuend'at ñich ndiscípulos ajcxy mñd miich nmic'ajt huidibi miich ti xymöyich, jigix yí' ajcxy tú'ciy yjot yhuinma'ñ yajpaadipy ma miich, tim jadu'n nej ñich ajt tú'ciy njot yhuinma'ñ nyajpaatim. ¹² Co anajty ñich njac'yaajity naaxhuiñ mñd ñich njäy ajcxy, ti ngüend'atyich anajty ajcxy mñd je mic'ajt huidibi miich xymooyich. E ni tüg ajcxy ca' yhuinma'ñydygooy. Abicy ñich n'octimpidägy

je huidibi nayyajhuinma'ñy digoooyi (je Judas Iscariote), co yi' anajty jadu'n yajcuydunam jadu'n nej jaybety ymiiñ miiid yi' ycixpi etz miiid iich ycixpi.

¹³ Cham iich miich niba'ttigihuaani jada'. Miich m'ayuc mdiy'ajt nyajnimaaaybich jada naaxhuiñyäj ajcxy huidibi nyaj'ixpijycypich, jigix aguic jotcuic yhui'mip ajcxy. ¹⁴ Ti iich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñyii yi' naaxhuiñyäj ajcxy huidibi ca' xymijpidägyich. Com je' co ajcxy yjot yhuinma'ñ ti yajtigach, ca' ytügiy miiid yi' jacjadyii naaxhuiñyäj yjot yhuinma'ñ. Jadu'n nej iich ca' ytügiy njot nhuinma'ñ miiid naaxhuiñyäj ajcxy yjot yhuinma'ñ. ¹⁵ Ca' iich cham miich nmibijctzoy co myajpidzimipy iich ndiscípulos ajcxy ma jada naaxhuiñybi. Hue' janchtiy tun may'ajt cuend'at ajcxy ma yi' ca'oybi ymiiñ. ¹⁶ Yi' ajcxy yjot yhuinma'ñ ca' ytügiy miiid yi' jacjadyii naaxhuiñyäj ajcxy yjot yhuinma'ñ. Tim jadu'n nej iich ca' ytügiy njot nhuinma'ñ miiid yi' jacjadyii naaxhuiñyäj ajcxy yjot yhuinma'ñ. ¹⁷ Yajhuaatz i ajcxy yjot yhuinma'ñ miiid miich m'ayuc, com yi' m'ayuc yi' je' tiy'ajt miiid. ¹⁸ Jadu'n nej miich xyquejxyich ya naaxhuiñ, nañ jadu'n iich yi' ajcxy nguejxhuäcxyich ya naaxhuiñ. ¹⁹ Miiid yi' ajcxy ycixpi ti nnaygiyegyiich amuumdüg jot ma miich, jigix yi' ajcxy nañ jadu'n ñaygiyegiyb amuumdüg jot ma miich, co ajcxy cuydunipy miich m'ayuc mdiy'ajt.

²⁰ E ca' iich jada'ajty ajcxy nibijctzohuiyich. Hue' iich janchtiy nibijctzohuiydaaybich tüg'óciy jäy ajcxy huidibi xymibijcibich xymijpidägyibich miiid yi' ayuc huidibi iich ndiscípulos ajcxy ycapxhuäcxy. ²¹ Huen ajcxy nidüg'óciy yjot yhuinma'ñ yajtügüy, jadu'n nej miich Dios Teedy m jot mhuinma'ñ yajpaady ma iich, e iich njot nhuinma'ñ yajpaady ma miich. Co yi' ajcxy yjot yhuinma'ñ yajtügühuipy miiid iich ajt njot nhuinma'ñ, huin'it jacjadyii naaxhuiñyäj ajcxy mibigipy co miich xyquejxyich ya naaxhuiñ. ²² Ti iich ajcxy nmöyich je tiy'ajt etz je oy'ajt huidibi iich miich ti xymöy, jigix ajcxy yjot yhuinma'ñ jatyimy yajtügühuipy ajcxy, jadu'n nej iich ajt njot nhuinma'ñ yajpaatim tú'ciy. ²³ Iich yajpatpich ma iich njäy, e miich nañ myajpatp ma iich, jigix tiydudägy ajcxy tüg mucus y'idipy, e nañ jigix naaxhuiñyäj ajcxy jatyimy nejhuñhuipy co miich xyquejxyich ya naaxhuiñ, e nañ co yi' ajcxy ti mdzocy ti mjiñhuñ jadu'n nej iich miich xychocy xyjiñhuñyich.

²⁴ Dios Teedy ndzojcpyich co yi' jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jii by tzajpjoty, jaydëbi ajcxy ixipy iich nmic'ajt iich n'oy'ajt huidibi miich ti xymöyich. Com miich ti xychocy ti xyjiñhuñyich jacjayijp ca'ni anajty naaxhuiñybi myajcojyñi. ²⁵ Dios Teedy, miich ooy mmijity mjanchity, e yi' jacjadyii naaxhuiñyäj ca' ajcxy yi' xy'ixy'ajtyp. Iich miich n'ixy'ajtyp. Iich njäy ajcxy ti mibicy ti mijpidägy co miich xyquejxyich ya naaxhuiñ. ²⁶ Ti nyajnimaaayich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiyb ñayjiñhuñybi nidüg nidüg, jadu'n nej miich xychocyich xyjiñhuñyich, e nañ jadu'n jigix iich ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

¹ Co jadu'n Jesús ycapxymiydacy jayijp, chi jada' ñicxy miiid je jäy ajcxy huidibi anajty ajcxy yaj'ixpijycp. Ñicxy ajcxy jim'amy huoc nñaxy, je huoc hue' anajty xijity Cedrón. Ñicxy ajcxy jim ma anajty tüg aguemy. Chi Jesús ytiñy ma je aguemy miiid ydiscípulos ajcxy. ² Judas huidibi anajty ciyegam Jesús, ñejhuñyib anajty ma je it ma anajty miiid'oy canaag'oc je' ydiscípulos ajcxy. ³ Chi jada' Judas miiidzooñ soldados ajcxy etz jacjadyii tungmiiidpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiiid ajcxy linterna, ymiiid ajcxy chinjin etz

canaagnax tijaty huiðibi anajty ajcxy mïd chiptuñ. ⁴ E Jesús com ñejhuiydaayb anajty tüg'óciy nej anajty yjada'ñ y'ayohua'ñ, chi jipcohuägiy je ymaymidzip ajcxy, e nimay:

—¿Pin ajcxy m'ijxtaayb?

⁵ Chi je' ymidzip ajcxy y'adzooy:

—Yi' ñch ajcxy n'ixtaayb je Jesús, je Nazaret jäy.

Chi Jesús yminañ:

—Ñich jëdu'n.

Je Judas huiðibi anajty cïyejcp Jesús, jim anajty ytinäy mïd Jesús ymidzip. ⁶ Co Jesús jadu'n yminañ: “Ñich jëdu'n.” Chi ajcxy yëphuibijtay jadu'ñyi. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús yminañ:

—Ti ajcxy njanimäy co ñch jëdu'n. Pen janch ñch miich ajcxy xy'ijxtaayb, najtzmadziydäy jadayaab ñch nmigügtijc ajcxy, huen nicxcixy.

⁹ E jadu'n yajcuyduñ je ayuc co anajty Jesús ci'm ti yminañ: “Tüg'óciy jäy huiðibi nDeedy ti xymöyich, ca' ni tüg jëbi huaad ytigooy.” ¹⁰ Chi jada' je Simón Pedro huiðibi anajty mïd tüg espada, juudy je y'espada ma ñidijc, e chi yajtzaachiiyi je Teedy mïjtungmïdipi ytumbi, tüg yta'tz'ac aa'oy'amybi yajminájiy. Je tumbi hue' anajty xiiijity Malco. ¹¹ Chi Jesús nimay Pedro:

—Pidäg m'espada ma ñidijc. Ca' mnejhuiy co copicy nyajnaxipyich je tzaachypi je ayo'n huiðibi Dios Teedy ti xyajnigo'adugiyich. Min n'ocminaxy n'ocyajnaxyich jada tzaachypi jadu'n nej ixyipy tüg tasi ta'm'ujtznii ngo'uucnaxyich.

Jesús ma je Teedy mïjtungmïdipi yhuinduu

¹² Chi je soldados ajcxy, je soldado yhuindzin etz judíojäy ajcxy ytungmïdipi huingo-huägiy ajcxy Jesús. Chi ajcxy majch, e chi ajcxy cïxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymïd'ajtyp, je huiðibi anajty mïjtungmïd ma teedytjic ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma yi judíojäy ajcxy co tügtecy yminañ: jac'oy co tüg jäy y'ögipy mïd tüg'óciy naax cajp ycixpi.

Pedro yminañ co ca' ixy'adyii Jesús

¹⁵ Simón Pedro mïd jadügpi ydiscípulo ypanicx ajcxy Jesús (co je ymidzip yajnicxi mach). E je jadügpi ydiscípulo ixy'ajtip anajty yajxon je teedy mïjtungmïdipi, paady ytigiiy axam huin'it co Jesús ymidzip yajtigiiyi ma je teedy mïjtungmïdipi ytijc. ¹⁶ E je Pedro jiiby je' yhui'miy ma tijc agu. E je jadügpi ydiscípulo co anajty ajcxy ñay'ixy'adyii mïd je teedy mïjtungmïdipi, chi ypidzimy migapxy je tijc agu adinaayb, chi Pedro ajcxy yajtigiiy jiiby tigoty. ¹⁷ Chi jada' je töxy'anäg huiðibi anajty tijc'agu adinaayb, nimay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtijc ajcxy ti anajty ajcxy oy jin yajmijiiygixy co anajty chachtichity, e Pedro nañ jim anajty nañ jadu'n mïd xamy ajcxy.

Je teedy mïjtungmïdipi yajcomidou Jesús ypocy

¹⁹ Chi je teedy mïjtungmïdipi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰ Chi Jesús y'adzooy:

—Ti ñch oy njacapxy njamiydägy mayjäyjoty. E ti ñch njatyimy nyaj'ixpicyich ma miich ajcxy mnaymujctacin etz ma Dios ytijc, ma yi judíojäy ajcxy nidüg'óciy ñaymugyii. Ca' ni ti ameech ti nnigapxyich. ²¹ ¿Na'amy co xyjactim'amidooyich ti anajty ti nyaj'ixpicyich?

Yi' ajcxy amídou pinjaty ti xy'amído'ijtich n'ayucich, yi' ajcxy nejhuiyb ti ich jadu'n ti nyaj'ixpicyich. Yi' ajcxy tūg'óciy ñejhuiydaayb nejaty ich ti mīna'ñich.

²² Co jadu'n y'adzooy Jesús, huin'it tūg judío tungmīdpi huidibi anajty jim huingon tinaayb ma Jesús, chi tūg ci' acojxigy Jesús, chi mīnañ:

—¿Nej co jadu'n jibic m'adzooy yi teedy mītungmīdpi?

²³ Chi Jesús y'adzooy:

—Pen jibic ich ti n'adzooy yec tiy'ajt nej co yjibicity. Pen oy ich ti n'adzooy, ¿nej co xycoxyich?

²⁴ Chi Anás nimay soldadtijc co huen Jesús yajnicxy cīxoch jim ma yi Caifás ytijc, je teedy mītungmīdpi.

Chi Pedro jadüg'oc ymīnañ co ca' ixy'adyi Jesús

²⁵ Simón Pedro jimni anajty ytinäy ma jīmmba' yxamy anajty, chi ajcxy amído y jadüg'oc:

—¿Nej cay yi' mīich xyaj'ixpijcp nañ jadu'n?

Chi Pedro jadüg'oc coyūch Jesús ymīnañ:

—Ca' je' n'ichity.

²⁶ Nidūgti ajcxy je teedy mītungmīdpi ytumbi, je' anajty y'amīgūg yi Malco, huidibi Pedro yta'tz'ac quejtzpujxi, chi jadu'n ymīnañ:

—¿Nej ca' mdijy n'ixyi jim ma je aguemy mīd Jesús?

²⁷ Chi Pedro mīdugīg'oc oy coyūch yhuindzin, e tim huin'itiy tzey oy yaaxigy.

Jesús ma je gobernador yhuinduu

²⁸ Chi ajcxy jim yajtzooñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judiojāy ca' ajcxy ytigīy ma agujctijc, com ca' anajty ytundigoyaangixy mīd judiojāy ycostumbre. Ca' ajcxy ytigīhua'ñ anajty ma je romanojāy gobernador ytijc amayxijoty, e ca' anajty ajcxy ñayyajjibiccihua'ñy. Com co jadu'n ycanayyajjibicciyi ajcxy, e huin'it ca' ajcxy ycacaay ma je pascua xi adzuu'ajtin. ²⁹ Co ca' ajcxy ytigīhua'ñ anajty ma je agujctijc, chi je gobernador Pilato nibidzimy ajcxy tība'y ma anajty ajcxy mīdity Jesús cuend'aty. Chi Pilato ymīnañ:

—¿Ti xīhuin ajcxy mmīd, mīd jadayaabi yēydijc?

³⁰ Chi ajcxy y'adzooy:

—Co ixypy ca' ti jibicpi tuñ, ca' ixypy ich ajcxy ya yi' nyajmīñ ma mīich.

³¹ Chi Pilato ymīnañ:

—Yajnicxcix mīich ajcxy. Nicx tiydungix jadu'n nej mīich ajcxy mley y'ané'my.

Chi je judiojāy ajcxy y'adzooy:

—Ich ajcxy ca' ni ti mīc'ajt nmīdity nicxy ich ajcxy njäyyaj'ögy.

³² Co jadu'n ajcxy ymīnañ, chi jadu'n ajcxy cuyduñ je Jesús yci'm'ayuc jadu'n nej anajty ti ymīnañ ti o'cin anajty ypadamy. ³³ Chi Pilato jadüg'oc ytigīy jīby agujctigoty, chi coyaaxiy Jesús, chi nimay:

—¿Nej mīich je' rey'ajtp ma yi judiojāy ajcxy?

³⁴ Chi Jesús y'adzooy:

—¿Nej mgi'mhuinma'ñ mīd xy'amídooyich pen ich nrey'ajtpich, o huingjāy ti xyajnimāy co nrey'atyich?

³⁵ Chi jada' Pilato y'adzooy:

—¿Nej nañ judiojāy jada' ichi? Mgi'mnaax mgi'mgajp etz je teedy mītungmīdpi ti xyciyecy ma ich. ¿Ti ti mdundigooy?

³⁶ Chi Jesús y'adzooy:

—Ich ca' n'ane'myich ya naaxhuiñ. Huingdum ich n'ané'min nmīdidyich. Co ixypy ya naaxhuiñ n'oc'ane'myich, tūg'óciy ich nmīgūgtijc ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygīyegyiijich ma yi judiojāy tungmīdpi ajcxy. Per janch ich ca' ich ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús ymíñañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'íjtibich yi' n'ayucich.

Pilato y'ane'my huen Jesús yaj'ögyi

³⁸ Chi Pilato y'adzooy:

—¿Ti jadu'n mdiy tiy'ajt tiydudägypí?

Jadu'ñyi je' jada'ajty yjacmíñañ, chi pidzimy jadüg'oc tiba'y ma anajty je judíojäy ajcxy. Chi ajcxy nimay:

—Ca' ñich ni ti bocy nbaadyich ma jada jäy ma yi romanojäy yley. ³⁹ E com miich ajcxy mñid tüg costumbre co tüg nnajtmadzñiyim machyjäy mñid jada pascua xñ yciñpi, ¿nej mdzojcy ajcxy co nnajtmadzñihuñbyich jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtmadzñihuñpy, yi' janchtiy mnajtmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jipphuopy. ² Chi jada' je soldados ajcxy yaj'oyñy tüg corona mñ'apy pa'apy, chi ajcxy yajcojeniy Jesús. Chi ajcxy yajnñieniy tüg rey yhuít ucypí ycolor. ³ Chi soldados ajcxy huingohuägñy jadüg'oc capxpoocxcixy yajxñgy'amy, nimaaygixy:

—¡Viva miich judíojäy rey!

Chi ajcxy ooy huingojxy jipcojxy.

⁴ Chi Pilato jadüg'oc ypidzimy tiba'y. Chi nimay je mayjäy:

—Cham ajcxy nyajpidzimy tiba'y jada Jesús, jigix ajcxy mnejhuñhuip co ca' ni ti pocy ti nbaadyich ma yi'.

⁵ Co Jesús ypidzimy tiba'y mñid je apy corona ma ycohuaic etz je rey yhuít ucypí ycolor. Huin'it Pilato ymíñañ:

—Ijxcix, cha je yëydijc.

⁶ Co je teedy tungmñidpi etz je judíojäy ajcxy ijxy, chi ajcxy yminanday nidüg'óciy aguipxyjaty:

—Yajcruudzpet, yajcruudzpet.

Chi Pilato ymíñañ:

—Yajcruudzpejtcix miich ajcxy, janch ñich ca' ni ti tiy'ajt nbaadyich nej ñich yi' nyajcruudzpedipy.

⁷ Chi je judíojäy ajcxy y'adzooy:

—Ñich ajcxy mñid tüg cötujcñ, jëbi y'ögy mñid ñich ajcxy ngötujcñ yciñpi, com ti ycapxtigooy co ymíñañ co yi Dios yteedy'ajtyp.

⁸ Co jada ayuc midooy Pilato, chi nñgi chigiygoty. ⁹ Chi ytigñy jadüg'oc ma je cötujctac mñid Jesús, chi nimay:

—¿Ma miich tiyí mgogajpity?

E Jesús ca' y'adzooy.

¹⁰ Paady Pilato ymíñañ:

—¿Ñich miich ca' xy'adzohua'ñ? ¿Ca' mnejhuñ co nmñididyich mic'ajt jëbi nnajtmadzñy etz nañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixyipy mgamüidity ma ich, pen ca' ixyipy mic'ajt ti xymöyich yi huidibi ane'mb jibiy tzejpjoy. E paady ycixpi yi tiibi ich xyciycyich nigi yi' pocy müidity ca'ydi miich.

¹² E huin'it Pilato ooy yjahuinma'n ixtay nej huaad ca' jëbi ocnajtmadziiy Jesús. E je judíoäy, je Jesús ymidzip, nigi anajty ajcxy chachx'iidich:

—Pen miich mnajtmadziiyb jada Jesús, huin'it ca' m'ocjacnaymigüg'ájtinipy müd yi mhuindzin je César huidibi ané'min ti xymöy. Com tüg'óciy pinjaty naydijip rey, ca' yi' müd nay'ixa'ñyii je César.

¹³ Co Pilato jadu'n ayuc midooy, chi yajpidzimy Jesús tiba'y. Chi Pilato y'ixtacy jim ma je' y'ane'mdac ycötujctac, jim ma je it huidibi anajty xijip Empedrado, hebreo'amy xijity Gabata. ¹⁴ Hue' tim cujcxii anajty, e chi com jabom anajty je pascuaxii ycodicxni, co Pilato jadu'n nimay judíoäy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato yminañ:

—Miich ajcxy mrey, ¿miñ n'ocyajcruudzpétyichi?

Chi je teedy tungmüdpí ajcxy y'adzooy:

—Ich ajcxy ca' ich ajcxy huingbi rey nmüidity, jëyi César ich ajt nrey'ajtim.

¹⁶ Chi Pilato cïyeycy Jesús ma je judíoäy ajcxy, huen ajcxy ci'm yajcruudzpety. Huin'it ajcxy Jesús niuägüiy. Chi ajcxy yajtzoñ.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejcycabiyy. Müd nicx ajcxy ma je it xijity o'cpi cohujc, hebreo'amy xijity Gólgota. ¹⁸ Jim ajcxy yajcruudzpejty quipxy müd jametz jäy, tüg anajty'amy, jadüg a'oy'amy etz Jesús cujc'amy. ¹⁹ Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíoäy ajcxy yrey.”

²⁰ May ajcxy ooy je judíoäy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihuingon anajty Jerusalén. Hue' anajty yjayty: hebreo'amy, latin'amy etz griego'amy. ²¹ Chi je teedy mïjtungmüdpí ajcxy nimay je Pilato:

—Ca' ixyipy jadu'n ti mjay: “Judíoäy yrey”. Hue' ixyipy ti mjay: “Yi' jadu'n naydijip ich judíoäy xyrey'ajtpich.”

²² Chi Pilato y'adzooy:

—Yi tiibi njaayich, ti ich yi' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je' y huit ajcxy huijtz'i'ci. Chi ajcxy je huit yajhuäcxy mïdaaxpicy. Chi soldados ajcxy cijptüg cïchypijcy. Yi' yjocx huit jadu'n nej anajty ytügiipxuyiyty. ²⁴ Chi ajcxy ñayñimay ac jëyi soldadtijc:

—Ca' huaad ajt n'agüdziiyim jada jocx huit. Tzoc ajt suerte n'oc'ijxim, jigix ajt nnejhuüyim pin anajty suerte'ajtip.

E jadu'n ajcxy cuyduñ nej anajty ycojaayty ma Dios ñecy, ma Cristo jadu'n yminañ: “Yajhuäcx ajcxy ich nhuit, e ma ich njocxnijen jim ajcxy suerte ijxy.” Je' je' huidibi soldadtijc ajcxy ycuuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶ Co Jesús ijxpaty ytaj etz je ydiscípulo huidibí anajty ooy nigi tzocy ma ytaj ymijc, chi nimay ytaj:

—Nan, ich nmigüg huidibi tinaayb ma miich mmijc, yi' xycuend'adip jadu'n nej jihuüy miich yi' xytaj'adyii.

²⁷ Chi Jesús nimay je' ydiscípulo:

—Ich ndaj miich mgüend'adipy, jadu'n nej ixyipy mgi'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytiyc.

O'c Jesús

²⁸ Co jadu'n ytundaayi yajtaayi, chi Jesús nejhuüy co ti anajty tüg'óciy ytundäyii yajtäyii jadu'n nej Dios tzocy. Huin'it jadu'n ymíñañ:

—Tidziyiniibich.

Co jadu'n ymíñañ, je' anajty ycuydundaayb nej anajty ycojayity ma Dios ñecy mïid yi' ycixpi.

²⁹ Jim anajty tüg pi'c uugi'ñ ymïid anajty vinoxunni. Chi ajcxy je' yajxoogy tüg esponja (jadu'n yi' nej po't) mïid vinoxunni, e chi yajjiip'eedziy tüg paxyijp, je' mïid yajjady je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n ymíñañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyijp

³¹ Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajminájcipy ajcxy je jäy ninïcx je tiibi anajty yajcruudzpejtcixy. Mïid je' ycixpi je judíojäy ajcxy ñicxy ma Pilato pijctzoy may'ajt co huen ane'my yi' soldados ajcxy, co huen nicxy yajtijy je jäy ytecy ajcxy huidibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jäy ajcxy ytecy tiji huidibi ajcxy yajcruudzpejt tú'ciy mïid Jesús. ³³ Co je soldados ajcxy ymijhuägy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyijp mïid quipy jipxu'ñybi. E huin'it tim mic'amy ni'py etz ni ypidzimy. ³⁵ Tüg jäy jim anajty ixy nej ytuni yajti, e nañ yejc tiy'ajt. E je' ytiy'ajt janch je', e je' nejhuüyb co yjanchity. Mïid je' tiy'ajt ycixpi jëbi miich ajcxy nañ jadu'n mmibijctähuip. ³⁶ Paady je' jadu'n ytuni yajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n ymíñañ: “Ca' huaad ni tüg ypajc yajtijy.”

³⁷ E jadüg'it anajty ycojaayity ma Dios ñecy, ma jadu'n ymíñañ: “Y'ixipy ajcxy je jäy huidibi ajcxy ycuum.”

Yajnaaxtigüy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpidzimy, mïid co anajty chigüy mïid je judíojäy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jëbi nicxy yajtzooni Jesús ñaaxnicx ma anajty ti yajcruudzpedyii. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ mïid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidici Jesús ñaaxnicx, chi ajcxy mo'ñ mïid poob huit, chi tzooy ajcxy mïid mirra etz áloes tzooy, jadu'n nej je judíojäy ajcxy ycostumbre mïidity co o'cpi yajnaaxtigüygixy. ⁴¹ Huingon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigüy. ⁴² Jim ajcxy Jesús ñaaxnicx yajnaaxtigüyi, co anajty jim yjac-huingonity, e janch jottigooy ajcxy yajnaaxtigüy, mïid co anajty ti chu'üyñi, e je judíojäy ajcxy tzachni'ixiyñi tzach'a'ixiyñi co je amayxii anajty chondägaani com jabom.

20

Jesús jugypijc jadüg'oc co anajty ti y'oc'o'cni

¹ Tim seman ixtigi', moñyi anajty, ca' anajty oy ximüyñi. Huin'it María Magdalena ñicxy ma Jesús anajty ti ñaaxtigüy. E chi jim ijxy co je tzaa ti anajty jim yajjidiguecy ma je

jut aguu. ² Co ajcxy ijxy je jut ahuädz, chi jada' mic'amy poyïgyi ninicxy Simón Pedro, etz je jadügpï ydiscípulo huidibi anajty Jesús miid ooy naychogyii, chi nimay:

—Ti yajtzoongixy ñich ajt nHuindzin ñaaxnicx ma ajcxy yajnaaxtigiy, e ca' nejhuïyïm ma ajcxy ti pidaaccixy.

³ Huin'it ajcxy nimetz chooñ poyïgyi Pedro etz je jadügpï discípulo, ñicxy ajcxy ma je o'cpi anajty ñaaxtigïy. ⁴ Poyïgyi ajcxy ñicxy nimetz, per je jadügpï discípulo jayïjp ñajxy, e jayïjp jim oyja'ty ma je naaxtigïydac. ⁵ Chi yco'ixïy jutjoty, huin'it jim oy ixxy je mo'nhuit jiiby jutjoty y'ooxnäy, per ca' yi' jiiby ytigïy jutjoty. ⁶ Simón Pedro co ymiñ jac'axam, tim janitigïy jutjoty, chi ijxy je mo'nhuit y'ooxnäy jiiby jutjoty. ⁷ E chi ijxy je cöxotz, je huidibi anajty miid ycohuaic yxochity, abicy je' anajty, ca' anajty tú'ciy y'ooxnäy miid ymo'nhuit. Y'ijx ajcxy je cöxotz yajxon y'anëgyity abicy. ⁸ Huin'it ytigïy jutjoty je jadügpï discípulo huidibi jacjayïjp ja't. Chi ijxy, e huin'it mibijcy co Jesús ñaaxnicx ca' anajty jiiby. ⁹ Ca'ni anajty ajcxy yajxon huinjihuïy co anajty jadu'n ycojaayity ma Dios ñecy, co anajty je Cristo yjugypïga'ñ. ¹⁰ Chi je metzpi ajcxy ydiscípulos yhuimbijty ma ytijc.

Jesús nayguëxici ma María Magdalena

¹¹ E je María jim yhuï'mïy ma je o'cpi jut ayaaxip. Chi ayaaxip yco'ixïy ma je jut. ¹² E chi ijxy metz ángel, poob huit ajcxy ymiid, y'ïñaaygixy jiiby ma je Jesús ñaaxnicx anajty yhuïtznäy, y'ïñaaygixy tüg cöduy, jadüg tecz ñaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nnejhuïyich ma ajcxy ti pidägy.

¹⁴ Jadu'n anajty ymina'ñ, co ñayji'ijxi, chi ijxy Jesús ytinäy ma yjix, e ca' ijxcapty pen Jesús je' anajty. ¹⁵ Chi Jesús ymina'ñ:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n ymina'ñ:

—Huindzin, pen ti myajnicxy Jesús ñaaxnicx, nigapx ma ti mbidägy, e ñich nicxy nyajtzoonich.

¹⁶ Chi Jesús ymina'ñ:

—María.

Chi jada' María yhuäg-huimbijty, chi yajxon huindicxpejty, chi nimay:

—¡Raboni! —jada hebreo ayuc yhuimbidzimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni ñich nba'ttigïy ma Dios Teedy yajpaady. Nicx miich ixta' nmigügtijcïch, e nima' co nnicxaamich ma Dios Teedy, ñich nDeedy etz miich ajcxy mDeedy, ñich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co yajnimähuïbyich miich ajcxy.

Jesús nayguëxici ma ydiscípulos ajcxy

¹⁹ Co je huin'it ximbi chuu'ïy seman ixtigi', aducy anajty tijc'aguu y'ity ma anajty je discípulos ajcxy yajpatcixy, miid co anajty ajcxy tzigïy je judíojäy ajcxy huidibi anajty midzip'ajtp Jesús. Chi Jesús ytigïy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰ Yam jadu'n anajty ymina'ñ, chi ajcxy yaj'ijxy je' yci' ma je clavo ytigïy, etz ycaachyjïp ma anajty jäy ti ycumyï. Chi yjotcugïy ajcxy co ajcxy ijxy je yHuindzin.

²¹ Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej ñich nDeedy xyquejxyich ya naaxhuiñ, nañ jadu'n ñich miich ajcxy yam nguejxhuäcxy miid ñich n'ayuc.

²² Co Jesús jadu'n ymínañ, chi jada' ajcxy nībuxujy cōbuxujy nímay:

—Huen Dios yjihu'i'ñ ymic'ajt xy'adigíy xyjottigíy ajcxy. ²³ Huenpinjäyity huidibi miich ajcxy mbocyhuinmeecxyp, nañ ypocyhuinmeecxipy Dios Teedy. Huenpinjäyity huidibi miich ajcxy ca' ypocy mhuinmeecxaani, nañ jadu'n Dios Teedy ca' yí' ypocyhuinmeecxa'ñyii.

Tomás ymibijc co yHuindzin yjugypijcy

²⁴ Tomás je' huidibi anajty mīd majmetz yca'pxy Jesús ydiscípulos ajcxy, je huidibi anajty yajtijp Dídimó, ca' je' anajty jīm choonity co Jesús ymíñ oga'n. ²⁵ Chi je jacjadyii ajcxy ymīgūg ñimaayi:

—Tí ñich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yí' yci' je clavo'au, e pen ca' ngíhuāxich ngodijíyich ma clavo'au, e ngí' nbidāgyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xī ajcxy jadūg'oc anajty yajpaady tigoty nidūg'ócíy je discípulos ajcxy. Tzoon anajty Tomás nañ jadu'n. Chi Jesús ymíñ. Agíy anajty tijc co Jesús ytinay'ahuíy cujc'amy ma je' ajcxy. Huin'it ycapxpocxy, chi nímay:

—Jotcugi' miich ajcxy.

²⁷ Chi jada' nímay je Tomás:

—Pidāg ya mgíhuāx ma clavo'au ma ngíjich. Najtzxají' mgi' etz pidāg ma ñich ngaach ma jāy xycumyich, e mibic yajxon tiydudāgy.

²⁸ Chi Tomás y'adzooy:

—Ñich miich nHuindzin'ajtyp etz ñich miich nDios'ajtyp.

²⁹ Chi Jesús Tomás nímay:

—Mīd co miich tí xy'ixyich, paady miich tí mmibicy. Jotcuyc yí' ajcxy huidibi ca' xy'ixyich, e tí ymibicy co tí njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je'yí' je Cristo, je Dios y'ung

³⁰ Tí anajty Jesús ooy tuñ mījhuinma'ñ ma ydiscípulos ajcxy yhuinduu huidibi ca' ycojaayity ma jadayaabi necy. ³¹ Paady ycix jada ngojaayich jigix ajcxy mmibigipy co Jesús je' yí' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tüccí'yí' ycixipy ytigoyipy mīd Jesucristo yxī ycixpi.

21

Jesús ñayguēxígyii ma ydiscípulos ajcxy nihiixtujcpi

¹ Co jadu'n jayijp ytuní yjajti, huin'it jadūg'oc Jesús ñayguēxíci ma je' ydiscípulos ajcxy jīm ma mejypa', je huidibi anajty xījip Tiberias mejy. E jadu'n ñayguēxíci: ² Jīm anajty ajcxy Simón Pedro mīd Tomás huidibi jāy ytijyp Dídimó. Nañ jīm Natanael huidibi anajty cogajp jīm Caná Galilea naaxjot. E nañ jīm anajty je Zebedeo ymang ajcxy etz jametz discípulos ajcxy. ³ Chi Simón Pedro ymínañ:

—Níxcy n'oc'acxmachich.

Chi ymīgūtijc ajcxy ymínañ:

—Tzoc ajt jāmim.

Chi ajcxy ytigíy ma tūg barco. E je huin'it tzuu ca' ní ti ajcxy majch. ⁴ Co yjobíy jīm Jesús anajty ytināy ma mejypa'. Je' ydiscípulos ajcxy ca' anajty ajcxy nejhuíy co Jesús je' anajty.

⁵ Chi Jesús ymínañ:

—Mīgūtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ní tí.

⁶ Chi Jesús yminañ:

—Pidaaccix ajcxy je huidibi m̃id m'acxmajtcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytig̃y. ⁷ Je ymig̃ug huidibi m̃id Jesús ooy anajty ñaychogyi, chi ñimay Pedro:

—Je' yi', ñch ajt nHuindzin.

Co jadu'n midooy Simón Pedro co anajty yj̃ity je Huindzin Jesús, huin'it yhuit yajtig̃y. Com ti anajty yhuit jeñ, com jadu'n anajty jac'oy ytuñ. Chi ytig̃y meyyoty huitm̃id.

⁸ Jacjadyi ajcxy ymig̃ugt̃ijc yj̃ady ma mejypa' m̃id je barco, pahuich pajugucy ajcxy je y'acxmadzi'ñ janch ujtz m̃id acx. Hue' anajty ca' ooy yj̃iguemyity ma mejypa', j̃eyi anajty migo'px metro yj̃iguemyity. ⁹ E co ajcxy ymejch ma mejypa', chi ajcxy ijxy co j̃im anajty j̃imbajc y'ity ni'ixi', e j̃im anajty acx j̃imbajc ñigix huidibi yajtzaayb, e nañ j̃im anajty tzajcaagy. ¹⁰ Chi Jesús ñimay je' ydiscípulos ajcxy:

—Yajmiingix yi acx tiibi ajcxy mmajtcixy.

¹¹ Chi Simón Pedro ypejty barcojoty, chi yajpidzimy huind̃itztuum y'acxmadzi'ñ ujtz m̃id may'acx. Chi ajcxy michoy migo'px jahuixchigi'px majctug̃ig acx mijatypi, e jadu'n ca' je acxmadzi'ñ ycih m̃id tzachmay'acx. ¹² Chi Jesús ñimay ajcxy:

—Min ajop'ajtcix.

E ni t̃ug ydiscípulos ajcxy ca' y'amidoohui:

—¿Pin miich?

Com ñejhũyib anajty ajcxy co je' anajty Huindzin Jesús. ¹³ Chi Jesús ym̃ijhuägy ma je acx ci' etz tzajcaagy anajty y'ity, e chi yajhuäcxy, chi moyday ymig̃ugt̃ijc ajcxy.

¹⁴ E je' je' anajty je midug̃ig'ocpi co Jesús ñayguëxi ma je' ydiscípulos ajcxy, huin'it co yjugyp̃jcy co y'o'cy.

Jesús yajni'ix̃y Simón Pedro ti ytunipy

¹⁵ Co ajcxy y'ajop'ajttay, chi Jesús ñimay je Simón Pedro:

—Simón, Jonás y'ung, ¿nej xyjactzojcpich miich, ca'yd̃i jada jacjadyi ndiscípulo'ichi?

Chi y'adzooy Pedro:

—Huindzin mnejhũyib miich co ndzojcpich nj̃ihũyibich miich.

Chi Jesús ñimay:

—Cuend'at ñch njäy, jadu'n nej j̃ihũy borregi cuend'ajtpi yaj'ocy yi' yborregi.

¹⁶ Chi Jesús m̃imejtz'oc yminañ:

—Simón, Jonás y'ung, ¿nej xychojcpich xyj̃ihũyibich miich?

Chi Simón y'adzooy:

—Huindzin, mnejhũyib miich co ndzojcpich nj̃ihũyibich miich.

Chi Jesús ñimay:

—Cuend'ajtig̃ich njäy, jadu'n nej yi borregi cuend'ajtpi cuend'aty yborregi.

¹⁷ Co midug̃ig'ocpi oy y'amidooy:

—Simón, Jonás y'ung, ¿nej xychojcpich xyj̃ihũyibich?

Chi Pedro yjotmaybijcni co midug̃ig'ocpi y'amidoohui: “¿Nej xychojcpich xyj̃ihũyibich?”

Chi Simón yjac'adzooy:

—Huindzin, miich mnejhũyidaayb t̃ug'óciy, e nañ mnejhũyib co ñch ndzojcpich nj̃ihũyibich miich.

Chi Jesús jacñimay:

—Cuend'ajtig̃ich njäy, jadu'n nej borregi cuend'ajtpi cuend'aty yborregi. ¹⁸ Janch janch ñch miich yam jadu'n ñimäy: “Co anajty miich m̃jac'anägñity, ci'm anajty mhuit

nayyajñijēñii, e mñicxp anajty ma mñimdzocy. E co mñacmijjāyñihuipy, huin'it mñi' mñajtzxajñihuipy, e huingbñi mhuit xyajñijēñihuipy, e xyajñicxyipy ma anajty ca' mdzocy.”

¹⁹ Co Jesús jadu'n ymñañ, chi Pedro yajhuinñihuñy jadu'n nej anajty jāy ajcxy yaj'ōga'ñy mñid Jesús y'ayuc ytiy'ajt ycixpi, e nañ ma yñ y'o'cñ tñy'ajt yegipy co ymñid Dios ytiy'ajt.

Je discípulo huñdibi anajty Jesús ooy tzocy jñhuñy

²⁰ Chi Pedro ñayjñ'ijxi, chi ijxy co anajty tú'ciy anajty ymñingixy je' ydiscípulo huñdibi anajty Jesús ooy tzocy jñhuñy je huñdibi anajty ññayb huingon ma Jesús ma je mesa co anajty y'adzuu'ajtcixy. Je huñdibi ñimay je' yHuñdzin:

—Huñdzin, ¿pñ miich yñ xycñyegam ma yñ mñidzip? ²¹ Co Pedro ijxy je jadügpñ discípulo axam Jesús ypanicxyii, chi ymñañ:

—Huñdzin, e jadayaabi mñüg, ¿ti yñ jadaanip?

²² Chi Jesús y'adzooy:

—Co ixipy ndzocyich co yñ huen jugy'aty ixtñ mabaad nhuimbityich, ca' miich xypaady mnejhuñihuipy ti yñ jadam. Panicxcich miich.

²³ Paady ycixp huñjñhuñy je ymñügñijc ajcxy co je ymñüg huñdibi Jesús ooy tzocy jñhuñy ca' anajty y'ōga'ñ. Per Jesús canan je' anajty jadu'n ytiyyp co ca' y'ōga'ñ. Hue' anajty ti ymñañ janchtiy:

—Pen ndzojcypñich ixipy co jada mñüg yhuñ'mñy ixtñ mabaad nhuimbityich, ca' miich xypaady mnejhuñihuipy ti yñ ytunamy.

²⁴ Je' je' je Jesús ydiscípulo huñdibi tñy'ajt yejcp jadu'n nej Jesús ytuñ y'ayoy etz yjajty y'ayoy, e nañ yñ je' huñdibi cojay nej Jesús ytuñ y'ayoy, yjajty y'ayoy. E ñich ajt nejhuñyñ co janch yñ je tñy'ajt huñdibi ti yecy.

²⁵ May ooy tijaty mñ huñmañ Jesús jactuñ. Co ixipy yajcojaydäy tñg'óciy, ca' yñ naaxhuñyñbi ixipy yhuaadñy mñid maylibro tzachpidägipy. Jadu'n n'aa'ixñyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuuñ etz jadu'n nej yaj'ixpijctzondacy oga'n'aty, ixti cooni ypättigiy tzajpjoty. Ca'ni Jesús anajty ypättigiy tzajpjoty co huin'ixy je' yjáy huidibi yi' y'ayuc ytiy'ajt capxhuäcxib, e chi miid je Espíritu Santo najztuníy najtz'ane'míy nej huaad ajcxy ytuníy. ³ Co anajty Jesús y'ögy, chi ñayguëxíci canaag'oc ma je' ydiscípulos ajcxy, e huixchiguipx xii ñayquëxígo'ci ma je' ajcxy, yajniquëxígy huädz co anajty yjuugyity, etz nañ yajmiidmiydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy miid Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuaníy ma miich ajcxy, je huidibi miich ajcxy nyajmiidmiydägy. ⁵ Janch Juan je Bautista jäy yajniibejt miid nii, tzojc miich ajcxy xy'adigihuipy xyjottigihuipy yi Espíritu Santo.

Jesús ypättigiyñi tzajpjoty

⁶ Ni'amugí anajty ajcxy jim miid Jesús, chi ajcxy yajtiy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuíygyixy je xii je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc miid cötújcín tijaty ytunamy. ⁸ Co anajty je Espíritu Santo chinaydacpicy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi miid ich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindicxcixy, chi Jesús chajppejtni. Chi miñ joc yeeg huidi Jesús yajniidigoyday, chi ajcxy ca' ocjac'ixni. ¹⁰ Jadu'n anajty ajcxy chachpät'íjxcixy tzajpcíxy, co Jesús ypättigíy. Huin'it mejtz yëydíjc ñayguëxíci ma je' ajcxy ymíjc, poob huit miid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'íjxcixy tzajpcíxy? Yi Jesús huidibi ti chajppety, ti choon ma miich ajcxy, minaamb jadüg'oc jadu'n nej ti m'ijxcixy co ti ypättigíy.

Matías yajhuin'ixy co Judas ytung jijptuníyipy

¹² Huin'it Jesús ydiscípulos ajcxy chooni ma je cögop huidi xiijp Olivos, yhuimbíjtcixni jim Jerusalén, ca' ooy yjiguëgyity, jëbi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz ñihuijtzpetypí ma ajcxy anajty miidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymíguëx. ¹⁴ Tüg'óciy anajty ajcxy y'ijtcixy tügmucy Dios mibijctzoogixy chajpcapxy-capxcixy. Ymiid ajcxy anajty Jesús y'uch etz María Jesús ytaj, etz jacjadyi töxyjäydiy.

¹⁵ Huin'it xii Pedro ytinayígy agujc'amy ma je ymigügtíjc ajcxy huidibi yajmíj'ajtp Jesús, huidi anajty ajcxy naybaatip migo'px ja'iipxti jäy, chi nimay ajcxy:

¹⁶ —Migügtíjc, copicy co jada yajcuydúnipy nej Dios yminañ ma ñecy huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judíojäy ajcxy majch Jesús. ¹⁷ Je Judas yaj'amichomujcp je' anajty miid ich ajt, paatip anajty Dios ytung tú'ciy miid ich ajt. ¹⁸ Chi Judas ñicxy juy tüg naax miid je muju'ñ huidibi anajty ti paady miid yjibic-huinma'ñ. Chi jim mic'amy ycäy tzuxcödeëñ, chi ytopxy ymooxac, e chi ytiinch ypidzimday. ¹⁹ Je jäy ajcxy huidibi anajty tzinaayb jim Jerusalén, co nejhuíy, chi

ajcxy yxii moy je naax Acéldama, hue' je' yhuimbídzimý ma je' ajcxy ayuc, ni'py ñaaxjot.

²⁰ Jada je' je ayuc huidibi David yjaay ma je Salmo necy:

Hui'mip najtz'ixiy yí chinaaydac. E ca' pin yajtunipy.

Nañ jadu'n ymina'ñ:

Huingbi huen yajnicxyii je' ytung.

²¹⁻²² Copicy co tüg yëydijc huidibi miid ti yhuidity nHuindzin Jesús quipxyi miid ich ajt, huen tunipy je tung huidibi Judas anajty ytumyb, maab Juan yajniibety ixti taabi xypuyöduutim co pättigiy tzejpjot, tüg jëbi testig'aty miid ich ajt co Jesús yjugypijcy.

²³ Chi Jesús ydiscípulos ajcxy huin'ijxy mejtz jäy: tüg jäy huidi anajty yxii José, huidi yxii anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵ Chi Jesús ydiscípulos ajcxy Dios mibijctzoy, yminañ ajcxy:

—Huindzin Dios, m'ijxyp mnejhuibiyb tüg'óciy jäy yjot yhuinma'ñ, yajni'ixiygich jada metzpi jäy huidibi miich nidügti ti nhuin'ixy, je huidibi jëbi jijptigiyiy miich mdung tú'ciy miid ich ajcxy, etz huidibi apóstol'adip. Huen jada jäy jijptigiyiy je tung huidibi Judas ti yajtigooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibidzimni je Matías. E huin'ítty je Matías oy ymicho'ndigiy ma je nimajtügpi ajcxy huidi ycapxhuäcxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijtcixy.

² Huin'it janch timitiini yajmidoy tüg ne'min, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. ³ Chi nigidaaci nidüg nidügti toodz jadu'n nej jinye'n. ⁴ Chi je Espíritu Santo nidüg nidügti ajcxy y'adigiyi yjottigiyi. Chi ytigiygixni capxy miydaacp nije' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xii may judíojäy ajcxy huidibi tzomb canaag agajp. Hue' ajcxy chachcuydumb judíojäy ycostumbre. ⁶ Co je cajpjäy ajcxy midooy je ne'min, chi ajcxy ooy yöymujcy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjäy ajcxy ooy chigiy jihuüy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huidibi jadu'n tzachcapxcixy tzachmiydaaccixy ich ajt ngi'm'ayuc? ⁸ ¿Nej ich ajt co nmido'mbícim co tzachmiydaaccixy ich ajt n'ayuc huidibi ti nmibi'c'ájtím? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huidi tzinaayb ajcxy jim Asia ñaaxjot, ¹⁰ etz huidibi ajcxy tzomb jim Frigia, etz Panfilia, huidibi tzomb jim Egipto, etz huidibi tzomb jim ma yí Africa ñaaxjot Cirene nínaxy. Nañ jadu'n jim romanojäy huidibi ya adzinaayb. May ajcxy jim huidibi judíojäy etz nijëjity huidibi ca' yjudíojäyity huidibi judíojäy ycostumbre ajcxy ti yjijptigiyiyi. ¹¹ Ya nañ jadu'n Creta jäy etz Arabia jäy; e ich ajt tüg'óciy nmidoohuim jada jäy ajcxy nigapxcixy nimiydaaccixy huidi Dios ti tuñ mijcajee ma ich ajt ngi'm'ayuc.

¹² Nidüg'óciy ajcxy ooy jihuüy, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbídzima'ñ?

¹³ E nijëjity jäy jëyi nixgy yajxgy, yminaangixy:

—Muucip jada yí ajcxy.

Pedro yaj'ixpijcy je mayjäy

¹⁴ Huin'it Pedro ytinaygy miid je nimajctügpi apóstoles, e ytigiy capxpi mic yminañ:

—Yëydijctijc ajcxy huidibi tzinaayb Judea etz tüg'óciy huidibi tzinaayb ya Jerusalén, nejhuihuipy miich ajcxy jada e midou ajcxy yajxon huidibi ajcxy nyajnimähuamyb.

¹⁵ Jada jäy ajcxy ca' ajcxy ymügyi jadu'n nej miich ajcxy mīnaangixy. Tīm petyxiñi jada cham. ¹⁶ Jada je' huiḁibi ñigapxy je Joel, Dios y'ayuc najtzcapxiybi, co jadu'n mīnañ:

¹⁷ Je huin'it xii mīna anajty je naaxhuiñybi cixa'ñ, jadu'n Dios mīnañ, nyajhuäcxtähuibich je nEspíritu ma tüg'óciy naaxhuiñyäj. Miich mnix etz mmang ajcxy capxhuäcxip iich n'ayuc ndiy'ajt, e je yujcyecpidijc ajcxy yhuin'ixipy ooy mījhuinma'ñ, e je mījjäydijc cumähuipy ajcxy.

¹⁸ Nyajhuäcxtähuip iich je nEspíritu huin'it xii ma iich ndumbi yēydijcpi töxyjäybi, e yi' ajcxy capxhuäcxip iich n'ayuc ndiy'ajt.

¹⁹ Nyajquëxigibich tzejpcixy huiḁijaty oy chigiyñi, e ya naaxhuiñ nyegipyich tiy'ajt: ni'py, jīn etz jīnjoc.

²⁰ Yi xii ahuimbidiḁy coodz, etz je po' ahuimbidiḁy nej ni'py, ma anajty ca' mīñ je xii je tiempo mīna anajty mīnañ je Huindzin Dios. Mij ayo'n ji tunaanip jadaanip iixna' quëxna'.

²¹ E tüg'óciy jäy huiḁi mīyaaxp ojadaḁtp je Huindzin Dios, Dios ajcxy yajñidzögib y'alma.

²² Chi Pedro yjacmīnañ:

—Amido'ijtcix, miich judíojäy ajcxy, jadu'n nej cham nmīna'na'ñich. Je Jesús huiḁibi tzoön jim Nazaret ti xyaj'ijxcixy Dios ymic'ajt, mījhuinma'ñ, etz iixpejt, jadu'n nej miich ajcxy ti m'ijxcixy ti mnejhuüygyxy. ²³ Jada yajciyejc ma miich ajcxy, jadu'n nej anajty Dios ti yajñigödugy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty mīd jibic jäydijc y'ané'min. ²⁴ Chi Dios yajjugypijcy yajñihuädzictuty ma yi ó'cin, ca' huaad yhui'my ögy huinixii. ²⁵ Je David ñimiydac Jesús chi ymīnañ: Nejhuüybiḁ co je nHuindzin Dios y'ity ma iich nhuinduu. Yi' ijt ma iich n'a'oy, jigix ca'ydi pin xy'adzigiych xyajhuinma'ñyidigooyich.

²⁶ Paady ti njotcugiyich, e ti ngapxypidzimyich co ooy njotcujcich. Paady co oy n'ögibich etz ninicx ñaaxtigihuipy, ca' ndajy mayich.

²⁷ Co miich Dios ca' myajhui'ma'ñ iich n'alma ma ñaaxtigiydac. Ni mga'aa'ixihuipy, co miich mdumbi huiḁibi ooy mdzocy, co nicxy ñinicx ñaaxhuindigoydäy.

²⁸ Miich Dios, ti xyajni'ixiyich yi tzinaayin huiḁibi ymīd jugy'ajt in huinixibi. Xya-jjotcugihuibich mīd co xymīd'idipyich.

²⁹ Chi Pedro yjacmīnañ:

—Migügtijc ajcxy, huädz miich mnejhuüygyxy co iich ajt nmij'ap David y'o'cy etz yajnaaxtigiyi. E ma ñaaxtigiy nmīdni jē'ajt chambaad. ³⁰ Je David hue' je' anajty Dios y'ayuc ñajtzcapxiybi, e ñejhuüyb anajty co ti Dios yajñimäyii huiḁibi ca' y'anijity. David ñejhuüyb anajty co ma y'ap y'oc ma'xung'adiḁy Cristo, jaydēbi ané'mipy ma David y'ane'mdac. ³¹ Jadu'n co David jecy'ajty huinjihuüy e nejhuüy etz nigapxy jadu'n nej yjugypiga'ñ je Cristo co anajty ti y'ögy. E ymīnañ co ca' yi' y'alma yhuí'mipy jutjoty etz ñinicx ca' ypüdzipy. ³² Dios yajjugypijcy je Jesús co y'o'cy. Jada tiy'ajt iich ajcxy nidüg'óciy nidiy'ajt'ajtpy. ³³ Jadu'n Dios Jesús mooy mij'ajt jiiby tzejpjoty, chi yajcidigiyi je Espíritu Santo huiḁibi Dios Teedy y'ahuanüy e tüg'óciy huiḁibi miich ajcxy ti m'ijxcixy ti mmidoogixy jiiby yi' choon ma yi'. ³⁴ Com David ca' je' chajppejty, je David ci'm ymīnañ: Je Huindzin Dios nimay iich nHuindzin: “ñña' ma iich a'oy'amy,

³⁵ ixti cooni nmimadactähuibich yi mmidzip, jadu'n anajty nipaady nej jihuiy mdecypocxpejt'adyii.”

³⁶ Chi Pedro yjacmīnañ:

—Ñejhuihuipy nidüg'óciy yi Israel jäy ajcxy co janch janch co je Jesús huiḁibi miich ajcxy myajcruudzpejt, Dios yajñibijc co yhuindzin'adiḁy ma miich ajcxy, etz Cristo huiḁibi xyñihua'nipy xyajtzögipy ajcxy.

³⁷ Co je mayjäy ajcxy jadu'n midoy, chi ajcxy yjotyungiy, e amidoy ajcxy je Pedro etz jacjadyii jäy huiḁi Jesús y'ayuc capxhuäcxī anajty, chi ajcxy ymīnañ:

—Migügtijc, ¿ti ñich ajcxy jëbi huaad nduñ?

³⁸ Huin'it Pedro y'adzooy:

—Jothuimbijtcix e ñiibejtcix nidüg nidüg miid Jesucristo yxi, jigix Dios miich ajcxy mbocy xyhuinmeecxipy. E jadu'n Dios xymöhuipy je Espíritu Santo. ³⁹ Huidibi Dios y'ahuanñy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jigüémip, etz jacjadyii jäy ajcxy huidi Dios huin'ixamy.

⁴⁰ Miid jadayaab ayuc etz jacjadyii ayuc Pedro yajnimay capxhuijy je mayjäy yminañ:

—Ca' mmijpidaaccix je jäy ajcxy y'ayuc huidibi ca' capxymidoy Dios.

⁴¹ Jadu'n yjajti, je jäy ajcxy huidijaty mibijc Pedro y'ayuc, chi ajcxy ñiibejtay huin'it xii. Ñimayñy ajcxy huidibi mijpidac Jesús y'ayuc oy nidugüig mildi jäy. ⁴² Tüg'óciy ajcxy anajty panixcixy yi' xpíjcin jadu'n nej yi' Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymújcigixy co anajty ajcxy chajcaagy tujc-huäcxaangixy.

Jadu'n nej je mibijpidijc chinaaygixy jugy'ajtcixy

⁴³ Nidüg'óciy ajcxy anajty ooy mijcajee jihuñy. E Jesús y'apóstoles ajcxy iixpejt etz mijhuinma'ñ ooy anajty tungixy. ⁴⁴ Nidüg'óciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxcixy tijaty ajcxy anajty ymiid, mooygixy ymigügtijc.

⁴⁵ Ytoocpy anajty ajcxy yi' ypidägy huidibi anajty ymiid, e chi anajty yajhuäcxcixy yi' meen nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxcixy etz ycaaygixy y'uuccixy ni'amugi' jotcuyc miid ajcxy y'oyjot y'oyhuinma'ñ. ⁴⁷ Ñi'igixy niyaaxcixy yi' Dios, e tüg'óciy jäy nayyajmij'ájtíp anajty ajcxy. Chi je Huindzin Dios yajmayñy jabom jabom yi' mibijcpidijc, yi' huidibi anajty patp nidoocin.

3

Tüg tecyma'tpi chögy

¹ Tüg xii Pedro etz Juan ypättigñy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxi la Hermosa, jigix jim pijctzohuipy meen ma je jäy ajcxy huidibi tigüyb ma Dios ytijc. ³ Co je jäy tecyma'tpi iixy Pedro etz Juan ytigihuaangixy anajty ma Dios ytijc, chi pijctzoy meen. ⁴ Co Pedro etz Juan iixy je tecyma'tpi, chi Pedro yminañ:

—Huindicxpejtcich.

⁵ Chi je jäy huindicxpejty, yjijp'ixpy anajty ti möhuanip. ⁶ Chi Pedro je tecyma'tpi nimay:

—Ca' nmüdidyich plata, oori, huidibi janchtiy nmüdich je' nmöhuip. Miid Jesucristo je Nazaretpi ymic'ajt ñich miich nimaayb: Tinaayg etz yöy.

⁷ Huin'it Pedro majch je tecyma'tpi ma a'oygi', e yajtinaygugñy. Huin'itiy y'oyñy ymicpijcy je ytecy etz ytecyöy. ⁸ Chi je tecyma'tpi ytinaygugñy etz chi ñajztibñy. Chi jada' yöychoñ e ytigñy ma Dios ytijc miid Pedro etz Juan yöyñip ñidijcni yujctijcni, yam Dios ooy jäymeç. ⁹ Tüg'óciy je mayjäy iixy co anajty yöyñip etz jäymeç yi' Dios. ¹⁰ Je jäy ajcxy y'ixy'ajtpy anajty ajcxy je tecyma'tpi e ñejhuiygixyp co je' anajty je' huidibi pijctzohuo'cp pi'c meen ma Dios ytijc'aguu huidi anajty yxi la Hermosa. Paady je jäy ajcxy ooy chigñy jihuñy, co ajcxy iixy nej anajty yam ti ytunyii ti yjadyii.

Pedro nimydyacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi' jäy anajty ooy jihuñygixy huinmaaygixy. Chi mic'amy mayjäy nimujcy Pedro etz Juan

jim ma yi Dios ytijc huinduu huidibi jäy ytiipy Salomón. ¹² Pedro co jadu'n ijxy je mayjay, chi ymínañ:

—Judío yëydijctijc, ¿nej co mdzachhuinmaaygixy mijcajee? ¿Nej co ich miich ajcxy xy-chachhuindicxcixy jadu'n nej jihuïy ich ajcxy jada jäy ti nyajtzögyich ti nyajyöchooñich mïid ngimmic'ajtich, o mïid co ich ajcxy ooy nDios'ojadaty? ¹³ Ich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzögy jada tecyma'tpi, jigix yajcömayipy yi' y'ung Jesús huidibi miich ajcxy mgïyejc ma je tungmïdpi. E co je gobernador Pilato je' najtzmazdihua'ñ, miich ajcxy ca' m'aa'axiy. ¹⁴ Ma yjapadyii ajcxy mgapijctzoy co huen yajnajtzmazdïy, je huidi anajty yajpaatp huädz etz tudägy, chi miich ajcxy mbijctzoy co huen yajnajtzmazdïy tüg jäy huidibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt ich ajcxy nidiy'ajt'ajtpyich. ¹⁶ Mïid co ti mibicy Jesús yxii, je mijhuinma'ñ huidibi Jesús ymic'ajt ti tuñ mïid jada pa'mjäy huidibi miich ajcxy m'ijxyp mnejhuïyb. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷ Chi Pedro yjacmínañ:

—Nmigügtijcich, nejhuïybich co miich ajcxy etz mhuindzindijc yaj'o'cy Jesús, mïid co anajty mganejhuïygixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxiybi ymínañ co copicy co yi Cristo yajnaxipy ayo'n. ¹⁹ Paady játyim jothuimbijtcix miich ajcxy ma Dios, jigix ajcxy mbocy yajjötztähuipy. Huin'it je Huindzin Dios xyajniguexipy ajcxy jotcujc'ájin huinixii, ²⁰ e yi' quexamb je Jesús, je Cristo, je huidibi Dios jayijp'aty yhuin'ijx co quexa'ñ ma miich ajcxy. ²¹ Oy jadachambi Jesucristo y'oc-huí'mipy jibby tzajpjoty ixti cooni Dios anajty yaj'oyidyäy tijaty, co jadu'n yjaay yi' y'ayucnajtzcaxiybi huidibi mïid huädz yjot yhuinma'ñ huidibi ajcxy jecy'ajty tzinay. ²² Jadu'n Moisés nimay ich ajt nmij'ap nmijteedy jecy'ajty: “Je Huindzin Dios xyajniguxaan miich ajcxy tüg yi' y'ayucnajtzcaxiybi, huidibi pidzimamyb ma miich ajcxy mjuugy mmigüg jadu'n nej ich yi' xyguejxy. M'amido'idipy miich ajcxy yi' y'ayuc. ²³ Jadu'n yjadipy co tüg'óciy jäy huidibi anajty ca' capxymidooy je Dios y'ayucnajtzcaxiybi, huädz ajcxy ytigoydähuipy, e tüg jibicy ajcxy idipy ma judíojäy ajcxy yajpaady.”

²⁴ Chi Pedro yjacmínañ:

—Jadu'n jada tüg'óciy Dios y'ayucnajtzcaxiybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi Dios y'ayucnajtzcaxiybi ajcxy, miich je' anajty ajcxy mmij'ap mmijteedy. E je ayuc huidibi Dios yajnimay Abraham ycuydunaamyb mïid miich ajcxy co jadu'n ymínañ: “Ngonúucxibich tüg'óciy naaxhuiñjäy mïid tüg miich m'ap m'oc.” ²⁶ Co Dios y'ung y'o'cy, chi Dios yajjugypijcy jadüg'oc, e quejxy jayijp ma miich ajcxy, jigix xyconúucxcixipy, etz jigix nidüg'óciy miich ajcxy m'ixmazdipy yi' mjbichuinma'ñ.

4

Pedro etz Juan ma tungmïdpi yhuinduu

¹ Pedro etz Juan jimni anajty tzachmïdmïydaaccixy je mayjäy ajcxy, co oy miingixy je judío teedy ajcxy, mïid je soldado huindzin, je tzajptijc cuend'ajtpi etz mïid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi öcpi jugypigipy yi' ajcxy, com co Jesús yjugypicy co y'o'cy. ³ Chi je tungmïdpi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'ñ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yëydijctijcpi, yajmichomujcy jahueen ycamigoox mility.

⁵ Je com jabom ajcxy ñaymújcci jim Jerusalén judíoáy tungmüdpí, je mijjáydiç etz yí escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mijtungmüdpí yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pin miich ajcxy ti xymöy cötujcin co jada jadu'n ti mdungixy?

⁸ Huin'it Pedro ymüid anajty Espíritu Santo ma yjot yhuinma'ñ, chi yminañ:

—Miich ajcxy tungmüdpí etz judíoáy mijjáydiç, ⁹ yí' ñich miich ajcxy cham xyaj'amidoob yí oybi tiibi yajtuñ ma tüg pa'mjäy e nejhuñhuaangixy nej ti chögy. ¹⁰ Cham nimiydactäyich ma miich ajcxy mhuinduu, jaydëbi ajcxy nejhuñdähuipy tüg'óciy judíoáy, co jadayaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, müid je mic'ajt huidibi Jesucristo je Nazaretpí yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yí Jesús jadu'n nipaady nej tüg tzaa oybi, huidibi ajcxy potzpidijc, ca' yajtúngixy co ytijccojcixy. Jesús cham ti paady mijtung ma Dios, jadu'n yí' ni paady nej tüg mij tzaa huidibi ytungbaatp ma poch ytaatz. ¹² Ca' jac ni pin huidibi jëbi xyajñidzoocim ajt n'alma. Jesucristo yí' je' tügpajc huidibi Dios yejc ma jäy ya naaxhuiñ huidibi jëbi xyajñidzoocim ajt n'alma.

¹³ Co je mijtungmüdpí ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuñy co ca' ajcxy y'ixpicjyáity, chi ajcxy ooy jihuiy huinmay. Nañ yí' ixcapj ajcxy co je' anajty huidibi ajcxy ti müid huidity Jesús. ¹⁴ Cha co yjactimjimity anajty je jäy huidibi anajty ti chögy ytinäy müid Pedro etz Juan, paady ajcxy ca'jajty nej midziptzoonipy. ¹⁵ Chi je tungmüdpí ni'ane'mdiy huen yajpidzimyii Pedro etz Juan ma je mayjäy anajty ñaymugyii, jigix ac jëyi tungmüdpídiç ñyöyaangixy capxyöyaangixy Pedro etz Juan ypocy. ¹⁶ Chi ajcxy yminañ:

—¿Ti cham nduunim müid yijiibi jäy ajcxy? Com tüg'óciy jäy huidibi tzinaayb ya Jerusalén ñejhuñyb ajcxy co ti túngixy mijhuinma'ñ, e ca' huaad ñich ajt nmínaaním co ca' yjanchity. ¹⁷ Tzoc capx'adujcim co ca' huaad ajcxy jacnimíydägipy Jesús jadachambi etz jacnixpi xi tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej ocnimíydaacñp, ni ca' jacyaj'ixpigipy müid Jesús yxi. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen tiy'ajt jada ma Dios co ñich miich ajcxy ngapxycöbigipy jayijp, ca'ydi yí Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmidoy.

²¹ Huin'it je tungmüdpí ajcxy adzigi'ñ migapxy Pedro etz Juan, e najtzmazdiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yí Dios jadu'n nej anajty ti ytuñyii ti yjadyii. ²² Je jäy tecyma'tpi huidibi tzooc co Dios mijhuinma'ñ ytuñ, ymüid anajty yjimijt huixchiuipx naxy.

Je mibijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazdiy, chi ajcxy ñicxy ma ymigügtijc anajty, yajmüdmíydactay tüg'óciy jadu'n nej teedy huindzin etz mijjáydiç anajty ti ñimáayigixy.

²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je mejy etz tüg'óciy tijaty.

²⁵ Miich müid mEspíritu je David myajcapxy, e yí' jadu'n yminañ:

¿Nej co jada naaxhuiñybi jäy chachhuaangixy chachjihuiyigixy, e yí jäy ajcxy huinmaaygixy huidibi ca' ytimytiijity?

²⁶ Yí reydiç ya naaxhuiñybi midziptzooñ ajcxy yí Dios. Etz je tungmüdpí cajp cajp ñaymujci ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yí gobernador Poncio Pilato ñaymujci ya ma jada cajp müid huidibi ca' yjudíoáyity ajcxy etz müid judíoáy ajcxy, midziptzoñ ajcxy yí

m'ung Jesús huidi anajty ti mhuin'ixy. ²⁸ Yi' ajcxy ti cuydungixy tüg'óciy jadu'n nej miich, Huindzin Dios, ti myajnigödugiy jadu'n nej ytunüyb yjadiyb. ²⁹ Jadachambi Huindzin Dios, ix jadu'n nej yi tungmütpi xychachmijotmá'tcixyich. Mo' yi mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e müd miich mmic'ájtín chögipy pa'mjäydijc, tunipy ajcxy tijaty ixpejt etz mijhuinma'n müd yi m'ung Jesús yxi, huidibi müd huädz yjot yhuinma'n.

³¹ Co ajcxy mibijctzoday, chi je naax chuyuuy ma anajty ajcxy tügmucy yajpaatcixy, etz nidüg'óciy yi' ajcxy ymic'ajt mooyi je Espíritu Santo, e yi Dios y'ayuc capxhuäcxixy anajty amic jotmic.

Je mibijcpidijc tú'ciy anajty ajcxy yjot yhuinma'n

³² Je mayjäy huidibi anajty ti mibicy, tú'ciy ajcxy yjot yhuinma'n. Ni pin anajty ycamina'n co naydüg jè'adyii. Hue' anajty yminaangixy co tú'ciy jè'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxxy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayajtcixy, com tüg'óciy tijaty anajty ajcxy ymüd ñaax o ytiyc ytoocpy anajty ajcxy, e yejccixy anajty meen. ³⁵ Chi je meen yajcidiigiygixy je apóstoles ajcxy e yi' ajcxy moy nidüg nidüg pinjaty yajmayajtp. ³⁶ Jim anajty müd je' ajcxy tüg levita jäy huidi anajty yxi José, huidibi ma'xung'ajt ma yi ñaaxjot meyy agujc huidibi yxi Chipre, je huidibi je majmetzpi Jesús y'ayuccapxhuäcxpi, yxi moy Bernabé, huidibi huimbídzim je yajjotcuyc'ajtpi. ³⁷ Je Bernabé tocy ytundac huidibi anajty ymüd, e chi mimiiñ je meen, e yajcidiigy je apóstoles ajcxy.

5

Je Ananías etz Safira ajcxy Dios müdündigoy

¹ Chi jadüg yëydijc, huidi anajty yxi Ananías, müd ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meen, e yajninicxy Jesús y'apóstoles ajcxy je jac-hueenip, jadu'n nej jihuüy yejctay tüg'óciy, etz yi' ytöxyijc ñejhuiyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'n, e mhuin'ina'n je Espíritu Santo, e ti mbugoñ jac'anaxypi meen nej ti tzoo'adyii yi pidägy tübi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeeñ'adyii? ¿Nej co jadu'n ti mdundigooy? Dios ti mhuin'ina'n, canan jäy.

⁵ Co jadu'n midoy, jímíyi Ananías yciday, e chi y'o'cy. E tüg'óciy jäy ajcxy huidijaty nejhuiy, ooy ajcxy chigüy. ⁶ Huin'it ymiiñ jadyii yujcyecpidijc, chi ajcxy mo'ñ Ananías ñiniñc, e oy ajcxy yajnaaxtigiy.

⁷ Codugüg hori naxy, oy ytigüy je Ananías ytöxyijc, e ni ca' nejhuiy anajty ti ti ytuñyii ti yjadyii je ñäy. ⁸ Pedro y'amídoohui:

—Yajniimaaygich, ¿nej janch jadu'n ti mdooccixy yi mdundac jadu'n nej ti mgapxcixy?

Chi je töxyjäy y'adzooy:

—Janch jadu'n ti ndoogyich.

⁹ Chi Pedro yminañ:

—¿Nej co ti mnaygápzigixy mhuin'ina'n yi Espíritu Santo? Cha ma tijc'aguu je jäy ajcxy ytinäy huidi oy ti yajnaaxtigiy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itíy Ananías ytöxyijc yciday, e chi y'o'cy. E chi oy ycidägy ma Pedro ytecymijc. Co je yujcyecpidijc ytigüy, chi ajcxy je' paaty ögy. Chi ajcxy yajpidzimy etz oy yajnaaxtigiy ma ñäy ymijc. ¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyii ti ytunyii, chi ajcxy ooy chigüy.

Canaag mij'ijxpejt etz tiy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajniguëxici etz iixpejt yejccixy ma yi jäy ajcxy. E tüg'ócix jäy ajcxy huidibi Jesús mibijc jabom jabom anajty ñayyöymüjcigixy ma Dios ytjc huinduu huidibi yxi Salomón. ¹³ Ca' jac ni pin anajty mñnicxpeda'ñ mijyöypeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yëydijctijc etz töxyjäydijc. ¹⁵ Etz ixti pa'mjäydijc anajty ajcxy yajnicxy mñtügüjc cix'aam pidaaccixy, jigix co Pedro ñaxipy jim ycadimjegyity co nicxy y'aa'ap yjäty ma je pa'mjäy. ¹⁶ Nañ jadu'n mayjäy chooñ anajty huidijaty huingon ycajp, ymiingixy Jerusalén, mñdmiingixy pa'mjäy, etz huidibi ca'oybi mñd ma yjot yhuinma'ñ, e tüg'ócix yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy mñtungmñdipi etz huidibi saduceo iixpñjcin ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mñpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguü, yajpidzimy ajcxy, chi ajcxy nimay:

²⁰ —Níxcix, tinay'ahuiygix tzejtigoty, yajmñdmñydaaccix yi mayjäy ajcxy Jesucristo ytiy'ajt nej jëbi jäy ajcxy paadipy jugy'ájtñ jemybi.

²¹ Co jadu'n mñdoy, chi com jabom ytiñy ajcxy jopyñi tzejtigoty. Jiiby je' ajcxy anajty ñiyaj'ixpijcco'ni.

Chi je teedy mñtungmñdipi etz jacpinjaty mñd, chi ajcxy capxyñiguejxy yi judíojäy ymijjäydijc etz ixcicytijc co huen junta jadyi. Chi ajcxy capxyñiguejxy huen nicxy yajpidzimyji jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni mñd tiy'ajt, ²³ chi ajcxy nimay:

—Hue' ñich ajcxy ti nbaadcixy yi pujxtijc aducy, etz je soldadtijc jim tijc aguüy yjac-cuend'ajtcixy. Chi co ñich ajcxy nyaj'ahuäch je pujxtijc, ca' ñich ajcxy ni pin ti nbaatyich jiiby pujxtigoty.

²⁴ Co jadu'n ajcxy mñdoy, je teedy mñtungmñdipi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixñhuip. ²⁵ Huin'it tüg jäy mññ huidibi nimaayi ajcxy:

—Je jäy huidibi mñich ajcxy mbidac pujxtigoty, chim je' ajcxy tzejtigoty yaj'ixpijccixy yi mayjäy.

²⁶ Chi je soldado huindzin mñd soldadtijc ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tziñyib anajty ajcxy co je mayjäy chaagädzñyb.

²⁷ Co ajcxy yajmññ, chi ajcxy pidacy ma je maytungmñdipi yhuinduu. Chi je teedy mñtungmñdipi je apóstoles ajcxy nimay:

²⁸ —Ñich ajcxy ti ngapx'aducy co ca' huaad m'ocjacyaj'ixpijccixni ma Jesús yxi. E ¿ti ti mdungixy? Ti myajhuäcxtaaygixy yi m'ixpijcin ma Jerusaléngajp, e ñich ajcxy mñich pocy xyjatyim yajmñhuimam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy ñich ajcxy ngapxycöbigipyich yi Dios jayijp ca'ydi jäy. ³⁰ Je Dios huidibi ñich ajt nmij'ap nmijteedy y'ojadajt, yi' yajjugypijc je Jesús huidibi mñich ajcxy myaj'öc cruudzcixy. ³¹ Je Dios Teedy jadachambi hue' Jesús mñdity aa'oy'amy jiiby tzejpjoty, e ti pidägy ane'mbi etz yajnñdzoocpi jigix yi judío jäy ajcxy yjothuimbidipy e yajhuinmeecxipy ajcxy ypocy. ³² Ñich ajcxy tiy'ajt nyejcpy mñd jada ycixpi, etz nañ jadu'n je Espíritu Santo huidibi Dios ymooyb pinjaty capxymñdoohuip.

³³ Co je jäy ajcxy jadu'n mñdoy, chi ajcxy ooy yjotmätcoty, chi ajcxy jayaj'öga'ñ. ³⁴ Huin'it ytinaygy ma je naymujctac tüg fariseojäy, hue' anajty yxi Gamaliel, hue' je' anajty Moisés yley ñihuindzin'ájtñ. E jäy ajcxy ooy anajty yajmij'ajtcixy je Gamaliel. Chi je'

ni'ane'mdiy co huen yajpidzimyi tzojcyi jiiby tiba'y je apóstoles ajcxy. ³⁵ Chi Gamaliel nimay yi tungmüdpí ajcxy:

—Judío yëydijctijc ajcxy, íxcim ti mdungixy müd jada jäy ajcxy. ³⁶ Jäymetz müch ajcxy co jecy'ajty je Teudas ypidígy ymíñañ co je' ymijity yjanchity, e chi ypanicxi oy nimidaax migo'pxti yëydijc. Chi ajcxy yaj'o'ci, chi tüg'óciy huidibi anajty ti ypanicxyii yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mína cajpjäy anajty ñecypejtcixy, ypidígy Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tüg'óciy jäy huidibi panicxy jadu'ñyi ajcxy yöyhuäcxtay. ³⁸ Paady ñich müch ajcxy jadu'n nimaaygixy, ixmajtzcix yi apóstoles ajcxy, e ca' mmijyöybejtcixy. Peni jäy yi y'ayuc ytiy'ajt huidibi ajcxy ymüd, cixip tigoyip yi'. ³⁹ Pen Dios y'ayuc ytiy'ajt yi' ajcxy ymüd, ca' ajcxy mjadipy nej myajcödigóoygixyipy. Jaty nayguend'ajtigixy, ca' jecyity co Dios anajty müd mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjn. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmazhiy. ⁴¹ Je apóstoles ajcxy ypidzimy ajcxy ma tungmüdpí ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyi müd Jesús yxii ycixpi. ⁴² E ooy ajcxy yaj'ixpijccixy etz nimiyaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajniñbejty huixtujc mutztungmüdpí

¹ Je huin'it xii ajcxy huidibi ixpijcp Jesús y'ayuc ñigi anajty ñimayiy'adütcixy. E huidibi anajty capxp griego ayuc ytiyiy nayñigápxip müd huidibi judío y'ayuc capxp. Ymínaangixy co yi griegojäy co'ögy töxyjädiyc, ca' anajty ajcxy paady quipxyjaty müd je judíojäy co'ögy töxyjädiyc caayin uucin jabom jabom. ² Huin'it yi majmetzpi apóstoles ajcxy yajnaymujctayyi je jäy huidibi Jesús mibijcp, chi ajcxy ymíñañ:

—Ca' huaad ñich ajcxy Dios y'ayuccapxhuäcxin n'ixmajch, e ñicxyich caayin uucin yajhuäcxixy. ³ Paady müch ajcxy migügtijc nayhuin'íxigix huixtujc yëydijctijc huidibi oy yajmij'ajtni Dios, huidibi huädz oy yhuinma'ñ ymüd, huidibi je Dios yjihui'ñ ymic'ajt müd, e huen ajcxy tung'adüb jada tung. ⁴ ñich ajcxy njacmibijctzohuamy Dios, etz ñich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ixy Esteban huidibi ymüd ooy ymibijcin, etz ymüd Espíritu Santo. Nañ huin'ixy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty choon jim Antioquía, jécyip anajty jiptigiyiñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc ñigi anajty jäy tzachnejhuñi. E je mibijcpidijc ñigi anajty ajcxy chachnimayñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymüd anajty Dios ymic'ajt etz y'oy'ajt e oy mijhuinma'ñ tuuñ, etz yejcy ijxpejt ma jäy ajcxy. ⁹ Huin'it xii nijëjity ixpijctijc ooy ñay'ixquípxigixy y'ixpijcin müd Esteban jim ma judíojäy ajcxy ñaymujctac huidi anajty yxii Libertados. E jim anajty Cirene jäy, Alejandría jäy, Cilicia jäy, etz huidibi tzomb jim Asia ñaaxjot. ¹⁰ Ca' ajcxy mímadacy Esteban com hue' je' anajty ycapxy müd yhuijy'ajt ycujc'ajt huidibi je Espíritu Santo anajty mooyip. ¹¹ Chi Esteban ymídzip ajcxy mujuy jäy huidibi jëbi ñihuambety Esteban, co ti anajty ooy ycapxtigooy etz ni'ojiy Moisés etz Dios. ¹² Jadu'n ajcxy yajyuumígy yaj'oxígy yi jäy mijjäydiyc, etz huidibi ajcxy yaj'ixpijcp Moisés yley. Chi ajcxy mímadacy majch ajcxy Esteban, yajnicxy ajcxy ma je judíojäy ymijtungmüdpí etz ixpijctijc ñaymújcigixy. ¹³ Chi ajcxy ixtaayyi jäy huidibi ñihuambedüb, chi ajcxy ymíñañ:

—Jada Esteban jibic nigapxy yi Dios ytiyc etz Moisés ytiy'ajt. ¹⁴ Ti ich ajcxy midoy co ymina'n co Jesús je Nazaretpi yjidamy je Dios ytiyc, e yajtigadza'n Dios ytiy'ajt jadu'n nej Moisés ajt xymooyim.

¹⁵ Huin'it je judíoJay tungmüdpí e tüg'óciy jäy nej anajty ajcxy jim ñaaygixy huindicxpejty ajcxy Esteban. E chi ajcxy ixi yhuiñyijp jadu'n anajty quëxigy nej y'ángel yhuiñyijp.

7

Esteban ñaygohuaani ma tungmüdpí yhuinduu

¹ Huin'it je teedy mjtungmüdpí yaj'amidooy Esteban:

—¿Nej janch jadají?

² Chi Esteban y'adzooy:

—Migügtijc ajcxy etz mijjäydijc ocmidoogix. Ich ajt nDios mijpi janchypí nayquëxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydacpiy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajnixihuamyb.” ⁴ Chi Abraham choon ma yi Caldea ñaaxjot, e nicxy tzinaydacpijcpí jim Harán. Co yteedy oy y'o'cni, chi Dios Abraham yajmiiñ ma jada naaxjot ma müch ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägipy. Hue' je' janchtiy yaj'ahuaniiy co möhuaaniiy y'ap y'oc, e co anajty je' ajcxy jëdiib. Oyñi anajty Abraham ca' y'ung müdity co Dios ymigapxi. ⁶ Nimaayi Dios co y'ap y'oc y'adzinähuipy ajcxy ma huingjäy ñaaxjot, etz chi ajcxy ytumbi'adiyb etz chaachytuniiyb midaax migo'px jimijt. ⁷ Nañ jadu'n Dios nimay Abraham: “Ndzaachytunipyich je naax cajn ma yi m'ap m'oc anajty ytumbi'adyii. Chi choonip ajcxy jim, e chi xymidunipyich ma jadayaabi it.” ⁸ Dios ytuun tüg capxytuunin müd Abraham, co huen ajcxy yajtiy'ajttihuip. Paady co Abraham y'ung Isaac yma'xung'ajty coductujc xii ajcxy oy tiy'ajtti. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacminañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios müd anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cōmay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytiyc.

¹¹ Huin'it xii ymiiñ mijyuu mij'ayo'n jim Egipto etz jim Canaán ñaaxjot. Je huin'it xii ich ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjäy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob müd tüg'óciy yjuugy ymigüg. Hue' anajty ajcxy ñaybaattáayigixy nidugi'px majmoxc jäy. ¹⁵ E jadu'n yajty co Jacobo oy chinaydacpiy jim Egipto. Jim oy comjey y'o'cni. Nañ jadu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacminañ:

—Ytimypadaanipy anajty tiempo nej anajty Dios ti yaj'ahuaniiy Abraham. Ti anajty yi judíoJay ooy ymayiiñi jim Egipto. ¹⁸ Chi oy jadüg rey ytiy ane'mbi huidibi ca' ix'y'adyii José. ¹⁹ Je rey yhuin'iiñ ich ajt nmij'ap nmijteedy, e oy ajcxy chaachytuun. E chi ane'my

co huen y'ung ajcxy niguecytaaygixy huidibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jäygidacy. Chi Moisés ytaj yteedy tugig po' yajyeeci ma ytijc. ²¹ Co ajcxy yajnigeeeci, chi je rey ñix je' agondigiiy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpiyity, e ooy ymadacy müd y'ayuc etz müd ytung.

²³ Co Moisés anajty müdity huixchiguipx jimijt, chi pidacy yhuinma'ñ co ñicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñii tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huiñihuüy co Dios nihua'naanip ma ymidzip müd Moisés ycixpi. Chi ajcxy ca' huiñihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayajxemaañ je tzip, chi nimay: “Miich ajcxy nay'amigüg'ajtip, ¿nej co mdziptungixy miich ajcxy miñ xyipy?” ²⁷ Je huidibi anajty ymigüg tzaachytuumb huiñ'it najtztijiiy Moisés, nimay: “¿Pin ti xypidägy huindzin etz tiydumbi ma ich ajcxy? ²⁸ ¿Nej xyaj'ögaamich jadu'n nej axiy myaj'o'cy yi egipciojäy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicy. Chi ytöxyijc paty metz ymang.

³⁰ Huixchiguipx jimijt naxy, huiñ'it jim adügtuum ma je cop huidibi yxi Sinaí, ñayguëxici tüg ángel jinjoty ma tüg quipymang huidibi anajty tzachtuoyb. ³¹ Chi Moisés ooy jihuüy huiñmaay müd je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimäyii: ³² “Ich Dios huidibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiuyugoty, ca' anajty ocjac-huindixpedaani. ³³ E je Huindzin Dios nimaayi: “Jen mgig, com je it ma miich mdinay, Dios yi' y'it. ³⁴ Ich ti n'ixyich njäyich nej tzaachypi paatcixy jim Egipto. Ti nmidooyich co yi'ajcxy yäxy ytinay müd je tzaachypi ycixpi. Ti ngidägyich co ajcxy ngohuaanip. Ich miich nguexamyb jim Egipto ma yi Israel jäy ajcxy.”

³⁵ Chi Esteban yjacmíñ:

—Co Moisés oga'n ñicxy ma ich ajt nmij'ap nmijteedy ca' ajcxy cöbijcy huen y'ane'miyyb, chi ajcxy ymíñ: “¿Pin ti xyñimäy co ich miich ajcxy nhuindzin'adiyyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymigapxyii jinye'ñ agujc, chi ajcxy cöbijcy. ³⁶ Je Moisés je' yajpidzim ich ajt nmij'ap nmijteedy jecy'ajty jim Egipto. Moisés ytuun oy mihuinma'ñ etz ixpejt huixchiguipx jimijt jim Egipto, jim ma tzaptz mejy, etz jim ma mijtigiduum. ³⁷ Je Moisés huidibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc huidibi najtzcaxihuipy yi' y'ayuc, jadu'n nej ti xy'ijxtiyyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigiduum müd je mayjäy. Chi jim je Dios y'ángel müd miydacy ma je cop huidi yxi Sinaí, etz Moisés yajnax Dios y'ayuc ma ich ajt nmij'ap nmijteedy. Moisés ycöbijc Dios y'ayuc huidibi jugy'ájin huiñixibi müd, etz jayhui'my müd ich ajt ycixpi.

³⁹ Chi ich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ané'min, chachhuimbidaangixy jim Egipto. ⁴⁰ Chi ajcxy Aarón nimay: “Ndzojcypich ajcxy co miich oyduñ tüg Dios huidibi ich ajcxy xyhuinhuoohup, com ca' nnejhuüyim ti jada' ti yjadyii je Moisés huidibi ajt xyajtzoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigiiy ajcxy je huajmang huidibi anajty ti yajcojixy, e ooy ajcxy mijotcuje'ajty huidibi ci'm anajty ti yajcojy. ⁴² Huin'it xi ajcxy Dios y'ixmajtzi, huen ajcxy ojadaty yi xi, yi po' etz madza'. Com jadu'n Dios y'ayuc cojaaybi cojaay co Dios jadu'n ymíñ:

Israel jäy ajcxy canan ich je' huidibi ti mhuindzigiiygixy jim mijtigiduum huixchiguipx jimijt.

⁴³ Ti mgiyníxcixy Moloc ytiyc etz yi Renfán ymadza', tzadzech, quipychech etz oori oyduñ huiðibi miich ajcxy ci'm myajcoj huiðibi anajty ajcxy m'ojadadamy. Paady iich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia ninaxy.

⁴⁴ Chi Esteban yjacmīnañ:

—Jim mijtigīduum iich ajt nmij'ap nmijteedy ymīd anajty cochactiyc ma anajty ajcxy Dios huindzigīy. Jiiby anajty ajcxy yujcciy je tzaa ma Dios ytiy'ajt ycojaayity. Je cochactiyc ajcxy ycoj jadu'n nej anajty ti yaj'ane'myii Moisés, e nej anajty yajni'ixiyii nej tunipy.

⁴⁵ Iich ajt nmij'ap nmijteedy mihui'm je cochactiyc, e iich ajt nmij'ap nmijteedy huiðibi miiñ ma jada naaxjot mīd Josué, chi mīmiiñ ajcxy je cochactiyc je taab ajcxy mīmadacy je ymīdzip canaag'agajp. Dios yajpidzim je' ajcxy ymīdzip ma je naaxjot, jigix yajcīdigihuip iich ajt nmij'ap nmijteedy. Yajtuuñ ajcxy je cochactiyc, ixti cooni David ytigīy ane'mbi.

⁴⁶ Dios yjāygīdaac je rey David, e David yjacoja'ñ anajty tūg tiyc oyduñ ma jēbi yaj'ojadaty yajhuindzigīy Dios, je Dios huiði Jacob mīpidac jecy'ajty. ⁴⁷ Per Salomón je' oy cojy Dios ytiyc. ⁴⁸ Oy yi Dios tzajpjoty pi ca' chināy ma yi tiyc tiibi jāy cojy. Jadu'n nej je Dios y'ayucnajtzcaxiibi jecy'ajty jaybety co Dios jadu'n ymīnañ:

⁴⁹ Je tzajp hue' je' iich n'ane'mdac, jada naaxhuiñybi iich ndecypocxtac. ¿Ti tiyc iich miich ajcxy xycojaanip? ¿Ma je it huiðibi it ma iich jēbi nbocxy?

⁵⁰ ¿Nej cay iich ti n'oyduñdāy tūg'ōciy?

⁵¹ Miich ajcxy ooy mjetjuuñity, ca' mgapxymīdoy Dios. Jadu'n Esteban yjacmīnañ:

—Jadu'n miich ajcxy mjet mhuinma'ñ mīdity jadu'n nej jāy ajcxy huiðibi ca' Dios ytiy'ajt nejhuīy. Miich ajcxy jātyim mīdzip'ajty je Espíritu Santo. Mdūgīyb ajcxy mīd mmij'ap mmijteedy. ⁵² Miich ajcxy mmij'ap mmijteedy chaachytuun tūg'ōciy Dios y'ayucnajtzcaxiibi. Yi' ajcxy yaj'o'c Dios y'ayucnajtzcaxiibi huiðibi jayijp'aty najtzcaxiīy co ymīnañ tūg jāy huiðibi tudāgyip. E co je tudāgy jāy ymīñ, chi miich ajcxy agojix myaj'o'cy. ⁵³ Je Dios y'āngel miich ajcxy xymooy je Dios ytiy'ajt, e ca' ajcxy mgōbijcy.

Yajtzaagōgātzcixy Esteban

⁵⁴ Co je mayjāy mīdoy jadu'n nej Esteban ymīnañ, chi ajcxy mjetmātcoty Esteban, chi ytigīy ajcxy tiitzmucxpi tiitzqueetpi. ⁵⁵ E chi je Esteban jihuīy je Espíritu Santo ma yjot yhuinma'ñ, chi chajp'ijxy, e ijxy yi Dios y'oy'ajtīn etz ijxy Jesús ytināy a'oy'amy ma Dios Teedy. ⁵⁶ Chi Esteban nīmay je mayjāy:

—¡Ijxcix! N'ijxypich yi tzajp ahuādz, e n'ijxypich je jāy huiðibi tzoon tzajpjoty ytināy a'oy'amy ma Dios Teedy.

⁵⁷ E chi je mayjāy ajcxy ytāt'ac amo'cxy, chi ajcxy ytigīy huambi jihuīybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy cōgātzcixy. Je tiy'ajt yejcpī huiðibi jadu'n idītz, chi yjocxhuit ajcxy yajmihui'my tūg yeeg'anāg huiðibi anajty yxi Saulo. ⁵⁹ Jim anajty ajcxy Esteban tzachcātzcixy. Chi Esteban Dios mībijctzoy, ymīnañ:

—Huindzin Jesús, cōbījcīgich n'alma.

⁶⁰ Huin'it ycoxtīnay'ahuīy, e chi yaaxqueegy mīc ymīnañ:

—Huindzin, ca' mbocy ixīpy nej ajcxy xytuñich.

Co jadu'n Esteban ymīnanday, chi oy y'ōgy.

8

Saulo pahuidijttāgy ooy mībijcpīdijc

¹ Saulo ytuun quipxycapxy mīd huiðibi ajcxy yaj'o'c Esteban.

Huin'it xī yaj'ixhuiðijt yajpahuidijt pinjaty anajty Jesús mībijcp jim Jerusalén. Tūg'ōciy je jāy ajcxy huiðibi Jesús mībijcp anajty yqueec-huācxtay, ñicxy ajcxy jim Judea ñaaxjot etz

Samaria ñaaxjot. Jëyi je majmetzpi apóstoles ajcxy jac-hui'miyy. ² Nijējity yëydijc huidibi Dios huindzigiiyb oy yajnaxtigiiy Esteban. E ooy ajcxy jotmay jihuiy, yaaxy ajcxy miid je' ycixpi. ³ Chi Saulo ooy ixhuidijtcoty pahuidijtcoty huidijaty Jesús mibijcip etz tijc tijc anajty yajpidzimy pahuich pajuguty yëydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huidi ajcxy queec-huäcxtay ycapxhuäcxy anajty ajcxy Jesús y'ayuc huen tim ma'amy huidijtcixy. ⁵ Nidügti huidibi anajty yxii Felipe ñicxy jim Samaria, ytigiiy y'ayuccapxhuäcxi, yajnimay ajcxy Cristo ytiy'ajt. ⁶ E je jäy ajcxy ñayyöymujci nidüg'óciy ajcxy y'amido'ijtcixy janch amöñyi jadu'n nej Felipe anajty ymiydägy e ijxyp anajty ajcxy je mihuinma'ñ huidibi Felipe anajty ytumyb. ⁷ Com may anajty jäy jim huidibi miid ca'oybi ma yjot yhuinma'ñ, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz nañ mayjäy anajty chögy huidibi ca' yci' ytecy yücxy etz tecyma'tpi. ⁸ E jadu'n je mayjäy ajcxy anajty jim ooy yjotcujcity.

⁹ Jim anajty tüg yëydijc huidibi anajty yxii Simón huidibi anajty ti ni'ixpigiiy huijy jäy huinma'ñ, e ooy anajty may Samaria jäy huin'ññ, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymiid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com miid je mañ'ajt anajty jecy ti chachhuin'ñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijy jäy, nañ jadu'n mibijcy e ñiibejty. Chi Simón puyöyiy Felipe, ooy jihuiy huinmaay jadu'n nej je mihuinma'ñ huidibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huidi anajty jim Jerusalén, nejhuiy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy miid je mibijcpidijc ycixpi, jigix ajcxy ymöhuiiyb je Espíritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espíritu Santo y'adigiiy yjottigiiy ajcxy.

¹⁸⁻¹⁹ Co Simón ijxy co je Espíritu Santo y'adigiiy yjottigiiy co yi apóstoles ajcxy ycñixajy, chi Simón yaj'ahuaniiy je' ajcxy meen, yminañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espíritu Santo y'adigiiy yjottigiiy.

²⁰ Chi Pedro nimay Simón:

—Mi'ögihuipy miich mmeen, miid co mhuinma'ñ ti mbiidägy co meen'gyix mbada'ñ je huidibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytudägiy ma Dios. ²² Jothuimbit e ixmatz yi mjbic-huinma'ñ, e mibijctzou Dios, ca' jécyty xyhuinmeecxipy jadu'n nej jibic mjot mhuinma'ñ mmidity. ²³ Com janch ta'm miich mjot mhuinma'ñ, e yi jibicpi hue' xymidity mach.

²⁴ Chi Simón y'adzooy:

—Mibijctzou je Huindzin Dios miid iich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yejcy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxiiy jim Samaria ñaaxjot, e capxhuäcxy Dios y'ayuc nej ajcxy y'alma nidoocin paadipy.

Felipe miid je Etiopía jäy

²⁶ Huin'it xii Huindzin Dios y'áŋgel miŋapxy je Felipe, ñimay:

—Tzoon ya, ñicx ma madzácruudz ypidzimy, ma je tü'aa huidi tzomb jim Jerusalén huidibi ñicxp jim Gaza.

Je' je' je tü'aa huidibi adügtuum najxp. ²⁷ Felipe tim janitzon e ñicxy, e tü'am naybaatti müd tüg Etiopía jäy. Hue' je' anajty eunuco, mįtungmüd jim Etiopía. Yi' je' tesorero'ajt anajty ma je töxyjäy huidibi anajty yxii Candace huidibi anajty ane'mb jim. Je eunuco jim anajty ti y'oy Jerusalén Dios ojadaftp. ²⁸ E chi yhuimbijtni anajty ma ycajp, iñaayb anajty carretijoty yam chachnecycapxy. Hue' anajty chachcapxyp je Dios y'ayuc huidibi Isaías ycojaay. ²⁹ Chi je Espíritu ñimay Felipe co huen ñicxy najtzpadäy je carreti ma je eunuco anajty y'ñaäy.

³⁰ Co Felipe mihuingoñ je carreti, chi midoy co je jäy anajty capxy je necy huidi Isaías yjaay, chi y'amidooy:

—¿Nej mhuinjihuüyb huidibi mgapxyp?

³¹ Chi je jäy y'adzooy:

—¿Nej iich nhuinjihuihuipy pen ca' pin xyajnimäyich?

Chi je eunuco ñimay je Felipe co huen müd iñaäy carretijoty.

³² Je huidibi anajty je eunuco chachcapxyp jadu'n je' anajty ymina'ñ:

Jadu'n ajcxy ñicxy yaj'ögy nej jäy borregi ñicxy yaj'ögy. Je' amoñ'ijty jadu'n nej borregi amoñ'ity co jäy ñime'pxy. Ni tüg'aa huam ycaminañ.

³³ Ti jäy yajtzöyduñyi, ca' ajcxy a'ixii co yjanayñigapxtüdaani. Ni y'ap y'oc ycaca'ty pin ocnigapxtüdüb. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnimaaŋgich pin jada ayucnajtzcapxiiyb iñimiydacpy, ¿ci'm ñayñimidyägyii o ji jada huingbi pin nimiydacpy?

³⁵ Chi Felipe yajtzondacy je ayuc capxtücxin ma jadayaabi Dios y'ayuccojaaybi ñecy. Chi yajmüdmidydaaci nej Jesús yajty y'ayoy. ³⁶ Co ajcxy ñajx ma tüg nii, chi je eunuco yminañ:

—Cha nii, ¿nej ca' iich jëbi huaad nnübeti?

³⁷ Chi Felipe y'adzooy:

—Pen mmübijcpy Jesús müd tüg'óciy yi mjot mhuinma'ñ jëbi mnübeti.

Chi je jäy y'adzooy:

—Nmübijcpyich co Jesucristo Dios yi' y'ung.

³⁸ Chi je eunuco ñimay je carreti huindzin co huen yajtinayxipy je' carreti. Chi nimetz ajcxy ñicxy ma nii, e chi Felipe yajnübejty je eunuco. ³⁹ Co ajcxy ñübidzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcujc. ⁴⁰ Felipe yajpaty jim Azoto, chi ñajxy cajp cajp capxhuäcxí Jesucristo y'ayuc ixti yja'ty jim Cesarea.

9

Saulo yjothuimbijty

¹ Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'ñ anajty ajcxy. Paady oy ixy je teedy mįtungmüdpi, ² pijctzoy cötújcin, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mübijcip. Saulo yajmiina'ñ anajty ajcxy mach jim Jerusalén huen yëdijctijcity huen töxyjäydíjcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tücxin huidi tzomb tzajpjoty, ñigidaaci jühuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

⁵ Chi Saulo yajtiy:

—¿Mbin müich, Huindzin?

Chi midoy co y'adzoyii:

—Ich je' Jesús, je huidibi miich mdzachpahuidijttacpy, ci'm naysajtzaachytunyii jadu'n nej huajyuub co jipconebi'y huidi mid ñuumygyumyii.

⁶ Chi Saulo chiyuygoty chachchigiiy, e ymíñ:

—Huindzin, ¿ti mdzojcpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

⁷ Je yëdijctijc huidibi anajty Saulo ymid ooy ajcxy ñay'adzigiiyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxici ca' pin ma oc'ijxni. Chi ajcxy majch Saulo ma yci', e chi ajcxy huijtnicxy jim Damasco. ⁹ Tugig xii Pablo jim yijty huiintz, ca' ycaay y'uucy.

¹⁰ Jim Damasco anajty tug yëdijc chinäy huidibi Jesús y'ayuc mibijcip, huidi anajty yxii Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidig, nicx ma je tü huidibi yxii Derecha, e jim ma Judas ytiyc yajtiü tug Tarso jäy, huidi yxii Saulo. Dios mibijctzoob je' jim cham, cumäyjoty ti huin'ijxy tug yëdijc huidi yxii Ananías, co oy ñimiñyii, e ycinixajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmidmüydägyich ajcxy jadu'n nej yi Saulo jibic y'idich jim Jerusalén mid miich mjäy ajcxy. ¹⁴ Jadachambi ti mimiñ ya je necy, ma teedy mijtungmidpi ti ycotujcmöyii, co huen majztäy je jäy, e yajnicxtähuipy jim Jerusalén, tug'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nicx, com ti ich huin'ixy yijibi yëdijc, jigix ich nxii etz n'ayucich capxhuäcxipy ma tug'óciy naax cajp huidi ca' yjudíojäy, etz ma yi reydiyc, etz nañ jadu'n ma yi judíojäy ajcxy. ¹⁶ Ich yi' nyajnimähuipy tug'óciy, nej ayo'n yajnaxipy mid ich nxii ycxpi.

¹⁷ Chi Ananías nicxy ma Saulo anajty ti yjättägy, co ytigiiy tigoty, chi cinixajy Saulo, e chi nimay:

—Migüg Saulo, je Huindzin Jesús huidibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuip xycodigihuip.

¹⁸ Mic'amy ycäy ma Saulo yhuin jadu'n nej acx ñimeñ, chi y'ijxigy. Huin'it Saulo ypidigy e chi yajniibejti. ¹⁹ Chi Saulo ycaay y'uucy, e chi ymic'pijcy jadüg'oc. Chi jim mid'ijty jecy huidibi ajcxy xpijciy Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytigiiy Dios y'ayuccapxhuäcxp ma je judíojäy ajcxy ñaymujctac jim Damasco, ymíñ co je Jesús hue' je' Dios y'ung. ²¹ Tug'óciy pinjaty anajty midoohuip Saulo y'ayuc, ooy ajcxy jihuiy huinmaay, etz ñaynimáayigixy:

—¿Nej ca' jada' yjëjty je huidibi tzachyajcödigoyam yi jäy ajcxy huidibi Jesús yxii miyaax ojadajtp jim Jerusalén? ¿Nej ca' jada' yjëjty huidi anajty ti ymiiñ ya jäy ymajtzpi, e nicxy cïyega'ñ ma teedy mijtungmidpi?

²² Je Saulo capxhuäcxp anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

²³ Ti anajty hueeni xii tiempo ñajtninixiiyñi, chi je judíojäy ajcxy ñaygapxi co yaj'ögaangixy je Saulo. ²⁴ Saulo ñejhuuiy co anajty yaj'öga'ñyii. Chi jim anajty ajcxy

y'ahuixyii xim tzuum ma je poch aguu cajppäbi, jim anajty yaj'öga'ñyii. ²⁵ E je jäy ajcxy huidibi anajty ymijpidacpy Jesús, chi je' ajcxy codiynajxy je Saulo mijcachjoty ma je pochycop huidi je cajp müd jübojtz'ahuidítyity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mibijcpidijc ajcxy. Nidüg'óciy anajty ajcxy ooy tzigiygixy anajty com ca' anajty mibijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmüdmíydactay nej Saulo anajty ti ixty je Huindzin Jesús tü'am, e nej anajty Saulo Jesús y'ayuc ti capxhuäcxi huinmic jotmic jim Damasco. ²⁸ Huin'it Saulo yhui'my jim Jerusalén, e müd huidity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz müd miydaaccixy e ñaymicmigápxigixy müd je judíojäy huidibi griego ayuc caxp. E je' ajcxy nihuinmayiib co yaj'ögaangixy. ³⁰ Co je mibijcpidijc nejhuüy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcuyc anajty chinaaygixy, e ñigi anajty ixpij'idich Dios y'ayuc ytiy'ajt, jadu'n nej yi huidibi ajcxy tzinaayb ma yi Judea ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e müd je Espíritu Santo ypubéjtin, ñigi anajty yjacmayiygixy.

Pedro yajtzoocy Eneas

³² Co anajty Pedro yhuidijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³ Jim minaybaatti tüg yëydijc huidibi anajty yxii Eneas, huidibi anajty ti ypa'm'ijtni tuctujc jimijt, hue' je' anajty ycixuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pidig, etz yajpidig yi mmaabejt.

Chi Eneas mic'amy ypidigy. ³⁵ Chi ijxy tüg'óciy jäy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'ñ e jijptigiyiy yi Huindzin Jesús y'ixpijcin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Joje, jim anajty tüg töxyjäy chinäy huidibi mibijcp Jesús, hue' anajty yxii Tabita, je' huidi griegojäy ytiyyp Dorcas. E je Dorcas oy xii tiempo anajty yajnaxy mi'oyjäy'aty yi jäy ajcxy. ³⁷ Jadu'n yajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tijc mimejtnihuijtzpetypí. ³⁸ Je Joje cajp naymihuigon'ájtíp anajty müd Lida cajp ma anajty Pedro yajpaady, co mibijcpidijc ajcxy anajty nejhuüy co je' anajty yjímity, chi ajcxy mejtz yëydijc quejxy co huen nimäyii:

—Min tzojc ya Joje.

³⁹ Huin'it Pedro ñicxy müd je' ajcxy. Co jim yja'ty, chi ajcxy yajnicxy ma je tijc mimejtnihuijtzpetypí, e jim anajty ajcxy je co'ögy töxyjäydijc ajcxy ytinayjuhuidityi ma je öcpi, chachyaaxcixy. Chi ajcxy Pedro yaj'ijxy je huit ñijen huidibi Dorcas anajty ti yaj'oyiy co anajty yjugy'atyñi. ⁴⁰ Mic'amy je Pedro quejxpizimday je jäy ajcxy. Chi ycoxtinay'ahuüy, e Dios mibijctzoy. Chi huindixpejty je öcpi, nimay:

—Tabita, pidig.

Huin'it Tabita yhuindixigy, e ijxy je Pedro, chi iñaygugiy. ⁴¹ Chi Pedro majtzi yci', e chi huijtzigy. Chi yaaxi ymigügtijc etz co'ögytöxyjäydijc ajcxy, chi ajcxy yajcidigiy juugy. ⁴² Tüg'óciy jäy ajcxy jim Joje nejhuüyday co Pedro yajjugypijcy je Dorcas. E mayjäy mibijcy je Huindzin Jesús. ⁴³ Jadu'n yajty co Pedro y'ijty jim Joje canaag xii ma je coodzpi ytiyc huidi anajty yxii Simón.

10

Pedro etz Cornelio

¹ Jim Cesarea anajty tög tungmüdpí huidi anajty yxii Cornelio, hue' je' anajty capitán'ajtp ma tög batallón soldado ajcxy yxiiip, la Italiana. ² Je Cornelio ooy anajty ytuđägyity, etz je' müd tög'óciy y'ung ytöxyijc ooy anajty yajmij'ajtcixy Dios. Je Cornelio nañ jadu'n ypubety müd meen je judíojäy ayoobtijc, e je' Dios ojadajt anajty jabom jabom. ³ Tög xii, minacyxii anajty, Cornelio huin'ijxy janch huadz Dios tög y'ánel ñigidaaci, e ñimaayi:

—¡Cornelio!

⁴ Chi Cornelio huindicxpejty je ánel janch tzigiiyb anajty, e chi yajtiy:

—¿Ti Huindzin?

Huin'it je ánel y'adzooy:

—Jadu'n nej mDios'ojadaty etz jadu'n nej mbubety ayoobtijc ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadügpí Simón, je cootzpí huidi ytijc mihuingon mejypa'. Je Pedro xyajnimähuipy ti mdunipy.

⁷ Co je ánel ñicxni huidi anajty ti ymígapxyii, chi Cornelio yaaxi mejtz ytumbi, etz tög soldado huidi Dios capxymidoob, etz huidibi je Cornelio ooy ymíjnicxpedyii. ⁸ Chi yajmüdmíydactay nej je ánel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy mihuingon Jope, cujc yxii anajty, e chi Pedro ypejty ma tijcnícx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yjicxy yaj'oyii. Chi Pedro huin'ixy je tzajp ahuadz, e huin'it ijxy quidägy jadu'n nej poob huit mijpi yxóchity majaty ytaatz. ¹² Jiiby ma je poob huit, jiiby anajty canaagnax iyujc huidijaty mídaax yci' ytecy etz tza'ñ etz joon. ¹³ Huin'it Pedro midoy co anajty ñimäyii:

—Pedro, pidig nicxy yaj'ög yi iyujc etz tzüdz.

¹⁴ Chi Pedro y'adzooy:

—Ca', Huindzin, caminaabi ich ti njicxy huidibi jibíciy etz huidibi ca' ñigödúcyity nicxy judíojäy jicxcixy.

¹⁵ Huin'it jadüg'oc ayuc midoy ñimäyii:

—Huidibi Dios yajhuäch ca' huaad mdijy co yi' yjibicity.

¹⁶ Tugüg'oc jadu'n yajti, chi je poob huit ypättigiiyñi tzajpjoty. ¹⁷ Jim anajty Pedro tzachhuinmay nej anajty yhuimbídzimy je tiibi ixy co yja'ty ma tijc aguü je Cornelio yquexyöybi huidi ajcxy anajty nidihiuip yajtihiuip je Simón ytijc. ¹⁸ Chi ajcxy mic ycogapxiy yajtiy pen jim anajty yjättägy Simón huidibi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tiibi ixy, chi je Espíritu Santo Pedro ñimaayi:

—Tugüg yëydijc ji xy'ixtäy. ²⁰ Pidig e minac, nicx müd je' ajcxy, e ca' ti mhuinmay, com ich jadu'n ti nnimäy co huen xy'ixtäy.

²¹ Huin'it Pedro yminajcy ma je' ajcxy, je Cornelio quexyöybi, nimay ajcxy:

—Ich je' huidibi müch ajcxy m'ixtaayb, ¿ti ycixpi co ti mmiingixy?

²² Chi ajcxy y'adzooy:

—Yi' ich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je huidibi tög'óciy judíojäy ooy tzójccixy, etz cōmaaygixy. Huindzin Dios tög y'ánel ñimay Cornelio co müch müñ nyajhuoy, jigix mñicxip ma yi' ytijc, e y'amído'ida'ñ ajcxy nej müch myaj'ixpiga'ñ.

²³ Chi Pedro yajtijctigiiy je' ajcxy. Chi ajcxy jim ymaahu'i'my. Com jabom Pedro ñicxy müd je' ajcxy, e chi nijéjty ypanicxi huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy mïd yjugymigüg, etz nijëjity pin ooy mïd ñaymigüg'adyii, huidijaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytiçpïdzimoy oy yijpcobadiy je Pedro, e chi ycoxtinay'ahuïy yajmij'ada'ñ anajty je Pedro. ²⁶ Chi Pedro huijztinayigy je Cornelio, e nimay:

—Tinayig, ca' xyajmij'ida'ñich, nañ jadu'n ñich njäyity nej miich.

²⁷ Mïd anajty ycapxy ymiydägy co ytiçtigiy, jiiyby anajty mayjäy ni'amugi'ahuïjxcixy. ²⁸ Chi Pedro nimay ajcxy:

—Miich ajcxy mnejhuïyb co yi judíoäy ycostumbre capx'aducy ca' huaad judíoäy yöymucy mïd huidibi ca' yjudíoäyity, ca' huaad ytiçyigy ma ajcxy ytiç. Per Dios ti xyajni'ixiyich co ca' huaad nmïna'ñich ca' oyjäyity huädzjäyity pinjaty. ²⁹ Paady co oy ti xyajhuoyiijich ti nmiiñich, ni ca' huam ti nmïna'ñich. Nnejhuïhuaamyich na'amy co oy ti xyajhuoyiijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ñich anajty ma ndijcich, jaygay jay'ügy nDios'ojadatyich. Com hue' anajty mijminacy xii mïna judíoäy ajcxy ycapxtaaccixy, co tüg ñayguëxici jadu'n nej jäy mïd ypoob huit janch adïcxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoobtjic ajcxy. ³² Quex mdumbi jim Jope, huen nicxy yajtzoñ Simón huidi nañ jadu'n yajtiç Pedro. Jim Pedro yja'ttägy ma je cotzpi ytiç huidibi yxii Simón, huidibi tzinaayb mihuingon mejypa'. Co je' ymiinipy, chi xymïdmïydägy.” ³³ Paady nguejxyich janch mic'amy huen nicxy xy'ijxtäy. E ti may'ajt mduñ co ti mmiiñ. Jadachambi cha ñich ajcxy nidüg'óciy ma Dios yhuinduu. E n'amïdo'idängixyich tüg'óciy je y'ayuc huidibi je Huindzin Dios ti xyaj'ane'my jëbi xyajniimaayigy.

Pedro Dios ytiy'ajt nigapxy nimïydacy ma Cornelio ytiç

³⁴ Huin'it Pedro ytiçy y'ayuccapxhuäcxpi, nimay ajcxy:

—Jadachambi huinjihuïybich, co yi Dios ca' ni tüg ix'yixy jäy, y'actzojctaayb hueñypinity. ³⁵ Dios ycöbijcpi hueñypinjäyity huidibi tzinaayb huen huidibi naax huen huidibi cajpity, pen chigiyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham jotcuç'äjtin mïd Jesucristo ñich ajt nHuindzin. ³⁷ Miich ajcxy mnejhuïyb yajxon nej ti ytunyii ti yjadyii ma judíoäy ajcxy ñaax ycajp chondacy jim Galilea, Juan el Bautista ti anajty capxhuäcxii Dios y'ayuc ytiy'ajt etz yjäyayniibety. ³⁸ E mnejhuïyb miich ajcxy co Dios yejc je Jesús je Nazaretpi je Espíritu Santo, e nej Jesús yhuidijty e tuuñ oy'äjtin, etz mihuïnma'ñ, jadu'n nej yajtzocy je jäy ajcxy huidi anajty ane'm'ijtp ma yi mujcu'. Com Dios anajty mïd y'ity je Jesús. ³⁹ ñich ajcxy je tiy'ajt nmïdich tüg'óciy jadu'n nej Jesús yjaty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcixy. ⁴⁰ E Dios yajjugypijcy codugüg xii, e chi yajnayguëxici ma ñich ajcxy. ⁴¹ Ca' ti yajnayguëxigyii ma tüg'óciy jäy, jëyi ma ñich ajcxy huidi jayijp Dios yhuïn'ijx jigix tiy'ajt nyegipyich. ñich ajcxy caaymujc uucmujc huïn'it co yjugypijcy ma y'o'cy. ⁴² Ti xyquexy ñich ajcxy ayuc ngapxhuäcxpi ma mayjäy ajcxy etz nidiy'ajt'adipyich ajcxy co Dios Jesús ti pïdägy mij'ane'mbi ma yi juugypi etz ma yi ögyi. ⁴³ Nañ jadu'n jecy'ajty tüg'óciy Dios y'ayucnajtzcapxiybi ñimïydac ajcxy Jesús, e ymïnañ ajcxy co tüg'óciy je jäy ajcxy pinjaty mibijc je Cristo, Dios huïnmeçxiib ajcxy ypocy.

Je Espíritu Santo ycidacy ma je ca'pi ajcxy yjudíoäyity

⁴⁴ Yam anajty Pedro ycapxyñi co je Espíritu Santo ñidigiiyi ycödigiiyi ajcxy nidüg'óciy huidijaty y'amïdo'ijt Pedro y'ayuc. ⁴⁵ E je judío mibijcpiidijc ajcxy tibi anajty miiñ mïd Pedro, ooy ajcxy jihuïy huïnmay co Dios quejx Espíritu Santo ma je jäy ajcxy huidibi ca'

yjudíoäyity, ⁴⁶ co midoy ycapxcixy mïd huingbi ayuc, etz cömaygixy jäymejtzcixy Dios.

⁴⁷ Chi Pedro yminañ:

—¿Nej ca' jada' y'óyity co ñiibedipy ajcxy huidibi Dios ti ymóoyigixy je yEspíritu Santo jadun'nej ñich ajt xymooyim?

⁴⁸ Chi Pedro ni'ane'mdïy huen ñibejtcixy ma Huindzin Jesucristo yxii. Huin'it ajcxy Pedro cohuanïy huen hui'my tüg xii mejtz xii mïd je' ajcxy.

11

Pedro yajmïdmïydacy jïm Jerusalén nej anajty ti ytuñyï ti yjadyï

¹ Je apóstoles ajcxy etz je mibijcpidijc ajcxy huidi anajty ajcxy jïm Judea, midoy ajcxy ayuc co nijëjity jäy huidi ca' yjudíoäyity ti anajty ajcxy cöbïjciy Dios y'ayuc. ² E co Pedro yhuimbijty Jerusalén, chi nijëjity judíoäy ajcxy ogy Pedro, je' ajcxy huidibi tzachmïjpidaaccixp judíoäy ycostumbre jadun'nej ajcxy tiy'ajttïygixy ymang. ³ Je' ajcxy nimay Pedro:

—¿Na'amy co oy ti mgo'ixïy jäy ajcxy huidi ca' yjudíoäyity, etz ti mgay m'ügy mïd je' ajcxy?

⁴ Chi Pedro nimïydactay tüg'óciy jadun'nej anajty ti yjaty, chi yminañ:

⁵ —Jïm ñich anajty Joep nDios'ojadatyich. Chi nhuin'ijxyich jadun'nej tüg mij poob huit choon tzajpjoty, cidägy ma ñich nhuinduu, xóchity anajty ma mïdaax ytaat. ⁶ Co nnimïjhuägyich n'ixa'ñich ti jiiy, chi n'ijxyich may iyujc, jiiy iyujc mïdaaxpi yci' ytecy, jiiy ahua'nbi iyujc, jiiy tza'ñ, etz joon. ⁷ Chi nmïdooyich tüg ayuc huidibi xyñimaaybich: “Pedro, pidig, yaj'ög yi iyujc etz tzüd.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adücyity judíoäy ajcxy tzüdzip.” ⁹ Chi mïmetz'ocpi tüg ayuc tzajpcixy xyñimäyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰ Tugig'oc jadun'yajti, chi je poob huit ypättigïyñi tzajpjoty. ¹¹ Huin'it xyñimiiñich je quexyöybi nidugig, choon ajcxy jïm Cesarea. ¹² Chi je Espiritu xyñimaayich, co min n'ocnicxich mïd je' ajcxy, ca' ma ni ti nhuinmayipyich. Mïd nicxyich nidugig nmigügtijcich. Chi ñich ajcxy ndigïy ma je jäy ytijc. ¹³ Je codijc xyajmïdmïydaacich co je' anajty ti huin'ixy tüg ángel ma ytijc, ñimäyï: “Quex mdumbi ajcxy jïm Joep huen nicxy yajtzoongixy Simón huidibi jäy ytijpy Pedro, ¹⁴ e je' xyajnimähuip nej jëbi Dios m'alma xyajnidzoocip, miich etz tüg'óciy mjin mdijc mjuugy-migüg.” ¹⁵ Co Jesús y'ayuc ngapxhuäcxtzondaacich, chi je Espiritu Santo ñidigïy ycodigïy je' ajcxy. Tim jadun'nej xyñidigïyim xycodigïyim je jayïp'atypi. ¹⁶ Huin'it njäymejtzcoodyich nej je Huindzin Jesús yminañ: “Janch Juan, je Bautista, jäy yajñibejt mïd ñi, e Dios jäy ajcxy y'adigïhuiyb yjottigïhuiyb je Espiritu Santo.” ¹⁷ Pen Dios ti ymöyï je jäy ajcxy huidibi ca' yjudíoäyity tú'ciy mïd huidibi ñich ajt ti xymooyim co nmibijcim Jesucristo. ¿Ocjactim pin ñich co Dios nmïdzïp'adïybich?

¹⁸ Je mibijcpidijc ajcxy jïm Jerusalén, co ajcxy midoy Pedro y'ayuc, chi ajcxy y'amoday. Chi ajcxy Dios jäymejch cömay, chi ajcxy yminaangixy: “Dios jadun'ti yminañ co je' ajcxy huidibi ca' yjudíoäyity jëbi yjothuimbijtcixy, jigix Dios ymöhuiyb jugy'ajtin huinixiibi.”

Antioquía jäy ymïdoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jïm Jerusalén. Chi nijëjity ajcxy yqueecy, nicxy ajcxy jïm Fenicia ñaaxjot, etz jïm Chipre, etz jïm Antioquía. E capxhuäcxy ajcxy je oybi ayuc ma jadyï judíoäy, ca' ajcxy jac ni pin yajnimay. ²⁰ E nijëjity mibijcpidijc huidibi jïm anajty ajcxy yconaaxip ycojájpip Chipre etz Cirene, chi ajcxy ñicxy jïm Antioquía. Chi yajmïdmïydacy ajcxy je Huindzin Jesús y'ayuc mïd griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinma'ñ etz mïjpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtín ti tuñ, chi oy yjotcugiiy je Bernabé. Chi capxhuijy tüg'óciy co huen ajcxy janch cixyjot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy müdity je Espíritu Santo jotjoty huinma'ñyjoty. Ymüid je' ycapxhuijin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi müdmüin Antioquía. ²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jijptigiiy je Jesús y'ixpijcin. Jim Antioquía oga'n yximoy cristiano, je jäy ajcxy huidibi mijpidacp Jesús.

²⁷ Huin'it tiempo nijējity tiy'ajtnajtzcapxiybi choon Jerusalén ñicxy ajcxy jim Antioquía. ²⁸ Tüg huidi anajty yxi Agabo ytinay'ahuiy mayjäyjoty, e chi je Espíritu Santo yajcapxi, e ymíañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtín ma ymügügtijc ajcxy huidi tzinaayb jim Judea, jadu'n nej pubéjtín pin tim yega'ñ. ³⁰ E jadu'n ajcxy tuuñ. E je meen tiibi anajty ymucy yajmiguejxy ajcxy je Bernabé etz Saulo ma je mibijcpidijc tungmüdpí jim Judea.

12

Co Jacobo y'o'cy etz co Pedro yajpujxtijctigiiyi

¹ Huin'it tiempo je rey Herodes yajmajtzi nijējity Jesús yjäy, e chi yajtzaachytuuni. ² Chi ni'ane'mdiy huen yaj'ögyii müid espada je Jacobo, je Juan y'uch. ³ Co je rey nejhuüy co je judíojäy ajcxy jadu'n ooy jäygidaaccixy, chi ymajtzi Pedro nañ jadu'n. Hue' jadu'n yjajti xijoty, je xii mina tzajcaagy caaygixy huidi ca'pi ylevadura müdity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaxpicy soldado ajcxy cuend'adyii, tügpicyjaty midax soldado ajcxy. Hue' anajty je rey ti huinmay xinaaxy anajty tiyduna'ñ Pedro mayjäy agujc. ⁵ Pedro jiiby anajty pujxtigoty janch oy cuend'aty. E je mibijcpidijc janch Dios mibijctzodüib anajty ajcxy müid Pedro ycixpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yximüy, ma je Herodes anajty tiyduna'ñ Pedro mayjäyjoty com jabom, Pedro maab anajty, e soldado agujc ajcxy cíxoch tecyxoch anajty müid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ángel ñayguëxici ytinäy ma Pedro yhuinduu, e je pujxtijc yaj'aníyday. E chi je ángel tijyücxxy Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycäday ma Pedro yci'. ⁸ Chi je ángel nimay Pedro:

—Ñayhuiini, yajtigi' mgig.

Co Pedro yajtigíyday ycig, chi je ángel ñimaayi:

—Yajtigi' mjocxhuit, e pajamgich.

⁹ Chi Pedro pujxtijc pidzimy axam ma je ángel, ni ca' nejhuüy pen janch anajty huidibi je ángel tumyb, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy mimetzpi ñinajxy. Co ajcxy yjaty ma mijpujxtijc aguu, ma mijtuba', chi je' ci'm'ahuaach. Chi ajcxy ypidzimy. Ti anajty mijyöyixni co je ángel ixmajtzní Pedro.

¹¹ Huin'it Pedro yhuinma'ñymejch, chi ymíañ:

—Jadachambi njihuüybich co janch jada' co je Huindzin Dios ti quexy y'ángel, e yi' ti xyñihua'ñich ma Herodes, etz jadu'n nej tüg'óciy judíojäy ajcxy anajty xytuna'ñich.

¹² Co Pedro yjot yhuinma'ñ ymejch, chi ñicxy ma María ytiyc, je Juan ytaj, je Juan huidi jäy ytiipy Marcos, ma anajty ajcxy jim mayjäy tügmucy y'ijtcixy Dios mibijctzoogixy. ¹³ Co Pedro tijc'aguu cojxnojcy, je tiba'y'amybi, chi tüg töxy'anäg ypidzimy huidi anajty yxi

Rode, ixa'ñ pin je' tijc'aguu cojxnojcy. ¹⁴ Co oy yögmidoy co Pedro je' anajty, chi ca' ytijc'aguu yaj'ahuaach. Jëyi co poyigy ñicxy tigoty co anajty tzachjotcúcity, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocjiiyb jada' miich.

Chi je töxy'anäg y'adzooy co janch je' anajty. E je jäy ajcxy yminaangixy co ca' yi' yjējity, hue' jada' Pedro y'ánel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiiy yjihuiy. ¹⁷ Pedro cimiid ytiy'ajtyejcy co huen amon ajcxy. Chi yajmimidyacy nej je Huindzin Dios anajty ti yajpidzimyi pujxtigoty. E nimay ajcxy co huen nicxy yajmimidyägy jada je Jacobo etz jacjadyii mibijcpidijc.

Chi Pedro ñicxy huingbi cajn.

¹⁸ Co yximiiy, huin'it soldadtijc ajcxy ooy ytigiiy huambi jihuiybi huinmay'ahuidijty, com ca' nejhuiygixy nej je' anajty ti ytunyii ti yjadyii miiid Pedro ycixpi. ¹⁹ Chi Herodes ni'ane'mdiy huen nicxy yaj'ixtäy Pedro. E co ca' yajpaty, chi pijctzoy tiy'ajt ma soldado ajcxy huidi anajty Pedro ti ycuend'adyii. Chi ni'ane'mdiy huen ajcxy nicxy yaj'ögyii. Chi Herodes choon jim Judea, chi oy chinaydacpicy jim Cesarea.

Herodes y'ögy

²⁰ Herodes janch ymijotmätpy anajty je jäy huidibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je miltungmiiidpi maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot.

²¹ Chi Herodes agapxtujcy tög xii, chi je reyhuít yajtigiiy, chi iñaydac paty ma ycötujctac, chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy yminaangixy:

—Jada jäy huidibi capxp, ca' jada yjäyity, jadu'n yi' nej tög dios!

²³ E huin'itiy Huindzin Dios y'ánel yajpa'mbejty Herodes, com ca' anajty huindzigiiy cömay je Dios. Chi y'o'cy, ting je' tzütztayyi.

²⁴ Je Huindzin Dios y'ayuc mibijc'idichpy anajty jäy, e yajcapxhuäcxp anajty hueñytimma'ámyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim ymiiidnicxy huidibi anajty yxii Marcos.

13

Bernabé etz Saulo yajtzondaaccixy ytung huidibi ajcxy pátip

¹ Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcaxxiyb. Jim anajty Bernabé etz Simón, huidi anajty ajcxy ytiipy el Negro, etz Lucio huidi tzoon Cirene ñaaxjot, etz Manaén huidi tög yeectac miiid Herodes, huidibi ane'm jim Galilea, etz Saulo. ² Tög xii ajcxy ñayyöymújcigixy jaygay jay'ügy Dios ojadaajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tiibi nyajnihuohuiyich.

³ Chi ajcxy yjacDios'ojadaajty etz yjac'ayuu'ajty, e chi je jäy ajcxy ciniixajy Bernabé etz Saulo, e chi ycapxycijxy miiid je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judiojäy ajcxy naymujctac. Tzoon je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay

ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judío'jāy huidi anajty yxii Barjesús, hue' je' anajty huijy'jāy, e ñaydiyii anajty co Dios ytiy'ajt najtzcapxiiyi, e ca' anajty yjanchity. ⁷ Je huijy'jāy ooy miid ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpícyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijy'jāy, huidi nañ jadu'n yajtijp Elimas, midziptzoñ Pablo etz Bernabé, e tüccí'y capx'aduga'ñ ca'ydi je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, miid je Espíritu Santo huindicxpejty je huijy'jāy, e nimay:

—¡Ooy mjbicjāyity miich, ooy m'anijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ miid! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús xychachytunaamb, e mhuí'mip huiintz, etz ni ca' je ximbi tzojc m'ixipy.

Chi je huijy'jāy mic'amy yhuí'my huiintz coodz, chi ixtay pin oc-huijtnicxib com ca' anajty y'oc'ixni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuiy huinmaay nej Pablo nimidyägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy miid ybarcotigüy, chi ajcxy ñicxy Perge ma Panflia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigüy ma je judío'jāy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcapxiiyi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmid ayuc tiy'ajt miid jāy ycixpi jēbi cham myajnimāy ajcxy.

¹⁶ Chi Pablo ytinayigy, yci' miid ytiy'ajt yecy co huen amoongixy, e nimay ajcxy:

—Midoogix, miich Israel jāy ajcxy, etz huidibi Dios yajmij'ajtp. ¹⁷ Je Israel jāy Dios huin'ijxy ich'ajt nmij'ap nmijteedy jecy'ajty etz yajyujcpejt ajcxy micho'n co anajty ajcxy jim yjactzināy Egipto ñaaxjot. Chi ajcxy yajpidziimni miid Dios ymic'ajt. ¹⁸ Dios je' ajcxy mihuindinay huixchigüipx jimijt jim mijtigüduum. ¹⁹ Je Dios huixtujc it naax cajp yajtigoy huidi anajty jim tzinaayb Canaán ñaaxjot, etz yajmoy je naax ich'ajt nmij'ap nmijteedy jecy'ajty jigix ajcxy jim chināhuipy. ²⁰ Midaax migo'px jahuixchigüipx majc jimijt Dios mic'ajt mooy juez ajcxy huen ane'myii Israel jāy ixti mabaad Samuel je Dios y'ayucnajtzcapxiiyb ytungbijcy. ²¹ Huin'it ajcxy tüg rey pijctzoy huidi ane'mib ajcxy. Chi Dios yajreytigüy Saul huidi tuun huixchigüipx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigüy David, chi Dios yminañ: “Ti nbaadyich David, Isaí ymang, tüg yēdyjc huidibi cuydundāhuipy nej ndimdzocyich.” ²³ Ma David y'ap y'oc Dios yajnibijcy Jesús, jigix nihuānipy yajnīdzögipy je Israel jāy ajcxy, jadu'n nej anajty jécyp Dios yaj'ahuanüy ajcxy. ²⁴ Ca'ni anajty Jesús miiñ co Juan, je Bautista, capxhuäcxy Dios y'ayuc ma je Israel jāy ajcxy, nimaaygixy co copicy huen jothuimbijtcixy ma Dios, e huin'it jēbi ñibéjtcixipy. ²⁵ Co anajty Juan y'o'cin huingon, chi yminañ: “Ca' ich njējity je Cristo, jadu'n nej mmīnaangixy. Jayijp ti nmiiñich, jac'axam miina'ñ je Cristo; jacmic'ajt miid je' ca'ydi ich. Ca' xypaadyich nicxy yi' ycighuin nguejich.”

²⁶ Chi Pablo yjacminañ:

—Migügtijc, Abraham y'ijx y'oc etz pinjaty yajmij'ajtp Dios, Dios ti xyajniguexy jada ayuc nej ajcxy jēbi m'alma nīdzoocin paady. ²⁷ Je jāy ajcxy huidi anajty ajcxy tzinaayb jim Jerusalén etz tungmīdipi ajcxy, ca' ajcxy nejhuüy pin je' anajty je Jesús, ni ca' anajty huinjihuüygyxy y'ayucnajtzcapxiiyb ajcxy y'ayuc huidibi anajty yajcapxp ma ajcxy ñaymujctac huindüg sábado. E je' ajcxy ci'm yajpocycāy Jesús, e cuyduñ nej anajty

ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuiy ma Pilato co huen nicxy yaj'ögyi. ²⁹ Co je jäy ajcxy cuydunday jadu'n nej anajty yjaybétyity ma Dios y'ayuc müd je' ycixpi, chi ajcxy yajminajcy cruudzcíxy, etz oy yajnaaxtigíyixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguëxigo'ci ma ymígügtijc huidi anajty ti ymídhuididyii co chooñ Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc iich miich ajcxy nyajmídmíydacpy cham, huidi Dios yajnimay iich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma iich'ajt co yajjugypijcy Jesús co y'o'cy. Jadu'n yi' Dios y'ayuccojaaybi jaay jecy'ajty ma je Salmo necy mímetspi ma Dios jadu'n ymíañ: "N'ungich cham ti nyajjugypicyich." ³⁴ Müd jadaaabi ycixpi co Dios ti yajjugypicy Jesús co y'o'cy, jigix ñinícx ca yhuindigoopy jadu'n anajty jaybétyity ma Dios ñecy ma Dios jadu'n ymíañ: "Nmöhuaamyich miich ajcxy je conúcxin huidibi nyajnimaaayich je David." ³⁵ Paady nañ jadu'n Dios y'ayuccojaaybi jaay jadüg'it, ma ymíañ: "Ca' Dios a'ixiy nicxy y'ung ñinícx yhuindigooy, je y'ung huidibi müd huadz jot huinmañ." ³⁶ Com janch co je David Dios huin'ijxy, jigix ane'mipy yi' yjuugy ymígüg ajcxy. E co ytung yajmay, chi y'o'cy, e je' y'alma ñaybaatti müd je y'ap yteedy y'alma, e je' ñinícx huindigooy je'. ³⁷ Je Jesús huidibi Dios yajjugypijc ca' je' ñinícx yhuindigooy. ³⁸ Migügtijc, jébi mnejhuíyixy, co je pocyhuinmeecxin yaj'ihuäcxy yajcapxhuäcxy müd Jesús ycixpi. ³⁹ Müd je' ycixpi pinjaty mibijcp ti ypocyajhuinmeecxcixy huidibi Moisés yley anajty ca'p pocyhuinmeecxin yecy. ⁴⁰ Nayguend'ájtigix, ix xyajcidacpejtcix je mij ayo'n jadu'n nej Dios y'ayuccojaaybi jaay jecy'ajty co Dios jadu'n ymíañ:

⁴¹ Midoogix iich n'ayuc, miich ajcxy nixiicpi yajxiicpi, nay'adzigíyixy, ix m'alma myajtigooygixy. Com iich Dios ndumyich tüg mijhuinmañ ma miich ajcxy mxii mdiempo. May miich ajcxy ca' mmibigipy, oy pin xyjayajmídmíydaaccixipy.

⁴² Co Pablo ajcxy ypidzimy ma yi judíojäy ñaymujctac, chi je jäy huidibi ca' yjudíojäyity nimay je Pablo co huen nañ jadu'n yajmídmíydaagíyb ma je jadügpí sábado. ⁴³ Co ajcxy yöyhuäcxni ma nayyöymujctac may judíojäy etz mayjäy huidi ca' yjudíojäyity huidibi jijptigíyiy je judíojäy y'ixpícin, panícxxy ajcxy je Pablo etz Bernabé. Pablo etz Bernabé capxhuijy ajcxy co huen paníxcixy je tiy'ajt jadu'n nej Dios tübi tuñ may'ajt müd jäy ycixpi, e ca' ajcxy ixmadzipy.

⁴⁴ Co sábado yxii paty, chi jäy ñayyöymujci jahuenjaty cajp jäy ycanicxtay co anajty tzachmidoohuaangíxy Dios y'ayuc. ⁴⁵ Ca' anajty ajcxy yjotcújcity co je judíojäy ajcxy íjxy je mayjäy. Chi ajcxy ooy yjot'ambijccoty ni'ojíyixy etz nimaaygíxy oy ni nej Pablo. ⁴⁶ Chi Pablo etz Bernabé ytigíy miccapxpi ymíañ ajcxy:

—Copicy anajty co iich miich nyajnimáhuipy Dios y'ayuc jayijp. Com ca' mgöbigaangíxy Dios y'ayuc, e co ca' mnaybidaacigíxy tudägy ma jugy'ájtín müd huinixiibi, nicxyich n'ocyajnimäy ajcxy Dios y'ayuc huidibi ca' yjudíojäyity. ⁴⁷ Com jadu'n xy'ane'myich ajcxy yi Huindzin Jesús, e xyñimaayich ajcxy:

Ti iich miich nbidägy jadu'n nej tüg tícxin jajin ma tüg'óciy naaxhuiñybi jäy jigix myajnejhuíhuipy ajcxy je nízoozin jiguembaad huindu'my naaxhuiñ.

⁴⁸ Co ajcxy jadu'n midoy huidibi ca' yjudíojäyity, chi ajcxy ooy nigi yjotcugíy, e chi ajcxy ymínandacy co je Huindzin Jesús y'ayuc ooy anajty y'óyity. E may ajcxy mibijcy huidibi anajty Dios ti yajnigödungíy co paatip jugy'ájtín huinixiibi. ⁴⁹ E jadu'n jim yajcapxhuäcxy Jesús y'ayuc ma je jimbi naax cajp. ⁵⁰ E je judíojäy ajcxy minaygapxi nijéjity töxyjäydijc ajcxy tudägypí huidibi Dios yajmij'ajtp, etz je mijjäydijc, e je' ajcxy müd mibidígy Pablo etz Bernabé co pahuojpquëgaangíxy ma jejimbi naaxjot. ⁵¹ Chi Pablo etz Bernabé ycíg huinhuoippy, je' je' tiy'ajtip co ca' jäygidacy ajcxy nej jäy anajty ytungíxy. Chi ajcxy ñicxni

jim Iconio. ⁵² E je' ajcxy huidibi mijpidaacp Jesús ooy anajty ajcxy yjotcujcity. E ymiid anajty ajcxy je Espíritu Santo ma yjot yhuinma'n.

14

Pablo miid Bernabé jim Iconio

¹ Jim Iconio Pablo etz Bernabé ytigüy ajcxy yquipxyi ma je judíoäy ñaymujctac, e oy yajxon ajcxy capxhuäcxy Jesús y'ayuc. E may judío etz griegoäy ajcxy ymibijcy. ² Je judíoäy ajcxy huidibi anajty ca' ymibijccixy nigapxcoty ni'ojygoty ajcxy huidibi ca' yjudíoäyity huen je cajp jäy ajcxy mijotmädi py je mibijcpidijc. ³ Miid jada ycixpi Pablo etz Bernabé yhui'my je' ajcxy jecy etz capxhuäcxcixy ajcxy Dios y'ayuc huinmic jotmic etz je Huindzin mijotcujc'ajtcixy ooy, e mooyi ajcxy je mic'ajt jëbi ajcxy pa'mjäy yajtzögipy etz mijhuinma'n tungixy huidibi iixpejt'ajtp ma Dios ymic'ajt. ⁴ E je cajpjäy mejtzpicy je' anajty ajcxy, nijëjity ymijpidacpy ajcxy yi judíoäy, etz nijëjity ymijpidacpy ajcxy je Dios y'ayuccapxhuäcxi. ⁵ Chi nijëjity judíoäy etz huidibi ca' yjudíoäyity ñaygapxi miid tungmiidpi co mijotmätcodaangixy etz tim tzaagögädzaangixy Pablo etz Bernabé. ⁶ Co Pablo etz Bernabé nejhuüy, chi ajcxy yqueecy ñicxy ajcxy jim Listra etz Derbe jim Licaonia, e majaty naax cajp huidi huinduy'agonbi. ⁷ Jim ajcxy capxhuäcxy Jesucristo ytiy'ajt nej jëbi ajcxy huaad y'alma nïdzoocin paatcixy majaty cajp huingonbi.

Tzaagätzcixy Pablo jim Listra

⁸ Jim Listra anajty tüg yëydijc iñäy tecyma'tpi, caminaabi anajty yöy, com jadu'n anajty yma'xung'aty. ⁹ Je tecyma'tpi amido'ijtpy anajty Pablo y'ayuc, e Pablo iixpy anajty co ymiid mibijcin nej jëbi chögy. ¹⁰ Chi Pablo mic nimay:

—Tinaayig.

Chi je tecyma'tpi tüg tipy ytinaygugüy, e chi ytigüy yöyb. ¹¹ Co je mayjäy ajcxy iixy nej Pablo anajty pa'mjäy ti yajtzögy, huin'it ajcxy ytigüy huambi jihuüybi miid Licaonia ayuc chachminaangixy:

—¡Dios ajcxy jadu'n nej jäy ti ycidaaccixy ma ich ajt!

¹² Yminaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huidibi anajty tumb jim ma je Júpiter chajptijc cajppäbi, mimiin toro ajcxy etz pijy. E je teedy miid je jäy ajcxy yhuindzigihuaangixy etz ojadadaangixy anajty Pablo etz Bernabé, yaj'ögaangixy je toro ajcxy. ¹⁴ Co Pablo etz Bernabé nejhuüy, ca' ajcxy jäygidacy nej jäy anajty ajcxy y'ididzaangixy, chi ajcxy ci'm yhuuit agiidziy, e ytigüy ajcxy mayjäy'agujc yam chachminaangixy:

¹⁵ —¡Yëydijctijc ajcxy! ¿Nej co jada jadu'n m'iditczixy? Nañ jadu'n ich ajcxy jäyity, jadu'n nej miich ajcxy. Paady ich ajcxy ti nmingixy ma miich ajcxy mgajp jigix ajcxy m'ixmadzi py jada jadu'mbi huinma'n huidibi ca' choobaady ma Dios. E mijpidaaccixp je Dios juugypí huidi oyduñ tzejp etz naaxhuiñybi, je mejy etz tüg'óciy tijaty ya n'ixim. ¹⁶ Jecy'ajty Dios ixmajch je jäy ajcxy huen túngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi miid miich ajcxy ycixpi. Dios yi' yajtuub etz yecy oybi cosecha e xymooyim mijcajee huidi ngaayim n'uucim e xyajjotcugüyim.

¹⁸ Oy anajty Pablo jadu'n jadim tzachnimaaygixy, ca'p ajcxy mimadacy co yi jäy ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xii nijëjity judíoäy yja'ty, choon jim Antioquía etz Iconio. Chi ajcxy yajnimay je mayjäy co huen midziptzoongixy Pablo etz Bernabé. Chi mic'amy je mayjäy midziptzoon Pablo etz cögäch ajcxy. Hue' ajcxy tijy ti anajty yaj'öccixy. Chi ajcxy oy ixjugucy cajppa'. ²⁰ Chi je apóstoles ajcxy jübigüy je Pablo, chi je' ypidigy, e ñicxy jadüg'oc cajpjoty. Com jabom Pablo etz Bernabé choon, ñicxy ajcxy jim Derbe.

²¹ Co Pablo etz Bernabé jadu'n capxhuäcxy je Jesucristo y'ayuc oybi jim Derbe, chi mayjäy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio,

etz Antioquía. ²² Jim ajcxy jotmicmigapxy je mibijcpidijc ajcxy, e capxhuijy huen tügjiip mibijccixy Dios y'ayuc, nimaaygixy:

—Co ndigihuaanim ma Dios y'ane'my copicy co nyajnáxim may ayo'n. ²³ Cajp cajp majaty mibijcpidijc yajpaady jim Pablo etz Bernabé yajníbijcy nijējity yēydictijc huen nigohuajc'ajtcixy je jāy ajcxy huidibi mijpidaacp Jesús. Co anajty ti yajníbicy je' ajcxy huidibi nigohuajc'adipy, chi jaygay ajcxy y'ijty etz Dios mibijctzoy mīd je' ajcxy ycixpi.

Pablo mīd Bernabé yhuimbijtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panflia. ²⁵ Chi Pablo etz Bernabé Jesús y'ayuc capxhuācxi jim Perge, chi ajcxy ñicxy jim Atalia. ²⁶ Chi ajcxy jim ybarcotigiiy ñicxcixy jadūgtecy jim Antioquía ma anajty ajcxy ti yajníbigyii Dios chójcín mīd je tung huidibi anajty ti yajcixcixy. ²⁷ Co ajcxy yja'ty jim Antioquía, chi ajcxy huoomujcy je jāy ajcxy huidibi anajty mijpidaacp Jesús, e yajmīdmīydactay tūg'óciy nej anajty Dios ti ytuñ mīd je' ajcxy ycixpi, nej anajty Dios ti yaj'ahuāch je tū'aa nej huaad mibicy ajcxy je huidibi ca' yjudío jāyity. ²⁸ Pablo etz Bernabé ijt ajcxy ooy jim jecy mīd je mibijcpidijc ajcxy.

15

Mibijcpidijc ñayyōymujci ajcxy jim Jerusalén

¹ Je huin'it tiempo nijējity jāy huidi tsoon Judea yja'ty ajcxy jim Antioquía, e ytigiiy yaj'ixpijcp ma ajcxy je huidibi mijpidaacp Jesús, ymīnaangixy: “Pen myajnídzōgamy ajcxy yi m'alma, copicy co ajcxy myajtiy'ajttīhuipy jadu'n nej Moisés y'ane'my.” ² Chi Pablo etz Bernabé ñaymīdzipitzongooti ajcxy mīd huidi anajty ajcxy tzomb jim Judea, e ca' ajcxy ñay'ayuc-huinjihuiyi. Chi jada' yajníbejtī Pablo etz Bernabé etz jacjadyii mibijcpidijc huen nicxy ajcxy Jerusalén yajtiydigiiy ma je apóstoles ajcxy etz huidibi ajcxy nigohuajc'ajt je mibijcpidijc jim Jerusalén.

³ Je mibijcpidijc huidibi anajty ajcxy jim Antioquía oy ajcxy tūjiiphuohuiy Pablo etz je' ajcxy huidi nicx mīd Pablo. Chi Pablo etz mīd yjajmīdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmīdmīydaaccixy je mibijcpidijc cajp cajp jadu'n nej jāy ajcxy huidibi ca' yjudío jāyity ti yjothuimbijtcixy etz yajmīj'adaangixy Dios. E tūg'óciy mibijcpidijc ooy ajcxy jāygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cōbijci je apóstoles ajcxy, etz je' ajcxy huidi nigohuajc'ajtp anajty je mibijcpidijc. Chi Pablo yajmīdmīydactay nej anajty Dios ti ytuñ mīd je' ajcxy. ⁵ Chi nijējity fariseojāy, tiibi anajty mibijccixy Jesús, ytinayīgy ajcxy juntijoty, e ymīnañ ajcxy:

—Copicy co huen yajtiy'ajttīy je jāy huidibi mibijcp Jesús huidi ca' yjudío jāyity, e copicy nyaj'ané'mim co huen ajcxy Moisés ycōtūjcín cuyduuni.

⁶ Chi ñayyōymujci je apóstoles ajcxy etz huidi ajcxy nigohuajc'ajtp je mibijcpidijc, co capxyōyaangixy je fariseojāy y'ayuc nej yhuí'mip. ⁷ Ca' ajcxy tzojc ñay'ayuc-huinjihuiyi, chi Pedro ytinayīgy ymīnañ:

—Migūgtijc, mnejhuiyb ajcxy co jayhuin Dios ti xyhuin'ixyich ma miich ajcxy, jigix nyajnimāhuiybich jāy ajcxy huidibi ca' yjudío jāyity je Jesús ytiy'ajt oybi nej ajcxy y'alma nīdzoocín paadipy. ⁸ E Dios huidi nejhuiyb jāy yjot yhuinma'ñ xyaj'ijxich je tiy'ajt co yejcy Espíritu Santo ma yi' ajcxy nañ tim jadu'n nej ytuuñ ma iich ajt. ⁹ Dios tú'ciy ytuñ mīd iich ajt etz mīd yi' ajcxy, mīd co yi' ajcxy mibicy Jesús paady Dios yajhuaatzi ajcxy yjot yhuinma'ñ. ¹⁰ Jadachambi, ¿nej co ca' mhuinjihuihuaangixy mibigaangixy nej Dios ytuñ mīd huidibi ca' yjudío jāyity? ¿Nej co adzip myajníhuidzaangixy je costumbre huidi ni iich ajt ni n'ap ndeedy ca' ti mīmadāgy nicxy cuydundaaygixy? ¹¹ Janch iich ajt nmibijcim co mīd je may'ajt huidi Jesús ti tuñ mīd iich ajt ycixpi ti nbaatim n'alma nīdzoocín. Nañ

tim jadu'n je' ajcxy huidi mibijc Jesús huidi ca' yjudíoäyity ypaat y'alma nüdzoocin müd je may'ajt huidi Jesús ti tuñ.

¹² Huin'it je jäy ajcxy y'amonday, y'amido'ijtcixy nej Bernabé etz Pablo nimiydaaccixy nej anajty Dios ti tuñ müd yi' ajcxy, jadu'n nej ajcxy ti yajtzögy pa'mjäy müd Dios ymic'ajt, etz jac tijaty mijhuinma'n huidi ti tuñ ma yi' jäy ajcxy huidi ca' yjudíoäyity. ¹³ Co Pablo etz Bernabé ajcxy miydactay, chi Jacobo ymíñañ:

—Migügtijc mido'mbíjcigich ajcxy ich n'ayuc. ¹⁴ Simón Pedro ti xyajmüdmíydaacim nej Dios may'ajt ti tuñ oga'n ma huidibi ca' yjudíoäyity, co huin'ijxy huidi yi' yjäy'adaañip ma yi' ajcxy. ¹⁵ Quipxy jada ñaybadyi müd huidi je Dios y'ayucnajtzcaxhíybi jecy'ajty ycojay, ¹⁶ co jadu'n ymíñañ:

Co anajty jadu'n ti y'ocjadyi, chi nhuimbidiyich ya naaxhuiñ. Nyaj'oyíhuibich jadüg'oc je naax cajp huidi David anajty y'ane'myb huidi anajty ti y'octigooybi jadu'n nej tüg'ijc huidi ti yciday. Ma David y'ap y'oc nyaj'a'oyíhuibich jadüg'oc naax cajp, jadu'n nej jäy ytiyc cojy huinjemybi.

¹⁷ Jigix jacjadyi jäy y'ojadadiy ajcxy yi' Dios. Nañ jadu'n je' ajcxy huidi ca' yjudíoäyity, huidi ich njäy'adaañip.

¹⁸ Jadu'n je Huindzin Dios jécyp jada tiy'ajt jadu'n yejcy.

¹⁹ Chi Jacobo yjacmíñañ:

—Paady ich jadu'n nmíñañich co ca' huaad n'amayíyim ajcxy huidi ca' yjudíoäyity huidi ajcxy ti mijpidägy Dios. ²⁰ Hue' janchtiy tzoc nijayíyim co ajcxy ca' tzüdzipy huidi jäy yajhuindzigíybi ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huidiaty jäy yöc-huidyip, etz ni ca' huaad jicxcixy tijaty iyujc ni'py. ²¹ Jecy'ajty ixti chamni tüg'oc cajp, ji pin ihua'cxp capxhua'cxp Moisés yley majaty nanyöymujctac naag naag pocxinxí.

²² Chi je apóstoles ajcxy etz je huidi nigohuajc'ajt yi' mibijcpidijc, müd tüg'óciy Jesús yjäy pidacy ajcxy yhuinma'n co huin'ixaangixy nijéjity jäy ma je' ajcxy etz quexaangixy jim Antioquía quipxy müd Pablo etz Bernabé. Chi ajcxy yajnibejty Judas, huidi nañ jadu'n yajtiy Barsabás, etz müd Silas, yédyictijc huidi ajcxy capxpaadip. ²³ E je' ajcxy yajmiguejxy necy nej anajty ti jaay: “ích ajcxy apóstoldijc, etz huidi nigohuajc'ajt yi' mibijcpidijc, etz nidüg'óciy mibijcpidijc, cham ich ajcxy nguexy capxpocxin ma ajcxy mibijcpidijc huidi ca' yjudíoäyity huidi ajcxy tzinaayb jim Antioquía, etz huidi ajcxy tzinaayb Siria etz Cilicia ñaaxjot. ²⁴ Ti ich ajcxy nejhuíyich co nijéjity jäy ti xyñiníxcixy, choñ ma ich ajcxy, ca' ich ajcxy ngötujcin mooy, e xy'amayíygixy jim müd y'ayuc, e xyajhuinma'ñytigoya'n ajcxy, co ajcxy xyñimaaygixy co copicy co myajtiy'ajttíhuip ajcxy m'ung, etz mbayöipy ajcxy je Moisés ycötújin. ²⁵ Paady ich ajcxy ti nnaygápíxigixy nidüg'óciy co nyajnibedipyich nijéjity jäy huidi yajpaatp ma ich ajcxy co huen nicxy xy'íjxcixy niguipxy müd nmigügtijcich huidi ooy ndzocyich, je Bernabé etz je Pablo. ²⁶ Je huidi ajcxy yjugy'ajt ti yoxy ti toogy müd ajt nHuindzin Jesucristo ycixpi. ²⁷ E jadu'n yam nguexyich ajcxy Judas etz Silas, e yi' ajcxy ci'm xyajmüdmíydägy tüg'óciy ich ajcxy n'ayuc. ²⁸ Ti je Espíritu Santo huinma'n pidägy ma ich ajcxy nhuinma'n etz ich ajcxy ti nhuinma'n nbidägyich, co ca' nyajnibigipy ajcxy tijaty ayuc tzaachyp, jeyi janchtiy je huidi copícyip. ²⁹ Copicy co ca' ajcxy mdzüdzipy huidi jäy yajhuindzigíybi ídolos, ca' ajcxy ni'py mjíxcixipy, ni ca' ajcxy mdzüdzipy iyujc huidi yöc-huicity ti y'ögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'min, oy anajty mdungixy. E Dios ajcxy xypubedipy xypudigíhuipy.”

³⁰ Jadu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcídigíy ajcxy je necy. ³¹ Co je mibijcpidijc je necy capxy, chi ajcxy ooy yjotcugíy müd je oybi ayuc tíbi anajty ajcxy yajniuguexy. ³² Com Judas etz Silas hue' je' anajty Dios y'ayucnajtzcaxhíybi, paady ajcxy yajjotcugíy jot'amij moy je mibijcpidijc

müid je ayuc. ³³ Jecy ajcxy jim yhuäcxijpy, chi je mibijcpidijc müid ajcxy ycapxycijxy, yajmihuaniiy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhui'ma'ñ. ³⁵ Nañ jadu'n Pablo etz Bernabé ijt ajcxy jim Antioquía, etz müid jac nijëjity ymügügtijc yaj'ixpijc'idüitzcixy etz capxhuäcx'idüitzcixy je Huindzin Jesús y'ayuc ytiy'ajt.

Pablo mîmetz viaje

³⁶ Ti xii tiempo anajty ñajtninixiiyñi co Pablo nimay Bernabé:

—Jam'ajt nmügügtijc co'ixiiyim cajp cajp majaty ti ngapxhuäcxim Huindzin Jesús y'ayuc. Ooy njanejhuihua'ñich nej ajcxy yajpaady. ³⁷ Bernabé ymüid nicxaamy anajty je Juan huidi yajtijp Marcos. ³⁸ E je Pablo ca' a'ixii co müid nicxip Juan, com ti anajty y'ocpuyöydüutibi jim Panfilia, e ca' anajty ti yjacmüidyajtyüyöyii je tung. ³⁹ E ca' ajcxy ñay'ayuc-huinjihuiyi miñ xyipy. Chi Bernabé müidnicxy Marcos e ybarcotigiiy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huidi anajty müid ñicxa'ñ. Chi je mibijcpidijc müid ycapxycijxy, chi chooni ti anajty je mibijcpidijc yajmihuaniiy Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jây huidi anajty yxii Timoteo huidi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpy anajty Jesús. ² Je jây ajcxy huidi yajmij'ajtp Jesús jim Listra etz jim Iconio ooy anajty oy nimiydaaccixy Timoteo. ³ Pablo ooy jatzojcy co Timoteo ycajäymüid'ajti. Chi Pablo yajtiy'ajttiyyi Timoteo, jigix ca' ymijotmädiyb je judíojäy huidi anajty ajcxy jim tzinaayb, com tüg'óciy ajcxy nejhuiy co griegojäy teedy'adyii. ⁴ Cajp cajp ma anajty ajcxy ñaxy yajmüidmiydaaccixy ajcxy je mibijcpidijc je cötujcin huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵ Je' ajcxy huidi yajmij'ajtp Jesús cajp cajp nigi anajty yjotmicpijccixy, etz mijpidaaccixy Dios y'ayuc, etz ñimayiy'idüitzcixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiiy nicx capxhuäcxixy Dios y'ayuc jim Asia ñaaxjot. Paady ajcxy huingdum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuuiy ajcxy co ca' yi' tzocy co jim nícxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëdyjc, huidibi yconaaxity anajty Macedonia, ytinay'ahuuiy ma Pablo yhuinduu, e ycohuaniiy, ñimäyii: “Tun may'ajt nicx jim Macedonia, e jim xypubedipy ñich ajcxy.” ¹⁰ Co Pablo jadu'n huin'ijxy cumäyjoty, chi ñich ajcxy n'ixtay barco huidi nicxamb jim Macedonia. Nhuinjihuiy ñich ajcxy co jim Dios xyquéjxcixyich jigix jim ngapxhuäcxibich Jesucristo ytiy'ajt je oybi nej jëbi ajcxy alma nidzoozin paadipy.

Pablo etz Silas jim Filipos

¹¹ Chi ñich ajcxy nbarcotigiiy jim Troas nicxy ñich ajcxy tiyyi ma naax mejy'agujcpi huidibi anajty yxii Samotracia. Chi com jabom ajcxy nja'tyich jim Neápolis. ¹² Co ñich ajcxy jim ndzooñ, chi ñich ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim ñich ajcxy nhuäcxijpy jecy. ¹³ Tüg sábado nicxy ñich ajcxy cajppa', mihuingon tüg mijni, ma anajty judíojäy ajcxy müidity Dios ojadajtac. Chi ñich ajcxy n'ixtacy jim, e ngapxhuäcxich ajcxy Jesús y'ayuc ma je töxyjädyjc ajcxy huidi jim anajty ajcxy ti yöymujccixy. ¹⁴ Je Lidia anajty y'amido'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios,

e je Huindzin Dios yajyungüy yjot yhuinma'ñ, jigix amido'idipy nej Pablo Dios y'ayuc capxhuäcxi. ¹⁵ Je Lidia nübejt müd tüg'óciy yjuugy ymígü, chi ñich ajcxy xychuanüy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ñich ndijc.

Chi ooy xychuanüy ñich ajcxy, ixti cooni jim xyajhui'myich ajcxy.

¹⁶ Jadu'n yjajti tüg tecz co ñich ajcxy anajty ñicxy ma Dios ojadajtac, chi ñich ajcxy nbaty tüg tumbi töxy'anäg mañ'ajt müdpi huidi ooy ytiygapxy. Ymüid anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy yminañ:

—Jada yëydijc Dios tzajpjotipi ajcxy ymidumyb. Capxhuäcxi ajcxy Dios y'ayuc jadu'n nej jëbi ñich ajt n'alma nüdzoocin paady.

¹⁸ Canaag xii jadu'n ñich ajcxy xychach'amayüy. Co Pablo chipin, chi yhuäc-huimbijty nimay je mañ'ajtmüdpi:

—Müid Jesucristo yxii n'ane'myich, pidzim ma jada töxy'anäg.

Tim huin'itüy je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi müid je' ycixpi ajcxy majch Pablo etz Silas, e yajnicxy ajcxy ma je tungmüdpi ma je' ajcxy y'agujctijc. ²⁰ Co ajcxy jiiby müdja'ty ma je tungmüdpi, chi yminañ:

—Jada yëydijc ajcxy judíojäy jada, nigoo ajcxy ñaax yajmäty ycajp yajmäty, ²¹ etz yaj'ixpiy ajcxy costumbre huidi ca' huaad ñich ajt ngöbïjim, e nihuaad ngatuunim, com hue' ñich ajt romanojäy.

²² Chi je mayjäy ajcxy müddziptzoon Pablo etz Silas, e je tungmüdpi ni'ane'mdiy co huen ajcxy yajnïjeñ yaj'ixjeñ huen yajhuojpcixy müd matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon. ²⁴ Co je pujxtijc huindzin ypaati je cötujcin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huidi yxii cepo.

²⁵ Chi jadu'n yjajty mijcuctz anajty, co Pablo etz Silas chach Dios ojadajtciy chach huin'igixy yi Dios, e jacjadyii machyjäy chach amido'o'ijtcixy. ²⁶ Chi timitiini ujx huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy. ²⁷ Chi oy ymähuiy je pujxtijc huindzin. Co jadu'n ijxy ac'ahuädz pujxtijc aguu, chi yajpidzimy y'espada ñayyaj'öga'ñyü anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnyaduuni, cheeby ajcxy nidüg'óciy.

²⁹ Chi je pujxtijc huindzin pijctzoy jin, e ytiüy poyigy pujxtigoty, janch tziyuuyb müd tzig'iñ. Chi ycoxtinay'ahuüy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, ¿ti ñich jëbi nduñ jigix nüdzoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nüdzoocin, miich etz m'ungdöxyijc.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytiyc. ³³ Mijcuctz je pujxtijc huindzin puji je Pablo ajcxy chaach'au, e chi je pujxtijc huindzin nübejttay ajcxy müd y'ung ytöxyijc. ³⁴ Chi je pujxtijc huindzin yajnicxy Pablo etz Silas ma ytiyc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mijtungmüdpi quejxy mutztungmüdpi jim ma pujxtijc huindzin müd cötujcin huen najtzmazdygyxy Pablo etz Silas. ³⁶ Chi je pujxtijc huindzin nimay Pablo:

—Ti je tungmüdpi quexy cötujcin co jëbi nnajtzmazdyich miich ajcxy. Nicxcix jotcujc.

³⁷ Chi Pablo migapxy je mutztungmüdpi, e chi nimay:

—Romanojäy ñich ajcxy. Yi cajptungmüdpi ti xyhuopyich müd matz mayjäy agujc, ni ca' jayijp ti xytidyduñich, e ti xypidägyich pujxtigoty. ¿Nej co jadachambi

xyñajtzmadziñhua'ñich ameechi? Ca' jadu'n y'óyity. Huen mijtungmüdpí ci'm müñ xyajpidzimgixich ñich ajcxy.

³⁸ Chi je mutztungmüdpí cijx nimíydactäy ma mijtungmüdpí tüg'óciy Pablo y'ayuc. Chi ajcxy ñay'adzigüy co nejhüy co Pablo etz Silas hue' je' anajty ajcxy romanojáy. ³⁹ Chi je mijtungmüdpí ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum ñíxcixni. ⁴⁰ Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñíxcixni.

17

Jim Tesalónica yjajti ooy capxy ayuc, ca' nay'ayuc-huinjihuñhuñ

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíoáy ajcxy tüg ñaymujctac. ² Com jadu'n anajty costumbre müdity, Pablo ñicxp anajty ma judíoáy ajcxy ñaymujctac sábado xü. E tugüg sábado xü jim capxy müydacy müd je' jim Tesalónica. ³ Hue' anajty müd müydaaccixy jadu'n nej jaybecyity ma Dios ñecy co Cristo copicy ayo'n yajnaxtähuip, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijëjity judíoáy ymibijc ajcxy e mijyöybejty ajcxy Pablo etz Silas. Nañ jadu'n may griegojáy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵ Je judíoáy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmüdpí. Yam chachmínaangixy mic:

—Jada jäy ajcxy je' huidi tzachyajhuinma'ñyidgooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy müddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumigy yaj'oxigy cajpjäy etz je tungmüdpí ajcxy.

⁹ Chi Jasón etz ymügügtijc yajmeeñeyjcy, chi najtzmadziñy ajcxy.

Pablo etz Silas jim Berea

¹⁰ Co oy ycodziñ mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíoáy ñaymujctac. ¹¹ Jim Berea judíoáy ajcxy yjacmüd oyjot oyhuinma'ñ, ca'ydi judíoáy ajcxy jim Tesalónica. Je Berea jäy ajcxy ycöbijc ajcxy Jesús y'ayuc ymüd oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹² May judíoáy ymibijcy etz may griegojáy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judíoáy jim Tesalónica nejhüy co Pablo nañ jadu'n Dios y'ayuc capxhuäcxí jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen ñicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymüd'ajt ymüdnicxy, müd ñicxy ajcxy ixti cooni yja'ty jim Atenas. Huin'it ajcxy yhuimbijty müd tüg ayuc co huen Timoteo etz Silas ñicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhüy co je cajp müd ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimíydacy Jesús ma yi judíoáy ñaymujctac müd je judíoáy etz jacjadyii jäy huidi Dios miyaaxp ojadaajtp. E jabom jabom müd müydaaccixy pinjaty y'oymujcp cajp cujc. ¹⁸ Nijëjity ixpijctijc ñay'ijxquípaxigixy y'ixpijcin müd Pablo. Jim

huidibi ni'ixpigiiyb epicúreo xpijcin, etz cham huidi ni'ixpigiiyb estoico xpijcin. Chi ajcxy nijëjity ymînaangixy:

—¿Ti jada jada' ajt xyajnimaaayim jada yëydijc capxymaaybi?

Chi jadyii ymînaangixy:

—Hue' jada ycapxhuäcxyp huingbi dios y'ayuc.

Jadu'n ajcxy ymînañ co Pablo nimiydacy Jesús etz jadu'n nej jäy yjugypicy huidijaty ti y'öccixyp. ¹⁹ Chi ajcxy müdnicy Pablo ma je it ma je xpijtyijc ñaymugyii huidi anajty yxii Areópago, chi ajcxy Pablo nimay:

—¿Nej jëbi njäjtciyxich jada jemybi xpijcin huidi miich mmimimb? ²⁰ Com ti ñich miich xyajnimaaaygich ayuc ca'pi yhuinjihuiyñity, e nejhuihuaamyich ajcxy nej yhuimbizimiy tüg'óciy jada ayuc.

²¹ Tüg'óciy Atenas jäy etz nañ jadu'n huidi ajcxy jim adzinaayb, ca' anajty ni ti tungixy, jëyi nigoobi amido'ijtcixy etz miydaaccixy jemybi ayuc tiy'ajt.

²² Huin'it Pablo ytinayigy mayjäy agujc jim Areópago, e ymînañ:

—Atenas jäy, n'ixypich co miich ajcxy ooy myajmij'ajtcixy canaagnax huidibi miich ajcxy mdios'ajtpy. ²³ Com ti xii ya n'ixyich canaagnax huidi ajcxy m'ojadaajtpy, chi ti nbaatyich tüg altar ma jadu'n yaayity: “Je Dios huidi ca' pin ix'yadyii.” Je Dios huidi miich ajcxy m'ojadaajtpy, e ca' ajcxy m'ixy'adyii, jada je' huidi nyajnimaaayb ajcxy.

²⁴ Je Dios huidi oyduñ naaxhuiñybi etz tzajp etz jac tijaty, yi' je' nihuindzin'ajttayb tüg'óciy. Je Dios ca' chinäy ma tzajptijc huidi jäy ajcxy cojpy. ²⁵ Dios ca' ni ti yajtigoy'ity huidi naaxhuiñyjäy jamöhuaanip. Dios yi' yejcp jugy'ajtin etz huidibi nxejim, etz tüg'óciy tijaty.

²⁶ E tügpî ni'py tügpî jot ti yaj'oyi y tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xii tiempo yöyipy, e ma jäy jëbi huaad chinaaygixy,

²⁷ jigix ixtaaygixipy Dios, jadu'n nej jihuüy ixtaaygixy tondäy xajtäy, com ca' je' jiguemity ma ñich ajt nidüg nidüg. ²⁸ Dios yci xpi ñich ajt ndzinaayim nyücxim etz nji'ajtim,

com jadu'n mînañ miich ajcxy mboeta, huidibi ñiy yajcojp: “Dios ñich ajt xy'ung'ajtim xy'anäg'ajtim.” ²⁹ Pen Dios ñich ajt xy'ap'ajt xy'oc'ajtim ca' huaad nhuinma'ñ nbidaacim co Dios yjadu'ñity nej oorî oyduñ, plata oyduñ, etz tzaadzech quipychech huidi jäy ti yaj'oyi müd yci'mhuinma'ñ.

³⁰ Dios ca' müdity jotcöduuyb je jäy chuuhuinma'ñ tibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy.

³¹ Com ti Dios yajnihuinmayi y tüg xii mîna tiyduna'ñ yi naaxhuiñybi jäy müd je yëydijc huidibi ti huin'ixy, jada tiy'ajt Dios ti yaj'ixy yajnejhuüy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytigiy nixiicpi yajxiicpi. Chi jacjadyii ymînaangixy:

—Huaad ñich ajcxy n'amido'idipyich miich m'ayuc mîna anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huidibi anajty yxii Dionisio, yi' je' anajty tungmüd jim Areópago. Nañ jadu'n tüg töxyjäy huidi anajty yxii Dámaris ypadzooni, etz jacjadyii jäy.

18

Chi Pablo ñicxy jim Corinto

¹ Co jada jadu'n ytuni yjajti, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxii Aquila, Ponto anajty ycogajpity, namja'tni anajty müd ytöxyijc Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyii,

com nañ cochactijcxuuyb anajty Pablo, paady Pablo jim yhui'my mïd je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíoäy ajcxy ñaymujctac yajmïdmiydaaccixy Jesús y'ayuc ytiy'ajt etz capxjotcidaaccixy judíoäy etz nañ huidi ca' yjudíoäyity.

⁵ Co ajcxy Silas etz Timoteo yja'ty jim Corinto, chooñ ajcxy Macedonia, chi Pablo adügiijp ytiigi ayuccapxhuäcxpi ma judíoäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíoäy ajcxy ytiigi jotma'tpi, tzipcapxpi ahua'ngapxpi. Chi Pablo yhuít huinxiy, je' je' je tiy'ajt co puyöydüdaani ajcxy, e chi Pablo ymïnañ:

—Miich ajcxy mïd mgi'mbocy ajcxy myajtigoya'ñ yi m'alma. ñich ca' ti pocy nmïdidyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíoäyity ajcxy.

⁷ Chi Pablo yöybojtni ma judíoäy naymujctac, chi ñicxy ma Justo ytiç. Justo ooy anajty Dios miyäxy ojadaty, e ymïd anajty ytiç mihuingon je judíoäy ñaymujctac. ⁸ E Crispo, je judíoäy ñaymujctac huindzin, ymibijc je' je Huindzin Jesús y'ayuc ytiy'ajt, mïd tüg'óciy y'ung y'anäg, yjuugy ymüg. Nañ jadu'n nijëjity Corinto jäy co midoy Jesús y'ayuc, chi mibijcy e ñibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigí, capxhuäcx'aditz n'ayucich, e ca' mni'amoñ. ¹⁰ Com ñich miich nbubedipy, ca' pin jot mïd'adipy nicxy nejaty xytuñ. ñich may ñich ya nmïdity jäy ma jada cajp.

¹¹ Chi Pablo yhui'my jim Corinto tüg jimajt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíoäy ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yëdyjc tzach jäy yaj'ixpijcp co ca' ycopicyity yajcuydunipy Moisés ycötujcin huidi jaybety ijtp.

¹⁴ Pablo capxamb anajty co oy yi Galión nimäy ajcxy je judíoäy:

—Pen yi Pablo ti ytundigooy o mijpocy ti tuñ, huin'it nmijpidägiibich miich ajcxy m'ayuc, miich ajcxy judíoäy. ¹⁵ Pen je Cristo y'ayuc etz miich ajcxy mgötujcin myajtibiyb myajcapxyiyb, ca' ñich huaad nyajtiyiyich yjiibi huinma'ñ.

¹⁶ Chi je gobernador y'ané'min pidacy co huen judíoäy ajcxy yajpidzimäyii ma je cötujctac. ¹⁷ Huin'it tüg'óciy griegoäy ma je cötujctac huijtzpidziimyb je Sóstenes, yi judíoäy naymujctac huindzin, e chi ajcxy cujy jibijpy huingojxy jipcojxy ma gobernador yhuinduu, e Galión ca' tuñyuenti.

Pablo yhuimbijtni Antioquía, e yajtzondacy midugigpi viaje

¹⁸ Jac-huäcxijp Pablo jecy jim Corinto. Chi yhuinma'ñypidacy co chonaani. Chi ycapxycijxni mïd je mibijcpidijc, e chi ybarcotigiyyi ñicxni jim Siria ñaaxjot. Ñicxni quipxyi mïd Priscila etz Aquila. Jim Cencrea, ca'ni anajty ybarcotigiyyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy mïd Priscila etz Aquila, e ñicxy ma je judíoäy ajcxy ñaymujctac. Chi mïdmiydacy je judíoäy ajcxy huidi jim anajty ti ñayyöymújigixy. ²⁰ Chi je judíoäy ajcxy jim Efeso cohuaniiy co huen jac-hui'my, e Pablo ca' a'ixiiy co yhui'mipy. ²¹ Chi Pablo ycapxycijxni mïd je Efeso jäy, chi ymïnañ:

—Copicy co jim xii nyajnaxa'ñyich Jerusalén, e nhuimbidipyich jadüg'oc ma miich ajcxy, pen Dios jadu'n tzojcp.

Chi Pablo ybarcotigiyy chooni jim Efeso. ²² Co anajty ti ypättigiy jim Cesarea, Pablo nicxy Jerusalén co anajty capxpocxaangixy je mibijcpidijc, chi mic'amy idaacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxí jim Efeso

²⁴ Huin'it tiempo yja'ty jim Efeso tög jäh huiði anajty yxii Apolos, hue' anajty ycoğápity Alejandría. Ooy anajty oy ayuc capxhuäcxy. E yajxon nejhuiydäy Dios y'ayuc huiði jaybety ijp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yjajty y'ayoy. Oy jëda'ajty anajty janejhuü nej Juan, je Bautista, jäh ajcxy yajniibejty. ²⁶ Chi Apolos ytigü capxpi miydaacpi ma je judíojäy ajcxy ñaymujctac janch ni ca' chigü chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuinguic, chi ajcxy oy yajmiidmiydägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayü je mibijcpidijc huiði ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpizimay mayjäy agujc co ca' yjanchity nej anajty ajcxy judíojäy yhuinma'ñ miidity, co Jesús ca' je' yjëjity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huiði anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigü xyjottigü je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi ich ajcxy pen ji Espíritu Santo.

³ Chi Pablo y'amidooy ajcxy:

—¿Ti niibejtin miich ajcxy mbaad?

Chi je' ajcxy y'adzooy:

—Je Juan, je Bautista, niibejtin.

⁴ Chi Pablo yminañ:

—Juan jäh yajniibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huiði jacmiinamni. Je' je' je Jesús, je Cristo.

⁵ Co jada ajcxy jadu'n midoy, chi ajcxy oy niibety miid je Huindzin Jesús yxii. ⁶ E co Pablo cñixajy ajcxy, huin'it je Espíritu Santo y'adigü yjottigü ajcxy. Chi ajcxy ytigü capxpi miydaacpi tigachyaty ayuc, e capxhuäcxy anajty ajcxy Dios y'ayuc. ⁷ Jëyi anajty nimajmetz yëdjictijc huiðibi ajcxy niibejt.

⁸ Tugü po' Pablo jim yhuäcxijpy, e yöydiib anajty ma judíojäy ajcxy ñaymujctac capxhuäcxy Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt.

⁹ Nijëjity jotjuuñydijc ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jäh ajcxy yhuinduu. Chi Pablo puyöydúutcxni. Chi abicy yajnicxy je mibijcpidijc ma tög escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tög'óciy jäh ma je Asia ñaaxjot ymidoday ajcxy je Huindzin Jesús y'ayuc, je judíojäy etz huiði ca' yjudíojäyity.

¹¹ E Pablo mayba'mjäy yajtzoocy miid Dios ymic'ajt etz ooy mijhuinma'ñ ytuñ. ¹² Ixti yajnicxy anajty ajcxy yhuic etz ypaayi huiði Pablo ñinix anajty ti ypanyi, e yajpaatcixy anajty pa'mjäy, e je' anajty miid chooccixy, e nañ je' anajty miid ca'oybi ypidzimay ma jäh ajcxy y'ay yjot.

¹³ Chi nijëjity judíojäy huiði anajty huiðijtp tzoymdumbi, huiðibi anajty yajpidzimgixyp ajcxy ca'oybi, jayajtzögaañ tög pa'mjäy miid je Huindzin Jesús yxii co huen yajyöydüdyi je ca'oybi. Chi ajcxy nimaaygixy je ca'oybi:

—Ich miich yam nimaayb miid Jesús yxii, je huiði Pablo ycapxhuäcxp, yajyöydüt jada jäh.

¹⁴ Jadu'n anajty y'iditczixy je Esceva ymang ajcxy, je nihiuxtujcpi ajcxy. Je Esceva hue' je' anajty judíojäy etz nihiundzin'aty teedy'adi. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuiybich pin je' Pablo, e miich ajcxy, ¿mbin miich ajcxy?

¹⁶ Chi je yëydijc huidi ca'oybi anajty müd, ytiycpiy tüg ma je' ajcxy, ymimadactay je nihiuxtujcpi, e yqueectay ajcxy ma je tijc nihuädz ixhuädz etz tzaachí. ¹⁷ Tüg'óciy jäy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuiyday ajcxy, chi ooy ajcxy chigiy e nimiydaaccixy e cömaaygixy je Huindzin Jesús yxi.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'itcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguipx majc mil plata meen (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindzin Jesús y'ayuc nig anajty yhuäcx'idich, nig ymijtigiy'idich.

²¹ Co anajty jadu'n ti ytuñyi ti yjadyi, chi Pablo yhuinma'ñypidacy co nicxy co-gapxihuañ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuihui jim Efeso müd Dios y'ayuc ycixpi

²³ Huin'it tiempo tzip oy pidicni jäy y'ocyumigni y'oc'oxigni müd Huindzin Jesús y'ayuc ycixpi. ²⁴ Co je', je plateri huidi anajty yxi Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyi jäy oy ymeeñybaatcixy müd je ytung. ²⁵ Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuiyb ajcxy co müd jadayaabi tung huidi ich ajt nduunim, jada müd jotcuyc ndzinaayim njugy'ajtim. ²⁶ E miich ajcxy m'ixpy mnejhuiyb co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaay Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ich ajt n'adogii e nañ jadu'n je mijpi dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytigiy ajcxy huambi jihuiyb, chachminaangixy:

—¿Cömay jada Diana, yi efesiojäy ydiosa!

²⁹ Chi ajcxy yajhuinmäñydgoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymüd huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujtijc huinduu ma jäy ñaymugyii. ³⁰ Chi Pablo yjatigihuañ jäy agujc, müdcapxa'ñ müdmidyäga'ñ anajty je mayjäy. E je mibijcpidijc ca' ajcxy a'ixiy nicxy jiiy ytigiy. ³¹ Nañ jadu'n nijëjity Asia mijtungmüdpí huidi anajty Pablo müd ñaymigüg'adyi, yajnigiejxy ayuc, co ca' huaad ñicxy ma jäy ñaymúcgixy. ³² Je mayjäy tügmucy anajty itcixy, ooy anajty yhuaangixy yjihuiygixy, ca' anajty ajcxy ñay'ayuc-huinjihuiygixy. E je jacmaaybi ni ca' anajty nejhuiygixy ti co chachnaymúcgixy. ³³ Nijëjity jäy huidibi anajty ajcxy mayjäy agujc, je ajcxy yajmüdmidyactay je Alejandro ti anajty tuunip jajtíp. Chi je judío jäy ajcxy tijpidzimy je Alejandro ma mayjäy agujc. Chi Alejandro címüd tiy'ajt yejcy co huen amongixy. Je' anajty ñigapxtüdamy judíojäy ajcxy. ³⁴ Co je mayjäy nejhuiy co je' je' yjudíojäyity, chi ajcxy ytigiy huaambi jihuiybi jahueenjaty ycamejtzhority, yminaangixy:

—¿Cömay ooy yi Diana, yi Efeso jäy ydiosa!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñjáy nejhuíy co jada Efeso cajp yi' cuend'ajtp yi Diana chajptijc, je' Diana huidi ooy ti yajcōmay, etz yi Diana ñinícx huidi cá'u tzajpcíxy. ³⁶ Ca' huaad ni pin ymína'ñ co ca' yjáncity. Amongix, ca' ti mdúngixipy pen ca' jayijp yajxon mhuinmaaygixy. ³⁷ Com jada yëydijc ajcxy tiibi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huidijaty miid ytuñ pen ymiid xihuín miid pinjaty, paady tungmiidpi etz tiydundac jiiijity. Jëbi nigapxy ma tungmiidpi, jëbi miñ xyipy ñayñigapxtúutigixy. ³⁹ E pen huingbi ayuc huidi miich ajcxy mbijctzooyb, copity jada y'oyihuipy ma jäy naymugyíi. ⁴⁰ Ymiid jada ayo'n co nicxy nayyajxihuim co jäy cham ñaymihuídidiyíi miid jada ycixpi nej yam ytunyíi yjadyíi e ni ti tiy'ajt iich ajt nganejhuíyíi nej nmínaaním pen ji anajty xyaj'amídoohuim miid co jäy cham chachhuaangixy chachjihuíygixy.

⁴¹ Co jadu'n miydactay, chi ycapxycijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugüig po'. Jim Grecia Pablo anajty ybarcotigíhua'ñ ñicxa'ñ Siria. Co Pablo oy nejhuíy co judíojäy ajcxy ti yajnihuinmayíyíi yaj'öga'ñyíi barcojoty, chi yhuinma'ñybaty co huimbida'ñ tegyi'm, ñaxa'ñ jadüg'oc Macedonia. ⁴ Pablo mayjäy miid ñicxy, miidnicxy je Sópater huidi anajty cogajp Berea, etz Aristarco, etz Segundo huidi anajty cogajp Tesalónica, etz Gayo huidi anajty cogajp Derbe, etz Timoteo, etz nañ jadu'n Tíquico, etz Trófimo huidi tzoón jim Asia ñaaxjot. ⁵ Co jada mibijcpidijc ajcxy ñicxy jayijp, chi ajcxy xy'ahuijxyich jim ma je cajp huidi xíi Troas. ⁶ Co xíi ñajxtay mína yajcaay je tzajcaagy je huidi ca' miidity levadura, chi iich ajcxy ndzooni jim Filipos barcojoty. Co migoox xíini, oy iich ajcxy naybáatigixy jim Troas. Jim iich ajcxy yhuäcxijpy huixtujc xíi.

Pablo co'ixiy je mibijcpidijc jim Troas

⁷ Domingo xíi ajcxy ñayyöymujci je mibijcpidijc chajcaagy ytujc-huäcxaangixy, e Pablo anajty ymigügtijc yjacyaj'ixpijcy. Je' co anajty com jabom chonaani, paady oy ayuc jacyajyoñ ixti ycujc-hua'cxchumiíy. ⁸ Jiiby anajty canaag lámpara ytíicxy ma ajcxy anajty ti yöymujccixy ma tüg cuarto huidi anajty oy ycixity. ⁹ E tüg yeeg'anäg huidi anajty yxíi Eutico, ma ventana aguú anajty y'íñäy. Com Pablo jecy oy yaj'ixpijcy, chi je yeeg'anäg ymäymajtzi, e tugüig ñihuijtzpety anajty ycixity je tijc ma ycäy. Chi ajcxy yajpidigý ögy. ¹⁰ Co Pablo yminajcy, chi ñaygíxnajaji amíneenmujcy je yeeg'anäg huidi anajty ti ycäy. Chi Pablo nimay ymigügtijc:

—Ca' mdzigíygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xímíyñ. Chi ycapxycijxni miid je' ajcxy, chi ñicxni. ¹² E je yeeg'anäg huidi anajty ti ycäy, chi ajcxy yajnicxy juugy, e ooy ajcxy yjotcugíy nidüg'óciy.

Choñ ajcxy Troas ñicxcixy Mileto

¹³ Chi iich ajcxy jayijp nicxígy barcojoty jim Asón co anajty jim nyajtzonáangixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴ Co iich ajcxy naybaatti jim Asón, chi Pablo ybarcotigíy miid iich ajcxy. Chi iich ajcxy ñicxy jim Mitilene. ¹⁵ Chi iich ajcxy jim ndzoñ, chi com jabom iich ajcxy najxy mihuigon Quío, comaax iich ajcxy nja'ty jim ma barco jättac huidi anajty yxíi Samos. Jim Trogilio iich ajcxy nbocxy, com jabom iich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso

co ca' yhuäcxiba'ñ jím Asia ñaaxjot, com tzojc anajty yjáda'ñ Jerusalén, com jím anajty vajnaxa'ñ Pentecostés xii.

Pablo yajmüdmüydacy je huidibi ajcxy ane'mb je mübijcpüdiyc

¹⁷ Jím Mileto anajty Pablo, chi capxyñiguejxy huidi ajcxy nigohuajc'ajtp je mübijcpüdiyc huidi ajcxy jím Efeso. ¹⁸ E co ajcxy müñ, chi Pablo ymínañ:

—Miich ajcxy mnejhuüyb jadu'n nej üch ti njäy'atyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy üch ooy ti n'ityich müd miich ajcxy, nduñich ma nHuindzin Jesús ytung müd yung naxy njot nhuinma'ñich, etz müd huinnü jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huidi oyip müd miich ajcxy ycixpi. Ti nyaj'ixpicxyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huidi ca' yjudíojäyity. Nnimaydaayich co huen jothuimbijtcixy ma Dios, etz huen mübijccixy üch ajt nHuindzin Jesucristo. ²² Jadachambi nicxpich jím Jerusalén; adzip je Espíritu Santo xyquexyich e ni nganejhüiyich ti üch jím xyjadamy. ²³ Co üch cajp cajp ma nnicxyich, je Espíritu Santo xyajnejhuüybich co jím Jerusalén jäy ajcxy xypüäga'ñich pujxtigoty etz jím ajcxy xychaachytuna'ñich. ²⁴ Yi jadu'mbü ayuc ca' üch nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcuyc, e nguydunipyich je Huindzin Jesús y'ayuc, je tübi xyajnübicyich jada tung. Ngapxhuäcxibich yi oybü Jesucristo y'ayuc ytiy'ajt jadu'n nej Dios may'ajt ti tuñ müd jäy ajcxy ycixpi.

²⁵ E jadachambi nnejhuüybich co miich ajcxy ma ti ngapxhuäcxxyich Dios y'ayuc, ca' miich ajcxy xy'ocjac'íxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuüpyich müd miich ajcxy ycixpi. ²⁷ Com ti ngapxhuäcxxyich ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huidi yajmü'ajtp je Huindzin Jesús, jadu'n ajcxy nipaady nej tügüicy cöbixy, etz miich ajcxy huidi nigohuajc'ajtp je mübijcpüdiyc jadu'n miich ajcxy nipaady nej cöbixy cuend'ajtpi. Je Espíritu Santo ti xyajnübíccixy co mgüend'adipy ajcxy yi Jesús yjäy, huidi ti cojuuy ajcxy ypocy müd yci'mni'py co y'o'cy.

²⁹ Chi Pablo yjacmínañ:

—Nejhüüybich co ya ndzóonibich miinip huingbü jäy huidi yajhuinma'ñyigoyam mübijcpüdiyc, jadu'n nej ahua'n iyujc huidi cöbixy tzüdzip. ³⁰ Ji ma miich ajcxy ji jäy yaj'ixpigam anü ma yjapadyii yaj'ixpigipy tiy'ajt oybü jigix yi mübijcpüdiyc ypanicxüyb. ³¹ Naygüend'ájtigix, mjäymedziüyb ajcxy jadu'n nej üch tugüig jímüjt ti nyaj'ixpicxyich xim tzuum jabom jabom, müd huinnü jotmay ti nyaj'ixpijccixy miich ajcxy nidüg nidüg.

³² Jadachambi üch, nmigügtijcix ajcxy, Dios miich ajcxy nyajpuhuanüyb, nyajmihui'maamyich miich ajcxy Dios y'ayuc jadu'n nej Dios ajt xychojcm xyjihüiyim. Ma Dios y'ayuc miich ajcxy mbaadipy mic'ajt ma yi mübijcín, e mbaadipy ajcxy it lugar ma Dios quipxyi müd ajcxy nidüg'óciy tübi yajhuäch yjot yhuinma'ñ. ³³ Ni ti üch ti nga'adzocy, ni pin yhuit ymeeñ huidibi n'ocjediüybich. ³⁴ Miich ajcxy mnejhuüyb co ti nduñich, müd ngi'mgüjich ci'm ti nnaymöyüijich huidi nyajmayajtpyich etz nañ jadu'n ti nbubetyich nmigügtijcix huidi üch anajty nmüd. ³⁵ Üch miich ajcxy ti nyajni'ixüygixy nej jëbi mdungixy, nej jëbi mbubéjtcixy migügtijc huidi pa'm'ijtp, etz huidi tijaty yajmayajtp. Jäymedziü ajcxy je Huindzin Dios y'ayuc co ymínañ: “Jacjotcuyc je' huidi yejcp, ca'ydi huidibi yajmooyb.”

³⁶ Co jadu'n ycapxtay, chi Pablo ycoxtinay'ahuüy müd je' ajcxy, e mübijctzoy ajcxy Dios. ³⁷ Ytigüy ajcxy yaaxpi nidüg'óciy, e mineeñ ajcxy Pablo etz tzücxxy. ³⁸ Ooy ajcxy jihüüy nej anajty ti ñimáayigixy ajcxy co ca' yjac'ixüyb ajcxy jadügtecy. Chi ajcxy oy najtzhuhuüy jím ma barco.

21

Pablo ñicxy jim Jerusalén

¹ Co ñich ajcxy ngapxycijxy müd je mibijcpidijc, chi ñich ajcxy nbarcotigüy, tüyi nicxy ñich ajcxy jim Cos. Com jabom ndzooñich Cos nicxy ñich ajcxy jim Rodas. Chi ñich ajcxy ndzooñ Rodas nicx ñich ajcxy jim Pátara. ² Jim Pátara ñich ajcxy nbaaty tüg barco huidi anajty najxp Fenicia ñaaxjot. Jim ñich ajcxy nbarcotigüy jadüg'oc, chi ñich ajcxy nnicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñich ajcxy Siria ñaaxjot, chi je barco ytigüy ma yjättac jim Tiro co jim anajty chimydajc yajhuüma'ñ. ⁴ Jim ñich ajcxy nbaty jäy huidi anajty yajmij'ajtp Jesús, chi nmüdhuaäcxijpich ajcxy huixtujc xii. Je' ajcxy je Espíritu Santo yajnejhuiyi co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xii yca'pxy, chi ñich ajcxy ndzooni. E tüg'óciy mibijcpidijc müd y'ung ytöxyijc oy xytüjijphuohüygixyich cajppa'. Jim ma mejypa' ngoxtinay'ahuiy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigüyñi ñich ajcxy e je mibijcpidijc yhuimbijtni ajcxy ma ytiyc.

⁷ Co ñich ajcxy ndzooñ Tiro, chi nicxy ñich ajcxy Tolemaida. Jim ñich ajcxy ngapxpocxich je huidi anajty ajcxy mijpidaacp Jesús, e nmüdhui'my ñich ajcxy jim tüg xii. ⁸ Com jabom ñich ajcxy ndzooñ Tolemaida müd Pablo etz pinjaty ñich ajcxy anajty nmüd. Chi ñich ajcxy nja'ty jim Cesarea. E chi ñich ajcxy nicx ma Felipe ytiyc, je huidibi anajty capxhuäcxy Jesucristo ytiy'ajt je oybi. Je' je' huidi tuun je nihiixtujcpi taabi ajcxy caayin uucin yajhuäcxy jim Jerusalén oga'n. Chi ñich ajcxy nhui'my müd je'. ⁹ Felipe midaax anajty ñiix müdity, ca'ni anajty ajcxy ypijccixy. E je' ñiix ajcxy anajty Dios y'ayucnajtzcaxiipy. ¹⁰ Ti anajty ñich ajcxy jim nhuäcxiy canaag xii co oy yjätty tüg ayucnajtzcaxiyybi huidi anajty yxi Agabo, jim anajty ti chooñ Judea. ¹¹ Chi Agabo y'oy xycogapxiygixy ma ñich ajcxy njättac. Chi Agabo Pablo yhuin huijtz'icci, e je' müd ñaygixojtz ñaydecyxoxtzi, chi yminañ:

—Je Espíritu Santo jadu'n minamb co jim Jerusalén jadu'n judíojäy ajcxy cixodza'ñ tecyxodza'ñ jada huin yhuindzin, e nañ ciyega'ñ ajcxy ma huidi ca' yjudíojäyity.

¹² Co jadu'n yajmidoy, ñich ajcxy etz je Cesarea jäy ngohuanüy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy müd ñich ycixpi? ¿Nej ñich miich ajcxy co njot nhuinma'ñ xyaj'amutzciyi? ñich nayyəcibich müd naygixodzii naydecyxodzii, nañ jebi n'ögibich jim Jerusalén müd je Huindzin Jesús ycixpi.

¹⁴ Co ca' ñich ajcxy mimadacy nicxy nyajhui'mgixyich Pablo, chi ñich ajcxy n'amooni, chi ñich ajcxy ñayñimaayi:

—Huen cuyduñ je Huindzin Jesús chojcín.

¹⁵ Co jadu'n yjajti, chi ñich ajcxy ndzonii ni'ixüy e chi ñich ajcxy nicxy jim Jerusalén.

¹⁶ Müd nicxy ñich ajcxy nijējity mibijcpidijc huidi tzoon Cesarea, e nañ tzoon anajty tüg Chipre jäy huidi anajty yxi Mnasón, jecyip anajty jijptigüyñi jada mibijcín e je' ñich ajcxy nicxy xyajjättägaangixy.

Pablo oy cogapxiy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcy janch jotcujc. ¹⁸ Com jabom ñich ajcxy nicxy müd Pablo, y'oy ñich ajcxy ngogapxiy Jacobo, e jim anajty tüg'óciy huidi nigohuajc'ajtp je mibijcpidijc. ¹⁹ Chi Pablo ymigügtijc capxpocxy, e yajmüdmıydacy ti anajty Dios ti tuñ müd yi' ma yi jäy ajcxy huidi ca' yjudíojäyity. ²⁰ Co ajcxy jadu'n midooy, chi ajcxy huin'üy jäymejch yi Dios, chi ajcxy Pablo nimay:

—Migüg Pablo, miich mnejhuüyb co ya canaag mil jäy ti mibicy Jesús, e yjactimmina'ñ ajcxy co copicy nguyduunim Moisés ycötujcín je jecyip. ²¹ Ti ajcxy yajmüdmıydgıii co miich mdzachjäyyaj'ixpıcy ma tüg'óciy judíojäy huidi ajcxy jigügy adzinaayb co ca'

huaad tuñycuenti Moisés ycötújcín je jecyí, etz ca' ycopicyity co tiy'ajttíygixipy y'ung, etz ni ca' ycopicyity payöyipy ñich ajt ngostumbre. ²² ¿Ti huaad nduunim? Jotmädám ajcxy co nejhuñhuipy co ya miich ti mjäty. ²³ Hue' janchtiy jadu'n miich mdunipy: cha mídaax yëydíjc huídi cuydunamy tüg huandaacín. ²⁴ Míidnícxy je' ajcxy, nícx nayyajpocyñíhuaatzi míd yí' ajcxy, e miich mgojuydayipy nej anajty ajcxy ypadyii je meeñyduní. E chi ajcxy myajcöme'pxipy cödza'm, e jadu'n je jäy ajcxy huinjíhuíydáhuipy co ca' yjanchity jadu'n nej xyñimíydaaccíxy, jëyi co miich nañ jadu'n mguydun je Moisés ycötújcín je jecyí. ²⁵ Huidibi janchtiy jadu'n nej yí' huídibi ajcxy ca' yjudíojäyity, e ti mijpídaaccíxy Jesús, ti ñich yí' ajcxy nijayíygíxich co ca' túngíxipy cuenti jada jadu'mbí judíojäy ycostumbre. Je' janchtiy co ca' huaad tzützcíxipy je tiibi jäy yajhuindzigíy ídolos, ni ca' huaad jícxcíxipy ní'py, etz ni ca' ajcxy tzüdzípy huídi yo'c-huúdy ti y'ögy, etz ca' ajcxy huingbí töxyjäy migapxtigóoygíxipy.

Chi ajcxy majch je Pablo ma Dios ytíjc

²⁶ Chi Pablo míd nícxy je nimídaaxpi yëydíjc, com jabom ajcxy nayyajpocyñíhuaatzi ajcxy, chi ajcxy ytígíy ma Dios ytíjc, e chi ajcxy ytíy'ajt yejcy ma judío teedy ti xí ycíxa'ñ je nayyajpocyñíhuädzi, etz ti xí huindzigí'ñ iyujc cýegaangíxy nidüg nidüg.

²⁷ Ma anajty yca'pxaani je mihuixtújcñibi nijëjity judíojäy, choon jim Asia, chi ajcxy ijxy Pablo ma Dios ytíjc. Huin'it ajcxy je mayjäy majch Pablo, yajhuangoty yajjihuigyoty, ²⁸ chi ajcxy yam chachmínaangíxy:

—¡Israel jäy ajcxy, pubejtcích ñich ajcxy! Jada je' je yëydíjc huídi xí ya tzach nigapxp ní'ojíyb judíojäy ycostumbre, Moisés ycötújcín, etz nDios ytíjc. E jadüg nax ti yajtígíygíxy griegojäy ma Dios ytíjc, yajjibicíygíxy jada it lugar huätzpi. (Com ca' ñigödúcyity nícxy griegojäy ytígíy ma Dios ytíjc.)

²⁹ Paady anajty jadu'n ymínaangíxy je huídi ajcxy majtz je Pablo, com co ijxy ajcxy Pablo mídhuidity cajpjoty je Trófimo, huídi anajty cogajp Efeso. Hue' anajty tíjcíxy co Pablo ti mídtígíy Trófimo tzajtigoty.

³⁰ Tüg'ócíy je cajpjäy yjotmätcottay, miiñ ajcxy poyígy majch ajcxy je Pablo yajpídzimy tzajtigoty pahuijch pajugujcy. Chi ajcxy mic'amy agíy Dios ytíjc. ³¹ Yaj'ögamyb anajty ajcxy Pablo. Chi je soldado huindzín ayuc mídoy co tüg'ócíy je cajp jäy ajcxy ti chachhuaangíxy chachjihuíygíxy. ³² Je soldado huindzín huodzonday ysoldado ajcxy, e chi ajcxy ñícxy poyígy ma je mayjäy yhuaangíxy yjihuíygíxy. Co je mayjäy ajcxy ijxy miñ soldado ajcxy míd yhuindzín, chi ajcxy ixmajch Pablo ca' ocjaccójxcíxni. ³³ Co je soldado huindzín jim ja'ty, chi yajmajtzi je Pablo, ní'anëmdíy co huen cíxochyii míd mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytígíy huaambi jihuíybi, e jadu'n je soldado huindzín ca' ní'nej huinjíhuíy míd je ne'mbí. Chi ní'ane'mdíy co huen Pablo yajnícxyii ma cuartel. ³⁵ Co jim ya'ty ma cuartel pedíydac, chi je soldado ajcxy cýígy Pablo, co anajty je mayjäy chachjottigoyñájxcíxy tzachyaj'ögaangíxy anajty Pablo. ³⁶ Tüg'ócíy je mayjäy pamiingíxy axam je soldado ajcxy, yam chachmínaangíxy:

—¡Huen ögy!

Pablo ñaygohuaani ma je mayjäy

³⁷ Co anajty yajtígíhua'ñyii cuartel tigoty, chi Pablo migapxy je soldado huindzín míd griego ayuc, ymínañ:

—¿Nej jëbi ii nmídmíydägy tüg'aa metz'aaji?

Chi je soldado huindzín y'adzooy:

—¿Nej mjaipty miich griego y'ayuc? ³⁸ ¿Nej ca' jada' miich jëjity je egipcio jäy huídi namni tzip yajpídcip, e huobídzimy mídaax míl jäy yaj'öcpí, míd nícxy ajcxy jim míjtígíduum?

³⁹ Chi Pablo nímay je soldado huindzín:

—Ich judíojäy ïch, jím ngogájpídyich Tarso, tüg mijcajp huídi yajpatpi jím Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiïy, chi Pablo ytinay'ahuïy ma je cuartel pedíydac, e cïmïd ytiy'ajt yecy co huen amoongixy. Co je mayjäy ajcxy y'amonday, chi migapxcoty mïd hebreo ayuc ymïnañ:

22

¹ —Migügtijc etz mij'anäctijc, midoogixy jadu'n nej ïch yam nnayñigapxtüdyii.

² Co je mayjäy ajcxy midoy co ymigápxigixy mïd hebreo y'ayuc, chi ajcxy y'amonday, chi Pablo ymïnañ:

³ —Judíojäy ïch. Jím Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpíjcich ya ma Gamaliel, etz yajxon Gamaliel ti xyaj'ixpijcyich ajt nmij'ap nmijteedy ytiy'ajt etz ycötújcín. Njatyim nyajmij'ajtpyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huídi anajty mijpidaacp Jesús y'ayuc, nyaj'öctähuaamyich anajty, e nyajnicxpyich anajty mach yëdyictijc etz töxyjäydijc, nbidägyich anajty ajcxy pujxtigoty. ⁵ Je teedy mijtungmïdpi etz tüg'óciy mij'anäctijc ymïd tiy'ajt, co ïch ajcxy xymooyich cötujcín, e nnicxyich anajty jím Damasco ma nmigügtijcich yi judío jäy ajcxy. N'ixtäyich anajty je jäy ajcxy huídi Jesús y'ayuc mijpidaacp, madza'ñich anajty ajcxy, e nyajmiina'ñich anajty ajcxy ya Jerusalén huen yajtzaachytunggixy.

Pablo nimíydacy nej yjothuimbijty

⁶ Co ïch anajty ndüyöyich mihuïngon Damasco, cujc yxii anajty, chi janch timitiini ytiicxígy jühuidity jadu'n nej jín ma ïch, hue' anajty choon tzajpjoty. ⁷ Chi jím ngidaayich, huin'it nmidooyich tüg ayuc xyñimaayich: “Saulo, Saulo, ¿ti co xy-pahuidijttägyich?” ⁸ Huin'it n'amidooyich: “¿Mbín miich, Huindzin?” Chi xy'adzooyich: “Ích je' je Jesús je huídi cogajp jím Nazaret, je huídi miich mdzachpahuidijttacpy.” ⁹ Pinjaty ïch anajty nmïd y'ijx je' ajcxy je tiicxín, chi ajcxy ooy chigíy, e ca' ajcxy huinjihuïy je ayuc huídi anajty nmigapxyiïjich. ¹⁰ Huin'it nnimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidíg e yajyöy mdu', nicxy jím Damasco, jím myajnimähuiyb tüg'óciy ti jëbi mduñ.” ¹¹ Je tiicxín hue' je' xy'ixmajchich huiintz. E chi je nmigügtijcich xyhujtzoönich ajcxy cígíxy, xyajja'tyich ajcxy jím Damasco.

¹² Jím Damasco anajty chinäy tüg yëdyijc huídi anajty yxii Ananías, je huídi anajty ooy cuyduñ Moisés ycötújcín je jécyp. E judíojäy ajcxy huídi jím tzinaayb ooy cömaaygixy co ooy y'oyjäyity. ¹³ Chi Ananías ymïñ ma njättaacich, e ytinay'ihuïy ma ïch nmijc, chi xyñimaayich: “Migüg Saulo, ixxígyich jadüg'oc huinjemy.” Tim huin'itiy n'ixxígyich. ¹⁴ Chi Ananías xyñimaayich: “Je Dios huídi ajt nmij'ap nmijteedy ojajajt, je' ti xyhuin'ixy jigix mnejhuïhuipy Dios yhuinma'ñ, etz m'ixipy je tudäcypí jäy, e mmidohuipy yci'm ayuc huídi ycapxpy. ¹⁵ Dios ti xyhuin'ixy jigix nicxy mdiy'ajt yecy ma tüg'óciy naaxhuiñyjäy, etz mnimíydägyipy nej ti m'ixy ti mmidooy. ¹⁶ Jadachambi, ¿nej co mhuäcxipy? Pidíg etz niibet. Mibijctzou Dios jigix mbocy ñihuädziipy.”

Pablo nimíydacy nej oy yajquexy ma je huídibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytiyc, oy Dios nmibijctzooyich. Chi ïch jilby tzajtigoty n'ixmañyïyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, yi jäy ajcxy ñejhuïyb co ïch anajty nnicxich huen huídi judíojäy naymujctac n'ixtäyich yi jäy ajcxy huídi miich m'ayuc xymibijcip, ti nbidägyich anajty ajcxy pujxtigoty, ooy ïch ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huídi miich m'ayuc xycapxhuäcxip, jím ïch anajty nañ jadu'n yajpaady. E ooy njäygidacyich co ajcxy

yaj'o'cy, ixti ngüend'ajtich je' ajcxy yjocxhuit huidi Esteban yaj'o'c.” ²¹ Chi ñich nHuindzin Jesús xyñimay: “Cham ñich miich nguexy jigüëgy it ma yi jäy ajcxy huidi ca' yjudíojäyity.”

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytigüy ajcxy huambi jihuüyb chachmínaangixy:

—¡Huen öc yijibi yëydijc! ¡Ca' huaad yjactzinäy!

²³ Yam yhuaangixy yjihuüygixy, yam yjocxhuit tzachjengixy, etz naaxhuaay tzachyujc-huijcixy. ²⁴ Chi je soldado huindzin ni'ane'mdüy co huen Pablo yajnicxyii cuartel tigoty, e ni'ane'mdüy co huen ci'adyii jigix nigapxip ti ti tuñ co je jäy ti ymibidügyii. ²⁵ Ti anajty ajcxy cïxojtcixy, e chi anajty ajcxy tzaachytunaangixy co Pablo nimay je capitán huidi anajty huinduy:

—¿Ti cötújcín miich ajcxy mïd co mdzaachytuna'ñ tüg romanojäy, ni ca' ajcxy jayijp mdüyduñ?

²⁶ Co jadu'n mïdooy je capitán, chi ñicxy oy yajnimäy je comandante:

—Ixcim nej mdüñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy ñich jada nbaaty co naydijyijich romanojäy.

E chi Pablo y'adzooy:

—Ñich ti nmübi'c'ajtich yi'.

²⁹ Mïd jëyi, je huidibi anajty ajcxy ci'adam je Pablo, chi puyöydúutcxni. Nañ jadu'n je comandante ooy ñay'adzigiyyi, mïd co cïxojch Pablo mïd cadena.

Pablo ma je judíoäy ajcxy yjuntitungixy

³⁰ Com jabom je comandante co anajty nejhuñhua'ñ ti ycxpi co ti yxïyii je Pablo yi judíoäy, huen yajminagyii cadena ma Pablo yci'. Chi ane'my co yajhuomujci je teedy tungmïdipi etz je judío mij'anäctijc. Huin'it je comandante yajnicxy Pablo ma je huindzindijc etz ixpiçytijc anajty ti ñaymújcigixy.

23

¹ Huin'it Pablo yaj'ijxpejty je mayjäy huidi anajty ti nayyöymújcigixy, e chi ajcxy nimay: —Migügtijc, Dios y'ijxpy ñejhuüyb nej ñich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmïdipi, ni'ane'mdüy Pablo co huen yaj'accojxigy.

³ Chi Pablo ymíañ:

—¡Dios xychaachytunipy miich huidibi mnaybidaacip nej jihuüy ooy mdudägyjäyity, e ca' yjanchity! Paady miich m'íñäy ma cötujctac jigix nyajtïydunipyich nej je ley y'ane'my. Chi mmidundigooy je ley co ti xyajcojxyijich.

⁴ Je jäy ajcxy huidi anajty jim míañ:

—¿Jadu'n miich mmigapxtigoy yi Dios ymijtungmïdipi?

⁵ Chi Pablo ymíañ:

—Migügtijc, ñich ca' anajty nejhuüyich, pen yi' je' Dios ymijtungmïdipi. Com jaybety jadu'n ma Dios ñecy: “Ca' huaad jibic mnigapxipy huidi tungmïd ijtp ma miich mjäy.”

⁶ Huin'it Pablo ijxy nejhuüy co jim junti'joty mejtzpicy ixpiçytijc anajty jim, jim huidi saduceo y'ixpiçin ymijpidacp etz nañ jadu'n jim huidi fariseo y'ixpiçin ymijpidacp, chi Pablo ymíañ mic:

—Migügtjicich, fariseojäy iich, nañ jadu'n ndeedyich fariseojäy je'. Cham nyajtiyduñich müd jëgixpi co nmibicyich co Dios yajjugypigipy jäy tiibi y'öccixy.

⁷ Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuñyi. Chi je naymujcpidijc ajcxy ñaybijc-huäcxi. ⁸ Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcpi je' ajcxy co yjiijity ángel ajcxy, co öcpi jugypigaangixy, co je Espíritu Santo yjiijity, co jäy ajcxy müdity y'alma, etz co mujcu' ajcxy yjiijity. ⁹ Tüg'óciy jäy ajcxy ma je naymujctac ytiigi y huambi jihuñyi. Chi nijëjity fariseojäy huidi nihuindzin'ajtpy je Moisés ycötújcín nìgapxtuty Pablo yminañ:

—Jadayaabi jäy ca' ti pocy ti tuñ. Ca' yjecyity ti jada' ymìgapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajjot'ambijcigixy. Je soldado huindzin tzigiiyb anajty co Pablo y'ahuoonnihuñyb y'agidzihuñyb, paady ni'ane'mdiy huen yi soldado ajcxy yajpidzimigixy juntijoty e yajnicxcixipy yi Pablo jadüg'oc ma cuartel.

¹¹ Huin'it coodz ñayguëxi je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinma'ñ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'iihojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo.

¹³ Nihuixchiguïpx naxy anajty yëydijctijc huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mjtungmüid etz judío mij'anäctijc, nìmay ajcxy:

—Iich ajcxy ti ngapxycödujccixy co ca' ngayáangixyich n'ügaangixyich ixti cooni iich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixcipytiijc mij'anäctijc nidungiygixy ma je soldado huindzin, co huen jabom yajminyii Pablo jadügtecy ma miich ajcxy. E aanüdaaccixy co jacyajxon yajtiyduna'ñ, e ni'ixi iich ajcxy anajty n'ijtcixy co Pablo nyaj'ögibich ca'ni anajty yjaty ma naymujctac.

¹⁶ Pablo chi' ymang nejhuñy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nìmay:

—Yajnicx jada yeeg'anäg ma je comandante, ymüid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nìmay:

—Pablo, je machyjäy, ti xyaaxyich, ti xyñimäyich co nmüdminipyich jada yeeg'anäg, ymüid yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáanigixy, y'aanüdägaangixy co jacyajxon tiydunaangixy. ²¹ Ca' miich yi' mmibigipy; com nihiixchiguïpx naxy yëydijctijc jim yi' ajcxy ahuixy yüch. Ti capxycödujccixy co ca' ajcxy ycaya'ñ y'üga'ñ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

²² Chi je comandante ycapxycijxy müd je yeeg'anäg. Chi nìmay co ca' huaad ymüydägy müd jacpinjaty jadu'n nej anajty ti ymüydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcín huen nayñi'ixiiygixy nime-jtmigo'px soldado huidi nicxip tegyi'm, etz tugi'pxmajc huidi nìcxip cohuaaygixy, etz mejtz migo'px quipyjiipxu'ñmüidpi, huen nicxcixy jim Cesarea mijcoodz. ²⁴ Nañ ni'ane'mdiy co huen cohuaay ni'ixi pidägyii huidi Pablo yaj'iñahuipy, e moy cötújcín co

huen oy yajxon ajcxy Pablo yajjädipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “Ich comandante, Claudio Lisias, cham nguejxyich jada necy ma miich, mijpi gobernador Félix, e nguejxpyich capxpocxin. ²⁷ Je judíoäy ajcxy ti anajty majtcixy jadaaabi yëydijc, yaj'ögamy anajty ajcxy co ich oy nejhuïy co je' yromanojâyity, chi nninixich müd soldadtijc etz nnihuaañich. ²⁸ Co ich ooy anajty nejhuïhua'ñich ti anajty co ti xigixy, chi nyajnicxich ma anajty ajcxy tungmüdpî etz mij'anäctijc ti ñayyöymüjcigixy. ²⁹ Hue' anajty yî ycipi ti yajxiy co anajty ti ytundigooy ma yî ajcxy ycötüjcin. Ca' anajty ytiy'äjtity co yaj'öccixipy, e ni ca' huaad ymach'ïñây. ³⁰ Co ich oy nejhuïy co yî judíoäy anajty ti nihuinmayiygixy co yaj'ögaangixy, cham ich miich yî nyajnigüexy. E ti ich nañ jadu'n nimay huidi ti yxiy huen nicxcixy ma miich, e jëbi ajcxy jim nigapxy ti ycipi co midzip'ajtcixy. Ji naybaatim.”

³¹ Je soldadtijc nej anajty ti ycötüjcin möyii tim huin'itîy müd tzoön je Pablo mijcoodz ixti yajja'ty ajcxy Antípatris. ³² Je soldadtijc huidi ajcxy tegyî'm nicxp, com jabom huimbjtcixni, chi yjá'tcixni ma cuartel. E je soldadtijc cohuaygixpi jacnicxy je' ajcxy müd Pablo. ³³ Co je' ajcxy yja'ty jim Cesarea, chi ajcxy je gobernador necy yajcädigüy, chi ajcxy nañ jadu'n yajquëxigü je Pablo ma je' yhuinduu. ³⁴ Co ñecy capxtay, chi je gobernador y'amidooy Pablo ma anajty yconaaxity. Co nejhuïy co yCiliciajâyity, ³⁵ chi nimay:

—Jiini nejhuïhuibich je tiy'ajt co anajty miingixy huidi ti xyxigixy.
Huin'it ni'ane'mdüy co huen cuend'adyii ma je Herodes ymijtijc.

24

Pablo ñaygohua'ñyii ma je gobernador Félix yhuinduu

¹ Co migoox xii Ananías je teedy ajcxy ymijtungmüdpî yja'ty jim Cesarea müd judío mij'anäctijc ajcxy etz müd tüg huingapxpî huidi anajty yxii Tértulo, chi ajcxy ñayguëxici ma gobernador co xihuaangixy Pablo. ² Co ajcxy Pablo yajmiñ, chi Tértulo ytiigüy xibi, nimay Félix:

—Müd miich ycipi jotcujc je naaxcajp y'ijty, ca' ma tzip, je' co yajxon m'ane'mdäy müd oyhuinma'ñ. ³ Tüg'óciy ich ajcxy njäygidacpyich hueñyma'ámyity, miich mijtungmüdpî Félix. ⁴ Ca'ydi mdiempo nyajtigooyi mij, tun may'ajt amido'ijtigich n'ayuc tüg jaxigüy. ⁵ Com ti nnejhuïygixich co jada Pablo, ooy ayo'n yecy hueñytimma'ámyity. Xi ya judíoäy tzach pijc-huäcxy müd y'ayuc huidi ymüd. Yî je' nigohuajc'ajtp tüg picy jây huidi jây ytiipy Nazaret jây. ⁶ Com tundigoy ma ich ajcxy nDios ytiyc nej ca' ypadyii, chi ich ajcxy nmajch, e chi ich ajcxy njatydunaañich jadu'n nej ich ajcxy ngötüjcin y'ane'my. ⁷ Per je comandante Lisias je' yajtigüy mictägy, chi ich ajcxy xypijci jada Pablo. ⁸ E Lisias ymînañ co pinjaty anajty ti yxiy huen müñ ma miich. Miich ci'm jëbi myajtiy, e mnejhuïhuip tüg'óciy je tiy'ajt jadu'n nej ich ajcxy yî ti nxüy.

⁹ E je judíoäy ajcxy huidi anajty jim gobernador yhuinduu, ac jadu'n ajcxy ymînaangixy co yjanchity jadu'n nej Tértulo ymîna'ñ. ¹⁰ Huin'it je gobernador tiy'ajt moy Pablo cîmüd co huen capxy, chi Pablo ymînañ:

—Janch jotcujc jëbi nayñgapxtüdyiijich ma miich Félix, com nejhuïybich co miich mijtungmüd ma jada naaxcajp cham xii jimijñ ñicxni. ¹¹ Miich ci'm jëb mnejhuïy je tiy'ajt, jëyi anajty ñimajcmetzxüjy maabi anajty nbättigüyich jim Jerusalén Dios ojadajpî. ¹² Ca' ich yî ajcxy xypaty ndzipcapxy n'ahua'ngapxyich müd pinjaty. E ni ich ngajây'axiigüy ngajây'agapxiy ma Dios ytiyc, etz ni ma naymujctac etz ni ma Jerusalén cajp. ¹³ Jada jây ajcxy ca' ajcxy müdity pinjaty tiy'ajt yegipy nej ich yî ajcxy yxiy. ¹⁴ Huidi janch ngapxypidzimyibich ma miich jadu'n nej je tzînaayin, je jemybi xpijcin huidibi yî ajcxy ytiipy ca' y'öyity, je' je' je' xpijcin huidi ich müd n'ojadajpîch Dios, je Dios huidi ich ajcxy

nmij'ap nmijteedy y'ojadajt. Nmibijcpiych tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxxiybi ñecy. ¹⁵ Nañ nmibijcpich co Dios yajjugypigipy pinjaty ti y'ögy, tibi oybi tuñ etz tibi jibicpi tuñ. ¹⁶ Paady ycixpi naymijottigoyiijich co njothuinma'ñich huädz ooy nmüid'idipyich ma Dios etz ma jäy.

¹⁷ Canaag jimijt ich anajty ti nhuidityich huingdum, chi nhuimbijtyich ma ich ngajp limosna cuejtp etz nhuindzigihua'ñich anajty Dios. ¹⁸ Jadu'n ich anajty nduñ co nijējity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costumbre, ca' anajty mayjäy pin yhua'ñ yjihuiy. ¹⁹ Je jäy ajcxy huidi xy'ijxyich ma Dios ytijc, je' ajcxy ixypiy ti ymiingixy ya tiy'ajt yejcp. ²⁰ Co ca' ajcxy ti miiñ, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xytidyduñich ma judío jäy tungmüdpí etz huinmij'anäctijc ajcxy ñaymujci. ²¹ Jēyi co ich mic ngapxyich juntijoty, chi nmīnaañich: “Xytiydumbich miich ajcxy cham müid co nmibicyich co Dios yajjugypigipy pinjaty ti y'o'cy.”

²² Co Félix jadu'n midodaay, com ñejhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy:

—Co anajty miiñ je comandante Lisias, huin'it njacnejhuiydaahuibich nyajtiydigihuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixihuip co pidzim tibiñ tibäy e pen ji ymigügtijc miiñ co'ixihuāñyii, huen möyii huidi yajmayjajtpy.

²⁴ Ti anajty xii ñajtnñicxiyñi co Félix jadüg'oc miiñ müid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miiñ müidmiydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tiyduna'ñ tüg'óciy, chi Félix ñay'adzigiiyi, ymīnañ:

—Nícx miich jadachambi, co ich anajty xyñibadxiyigixy huin'it nícxny nyajhuooyii.

²⁶ Nañ jadu'n Félix y'ahuijxpy anajty mina Pablo y'ocmeeñymöyii, e huin'it anajty najtzmazdihua'ñ. Paady anajty janam jadzojc nícxny yajhuoyii, e müid miydägy anajty.

²⁷ Mejtz jimijt jadu'n yjajty, huin'it Félix ygobernadorbidzimy. Chi Porcio Festo ygobernadortigiiy ma Félix anajty ytuñ. Co Félix anajty nayyajhui'ma'ñyii ooy müid je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yjajty co Festo anajty ti ygobernador tigiiy, chi codugüg xii choñ Cesarea, ypättigiiy Jerusalén. ² E jim Jerusalén je teedy mijtungmüdpí etz nijējity huinmij'anäctijc jactimxiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nícxna'ñ janch tim tzojc jim. ⁵ Chi ajcxy nimay:

—Jēbi nijējity miich ajcxy mdungmüdpidijc etz huinmij'anäctijc quipxy nícxibich müid ich. Pen ti je Pablo ytundigooy jēbi miich ajcxy mxiiy jim Cesarea.

⁶ Festo jēyi jim y'ijty tuctujc xii taxtujc xii Jerusalén, chi yhuimbijtni Cesarea. Com jabom nícxny ma tiydundac, huin'it capxyñiguejxy Pablo co huen yajminyii. ⁷ Co Pablo ytigiiy ma tiydundac, chi mic'amy je judíojäy ajcxy yjübigiydäy huidi anajty ti choongixy jim Jerusalén. Chi ajcxy oxyiiy Pablo co mij anajty ti ytundigoy. E ca' ni ti tiy'ajt ajcxy miguëxiy. ⁸ Chi Pablo ñaygogapxi ymīnañ:

—Ich ca' ni ti ndundigooyich, ni ngamidundigooyich yi judío jäy ycötújcín, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimayajcōmaya'ñ ma judíojäy ajcxy, chi y'amidooy Pablo:

—¿Nej mnícxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cõtujctac huidi je romano codung y'ane'myb e ma jëbi yajtiyduñich. Yajxon miich mnejhuïy co ca' ti ti ndundigooyich ma yi judíojaï ajcxy.

¹¹ Pen ti ndundigooyich huidi jëbi co'ögïyich, ca' nminá'nibich co ñich ca' n'öga'ñ. Pen ca' ji ni ti tiy'ajt jadu'n nej yi' ajcxy ti xyxïyich, ni pin cõtújcïn camidity nicxy xycïyecyich ma yi' ajcxy. ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday müd ymidungmüdpï, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycõtujctac, nguexipyich miich jim. Miich ti mbijctzoy co je emperador xytiyduna'ñ. Pis jim mnicxipy miich.

Pablo ma je rey Agripa yhuinduu

¹³ Chi yi xii tiempo ñajtnñicxiyñi co je rey Agripa etz Berenice ycidacy Cesarea, co-gapxihua'ñ anajty Festo. ¹⁴ Co ajcxy jim yhuäcxipy canaag xii, chi Festo yajmüdmïydacy je rey Agripa je Pablo ayo'n, e nimay:

—Ji tüg yëdjic huidi Félix y'ixmajtz mach. ¹⁵ Co n'oyich jim Jerusalén, chi je teedy mïjtungmüdpï etz judío mij'anäctijc xymixïyich, nibijctzohuïy co Pablo nyaj'ögibich.

¹⁶ Chi n'adzooyich co romanojaï ca' cõtújcïn jadu'n müdity nicxy yaj'ögy yi machyjäy ma ca'ni ñayhuindinaïyigixy müd je huidi müd ñayxïyii, jigix ñaygogapxiyb nej anajty ti yxïyii.

¹⁷ Paady co je judíojaï ajcxy y'oy ya ca' nigoob tiempo nyajtigooyich com jabom nnicxich ma ngõtujctaacich, e nni'ane'mdïyich co huen yajmiñyii je Pablo. ¹⁸ Co ajcxy ñayguëxi'ci, je huidi anajty ti xïy, ca' jac ni ti ayuc anajty ajcxy müdity jadu'n nej ñich anajty ti ndijyich. ¹⁹ Jëyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huidi o'c, juugyñi je'. ²⁰ Com ñich ca' nnejhuïy nej ndunipich müd jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatidyduñich müd jadayaabi ycixpi. ²¹ Pablo ci'm minañ co nigi oy yajtiydunipy jim ma je emperador huidi ane'm jim Roma. Chi nni'ane'mdïyich co huen jacmach'ñäy, ixti cooni nguexipyich jim Roma ma César.

²² Chi je rey Agripa yminañ:

—Nañ ooy ñich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miiñ Agripa etz Berenice müd mayjäy etz xuuxpidijc, chi ytigïy ajcxy ma tiydundac müd je soldado huindzin ajcxy, etz huinmij'anäctijc. Chi Festo capxyñigüeijy co huen Pablo nicxy yajtzonyii. ²⁴ Chi Festo yminañ:

—Rey Agripa, etz tüg'óciy mij'anäctijc huindzindijc huidi ya ti mnayyöymújcigixy müd ñich ajcxy, cha je' je yëdjic huidi oy yi judíojaï ti yxïyii ma ñich. Xymixïyich jim Jerusalén, e nañ ya Cesarea, e jatymyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñbijctzohuïyii co jim yajtiyduna'ñ ma je emperador jim Roma, paady ti n'a'ixïyich co nguexaañich. ²⁶ E com ca' ni ti tiy'ajt nej nijayihuibich nhuindzinich, je emperador César, müd yi' ycixpi, paady nyajmiiñich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmüd'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt müdity nej ti yxïyii.

26

Pablo nimiydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimiydägyii.

Chi Pablo yujcxajy yci' e ytigïy nayñügapxtuutip, yminañ:

² —Jotcuje nayjihuñiyich, co jëbi nmïydägyich ma miich, rey Agripa, jigix nayñgapxtüdiybich tüg'óciy jadu'n nej judío jäy ti xyxíyich. ³ Com miich mnejhuñiyb yajxon nej judíojäy ajcxy yhuinma'n mïidity, etz tijaty tzip yi' ajcxy ymïid, etz jadu'n nej yi' ajcxy y'ixpíjcin oy ñay'ijxquípíxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíojäy ñejhuñiyb nej ti ndzinäyich ma yi' ajcxy jim ma nnaaxjotich etz jim Jerusalén maabi nyeecpidzimyich. ⁵ E yi' ajcxy ñejhuñiyb nañ jadu'n, e jëbi nigapxcixy jadu'n nej ti nyujcyecpi'atyich. Hue' naydijyijich anajty fariseojäy, je tügpícpyi jäy huïdi mictägy je judío jäy ycostumbre etz ycötújcin payöyip. ⁶ E jadachambi xytíyduñich mïid co njípp'ixyich co Dios yajjugypiga'n yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpícpí Israel ymang y'ap y'oc y'ahuixpy mïna Dios cuyduna'n nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigíy xim tzuum. Miich, rey Agripa, nmibícyich co Dios yajjugypigípy je jäy tiibi y'öccixy, paady ycíxpi yi judíojäy yxíyich. ⁸ ¿Na'amy co ca' miich ajcxy mibíga'n co jëbi Dios yajjugypícy je tiibi ajcxy y'ögy?

Nej anajty Pablo jayíjp'aty mibíjcpídjic ixhuïdity pahuïdity

⁹ Jecyíp iich hue' ndijyich oy nduñich co anajty ndzachmídzíp'adyijich je Jesús je Nazaretpi. ¹⁰ E jadu'n nduñich jim Jerusalén. Mïid je teedy mïjtungmïdpi ycötújcin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt iich co huen yaj'öccixy. ¹¹ E nníxxyich anajty majaty judío ñaymujctac jim ndzaachytuñich huïdi ajcxy mïjpidacp anajty Jesús, jigix ajcxy y'ixmadzípy je' ymibíjcin co Jesús je' je' je Cristo. Nígi anajty nmijotmátcootyich ixti nbahuïdijttacyich huingnaax huinggajp.

Pablo nimïydägy jadüg'oc nej yjothuimbity

¹² Mïid yi jadu'mbi huinma'n nníxxyich anajty jim Damasco. Je teedy mïjtungmïdpi anajty xyquexpich, e xymöyich anajty cötújcin. ¹³ E tü'am, señor rey, iich anajty nícxy, cuje xii anajty co n'ijxyich tügi tiicxin jacmic ca'ydi xii ytiicxin chooñ tzajpjoty, xyñigídacxyich etz nañ jadu'n huïdi anajty ajcxy xymídnícxich. ¹⁴ Huin'it nidüg'óciy iich ajcxy ngídaday, e nmídooyich tüg ayuc xymígapxich mïid hebreo y'ayuc, xyñimäyich: “Saulo, Saulo, ¿nej co chach xypahuïdijttägyich? Cí'm nayyajtzaachíyii jadu'n nej huaj yuub co jippconebíy huïdi mïid ñumygumyii.” ¹⁵ Huin'it n'adzooyich, nnímaayich: “¿Mbin miich Huindzin?” E je Huindzin xyñimaayich: “Íich je' Jesús je huïdi miich mdzachpahuïdijttacpy. ¹⁶ Pidíg e tinaaygugi', com ti nnayguëxígyijich ma miich jigix xymídupíyich etz mgodiy'ajt'adípy jadu'n nej cham ti nyajnimäy ti nyajnejhuñy, etz jadu'n nej jiini njacyaj'ixa'n njacyajnejhuñhua'n. ¹⁷ Íich miich nnihuänip nyajtzögip ma yi judíojäy, etz nañ ma huïdi ca' yjudíojäyity. Íich miich jim nguejxpy ma huïdi ca' yjudíojäyity. ¹⁸ Nícx jim myajhuinjihuiyigixy iich ndiy'ajt, huen íxmach ajcxy yi jibic-huinma'n e jadu'n ypidzimípy ajcxy ma je mujcu' y'ané'migixy, etz mïjnícxpedípy ajcxy Dios ytiy'ajt. Co ajcxy mibígípy mïjpidägípy iich ndiy'ajt huin'it nmöhuibich tígíydac tzajpjoty ma yi oyjäydíjic ity tiibi Dios yajpocyníhuächyii.”

Pablo cuyduñ nej anajty ti y'ijxmañíyín

¹⁹ Rey Agripa, jadu'n ti ngapxymídooyich huïdi n'ijxich nmídoohuich tzoön tzajpjoty. ²⁰ Jayíjp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huïdi ca' yjudíojäyity. Nyajnimáaygixyich huen jothuimbijtcixy, huen mibíjccixy Dios y'ayuc ytiy'ajt, etz huen yajtungixy oyjot oyhuinma'n jigix ñiguëxígípy co ti yjothuimbijtcixy. ²¹ Mïid jada ycíxpi xymajchich ajcxy je judíojäy ajcxy ma Dios ytiic, e xyaj'ögángíxyich anajty. ²² Mïid co Dios ti xypubety ti xypudígíyich cha nyajpaadyich juugy. Ngapxhuäcxíyich Dios

y'ayuc ytiy'ajt ma tög'óciy ayoobtijc etz ixpicytijc. Tög'óciy huidi ngapxpyich je Dios y'ayucnajtzcaxiibi jaay jecy'ajty, etz je Moisés nañ jadu'n jaay jecy'ajty co jadu'n ytuna'ñyii yjada'ñyii. ²³ Hue' yajmína'ñ co je Cristo copicy ayo'n tzaachypí yajnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcapxhuäcxip je ayuc ytiy'ajt ma ich ajcxy judíojäy, etz ma huidi ca' yjudíojäyity.

Pablo jahueeni cayajjothuimbijty Agripa

²⁴ Co Pablo jadu'n ymínañ ma anajty ñayñigapxtüdyii, chi Festo mic mínañ:

—¡Mlocjiyb miich Pablo! Míid je ixpíjcin nīgi m'ahuimbity loci.

²⁵ Chi Pablo y'adzooy:

—Ca' ich nlocijiy, miich mijtungmíidpi Festo. Yi huidi ich ngapxpyich je' je' tiy'ajtip etz janchip. ²⁶ Yi rey Agripa ñejhuídaayb yi' tög'óciy jada, paady nmíydägich aamic jotmic ma yi' yhuinduu; com nnejhuíybich co yi' ñejhuídaayb jada tög'óciy, com canan hue' jada yajtuuñ yajmíydacy ayüchytuum. ²⁷ ¿Nej mmibijcpy, miich rey Agripa, jadu'n nej ajcxy ymínañ yi Dios y'ayuccojaaybi? Nnejhuíybich co miich mmibicy.

²⁸ Chi je rey Agripa y'adzooy, ymínañ:

—Janch tim jayinjaty jahuenjaty miich xycayajmibicyich Jesucristo.

²⁹ Chi Pablo ymínañ:

—Oy yjayinjaty yjahuenjatyity ooy mijcajee mgamibicy, chojcpy Dios co miich mmibigipy Jesucristo etz nañ jadu'n tög'óciy jäy huidi cham xy'amído'o'íjtip ich n'ayuc. Dios chojcpy co mmibigipy Jesucristo jadu'n nej ich nmibicyich, jëyi janchtiy co ca' mmach'idipy jadu'n nej ich nmach'ityich.

³⁰ Co je Pablo ymíydactay, chi je rey etz gobernador ytinayigy quipxyi míid Berenice etz jacjadyii huidi anajty ajcxy jím. ³¹ Chi ajcxy ahuingujc oy capxyögyixy Pablo ypocy, ñayñimáayigixy miñ xyipy:

—Jada yëdjic ca' jada ti tundigoy, ca' ypadyii nicxy y'ögy, ni ca' ypadyii nicxy ymach'íñäy pujxtigoty.

³² Chi Agripa nimay Festo:

—Jëbi ixipy nnajtzmaziiyim Pablo co ca' ci'm ycanayñibijctzohuiyi co huen tiydunyii je emperador César jím Roma.

27

Pablo yajnicxi jím Roma

¹ Co ajcxy yajnihuinmayiy co xyquexáangixyich jím Italia, chi Pablo yajciyejc míid jacjadyii machyjäy ma tög capitán huidi anajty yxi Julio, je' huidi nihuindzin'ajtp tögpiy soldadtijc huidi anajty yxi batallón Augusto. ² Chi ich ajcxy ndigiy ma tög barco huidi yhuindzin cogajpíp jím Adramitio. Je barco hue' anajty ñicxa'ñ ma nijëjity barco jättac jím Asia ñaaxjot. Chi ich ajcxy ndzooni. Míid ich anajty ajcxy Aristarco huidi anajty cogajpíp Tesalónica jím Macedonia. ³ Com jabom ich ajcxy nja'ty ma barco jättac jím Sidón. Jím je Julio pa'ayoy Pablo, e ahuaatzí ytu' co huen nicxy co'ixiy ymigügtijc, etz huen je' ajcxy yajcayyii yaj'ügyii. ⁴ Co ich ajcxy ndzooñ jím Sidón, chi je naax mejy'agujcpi yhui'mni anajty'amy huidi yxi Chipre, míid co je poj anajty jipcobojiy je barco. ⁵ Chi je barco huinyöyñaxy je Cilicia ñaaxjot etz Panfilia ñaaxjot, oy njädyich ajcxy jím Mira, tög cajp jím Licia ñaaxjot.

⁶ Jím je capitán paty tög Alejandría ybarco hue' anajty nicxy jím Italia. Chi je capitán ich ajcxy xyajbarcotigiiy. ⁷ Canaag xi ich nyöy janch oñdägy, adzaach ich ajcxy nja'ty mihuingon je Gnido co anajty je poj tzach jipcobojiy je barco. Najx ich ajcxy mihuingon Salmón, etz njüyö'ahuidijtyich ajcxy Creta je mejy'agujcpi naax. ⁸ Adzaach ich ajcxy nja'ty ma barco jättac huidi anajty yxi Buenos Puertos, mihuingon Lasea.

⁹ Ti ñich ajcxy ooy anajty nx̃idigoy, e ooy anajty ycodzig̃ity je barco yajyöỹ. Ti anajty je ayuux̃i ñajx̃ni, e ti mihuingon anajty je poj tuu tiempo huidi jāy ytiŋpy inwierno. Paady Pablo je soldado huindzin jaccapxhuijy, ¹⁰ chi Pablo ym̃inañ:

—Huindz̃indijc, jadu'n nej yam codzigi' jada ooy co njac̃ic̃xim barcojoty, ca' yjecỹity co nicxy ndigooyim m̃id barco etz m̃id ñidzimy etz n'o'ctaayim.

¹¹ E je soldado huindzin yjacm̃ijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'öyity, nicxy jim yajnax̃cixy je poj tuu tiempo, chi je jacmaybi ajcxy yhuinma'ñypidacy, co jēbi barco yjacyöy, oc'ixaangixy pen yjät̃cixy jim Fenice ma Creta ñaaxjot. Jim ma t̃üg barco yjättac huidi y'aguu najtz'ix̃iyb ma x̃i pidzimy, e jim anajty je poj tuu tiempo yajnaxaangixy.

Je mijpoj m̃ijtigoy ma je mejy

¹³ Jadu'n yajty co je j̃inboj hueeni ypidz̃im̃y, huin'it huinmay ajcxy co jēbi yjact̃yöy je barco. Chi ajcxy yajpid̃igy je m̃ij pujx huidi barco yajtinayx̃ijp, e yajyöychooñ je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je mic̃poj m̃iñ ma t̃ichpoj pidzimy, huidi jāy ytiŋpy Euroclidón, jadu'n yhuimb̃idzim, Noreste. ¹⁵ Chi je mic̃poj yajt̃utigajch je barco, e com ca' anajty ndimd̃yöỹgix̃ni m̃id je poj yc̃ixpi, chi je mic̃poj ñich ajcxy xyajnic̃xy adzip ma anajty tzocy. ¹⁶ Najx ñich ajcxy mihuingon t̃üg naax mutzpi mejy agujcpi huidi yx̃i Clauda, e adzaach ñich ajcxy nyujcjugujcy je mutz barco huidi anajty m̃imb̃ ix̃xodz̃iy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtz̃mujcy je barco aguu. Chi ajcxy yajm̃inajcy je huit huidi anajty poj mic̃ tzach ymajchyp. Je' co chig̃iygixy co chim̃ic̃ix̃iyb je barco jim ma mejy huidi ca' y'agom̃ity, ma p̃ujot huidi yx̃i Sirte. Chi ajcxy ñayyejci huen poj yajñic̃ix̃igixy. ¹⁸ Com jabom, com ooy mic̃ anajty je poj, chi ajcxy je chimy mejy c̃ojibijptaayi. ¹⁹ Je midug̃ig̃ x̃iibi, chi ñich ajcxy nmejyc̃ojibijptay je tungbejt huidi yajtumỹb ma je barco. ²⁰ Ti anajty canaagx̃i ñajx̃ni e ñich ajcxy ca' ma x̃i madza' n'oc'ij̃xc̃ix̃ni, m̃id je m̃ijpoj yc̃ixpi huidi anajty ñich ajcxy xychachyajt̃yöyp. Hue' ñich ajcxy ndijc̃ixy co ti ndig̃öỹgix̃iyich, ca' ndijy ñich ajcxy ndzög̃ipy.

²¹ Ti anajty x̃i tiempo ñich ajcxy nyajnax̃cixy jaygay, chi Pablo ytinaỹgy, ñimay je jāy ajcxy:

—Ỹeydij̃t̃ijc, co ñich miich ajcxy xycacapxym̃idoy ca' ngatzoonim̃ jim Creta ñaaxjot, e ca' ix̃yipy jada ayo'n yam jadu'n nbaatim. ²² Jadachambi ca' mdajc̃ixy m̃maygixy, ca' ni pin ytiŋoya'ñ, oy je barco yjatigoy. ²³ Amygoodz je nHuindzin Dios t̃üg y'ángel ti ñaygũex̃ig̃iyi ma ñich, je Dios huidi ñich ngapxym̃idooybich, ỹi' ti quexy. ²⁴ Je ángel ti xyñim̃äyich: “Ca' mdzig̃iy, Pablo, copicy co m̃jatyjädipy ma je m̃ij'ane'mbi, je César yhuinduu. M̃id miich yc̃ixpi, Dios ñihuänamy yajtzög̃amy t̃üg'óciy huidi ji barcojoty, ca' ni t̃üg y'ög̃ipy.” ²⁵ Paady nayjot'am̃ijm̃öỹigix, ỹeydij̃t̃ijc, nm̃ibijc̃pyich Dios co jadu'n yjada'ñ jadu'n nej ỹi' y'ángel ti xyñim̃äyich. ²⁶ Ooy ycopicỹity nicxy nm̃ijpojpejt̃im̃ ma t̃üg naax mejy agujcpi.

²⁷ Majmactz x̃i je mic̃poj anajty yajyöỹi je barco oyñinej jim ma je mejy huidi yx̃i Adria, chi m̃ijcutz je barco yajyöybi jihui'ñybijcy co anajty ti mihuingoñ naax. ²⁸ Chi ajcxy quipxy je ñi jadu'ñi anajty yc̃icỹity, e hue' ajcxy quipxy iipx xap yc̃icỹity. Jahuengi huin'it jad̃üg'oc ajcxy quipxy je ñi, e hue' oy quipxc̃ixy majmocx xap yc̃icỹity. ²⁹ E co anajty chig̃iygixy co tijy je barco j̃ipcoboñihuipy ma tzaagop, chi ajcxy pidacy ñijoty m̃idaax pujx ma barco y'ijx, je huidi yx̃i j̃ip anclas, janch tzig̃iyb anajty ajcxy y'ahuij̃cixy cooni x̃im̃ihuipy. ³⁰ Chi je' ajcxy huidi anajty barco yajyöyp yhuinma'ñybaty co yquēga'ñ ameech. Chi ajcxy pidacy ñihuing̃ixy je mutz barco. Chi ajcxy ñaybidaaci jadu'n nej jihuiy je ancla jac yajm̃inagaangixy jim ma barco yhuinduu. ³¹ Huin'it Pablo ñimay je soldado huindzin etz je soldadt̃ijc:

—Pen ca' jada hui'mgixy ma barco, ca' miich ajcxy mejy ypidz̃im̃ipy.

³² Huin'it ajcxy tzujctujcy je tzaay huidi je mutz barco anajty m̄id ycoxochity, chi ajcxy yajcäy je mutz barco n̄ijoty, e chi je mejy yajnicxyi.

³³ Moñyi Pablo migapxy je jäy ajcxy, chi ajcxy nimay co huen huingayñajxcixy, chi Pablo yminañ:

—Cham majmactz x̄i ma miich ajcxy ca' mmaagixy, e ni ca' mgaaygixy m'uuccixy.

³⁴ Tun may'ajt caaygixy oy jadu'ñyi, copicy jada co njatyñidzooctähuaanim, ni t̄üg ngöhuay ca' ytigoyaanim.

³⁵ Co Pablo jadu'n yminanday, chi t̄üg tzajcaagy con̄gy, chi jayijp Dioscojuyip yajnajxy mayjäy agujc, chi tujc-huäcxy etz ytiḡiy ajcxy caaybi. ³⁶ Mic'amy je jäy ajcxy yjotmiḡiyday nidüg'óc̄iy, e chi ajcxy ytiḡiy caaybi. ³⁷ Hue' anajty ñaybáatiḡixy barcojoty mejtz migo'px jatugi'px majmocxt̄üg jäy. ³⁸ Co ajcxy ycayday, chi jacn̄igöjibijpy je trigo, jigix huen cōminacy je barco chimy.

Chi barco t̄üg yquĩñ

³⁹ Co yx̄im̄iy, chi je barco yajyöybi ca' ijxcapy je naax, e y'ijxpaty t̄üg it ma mejy huen ycogueḡiy, e jim anajty p̄ujot. Chi ajcxy yhuinma'ñybaty co'ixaangixy pen jēbi jim yjāty je barco. ⁴⁰ Chi ajcxy tzujctujcy je tzaay huidi anajty m̄id yxochity je anclas, e chi anclas yhui'mni n̄ijoty, huin'it ajcxy miguej̄iy je n̄igaap huidi tumb co t̄ümöy je barco. Chi huit jadüg'oc ajcxy p̄idacy huidibi pojmajtzip. Chi je barco ytiḡiy yöyb, t̄iy ajcxy yajnicxy ma p̄ujot. ⁴¹ E chi oy minaybadyi ma anajty je mejy mejtz it oy mic ycujiȳn, chi oy yjēpxy p̄ujoty. Je barco j̄ip oy ytiḡiy tātzipcy ca' huaad y'ocyücxni, e je barco ījx oy ytiḡiyñ aguejthuācxpi ym̄id je mejy p̄ujoty ym̄ijaa. ⁴² Chi je soldado yjayaj'ögaañ je machyjäy ca'yd̄i yqueeccixy ayaahuip. ⁴³ Je soldado huindzin ca' a'ix̄iy nicxy yaj'ögyi Pablo, chi nimay soldado ajcxy co huen ixmajtzcixy yi machyjäy. Chi je soldado huindzin nimay je jäy ajcxy co huen n̄idiḡiygixy pinjaty jajt̄p yau. ⁴⁴ E huidi ca' jajt̄cixy yau jaydēbi n̄idiḡiygixy m̄id pu'y etz m̄id barco pedasi. Jadu'n ajcxy nidüg'óc̄iy ymejy yp̄idzimday.

28

Pablo yjādy ma t̄üg naax mejy'agujcpi huidibi yx̄i Malta

¹ Co īch ajcxy n̄ibidzimday, chi īch ajcxy nejhūiy co je naax mejy agujcpi hue' anajty yx̄i Malta. ² Je conaax ajcxy ooy oyjāy'ajtin tuuñ m̄id īch ajcxy, chi ajcxy yajm̄ij̄iy j̄in mij, m̄id co anajty ooy yt̄ichity, etz co anajty ooy ytuubojy. Chi xyñimay īch ajcxy co miñ n'ocxāamgixyich. ³ Chi Pablo ytiḡiy j̄axycajpmujcpi, e chi p̄idacy j̄injoty. Chi t̄üg ahua'n iyujc p̄idzimy, yquēgy anajty m̄id je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc yt̄iyñāy ma Pablo yci', chi ajcxy ñayñimaaȳi miñ xyipy:

—Jadayaabi yēdyjc, jäy yaj'öcpi jada. Oy ca' ti y'ögy mejyjoty, je tiydumbi tzajpjot̄yp̄i ca' a'ix̄iy nicxy yjactzināy.

⁵ Chi Pablo yci' huinxidicxy, e j̄injoty oy ycāy je ahua'n iyujc, e ca' Pablo ni nej yjajty.

⁶ E t̄üg'óc̄iy je jäy tzach'ahuijxcixy m̄ina anajty y'ocquiix̄gy, o m̄ina anajty y'oc'ögy. T̄i anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' t̄üg dios.

⁷ E m̄ihuingon anajty je Publio yt̄ijc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich īch ajcxy yajxon tuḡig x̄i. ⁸ Jadu'n yjajt̄i co je Publio anajty yteedy yp̄igȳi m̄id tooy gohuajc etz m̄id̄ity anajty ni'pypa'm. Chi Pablo oy ixy je pa'mjāy. Chi Pablo Dios mib̄ijctzoy, e chi c̄n̄ixajy, e yajtzoocy. ⁹ M̄id jadaay miñ ajcxy nijējity pa'mjāy huidi anajty ajcxy tzinaayb ma je naax mejy'agujcpi e chi ajcxy chooctāy. ¹⁰ M̄id jada ycixpi nyajcōmay īch ajcxy, e nyajmooyich īch ajcxy tijaty huidi īch ajcxy nidüyöyipy barcojoty.

Chi Pablo oy yjādy jim Roma

¹¹ Tugüig po' ich ajcxy anajty ti n'ijtni jim. Chi ich ajcxy nbarcotigüy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymüd anajty ahuinax huidi anajty yxii Cástor etz Pólux huidi ajcxy dios'ajtpy. ¹² Chi ich ajcxy oy njäty ma je barco jättac huidi anajty yxii Siracusa. E jim ich ajcxy nhui'müy tugüig xii. ¹³ Ndzoñich ajcxy Siracusa barcojoty, nicxy ich ajcxy mejypa' mejypa', ixti nja'tyich ajcxy jim Regio. Com jabom oy ypidzimy jinboj, chi co maax oy nja'ty ich ajcxy Puteoli. ¹⁴ E jim ich ajcxy nbaaty nijëjity jäy huidi anajty mijpidaacp Jesús. Je' ajcxy xycohuanüyich co ich ajcxy jim hui'mipy tüg semaan. Chi ich ajcxy jadüg'oc ndzoñ, nnicxyich ajcxy jim Roma. ¹⁵ Je mibijcpidijc ajcxy huidi anajty jim Roma ymidou ajcxy ayuc co ich anajty ajcxy jim nicxy, chi ajcxy chooñ nijëjity oy xyjipcobadüygixyich ma je cajp mercado müd huidi anajty yxii Foro de Apio. Jacjadyii mibijcpidijc oy xyjipcobadüyich ma tüg jättac huidi anajty yxii, Tres Tabernas. Co Pablo jipco'ixüy je mibijcpidijc ajcxy, chi Dioscojuyip yajnaxy etz ñayjihuüy janch jotcuic. ¹⁶ Co ich ajcxy nja'ty jim Roma, chi je soldado huindzin cëyeycy je machyjäy ma je comandante, per a'ixüyb co Pablo tzinäy ahuinguic ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxii jim Roma

¹⁷ Tugüig xii maabi Pablo anajty yjäty jim Roma co capxyñiguejxy je judío huinmij'anäctijc huidi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ich ca' ti ndundigooyich müdi judío jäy ajcxy etz müd ajt nmij'ap nmijteedy ycötüjcin, chi je judíojäy ajcxy xymajchich etz xyciyejchich ma romano tungmüdpü jim Jerusalén. ¹⁸ Co je romano tungmüdpü ajcxy xy'amidooyich, huin'it ajcxy xyjanajtzmadzihuaañich, ca' ti ajcxy paaty ma ich huidi ajcxy xyajco'ögihuibich. ¹⁹ Co je judíojäy yjotmätcoty ajcxy, ca' ajcxy a'ixüy co nyajnajtzmadzihuibich, chi nayñibjctzohuiyich co nyajtiydunipyich ma je mij'ane'mbi ya Roma, oy ich ca' ti xihuin nmüidity müd ich nmigonaax nmigogajpich. ²⁰ Paady ti ngapxyñiguejxcixy co nyajmüdmüydäga'n ajcxy tigix co nmach'ityich. Müd co ich ajt n'ahuijxim co Dios ni-huäna'n yajnüzöga'n yi Israel jäy etz yajjugypiga'n je jäy tübi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ich ajcxy ni ti necy xyñijäty huidi tzoomb jim Judea müd müch ycixpi. E ni tüg ajt nmigügtijc ca' jibic xyñimüydägy. ²² Nja'amido'idaamyich jadu'n nej müch mmiydägy, com nnejhuüybich co huen yma'amyity jäy ymidzip'ajty je jemybi y'ijxpjcin.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac müdity. Jopy ajcxy yajtzondacy capxii müydägi ixti ycootztzuu'üy, jadu'n Pablo tzachyajnimaaygixy je Dios y'ayuc nej Dios yhuinma'n müdity. E yajjothuimbidaangixy anajty ma je Jesús müd co capxticxy je Moisés ycötujcin nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbijc ajcxy nej Pablo anajty ymina'n, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügüy yhuinma'n, chi ajcxy icy ca'ixy yöychóongixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Müch ajcxy oy mjamidohuipy n'ayucich, per ca' ajcxy mhuinjihuüip; oy mjahuindüxcixipy, e ca' ajcxy mhuinjihuüipy.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihuüy yhuimbüdz'ijtcixy, e ni ca' y'oc'ijxcixy müd yhuin e ni ca' ocmidoogixy müd yta'tz'ac, ni ca' huinjihuüygixy müd yjot yhuinma'n, ni ca' minipy ajcxy ma ich jigix myajtzögibich.

²⁸ Nejhuíygi xy miich ajcxy co jadachambi etz jacnıxpi xiı tiempo Dios y'ahuanıyb y'ayuc ytiy'ajt nej jėbi jėy y'alma ajcxy yajnıdzögıpy ma je jėy ajcxy huıdi ca' yjudıojėyıty, e je' ajcxy y'amıdo'idıpy.

²⁹ Co Pablo jadu'n nımay ajcxy, chi ajcxy ńıcxtáaygi xni chach ńayhuin'ııbéjti gi xy ńayhuingapxpéjti gi xy miń xyıpy.

³⁰ Pablo mejtz jımıjt jım chinay ma je pijctzoydıjc jım Roma, e yajxon xiic'adzoy capx'adzoy pin miń ycogapxiıyi. ³¹ Janch aguıjc jotcuıjc anajty capxhuäcxy je Dios y'ané'mın, e yaj'ixpi cy je Huındzin Jesús ytiy'ajt, e ni pin ma ycapx'adugyiı.

ROMANOS

Yi Necy Huidi San Pablo Yajniguejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy müd yi' y'apóstol ajcxy. Ti xypidägyich ma jada tung tügjiip co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcaxiibich ñecy co quexa'ñ anajty je Cristo ya naaxhuiñ. ³ Ngapxhuäcxich jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinix paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy müd yjihui'ñ ymic'ajt, chi ti yajnejhuiy anajty je naaxhuiñyäj co Jesucristo hue' je' Dios y'ung, huidibi müd huädz yjot huädz yhuinma'ñ, etz nañ ymüd Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ müd hich ajt ycixpi. E nañ müd Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi' mayjyä ajcxy ma tüg'óciy naax cajt, jigix jëbi mayjyä mibijccixy e nañ capxymidoogixy Jesucristo. ⁶ E müch ajcxy huidibi tzinaayb jim ma yi' cajt huidibi xijip Roma, nañ jadu'n Dios müch ajcxy ti xyhuin'ijxcixy jëbi ajcxy Jesucristo xyjyä'adyii.

⁷ Jada necy nguejxypich ma müch ajcxy nidüg'óciy huidibi jim yajpatcixp ma yi' cajt huidibi xijip Roma. Dios müch xychojccixp xyjihuiygixp, e nañ Dios ti xyhuin'ijxcixy jaydëbi yi' xyjyä'adyii, etz nañ jaydëbi mdzinaaygixy müd huädz mjot huädz mhuinma'ñ. Huen hich ajt nDios Teedy etz ajt nHuindzin Jesucristo may'ajt oy'ajt tunipy müd müch ajcxy etz nañ xyajjotcugihuip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäygidaacin ma Dios, müd Jesucristo yxi, co müch ajcxy ti mmibijccixy Jesucristo. Mayjyä ma nidüg'óciy naax cajt ti nejhuuygixy jadu'n nej müch ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxich Dios y'ayuc ytiy'ajt müd Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich müd müch ajcxy ycixpi. ¹⁰ Dios nmibijctzooybich pen yi' jadu'n tzojcp co jëbi nnicxyich cham tiempo jim ma müch ajcxy myajpaady. Canaag'oc hich müch ajcxy nicxy nja'ixaangixy, e ca' y'oyiy nej nixibich. ¹¹ Ooy njanijot'atyich co hich müch ajcxy nicxy n'ixaangixy, jaydëbi ngapxhuäcxibich Dios y'ayuc ma müch ajcxy müd Dios yjihui'ñ ymic'ajt, e nañ ngapxhuäcxibich Dios y'ayuc ma müch ajcxy jaydëbi tiydudägy mmibigipy ajcxy Jesucristo. ¹² Pen oyiiyb nej nixibich ma müch ajcxy myajpaady, chi jëbi njotcugihuibyich co anajty n'ixyich nej müch ajcxy mibijccixy Jesucristo, e nañ jaydëbi njotcugihuipy müch ajcxy co anajty m'ijxcixy nej hich nmibicyich Jesucristo, e jadu'n naysajjotcugiyim miñ xyipy.

¹³ Ndzojcpich co müch ajcxy mnejhuihuipy co canaag'oc ti njapidägyich nhuinma'ñich co anajty nnicxa'ñich ma müch ajcxy myajpaady, e ca' y'oyiy nej nixibych. Njijp'ijxypich co oyihuip jadachambi tiempo jadu'n nej jëbi nnixibych jim ma müch ajcxy. Com njacyaj'ixpigaamybich müch ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacyadyii jäy huidibi ajcxy ca' yjudíojäyity. ¹⁴ Dios jadu'n xyajñibich jada tung, paady copicy co ngapxhuäcxibich yi' y'ayuc ma tüg'óciy jäy, etz majaty naax cajt. Ngapxhuäcxamybich Dios y'ayuc ma yi' jäy ajcxy huidibi griego ayuc cápccixp, etz ñan ma yi' jäy ajcxy huidibi ca' griego y'ayuc capccixy. Ngapxhuäcxamybich Dios y'ayuc ma yi' ixpicy jäy ajcxy, etz

nañ ma yi jäy ajcxy huidibi ca' y'ixpicyity. ¹⁵ Paady ycixpi ooy ndzachcapxhuäcxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo'ydunyiiich Cristo y'ayuc ytiy'ajt. Com je' jada je oybi ayuc huidibi tzoon ma Dios, ymiid yi' Dios ymic'ajt jigix jëbi tüg'óciy jäy ajcxy paadipy pocy huinmeecxin, pinjaty cöbigaamb Cristo y'ayuc. Tim jayijp ti ngapxhuäcxy Jesucristo y'ayuc ytiy'ajt ma yi judíojäy ajcxy, e jac'axam ma yi huidibi ajcxy ca' yjudíojäyity. ¹⁷ Jesucristo ytiy'ajt xyajnejhuüyim co nmibijcim co Cristo ti jöch ajt nbocy etz nxihuín, chi Dios xycöbigaaním jadu'n nejjihuüy tudägyjäy. Ca' ji jadüg huinma'ñ nej Dios jëbi xycöbíjcm jadu'n nej jihuüy tudägyjäy. Com jadu'n jaybety y'ity ma Dios ñecy ma jadu'n yminañ: “Pinjaty tudägy'ajtin ti paady miid co ti mijpidägy Dios y'ayuc, hue' je' tzinähuip, ca' yjugy'ajtin ycixipy ytigoyipy.”

Je naaxhuiñyäjy ajcxy ypocy

¹⁸ Copicy nbaatim tudägy'ajtin ma Dios, com je Dios huidibi tzinaayb tzaipjoty ti xyajnejhuüyim co yi' tzaachytuna'ñ mictägy tüg'óciy jäy ajcxy huidibi midundigooyb yi' ytiy'ajt, tüg'óciy huidijaty jibic huinma'ñ ymiid, tüg'óciy yi' ajcxy huidibi yajtigooyb Dios ytiy'ajt miid je jibicpi huidibi ajcxy ytumyb. ¹⁹ Com yi jäy ajcxy huidibi jibicjot jibic-huinma'ñ miid, y'ijxpy ñejhuüyb ajcxy Dios ytiy'ajt, com Dios ti pidägy yi' ytiy'ajt ma yi' ajcxy yjot yhuinma'ñ. ²⁰ Ñejhuüyb jäy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quëxícip ya naaxhuiñ Dios ymic'ajt y'ijxpejt, oy ca' pin Dios ixy, huidibi Dios ti cojy ti macxy yejcpy ijxpejt co Dios yjiiyity, etz Dios ymic'ajt huinixi huinítiempo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjäy ajcxy, ca' ajcxy ni ti ayuc miid huaad adzohuimbidi Dios miid ajcxy ypocy ycixpi. ²¹ Com ñejhuüyb ajcxy co ji Dios yajpaady, e ca' ajcxy ojadajtcixy ca' ajcxy huindzigüygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidáacigixy amij agix, yhuinma'ñ ixtaaygixy huidibi ca' ytiy'ajtiny. Yajtigooyi ajcxy Dios ytiy'ajt ma ajcxy yjot yhuinma'ñ, e nañ miid'ajtcixy tzuuhuinma'ñ. ²² Yi jadu'mbi jäy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicyity, e ca' yjanchity, tzuu huinma'ñ ajcxy ymiid. ²³ Ma yjapadyii ojadajtcixipy huindzigüygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigüygixy jäy y'ahuinax e jäy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jäy ajcxy jadu'n ytundigoy, paady Dios ñajtz'ixiyyin ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigóoyigixy ñinícx miñ xyipy huidibi janch oy midzo'yduuni. ²⁵ Ma yjapadyii ixipy mijpidaaccixy je tiy'ajt tiydudägyi nej Dios ti yecy, huin'it ajcxy mijpidaaccixy aní huidijaty jäy ti cojy ti macxy. Ma yjapadyii ixipy huindzigüygixy Dios, huidibi ci'm ti yajcojtäy tüg'óciy tijaty ji yajpaatp, huin'it ajcxy huindzigüygixy jäy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngömaayim Dios huinixi huinítiempo. Amén.

²⁶ Miid co jäy ajcxy tzachhuindzigüygixy jäy y'ahuinax etz jactijaty ahuinax, paady ycixpi Dios ajcxy ñajtz'ixiyyi, chi ajcxy tungixy yi' jibic-huinma'ñ huidibi ci'm ñijot'ajtcixyp huidibi oy ymidzo'yduuni. Töxyjäy ajcxy ma yjapadyii chináaygixipy tudägy miid ñäy, chi ajcxy ñaymiidtzináayigixy e ñaymiidkundigóoyigixy actöxyjäydijc. ²⁷ Yëydijctijc ajcxy nañ jadu'n ñaymiidkundigóoyigixy miñ xyipy. Ñaymiiddzináayigixy ma yjapadyii ixipy chinaaygixy miid töxyjäy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huidibi oymidzo'yduuni, ypátcixipy ma ajcxy ñinícx je tzaachypí huidibi Dios ypidacpy miid yi' ajcxy ypocy ycixpi.

²⁸ Co yí jáy ajcxy jadu'n ci'm yhuinma'n ti pidaaccixy co ca' yajmij'ada'n Dios, paady ycixpi Dios ñajtz'ixiyii ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jáygidägy. ²⁹ Jáy ajcxy ooy mij jibic-huinma'n canaagnax nijot'ajtcixy; yëydijctijc ooy ajcxy jibic-huinma'n tungixy; ooy ajcxy migapxtigoy töxyjäy ajcxy; ooy ajcxy adzojccixy comeen'ajtin; ooy mi'ijxtinaaygixy ymigügtijc; ca' ajcxy ymigüg ixaangixy; ooy ajcxy yjäyyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca'p ajcxy ymigüg ixaangixy. ³⁰ Jáy ajcxy ooy nigapxy ni'ojíy ymigügtijc; ca' ajcxy ixaangixy Dios; ca' ti jáygidaaccixy; ooy ajcxy amij agix ñayjihuiyigixy; ooy ajcxy ci'm ñaygömaayigixy; ooy ajcxy cojy macxy jibic-huinma'n, ca' ajcxy capxymidoogixy ytaj yteedy. ³¹ Jáy ajcxy ca' y'ayuc-huinjihuiyigixy; ca' ajcxy cuydungixy yci'm'ayuc; ca' ajcxy ni pin tzojccixy jihuuyigixy; ca' ajcxy ni pin pa'ayoogixy. ³² Jadayaabi jáy ajcxy ñejhuiyb co Dios ti cojy ti macxy ycötujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy ixyipy yí jáy ajcxy janejhuiyigixy co padaangixy y'o'cin, huin'it ajcxy jactimtungixy jibic-huinma'n, e nañ jadu'n jotcuyc ajcxy co jac pinjaty jibic-huinma'n tungixy.

2

Dios tiydumb jadu'n nej yí' tzocy

¹ Paady co miich migüg m'ix'ixy mba'ixy ti ytumy, ti migüg ycapxyp ti anajty pocy mnaymöy, oy ixyipy ypinjäy ñejpyjäyity. Miich ooy ti pocy m'ixy ma huing jáy, e nañ jadu'n miich ooy mij mdundigoy, tim jadu'n nej yí' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumy ti migüg ycapxyp, nañ jadu'n miich Dios xychaachytuna'n. ¿Nej mdiy mdzögip co anajty Dios xytidyuna'n? ⁴ ¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuiy co Dios mij ooy xypa'ayoy xymimecxtucy, jigix mjothuibidipy nej mdundigoy ma Dios ytiy'ajt? ⁵ Miid co ooy mjetjuuñity mgöjuuñity, ca' ajcxy mjothuibida'n, ca' ajcxy m'ixmadza'n nej ajcxy mdundigooygixy. Paady ycixpi Dios huidibi tudägy tumb nigi miich yí' ooy mij xychaachytuna'n co anajty xii tiempo ycixy ytigoy, e Dios chaachytunamyb jáy ajcxy miid ypocy ycixpi. ⁶ Co anajty Dios tiyduñ yí naaxhuiñ jáy, chi yajnidagihua'n nidüg nidüg nej anajty ti chinäy. ⁷ Nijëjity jáy ajcxy oyjot oyhuinma'n tungixy jabom jabom, yjip'ijxpy ajcxy co Dios oybi ymöhuaangixy, nañ yjip'ijxpy ajcxy co Dios ycömayiyb, yjip'ijxpy ajcxy yjugy'ajtin huidibi ca' ycixipy ytigoyipy nimina. Yí jadu'mbi jáy Dios ymöhuaamyb jugy'ajtin huidibi ca' ycixipy ytigoyipy nimina. ⁸ Per Dios chaachytunamyb mijcajee yí jáy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'n. ⁹ Ayo'n tzaachypí ypadamyb tüg'óciy jáy ajcxy huidibi jibic-huinma'n ti tuñ. Nañ jadu'n miich judíojäy ajcxy tim jayijp mbadaangixy tzaachypí, pen mdundigooygixp, e chiini yí jacjadyii jáy padaangixy tzaachypí, pen tundigooygixp. ¹⁰ Tüg'óciy pinjaty oyjot oyhuinma'n tungixp, Dios ymöhuaamyb yí' ajcxy oy'ajtin, nañ cömayaanip yí' ajcxy Dios, etz nañ yajjotcugihuib ajcxy. Tim jayijp yí judíojäy pada'n ajcxy oybi, etz jac'axam yí jacjadyii jáy ajcxy.

¹¹ Dios ca' tiyduna'n jáy ajcxy huin'ijxpety, quipxyjaty tiyduna'n nidüg'óciy jáy ajcxy. ¹² Nidüg'óciy jáy ajcxy huidibi tundigooygixp, Dios yajtigoyaanip ajcxy yjugy'ajtin. Yí jáy ajcxy huidibi ca' m'idity Dios ycötujcin huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'n. Yí jáy ajcxy huidibi miid Dios ycötujcin cojay, Dios yajpocycähuaanip ajcxy miid yí' ycötujcin huidibi cojaayip. ¹³ Yí jáy ajcxy huidibi nigoob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'ñyii Dios jadu'n nej jihuiy ytudägyjäyity. Yí jáy ajcxy huidibi capxymidoob Dios ycötujcin, Dios cöbigaanip co ajcxy ytudägyjäyity. ¹⁴ Yí jáy ajcxy huidibi ca' m'idity Dios

ycötujcin huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuïy ajcxy müdity Dios ycötujcin. ¹⁵ Co je jäy ajcxy oyjot oyhuinma'ñ tungixy, huin'it yajnigüëxëccixy co ajcxy ymüid Dios ycötujcin ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiyigixy. E co patcixy oyjot oyhuinma'ñ, huin'it ooy oy ñayjihuiyigixy. ¹⁶ Jada je'du'n je jemybi oybi ayuc huidibi ngapxhuäcxypich co müinip je xii je tiempo co Jesucristo, müid Dios ycötujcin, tiydunip tüg'óciy jäy ajcxy nej anajty yjot yhuinma'ñ ajcxy müdity, tüg'óciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷ Miich ajcxy huidibi minamb co mjudíojäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnaygömäayigixy co miich ajcxy Dios xyjäy'adyii. ¹⁸ Miich ajcxy mnejhuïyb nej Dios tzocy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuïygixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt müdity, jadu'n nipaady nej jihuïy tüg huintzpi mhuijtzöy, e nañ jadu'n nipaady nej jihuïy mgodicxy je jäy ajcxy huidibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huidibi ayoob, huidibi ca' ti tiy'ajt nejhuïygixy, e mgapxhuijy yi jäy ajcxy huidibi ca' yhuinma'ñymejtzicxy. Miich ajcxy minamb co m'ayuc etz mdiy'ajt mbaatcixy ma Dios ycötujcin huidibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigiy tzaaboch quipychech, e miich ajcxy ci'm mdzachmeech je meen ma je tzajptijc ma je quipychech y'ity. ²³ Miich ajcxy mdzachnaygömäayigixy co mguydungixy Dios ycötujcin. Miich ajcxy m'ixtijy Dios müid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymina'ñ: "Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojiy Dios yxii."

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy müdity je tiy'ajt ma mninëcx co Dios xyjäy'adyii. Co ca' ajcxy mguyduunip Dios ycötujcin, huin'it Dios ca' xytunipcuendi co miich müdity je tiy'ajt ma mninëcx co Dios xyjäy'adyii. Jadu'n nipaady nej jihuïy ca' mdiy'ajttiyity. ²⁶ Co yi jacjadyii jäy ajcxy huidibi ca' müdity tiy'ajt ma ñinëcx, e cuyduni ajcxy Dios ytiy'ajt, jadu'n nej ajcxy ytiy'ajttiyity. ²⁷ Yi jacjadyii jäy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíojäy mbocycähuip miich ajcxy, oy miich ajcxy mjamiidity ixypy Dios ycötujcin huidi cojaayip, pen ca' mguydungixy. ²⁸ Je iixpejt janchypi co pinjaty Dios yjäy'ajtyp, canan je' je iixpejt huidibi ymüid ma ninëcx. E nañ jadu'n canan je' je tiy'ajttihuüi cötujcin huidibi jäy cuydun jecy'ajty. ²⁹ Je iixpejt janchypi co pinjaty Dios yjäy'ajtyp, je' je' je iixpejt huidibi ymüid ma yjot yhuinma'ñ, je oyjot oyhuinma'ñ huidibi ymüid, je iixpejt co je Espíritu Santo ti yajhuächyii yjot yhuinma'ñ, canan je' je tiy'ajt co ti cuyduñ je jecyip cötujcin huidibi cojay ijtp. Yi jadu'mbi jäy ajcxy cömay'idipy ma Dios, e ca' ycömay'ida'ñ ma jäy ajcxy.

3

¹ Pen tiy'ajt jadu'n nej nmına'ñich, ¿ti jäygidaacin yi judíojäy ajcxy ymüid ma Dios huidibi yi jacjadyii jäy ajcxy ca' müdity? ¿Ti jäygidaacin ajcxy ypatpy co ajcxy müdity tiy'ajt ma ñinëcx co Dios yjäy'adyii? ² Yi judíojäy ooy canaagnax oy'ajtin jamüidity. Tim jayijp Dios yajnibijci ajcxy yi' ycötujcin yi' y'ayuc huidibi cojaayip. ³ ¿Nej mdiy co Dios ca' cuyduna'ñ yi' y'ayuc müid yi' judíojäy ajcxy müid co nijëjity judíojäy ca' cuyduñ yi' ycötujcin? ⁴ Dios ca' jadu'n huinma'ñ müdity nej jäy ajcxy huinma'ñ müdity. Oy ixypy

nidüg'óciy jây y'anidaaccixy, Dios ca' y'anidäga'ñ nimina. Paady jadu'n jaybety miiñ ma Dios y'ayuc co David jadu'n yminañ:

Ñejhuihuipy jây ajcxy co miich, Huindzin Dios, tudägy mguyduñ yí m'ayuc. Ca' huaad pinjaty ymina'nip co ca' miich mguyduñ yí m'ayuc.

⁵ Pen Dios cōmaybidzimipy mīd ajt nbocy ycixpi, ¿nej tiy'ajt jadu'n nej jây yminaangixy co Dios ca' oy ytuñ, co xychaachytuunim mīd ajt nbocy ycixpi? ⁶ Ca' yjadu'nity. Co ixypy yjadu'nity, Dios ca' yí tiydunipy naaxhuiñjây mīd ajcxy ypocy ycixpi.

⁷ Co ixypy ytiy'ajtiy jadu'n nej jây yminaangixy co Dios ooy yjotujcity co ca' xychaachtunipyich mīd nbocyich ycixpi, jac'oy co ixypy ndundigooyich, jigix Dios janch ycōmaybidzimipy. ⁸ Jac'oy ixypy nmīnaanīm: “Tzoc tundigooyim jigix jēbi Dios cōmay ypidzimipy.” Ixti nijējity jây ti xyñihuambetyich co ich jadu'n ti nmīna'ñich. Ca' jadu'n nmīna'ñich co Dios jây tzaachtunipy ninigoob. Dios chaachtunipy pocyjây ajcxy, com paatip ajcxy jadu'n yí tzaachypī.

Nidüg'óciy ich ajt nbocymidity

⁹ ¿Nej janch jadu'n co ich ajcxy huidibi judíoñjây, jac'oyjây ich ajcxy ca'ydi yí jacjadyii jây ajcxy? Ca' yjadu'nity, ca' ich ajcxy njac'oyjâyity. Com ti jayijp nyaj'ixpiyich co tüg'óciy jây ajcxy yajpaady pocymīd, yí judíoñjây, etz nañ jadu'n jacjadyii jây ajcxy. ¹⁰ Com jadu'n jaybety miiñ ma Dios ñecy ma jadu'n yminañ:

Ca' ji ni tüg jây tudäcypī, ni tüg.

¹¹ Ca' ji ni pin huidibi huinjihuñyb Dios ytiy'ajt. Ni pin huidibi ixtaayb Dios ytiy'ajt.

¹² Nidüg'óciy jây ti ixmajtcixy Dios ytiy'ajt. Quipxy ycapxy ajcxy ytumyb co ytundigooygixy. Ca' ji ni pin, pin huädz oy yjot oy yhuinma'ñ tumb, ca' ji ni tüg.

¹³ Yí jây ajcxy ooy ycapxtigooygixy, oy ajcxy yhuin'ñ mīd y'ayuc. Jadu'n ajcxy yōcpajc nipaady nej tüg öcpi jut huidibi ahuädz. Ooy ajcxy yajtzachñy mīd y'ayuc jadu'n nej jihuñy tza'ñ chüch.

¹⁴ Ooy ajcxy ycapxtigooygixy. Ooy ajcxy jibic ayuc capxcixy.

¹⁵ Mīd yinjaty huenjatypī ayuc, mic'amy ymigüg yaj'o'ccixy.

¹⁶ Ma ajcxy yhuidity ooy midundigooygixy ymigüg, e nañ yecy ajcxy tajin mayin.

¹⁷ Ca' ajcxy nejhuñygixy nej huaad chinaaygixy jotcujc, ca' ma ti tzip ti capxy.

¹⁸ Ni cahuinmaaygixy nej Dios tzigüygixipy.

¹⁹ Tüg'óciy ayuc ycojaayity ma Dios ycōtujcin necy, mic'ajt mīdpi mīd yí jây ajcxy huidibi yajmij'ajtp je cōtujcin. Dios ti pidägy yí ycōtujcin, jaydēbi pinjaty tundigooyb, huaad ca' ti anñ tuñ ma Dios. Dios ytiydunipy tüg'óciy jây ajcxy mīd yí ycōtujcin. ²⁰ Dios ca' capxpada'ñ co ytudägyity, mīd co ti cuydunyii ycōtujcin. Dios ti pidägy ycōtujcin jaydēbi nejhuñyim co ajt nbocymidity.

Yí alma nidzoocin, hue' yajpaady mīd mibijcin

²¹ Jadachambi Dios xyajnejhuñyim jemybi tiy'ajt jadu'n nej tudägy'ajtin jēb nbaatim ma yí, e jada jemybi tudägy'ajtin tiy'ajt, ca' yí yjadu'nity nej yí tiy'ajt huidibi yajpatp ma Dios ycōtujcin jecy'ajtpyi. Per yí Dios y'ayucnajtzcapxñyb ñecy etz Dios ycōtujcin necy yejc tiy'ajt jecy'ajty co Dios xymōhuaanim tudägy'ajtin. ²² Jadu'n Dios yaj'ahuimbidaangixy tudägy tüg'óciy jây huidibi mibijcp Jesucristo, ca' ñejity pinjây ajcxy, pen judíoñjây o pen ca' judíoñjây ajcxy. ²³ Com nidüg'óciy naaxhuiñjây ti ytundigooygixy. Ni tüg jây yhuädz'ajtin ycanaybadyii mīd Dios yhuädz'ajtin y'oy'ajtin.

²⁴ (Mīd co nidüg'óciy jây ytundigooygixy), paady ycixpi Dios mijmay'ajt mij'oy'ajt tuñ ninigoob mīd tüg'óciy jây ajcxy, e Jesucristo ti cojuydäy tüg'óciy ajcxy ypocy, e jadu'n yaj'ahuimbity tudägy nidüg'óciy jây ajcxy huidijaty mibijccixp Jesucristo. ²⁵ Dios yquejx y'ung ya naaxhuiñ, jaydēbi huinmeecxip jây ajcxy ypocy, mīd co Jesucristo ti y'ögy mīd ajcxy ypocy ycixpi. Dios yhuinmeecxip jây ajcxy ypocy co ajcxy mibigipy Jesucristo. Jayijp ca'ni anajty Jesucristo miiñ ya naaxhuiñ, Dios ooy mimecxtujcy jây ajcxy, ca'

anajty m̄id̄ity jotcōduuyb jāy ajcxy ypocy. ²⁶ Jadachambi x̄i tiempo Dios ti yaj'oȳiy jadu'n nej jēb huinmeecxipy jāy ajcxy ypocy, e jadu'n yaj'ahuimbidity ajcxy tudāgy ma yī' yhuinduu. Jadu'n Dios tuñ jigix ñiguēxigipy co Dios tudāgy yī', e tudāgy'adaamni yī', co cōbicy jāy, yī' pinjaty mibijcp Jesucristo.

²⁷ ¿Ti huaad jāy ajcxy tungixy huidibi jēbi m̄id ñaygōmayiyb ma Dios? Ca' ni ti. ¿Na'am y co yjadu'nity? ¿Nej jēbi ajcxy ñaygōmayiyb m̄id co yajm̄ij'ajtcixy Dios ycōtujc̄in? Ca' yjadu'nity. Ca' huaad ñaygōm̄ayigixy cī'm, com Dios ti yaj'ahuimbity jāy ajcxy tudāgy huidibi m̄ijpidacp Jesús. ²⁸ Paady nm̄ina'ñich co jāy ajcxy y'ahuimbity tudāgy co ajcxy mibicy Jesucristo, e canan co janch ypaad jacuydungixy canaag cōtujc̄in.

²⁹ ¿Nej miich ajcxy mdijcixy Dios ytuñ m̄id ac yī'yī' judíōjāy ajcxy, e ca' jacm̄id pinjaty? Ca' yjadu'nity. Dios tuumb m̄id janch nidüg'óciy jāy ajcxy. ³⁰ Ji tūgpajc Dios, e yī' tú'ciy ytuñ m̄id judíōjāy, etz nañ jadu'n jacjadyi jāy ajcxy. Dios yaj'ahuimbityaayb tudāgy nidüg'óciy jāy ajcxy co ajcxy mibijccixy Jesucristo. ³¹ Co jadu'n nbaatim ndudāgy'ajtin m̄id co nm̄ibijc̄im Jesucristo, ca' nm̄inaanim Dios anajty yī' ycōtujc̄in je jecyip nya-jcōdigooyim. Hue' janchtiy n̄igi anajty nm̄ic'ajtm̄ooyim Dios ycōtujc̄in.

4

Je iixpejt huidi Abraham yejc

¹ ¿Nej n'ocm̄inaanim? ¿Ti oybi ti paady ma Dios je Abraham ñich ajt nm̄ij'ap nm̄ijteedy? ² Co ixypy Dios Abraham tudāgy ti ixy, m̄id co oybi ti tuñ, jēbi Abraham ixypy ñaygōmayii. Per ca' huaad cī'm ñaygōmayii ma Dios. ³ Jadu'n jaybety ym̄iñ ma Dios ñecy ma jadu'n ym̄ina'ñ: “Abraham ym̄ijpidaaci Dios, e paady Dios jadu'n cōbijcy Abraham jadu'n nej tūg tudāgyjāy.” ⁴ Je jāy huidibi ymuju'ñ patp m̄id ytung ycixpi, jada meēñ huidibi ymuju'ñ'ajtpy ca' n̄igoo ñimōyii, hue' tim paatip jadu'n m̄id ytung ycixpi. ⁵ Yī' jāy huidibi ca' j̄ijp'ixy co tudāgy'ajtin pada'ñ ma Dios m̄id oy'ajtin ycixpi huidibi ytumyib, jēyi ym̄ibijcpy ym̄ijpidacpy co Dios yaj'ahuimbida'ñyii tudāgy. Yī' jadu'mbi jāy tudāgy'ajtin ypadamy m̄id ym̄ibijc̄in ycixpi. ⁶ Jaybety ym̄iñ ma Dios ñecy co je David jecy'ajty nim̄iydacy tūg jāy huidibi ooy anajty jotcuyc ñayjihūiyii m̄id co Dios ti y'ixyii jadu'n nej jihūiy ytudāgyjayity m̄id ym̄ibijc̄in ycixpi, e ca' nm̄inaanim m̄id oyjāy'ajtin ycixpi huidibi ytumyib. ⁷ David jadu'n ym̄ina'ñ:

Jotcuyc je jāy ajcxy huidibi ypocy ti yhuinmecxyii, huidibi ypocy ti yajtigoyii.

⁸ Jotcuyc je jāy huidibi Dios cōbijc̄ip jadu'n nej jihūiy ca' ypocy ym̄id̄ity.

⁹ ¿Nej janch tiy'ajt jadu'n co jada jotcuyc'ajtin huidibi David ñim̄iydac jecy'ajty, co ac yī' judíōjāy yī' ajcxy padaamb huidijaty m̄id tiy'ajt ma ñin̄icx co Dios yjāy'adyii? Ca' yjadu'nity, yī' jacjadyi jāy nañ jadu'n yī' ajcxy pada'ñ jotcuyc'ajtin. Ti nm̄ināangixyich co Abraham ym̄ibijci Dios, e Dios ycōbijci jadu'n nej jihūiy ytudāgyity. ¹⁰ ¿Nej mdijy Dios ycōbijci Abraham jayijp ca' anajty yajtiy'ajttiñi? o ¿ti anajty yajtiy'ajttiñi? Dios ycōbijc̄i Abraham jadu'n nej jihūiy ytudāgyjāyity ca'ni anajty pidacy tiy'ajt ma ñin̄icx co Dios yjāy'adyii. ¹¹ Jayijp anajty Abraham ti mibicy Dios, e ti anajty Dios ycōbigyii. Jac'axam Dios Abraham je cōtujc̄in mooy co huen tiy'ajttiñiipy y'ung etz y'ap y'oc. Je' je' iixpejt'ajtp co Dios anajty jayijp ti ycōbigyii jadu'n nej jihūiy ytudāgyjāyity, ca'ni anajty ym̄oyii cōtujc̄in. Co Dios jadu'n ytuñ m̄id Abraham jadu'n nipaady nej jihūiy Abraham nm̄ijteedy'ajtim ñich ajt nidüg'óciy huidibi cham mibijcp Jesús. ¹² Abraham nañ jadu'n ñim̄ijteedy'ajtyp yī' judíōjāy huidibi mibijcp m̄ijpidacp Dios tim jadu'n nej yī' mibicy anajty Dios, jayijp ca'ni anajty m̄id̄ity tiy'ajt ma ñin̄icx co Dios yjāy'adyii. Jadu'n nipaady nej jihūiy Abraham ca' nm̄ijteedy'aty yī' judíōjāy huidibi ca' mibicy Dios.

Je huidibi Dios ti xyaj'ahuan̄iyim ti ycixy yca'px m̄id je mibijc̄in

¹³ M̄id co Abraham etz y'ap y'oc ym̄ibijcpy ym̄ijpidacpy anajty ajcxy Dios, e paady anajty Dios yaj'ahuimbida'an̄igixy tudāgy, e paady Dios nimay Abraham co yī' naaxhuiñybi

yi' ajcxy je' adaanip. Canan jadu'n ajcxy Dios ñimayi co ymōhuaanigixy je naaxhuiñybi mīd co anajty nidüg'óciy ajcxy ti cuydungixy Dios ycōtujcīn. ¹⁴ Co Abraham etz y'ap y'oc padaangixy je naaxhuiñybi huidibi yaj'ahuaniiyi, mīd co ajcxy ti cuydundaayi Dios ycōtujcīn, paady naadig'i'ajtp ixyipy co nmībījcīm co Dios xyaj'ahuimbidaanim tudägy. E nañ naadig'i'ajtp ixyipy co Dios je Abraham ñimay: "Je naaxhuiñybi miich je' mje'adaanip, com ti xymibicyich." ¹⁵ Je pinjaty mijpidaacp Dios ycōtujcīn je jecyip, Dios yi' tzaachytunaanip, com ca' cuydundaaygixy. Pinjaty ca' mīdity Dios ycōtujcīn huidibi jaybetyip, ca' yi' mīdundigooygixy jadayaabi cōtujcīn.

¹⁶ Mīd co Abraham anajty Dios ti mībicy, paady ycīxpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ mīd Abraham, jaydēbi tūg'óciy pinjaty mībījcp Dios, tīm jadu'n nej Abraham mībījcy Dios, jēbi ajcxy paatcīxy yi' oy'ajtin huidibi Dios yajnimay Abraham co mōhua'ñ je oy'ajtin huidibi yegamyb ninigoobi. Dios ycuydunamyb yi' y'ayuc mīd tūg'óciy jāy huidibi mībījcp Dios, tīm jadu'n nej Abraham anajty mībicy Dios, canan yī'yi judío jāy ajcxy padam oy'ajtin, com Abraham ijxpejt yejc ma tūg'óciy jāy ajcxy. ¹⁷ Ma Dios yhuinduu jadu'n nipaady nej jihuīy Abraham iich ajt nmī'ap'ajtim nmījteedy'ajtim nidüg'óciy huidibi mībījcp Dios, com Abraham nañ jadu'n ymībījcpy anajty Dios. Com jadu'n jaybety ymīñ ma Dios ñecy co Dios jecy'ajty jadu'n ñimay Abraham: "iich miich nyajñībījcpy co miich mnīmī'ap'adamyb mnīmījteedy'adamyb tūg'óciy je mayjāy huindu'mybi naax huindu'mybi cājp." E Dios ycuydunipy yi' y'ayuc com mīc'ajt mīd, ixti jaydēbi yajjugypīgipy jadüg'oc jāy tūbi y'óccixy. E nañ mīc'ajt mīd jaydēbi ane'mīn pidāgy co huen yjii'adipy huidijaty ca' ca'tni.

¹⁸ Mīd co Dios anajty ti ñimāyī co ymīd'adamyb may y'ap y'oc, paady ycīxpi Abraham ti jīp'ixy anajty co Sara anajty y'ung'ixa'ñ. Canaag jīmījt anajty jajīp'ixy co huen y'ung paadip. Ti anajty tiempo ñajxni mīna y'ung'ixipy. Hue' Abraham ymībījc huidibi anajty Dios ti yajnimāyī co yi' mīd'idamyb may'amy y'ap y'oc. Paady ti nī'ap'aty ti nīdeedy'aty may'amy y'ap y'oc. ¹⁹ Abraham ti anajty ymīc'ajt ycīxni com ti anajty ymījāyīyī. Ymīd anajty mīgo'px jīmījt, e nañ yi' ytōxyīc Sara nī tūg anajty ti yca'ung'ixy, per Abraham yjacmībījcp anajty co Dios cuyduna'ñ y'ayuc mīd yi'. ²⁰ Abraham ca' anajty ixmach yi' ymībījcīn jadu'n nej anajty Dios ymīdity ymīc'ajt jaydēbi cuydunip yi'y'ayuc. Chi Abraham iibaty capxpaty Dios. ²¹ Com Abraham ti anajty huinma'ñ ypidāgy ma Dios co yi' ymīd ymīc'ajt jaydēbi ycuydunīyb yi' y'ayuc huidibi yaj'ahuanīy. ²² Com Abraham ymīpīdaacīp anajty Dios y'ayuc, paady Dios anajty ti cōbīcy Abraham, e jadu'n anajty ti yajnaxy nej jihuīy ytudāgyjāyīty.

²³ Dios ymoy Abraham jada y'ayuc huidibi jaybety, canan jēda'ajty Abraham yajmoy, nañ yajmoyday mayjāy. ²⁴ Nañ jadu'n jaybety mīñ jada ayuc mīd iich ajt ycīxpi. Dios nañ xycōbīgaanim jadu'n nej jihuīy ajt ndudāgyjāyīty mīd co nmībījcīm Dios huidibi ti yajjugypījcy anajty jadüg'oc ajt nHuindzīn Jesucristo. ²⁵ Dios ycīyejc Jesús huen yaj'ōgyī mīd ajt nbocy ycīxpi. E nañ Dios yajjugypījc Jesús jadüg'oc jaydēbi xyaj'ahuimbījtim tudāgy ma Dios.

Je nej yhuimbīdzīmni co Dios xycōbījcīm tudāgyjāy

5

¹ Mīd co nmībījcīm nmīpīdaacīm ajt nHuindzīn Jesucristo, paady Dios ti xyaj'ahuimbījtim tudāgy. E mīd co Dios ti xyaj'ahuimbījtim tudāgy, paady jotcuīc n'ījtim mīd Dios. ² Co nmībījcīm nmīpīdaacīm Cristo, chi nbaatim je may'ajt je oy'ajt huidibi Dios ytumy mīd iich ajt, e jadu'n oy n'ījtim mīd Dios, ca' ma ti tzip. Nañ ooy njotcugīyīm, mīd co njīp'īxīm co nbadaanim Dios y'oy'ajtin. ³ Canan jēda'ajty nmījotcuīc'ajtim co nbadaanim Dios y'oy'ajtin, nañ jadu'n tzoc mījotcuīc'ajtim ayo'n tzaachypī. Com nejhuīyīm co nmīnāxīm nyajnāxīm tzaachypī, huīn'it jēbi nyajtunīm

mecxtujcin. ⁴ E co nyajtunim mecxtujcin, cōmay najxim ma Dios, e co anajty cōmay ti nnajxim, chi njijp'ijxim co nbadaanim oy'ajtin ma Dios. ⁵ Com njijp'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspíritu Santo xy'adigñiyim xyjottigñiyim huidibi xyajnejhuiyim jadu'n nej Dios xychojcin xyjihuiyim.

⁶ Jecy'ajty co anajty ca'ni Jesucristo ymiñ, je naaxhuiñjāy ca' anajty mic'ajt mñdity nej ci'm y'ahuimbijtcixipy tudāgy. Co yhuaad'ajtni je xñi je tiempo huidibi Dios ti yaj'ixtāgy, huin'it Cristo y'o'cy mñd iich ajt nbocy ycixpi mñd co ndigooyim mñd Dios ytiy'ajt. ⁷ Co ixyipy n'ijxtaayim pinjaty codināhuip tūg jāy tudāgyti ma yi' o'cin, ca' ni pin nbaatim. Co ixyipy n'ijxtaayim pinjaty codināhuaamyb tūg jāy huidibi ooy ycōmayity ma yi' o'cin, ca' yjecyity co nbaatim tūg metz. ⁸ Per Dios yajniquēxīcyp jadu'n nej xychojcin xyjihuiyim mijcajee co quejxy Cristo huen o'cy mñd ajt nbocy ycixpi, oy anajty iich ajt ooy njacpocy-tuunim. ⁹ Cristo ti xyaj'ahuimbijtim tudāgy co ñi'py ti temy ti yocy mñd ajt nbocy ycixpi, e nañ Cristo ñigi may'ajt tuna'ñ mñd iich ajt ycixpi co anajty xyajñdzōgaanim ajt n'alma, jadu'n nej Dios tzaachytuna'ñ naaxhuiñjāy mñd ajcxy ypocy ycixpi. ¹⁰ Co anajty ca' Cristo ymiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyi co quejxy y'ung ya naaxhuiñ, e y'o'cy mñd ajt nbocy ycixpi. Mñd co Cristo xycodinaayim ma yi' o'cin, paady ñigi xypubejtim xypudigñiyim cham co yajpaady juugy. ¹¹ Canan jada'ajty co Jesucristo xyajñdzōgaanim ajt n'alma, nañ jadu'n tzoc xondaacim mñd co n'ijtim mñd Dios, mñd je may'ajt huidibi ajt nHuindzin Jesucristo ti tuñ mñd iich ajt ycixpi co yaj'oyi je tzip nej anajty Dios nmidzip'ajtim, jēbi jotcujc n'ijtim mñd Dios.

Adán etz Cristo

¹² Mñd jada ycixpi co yi' pocytunñ chondacy jecy'ajty ya naaxhuiñ mñd tūgpi jāy. E co jāy ytundigoy oga'n mñd Dios, paady ycixpi je o'cin ytigñiy ya naaxhuiñ. Mñd co tūg'óciy jāy midundigooygixy Dios, paady tūg'óciy jāy patcixy yi' o'cin. ¹³ Janch tiy'ajt jadu'n co jāy ajcxy ytundigooy jecy'ajty jayijp ca'ni anajty Dios yecy yi' ycōtujcin cojaaybi, e co ca' jāy anajty ajcxy cōtujcin mñdity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' mñdity Dios ycōtujcin, nañ jadu'n y'o'ctay ajcxy, chondacy mñd Adán, ixti yja'ty ma Moisés yxñ ytiempo. Nañ o'ctay jāy ajcxy huidibi tigachjaty tundigooy, ca' yjadu'nity nej Adán oga'n ytundigooy. Iich ajt nninīcx ymñd je jibicpi huidibi nbaatim ma Adán. Per ajt njemyjot njemyhuinma'ñ nbaatim ma Cristo.

¹⁵ Je pocytunñ huidibi Adán yajtzondac, ca' naybadyii mñd je tudāgy'ajtin huidibi Dios ti xyñimooyim. Mñd je pocytunñ ycixpi huidibi tūg jāy ti yajtzondāgy, tūg'óciy jāy öcin ti paady. Dios mñd tūg yēdjic, je Jesucristo, mijmay'ajt tuñ mñd jāy ajcxy ycixpi co yaj'ahuimbijtcixy tudāgy, chi mayjāy tudāgy'ajtin ti paady. ¹⁶ Per je tudāgy'ajtin huidibi Dios xyñimooyim, ca' jadu'n naybadyii mñd huidibi Adán ytuun. Mñd co Adán ytundigoy tūgtecy mñd Dios, paady ycixpi mayjāy o'cin ti paady mñd tūg pocy ycixpi. Mñd co Dios ti xyñimooyim tudāgy'ajtin mñd Jesucristo, paady mayjāy tudāgy'ajtin y'oy'ajtin ti patcixy huidibi mibijcp Cristo. ¹⁷ Mñd co tūg jāy capxycōmidodacy Dios, paady tūg'óciy jāy ti patcixy yi' o'cin. Mñd co tūg jāy, je Jesucristo, may'ajt oy'ajt tuñ co xyaj'ahuimbijtim tudāgy, paady tūg'óciy jāy ajcxy huidibi mibijcp Jesucristo ypadaangixyp jotcujc'ajtin etz nañ chināhuaangixy jibby tzajpjoty ma Jesús y'ane'my.

¹⁸ Mñd co tūg jāy ytundigoy oga'n, paady nidūg'óciy je mayjāy ypocycāy ajcxy, e patcixy yi' o'cin. Nañ tim jadu'n mñd tūg jāy huidibi ti chināy tudāgy, Dios mayjāy yaj'ahuimbijty ajcxy tudāgy, e ti patcixy yjugy'ajtin huidibi ca' ycixipy ytigoyipy nimina xñi. ¹⁹ Mñd co tūg jāy capxycōmidodacy Dios, paady tūg'óciy jāy ti patcixy je pocy. Nañ mñd co tūgpi jāy capxymidoy Dios, paady je mayjāy tudāgy'ajtin ti patcixy huidibi mibijcpi Jesucristo.

²⁰ Co Dios moy jāy ajcxy yi' ycōtujcin huidibi cojaayip, chi ñigi jāy ajcxy nejhuiyigixy co ypocytungixy. Je may'ajt oy'ajt huidibi Dios ytumy, ñigi yi' y'oyity, ca'ydi je mijpocy huidibi jāy ajcxy ytungixyp. ²¹ Tim jadu'n nej co jāy ypocytungixy, huin'it ajcxy pocymñd chinaaygixy, ixti mabaad anajty y'öccixy mñd ypocy ycixpi. Nañ tim jadu'n co Dios

may'ajt tuuñ co yaj'ahuimbity jäy ajcxy tudägy, huin'it Dios ane'my yi' ajcxy chinaayin müid tudägy huinma'ñ, etz nañ xymöhuaanim jugy'ajtin huidibi ca' ycixipy ytigoyipy nimina, co nmijpidaacim ajt nHuindzin Jesucristo huidibi yjugy'ajtin yejc müid ajt nbocy ycixpi.

O'cy müid yi pocy ycixpi, jugy'aty müid Cristo ycixpi

6

¹ ¿Nej n'ocmīnaanīm? ¿Tzoc ooy nīgi tundigooyīm jigix Dios nīgi may'ajt tunipy müid ich ajt? ² Ca' jadu'n ytiy'ajtiy, ca' huaad njacpocytuunīm. Co nmibijcim Jesucristo, chi jadu'n nipaady nejihuīy ti n'o'cim, e cham ca' n'ijtim pocymüd. ³ ¿Nej ca' mnejhuīyigixy jada tiy'ajt? Co nnibejtim müid Jesucristo yxi, chi n'ijtim müid Jesucristo. Jadu'n nipaady nej jihuīy ti n'o'cim quipxy müid Cristo co yi' y'o'cy müid ajt nbocy ycixpi. ⁴ Co ich ajt nnibejtim jadu'n nipaady nej jihuīy ti n'o'cim, e ti nnaaxtigīyīm quipxy müid Jesucristo. Dios Teedy müid ymic'ajtin oybi yajjugypijcy Cristo co anajty ti y'ögy, chi Cristo paty jemybi jugy'ajtin, nañ jadu'n ich ajt ti nbaatim jemybi jugy'ajtin quipxy müid yi', paady copicy ndzinaayīm müid jemybi jot jemybi huinma'ñ.

⁵ Co nmibijcim Jesucristo, chi n'ijtim müid yi', co yi' ti y'ögy, jadu'n nipaady nej jihuīy ti n'o'cim quipxy müid yi'. Co Jesucristo yjugypijcy müid jemybi yjugy'ajtin, nañ jadu'n ich ajt nbaatim jemybi jugy'ajtin quipxy müid yi'. ⁶ Nejhuīyīm ich ajt nej anajty jibic-jot jibic-huinma'ñ nmüd'ajtim jayijp'aty ca'ni anajty nmibijcim. Jadu'n nipaady nej jihuīy ajt njibicjot njibic-huinma'ñ ti y'ögy quipxy müid Cristo co yi' y'o'cy cruudzcixy. Cristo ti y'ögy müid ajt nbocy ycixpi, jigix jēbi n'ijxmajtzim pocytunī huinma'ñ, etz jigix jēbi je pocytunī ca' xyjac'ane'mīm ajt njot nhuinma'ñ. ⁷ Com pinjaty ti y'ögy, yi' ypocytunī ca' ti mic'ajt jacmūdity ma yjot yhuinma'ñ. ⁸ Pen jadu'n nipaady nej jihuīy ti n'o'cim quipxy müid Cristo, paady ndzināhuaanim njugy'adaanim quipxy müid yi'. ⁹ Nejhuīyīm co Cristo ti yjugypijcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajt jacmūdity ma Jesucristo. ¹⁰ Co Cristo ti y'o'cy müid jäy ypocy ycixpi, chi y'ögy tüg tecypajc müid nidüg'óciy jäy ajcxy ycixpi. Co Jesucristo yjugypijcy, chi tüg'óciy huidibi yi' ytumyb ma yi' chinaydac yjugy'ajttac, yi' ytumyb müid Dios ycixpi. ¹¹ Nañ jadu'n miich ajcxy mhuinma'ñypidaaccix jadu'n nej jihuīy ti m'öccixy, e yi' ypocytunī ca' ti mic'ajt jacmūdity ma miich ajcxy mdzinaayin. E jadachambi xī tiempo tzinaaygix müid Dios ycixpi quipxy müid Jesucristo ich ajt nHuindzin.

¹² Paady ycixpi ca' huaad xy'ane'mgixy je jibic-huinma'ñ huidibi ajcxy mninīcx yjanijot'ajtpy. ¹³ Ca' huaad mgīyejccixy yi' mninīcx ma pocytunī. Naygīyéjigix ma Dios, ixmajtzcix yi' pocytunī. Jadu'n nipaady nej jihuīy ti m'öccixy, e ti mjugypijccixy jadüg'oc. Hue' janchtiy cīyejccix yi' mninīcx ma Dios, jaydēbi mdzināaygixipy müid ajcxy tudägy mjot mhuinma'ñ, e cuydungix Dios chojcin. ¹⁴ Jadachambi xī tiempo ca' miich ajcxy mdzinaaygixy pocymüd, jadu'n nej jecy'ajty ajcxy mdzinaaygixy co anajty ajcxy mguydungixy Dios ycötujcin je jecyip. Hue' janchtiy tzinaaygix müid Dios ycixpi, com Dios mij may'ajt ti tuñ müid miich ajcxy.

Tüg ijxpejt huidibi yajpatp ma n'ijtim yajtuñ

¹⁵ ¿Ti huaad nduunīm? ¿Nej jēbi huaad njacpocytuunīm? Com Dios mijmay'ajt ti tuñ co ti jöch ajt nbocy etz nxīhuin, e Dios ycötujcin, je jecyip, ca' xyjacyajpocycāhuim. Ca' huaad njacpocytuunīm. ¹⁶ ¿Mnejhuīyb miich ajcxy jada tiy'ajt? Co ixipy pinjaty ñaygīyegyī co ytuna'ñ müid tüg huindzin huidibi mic yajtumb, copicy co je tumbi capxymidohuipy je yhuindzin. Nañ tim jadu'n nipaady müid pocytunī. Pen mnaygīyējicp müid pocytunī, huin'it anajty pocy xy'ane'my ma mdzinaayin, ixti mabaad anajty m'ögy müid mbocy ycixpi. Co mnaygīyéjigixipy ma Dios, huin'it ajcxy mgapxymidohuipy Dios, e

mdzinähuip ajcxy tudägy. ¹⁷ Jecy'ajty miich ajcxy anajty pocy xy'ane'mgixy, co jibic-huinma'ñ mdungixy. Nyajnajxpyich jäygidaacin ma Dios co jadachambi tiempo ti mgöbijccixy cixyjot huinijot Dios ytiy'ajt huidibi xyaj'ixpijccixp, e mgapxymidoogixy Dios. ¹⁸ Cristo ti xyaj'a'oyiijy ajcxy mjot mhuinma'ñ, ca'ydi mjactzinaaygixy pocymiid. Ti mhuinma'ñ mbidaaccixy co mgapxymidohuaangixy Dios e mdzinähuaangixy tudägy. ¹⁹ (Ngapxhuijpyich miich ajcxy cham miiid naaxhuiñjy y'ayuc ytiy'ajt, com ca' yajxon mhuinjihuuygixy Dios y'ayuc ytiy'ajt.) Jadu'n nej jecy'ajty co ca' anajty mmibijccixy Cristo, ooy anajty mnaygiyéjigixy xii ya ma jibic-huinma'ñ, e mdundigooygixy xii ya miiid mninīcx. Ooy miich anajty ajcxy miiidity jibicpi ma mjot mhuinma'ñ, ooy anajty mdundigooygixy. Jadachambi xii tiempo naygiyéjigix ma Jesucristo, jigix jēbi huaad mdungixy miiid tudägy jot tudägy huinma'ñ, etz jigix jēbi huaad mdzinaaygixy miiid huädz jot huädz huinma'ñ.

²⁰ Co anajty yi jibic jot jibic-huinma'ñ xy'ane'mgixy, chi ca' je oyjot oyhuinma'ñ anajty xy'oc'ané'mgixni. ²¹ ¿Ti jotcuje'ajtin miich ajcxy ti mbaatcixy co jibic jot jibic-huinma'ñ mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'ñ xyyajnicxp ajcxy ma yi o'cin. ²² Jadachambi xii tiempo Dios ti yaj'oyiijy nej jēbi m'ixmájtzcixipy yi pocytunī, ca' huaad mjactzinaaygixy pocymiid. Ti m'ahuimbijtcixy Dios ytumbi, jadayaabi tzinaayin xymöhuip ajcxy mjotcuje'ajtin. Tiydudägy cham tzinaaygix miiid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytunī ycoju'ñ yi' je' yi o'cin. Per je huidibi Dios xyñimooyim, hue' je' je jugy'ajtin huidibi ni caminaxi ycixipy ytigoyipy co n'ijtim miiid ajt nHuindzin Jesucristo.

7

Tüg ijxpejt huidibi yajpatp ma picychinaayin

¹ Miich ajcxy migügtijc huidibi ti m'ixpicy Dios ycötujcin huidibi Moisés yjaay, mne-jhuuyb miich ajcxy co yi naaxhuiñjyäy ycötujcin ymiiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjäy ycivilbicy miiid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocmiidiñ ñäy y'ane'min. ³ Ooy anajty mij ytundigoy je töxyjäy co ypijipy miiid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy, huin'itni janchtiy jēbi ypijy miiid huingbi yëydijc, e ca'p je' anajty ytundigoy.

⁴ Miich ajcxy nmigügtijc, judiojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi' xyjac'ané'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydijc ti y'ögy, e ti ypijctigach. Cristo miich ajcxy xyñigohuajc'ajtp, jigix jēbi mdzinaaygixy miiid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nninīcx ñijot'ajt. Je huin'it tiempo anajty je jibic-huinma'ñ xy'ane'mim ma ajt ndzinaayin. Je' je' je jibic-huinma'ñ huidibi Dios xycapx'adujcim miiid ycötujcin. Miiid co jibic-huinma'ñ xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huidibi Moisés xymooyim, ca' ti mic'ajt miiidity ma ich ajt, ti n'ixmajtzim. Jadu'n nipaady nejihuuy ti n'o'cim, e njugypijcim jadüg'oc. Paady nguyduunim je jemybi tiy'ajt huidibi je Espíritu Santo xyajnejhuuyim. Canan je' anajty nguyduunim je jecy'ajtpy cötujcin.

Je pocy huidibi ijtp ma ich

⁷ ¿Nej n'ocminaanim? ¿Nej janch co je cötujcin huidibi Moisés xymooyim xyajpocy-tuunim anajty? Ca' yjadu'nity. Co ixypy ca' anajty nmiiidityich Moisés ycötujcin, ca' ixypy ich ti nnejhuuyich co ti ndundigooyich ma Dios ytiy'ajt. Co ixypy anajty ca'

n'ocnejhuiyich Moisés ycötujcin ma jadu'n ymíñañ: “Ca' mmigüg ni ti m'adzojciipy.” Ti ixypiy ndundigooyich, e ca' ixypiy nejhuiyich ma ti ndundigooyich. ⁸ Míid co íich jecy'ajty ooy anajty nnijot'atyich pocytuní, paady ycixpi íich anajty ooy ndundigooyich. E jadu'n anajty nígi ooy n'adzocyich, e jamínam anajty Dios ycötujcin co ca' migüg ni ti m'adzojciipy. Co ixypiy Dios ca' jadu'n cötujcin ti pidägy, ni ca' ixypiy njihui'ñybicyich co ndundigooyich. ⁹ Jayíjp co ca'ni anajty nhuinjihuíyich Dios ycötujcin, huin'it tiempo ca' anajty njihui'ñybicyich nbocy. E co nbatyich Dios ycötujcin, chí njihui'nybijcyich nbocy, e nañ ti nejhuiyich co tigoyaamich njugy'ajtin. ¹⁰ Dios ypidac ycötujcin jaydëbi nbáadibich jugy'ajtin huidibi ca' ycixipy ytigoyipy. Per ca' jadu'n ti oyíy míid íich. Yí cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n anajty huinma'ñ nmíididyich co nguydundähuaamybich Dios ycötujcin huidibi Moisés yjayhui'm. Pero com ca' njatyich nej nguydundähuiyich, chí nbocycäyich ma Dios. Je pocytuní ti xyhuin'íñich, e míid je' ycixpi nbadaamybich anajty yí o'cin.

¹² Tüg'óciy Dios yley etz Dios ycötujcin huidibi cojay ijtp, huädz yí, tudägy yí, ooy yí. ¹³ ¿Nej tigoyaambich anajty njugy'ajtin míid co anajty nmí'ityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbídzimí jibic míid íich co xyajtigoyaamich anajty njugy'ajtin? Ca' yjadu'nity. Nicxpich anajty ma yí o'cin míid nbocyich ycixpi. Je Dios ycötujcin xyajnejhuiyich co o'cin nbadaamybich míid nbocyich ycixpi. Jadu'n Dios pidacy ycötujcin ya naaxhuiñ, jigix jëbi jäy ajcxy nejhuihuipy co mij ajcxy ooy ytundigooy míid Dios.

¹⁴ Nejhuiyim co yí Dios ycötujcin huidibi Moisés xymooyim, jiiy yí' choon ma Dios, paady yí' ooy y'oyity. Íich nninícx yí' je' huidibi nijot'ajtp yí pocytuní, paady ndzinäyich pocymíid. ¹⁵ Ca' nhuinjihuíyich huidibi ndumyibich. Yí oybi huidibi njatunaamybich, ca' njatyich nej ndunipyich. Yí jibicpi huidibi ca' y'oychojcnity, yí' ndumyibich. ¹⁶ Co nduñich huidibi ca' ndzocyich, jadu'n niquëxígy co Dios ycötujcin ooy oy yí', tudägy yí'. ¹⁷ Canan jotcujc íich jadu'n co nbocytuñich. Yí pocy'adzojcin huidibi nmíidich ma njot nhuinma'ñ, yí' yí' xyajtundigooyibich. ¹⁸ Nejhuiybich co ca' ti oybi yajpaady ma íich nninícx. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyibich. ²⁰ Co yí' nduñich huidibi ca' ndzocyich, yí' je' je pocytuní huidijaty njot'ajtibich nhuinma'ñ'ajtibich, yí' xyajtundigooyibich.

²¹ Nbaatypich tüg tíy'ajt, co njatunaamybich oyhuinma'ñ, jiiy jibicpi nbaadyich ma njot nhuinma'ñich. ²² Jotjoty huinma'ñjoty ooy nmíxondägyich Dios ycötujcin. ²³ E nañ míidich jotjoty huinma'ñjoty yí jibicpi huidibi mí'ijxtinaayb je oybi. Yí tundigoyí yajpatp ma íich nninícx. Yí nninícxich yajpatp pocymíid.

²⁴ Paady ca' njotcúciyich. ¿Pín jëbi xyñihua'ñich xyajnídögibich ma jadayaab nninícxich huidibi xyajnicxpich ma yí o'cin? ²⁵ Dioscojuyip nyajnaxypich ma Dios co Dios, míid ajt nHuindzin Jesucristo, xyñihuaanim ma jada jibicpi huidibi ajt nninícx xyñi'jot'ajtim. Paady míid n'oyjot n'oyhuinma'ñ nguyduñich Dios ycötujcin. Míid nninícxich nijot'atyich pocytuní.

8

Je jugy'ajt míid je Dios yjihui'ñ ymic'ajt ycixpi

¹ Jadachambi tiempo janchtíy Dios ca' tzaachytuna'ñ yí jäy ajcxy huidijaty tú'ciy ijtp míid Cristo Jesús, huidibi ajcxy cuydumb Espíritu Santo chojcin, e ca' ajcxy tungíxy nej je ninícx nijot'ajtcíxy. ² Je Espíritu Santo ti xyajpidzimim ma yí pocytuní etz ma yí o'cin huidibi yí jecy'ajty cötujcin ti xymooyim. Je Espíritu Santo xyajtzinaayim huinixí, íich ajt huidibi ijtp tú'ciy míid Jesucristo. ³ Míid co íich ajt ooy ninícx ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñjáy yajtigoy ajcxy je

cötujcin ymajaa, e ca' ymadacy nicxy xyajtzinaayim mïid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ mïid ñinïcx jadu'n nej ñich ajt nmïidity nninïcx, jigix jëbi ndzinaayim mïid huädz jot huinma'ñ. Jadu'n Dios y'ung chinay mïid ñinïcx, per ca' ni ti bocy anajty mïidity. E yi' ti y'ögy mïid ajt nbocy ycixpi, e jadu'n yajtigoy je pocy huidibi ajt nïgix'ajtim. ⁴ Jadu'n Dios ytuuñ jigix jëbi xyajtzinaayim mïid tudägyjot tudägyhuinma'ñ jadu'n nej yi' ycötujcin y'ane'my. Mïid co nmïid'ajtim Dios yjihui'ñ ymic'ajt ma ajt njot nhuinma'ñ, paady jëbi huaad ndzinaayim mïid tudägy-jot tudägy-huinma'ñ.

⁵ Yi jäy ajcxy huidibi ca' mïidity Dios yjihui'ñ ymic'ajt ma yjot yhuinma'ñ, hue' ajcxy ycapxymïdooyb je jibicpi huidibi ajcxy ñinïcx ñijot'ajtpy. Yi jäy ajcxy huidibi tzinaayb mïid Dios yjihui'n ymic'ajt ma yjot yhuinma'ñ, hue' ajcxy ycapxymïdooyb je Espiritu Santo. ⁶ Yi jäy ajcxy huidibi capxymïdoob je jibicpi huidibi ajcxy ñinïcx ñijot'ajtpy, hue' ajcxy ypadaangixyp o'cin. Yi jäy ajcxy huidibi capxymïdoob je Espiritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcuja'ajtin. ⁷ Yi jäy ajcxy huidibi capxymïdoob je jibicpi huidibi ajcxy ñinïcx ñijot'ajtpy, hue' ajcxy Dios ymidzip'ajtpy, ca' capxymïdohuaangixy Dios ycötujcin. Ni ca' jajtcixy nej ajcxy capxymïdooxixipy Dios ycötujcin. ⁸ Ca' Dios jäygidägy yi' ajcxy chinaayin huidibi ajcxy capxymïdoob je jibicpi huidibi ajcxy ñinïcx ñijot'ajtpy.

⁹ Per miich ajcxy ca' mgapxymïdoogixy je jibicpi huidibi mninïcx nijot'ajtpy. Com miich ajcxy mmïid Dios yjihui'ñ ymic'ajt ma mjot mhuinma'ñ, e mguydungixpy je Espiritu Santo chojcin. Huenpinity huidibi ca' mïidity Cristo yjihui'ñ ymic'ajt ma yjot yhuinma'ñ, ca' yi' y'ity mïid Cristo. ¹⁰ Pen miich ajcxy ijtp mïid Cristo, yi' mjogy'ajtin ajcxy ca' ycixipy ytigoyipy nimina, mïid co Cristo ti xyaj'ahuimbijtcixy tudägy ma Dios yhuinduu. Yi mnaaxnicx cixamb tigoyamb yi'. ¹¹ Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, mïid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹² Mïid co nmïid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymïdoohuim je Espiritu Santo, e ca' huaad ngapxymïdoohuim je jibicpi huidibi ajt nninïcx ñijot'ajtpy. ¹³ Pen ooy ajcxy xytimy'ane'mgixy je jibicpi huidibi ajcxy mninïcx ñijot'ajtpy, co m'öccixipy, yi' mjogy'ajtin cixip tigoyip yi'. Per pen mïid Dios yjihui'ñ ymic'ajt miich ajcxy myajtigoy je jibicpi huidibi mninïcx ñijot'ajtpy, co m'öccixipy, yi' mjogy'ajtin ajcxy ca' yi' ycixipy ytigoyipy.

¹⁴ Tüg'óciy pinjaty ajcxy capxymïdoob je Espiritu Santo, Dios yi' ung'ajtip ajcxy. ¹⁵ Je Espiritu Santo huidibi miich ajcxy xy'adigüygixp xyjottigüygixp, ca' xychaachtungixy e nañ ni ca' mdzinähuaangixy mïid tzig'iñ jihui'ñ. Ca' miich ajcxy jadu'n paady nej tumbidijc huidibi ooy tzigüygixy yhuindzin. Co je Espiritu Santo yajpaady ma ajcxy mjot mhuinma'ñ, jadu'n nipaady nejihuïy miich ajcxy Dios xy'ung'adyi. E com nmïid'ajtim Dios yjihui'ñ ymic'ajt, je' jadu'n xyajminaanim: “¡Dios Teedy!” ¹⁶ Je Espiritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷ Pen ñich ajt Dios xy'ung'ajtim, chi nbadaanim it lugar quipxyi mïid Cristo jiiby tzaajpjoty ma Dios yajpaady. Pen mminajxim nyajnajxim tzaachypi jadu'n nej Cristo minajxy yajnajxy tzaachypi, chi nbadaanim Dios y'oy'ajtin quipxyi mïid Cristo.

¹⁸ N'a'ixiibich co yi' tzaachypi yi' ayo'n huidibi mminajxim nyajnajxim ya naaxhuiñ, ca' yi' ytim ytiijity, ca' ninej yquipxyjatytyi je oy'ajtin etz mijjotcuja'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹ Tüg'óciy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjijp'ijxpy ajcxy mina Dios ymöhuáanigixy y'oy'ajtin ymij'ajtin yi' jäy ajcxy huidibi ajcxy Dios ung'ajtip. ²⁰ Tüg'óciy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ögam tïdzam. E canan ci'm jadu'n tzocy, hue' je' Dios jadu'n ti yajnigödugiy. Per ca' yjugy'ajtin ycixipy ytigoyipy

tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹ Co anajty Dios yaj'oyiy nej jëbi ajcxy chinaaygixy, e ca' y'öccixipy, ca' ytütcixipy, etz ca' ypügixipy, chi ajcxy padaangixy oy'ajtin etz jotcuyc'ajtin quipxyi müd je jäy ajcxy huidibi Dios ung'ajtip. ²² Com nejhuüiyim co ixti chambaad tüg'óciy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcuyc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'n. ²³ Canan yi naaxhuiñybi huidi Dios yaj'oyiy yi'yi tzaachypi jihuiyb, nañ jadu'n ich ajt huidijaty müd'ajtp Dios yjihuiñ ymic'ajt, huidibi Dios xymooyim jayijp'aty ca'ni anajty nyajtigajtzim nninïcx. Nañ ich ajt tajim mayim njüiyim nyaaxim ixti cooni anajty Dios xyajtigadzaanim ajt nninïcx etz xycöbigaanim ma yi' y'it jiiyby tzajpjoty, e xymüd'idaanim ajt jadu'n nej yci'm'ung. ²⁴ Müd co n'aa'ijxim njijp'ijxim co Dios xyajnidzögaanim ajt n'alma, paady ti nbaatim jugy'ajtin huidibi ca' ycixipy ytigoyipy. Co ixipy ti nbaatim huidibi anajty njijp'ijxim, ca' ixipy njacjijp'ijxim co nbadaanimni. Com ca' pin jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmüd'ajtim, huin'it n'ahuijxim müd mecxtujcin cooni nbaatim.

²⁶ Tim jadu'n nej jotcuyc'ajtin nbadaanim co njijp'ijxim huidibi Dios xymöhuaanim, nañ tim jadu'n je Espíritu Santo xypubejtim xypudigüiyim co njotmetzciiyim, com ca' najtim nej jëbi huaad Dios nmibijctzoohuim nej ypadyii. Paady je Espíritu Santo xycodinaayim ma Dios, ymibijctzooyb je Dios mictägy müd ich ajt ycixpi müd jiiyin yaaxin, huidi ca' huaad yajcapxpídzimy müd miydacin. ²⁷ Dios ñejhuüiyb ti jot ti huinma'n jäy ajcxy ymüd. E Dios nañ huinjihuüyb tüg'óciy ayuc huidibi je Espíritu Santo yajnajxyp ma yi'. Je Espíritu Santo ypijctzooyb may'ajt jabom jabom ma Dios müd tüg'óciy je mibijcpídjic ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yi jäy ajcxy huidibi mijpidacp Dios, huidibi ajcxy Dios ti huin'ixy, jëbi chinaaygixy jadu'n nej Dios jäygidägy ajcxy chinaayin. Nejhuüiyim co huentimtiijity huidibi yi' ajcxy ymajxpy yajnajxpy, pen jibicpi o pen oybi, Dios jadu'n ti a'ixiy co huen minajxcixy yajnajxcixy müd yi' ajcxy y'oy'ajtin ycixpi. ²⁹ Je' yi' ajcxy huidibi Dios ti yhuin'ixyii, je' yi' ajcxy huidibi Dios ñejhuüiy jayijpni co ymibiga'ñyii y'ayuc. Dios jadu'n tumb ma yi' ajcxy yjot yhuinma'n jaydëbi yquipxyjatytiy ajcxy yjot yhuinma'n müd Dios y'ung, jadu'n nej yi' yjot yhuinma'n müdity. ³⁰ Yi mayjäy huidibi Dios yajnigödugüiy ca'ni anajty naaxhuiñybi chondacy co ytuna'n müd yi', yi' ajcxy Dios huin'ijxi. Yi mayjäy huidibi Dios ti yhuin'ijxigixy, nañ Dios yi' ajcxy yaj'ahuimbijtip tudägy. E yi mayjäy huidibi Dios ti yaj'ahuimbity tudägy, nañ Dios yi' yajquipxyjatytihuaanip ajcxy y'oy'ajtin müd yi' y'ung y'oy'ajtin.

³¹ ¿Ti jada' njacjijp'ijxim ti jada' njactzojcin? Ca' ni ti. Pen Dios ich ajt xypubejtim xypudigüiyim, ¿pin ich ajt jëbi xymimadaacim? Janch ni ca pin. ³² Dios ixti yci'm'ung ti yecy müd ich ajt ycixpi, co oy y'o'cy müd ich ajt ycixpi, co oy y'o'cy ma yi' cruudz müd nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty müd yi' y'ung, Jesucristo. ³³ ¿Pin jada' jëbi ocxiy je jäy ajcxy huidibi Dios ti huin'ixy? Ca' ni pin. Com Dios ci'm yi' ti yaj'ahuimbijttäy tudägy. ³⁴ ¿Pin yi' ajcxy jëbi ocyajpocycäy? Ca' ni pin. Com Cristo o'c je' müd ajt nbocy ycixpi, etz yjugypijcy jadüg'oc, e jadachambi xi tiempo yajpaady a'oy'amy ma Dios ymijc, e yi' ane'mdaayb tüg'óciy. E Cristo ich ajt xyñibijctzohuiiyim, ypijctzooyb may'ajt ma Dios müd ich ajt ycixpi. ³⁵ Com Cristo ooy xychojcin xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixipy tzaachypi ayo'n nminajxim nyajnajxim, oy ixipy tajin mayin nbaatim; oy ixipy jäy xy'ixhuidijtim xypahuidijtim; oy ixipy yuu ayo'n nbaatim; oy ixipy huit tucxy nyajmayajtim; oy ixipy tzigi'ñ nyajnajxim; oy

ixyipy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñañ:

Miid miich, Huindzin Dios ycixpi, je nmidzipich xyjatytimyyaj'ögaambich xim tzuum.

Jadu'n ich ajcxy nej cöbixy huidibi yajnicxip ma yaj'öctac co yaj'öga'ñyii.

³⁷ Ca' ti ayo'n nbadaanim. Nmimadactähuaanim tüg'óciy ayo'n, miid co Cristo xychojcm xyjihuiyim. ³⁸⁻³⁹ Janch nejhuiybich tiydudägy co Dios xychojcm xyjihuiyim. Ca' ji ni pin jëbi huaad xypijc-huäcxim ma Dios chójcin, oy ixyipy nja'o'cim; oy ixyipy njajugy'ajtim; oy ixyipy xymidzip'ajtim ángel ajcxy etz jacjadyii huidibi mic'ajt miid jiiby tzajpjoty. Ca' ajcxy jëbi huaad xypijc-huäcxim ma Dios, ni ti huidibi ji ijtp cham, ni je huidibi mimb cidacp, ni yi' jëbi xycapijc-huäcxim ma Dios chojcin. Ajt nHuindzin Jesucristo ti xyajnejhuiyim jadu'n nej Dios xchojcm xyjihuiyim co y'o'cy ma yi' cruudz miid ajt nbocy ycixpi.

9

Dios ti huin'ixy yi Israel jäy ajcxy

¹⁻² Nmüidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich miid n'amigügtijcich ycixpi je Israel jäy co ajcxy ca' cöbigañ je Cristo. Nañ Dios yjihuiñ, je Espíritu Santo, tiy'ajt yejcp ma ich njot nhuinmañ co jadu'n tajin mayin njihuiyich miid yi' ajcxy ycixpi. ³ Com tajy may nayjihuiyijich miid ich n'amigügtijc, ich nmigogajp, ixti njaccodinähuaamybich ajcxy ma Dios miid ypocy ycixpi, ixti jëbi ixyipy Cristo nja'ixmachich miid yi' ajcxy ycixpi, ixti jëbi ixyipy Dios xychaachytuñich miid yi' ajcxy ypocy ycixpi, co ixyipy jëbi Dios pocyhuinmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuüy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiiy nidüg'óciy tiy'ajt nej ajcxy jëbi huaad Dios huindzigii, e Dios yajhuinhuaniiy Israel jäy ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jiiby tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n minañich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'nañich co Dios ca' cuyduñ yi' y'ayuc huidibi yajhuinhuaniiy Abraham etz Moisés. ⁷ Canan nidüg'óciy Abraham y'ap y'oc padañ je oy'ajt huidibi yajhuinhuaniiy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuaniiy.” ⁸ Co Dios jadu'n nimay Abraham, paady ycixpi nejhuiyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuaniiy co may'ajt tunañ miid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuimbidaamybich ma je tiempo huidibi ti n'agapxtucyich, e huin'it mdöxyijc Sara y'ungbaadip.”

¹⁰ Ji jadüg tiy'ajt. Ich ajt nmij'ap Isaac ytöxyijc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxigy ti huinmañ ymiid, oyhuinmañ o jibic-huinmañ. Dios ninigoob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac nigi ti ndzocyich Jacob, ca'ydi Esaú.”

¹⁴ ¿Nej n'ocminaanim? ¿Dios ca' tiybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: “Nba'ayohuipyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhuiyim co canan paady ycixpi Dios pa'ayohuañ jay miid co ajcxy chachñaymija'ijxigixy co tunaangixy oyhuinmañ. Hue' je' Dios pa'ayo'n tuñ miid

jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

ñich miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzojcpy.

¹⁹ Huin'it miich ajcxy xyñimähuibich: "Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidi nej yi' tzocy?" ²⁰ Miich jäy, ¿mbin miich co ti myajcapxycoja'ñ myaj'ayuccoja'ñ miid Dios? ¿Nej jëbi pochytüdztimäy je pin anajty ti yajcojyii? "¿Nej co jadu'n ti xyajcojyich?" ²¹ Tüdzyajcojpi yi' yaj'oyiib je mo'ntz nej tim tzocy. Pen yajcojamyb tüzdy oybi tzoopatyi, yajcojpy je'. Peni yajcojamyb tüzdy huidibi ca' oyjatyity, yajcojpy je'.

²²⁻²⁴ Tim jadu'n nej je tüzdyajcojpi yaj'oyiib mo'ntz nej tzocy, nañ jadu'n Dios tuñ miid jäy nej tzocy. Dios ti yajcojy jäy, e miid ymic'ajt jëb tzaachytuñ miid ypocy ycixpi. E co jadu'n tzaachytunipy, chi ñiguëxigipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachytunipy ajcxy. Com Dios ti yajcojy jäy paady jëb nañ jadu'n pa'ayoohuipy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios ñich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nidzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi ñich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

²⁶ E nañ jadu'n jadüg'it Oseas cojay: "E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixi tzinaayb."

²⁷ Nañ jotmay miid co Isaías jada tiy'ajt ycojay ma ñecy ma jadu'n yminañ: "Oy ixipy ajcxy ti yjamayy jadu'n nej tzaa'ung yajpaady ma mejy ypa', nihueeñ ajcxy y'alma ñidzoocin padañ. ²⁸ Com Dios mic ooy cötujcin miidity, e ca' mimecxtugipy jäy ajcxy ypocytunii huinixii. E mic'amy tzaachyp mōhua'ñ naaxhuinyjäy miid ypocy ycixpi co anajty xii tiempo paatni mabaad agapxtujcy." ²⁹ Isaías ñajtcapxiy jadu'n jecy'ajty:

Pen ca' ixipy je Huindzin Dios huidibi ane'mdaayb jiiby tzajpjoty etz ya naaxhuiñ, capubejty yi Israel jäy, co ca' ycajacyajtzooci nijëjity ajcxy, ycacōdigoyday yi' ajcxy, tim jadu'n nej je jäy ajcxy yajty jim ma Sodomo cajp etz Gomorra cajp, cōdigoyday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhuinjihuigixy huidibi ti nyajnijayigixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jip'ixp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios.

³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ miid yi' ajcxy ycixpi. Hue' ajcxy tijy co tudägy'ajtin padaangixy ma Dios miid co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cōbijccixy, tim jadu'n nej jäy ayo'n paady co yconepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n yminañ:

Nguexaamybich jim Jerusalén tüg jäy. Mayjäy ca' mijpidäga'ñ je jäy, e ayo'n ajcxy ypadamyb ma ñich. Tim jadu'n nej ixipy ti nbidägyich tüg tzaa ma jäy ajcxy huaad yconepcixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n padañ ma ñich, nbocyhuinmecxaamybich yi' ajcxy.

10

¹ Miich ajcxy nmigügtjicich, ooy ndzocyich cixyjot huinijot co yi Israel jäy nidüg'óciy pada'n y'alma ñidzoocin. Ooy ñich ñigi Dios nmibijctzoy miid yi' ajcxy ycixpi. ² Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuïy Dios ytiy'ajt. ³ Com nejhuiyb ajcxy co Dios yajpocyñihuädzamyb jäy ajcxy, hue' ajcxy ca' huinjihuïy nej Dios yhuinma'n miidity. Ci'm anajty chachhuinma'n ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴⁻⁵ Yi judíojäy ajcxy ca' huinjihuïygixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n ymina'n: "Je pinjaty cuydumb je Dios ytiy'ajt, jim mic'ajt paadipy miid chinaayin ycixpi." ⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy ymina'n: "Ca' huaad judíojäy ajcxy yminaangixy jotjoty huinma'ñyoty: ¿Pin ocpättigihuip tzajpjoty nicx je Cristo yajtzoön? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?" ⁸ ¿Nej Dios y'ayuc ymina'n? Jadu'n Dios y'ayuc ymina'n: "Ti mmidooy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti mmido'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ñich ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcpy ajcxy ma mjot mhuinma'n co Dios ti yajjugypijcy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägipy Jesús cixyjot huinijot huin'it Dios xyajpocyñihuädzipy. Co mgapxypidzimipy mayjäy agujc co miich mijpidägy Cristo Jesús, huin'it yi' m'alma ñidzoocin pada'n.

¹¹ Com jaybety jadu'n miiñ ma Dios ñecy, ma jadu'n ymina'n: "Nidüg'óciy jäy huidijaty mijpidacp je Cristo, ca' ajcxy ayo'n pada'n ma Dios." ¹² Jëbi nidüg'óciy jäy mijpidägy je Cristo Jesús com Dios tú'ciy yajhuinhuaniiy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxii. ¹³ Com jadu'n jaybety ymiiñ ma Dios ñecy, ma jadu'n ymina'n: "Nidüg'óciy jäy pinjaty Dios mibijctzoob miid Huindzin Jesucristo yxii, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuaniiy Jesucristo co huen y'alma ñidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxy ma yi' ajcxy? ¹⁵ ¿Nej jëbi jäy ajcxy capxhuäcxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiiñ ma Dios ñecy, ma jadu'n ymina'n: "Ooy oy jäy ñayjihuïyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

¹⁶ Per ca' nidüg'óciy jäy mibicy je oybi tiy'ajt, com Isaías jadu'n cojay ma ñecy ma jadu'n ymina'n: "Huindzin Dios, ¿pin ti mijpidägy ñich ajcxy n'ayuc?" ¹⁷ Cooni jäy ajcxy capxhuäcxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidooy, com jaybety jadu'n ymiiñ ma Dios ñecy ma jadu'n ymina'n: Ti capxhuäcxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuiy Dios ytiy'ajt? Ñejhuiyb ajcxy. Com jecy'ajty Moisés ycojay ma ñecy ma Dios jadu'n ymina'n: Nyajpocyñihuaatztähuiyich yi jäy ajcxy huidibi ca' ñich njäy'adyii, e huin'it miich ajcxy cohuindoyii mjihuïhuipy miid yi' ajcxy ycixpi. Ndunipyich may'ajt miid yi' ajcxy, e huin'it miich yi' ajcxy mmijotmädip.

- ²⁰ Jadu'n jadüg'it Isaías cojay ma yí' ñecy, ma Dios jadu'n ymíñañ:
Yí jáy ajcxy huidibí ca' xy'ixtäyich, ti xypaadyich ajcxy. Ti nyajñiguëxígyich ndiy'ajt ma
yí jáy huidibí ca' xyñidiy xyajtíyich.
- ²¹ Com jadu'n jaybety ymíñ ma Dios ñecy, ma Dios jadu'n nigapxy yí Israel jáy co jadu'n
ymíñañ:
Jabom jabom ti njamimecxtucyich yí Israel jáy ajcxy. Ti njayajnimäyich íich ndiy'ajt, e
ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yí Israel jáy ajcxy huidibí ti ypocyníhuaatzcixy

- ¹ Paady n'amidoogixy: ¿Nej ti jada' Dios ix'ijxni ixtijni yí Israel jáy ajcxy? Pues ca' yjadu'nity, Dios ca' yí' ixmachñi Israel jáy ajcxy. Com nañ Israel jáy íich. Abraham nmij'ap'ájtibich nmijteedy'ájtibich e nañ jim ngogájpídyich ma anajty Benjamín yco-gajpity. ²⁻³ Dios ca' ixmach yí' yjáy huidibí yhuin'ijx jecy'ajty co jáy'ada'ñyíi jigix jébi may'ajt oy'ajt tunipy miiid yí' ajcxy. ¿Nej ca' ajcxy mnejhuíy nej jaybety ymíñ ma Dios ñecy jadu'n nej Elías nigapxy yí Israel jáy ma Dios? Jadu'n ymíñañ:
Huindzin Dios, ti yí Israel jáy ajcxy yaj'öctäy huidibí anajty miich m'ayuc xycapxhuäcxip.
Ti ajcxy yajhuindigoydäy je tzaa macxy ma anajty jáy xyhuindzigíy. Naydügpajc íich ti njachui'myich njaccapxhuäcxych miich m'ayuc, e nañ xyaj'ögaamich jáy ajcxy.
- ⁴ E chi Dios y'adzooy nimay Elías:
Ca' mim naydügity, ji íich ahuing nmíididyich yujcpicy jahuixtujc mil yëdyijc huidi xy'ojadajtpich xyhuindzigíyich chambaad, huidibí ca'ni huingoxtinäy yí Baal, yí dios falso, ca'pí ti mic'ajt miiidity ni ti tzöc'ajt ca miiidity.
- ⁵ Tim jadu'n nej Dios miiidity anajty huixtujc mil yëdyijctijc jecy'ajty co anajty Elías yjugy'aty, nañ tim jadu'n cham ma íich ajt nxíi ndiempo Dios ymíid nijëjity judíojäy huidibí ti pa'ayoy, e paady ycixpi ti yhuin'ixyíi jébi yí' jáy'adyíi. ⁶ Com co íxyipy ajcxy yajxon cuyduni Dios ycötujcin, ca'p ni ti pa'ayo'n Dios jactunaani miiid yí' ajcxy, com co ti anajty jim Dios y'ayuc ycuydundäyíi.
- ⁷ ¿Ti ti ytunyíi ti yjadyíi miiid yí Israel jáy ajcxy? May ajcxy ca' may'ajtin oy'ajtin paady ma Dios jadu'n nej ajcxy jijp'ijxcixy. Jëyi ajcxy huidi Dios huin'ijxi ti ajcxy paatcixy oy'ajt ma Dios. Yí jacjadyíi Israel jáy ajcxy Dios níg ooy yajjotmij'öccixy. ⁸ Com jadu'n jaybety ymíñ ma Dios ñecy jadu'n nej Dios yajjotmij'ögy yí Israel jáy, ma jadu'n ymíñañ:
Tim jadu'n ajcxy nipaady nej jáy ajcxy huidibí ti ymí'öctigooyíi, jadu'n nipaady nej jáy huidibí huiintzip, jadu'n nipaady nej huidibí cönatip.
- ⁹ David nañ jadu'n ycojay jecy'ajty ma ñecy, ma jadu'n ymíñañ:
Huindzin Dios, cham je jáy tzachnixondägy yí tzinaayin yí jugy'ajtin, ca' ajcxy xyjäymeck.
Timíitiini ajcxy ayo'n möhuipy; tim jadu'n nej iyujc ayo'n paady co yajtüxuuch o co yjut cögäy.
- ¹⁰ Yajma'ti ajcxy yjot yhuinma'ñ, huen ahuimbijtcixy jadu'n nej jáy huintzpi. Mö ajcxy tzaachypi huinixíi huinítiempo, tim jadu'n nej jáy ajcxy tzaachypi jihuíy huidibí jemxypi tzmíccixp.

Yí ypocyhuinmeecxin huidibí ajcxy ca'p yjudíojäyity

- ¹¹ Co jadu'n yí maybi Israel jáy ca' cöbijccixy Dios ytiy'ajt, ¿nej mdijy, ti Dios y'ixmachyíi ajcxy tücci'yí, e yajtigoya'ñ ajcxy? Pues ca' yjadu'nity, ca' Dios ixmach yí Israel jáy ajcxy tücci'yí. Co yí Israel jáy ca' cöbijccixy Dios ytiy'ajt nej Cristo y'o'cy miiid yí' ajcxy ypocy ycixpi, paady cöbicy yí huidibí ca' yjudíojäyity, jébi ajcxy y'alma nízoozin paady. Jadu'n Dios ytuñ jigix jébi yí judíojäy ajcxy cohuindoyíi jihuíhuipy, e chi nañ jadu'n mijpidägy py ajcxy Jesucristo. ¹² Pen yí mayjäy ajcxy huidijaty ca' y'israeljäyity mij'oy'ajtin

mijjotcuyc'ajtin ti paady, mïid co yi jacmaybi Israel jäy ca' cöbijccixy Jesucristo, chi nïgi oy'ajtin jotcuyc'ajtin pada'n yi naaxhuiñyäjy ajcxy co anajty nidüg'óciy Israel jäy yjothuimbijttaaygixy etz cöbijctaaygixy je Cristo.

¹³ Cham nijayñygixy miich ajcxy huidi ca' yjudíojäyity, com Dios ti xyquexyich ngapx-huäcxich yi' y'ayuc ma yi jäy ajcxy huidibi ca' yjudíojäyity. Ooy nyajcopicyich jada ndungich, jigix jëbi judíojäy oy'ajtin paady nañ jadu'n. ¹⁴ Ca' jecyity co ñich n'amigügtijc, yi judíojäy ajcxy, cohuindoyi ajcxy jihuñhuipy, co anajty mayjäy huidi ca' yjudíojäyity mijpidägy ñich n'ayuc. Co jadu'n ajcxy cohuindoyi jihuñhuipy, chi ajcxy nañ jadu'n mijpidägipy Jesucristo. ¹⁵ Com pen je naaxhuiñyäjy huidibi ca' yjudíojäyity, huidibi Dios jecy'ajty ca' jäygidaci ajcxy chinaayin, pen ti ajcxy cöbijci Dios ytiy'ajt, pen ti ajcxy oy'ajtin paady ma Dios, mïid co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuipy ajcxy, jadu'n nejjihuñy ti ajcxy y'ögy etz nej jihuñy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'óciy Israel jäy Dios jäy'adyii, mïid co Israel y'ap'ajtip y'oc'ajtip ajcxy. Tim jadu'n nejjihuñy judíojäy ajcxy tzajcaagy puuducy möy Dios, nañ jadu'n je ytujectuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'óciy je' Dios je' ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiyyi, e may'ajt oy'ajt tuñ mïid huingbi jäy huidi ca' israeljäyity. Tim jadu'n nej jihuñy tüg oyguipy huidi tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huidibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty mïidity Dios y'oy'ajt. ¹⁸ Ca' huaad amij agix mnayjihuñygixy, e ni ca' huaad m'ixtiycixy yi judíojäy huidibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixiyy yi judíojäy huidibi ca' mibicy Cristo, jaydëbi miich ajcxy mnaydijyii co Dios xyjäy'adyii. ²⁰ Tiy'ajt jadu'n nej miich mina'n. Dios ñajtz'ixiyy yi maybi judíojäy mïid co ajcxy ca' mibicy Jesucristo. E Dios miich ti xycöbicy mïid co ti mmibicy Jesucristo. Per ca' huaad miich amij agix mnayjihuñy mïid co Dios ti xycöbicy. Naygüend'adii yajxon ma Dios ytiy'ajt, tzig'i Dios. ²¹ Com Dios ñajtz'ixiyy yi judíojäy ajcxy mïid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'n, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ mïid nijëjity jäy, etz mic tzaachytuñ nijëjity jäy. Dios mic tzaachytuñ je judíojäy huidibi ca' ycapxymidooy, etz may'ajt oy'ajt tuñ mïid miich ajcxy huidi capxymidoob. Jaccuydun yajxon Dios ytiy'ajt, e nïgi Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuipy. ²³ E nañ jadu'n yi judíojäy ajcxy huidi ca' mibijccixy Jesús, co ajcxy yhuinma'n yajtigadzipy, e mijpidägipy Jesús, huin'it Dios ycöbigiyyb jadüg'oc, etz Dios mïid ymic'ajt jëbi may'ajt oy'ajt tunipy mïid yi' ajcxy. ²⁴ Com pen miich ajcxy huidi ca' yjudíojäyity huidibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'n huidibi ajcxy judíojäyip, pen ycöbijcy ajcxy.

Jadu'n nej Dios yajnïdzooccogixihua'n Israel jäy ajcxy

²⁵ Miich ajcxy nmigügtijcich, nyajnijayñyb ajcxy jadu'n nej Dios tuna'n mïid yi Israel jäy, jaydëbi ca' miich ajcxy amij agix mnayjihuñhuñyb, etz jaydëbi mnejhuñhuipy jada tiy'ajt huidibi ca' pin nejhuñy, co yi Israel jäy ajcxy ooy ajcxy y'aamijity yjotmijity, ca' ajcxy capxymidooy Dios. E jadu'n ajcxy y'ida'n mabaad anajty yca'pxy je mayjäy, ca' pi y'israeljäyity je huidibi mijpidägam Jesucristo ytiy'ajt. ²⁶ Nejhuñyim co Dios may'ajt oy'ajt

tunamb jadüg'oc mïid tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjiini tüg Israel jäy ymina'ñ huiidibi yajnïdzögamb ajcxy ma yi' ypocy. Yi' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuaniiyich yi' Israel jäy co yi' ajcxy ypocy nyajtigooybich.

²⁸ Co yi' Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiiyi. E co ñajtz'ixiiyi ajcxy, paady ycixpi miich ajcxy Dios ti yxcöbicy, co ti mmijpidaaccixy Jesucristo. Per chambaad Dios jactzojctay yi' Israel jäy mïid co Dios huin'ixy yi' Abraham, Isaac etz Jacob jecy'ajty jëbi yi' yjäy'adyii. ²⁹ Dios ti huin'ixy yi' Israel jäy ajcxy jëbi yi' yjäy'adyii, etz tüg'óciy huiidibi yajhuinhuaniiy co möhua'ñ, co may'ajt tuna'ñ mïid yi' ajcxy ycixpi. Ymöhuiipy yi', ytunipy yi'. Dios ca' y'ayuc yajxïgy. ³⁰ Miich ajcxy huiidibi ca' yjudíojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, mïid co yi' Israel jäy ca' mijpidägy Cristo ytiy'ajt. ³¹ Yi' judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjiini Dios pa'ayoohuin tuna'ñ jadüg'oc mïid yi' judíojäy ajcxy tim jadu'n nej ytuñ mïid miich ajcxy jadachambi xii tiempo. ³² Com Dios anajty ti yajpocycädäy tüg'óciy jäy co ajcxy ycapxycömidodacy, yi' judíojäy etz nañ huiidibi ca' yjudíojäyity, paady ycixpi Dios pa'ayo'n tuñ mïid nidüg'óciy jäy, judíojäy etz nañ huiidibi ca' yjudíojäyity, tüg'óciy pin mijpidacp yi' ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ mïid jäy ajcxy ycixpi. Dios ooy mijcajee mijhuinma'ñ ti tuñ mïid jäy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuïydäy je ayuc huinma'ñ huiidibi Dios ymïid. Etz nañ ca' ni pin jëbi huinjihuïydäy huiidibi Dios ytumyib. ³⁴ Com jaybety jadu'n miiñ ma Dios ñecy ma jadu'n ymina'ñ:

Ca' ni pin jëbi huinjihuïydäy nej Dios yhuinma'ñ mïidity. Ca' ji ni pinjäy huiidibi ti capxhuijy Dios.

³⁵ Ca' ji ni pinjäy huiidibi tijaty ti ocmooybi Dios. Dios ca' ni ti nuucxy mïidity mïid ni pinjäy.

³⁶ Tüg'óciy huiidijaty ñich ajt ya nbaatim, ac jiiby choondäy ma Dios. Yi' tüg'óciy ti yaj'oyïydäy, e yi' je'ajttaayip tüg'óciy. ¡Tzoc Dios capxpaatim ojadajtim huinixii huinitiempos! Jadu'n jadu'n. Amén.

12

Je jugy'ajtin cixyot ma Dios

¹ E jadu'n nmigügtijcich, cham ñich miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjigix naygïyéjigix amuumdügjot ma Dios. Cuychinay yi' ytiy'ajt yajxon jabom jabom. Tzinaaygix mïid huädz mjot mhuinma'ñ, jadu'n nej Dios jëbi jäygidägy yi' mdzinaayin. Jada je tiy'ajt nej jëbi Dios m'ojadajtcixy tiydudägy. ² Ca' ajcxy mguydungixy mguychinaaygixy yi' naaxhuiñyjäy ajcxy yjibicjot yjibic-huinma'ñ huiidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'ñ, paady mguydunipy ajcxy yi' ytiy'ajt. Ixpïjccix Dios ytiy'ajt, jigix ajcxy mnejhuïhuipy huiidibi tiy'ajt Dios chojcyp mguydunipy, etz jigix mhuinjihuïhuipy je oyhuinma'ñ, je tudägy pi huinma'ñ huiidibi Dios yjäygidacpy, je huinma'ñ huiidibi huädzip ca'pxyip.

³ Com Dios may'ajt oy'ajt ti tuñ mïid ñich etz ti xymöyich jada tung co ngapxhuäcxich yi' y'ayuc, paady ñich miich ajcxy nimäy nidüg'óciy co ca' huaad amij agix mnayjihuiiyigixy, ca' huaad nigï anaxy mnaygömaayigixy ci'm. Nidüg nidüg ci'm huinmaaygixy yajxon huiidibi tung jëbi myajnicxcixy, jadu'n nej Dios huijy'ajt cujc'ajt ti xymooygixy. ⁴ Jadu'n nej ñich ajt nninïcx ymïid yhuin y'ahuac etz yci' ytecy, je ninïcx abicy ytung mïidity, je huin abicy ytung mïidity, je y'ahuac abicy ytung mïidity, etz je ci' tecy abicy ytung mïidity. ⁵ Nañ

tim jadu'n ñich ajt huidi mijpidacp Cristo, e ni may ñich ajt, e tügpicy jäy ñich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpijcin nmüd'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpijcin nmigügtijc, copicy ndung'ajtim yaj'ixpijii. ⁸ Pen Dios huijy'ajt cujc'ajt ti xymooyim co jëbi ngapxhuijim nmigügtijc, co jëbi njot'amijmooyim nmigügtijc, copicy ngapxhuijim nmigügtijc, etz njot'amijmooyim nmigügtijc agujc jotcujc. Pen nyejcin tijaty ma nmigügtijc, copicy agujc jotcujc nyejcin. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n müd jotmay müd, copicy agujc jotcujc nbubejtim pinjaty ayo'n müd jotmay müd.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigi oyjot oyhuinma'ñ. ¹⁰ Naychójcigix nayjihuiyigix amuumdügjot, jadu'n nej ypadyii mnaymigüg'ájtigixipy ma Jesucristo. Nayyajmij'ájtigix nigi nidüg nidüg miich ajcxy.

¹¹ Naymic'ijxigix cixyjot huinijot, ca' mnuux'ajtcix. Tungix amuumdügjot müd mHuindzin Jesucristo ycixpi.

¹² Tzinaaygix agujc jotcujc, com mnejhuiyb ajcxy co mbada'ñ oy'ajtin ma Dios. Mecxtujccix yi' tzaachypi ayo'n huidibi mminajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayajtpy migüg tijaty. Nayyajjättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ müd yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcujc nayjihuiyim co ajt nmigügtijc jotcujc ñayjihuiyii. Tzoc müdtajim müdmayim nmigügtijc pen tajp mayb.

¹⁶ Ooy yajxon nayyaj'íjtigix naygodigíyigix. Ca' amij agix mnayjihuiyigixy. Migüg'adiyb yi' mmigüg huidi ayoob. Yung naxy müd'at mjot mhuinma'ñ, ca' mnaygömäyigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jëbi jäygidägy. ¹⁸ Oy nayyaj'íjtigix müd nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidity, mimecxtugipy ajcxy, com Dios yi' tzaachytunip yi' jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n yminañ: "Íich nyaj'ahuimbiditych nej anajty jäy xymidundigóoygixy." ²⁰ Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n ymina'ñ:

Pen yi' mmidzip yubo'cip, myajcayipy myaj'ügipy, pen yi' mmidzip tidziyipy, myajni'ügipy.

Co jadu'n mdunipy müd mmidzip huin'it tzöydu'n jihuñhuipy.

²¹ Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mimadägipy müd oybi.

13

¹ Copicy co nidüg'óciy jäy capxymidóogixipy yi cajp tungmüdpí etz yi gobierno tungmüdpí. Ca' ji ni tüg tungmüdpí huidibi jëbi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmüdpidijc, paady ycixpi tungmüdpidijc nidüg'óciy jim mic'ajt paady ma Dios. ² Paady jäy ajcxy pinjaty ca' ycapxymido y ma tungmüdpidijc, hue' tundigooyb ma Dios e tzaachypi ajcxy ypadaamyb. ³ Yi miltungmüdpí ca' yi' ajcxy adzigiy yi jäy huidijaty oyhuinma'n müd. Hue' janchtiy yi' ajcxy chaachytunipy yi jäy huidi jibic-huinma'n müd. Pen mdzojcyp co ca' tzaachypi mbaadipy ma yi tungmüdpí, hue' janchtiy oybi mdunipy, e huin'it m'idipy jotcuyc. ⁴ Com Dios ti pidägy jada tungmüdpí müd miich ajcxy ycixpi, jigix jëbi jotcuyc ajcxy mdzinaaygixy. Pen mdundigooyb huin'it je tungmüdpí mdzigihuipy, com yi' ymüid mic'ajt jëbi tzaachytuñ jäy ajcxy huidibi tundigooyb. Com Dios ytung ytuunipy etz ycuyduunipy Dios ycötujcin jadu'n nej Dios xyñajtz'ane'miym, copicy co tzaachytuñ je jäy ajcxy huidibi tundigooyb. ⁵ Paady ycixp copicy mgapxymidohuipy tungmüdpidijc, jigix ca' miich ajcxy Dios xychaachytunipy e nañ jotcuyc mnayjihuihuib co ca' anajty ti ti mdundigoy. ⁶ Yi tungmüdpidijc Dios ycixpi ajcxy ytuñ, e ymüid ajcxy ycötujcin, paady ycixpi copicy mmigüedipy ajcxy.

⁷ Mgüedipy ma yi tungmüdpidijc huidibi xypaatp. Co ajcxy cajp meen yajmucy, migüedipy. Co je gobierno tungmüdpí pidägy impuestos, migüedipy. Jäy ajcxy huidijaty tungmüid myajmij'adipy, etz huidi miltungmüid mgömayipy. ⁸ Ca' pin minuucxy'adiyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihihuipy ti anajty mguydundäy Dios ycötujcin. ⁹ Jadu'n Dios ycötujcin jaybety ymiñ, ma jadu'n ymina'n: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäy'aj'ögipy. Ca' mmigüg m'adzojcipy ti ymüid." Pen mdzojcipy mjihiyb migüg nej miich ci'm mnaychogyi ti anajty mguydundaayi Dios y'ane'min ycötujcin. ¹⁰ Je naychojcin je nayjihuiyin ca'p je' ti jibicpi ti tzaachypi tuñ ma je migüg, co jadu'n jada mguydundähuipy ti anajty Dios ycötujcin mguydundaayi.

¹¹ Com miich ajcxy mnejhuiyb co huingon je xii je tiempo mina Jesucristo mina'n jadüg'oc ya naaxhuiñ, paady ycixpi jip'ijxcix ajt nHuindzin Jesucristo co tzojc yminipy. E jadachambi ti yjac-huingoni mina miina'n iich ajt nHuindzin Jesucristo, ca' ydi co oga'n nmibijcin. ¹² Canaag jimijt jäy ajcxy ahuijxy jip'ijxpy co Dios yajnidzöga'nyii ajcxy y'alma, jadachambi ti yhuingoni je xii je tiempo mina n'alma ajt nidzoocin padaanim. Paady ycixp tzoc ixmajtzim yi jibic-huinma'n yi huidibi jäy ycuydumy huidibi ca' Dios ytiy'ajt nejhuiyi. Tzoc cuychinaayim cuyjugy'ajtim Dios ytiy'ajt. ¹³ Tzoc tzinaayim jugy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim müd huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ijxtinaayim. ¹⁴ Tzoc cuychinaayim cuyjugy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Miich ajcxy nmigügtijcich, copicy mgöbigipy agujc jotcuyc ma miich mnayyöymújcigixy ajcxy yi migügtijc huidibi mibijcp je Cristo, per ca' tiydudägy huinjihuib je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy müd yi' ajcxy. ² Ti migügtijc huidibi minamb co Dios ca' ti jicxy capx'aducy, etz jëbi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyii je'jada'ajty aay ujtz. ³ Yi migüg huidibi tzüch tzützp ca' huaad

ixtijy je ymīgüg huiḁibi yjicxpy je'jada'ajty aay ujtz. E nañ ni yi mīgüg huiḁibi jicxp aay ujtz ca' huaad ixtijy yi mīgüg huiḁibi tzüch tzu'tzp, com Dios ycöbijctaayb je jäy ajcxy huiḁibi ti mibicy Jesucristo. ⁴ Ca' huaad miich ajcxy mnimähuipy yi mmīgüg co ca' oytuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios ci'm nimähuip huiḁi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijējity ajt nmīgügtijc ymina'ñ co ooy ycopyity n'amay'ajtim nijējity xii, jacjadyii jäy ymina'ñ co ca' ycopyity n'amay'ajtim jada xii. Huen nidüg nidüg yci'mhuinma'ñ yajtuñ pen y'amay'adamyb, o pen ca' amay'ada'ñ nije' nije' xii. ⁶ Ich ajt nmīgügtijc huiḁi amay'ajtp nijējity xii, hue' ajcxy tijy co Dios jadu'n tzojcp. E nañ ich ajt nmīgügtijc huiḁi tzüch tzu'tzp, hue' ajcxy tijy co Dios jadu'n tzojcp, etz nañ yajnajxyp Dioscojuyip ma Dios miid yjicxpy ypic ycipi. Nañ tim jadu'n ajt nmīgügtijc huiḁi ca' tzüch tzüdza'ñ, hue' tijy co Dios jadu'n tzojcp, etz nañ yajnajxyp Dioscojuyip miid yjicxpy ypic ycipi.

⁷ Ca' ich ajt nayyajtinaayim amidzooci'm, nañ jadu'n ca' ich ajt ci'm ndzojcin co n'o'cim. ⁸ Pen njactzinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöduy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹ Paady ycip Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huiḁibi jactzinaayb jacjugy'ajtp, etz jigix jëb nihuindzin'aty yi tiibi y'ögy.

¹⁰ ¿Na'amy co mmīgüg mdzachpocy'ixy? o ¿Nej co mmīgüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'óciy ajt njädaanim ma Dios ytiydundac. ¹¹ Com jadu'n jaybety ymiñ ma Dios ñecy, ma jadu'n ymina'ñ:

Janch janch co ich, je tügpajcpi Dios, jadu'n nmina'ñich co tüg'óciy naaxhuiñyjäy xyhuingoxtinähuibich xyhuindzigihuibich, etz nañ tüg'óciy naaxhuiñyjay xycapx-paadibich co ich je' tügpajcpi je Dios.

¹² Com Dios nhuindzin'ajtim, paady ycip nidüg'óciy ich ajt nayguëxictähuaanim ma Dios yhuinduu, chi Dios xy'amidohuaanim nej ti ndzinaayim ti njugy'ajtim nidüg nidüg.

Ca' mīgüg myajhuinma'ñyigooyixy

¹³ Paady ycipi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdungixipy huiḁi mmīgügtijc ca' jäygidägy, huiḁi mmīgüg yajpocycähuib. ¹⁴ Nnejhuibich tiydudägy co ajt nHuindzin Jesucristo ytiy'ajt xyajnejhuixim co jëbi njicxim huen tim huiḁi jicxy tim huiḁi picy. Je jicxy je picy ca' ma ycobocy. Per pen tüg mīgüg yhuinma'ñ pidacp co Dios ca' jäygidägy co yi' yjicxpy nijējity jicxy picy, pues ca' yhuaadity co yi' jadu'mbi jäy jicxy huiḁi yi' ytiy co ca' huaad njicxim. ¹⁵ Pen ca' m'oy'ity miid tüg mīgüg co ti mjicxy je jicx picy huiḁibi yi' ytiy co Dios ca' jadu'n yaj'cöduy, chi ca' anajty mdzocy mjihuixy yi mmīgüg nej ypadyii. Com nañ Cristo ti y'ögy miid yi mmīgüg ypocy ycipi, paady ca' huaad myajtigoy yi mmīgüg, miid co mjicxy huiḁi yi' ca' jäygidägy. ¹⁶ Ca' ajcxy m'a'ixiygixipy co jibic yajnigapx yajnimiydägipy huiḁibi miich ajcxy myajnajxp co y'oyity. Oy miich mjahuinjihuixy Dios ytiy'ajt, per ca' huaad mdunipy huiḁi yi mmīgüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'miixim huiḁijaty huaad njicxim n'uucim, o huiḁi ca' huaad njicxim n'uucim. Hue' janchtiy ti xyñajtz'ane'miixim nej jëbi tiydudägyi ndzinaayim njugy'ajtim. Nej jëbi jotcuyc n'ijtim miid ajt nmīgügtijc. Nej jëbi jotcuyc nayjihuixim miid Dios ymic'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'miixim, huin'it jäygidägipy Dios etz nañ jadu'n jäygidägipy jäy ajcxy nej anajty nduunim.

¹⁹ Tzoc panixim je huinma'ñ jadu'n nej jëbi ndzinaayim agujc jotcuyc miid ajt nmīgügtijc, ca' ma ti tzip ti capxy nmüid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtigooyim Dios ytung miid tzip capxy jadu'n nej huiḁi jëbi huaad ndzüdzim, etz

huidibi ca' huaad ndzüdzim. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt nmigügtijc yajcoboicpy, e jadu'n nyajhuinma'ñyidigooyim ajt nmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzim etz ca' huaad vino n'uucim, o jactijaty huidibi ajt nmigüg yajcoboicpy. Com co jadu'n ajt n'ididzim, hue' anajty ajt nmigüg nyajhuinma'ñyidigoyaanim ma ymibijcin. ²² Miich ajcxy huidibi huinjihuüyb Dios ytiy'ajt co Dios ca' capx'aducy ti jicxin ti pijcin, ca' mnimiydacconaxipy müd jäy ajcxy. Dios ñejhuüyb co miich mhuinjihuüy yi' ytiy'ajt. Jëbi jotcuic mdzinähuipy pen mguychinaayb je huinma'ñ huidibi miich mnejhuüygixyp co ytudägyity, e huin'it ca' jibic mnayjihuüyb ajcxy. ²³ Tundigooyb yi' migügtijc huidibi jotmetz jicxp nijëjity jicxy picy, müd co tzigüyb yi' co Dios ymijotmädiyb co ti jicxy huidi ytiipy co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajñigüeyj. Pen ca' nguyduunim jadu'n nej nhuinjihuüyim Dios ytiy'ajt, tundigooyim anajty.

15

Tzocix migügtijc, ca' ñaydüg mnaychogyii

¹ Ich ajt huidibi tiydudägy nmibijcin etz nhuinjihuüyim Dios ytiy'ajt, copicy nmimecxtujcin ajt nmigügtijc huidibi ca'ni huinjihuüy yajxon Dios ytiy'ajt. Ca' huaad ti nduunim müd ngi'm jäygidaacin ycixpi. ² Copicy nyajtuunim oyhuinma'ñ müd ajt nmigügtijc, jadu'n nej jëbi ajt nmigüg jäygidägy, etz jadu'n nej jëbi nbubejtim ajt nmigüg müd ymibijcin. ³ Com nañ Cristo ca' ti ytuñ müd yci'm jäygidaacin ycixpi, com jaybety jadu'n miñ ma Dios ñecy, ma je Cristo nimay Dios Teedy: "Miich mmidzip ajcxy huidibi xyñigapxp xyñi'ojüyb, xyñigapxpich xyñi'ojüybich ajcxy nañ jadu'n." ⁴ Com tüg'óciy Dios y'ayuc huidibi ycojay jecy'ajty, hue' cojay müd ich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuüyim co Dios jadu'n tzocy co nmimecxtujcin ajt nmigügtijc. Nañ Dios y'ayuc xyjot'amijmooyim, e nañ xyajnejhuüyim jadu'n jëbi njijp'ijxim pubejtin ma Dios. ⁵ Com Dios, yi' je' huidi xypubejtim müd mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmid'idipy tú'ciy mjot mhuinma'ñ nej Jesucristo yjot yhuinma'ñ müdity, e jadu'n jëbi mnayyaj'oy'jigixy jotcuic ca' ma tzip capxy. ⁶ Dios miich ajcxy xypubedipy xypudigihuipy, jigix jëbi myajtügüygixy mjot mhuinma'ñ, etz tú'ciy m'ojadajtcixipy mhuindzigüygixipy Dios Teedy etz ich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudíoäyity

⁷ Naygöbícigix nidüg nidüg agujc jotcuic, tim jadu'n nej Cristo xycöbiccixy agujc jotcuic. Co mnaygöbícigixipy nidüg nidüg agujc jotcuic, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíoäy ajcxy, e jadu'n cuyduñ Dios ytiy'ajt huidi yajhuinhuanüy Abraham, Isaac etz Jacob jecy'ajty co jadu'n tuna'ñ müd yi' ajcxy ycixpi. ⁹ Nañ jadu'n Cristo ooy pubejty yi' huidibi ca' yjudíoäyity, jaydëbi ajcxy capxpaadipy Dios, müd co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David yminañ:

Com miich Huindzin Dios ti xycohua'ñich paady miich ngapxpaady ma yi' jäy ajcxy huidibi ca' yjudíoäyity. Ich miich nhuin'ihuipy müd himnos.

¹⁰ E nañ jaybety jadu'n ymiñ ma Dios yñecy:

Jotcuic'ajtcixy quipxy müd Dios yjäy miich ajcxy huidi ca' yjudíoäyity.

¹¹ E nañ jaybety jadu'n ymiñ ma Dios ñecy, ma jadu'n ymina'ñ:

Capxpaatcix yi' Huindzin Dios miich ajcxy huidi ca' yjudíoäyity. Capxpaatcix yi' Huindzin Dios miich ajcxy nidüg'óciy naaxhuiñyjäy.

¹² E Isaías ycojay nañ jadu'n ma yi' ñecy, ma jadu'n ymina'ñ:

Ma'xung'adamb tög Isaí y'ap y'oc, e yí' ane'mamb yí jáy huiðibi ca' yjudíojäyity. Co yí jáy ajcxy huiðibi ca' yjudíojäyity mijpidägipy je mij'ane'mbi, hue' ajcxy yjijp'ijxpy co möhuaanip oy'ajt.

¹³ Nmibijctzooybich Dios müd miich ajcxy ycixpi huiðijaty mibijcp Jesucristo, com njijp'ijxim co Dios xymöhuaanim oy'ajtin. Nmibijctzooybich Dios müd miich ajcxy ycixpi co huen xyajjotcugihuip ajcxy, e nañ co huen xyajpoocxipy mjot mhuinma'ñ. Nmibijctzooybich Dios co huen xypubejtciy xypudigiigixy müd yí' yjihui'ñ ymic'ajt, jayðebi mijjp'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcuyc nayjihuiyijich müd miich ajcxy ycixpi, com nehuiyibich co miich ajcxy müdity oyjot oyhuinma'ñ, e nañ mhuinjihuuyb ajcxy tög'óciy Dios ytiy'ajt, paady jëbi mnayyaj'ixpícgixy nidüg nidüg. ¹⁵⁻¹⁶ Jotmic'amy ti nya-jjämejtzcoodyich miich ajcxy nijëjity Dios ytiy'ajt ma jada necy huiði nyajnijayiyb ajcxy cham, com Dios may'ajt oy'ajt ti tuñ müd iich, e ti xyhuin'ixyich jayðebi nduñich Jesucristo ytung ma yí jáy ajcxy huiði ca' yjudíojäyity. Jadu'n nduñich müd Dios ycixpi, co ngapxhuäcxyich je oybi tiy'ajt jadun nej Jesucristo y'o'cy müd jáy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yí mayjäy ca'pi yjudíojäyity huiði ti mibicy Jesucristo etz huiðibi yí Espíritu Santo ti yajhuäch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma iich njot nhuinma'ñ, paady ycixp ooy jotcuyc nayjihuiyijich co nduñich müd Dios ycixpi. ¹⁸ Jada janchtiy iich nyajmüdmidyacy miich ajcxy je may'ajt huiði Cristo ti tuñ co ngapxhuäcxich yí y'ayuc. Ca' nyajmüdmidydaaccixy huiði Cristo ytumyb müd jacpinjaty. Müd co ngapxhuäcxich Cristo y'ayuc, e nañ mijhuinma'ñ ndumybich müd Cristo ymic'ajt, paady mayjäy ycapxymidooyb Dios huiði ca'p ajcxy yjudíojäyity. ¹⁹ Ti ngapxhuäcxyich tög'óciy Cristo ytiy'ajt nej jëbi ajcxy y'alma ñidzoocin paadip. Jim nyajtzondacyich Jerusalén, e ti nhuiðijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigiigiyich co iich mijhuinma'ñ nduñich, etz Dios ytiy'ajt nyéjibich. ²⁰ Ooy nijot'atyich co ngapxhuäcxibych Jesucristo ytiy'ajt ma anajty ca' pin jayijp capxhuäcxyñi. Iich oga'n Jesucristo y'ayuc jim nminicxi ma yí jáy ajcxy huiði ca' anajty midoy Jesucristo ytiy'ajt. Jadu'n nduñich, jigix ca'ydi njijptigiigiyich ma huingbi anajty jayijp ti capxhuäcxi Jesucristo ytiy'ajt. ²¹ Com jaybety jadun ymiñ ma Dios ñecy, ma Dios jadun ymina'ñ:

Yí jáy ajcxy ymidohuaanip Cristo y'ayuc huiðibi ca'ni anajty midoogixy. Yí jáy ajcxy yhuinjihuuhuaamyb je Cristo ytiy'ajt huiðibi ca'ni anajty nehuiyigixy co yjiijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nyajnibadiyich nícxiyich ma miich ajcxy. ²³ Canaag jimijt ndzachnijot'atyich anajty nícxa'ñich ma miich ajcxy. Ixti chamni ti nhuiðijttäyich majaty anajty nhuidida'ñich. ²⁴ Paady njijp'ijxypich co jëbi nnaxihuibich ma miich ajcxy co anajty nícxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy müd ndu'amgixpich. ²⁵ Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meen huiðibi nyegaamybich ma yí mibijcpidijc jim Jerusalén müd ayoobtijc ycixpi. ²⁶ Com yí mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yí ayoobtijc jim Jerusalén huiðibi mijpidacp Jesucristo. ²⁷ Ooy ajcxy jotcuyc ñayjihuiyii co ymigügtijc pubeda'ñ jim Jerusalén. Paatip co pubedipy ajcxy, com ma yí judíojäy ajcxy, jim ajcxy ti paady Dios ytiy'ajt, paady paatip ajcxy huiði ca' yjudíojäyity co pubedipy yí judíojäy ajcxy. ²⁸ Co anajty ti nyajcidiigiydaaygixy je meen huiðibi yí migügtijc ya Macedonia etz Acaya ti yajmujccixy müd je mibijcpidijc ycixpi huiðibi yajpatp jim Jerusalén, huin'it nnicxa'ñich jim España ñaaxjot. Nnaxihuaambich

ma miich ajcxy co anajty jim nnicxich. ²⁹ Nejhuibich co anajty jim naxiyich ma miich ajcxy, je Cristo xypubedipich je ymic'ajt, e nyegipich Cristo ymic'ajt iixpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtijcich, com miich ajcxy mijpidaaccixyp ich ajt nHuindzin Jesucristo, e com miich ajcxy müd Dios yjihui'ñ ymic'ajt ma m'aa m'jot, e nañ xychojcpich xyjihuiybich, paady ycixp nbijctzooyich may'ajt, yajtügigixy m'ayuc mhuinma'ñ müd ich, jëbi tú'ciy Dios nmibijctzoohuim mictägy müd ich ycixpi. ³¹ Mibijctzoogix Dios co huen xyñihua'ñich xycohua'ñich ma yi judíoäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ich jim ngiyegaamy. ³² Mibijctzoogix Dios co huen xypubedipy xypudigihuibich, jëbi nícxibich ma miich ajcxy agujc jotcuyc, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuyc, e jim ich nhuinma'ñ nyajpocxip. ³³ Mibijctzooybich Dios müd miich ajcxy ycixpi, je Dios huidibi jotcuyc'ajtin yejcp, co huen miich ajcxy xypubedipy xypudigihuipy. Jadu'n jadu'n. Amén.

16

Capxpooxín nidüg nidüg ma pinjaty y'ixy'ajtyp

¹ Cham ich miich ajcxy nyajnibijccixy, cöbijccixy je ajt nmigüg töxyjäy je Febe co anajty ñicxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe müd ajt nHuindzin Jesús ycixpi. Com jadu'n ycopicyity co jäy huidibi mibijcp Jesucristo huen naymigüg'ájtigixy. Mbubedip mbudigihuip jadu'n nej yi' jotmay müdity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooxín ma jada necy müd yi Priscila etz Aquila huidibi ich anajty müd ooy oy nduñ co ngapxhuäcxyich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin müd ich ycixpi, ca'ydi n'ögyich. Nyajnajxypich jäygidaacin ma Dios müd yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíoäyity yajnajxcixy jäygidaacin ma Dios müd yi' ajcxy ycixpi. ⁵ Nguejxypich capxpooxín nañ jadu'n ma jada necy müd yi mibijcpidijc ajcxy huidijaty naymujjcp ma Priscila etz Aquila ajcxy ytiyc. Etz nañ nguejxypyich capxpooxín ma yi Epeneto huidibi ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooxín ma María, yi' ooy ti ytuñ müd miich ajcxy müd Cristo ycixpi. ⁷ Etz nañ nguejxypyich capxpooxín ma yi Andrónico etz Junias. Ich n'amigüg ajcxy huidibi ti ypujxtijc iñäy quipxy müd ich. Capxpaady ajcxy y'ity müd yi apóstoltijc. Jacjayijp ajcxy mijpidacy Jesucristo ca'ydi ich.

⁸ Etz nañ nguejxypich capxpooxín ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooxín ma yi Urbano huidibi xymüdtuñich co ich anajty ngapxhuäcxyich Jesucristo ytiy'ajt. Nañ jadu'n nguejxypich capxpooxín ma yi Estaquis huidibi oy ndzocy njihuïyich. ¹⁰ Nañ nguejxypyich capxpooxín ma yi Apeles, huidibi ooy tiy'ajt ti yecy co yi' ymibijcpy Cristo tiydudägy. Nañ nguejxypich capxpooxín ma yi Aristóbulo etz jac pinjaty huidibi yajpatp ma yi' ytiyc. ¹¹ Nañ nguejxypich capxpooxín ma ich n'amigüg yi Herodiön. Etz nañ nguejxypich capxpooxín ma yi Narciso yjuugy ymigüg huidibi mijpidacp ich ajt nHuindzin Jesucristo. ¹² Nañ nguejxypich capxpooxín ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooxín ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooxín ma yi Rufo, je huidibi yi mibijcpidijc ycömaayb. Nañ nguejxypich capxpooxín ma yi' ytaj, com jadu'n njihuïyich jadu'n nej jihuïy yi' ndaj'adyiijich. ¹⁴ Nañ

nguejxpyich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxpyich capxpooocxin ma yi Filólogo, yi Julia, yi Nereo etz yi' y'uch töxyjäybi, yi Olimpás, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimájtzigix miñ yxipy agujc jotcuyc. Tüg'óciy huidibi mibijcp Jesucristo ma yi jacjaydyi cajn, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtiy, huidibi nigoob yjäyajtziptuna'ñ yjäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñ ydigoooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcín. Je' ajcxy huin'ñnigixp je jäy ajcxy huidibi ca' mijcajee y'ixpiyity. Yi ayuc huidibi ymihuidijtyp, jadu'n yajmidoy nej jihuiy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidooy Jesucristo, paady jotcuyc nayjihuiyijich müd miich ajcxy ycixpi. Ndzojcypich co miich ajcxy mnejhuihuipy huidibi oyhuinma'ñ jaydëbi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jëbi ndzinaayim müd ajt nmigügtijc agujc jotcuyc, ca' ma tzip capxy. Tim huingon je xii je tiempo mina Dios yajcödigoya'ñ yi mujcu' ymic'ajt, e yi' xypubedip xypudigihuip jëbi mmimadägipy yi ca'oybi. Nmibijctzooybich Dios müd miich ajcxy ycixpi co ich ajt nHuindzin Jesucristo huen may'ajt oy'ajt tuñ müd miich ajcxy jabom jabom.

²¹ Je Timoteo huidibi tumb müd ich co ngapxhuäcxich Jesucristo ytiy'ajt xyajniguejxp ajcxy capxpooocxin. Nañ jadu'n Lucio, Jasón etz Sosípater ich n'amigüg ajcxy, xyajniguejxp capxpooocxin.

²² Ich Tercio huidibi cojaayb Pablo y'ayuc ma jada necy, nañ nguejxypich capxpooocxin ma miich ajcxy, com ich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytiyc yquejxyp ajcxy capxpooocxin ma miich ajcxy. Erasto je cajn ytesorero etz ajt nmigüg huidibi yxii Cuarto, nañ xyajniguejxp ajcxy capxpooocxin.

²⁴ Nmibijctzooybich Dios müd miich ajcxy ycixpi jabom jabom co ich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooocxin ma yaj'ñbaady yajcapxpaady Dios

²⁵ Tzoc cömayim Dios, tzoc ojadajtim, tzoc huin'ñhuim müd himnos. Dios müd ymic'ajt jëbi xypubedipy xypudigihuipy ajcxy, jaydëbi ajcxy tydudägy mmibigipy Jesucristo, ca'ydi mjetmetzcüygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyi jäy ycapxhuäcxixyp. Jada je tiy'ajt huidibi jecy'ajty ca' pín huinjihuiy huidibi Dios ti xyajnejhuuyim. ²⁶ Dios ti xyajhuinjihuiyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiendo, ane'mb co huen yajcapxhuäcxy jada tiy'ajt oybi ma tüg'óciy naaxhuiñyäj, jigix jëbi mayjäy mijpidägip etz capxymidoohuipy Dios.

²⁷ Müd co Jesucristo ooy mijhuinma'ñ tuñ müd ich ajt ycixpi, paady tzoc cömayim, tzoc ojadajtim etz tzoc huin'ñhuim müd himnos huinixii huinitiendo yi tügpajcpi Dios huidibi ñejhuiydaayb tüg'óciy. Jadu'n ngapxcixyich. Amén.

1 CORINTIOS

Yi Midügpî Necy Huïdibi San Pablo Yajñiguejx Je Mibijcpi dijç Jim Corinto

¹⁻² Hich Pablo, Dios jadu'n tzojcp co Jesucristo xyajñibicyich co ngapxhuäcxibych yi' y'ayuc. Hich etz ajt nmigüg Sóstenes nijayñybich miich ajcxy tüg'óciy huïdibi jim Corinto huïdibi mijpidacp Dios etz ñayyöymújcigixy jim miid Dios ycixpi. Nijayñybich miich ajcxy huïdibi Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayñybich miich ajcxy huïdibi Dios ti huin'ixy, jaydëbi mmid'idipy huädz jot huädz huinma'ñ. Nañ jadu'n nijayñybich tüg'óciy je jäy huenyma'amyity huïdibi Dios mibijctzoob ojadajtp miid hich ajt nHuindzin Jesucristo yxii. ³ Ndzojcypich co hich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajñajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjugy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjugy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjugy'ajtin huïdibi Dios ñiyejcpy, ma je' m'ahuijxcixy co Dios yajñiguëxiga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yi' tiyduñ naaxhuiñyây ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yi' y'ayuc miid miich ajcxy, ca' xy'ixmadzaangixy ni mina xii, com yi' ti xyhuin'ijxcixy co miid mnaymigüg'ajtigixy yi' y'ung, hich ajt nHuindzin Jesucristo.

Naybijc-huäcxii ma je mibijcpi dijç

¹⁰ Migügtijc, hich miich ajcxy nmînucxtacyp miid Jesucristo yxii co tungixy may'ajt nay'ayuc-huinjiñyigixy, e ca' mnaybijc-huäcxigixy. Tzinaaygix xic xon miid tú'ciy mjet mhuinma'ñ. ¹¹ Miich ajcxy migügtijc, ti je Cloé y'amigügtijc xyajñimäyich co ooy miich ajcxy mnaychip'ijxigixy, e ca' mnay'ayuc-huinjiñyigixy. ¹² Miid jada ycixpi nmîna'ñich co nijëjity miich ajcxy jadu'n mînaangixy: "Hich Pablo nmijnicxpejtpyich." E nijëjity ymînaangixy: "Hich Apolos nmijnicxpejtpyich." E nijëjity ymînaangixy: "Hich Pedro nmijnicxpejtpyich." E nijëjity ymînaangixy: "Hich Cristo nmijnicxpejtpyich." ¹³ ¿Nej Cristo ti ñaybijc-huäcxii? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mnîbejtcixy miid Pablo yxii? Ca' yjadu'nity. ¹⁴ Nyajñajxypich Dioscojuyip ma Dios co ca' jac ni pin hich ti ngayajñibety. Jëda'ajty ti nyajñibetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy ymînaangixy co ti ajcxy ñibety miid Pablo yxii. ¹⁶ Nañ jadu'n ti nyajñibetyich yi' Estéfano miid yi' yjuugy ymigüg ajcxy. Jac ni je' ca' njäymechich pen ti nyajñibetyich. ¹⁷ Com Cristo ca' xyquejxyich jäy yajñibejtpi. Hue' janchtiy ti xyquexyich co ngapxhuäcxibych yi' y'ayuc ytiy'ajt oybi. Ca' nyajtuñich xpicytijc y'ayuc yhuinma'ñ. Co ixipy nyajtuñich xpicytijc y'ayuc yhuinma'ñ, naadig'i'ajt ixipy co Cristo y'o'cy ma yi' cruudz miid ajt nbocy ycixpi.

Cristo ymiid Dios ymic'ajt etz yi' y'ixpijcin etz ytiy'ajt

¹⁸ Yi jäy ajcxy huïdibi y'alma tigoyam, loci huinma'ñ yi' tijcixy co Cristo y'o'cy ma yi' cruudz miid ajcxy ypocy ycixpi. Per hich ajt pinjaty y'alma nîdzögam, hue' mînaanim co

jada ayuc tɪy'ajt mɪɪd Cristo ycɪxpɪ, ymɪɪd yɪ' Dios ymɪc'ajt. ¹⁹ Com jaybety jadu'n ma Dios ñecy, ma Dios jadu'n ymɪna'ñ:

Nyajtigoyaamybɪch yɪ ɪxpɪcytɪjc y'ayuc yhuinma'ñ.

Njɪbɪjcɪbɪch yɪ cohuinma'ñyɪɪdɪjc ajcxy yhuinma'ñ.

²⁰ ¿Ti mɪc'ajt ymɪɪd yɪ cohuinma'ñyɪɪdɪjc ajcxy? ¿Ti mɪc'ajt ymɪɪd yɪ ɪxpɪcytɪjc? ¿Ti mɪc'ajt ymɪɪd yɪ huidibɪ ajcxy nay'ɪxquɪpxɪp mɪɪd ɪxpɪjɪcɪn? Ca' ti mɪc'ajt mɪɪdɪty yɪ' ajcxy, com Dios ti yaj'ahuimbɪty yɪ naaxhuɪñ y'ɪxpɪjɪcɪn tzuu huinma'ñ loci huinma'ñ. ²¹ Com Dios jadu'n ti tzocy co jɪy ajcxy ca' padaangɪxy Dios ytɪy'ajt ma yɪ naaxhuɪñjɪy ajcxy y'ɪxpɪjɪcɪn. Dios yjɪygidacpy co jɛbɪ jɪy ajcxy y'alma ñɪdzögɪpy co ajcxy mɪbɪgɪpy je Dios y'ayuc huidibɪ ngapxhuäcxypɪch. Je Dios y'ayuc ytɪy'ajt huidibɪ ɪch ajcxy ngapxhuäcxpy, yɪ' yɪ naaxhuɪñjɪy ajcxy huɪnjɪhuɪyɪgɪxyp nej tzuu huinma'ñ loci huinma'ñ.

²² Yɪ judíoɪjɪy ajcxy ooy tzachtzojccɪxy co Dios tunɪpy ɪxpejt mɪjhuinma'ñyɪbɪ. Yɪ griego jɪy y'ixtaayɪxyp ayuc huinma'ñ etz huenhuidibɪty ɪxpɪjɪcɪn. ²³ ɪch ajcxy ngapxhuäcxɪch co Cristo y'o'cy ma yɪ cruudz mɪɪd jɪy ajcxy ypocy ycɪxpɪ. Yɪ maybɪ judíoɪjɪy ajcxy ca' mɪjɪdägaangɪxy ca' cöbɪgaangɪxy ɪch ajcxy n'ayuc. Etz yɪ maybɪ jɪy ajcxy huidibɪ ca'p yjudíoɪjɪyɪty, hue' tɪjɪcɪxy co tzuu huinma'ñ loci huinma'ñ ɪch ajcxy n'ayuc. ²⁴ Per yɪ jɪy ajcxy huidibɪ Dios ti yhuin'ɪjɪxɪxy, huen yjudíoɪjɪyɪty, o huen ycajudíoɪjɪyɪty, hue' ajcxy tɪjɪcɪxy co je Cristo ymɪɪd anajty Dios ymɪc'ajt etz ymɪɪd anajty Dios y'ayuc ytɪy'ajt. ²⁵ Co ɪxpɪcytɪjc tɪjɪcɪxy co Dios ytung, tzuu huinma'ñ loci huinma'ñ je', nɪgɪ jac'oyhuinma'ñ yɪ' huidibɪ Dios tumyb, ca'ydi huidibɪ jɪy ajcxy ytumyb. Co ɪxpɪcytɪjc ymɪnaangɪxy co Dios ca' ymɪc'ajt mɪɪdɪty, nɪgɪ jacmɪc'ajt mɪɪd yɪ', ca'ydi huidi jɪy ajcxy ymɪɪd.

²⁶ Mɪgügtɪjc ajcxy, huɪnmay mɪɪch ajcxy jadu'n nej Dios ti xyhuin'ɪjɪcɪxy. Ni may mɪɪch ajcxy huidibɪ ca' y'ɪxpɪcyɪty, tim nihueeni huidibɪ ɪxpɪcyɪp ma mɪɪch ajcxy. Ni may mɪɪch ajcxy huidibɪ ca' ti mɪc'ajt, ca' ti ane'mɪn mɪɪdɪty. Ni hueeñ mɪɪch ajcxy huidibɪ mɪc'ajt mɪɪd etz ane'mɪn mɪɪd. Ni may mɪɪch ajcxy huidibɪ oyñɪpɪnjɪyɪty. Ni hueeni mɪɪch ajcxy huidibɪ y'ap yteedy rey'ajtp. ²⁷ Per Dios ti huɪn'ɪxy yɪ jɪy ajcxy huidibɪ ca' y'ɪxpɪcyɪty co jadu'n yajtzo'yduna'ñ yɪ ɪxpɪcyjɪy yɪ cohuinma'ñjɪy. Dios ti huɪn'ɪxy yɪ jɪy ajcxy huidibɪ ca' ti mɪc'ajt mɪɪdɪty, mɪɪd co jadu'n yajtzo'yduna'ñ yɪ jɪy ajcxy huidibɪ mɪc'ajt mɪɪd, ane'mɪn mɪɪd. ²⁸ Dios ti huɪn'ɪxy huidibɪ jɪy ajcxy ca' mɪj'ɪjɪx mɪjɪpɪdaaccɪxy, huidibɪ jɪy ajcxy ytɪjpy co ca' y'oyɪty. Dios jadu'n tuuñ co yajcödigoya'ñ yɪ huidibɪ jɪy ajcxy mɪj'ɪjɪxp mɪjɪpɪdacp, je huidibɪ jɪy ajcxy ytɪjpy co y'oyɪty. ²⁹ Jadu'n Dios ytuñ co ca' tzocy co ni pɪnjɪy ca' ñaygömayɪy ci'm ma yɪ' yhuɪnduu. ³⁰ Per Dios ci'm yaj'oyɪy nej jɛbɪ mɪɪch ajcxy myajpatcɪxy mɪɪd Cristo Jesús. Dios ci'm yaj'oyɪy nej jɛbɪ ajt nbaatɪm ɪxpɪjɪcɪn ma Cristo. Nañ jadu'n yaj'oyɪy nej jɛbɪ Cristo xyaj'ahuimbɪjɪm tudägy, jaydɛbɪ Dios xycöbɪjɪcɪm nej tudägy jɪy. Nañ jadu'n Dios yaj'oyɪy nej jɛbɪ huaad nbaatɪm ajt nhuädzjot nhuädzhuinma'ñ ma Cristo. Nañ jadu'n Dios yaj'oyɪy nej jɛbɪ Cristo xyñɪhuaanim ajt n'alma etz njugy'ajtin. ³¹ Paady ycɪxpɪ jaybety ymɪñ ma Dios ñecy, ma jadu'n ymɪna'ñ: "Pɪnjaty naygömayaanɪp ci'm, huen naygömayɪi mɪɪd co mɪbɪcy ajt nHuɪndzɪn Dios."

2

Je y'ayuc ytɪy'ajt, je Cristo huidibɪ cruudzpejt

¹ Per co n'oyɪch ma mɪɪch ajcxy jayhuɪn, ngapxhuäcxɪch anajty Dios y'ayuc ytɪy'ajt, oy'amy nyaj'ɪxpɪjɪcyɪch, ca' nyajtuñɪch ɪxpɪcyjɪy ajcxy y'ayuc, etz nañ jadu'n ca' nyajtuñɪch tzɪpjatypɪ ayuc. ² Co jɪm n'ɪjtyɪch ma mɪɪch ajcxy jayhuɪn, chi nhuinma'ñyɪbɪdacyɪch co ca' jac ti ayuc ti huɪnma'ñ nyajmɪɪdmɪyɪdägaangɪxy, jɛ'yɪ janchtɪy nyajmɪɪdmɪyɪdägaangɪxy Jesucristo etz jadu'n nej je' yajcruudzpejtɪ mɪɪd jɪy ajcxy ypocy ycɪxpɪ. ³ Co jɪm ɪch anajty nyajpaadyɪch ma mɪɪch ajcxy, chi ooy yung naxy naybidaacɪch, ooy ndzɪgɪy njɪhuɪyɪch. ⁴ E co nmɪɪdmɪyɪdaacyɪch mɪɪch ajcxy, co ngapxhuäcxɪch Dios ytɪy'ajt ma mɪɪch ajcxy, ca'pɪ ɪch mɪɪch ajcxy nyajmɪbɪcy mɪɪd ɪxpɪcytɪjc y'ayuc mɪɪd tzɪpjatypɪ ayuc. Je Espíritu Santo xypubejtpɪch anajty co ajcxy nyaj'ɪjɪxy

Dios ymic'ajt, e paady ycixpi ti ajcxy mmibijccixy Dios y'ayuc. ⁵ Jadu'n je Espíritu Santo xypubetyich anajty, jigix miich ajcxy mijpidägipy Dios, ca' nminaanim müd co ti mmidoogixy oyjatypi ayuc huidibi jäy ajcxy ti cojy ti macxy. Ti mmijpidaaccixy Dios com ti m'ijxcixy ti mjihuiygixy Dios ymic'ajt.

Dios xyajnejhuüym yi' ytiy'ajt müd y'Espíritu Santo

⁶ Oy co ti nyajmibicyich miich ajcxy müd ayuc huidibi ca' chipjatyity, per nañ jadu'n nyaj'ixpiyich oyjatypi ayuc tzipjatypi ayuc yi' mibijcpidijc ajcxy tübi yhuinma'n ymiinni ymejchni. Tigachjaty ich n'ayuc ndiy'ajt e ca' ñaybadyii müd naaxhuiñjy äy ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xii jadachambi tiempo. Ich n'ayuc ndiy'ajt ca' ñaybadyii müd je jäy ajcxy y'ayuc ytiy'ajt huidibi ane'mb ya naaxhuiñ, yi' jadu'mbi jäy yi' ajcxy yjugy'ajtin cixamb tigoyamb tüccí'yi. ⁷ Ich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuüy huinjihuüy, je ayuc tiy'ajt huidibi Dios ymüd coyüch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydëbi ajt n'alma ñidzoocim huinixii huinitiempo. ⁸ Ni tüg mij'ane'mbi huidibi tzinaayb jadachambi xii jadachambi tiempo, ca' huinjihuüy jada ayuc. Co ixipy ajcxy huinjihuüy, ca' ajcxy cayajcruudzpejty je Huindzin Dios y'ung, je huidibi müd Dios y'oy'ajtin ymij'ajtin. ⁹ Com ca' ajcxy huinjihuüy Dios y'ayuc, paady ycixpi jaybety ymiñ ma Dios ñecy, ma jadu'n ymina'n:

Ni tüg jäy ca' ixy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixiy müdity müd je jäy ajcxy ycixpi huidibi yi' mijpidaacip yajmij'ajtip.

¹⁰ Müd co nmijpidaacim Dios, paady ycixpi Dios yaj'oyii nej jëbi je Espíritu Santo xyajnejhuüym yi' ytiy'ajt. E je Espíritu Santo yhuinjihuüydaayb ñejjihuiydaayb tüg'óciy, ixti yhuinjihuüydaayb nej Dios yhuinma'n ti pidägy co tuna'n, je huidibi ca' pin nejhuüy.

¹¹ Ca' pinjäy jëbi huinjihuüy nej jadügpi jäy yjot yhuinma'n müdity. Je jäy yci'mhuinma'n jëbi huinjihuüy nej je' yci'mjot yci'mhuinma'n müdity, ca' jac pin. Nañ jadu'n ca' jac pin jëbi huinjihuüy nej Dios yjot yhuinma'n müdity. Dios yci'mjihui'n huinjihuüyb nej Dios yjot yhuinma'n müdity. ¹² Dios ca' xyaj'adigüym xyajjottigüym huingjäy yjihui'n ymic'ajt. Hue' Dios xyaj'adigüym xyajjottigüym yi' yci'mjihui'n yci'mmic'ajt, paady ycixp jëbi nhuinjihuüym tüg'óciy huidibi ti xymooyim. ¹³ Ich ajcxy nyajmüdmüydacpy miich ajcxy je ayuc tiy'ajt huidibi je Espíritu Santo xyaj'ixpijccixyich. E ca' nyajmüdmüydaaccixy je tiy'ajt huidibi ti n'ixpiyich ya naaxhuiñ huidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espíritu Santo xyajnejhuüyich. Ich ti nyaj'ixpiyich yi' ajcxy huidibi müd Dios yjihui'n ymic'ajt ma y'aa yjot.

¹⁴ Pinjaty ca' müdity Dios yjihui'n ymic'ajt, ca' yi' cöbiga'n je tiy'ajt huidibi je Espíritu Santo xyajnejhuüym. Com yi' ajcxy ytiyp co jada tiy'ajt tzuu huinma'n loci huinma'n yi'. Nañ ni ca' ajcxy Dios ytiy'ajt huinjihuüy, com ca' ajcxy müdity Dios yjihui'n ymic'ajt huidibi yajnejhuüyb Dios ytiy'ajt. ¹⁵ Je jäy huidibi ymüd'ajtipy Dios yjihui'n ymic'ajt, yi' jëbi yajcüyöy yajtecyyöy tüg'óciy pinjaty yjot yhuinma'n. Per ca' yi' huaad pinjaty yajcüyöy yajtecyyöy yjot yhuinma'n. ¹⁶ Com jadu'n Dios ymina'n ma ñecy: “¿Pin jäy huinjihuüyb nej Dios yhuinma'ñmüdity? Ca' ni pin. ¿Pin jäy huaad Dios yaj'ixpiy? Ca' ni pin.” Oy ca' pin huinjihuüy jecy'ajty nej Dios yhuinma'ñmüdity, jadachambi ich ajt nhuinjihuüym nej Cristo yhuinma'ñmüdity.

3

Je huidibi ajcxy mibijcp ytungixy ma Dios

¹ Migügtijc ajcxy, co ti n'oyich ma miich ajcxy, chi nmüdmüydaaccixy jadu'n nej jihuüy miich ajcxy mhuinma'ñmüdity nej naaxhuiñjy äy ajcxy yhuinma'ñmüdity huidibi ca' ymibijccixy. E ca' anajty miich ajcxy müdity je mhuinma'n huidibi je Espíritu Santo

yejcpy. Miich ajcxy mmibijcin ma Cristo jadu'n yi' nipaady nej ma'xungdijc ymibijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuïygixy. Jadu'n nipaady nej jäy ajcxy yaj'ügy leche yi ma'xungdijc, müd co cacöbiga'ñ caayin uucin huidibi jemxy cidacp ma yjot. Ca' miich ajcxy anajty ti mnayñi'ixiïygixy ma mjot mhuinma'ñ nej jëbi mhuinjihuïygixy Dios y'ayuc yi tzipjaty. Chambaadni ca' mnayñi'ixiïyiini ajcxy ma mjot mhuinma'ñ nej jëbi mhuinjihuïygixy yi tzipjaty ayuc. ³ Chambaadni miich ajcxy myajtuñ mjot mhuinma'ñ jadu'n nej naaxhuiñjäy ajcxy müdity huinma'ñ ca'pi ymibijccixy, chambaad mmi'ijxtinaaygix yi migügtijc, chambaad mnaychip'ijxigix naybijc-huäcxigix. Jadu'n m'iditczixy nej jacjadyi jäy ajcxy y'iditczixy huidibi ca' ymibijccixy. ⁴ Com nijëjity miich ajcxy minaangixy: "ñich naygomajtzip ma Pablo." Etz nijëjity minaangixy: "ñich naygomajtzip ma Apolos." Jada je tiy'ajt co ca' mnay'ayuc-huinjihuïygixy tim jadu'n nej jäy ajcxy ca' nay'ayuc-huinjihuïygixy huidibi ca' müdity Dios yjihu'ñ ymic'ajt.

⁵ ¿Pin je' je Apolos? ¿Pin je' je Pablo? ñich Pablo etz Apolos nimetz ajcxy nduñ ma Dios ytung, e ñich miich ajcxy nyajmibijccixy Cristo. ñich ajcxy nduñ nidüg nidüg je tung huidibi Dios xymooyich. ⁶ ñich jayijp'aty miich ajcxy ti nyaj'ixpiyich, e Apolos jac'axam. Jadu'n miich ajcxy nipaady nej tüg moc cam huidibi ñich ti nnipy, e Apolos jac'axam ti pidägy nñi. Per Dios ti yajyeegy je moc. ⁷ Ca' ytimyñejity pin ti yñipy, e pin ti pidägy je nñi. Dios yi' tügpaic copicyip. Com yi' yajyeecp je moc. ⁸ Yi' huidibi niip etz yi' huidibi nñi pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com ñich etz Apolos naymigü'ájtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi ñich ti nduñ.

Nañ jadu'n miich ajcxy nipaady nej tüg tijc huidibi Dios ycojpy. ¹⁰ Dios ti xya-jñibicyich yi' ytung ndunipyich. Ti nyaj'ixpiyich miich ajcxy Dios y'ayuc ytiy'ajt. Jadu'n ñich nipaady nej tüg pojtzpi oybi huidibi ti yajtzondägy je tzaadijc poch. Chi huingjäy xyjacyaj'ixpijccixy. Jadu'n yi' nipaady nej huingbi pojtzpi huidibi je tzaadijc poch jacjijppodzäyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixipy. ¹¹ Dios ti pidägy Jesucristo tügpaic huidibi huaad nmibijcin, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹² Co pinjaty yaj'ixpiy Dios y'ayuc ytiy'ajt tiydudägy, chi jadu'n nipaady nej jihuïy pinjaty tijcpojtzp müd ori, müd plata etz müd tzaa oyjaty. Pinjaty ca' yaj'ixpiy yajxon Dios ytiy'ajt, jadu'n nipaady nej jihuïy pinjaty tijcpojtzp müd quipy, müd miy, etz müd moc'aay. ¹³ Jiini co anajty xñi tiempo paady mina Cristo tiyduna'ñ yi' yjäy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jñin pidägy ma je tijc, e je quipy, je miy, etz je moc'aay tigoydähuipy ma je jñin. Etz je ori, plata etz tzaa oyjaty ca' ytigoydähuipy müd je jñin. ¹⁴ Peni oy yajxon pinjaty ti yaj'ixpiy Dios ytiy'ajt, chi Cristo premio möhua'ñ jada jäy co ooy yajxon ti yaj'ixpiy. E jadu'n yi' ytung nipaadip nej je ori, plata, etz tzaa'oyjaty huidibi ca' ytigooy ma je jñin. ¹⁵ Pen je Dios ytumbi ca' oy yajxon ti yaj'ixpiy Dios y'ayuc ytiy'ajt, chi ca' premio pada'ñ. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jñin. Jadu'n nipaadip müd jada jäy nej jihuïy ti ñaxy jñinjoty, e ti ytigoydäy ma je jñin tijaty ymüd, je'yi yjugy'ajtin ti yajtzögy.

¹⁶ ¿Nej ca' mnejhuïygixy? Pen Dios yjihu'ñ ymic'ajt yajpat ma miich ajcxy, jadu'n nipaady nej jihuïy Dios ci'm ti chinaydacpicy ma miich ajcxy, nej jihuïy miich ajcxy Dios xytijc'adyi. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'ñ jada jäy. Yi Dios chinaydac huädz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'ñnigix ci'm. Pen nidügti miich ajcxy mnaydijy co oy ixpiyity ma naaxhuiñjäy y'ixpijin, copicy jäydigoyipy yi' y'ixpijin, jigix ixpigipy Dios ytiy'ajt. ¹⁹ Yi

naaxhuiñyäj y'ixpijcin jadu'n nipaady mïd Dios nej tzuu huinma'ñ loci huinma'ñ. Paady jadu'n yjaybetyity ma Dios ñecy ma jadu'n ymïna'ñ: “Dios yajpocycähuip yi xpicityijc mïd yci'm'ayuc mïd co chachnaygömayii.” ²⁰ E jadu'n yjaybetyity jadüg'it ma Dios ñecy ma jadu'n ymïna'ñ: “Je Huindzin Dios ñejhuiyb co yi xpicityijc y'ayuc yhuinma'ñ ca' choobaady.” ²¹ Ni pin ca' huaad amij agix ñayjihuiyïi, mïd co mijnicxpety oyñipin y'ayuc. Miich ajcxy mïd'ajttaayb tüg'óciy tijaty. ²² Miich ajcxy mïd'ajtpy Pablo, Apolos etz Pedro. Nañ jadu'n miich ajcxy mïd'ajtpy je naaxhuiñybi, je tzejp, je jugy'ajtin, je o'cin, je xii je tiempo huidibi ji yajpatp, etz huidibi mim cidaacp. ²³ Je Cristo mïd'ajtpy miich je' ajcxy cï'am etz Dios ymïd'ajtpy Cristo cï'am.

4

Je apóstoles ajcxy ytung

¹ Jëbi jadu'n co ñich etz Apolos, ñich miich ajcxy xytijcixy Cristo ytumbi huidibi Dios ti xyajniñijccixyich, nyaj'ixpijccixyich etz nguend'ajtcixyich yi' y'ayuc ytiy'ajt huidibi jecy'ajty ca' pin nejhuiy huinjihuiy. ² Pinjaty cuend'ajtp huingjây yje', copicy tiydudägy ytunipy, jaydëbi yi' yhuindzin yjäygidägiyb yi' ytung. ³ Per ca' ooy nduñich cuendi co miich ajcxy xyajciyöy xyajtecyöyïi ñich nbocy. Nañ jadu'n ca' ooy nduñich cuendi co ixyipy tüg juez yajciyöy yajtecyöyïi ñich nbocy. Nañ jadu'n ca' nyajciyöyich nyajtecyöyich ngi'mbocyich. ⁴ Ca' nayjihuiyijich co nmidundigooyich miich ajcxy. Ca' jadu'n nmïna'ñich co ca' ma ndundigooyich. Hue' ajt nHuindzin Jesucristo yi' je' xyajciyöyip xyajtecyöyip ñich nbocy, ca' jac pinjaty. ⁵ Paady ycixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuijxcix co Jesucristo yajniguëxigaani je jây ajcxy ypocy huidibi cham ca' ñiguëxigy, huidibi jadu'n nipaady nej jihuïy yüch y'ity agootztuuby. Jesucristo co anajty ymiñ jadüg'oc, chi yajniguëxigipy nej jây ajcxy yjot yhuinma'ñ mïdity. E Dios nidüg nidüg jây cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, ci'm ti naybidägyiijich mïd Apolos jadu'n nej tüg ijppejt ma jada tiy'ajt huidibi cham ti nyajnijayiyigixp. Jadu'n ti nduñich mïd miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mïactungixy huidibi Dios ycapxcödujc ma ñecy. Nañ jadu'n ñich ti nduñich mïd Apolos nej tüg ijppejt, jigix miich ajcxy ca' mnaygömayiib ci'm, e ca' mmïnaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuïy ajcxy ooy mgömayity? Ca' ni pin. ¿Ti miich ajcxy mïdity, huidibi Dios ca' ti xymooygixy? Ca' ni ti. E pen Dios ti xymooygixy tijaty ajcxy mïdity, ¿na'amy co mnaygömáygixy ci'm, jadu'n nej jihuïy ci'm ti mganar'ajtcixy tijaty ajcxy mïdity?

⁸ Jadu'n miich ajcxy mnaybidáacigixy nej jihuïy ti mgüxigixy, nej jihuïy ti mgomeeñygojcixy, nej jihuïy mrey'ajtcixy, e ca' mdzojccixy co nyaj'ixpijipyich. ⁹ Miich xytijcixyich nej jihuïy ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'ögiiyb, co ángeles ajcxy etz jây ajcxy xyñixíccixyich xyñiyáaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jây tzuu locip co ndúngixyich mïd Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy mïdityich, e miich ajcxy mnaybidaacip nej jihuïy ooy ti mmicpijccixy, nej jihuïy ooy mgömayity, e ñich ajcxy ca' nyaj'ixaangixyich. ¹¹ Chambaad ñich ajcxy nyuubögyiijich etz ndidziyijich. Minaajity n'ijtcixyich ca' ñich ajcxy nhuit. Jây ajcxy xyñi'oñiygixich etz xyhuingojxy xyijpcójxcixich, ni ndijc ñich ajcxy ycaca'tcixy. ¹² Ndúngixyich xuuyii mïd ngi'm ngijich. Co pinjaty xyñi'oñiygixyich, chi n'adzógixyich mïd oy ayuc. Co ñich ajcxy xy'ixhuidityich xypahuidityich, ooy nmecxtújccixyich yi' tzaachypi. ¹³ Co pinjaty jibic xyñigápccixyich, chi huinma'ñ ixtáaygixyich oy'amy mïd mecxtujcin n'ñhuijccixyich

ngapxhuíjcixyich nej jëbi y'ayuc-huinjihuüygixy. Ca' naaxhuiñjyäj ajcxy xychójjccixyich. Ixti chambaad jadu'n ajcxy xy'íjxcixyich nej püx, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayíy jada ayuc co nyajtzöydunaangixy. Hue' janchtiy jada ayuc nyajnijayíyb ajcxy co ngapxhuíjáangixy. Jadu'n ndzojccixy njihuüygixy nej ndzocyich njihuüyich ngi'm'ung. ¹⁵ Oy ixyipy yjanchity co miich ajcxy mïd majc mil huindzindijc huidibi xyaj'ixpijccixy Cristo ytiy'ajt. Per tügpaicpi je mhuindzin huidibi oga'n xyajmibijcy ajcxy Cristo, ca' nan canaag. ñich jadu'n oga'n ti nyaj'ixpiyich miich ajcxy Jesucristo ytiy'ajt nej jëbi ajcxy m'alma ñïdzögipy. Paady ycixpi jadu'n ñich nipaady nej miich ajcxy mdeedy ma mmibijcin. ¹⁶ ñich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej ñich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuüyich. Ti ñich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäymedzip miich ajcxy je ayuc je tiy'ajt jadu'n nej nyaj'ixpiyich ma tüg'óciy cajn ma yi jäy ñaymújcigixy huidibi mijpidaaccixp Jesucristo. ¹⁸ Cham nije' nije' miich ajcxy amij agix mnayjihuüyii co jadu'n mïnaangixy co ca' nïcxy n'ixa'ñich miich ajcxy jadüg'oc. ¹⁹ Per ca' jadu'n mïnaangixy co ca' nñicxa'ñich ma miich ajcxy. Tzojc nïcxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amïdoo'ida'ñich yi' ajcxy y'ayuc huidibi amij agix nayjihuüyip. Hue' janchtiy nejhuíhua'ñich pen ymïd yi' ajcxy Dios ymic'ajt chög'ajt. ²⁰ Pinjaty mïd Dios ymic'ajt Dios chög'ajt, je' yajniguëxïcp Dios y'ane'min. Pinjaty mïd oyñiti ayuc, ca' je' yajniguëxïgip Dios y'ane'min. ²¹ Co nñicxibich jim ma miich ajcxy, ¿ti ajcxy mdzojccixyp ndunipyich? ¿Nej oy nminicxibich ma miich ajcxy tüg matz jigix ajcxy nhuójcixipy? o ¿Mdzojccixyp co nñicxibyich ma miich ajcxy mïd yungnaxy njot nhuinma'ñich, etz oy'amy ajcxy nmigapxipy, jadu'n nej jihuüy ooy ndzojccixy njihuüygixy?

5

Moy ajcxy castigo tüg jäy huidibi anajty ti ytundigooy

¹ Mayjäy nejhuüy co ma miich ajcxy jim tüg yëydijc huidibi tundigooyb mïd tüg töxyjäy. Nigi yi' ytundigooy ca'ydi huidi ajcxy ca' Dios y'ayuc mijpidaci. Ti nnejhuüyich co jim tüg yëydijc huidibi mïddzinaayb ycoo'uu. ² Jim miich ajcxy mïdity je mijpocytumbi, e miich ajcxy amij agixy mnayjihuüygixy co ajcxy mdzach'ixpiyity ma Dios ytiy'ajt. Jac'oy co ixyipy mdajcixy mmaygixy. Yajpidzimigix ma miich ajcxy yi jäy huidibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuüy ñich njimity, mïd co ooy njihuüyich nej miich ajcxy mjaajtcixy m'ayoogixy. Paady ycixpi ti nyajpocycäyich mïd Jesucristo y'ane'min yi jäy huidibi jim ooy mij ytundigooy, tim jadu'n nej ixyipy jim nyajpaadyich ma miich ajcxy. ⁴ Huomujctaaygix yi mibijcpidijc, e jadu'n nipaadipy nej jihuüy ñich njimity quipxyi mïd miich ajcxy. Huin'it miich ajcxy mïd'ajtcixipy ajcxy ajt nHuindzin Jesucristo y'ane'min ymic'ajt. ⁵ Mïd je ane'min mic'ajt huidibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuüy myajcidigüygixy je mujcu', jaydëbi yi' ñinïcx ytigoyipy, per je' y'alma ñïdzögip mïna anajty ñich ajt nHuindzin Jesús yhuimbity ya naaxhuiñ jaydëbi tiydunipy jäy ajcxy mïd ypocy ycixpi.

⁶ Ca' mnaygömaayigixy ci'm mïd huidibi mdungixyp. ¿Nej ca' mnejhuüygixy nej jäy mïna'ñ co levadura huidibi ca' y'oyity yajhuindigooyb tüg'óciy yi harina jich? ⁷ Jadu'n je pocytunï nipaady nej levadura huidibi ca' y'oyity, paady ycixpi yajtigooygix je pocytunï nej anajty mdundigóoygixy taabi anajty ajcxy ca'ni mmibijccixy. Jadu'n mdungixipy, jigix

jëbi m'ijtcixyp huädz ca' ma pocy. Co jadu'n mdúngixipy, jadu'n nipaadip miich ajcxy nej tzaajcaagy oyjatypi. Nejhuüybich co miich ajcxy ti mbocyññhuaatzcixy, com Cristo nayyejci huen yaj'ögyii müd ajt nbocy ycixpi. Jesucristo jadu'n nipaady nej ajt ngöbixy mang huidibi müd nhuindzigüim Dios müd ajt nbocy ycixpi. ⁸ Tzoc tzinaayim müd huädz njot huädz nhuinma'ñ, jadu'n nipaady nej judíoäy co ajcxy amay'ajtcixy yi pascua xii. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayiygixy jayhuin co ca' huaad migüg'ajtigixy pinjaty huidibi tundigooyb müd töxyjäy ajcxy. ¹⁰ Ca' nan jadu'n nmäna'ñich co tücci'yi mbuhuäctútcixipy yi naaxhuiñjäy ajcxy huidibi ca' ymibijccixy, huidibi tundigooygixp müd töxyjäydijc, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadajtcixp. Co ixypy tücci'yi mbuhuäctútcixipy yi naaxhuiñjäy ajcxy, copicy co ixypy miich ajcxy mbidzimgix ya naaxhuiñ. ¹¹ Jayhuin ti nijayiygixy co ca' huaad mnaymigüg'ajtigixy müd yi jäy ajcxy huidibi naydijcigixp co ymibijccixy, je huidibi tundigooygixp müd töxyjäydijc, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy müd yi' ajcxy. ¹²⁻¹³ Com ca' yhuaadity co iich nyajcüyöipy nyajtecyyöipy yi jäy ajcxy ypocy huidibi ca' mijpidaaccixy Jesucristo. Dios ci'm yajcüyöyam yajtecyyöyam yi' ajcxy ypocy. Hue' janchtiy copicy co miich ajcxy myajcüyöip myajtecyyöip yi mibijcpidijc ajcxy ypocy. Yajpidzimgixp yi pocytumbi ma miich ajcxy.

6

Tzip capxy ma je juez ajcxy huidibi ca' ymibijccixy

¹ Pen xymidundigooyb tüg mibijcpi, ¿nej oy mnayjihuiyüi co nicxy mxüy yi mmigüg ma yi tungmüdpí huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyihuiipy je ayuc nej anajty ti xymidundigoy? ² ¿Nej ca' mnejhuüygixy co yi jäy ajcxy huidibi Dios ti ypocyhuinméecxigixy, yi' ajcxy yajcüyöamyb yajtecyyöamyb yi naaxhuiñjäy ajcxy ypocy huidibi ca' mijpidaaccixy Dios? Pen miich ajcxy myajcüyöip myajtecyyöip yi naaxhuiñjäy ajcxy ymijpocy, ¿nej co ca' mjaajtcixy nej ajcxy myajcüyöipy myajtecyyöipy yi mibijcpidijc ajcxy ypocy huidibi ca' ytimymij ytimycajeejity? ³ ¿Nej ca' mnejhuüygixy co miich ajcxy myajcüyöamyb myajtecyyöamyb ixti yi ángeles ajcxy ypocy? Pen miich ajcxy myajcüyöamyb myajtecyyöamyb yi ángeles ajcxy ypocy, nigi ca' chipity co ajcxy myajcüyöipy myajtecyyöipy yi mibijcpidijc ajcxy ypocy huidibi tzinaayb jugy'ajtp ma jadachambi xii tiempo. ⁴ Pen miich ajcxy mnaymidundigóoyigixp, ¿nej co nicxy mbidaaccixy yi mxihuín ma yi jäy ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydëbi mdzöydu'njihuiygixy müd jada ycixpi. ¿Nej ca' yajpaady ma miich ajcxy ni tüg yëydijc huijy ycuipi huidibi jëbi yaj'oyiy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyity co yi mibijcpidijc ajcxy ñayxihuigixipy ma je tungmüdpí huidibi ca' mijpidaaccixy Dios?

⁷ Co miich ajcxy mnayxihuigixy ma cajp tungmüdpí, je' je tiy'ajt co ca' ajcxy mguydúngixy Cristo y'ayuc ytiy'ajt. ¿Nej cay jac'oy co mnaymímecxtújcigixipy, ca'ydi co mnayxihuigixy? ¿Nej cay jac'oy co xytigóoyigixipy tijaty, ca'ydi co mnayxihuigixy? ⁸ Ma yjapadyii ixypy mnaymímecxtújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzigixy ti ajcxy ymüid.

⁹ ¿Nej ca' mnejhuüygixy co yi jäy ajcxy huidibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'ñgixy, ca' ajcxy it lugar pada'ñ ma Dios y'ane'my yi jäy ajcxy huidibi migapxtigooyb töxyjäydijc, huidibi ajcxy ojadajtp tzaadzech quipychech,

huidibi ajcxy migapxtigooyb ymīgüg ytöxyijc, huidibi ajcxy adöxyñi'aa. ¹⁰ Ca' ajcxy it lugar pada'ñ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmihuidijt capxmihuidijt. Nidüg'óciy yi jäy ajcxy huidibi jadu'n tundigooyb, ca' ajcxy it lugar pada'ñ ma Dios y'ane'my. ¹¹ Jadu'n anajty nijëjity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinma'ñ, etz mnayyéjigixy amumdügjot ma Dios. Co miich ajcxy mmijpidaaccixy je nHuindzin Jesús yxii e xy'adigiiygixy xyjottigiiygixy Dios yjihui'ñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtin huidibi ijtp ma ajt ndzinaayin

¹² Janch tiy'ajt nej jäy ymīnaangixy co jëbi huaad tungixy hueñytijity huidibi ñijot'ajtcixyp. Per ca' tüg'óciy huidibi jäy ajcxy tuñ y'oyjäygidaacnity. Janch jadu'n jëbi pinjaty tunipy hueñytijity, per ca' huaad ymīmadägyi je huidibi ajcxy ytumyb. ¹³ Janch tiy'ajt nej jäy ymīnaangixy co je jicxy picy ytungbaady ma je jäy y'aa ymōx, e je aa mōx ytungbaady mīd je jicxy picy ycixpi. Per Dios yajcōdigoyamyb je jicxy picy, e nañ jadu'n yajcōdigoya'ñ je jäy y'aa ymōx. Per nañ tiy'ajt co Dios ca' ti yaj'oyiy je yëydijc ñinīcx, co midundigooyipy töxyjäydijc. ¹⁴ Dios ti yajjugypicy jadüg'oc iich ajt nHuindzin Jesucristo co y'o'cy. Nañ jadu'n Dios mīd ymic'ajt co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuīy miich ajcxy co yi mninīcx ajcxy Cristo yi' yje'? ¿Nej cay Cristo anajty midundigooybich co nnīcx mīdmäyich yi töxyjäy huidibi jibic-huinma'ñ mīd? ¡Ca' jadu'n y'óyity nimina! ¹⁶ ¿Nej ca' mnejhuīiygixy co tüg yëydijc puhuägy tüg töxyjäy huidibi jibic-huinma'ñ tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ymīna'ñ: "Nimetz y'idaangixy jadu'n nej tügpi ninīcx." ¹⁷ Co tüg jäy mīd y'ity yi Huindzin Jesucristo, huin'it je jäy yjihui'ñ ymic'ajt etz Dios yjihui'ñ ymic'ajt y'ijtcixy tú'ciy.

¹⁸ Ixmajtcix je jibic-huinma'ñydunī, ca' mdundigooygixy mīd töxyjäy ajcxy jibic-huinma'ñydumbi. Yi jacjadyi pocy huīdi jäy ajcxy ytumyb, ca' yi' ajcxy midundigoy ninīcx. Per co ytundigooygixy mīd töxyjäy ajcxy, huin'it janchtiy yci'mninīcx anajty ymidundigooygixyp. ¹⁹ ¿Nej ca' mnejhuīiygixy co je Espíritu Santo huidibi Dios xy-mooyim, ti chinaydacpicy ma miich ajcxy mjot mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzoohui Cristo ti cojuy miich ajcxy mbocy, paady ycixpi ooy ycopicyity co oybi mdūngixip mīd mninīcx, jigix Dios cōmay y'idipy mīd co oy anajty ti mdungixy.

7

Capxhuijin ma je pijcin

¹ Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajniguéjxcixyich. Oy jadu'n co tüg yëydijc ca' ypiipy. ² Per com may yëydijc huidibi ooy ytundigoya'ñ mīd töxyjäydijc, paady ycixp jac'oy co nidüg nidüg yëydijc piipy e mīd'idipy yci'mdöxyijc. E nañ jadu'n jac'oy co nidüg nidüg töxyjäy ypiipy, e mīd idipy yci'm ñäy. ³ Copicy je yëydijc chināhuipy mīd ytöxyijc nej ypadyi, nan tim jadu'n je töxyjäy chināhuipy mīd ñäy nej ypadyi. ⁴ Com je töxyjäy ca' ane'my yci'mninīcx, hue' ñay'ané'migixy miñ xyipy. Nañ jadu'n je yëydijc ca' ane'my yci'mninīcx, hue' ñay'ané'migixy ymiñ xyipy. ⁵ Ca' huaad je yëydijc nimay je töxyjäy co ca' mīd mähua'ñ mīd pocxa'ñ. Nañ jadu'n je töxyjäy ca' huaad nimay je ñäy co ca' mīd mähua'ñ mīd pocxa'ñ. Jëbi janchtiy minajity ñay'ayuc-huinjihuīiygixy co amay'adaangixy co Dios mibijctzohuaangixy ycapxtägaangixy. Co Dios mibijctzoohuin myajmāygixipy, huin'it jëbi máagixni pócxixni agujc jotcuje, ca'ydi je mujcu' mīmadägyi ajcxy.

⁶ Jada je' tiy'ajt nej jëbi yëdyjc müddzinäy ytöxyjc, hue' jada capxhuijn, ca' jada y'ane'minity. ⁷ Jadu'n njadzocyich co miich ajcxy ixyipy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canaagnax jäy yhuinma'ñ, e nidüg nidüg müd yci'mhuinma'ñ nej ytunaangixy, pen pigaangixp o ca' ypigaangixy.

⁸ Jada ayuc nyajnamaaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co ypigaangixy, jac'oy co ypijicixipy. Com jac'oy co ypijicixipy ca'ydi co cuydúngixipy ninicx chojcin.

¹⁰ Jada ayuc nyajnamaaybich huidibi ajcxy ti ypijicixy. Ca' y'oyity co töxyjäy tüg ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tüg töxyjäy ixmach ñäy, copicy co huen tzinäy adüg, e ca' huaad ypiy müd huingbi yëdyjc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tüg yëdyjc ixmadzip ytöxyjc.

¹² Ich jada ngi'm'ayuc jada huidibi nyajnamaaybich je jacjadyii mibijcpidijc. Yi Huindzin Jesús ca' ti ane'min yecy müd jadayaabi ycixpi. Pen tüg yëdyjc mibijcp tzinäy müd tüg töxyjäy huidibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcuyc jacmüddzinähua'ñ je yëdyjc. ¹³ Nañ tim jadu'n co tüg töxyjäy huidibi mibijcp tzinäy müd tüg yëdyjc huidibi ca' mijpidägy Cristo, jac'oy co ca' ñay'ixmájtzigixipy pen je yëdyjc jotcuyc jacmüddzinähua'ñ je töxyjäy. ¹⁴ Je töxyjäy ñäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch müd co ytöxyjc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch müd co ñäy ti mijpidägy Cristo. Pen ca' ixyipy yjadu'nity, yi' ajcxy y'ung y'anäg, hue' ixyipy nipaady nej jäy ajcxy y'ung huidibi ca' mibicy. Per com ti je yëdyjc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëdyjc huidibi ca' mibicy Cristo ca' müddzinähua'ñ ni jadu'ñyi yi' ytöxyjc huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' müddzinähua'ñ ni jadu'ñyi yi' ñäy huidibi ti mibicy Cristo, huin'it jëbi ñay'ixmájtzigixy. Com Dios jadu'n tzocy co jotcuyc ñaymüddzinäyigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñäy yajmibigipy Cristo. Nañ jadu'n je yëdyjc ca' tiydudägy ñejhuüy pen jëbi ytöxyjc yajmibigipy Cristo.

¹⁷ Oy ixyipy ñejity jada tiy'ajt cuydúngixy. Copicy co nidüg nidüg miich ajcxy mdzinähuiipy mjugy'adipy jadu'n nej Dios ti xyajni'ixiygixy mdzinaayin mjugy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidijc ma tüg tüg cajp. ¹⁸ Yi jäy huidibi ti yajtiy'ajtti y jayijp, e Dios yhuin'ixyii jac'axam, huen jadu'nity, ca' huaad yajtigoy je iixpejt nej ti yajtiy'ajtti. E yi jäy huidibi ca'ni yajtiy'ajtti e ti yhuin'ixyii Dios, huen jadu'n y'ity, ca' ycopicyity yajtiy'ajttihiipy. ¹⁹ Ca' ytimyñejity pen miich ajcxy ti myajtiy'ajtti, o pen ca'ni myajtiy'ajtti y gixy. Huidibi copicyip, mguyduunip ajcxy Dios y'ane'min ycötujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ijxyi. ²¹ Pen miich anajty codoogiy tumb ma tüg jäy co Dios ti xyhuin'ixy, ca' mdajy may müd yi' ycixpi, hui'm müd mhuindzin. E pen mhuindzin a'ixiyb co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädzictüdyii ma yi pocy y'ane'myii. Pinjaty tungixp yci'mdung, co mibicy ich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzoohui ooy Jesucristo xycojuuyi miich ajcxy mbocy, paady ycixpi cuydúngix ajt nHuindzin Jesucristo y'ayuc ytiy'ajt. E ca' mguydúngixy naax-huiñjäy ajcxy y'ayuc ytiy'ajt huidibi ajcxy xypidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ijxi ajcxy.

²⁵ Jada ayuc nyajñimaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich müd miich ajcxy ycixpi. Hue' ajcxy nyajñimaayb ahuing je huinma'ñ huidibi nmüddich. Com Dios ti xypa'ayooyich, paady ycixpi jëbi mgöbigipy ajcxy ich n'ayuc ich ngapxhuijin. ²⁶ Jadu'n huinma'ñ nmüddiyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypí ayo'n nmñajxim nyajñajxim jadachambi xii tiempo, paady ycixpi ngapxhuijyich jadun. ²⁷ Pen mbijcyp tüg töxyjäy, müddzina'. Pen ca' ti picy tüg töxyjäy, jac'oy co ca' mbigipy. ²⁸ Pen ti mhuinma'ñ mbidägy co mbiga'ñ, jëbi mbicy, ca' anajty mdundigoy co mbigipy. Nañ jadun tüg töxyjay mutz'anägnip ca' anajty ytundigoy co ypigipy. Janch tiy'ajt jada co yi' ajcxy huidibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbijccixipy, e ca'ydi ti jotmay mbáatcixipy.

²⁹ Migügtijc ajcxy, jada njacyajñimaaygixpy. Hueeni xii tiempo njactzinähuaanim ya naaxhuiñ. Jadu'n nej je xii je tiempo yjacñicxni miich ajcxy pinjaty ti ypicy, tzinaaygix jadun nej ixipy ca' mdöxijc ajcxy müdity. ³⁰ Miich ajcxy huidibi yaaxp etz ayo'n jihuüyb, tzinaaygix jadun nej ixipy ca' ti ayo'n müdity. Miich ajcxy huidibi xondacp, tzinaaygix jadun nej ixipy ca' mxondaaccixy. Miich ajcxy huidibi ajuuyb adoocp tzinaaygix jadun nej ixipy ca' ti ajcxy müdity. ³¹ Miich ajcxy huidibi mic'ajt comeen'ajtp, tzinaaygix jadun nej ixipy ajcxy ca' ti mgomeen'ity.

³² Hue' ndzocyich co ca' ti jotmay miich ajcxy mmüdd'adipy ma yi mdzinaayin mjygy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'ñ ajcxy je Huindzin Dios. ³³ Je tübi ajcxy ypijccixy, chi ymijottigooyb ajcxy yi' ytung ya naaxhuiñ, jadun nej jëbi yajjotcuje'ajtcixy ytöxyijc. ³⁴ Nañ tim jadun tigachjaty yhuinma'ñ müdity je töxy'anäg huidibi ti ypicy. Je töxy'anäg adügpi ymijottigooyb Dios ytung, etz yecy ñinícx etz yjihuüñ ymic'ajt cixyot huinijot ma ajt nHuindzin Jesucristo. Per je töxy'anäg huidibi ti ypicy, hue' je' ymijottigooyb ti ga ti ya naaxhuiñ, jadun nej huaad jäygidägyii ñäy.

³⁵ Jada jadun ti nyajñimaaygixy müd miich ajcxy m'oy'ajtin ycixpi. Ca' nan tzipjaty ane'min ti nmooygixy. Jadun ti ngapxhuijcixy jaydëbi jotcuje mdzinaaygixy mjygy'ajtcixy, etz jaydëbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay müdity müd ñix ycixpi, müd co yxi yjimijt ti yujc-huäcni, jada je' ooy ytimycapxpaadyty, jëbi tuñ huidibi y'a'ixüyb jac'oyip, jëbi ypicy, ca' yi' ypocyty. ³⁷ Pen ji pinjaty ñix yhuima'ñ jaybicy, e ca' pin ycohuanüyii, nañ ni pin yca'adugyii co tuñ nej tzocyin, e ñijot'ajtyp tudägy'ajt janch cixyot huinijot co yñix yhuima'ñ jaybicy, oybi anajty ytumyb. ³⁸ Je jäy huidibi yñix yajpijcp, oybi anajty ytumyb, e pinjäy yñix cayajpijcp, ñigi anajty oybi tuñ ca'ydi co ypigipy.

³⁹ Copicy co je töxyjäy müddzinähuiipy yi' ñäy mabaad yñäy yjugy'aty. Co janch anajty yñäy y'ögy, huin'it jëbi ypigipy müd huingbi, pen jadun anajty najtztzogü. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy ñigi je töxyjäy co'ögypí agujc jotcuje chinähuiipy yjugy'adipy pen ca' ypijctigach, jadun nmüddiyich nhuinma'ñ, e nmñambich co naybaatip ich nhuinma'ñ müd je tiy'ajt huidibi je Espíritu Santo yejcp.

8

Je tzüch huidibi ajcxy yajhuindzigüyb quipychech

¹ Jadüg nax, jada ayuc ajcxy nyajñijayüyb ma yi tzüch ymiñ huidibi jäy ajcxy yajhuindzigüyb tzaadzech quipychech. Janch tiy'ajt co nidüg'óciy ich ajt nmüdd'ajtim ixpijcin. Per pen ooy mij nayjihuüyim ajt n'ixpicyty, chi amij agix nayjihuüyim. Per pen naychojcim nayjihuüyim nidüg nidüg, huin'it nyajyeecim nmibijcin. ² Pen ji nidüg ma

miich ajcxy ñaydiyii co y'ixpicity, ca'ni yi' jajtäy ixpijcin huidibi jaccopicy yjadipy. ³ Co tüg jäy yajmij'aty Dios, Dios ñejhuüyb nej jada jäy yjot yhuinma'ñ muidity.

⁴ Jadu'n jada je tiy'ajt maabi je tzüch huidibi jäy ajcxy ti yajhuindzigüygixy tzaadzech quipychech ajcxy. Nejhuüyim co yi' tzaadzech yi' quipychech ca' ti jugy'ajtin muidity. Ji tügpajc Dios huidibi tzinaayb jugy'ajtp. ⁵ Janch tiy'ajt co yi' naaxhuiñyäjy ajcxy Dios'ajtigixy canaagnax huidibi yajpatp tzejpcix etz ya naaxhuiñ huidibi ca' Diosity. Etz nañ tiy'ajt co may yhuindzin'ajtcixy huidibi ca' yhuindzinity. ⁶ Per ich ajt n'ojadajtim tügpajcpi Dios, je Dios Teedy. Je Dios Teedy co macx tüg'óciy huidibi ji'ajtp. Muid yi' ycixpi ich ajt ndzinaayim njugy'ajtim. Nañ tim jadun' nmuid'ajtim tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huidibi ji'ajtp, e nañ yi' ajt xyhuijtz'ijtim.

⁷ Janch tiy'ajt co yi' tzaadzech quipychech ca' ti mic'ajt muidity, per nije'jity mibijcpidijc ca' huinjihuüy jada tiy'ajt. Nijejity ajcxy jecy'ajty ooy huindzigüygixy tzaadzech, ixti chambaadni tijcixy co yi' tzüch huidibi jäy muid huindzigüy tzaadzech, tzaadzech yi' yje'. Co ajcxy tzüdzixy yi' jadum'bi tzüch, jibic nayjihuiyigixy, nayjihuiyigixy nejjihuiy ti ytundigooygixy. Ca' tiydudägy y'ijtcixy ma ymibijcin. ⁸ Ca' Dios xycöbigaanim muid je' ycixpi co ti njicxim ti ndzüdzm tijaty tzüch, o muid co ca' ti njicxim ca' ti ndzüdzm tijaty tzüch. Nañ tim jadun' Dios ca' oybi xymöhuaanim muid je' ycixpi co ti njicxim ti ndzüdzm ti tzüch, o muid co ca' ti njicxim ca' ti ndzüdzm tijaty tzüch. ⁹ Oy Dios a'ixiy co jëbi ndzüdzm huenhuidibi tzüchity. Per muid je migügtijc ycixpi huidibi ca' tiydudägy muidity ymibijcin, tzoc naygüend'ajtim ca'ydi je' jibic yñayjihuiyii muid huidibi ich ajt ndunim. ¹⁰⁻¹¹ Tzoc ocpidaacim co miich ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jilby tigoty me je tzaadzech y'ity. Ca' jecyity co jada jäy huidibi ca' tiydudägy muidity ymibijcin, etz co xy'ixpaadipy jilby, huin'it je' cöbiga'ñ je tzüch huidibi huindzigi'ñ'ajtp. E jadun' yhuimbizimy co miich jibic ixpejt ti myecy muid yi' m'ixpijcin ycixpi, com yi' mmigüg ti ytundigoy muid huidibi miich ti mduñ. E Cristo ti y'ögy muid yi' ypocy ycixpi nañ jadun'. ¹² Co tüg mibijcpi jibic nayjihuiyii muid co ti xy'ixy ma je caydac mdzüch je tzüch huidibi jäy ajcxy yajhuindzigüyb tzaadzech, miich anajty tundigooyb muid Cristo ytiy'ajt, muid co yi' mibijcpi jibic ñayjihuiyii. ¹³ Paady ycixp ca' ndzüdza'ñich ni mina tzüch huidibi tzaadzech yhuindzigi'ñ'ajtp. Pen jadun' nduñich, jibic ixpejt anajty nyejcpyich ma nijejity migügtijc, e chi yi' ajcxy yhuinma'ñytigoya'ñ.

9

Je tung huidibi Pablo paatip

¹ Janch janch co jëbi nduñich huentijity huidibi ndzojcpich. Nañ jadun' janch co Jesucristo ti xyajñibicyich jada apóstol tung. Etz janch co ti n'ixyich ajt nHuindzin Jesucristo. Nañ jadun' janch co miich ajcxy ixpejt'ajtp ma ich ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcxyich ma miich ajcxy. ² Ca' jecyity co jacjadyii jäy ajcxy ca' xycöbiga'ñich jadun' nej Jesús xy'apóstol'adyiijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyajñibicyich jada tung, paady ycixpi copicy co ich miich ajcxy xycöbigipyich jadun' nej Jesús y'apóstol.

³ Jadun' n'adzohuimbityich yi' ajcxy huidibi jibic xyñigapxip ich ndung. ⁴ Com Jesucristo xyajñibijcich jada tung co ngapxhuäcxyich yi' y'ayuc ytiy'ajt, paady ycixpi xypatpich jadun' co je mibijcpidijc xymöhuibich ngaayin n'uucin. ⁵ Nañ jadun' xypaatpich co nmuid'adipyich tüg ndöxyijcich huidibi mibijcp, etz huidibi nmuidhuididipyich tim jadun' nej yi' jacjadyii apóstol ajcxy muidity, etz je Huindzin Jesús y'uch ajcxy muidity, etz Pedro. ⁶ ¿Nej miich ajcxy mminaangixy co ich etz Bernabé nimejtzpajc ca' ich ajcxy huaad ixmajtzicixy yi' ndungich co ngapxhuäcxyich Cristo y'ayuc ytiy'ajt? ⁷ ¿Huidibi soldado yi' ma je ejercito ci'm ygasto cojuy? ¿Pin ji cam nidungüyb, e ca' jicixpy je huidibi

ti yaj'ity? Pin ychibo cuend'ajtp, ¿e ca' ügipy je chibo yleche? ⁸ Ca' miich ajcxy mîna'nîpy co jây y'ayuc jada. Nañ jadu'n jaybety y'ity ma Dios ñecy tim jadu'n nej nmîna'ñich. ⁹ Com jaybety jadu'n ymîñ ma Moisés ñecy, ma Moisés jadu'n ymîna'ñ: "Ca' huaad huajyuub y'ajen mbîdaaci ma yam ten moody yî trigo co yajpajc'aty." ¿Nej jêyi mîd huajyuub ycîxpî Dios jadu'n ymîna'ñ? ¹⁰ Canan jêyi mîd huajyuub ycîxpî Dios jadu'n ymîna'ñ. Nañ jadu'n Moisés jaybejty jada tîy'ajt mîd ñich ajt ycîxpî. Com yî jây ajcxy huidîbî naaxjîdzîjtzp, etz yî' ajcxy huidîbî trigo yajpajc'ajtp, hue' ajcxy yjîjp'îjxyp co padaangîxy je moc tîm huidîbî ajcxy ti nidungîy. ¹¹ Nañ jadu'n ñich ajcxy huidîbî Jesús ytung tuunîp, ti ngapxhuäcxyich Dios y'ayuc ma miich ajcxy, e miich ajcxy oybî ti mbaatcîxy ma Dios. ¿Nej ca' jadu'n y'oyity co nbaadyich meen etz jîcxy pîcy mîd ndungîch ycîxpî? ¹² Pen jacjadyî Dios y'ayuccapxhuäcxyî ti paatcîxy meen etz jîcxy pîcy ma miich ajcxy mîd ytung ycîxpî, ¿nej ca' jêbî nîgi ñich nbaadyich meen etz jîcxy pîcy mîdîch ndung ycîxpî? Oy njamîdîdyich je mîc'ajt nej nja'ane'mgîxy co xymôhuîbyich ajcxy meen etz jîcxy pîcy mîd ñich ndung ycîxpî, per ca' jadu'n ti n'ane'mgîxy. Jadu'n ñich tzaachypî nyajnajxîch jîm ma miich ajcxy, jaydêbî jây ajcxy cöbijccîxy Cristo agujc jotcuje ca' ti adzîjpin. ¹³ Mnejhuîyb miich ajcxy co yî' huidîbî ajcxy tumb ma Dios ytîjc, paatcîxy ninîgoobî caayîn uucîn. Nañ jadu'n yî' pin ajcxy huidîbî îyujc yajhuîndzîgîyb Dios, paatîp ajcxy je huîndzîgî'ñ tzüch. ¹⁴ Nañ jadu'n je Huîndzîn Jesucristo ane'my co huen yajcaaygîxy yaj'uuccîxy etz mooygîxy yhuît ytucx yî' ajcxy huidîbî capxhuäcxcîxp yî' y'ayuc ytîy'ajt. ¹⁵ Ñich ca' ti nyajtuñîch jada mîc'ajt jada ane'mîn huîdî nmîdîch. Nañ jadu'n ca' jada ayuc nyajnijayîygîxy, mîd co ndzocy co padañîch tijaty ma miich ajcxy. Jacjotcuje co n'ögîbîch mîd yuu, ca'ydi co n'ané'mîbîch caayîn uucîn ma miich ajcxy, e jadu'n tzöydu'n nbáadîbyîch jadu'n nej cham naygömayîjîch, mîd co cî'm nnayyajcayîjîch mîd ndungîch.

¹⁶ Com ca' huaad naygömayîjîch co ngapxhuäcxyîch Cristo y'ayuc. Mîd co Cristo xyyajñîbjîcîch jada tung, paady ycîxpî copîcy ngapxhuäcxyîch Cristo y'ayuc. Ayo'n nbadaamybîch, pen ca' ngapxhuäcxyîch Cristo y'ayuc. ¹⁷ Pen ngî'mdzócinîch ycîxpî ngapxhuäcxyîch Cristo y'ayuc, njîjp'îjxypîch îxyipy co jây ajcxy xymîjuyîpyîch. Per ca' yjadu'nîty. Hue' janchtîy je Huîndzîn Jesucristo xyajñîbjîcîch jada tung, e paady nduñîch yî' ytung. ¹⁸ ¿Ti muju'ñ nbáadîbîch mîd ndungîch ycîxpî? Nbáadîbîch jotcuje'ajtîn co ngapxhuäcxyîch Cristo y'ayuc jadu'ñyî, ca' ymeenîygîxyity. Ca' nyajtuñîch je ane'mîn huidîbî Cristo xymóyîch mîd caayîn uucîn ycîxpî.

¹⁹ Ca' jî ni pin jây mîc'ajt mîdîty jaydêbî xy'ane'myîjîch. Oy îxyipy ytimyñejity ti nnaybîdägyîjîch mîd ñich njot nhuinma'ñ jadu'n nej jîhuîy tûg'ócîy jây ajcxy xy'ane'myîch. Jadu'n nduñîch jaydêbî jac mayjây ajcxy nyajmîbigîpyîch Cristo. ²⁰ Co ngapxhuäcxyîch Cristo y'ayuc ma yî judíoîjây, hue' naybîdägyîjîch judíoîjây, jaydêbî nyajmîbîcyîch ajcxy Cristo. Co ngapxhuäcxyîch Cristo ma yî judíoîjây ajcxy huidîbî cuydumyîb yî' ajcxy ycötujcîn etz ycostumbre, nañ jadu'n ñich nguyduñîch yî' ajcxy ycötujcîn, jaydêbî nyajmîbîcyîch ajcxy Cristo. Ooy yjanchîty co ca' yî judío ycötujcîn etz ycostumbre xy'ane'myîch. ²¹ Co ngapxhuäcxyîch Cristo y'ayuc ma yî' ajcxy huidîbî ca' yjudíoîjâyity, chi naybîdägyîjîch jadu'n nej yî' ajcxy. Ca' nan nmînaambîch co ca' nguyduñîch Dios ytîy'ajt. Hue' njatytimycuydumyîbîch Cristo ycötujcîn, jaydêbî nyajmîbîcyîch ajcxy Cristo.

²² Co ngapxhuäcxyîch Cristo y'ayuc ma yî' ajcxy huidîbî ca' tîydudägy ymîbijccîxy, chi naybîdägyîjîch jadu'n nej yî' ajcxy, jaydêbî nyajmîbîcyîch ajcxy Cristo. Ma nidüg'ócîy jây ajcxy ma ngapxhuäcxyîch Cristo y'ayuc, chi nbîdägyîch njot nhuinma'ñ nej yî' ajcxy yjot yhuînma'ñ mîdîty, jaydêbî nijêjity ajcxy nyajmîbîcyîch Cristo y'ayuc ytîy'ajt. ²³ Jadu'n nduñîch tûg'ócîy mîd Cristo y'ayuc ycîxpî, je ayuc nej jêbî jây ajcxy y'alma ñîdzoocîxy. Jadu'n nduñîch, jaydêbî nbaadyîch je jotcuje'ajtîn etz oy'ajtîn huidîbî nbaatîm nidüg'ócîy co nmîjpîdaacîm Cristo.

²⁴ Mnejhuîygîxy co jây ajcxy ñayboyîcquîpxîgîxy co premio padaangîxy, huîn'it nidüg'ócîy ajcxy ñaymîc'îjîgîxy, per tûgpajc huîdî je premio patp. Nañ jadu'n mi-

ich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg premio. ²⁵ Tüg'óciy pinjaty nayñi'ixiiyip co ñay'ixquipxáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huidibi ca' huinixi ajcxy mi'ijtcixy. Pero ich ajcxy Dios y'ayuc capxhuäcxy, yi' ich ajcxy mijottigooygixy nganar'adaangixyich huidibi ca' nimina ycixipy ytigoyipy. ²⁶ E jadu'n ich ndung mijottigooyich, ca' yhuimbädzity agoodzity, jadu'n nejhuüy ngoxich e nipin ca ypegyii. ²⁷ Nnaychaachytumybich ngi'mninicxich, jaydëbi ngi'mninicx ycapxymidooyich. Jadu'n nduñich co ti ngapxhuäcxyich Cristo ma je mayjäy ajcxy, ca' ydi nyajtigoyipyich nbremio huidibi Dios xymöhuambich.

10

Capxhuijin ma yi pin ajcxy jac-huindzigiyb quipychech

¹ Com ndzojcypich co miich ajcxy migügtijc mnejhuüygyixipy co ajt nmij'ap nmijteedy müd yhuidijty Moisés co Dios nidüg'óciy ajcxy cuend'ajttay, huinhuoy jecy'ajty müd tüg joc. E nañ jadu'n Dios yajnihuañ yajtzoocy nidüg'óciy ajcxy ma ymidzip co ajcxy yajnaxxy je tzaptz mejy cujc'amy. ² Co nidüg'óciy ajcxy panixy je joc, e co ñidzoocay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuüy ni'amugi ajcxy yñibejty müd Moisés yxi. ³ Nañ jadu'n nidüg'óciy ajcxy caay jicxy je maná huidibi Dios anajty yecpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je nñ huidibi Dios anajty yecpy, com y'uuc ajcxy je nñ huidibi yajpidzim ma je tzaa. E je tzaa hue' je' anajty Cristo, e paady Cristo ymüd'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'öctay jim migtigüduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti müd ajt nmij'ap nmijteedy jecy'ajty, je' iixpejtíp ma ich ajt, ca'ydi n'adzojcm tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadaajtcixy tzaadzech quipychech jadu'n nej nijëjty ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymina'ñ: "Ixtactay je jäy ajcxy caaybi uucpi, e huin'it ajcxy ypidigy etz ytiigixy iyiybi ejtzpi." ⁸ Nañ jadu'n ca' y'oyity co ndundigooyim müd töxyjäy ajcxy jadu'n nej nijëjty nmij'ap nmijteedy tuñ jecy'ajty, e iipx tugüg mil ajcxy y'o'cy tüg xiibi. ⁹ Nañ ni ca' y'oyity co njot'ijxim nhuinma'ñ'ijxim ich ajt nHuindzin Jesucristo, jadu'n nej ajt nmij'ap nmijteedy ajcxy idiich jecy'ajty, e may ajcxy tza'ñchüdz, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojiiyim Dios, jadu'n nej nijëjty ajcxy idiich jecy'ajty, e müd je' ycixpi Dios y'ángel yaj'o'cy mayjäy ma yi' ajcxy.

¹¹ Tüg'óciy yi jadu'mbi ayo'n yjajti müd ajt nmij'ap nmijteedy, e jaybety yhui'my ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydi ndundigooyim müd Dios, ich ajt pinjaty tzinaayb ma jadachambi xii jadachambi tiempo huidibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmüd'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt müdity ma ymibijcin, huen naygüend'adyii, ca'ydi ytundigoy etz ypocycähuipy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huidibi miich ajcxy mminajxyp myajnajxyp, nañ jadu'n jacjadyii mibijcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuip co mjacminájxcixipy mjacya-jnájxcixipy tzaachypi ayo'n anaxy huidibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jëbi mminaxtagixy myajnaxtagixy yi tzaachypi ayo'n.

¹⁴ Paady miich ajcxy migügtijc, huidibi ooy ndzocy njihuïyich, ixmajtzcixy ca' m'ojadajtcixy tzaadzech quipychech. ¹⁵ Nyajmüdcapxy nyajmüdmıydacpy ajcxy jadaaabi ayuc, com nejhuiybich co miich ajcxy ooy oy huinma'n mmıdity. E jëbi ci'm mhuinmaaygıxy pen tiy'ajt jada ich n'ayuc, o pen ca'. ¹⁶ Ma je "Santa Cena" co nyajnajxım Dioscojuyip ma Dios müd je ügy, e n'uucım. Je' je' ñidiy'ajt'ajtpy co Cristo ti xyajtügmuıjcım ajt njot nhuinma'n co yajcruudzpejtı etz ñi'py yteemy yojcy müd ajt nbocy ycıxpı. Nañ jadu'n ma je "Santa Cena" co ndujchuäcxım, e ngaayım je tzajcaagy, je' je' ñidiy'ajt'ajtpy co Cristo xyajtügmuıjcım ajt njot nhuinma'n müd ñinıcx co ñaygiyejci ma ymıdzip huen yajcruudzpedyii. ¹⁷ Oy ajt ooy njanimaayıty, per nidüg'óciy ich ajt ngaayım je tügpı "Santa Cena" tzajcaagy. Jada tzajcaagy tüg yi', paady ycıxpı tügpıcy jay ich ajt, e jadu'n ich ajt nipaady nej tügpı ninıcx.

¹⁸ Oc-huinmaaygıxy miich ajcxy yi Israel jay ajcxy, co ajcxy tzützcixy je huidibi ajcxy yajhuindzigıyb Dios, chi ajcxy naydücmüjcıgıxy müd Dios ycıxpı ma je Dios ojadajttac. ¹⁹ Ich nmına'ñich co yi tzaadzech ca' ti mic'ajt mıdity, e nañ jadu'n yi tzüch huidibi yajhuindzigıyb tzaadzech ca' jac nıgi oy'ajtin mıdity, ca'ydi jac huidibi tzüch. ²⁰ Jadu'n nmına'ñich, co yi jay ajcxy huidibi ca' mijpidaaccıxy Dios, co ajcxy yejccıxy yhuindzigi'ñ, hue' ajcxy yajhuindzigıyb ca'oybi, e ca' Dios ajcxy yajhuindzigıy. E ca' ndzocyich co miich ajcxy migüpgıgıpy je ca'oybi. ²¹ Co miich ajcxy m'uuccıxy je ügy ma je "Santa Cena", ca' huaad m'uuccıxy je ügy huidibi ca'oybi ajcxy yhuindzigi'ñ'ajtipy. Etz co mgaaygıxy je tzajcaagy ma je "Santa Cena", ca' huaad mgaaygıxy je tzajcaagy huidibi ca'oybi yhuindzigi'ñ'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt müd jada' ich ajt, ca'ydi yi'?

Je tzojcin huidibi tüg mibıjcpı huaad tuñ müd ymigüg

²³ Janch tiy'ajt nej jay ymınaangıxy co jëbi huaad nduñich huentiiıty huidibi nijot'ajtpyich, per ca' tüg'óciy nmigügtıjcıch jaygıdaaccıxy huidi ndumybich. Janch jadu'n jëbi huaad nduñich huentiiıty huidibi nijot'ajtpyich, per huidibi ndumybich ca' tüg'óciy xypubetyich ma ich nmibıjcin. ²⁴ Ca' y'oyıty nnijot'ajtim ngı'm'oy'ajtin. Oy co nbubejtim nbudigiıym nmigügtıjc.

²⁵ Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtiıhuıpy ma je tzüch chooñ, ca'ydi jıbic mnayjiıhuıyigıxy. ²⁶ Com Dios y'ayuc jadu'n ymına'ñ: "Je Huindzin Dios yi' niıhuindzin'ajtp je naaxhuiñybi, etz ñıhuindzin'ajttaayb tüg'óciy huidibi ji yajpatp."

²⁷ Pen jim pinjaty huidibi ca' ymıbıcy, xyajniıhuıhuıy tüg caayın uucın ma yi' ytıjc, e pen ti mhuinma'n mbıdägy co nıcxı mgaya'ñ ma yi' ytıjc, oy co mgaayıpy mdzüdzıp huentiiıty huidibi ajcxy xymooyb. E ca' mnıdııhuıpy myajtiıhuıpy ma je tzüch chooñ, ca'ydi jac pinjaty jıbic ñayjiıhuıyii müd huidibi ti mduñ. ²⁸ Per pen je jay xyñımaayb: "Jada tzüch ti jay yajhuindzigıy tzaadzech." Pues ca' mdzüdzıp je tzüch, jigıx ca' jıbic ñayjiıhuıhuıyb je migüg huidibi ti xyñımäy co je tzüch ti yajhuindzigıy tzaadzech. ²⁹ Hue' nımiıydacypıch je mmıgüg huidibi jıbic nayjiıhuıhuıyb pen miich mdzu'chpyı tzüch huidibi tzaadzech yhuindzigi'ñ'ajtp. Ca' nnımiıydgıych nej miich ci'm mnayjiıhuıyii. Ca' yjcyıty co nijëjıty jay xyñımähuıbıch: "¿Na'amy co xycapx'adujcıch tijaty nıgoob müd co huingbi jay jıbic ñayjiıhuıyii müd jëgıxpı? ³⁰ Pen nyajnajxypıch Dioscojuyip müd tijaty ycıxpı huidibi ngaaybıch n'uucypıch, ¿na'amy co xyñıgapxa'ñıch xyñı'ojıhua'ñıch co ti ngay ti n'ügyıch tijaty?" ³¹ Paady ycıxpı huentiiıty huidibi mdungıxyp, pen mgaaygıxyp m'uuccıxyp, o jac ti ga ti mdungıxy, tungıx tüg'óciy müd Dios y'oy'ajtin ymıj'ajtin ycıxpı. ³² Ca' mdungıxıpy tijaty huidibi yi judıojäy ajcxy müd huing ñayjiıhuıyii. Ca' mdungıxıpy tijaty huidibi yi griegojäy ajcxy müd huing nayjiıhuıyii. Etz ca' mdungıxıpy tijaty huidibi yi mibıjcpıdıjc ajcxy müd huing ñayjiıhuıyii. ³³ Tüg'óciy huidibi ndumybıch, hue' nduñich jigıx tüg'óciy jay jaygıdägıpy huidibi ndumybıch. Ca' ni ti nduñich nej jëbi ich ci'm

nayjäygidägyijich. Hue' nduñich miid jacyadyii jäy ajcxy y'oy'ajtin ycixpi, jaydëbi ajcxy y'alma ñidzögipy.

11

¹ Jadu'n ndzocyich co miich ajcxy mdunipy jadu'n nej nduñich. E ñich tumbich jadu'n nej Cristo ytuuñ.

Nej huaad töxyjäydijc ajcxy yjäy'ajtcixy co migügtijc naymújcgixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi ñich miich ajcxy ti nyaj'ixpijccixy. ³ Per ndzojcpich co mhuinjihuñygixipy je tiy'ajt co Cristo nigohuajc'ajtpy nidüg nidüg yi mibijcpi yëydijcpi. E nañ nidüg nidüg yëydijc nigohuajc'ajty ajcxy ytöxyijc. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'ñ ihuäcxy capxhuäcxy je tiy'ajt huidibi Dios ti ymöyii, tüg je' tzo'yduñ anajty naymöyii. ⁵ E co tüg töxyjäy cöjuxtüdy cöbe'ndüdy ihuäcxy capxhuäcxy je tiy'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuñy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuñhuamyb co ycöhuay yme'pxity, o co ycöme'pxity cödza'm, jac nigi oy co ñaygöbe'ñiib. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ mi'idipy ma ajcxy Dios mibijctzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc miid yi' y'oy'ajtin ycixpi. Per Dios yajcoj je töxyjäy miid je yëydijc y'oy'ajtin ycixpi. ⁸ Co Dios yajcoj je jayijpi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy miid je yëydijc ycixpi. E ca' nan yajcoj je yëydijc miid je töxyjäy ycixpi. ¹⁰ Paady ycixp copicy co je töxyjäy ajcxy y'ijtcixy cöbe'ñ co Dios mibijctzoogixy o najtzcaxhuñygixy Dios ytiy'ajt. Je' je' je tiy'ajt co yajpaady ajcxy ane'my, nañ jadu'n yi' ángeles ajcxy yajpaatcixy ane'my. ¹¹ Per ca' ñejity, ñich ajt huidibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymüddzináayigixyp. ¹² Com tiy'ajt jadu'n co Dios yajcoj je jayijpi töxyjäy miid je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jilby chondäy ma Dios.

¹³ Miich ajcxy ci'm ocmänaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'ámyity ya naaxhuiñ co je yëydijc huidibi ymiid ycöhuay yoñ ooy cho'ydu'n yecy. ¹⁵ E je töxyjäydijc ajcxy ooy ycömaypidzimgixy co ajcxy miidity ycöhuay yoñ. Com yi' je' huidi ycöbe'n'ajtip. ¹⁶ Pen jim pinjaty ca' mijotcuje'aty ñich n'ayuc, copicy nejhuñhuipy co ñich ajcxy etz nañ jadu'n tüg'óciy jäy huidibi ajcxy mijpidaaccixyp Dios ma tüg'óciy cajn, cuydungixy nej ti nyaj'ixpiyich miich ajcxy, ca' pin jac huingbi costumbre miidity.

Pin tundi gooyb "Santa Cenajoty"

¹⁷ Jada ayuc nyajnimähuaangixyp jadu'n nej mdungixy ma mnayyöymújcgixy co Dios m'ojadajtcixy. Ca' ngapxpaadyich miich ajcxy, com jibic yhuimbizimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújcgixy ma je nayyöymujctac. E ñich nmibijcpyich ma ga ma co yjanchity nej je migügtijc ajcxy ymina'ñ. ¹⁹ Ca' yjecyity paady miich ajcxy mnaybijc-huäcxí miid ajcxy mijibic-huinma'ñ ycixpi, jaydëbi ñiguëxigy pin je' janch tiydudäy cuydumb Dios ytiy'ajt. ²⁰ Co miich ajcxy mnayyöymújcgixy ma je nayyöymujctac, jadu'n yhuimbizimy co ca' mguydungixy nej ypadyyi ñich ajt nHuindzin Jesucristo ytiy'ajt co mjatungixy je "Huindzin je' ySanta Cena". ²¹ Com co je hora paady ma yam mdungixy je "Huindzin je' ySanta Cena" nidüg nidüg miich ajcxy

mgaaygixy abicyjaty, e ca' mdungix cuendi yi jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaaygixy y'uuccixy, ixti ymuucigixy nijëjity. ²² ¿Nej ca' miich ajcxy mïdity mjiin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huidibi mijpidacp Dios. E nañ jadu'n myajtzo'ydungixy yi ayoobi jäy huidibi ajcxy ca' ti mïdity. ¿Huam iich miich ajcxy nimähuipy? ¿Nej jëbi ngömaaygixy miich ajcxy jadu'n nej mdungixy? Ca' huaad ngömaaygixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi "Santa Cena"

²³⁻²⁴ Com iich ajt nHuindzin Jesucristo ci'm xyaj'ixpijcyich je tiy'ajt huidibi ti nyaj'ixpijcyich miich ajcxy, co je huin'it coodz co agojiix ajcxy cïyejcy je nHuindzin Jesús, huin'it je' conïgy je tzajcaagy, e co jayijp yajnajxy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscipulos ajcxy. E co ajcxy moyday, chi nimay ajcxy: "Caaygix jada tzajcaagy. Jadu'n iich jada nninïcx huidibi ngïyegaamybich ma yi o'cin mïd miich ajcxy ycixpi. Jadu'n iich ti nduñich, jadu'n jada miich ajcxy mdunipy jäymejtzig mïd iich ycixpi." ²⁵ Co ajcxy ycayday, chi Jesús nañ jadu'n conïgy je ügy copï'am, e ymïnañ: "Jada ügy je' jada je Dios y'ayuc jemybi huidibi Dios yajhui'my mïd jäy ajcxy ycixpi, je huidibi iich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtzig mïd iich ycixpi." ²⁶ Paady naag'oc naag'oc miich ajcxy mgaaygixy jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy mïd ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je "Santa Cena"

²⁷ Paady ycixp pinjaty mïd ca'oyjot ca'oyhuinmañ caaygixy je tzajcaagy etz uuccixy je vino'ügy, huidibi ajt nHuindzin Jesús ñinïcx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxnïcx etz yi' yñi'py. ²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinmañ, e huin'it jëbi cayipy je tzajcaagy etz ügipy je vino ma je "Santa Cena". ²⁹ Com pinjaty caayb je tzajcaagy etz ügy je vino ma je "Santa Cena", e ca' tuñ cuendi co je' je' iich ajt nHuindzin Jesús ñinïcx etz ñi'py, hue' je' ci'm ñaymidundigoyii, e Dios tzaachytunib mïd ypocy ycixpi. ³⁰ Paady ycixp may miich ajcxy myuumïdity mba'mmïdity, pumäy mnayjihuyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tiydudägy njot nhuinmañ nyaj'oyiym ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim mïd yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi mïd je naaxhuiñyjäy ajcxy huidibi ca' ajcxy Dios tzigiiygixy.

³³ Paady ycixpi miich ajcxy migügtijc co ajcxy mgaya'nip m'üga'nip je "Santa Cena" nay'ahuixigixy miñ xyipy, e jadu'n mgäaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayyöymujctac. Jadu'n mdungixipy, ca'ydi Dios xychaachytuungixy mïd co ca' oy mduungixy je "Santa Cena". Yi jacjadyii ayuc huinmañ jim nyaj'oyihuibich co anajty nicxy ci'm n'ijxcixyich miich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

¹ Migügtijc ajcxy, ndzojcypich co miich ajcxy mnejhuihuipy jadu'n nej je Espíritu Santo xymooyim mic'ajt. ² Miich ajcxy mnejhuib co jayijp'ajty co ca'ni anajty mmibijccixy Cristo, ooy anajty je ca'oybi xyajnidigooygixy xyajtüdigooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcypich co miich ajcxy mnejhuihuipy co pinjaty ymïna'nipy: "¡Ca' oy jäy yi Jesús!" je jäy huidibi jadu'n

minamb, ca' je' anajty yajcapxyii je Dios y'Espíritu. E pinjaty minamb: “¡Jesús ñich ajt nHuindzin!” je' anajty yajcapxip je Espíritu Santo.

⁴ Dios yjihui'ñ ymic'ajt yejcpy ymic'ajt canaag nax, per tūgpajc jēyi je Dios yjihui'ñ huidibi mic'ajt yejcp. ⁵ Ji yajpaady canaagnax Dios ytung, per tūgpajc ajt nHuindzin Jesús huidibi xyajñibijcim nije' nije' tung. ⁶ Ji yajpaady canaagnax huinma'ñ nej jēbi ndunim Dios ytung. Per tūgpajc Dios huidibi xymooyim nidūg nidūg je nhuinma'ñ nej huaad ndunim Dios ytung. ⁷ Dios yajñiguēxīgyp ma nidūg nidūg mibijcpidijc je tiy'ajt co ajcxy mūdity yī' yjihui'ñ ymic'ajt ma ajcxy yjot yhuinma'ñ. Jadu'n Dios ytuñ mūd tūg'óciy ymibijcpidijc y'oy'ajtin ycixpī. ⁸ Dios mūd yjihui'ñ ymic'ajt ymooyb nijējity mibijcpidijc ayuc huinma'ñ nej jēbi ajcxy yaj'ixpicy Dios y'ayuc. E nañ jadu'n Dios mūd yjihui'ñ ymic'ajt mōy nijējity mibijcpidijc ixpijcin ma yī' ytiy'ajt, per tūgpajc je Espíritu Santo huidibi mic'ajt yejcp. ⁹ E nañ jadu'n Dios mūd yjihui'ñ ymic'ajt mōy nijējity jāy mibijcin, per tūgpajc je Espíritu Santo huidibi mic'ajt yejcpy. E nañ jadu'n jacnaagity mōy mic'ajt jaydēbi yajtzōgy pa'mjāy. ¹⁰ E nañ jadu'n Dios mūd yjihui'ñ ymic'ajt ymooyb nijējity mibijcpidijc mic'ajt, jaydēbi mijhuinma'ñytūngixy milagro tungixy. E jac nijējity ymooyb mic'ajt, jaydēbi najtzcapxīgixy Dios ytiy'ajt. E jac nijējity Dios ymooyb ixpijcin etz huijy'ajtin, jaydēbi ixcajpcixy je espíritu huidibi ca' tiy'ajt mūdity, etz nañ jadu'n ixcajpcixy je espíritu huidibi tiy'ajt mūdip. E jac nijējity Dios ymooyb je mic'ajt, jaydēbi capxcixy huingbi ayuc, etz nañ jadu'n jac nijējity ymooyb je ixpijcin jaydēbi yajñiguejixy je huingbi ayuc. ¹¹ Per tūgpajc je Espíritu Santo huidibi ymooyb nije' nije' mibijcpidijc mic'ajt etz huinma'ñ. Ymooyb nidūg nidūg nej yī' tzocy.

Nidūg'óciy ajt nyajpaatim ma Cristo

¹² Cristo jadu'n yī' nej tūg ninīcx, je ninīcx ymūd canaag nax huidibi yu'cxp. Oy canaag jamūdity huidibi yu'cxp, per tūgpajc ñinīcx'aty. ¹³ Co nidūg nidūg ñich ajt nnībejtim, chi ñich ajt nyajpaatim nej tūgpicy jāy. Com Dios yjihui'ñ ymic'ajt tūgpajc yajpaady ma nidūg'óciy ñich ajt njot nhuinma'ñ, ca' ñējity pen judío jāy ajt, o pen ca' ajt njudío jāyity; pen jāy xytumbi'ajtim o pen ndunim ngi'ndung; hue' n'ijtim nej tūgpicy jāy. Dios xy'adigiym xyjottigiym yī' yjihui'ñ ymic'ajt nidūg'óciy ñich ajt, paady ycixpī tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tūgpī jāy ñinīcx mūd canaagnax huidibi yu'cxp, huidibi mīdoob, huidibi iixp. ¹⁵ Co ixyipy je teci jadu'n ymīna'ñ: “Ca'p ñich ngījity, paady ca' nyajpaadyich ma je ninīcx.” ¿Nej paady ycixpī ca' yajpaady ma ninīcxin? ¹⁶ O co ixyipy je tādza ymīna'ñ: “Ca'p nhuinity, paady ca' nyajpaadyich ma je ninīcx.” ¿Nej paady ycixpī ca' yajpaady ma ninīcxin? ¹⁷ Co ixyipy tūg'óciy je jāy ñinīcx y'oc-huin'aty, ¿ma ixyipy mūdity huidi mīdooyb? O co ixyipy tūg'óciy je jāy ñinīcx ytādzac'aty, ¿ma ixyipy mūdity huidibi jēbi mūd tijaty xuugyī? ¹⁸ Dios ti pidaci jāy ytecy yhuin y'ahuac etz jac tijaty ma tūgpī ninīcx jadu'n nej yī' tzojcy. ¹⁹ Pen huiindi'ajty ixyipy ninīcx'ajtp, ¿ti ninīcx ixyipy jada? ²⁰ Dios ti mōy nidūg nidūg jāy yci' ytecy, yhuin y'ahuac, yjijpput etz ytādzac, per tūgpajc ñinīcx'aty.

²¹ Ca' huaad je huiin ixyipy nimāy je ci': “Ca' ñich mīich nyajmayjaty.” Nañ jadu'n ca' huaad ixyipy je cohuaajc nimay je teci: “Ca' ñich mīich nyajmayjaty.” ²² Tūgpī ninīcx copicy ca'pxy tijaty mūd. Huidijaty je ninīcx ymūd oy yjaquēxīgyp nej jihuīy ca' y'oy'ojadajtnity, per copicy yī'. ²³ Jadu'n ñich ajt njāy'ajtim. Muum ma ajt nninīcx ca' oy n'ijxim, paady nayxojxim, jigix jac'oy quēxīgip. Nañ jadu'n muum ma ajt nninīcx huidi y'oymidzo'yduni, paady nyūdzm mūd huit, jaydēbi oy quēxīgity. ²⁴ Muum ma ajt nninīcx oy n'ijxim paady ca' nyūdzm mūd huit. Jadu'n Dios yaj'oyīy ajt nninīcx, jigix ma ca' oy y'ijxity, nxojxim mūd huit, jigix jēbi oy quēxīgyp. ²⁵ Jadu'n Dios yajcojy yaj'oyīy ajt nninīcx tú'ciy, jigix ca'ydi ñaychiptúnigixy nije' nije' huidibi yūcx ma ajt nninīcx. Tūg'óciy huidibi nmūd'ajtim ma ajt nninīcx naybubéjtigixp miñ xyipy. ²⁶ Pen pijcp muum ma je ninīcx,

tüg'óciy je ninícx jihuíy je pijcin. Pen muum ma ajt nninícx ooy capxpaady y'ity, chi tüg'óciy je ninícx jotcuje ñayjihuíy.

²⁷ Miich ajcxy nidüg'óciy Cristo xyñinícx'ajtcixyp, e nidüg nidüg miich ajcxy mya-jpatcixy ma Cristo ñinícx. Jadu'n nidüg nidüg ñich ajt nipaady nej huidi yücxp ma tüg ninícx. ²⁸ Dios yajnibicjpy nije' nije' mibijcpidijc, jigix ajcxy yajnicxip nidüg nidüg yi' ytung. Tim jayijp yajnibijcy je apóstol ajcxy huidibi je mijtung yajnicxip. E mimetz Dios yajnibijcy nijējity mibijcpidijc huidibi najtzcaxiyyb yi' y'ayuc, je midugügpi Dios yajnibijcy nije' nije' je mibijcpidijc huidibi yajixpijcp yi' ytiy'ajt. Dios yajnibijcy mibijcpidijc nijējity huidibi mij huinma'ñ tumb. E Dios yajnibijcy mibijcpidijc nijējity huidibi yajtzoocp pa'mjäy. E Dios yhuin'ijx huidibi pubejtp ymigügtijc. E Dios yhuin'ijx je mibijcpidijc huidibi ane'mip je ymigügtijc. E Dios yhuin'ijx je mibijcpidijc huidibi jadip nej capxip huingbi ayuc. ²⁹ Ca' nan nidüg'óciy mibijcpidijc huidibi Dios huin'ijxyp y'apóstol'ajtcixy. Nañ ni ca' nan nidüg'óciy ajcxy najtzcaxiyygixy Dios y'ayuc. E nañ ni ca' nidüg'óciy yi' ajcxy mijhuinma'ñytungixy. ³⁰ Ca' nan nidüg'óciy mibijcpidijc huidibi Dios huin'ijxip ymüd ajcxy mic'ajt cötujc yajtzögipy pa'mjäy. Nañ jadu'n ni ca' ajcxy nidüg'óciy jajtcixy nej yajniğuéjixipy huingbi ayuc. ³¹ Pijctzoogix cixyjot huinijot ma Dios je mic'ajt etz je huinma'ñ oybi. ñich miich ajcxy nyajniğihuipy tüg ñi'aa tü'aa jac'oybi.

13

Je tzojcin je oyjäy'ajtin

¹ Co ixipy ngapxyich tüg'óciy jäy ajcxy y'ayuc, etz nañ jadu'n ngapxyich ángeles ajcxy y'ayuc, e ca' ndzocyich ca' njihuíyich nmigügtijcich, jadu'n yhuimbizimiy ñich n'ayuc jadu'n nej tüg tambor o tüg platillo huidibi nigoob ooy ñe'my. ² E co ixipy najtzcaxiyyich Dios y'ayuc, etz co ixipy njatyich tüg'óciy xpijcin huidibi pinjaty nejhuíy etz huidibi pinjaty ca' nejhuíy, etz co ixipy nmijpidägyich Dios ymic'ajt, ixti jēbi nyajpidägyich tüg cop, pen ca' ndzocyich njihuíyich nmigügtijcich, ca' ñich ti ndzoohuity. ³ E co ixipy nmoydayich ayoobitijc tüg'óciy tijaty nmüdich, e nañ co ixipy ngiycyich nninícx ma jäy ajcxy co huen nöctigoydäy, e ca' ndzocyich njihuíyich nmigügtijcich, ni ti oybi ca' nbada'ñich.

⁴ Yi jäy ajcxy huidibi ooy tzocy ooy jihuíy ymigügtijc, hue' ajcxy ooy mecxtujcin miidity, nañ ooy ajcxy yung naxy yjot yhuinma'ñ. Nañ ca' ajcxy ymigüg ti yajcohuindoyii, e nañ ca' ajcxy ñaygömayii ci'm. ⁵ Yi mibijcpidijc huidibi ajcxy tzojcp jihuíyb ymigügtijc, ca' ajcxy oyñinej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymigüg mijotma'tcixy. ⁶ Yi mibijcpidijc huidibi ajcxy tzojcp jihuíyb ymigügtijc ca' ajcxy yjotcuycity co pinjaty ytundigooy. Jotcuje ajcxy co pinjaty tudägy yjäy'ajtcixip. ⁷ Co naychojcin nayjihuíyim, huin'it yajtunim mecxtujcin, huin'it nmibijctayim huidijaty tiy'ajtip, huin'it nmibijctaayim co tüg'óciy tijaty oy yhuimbizimipy, huin'it nmecxtujctayim tüg'óciy tzaachyp ayo'n.

⁸ Yi naychojcin nayjihuíyim ca' yi' ycixipy ytigoyipy ni mina. Minip je xii tiempo ma ca' y'ocyaj'ijxnipy y'ocyajmidoonipy Dios ycapxy y'ayuc huidi jäy ajcxy ñajtzcaxiyygixyp, nañ ni ycayajmidoohuipy pin huingbi ayuc capxp, ni ycayajtzocy anajty ti diy'ajt. ⁹ Com ca' yca'pxity je xpijcin huidibi ñich ajt nmüd'ajtim. Nañ jadu'n ca' yca'pxity je Dios y'ayuc huidibi ñich ajt nnajtzcaxiym.

¹⁰⁻¹¹ Per co anajty nmüd'ajtim ca'pxy Dios y'ayuc ytiy'ajt, chi ycixipy ytigoyipy je ayuc huidibi nmüd'ajtim cham huidibi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmiydägyich n'iyiyich nejtyin pi'c'anäcin. Per co oy nmij'anäciyñich, chi n'ixmajtnich je pi'c'anäg'atypi huinma'ñ. ¹² Nañ tim jadu'n nyajnajxim jadachambi xii tiempo ca' n'ixpijctaayim, ca' nhuinjihuíydaayim Dios y'ayuc ytiy'ajt. Jadu'n nipaady nej jihuíy nay'a'ijxnajxim ma tüg iix, huidibi ti chijxni

ti yjibiciyñi. Co anajty Jesús yhuimbity jadüg'oc, huin'it huädz nhuinjihuیداایم Dios y'ayuc ytiy'ajt, com naybadaanim müd Jesús ahuin ajipp. Jadachambi magama nhuinjihuیدایح. Per co nnaybadıybıch müd Jesús, huin'it nhuinjihuیدāhuıbıch nej Dios y'ixpijcin müdity, tim jadu'n nej Dios nehuiydāy nej ıch n'ixpijcin nmıdity. ¹³ Nmıbıgaanim Cristo huinıxıı huinıtiempo, ca' n'ixmadzaanim nmıbıjcin ni mına. Nañ njıpp'ıjxim co oybı nbadaanim ma Dios huinıxıı huinıtiempo. Nañ jadu'n ndzojcin njihuıyım migügtıj huinıxıı huinıtiempo. Hue' jac nıgi copıcyıp co naychojcin nayjihuıyım ca'ydi jac ti.

14

Co huingbi ayuc yajcapxy

¹ Naychójcigıxy nayjihuıygıxy miñ xyipy. Mıjottıgooygıxy nej mbaatcıxy Dios yjihuıñ ymıc'ajt canaagnax. Yi Dios yjihuıñ ymıc'ajt huidibi jac'oybı, yi' je' yejcpy mıc'ajt jaydēbi mnajtzcapxyıgıxy Dios y'ayuc ytiy'ajt. ² Yi jāy ajcxy huidibi Dios ymıc'ajt müd jaydēbi capxy huing ayuc, hue' ajcxy ymıgapxyp Dios, e ca' nan jāy, com yi jāy ajcxy ca' huinjihuıygıxy je' ajcxy y'ayuc huidibi capxp. Je Espıritu Santo yejcp je ayuc ma je huidibi capxp. Jadu'n nıpaady nej jihuıy ameech je' ycapxy. ³ Pinjaty najtzcapxyıyb Dios ytiy'ajt, yi' ycapxhuäcxyp Dios y'ayuc ma yi jāy ajcxy, jaydēbi yujcpedıpy ajcxy y'ixpijcin ma Dios y'ayuc, nañ jadu'n jaydēbi ajcxy yjotmıcpıgıpy etz yjotcugıygıxıpy. ⁴ Pinjaty capxp huing ayuc, hue' cı'm naybubedyıı. Pinjaty najtzcapxyıyb Dios y'ayuc ma yci'm ayuc, hue' ypubejtyp tüg'ócıy yi mıbıjcpıdıj.

⁵ Huaad co ıxyıpy nidüg'ócıy miıch ajcxy mgapxcıxy huingbi ayuc. Per jac nıgi oy co miıch ajcxy mnajtzcapxyıygıxy Dios ytiy'ajt, ca'ydi co mgapxcıxy huingbi ayuc. Pinjaty huidibi najtzcapxyıyb Dios y'ayuc, jac nıgi oy tuñ, ca'ydi jac pinjaty huidibi capxy huingbi ayuc, pen ca' pinjaty capxtıcxıpy je huingbi y'ayuc, jıgıx je mıbıjcpıdıj jotcuıj'ajtin pátıcxıp. ⁶ Migügtıj ajcxy, co ıxyıpy nnıcxıyıch ma miıch ajcxy, e ngapxyıch ıxyıpy huingbi ayuc, ¿ti oybı miıch ajcxy mbadamyb ma ıch? Pen ca' anajty ti pubejtin nduñıch ma miıch ajcxy, pen ca' nyajnejhuıygıxy Dios ytiy'ajt jemıybi, pen ca' nyaj'ıxpıjccıxy Dios ytiy'ajt o pen ca' nnajtzcapxyıyıch Dios y'ayuc, o pen ca' nyecyıch ıxpıjcin.

⁷ Tzoc ocpıdaacım tüg ıjxpejt ma je xüxy, jadu'n nej je flautı o je arpa. Pen ca' nmıdo'mbıjcin je nota je tono nidüg nidüg, ca' nmıdo'mbıjcin ti pieza ti xüxy yajxuxp o yajcoob. ⁸ Nañ jadu'n co soldados ajcxy chıptunaangıxy, pen je trompeta ca' huädz yxüxy, ca' ni tüg soldado ñayñı'ıxıhua'ñyıı ma je tzip ytuna'ñyıı yjada'ñyıı. ⁹ Nañ tim jadu'n müd miıch ajcxy, pen mgapxcıxyp huingbi ayuc huidibi ca' pın huinjihuıy, ¿nej yajnejhuııpy ti miıch anajty mgapxyp? Jadu'n je' anajty yhuımbıdzımnı nej nıgoob mdım'ıxmıydaaccıxy. ¹⁰ Janch co jı yajpaady canaagnax ayuc ya naaxhuıñ ac tıgachjaty. Etz janch co nidüg nidüg jāy ayuc müdity e cı'm je' ajcxy huinjihuıygıxy. ¹¹ Per pen ca' nhuinjihuıyıch je ayuc huidibi jāy xyajmıgapxpıch jadu'n ıch yi' nyajnaxyıch nej agatz. O pen ca', yi' xyajnaxpıch nej agatz. ¹² Paady miıch ajcxy co ooy mnıjot'ajtcıxy Dios yjihuıñ ymıc'ajt canaagnax, yajtungıx je mıc'ajt huidibi pubedam yi mıbıjcpıdıj, jıgıx yujcpedıpy ajcxy ymıbıjcin etz y'ıxpıjcin ma Dios y'ayuc.

¹³ Paady pinjaty jajtp nej capxıp huingbi ayuc, copıcy co Dios mıbıjctzohıpy co mıc'ajt ymıohuııb, jaydēbi yajnıguejy je ayuc huidibi ycapxamyb. ¹⁴ Pen nmıbıjctzooybıch Dios müd huingbi ayuc, nmıbıjctzooybıch müd ıch n'espıritu, per ıch nhuınma'ñ ca' ti jāygıdaacin paady. ¹⁵ ¿Ti huaad ndunıpyıch? Pues copıcy nmıbıjctzooyıch n'ojadatyıch Dios müd ıch njihuıñıch, e nañ jadu'n nmıbıjctzooyıch müd ıch nhuınma'ñıch. N'ıbadaamyıch ngapxpadaamyıch Dios müd ıch njihuıñıch etz müd ıch nhuınma'ñıch. ¹⁶ Com pen miıch mhuın'ıgıxyp mhuingapxtaaccıxyp Dios müd yi mıjihuıñ, je migüg huidibi amıdoo'ıjtp ca' je' huinjihuıy je huing ayuc huidibi mgapxyp, e ca' jēbi ymına'nıp

“jadu'n jada, Amén.” Com ca' yi' huinjihuïy ti yi' mgapxyp. ¹⁷ Ca' yjeczyty co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huidibi ca' huinjihuïy miich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nigü njatyich nej ngápxiyich huingbi ayuc, ca' ydi miich ajcxy nidüg'óciy. ¹⁹ Per co nyajpaadyich ma je mibijcpidijc ti ñayyöymújcigixy, jac'oy co ngapxyich migoox ayuc huidibi mibijcpidijc yhuinjihuïygixyp, ca' ydi co ngápxiyich majc mil huingbi ayuc huidibi ca' pin huinjihuïy.

²⁰ Migügtijc ajcxy, ca' ajcxy mmid'adipy mhuinma'ñ, jadu'n nej pi'ctijc yhuinma'ñ muidity. Ma yi jibicpi huinma'ñ ymiñ naybidägi jadu'n nej ma'xungdijc huidibi ca' ti jibic huinma'ñ huinjihuïygixy. Mid'adip miich ajcxy oyjot oyhuinma'ñ jadu'n nej mij'anäctijc huidibi yhuinma'ñ ti ymejtzn ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'ñ: “Nmigapxaamybich je may Israel jäy mid huingbi ayuc, e huingbi jäy najtzcapxihuamb ich n'ayuc ma yi' ajcxy, per ni jadu'n ajcxy xycatuna'ñich cuendi.” Jadu'n je Huindzin Dios ymina'ñ. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt iixpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymid co najtzcapxiy Dios ytiy'ajt, yejcp iixpejt ma yi mibijcpidijc, ca' yecy iixpejt ma yi' ajcxy huidibi ca' ymibijccixy. ²³ Ca' yjeczyty jadu'n yjadip, co anajty ti ñayyöymújcigixy je mibijcpidijc, e nidüg'óciy anajty ajcxy ytigüygixy capxpi mid huingbi ayuc huidibi ca' pin huinjihuïy, chi ytigühuip ma ajcxy ñayyöymugyii nijëjity huidibi ca' ymibijccixy. ¿Ca' yi' ajcxy yminaangixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcapxiygixy Dios ytiy'ajt mid yci'm ayuc, e co ytigühuipy pinjaty huidibi ca' ymibicy, e co yi' midohuipy Dios y'ayuc yjihuïhuamyb ypocy. E ci'm huinmayip nej anajty ti ytundigooy mid Dios co midohuipy co nidüg'óciy mibijcpidijc anajty najtzcapxiygixy Dios y'ayuc. ²⁵ E Dios y'ayuc yajnejhuïhuib nej anajty ameech ti ytundigooy jotjoty huinma'ñjoty. E chi jada' ycojxtinay'ihuïhuipy, e ojadadipy Dios, e nañ jadu'n ymina'nip co janch Dios miich ajcxy xymid'ijtp.

Tungixy tüg'óciy mid tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújcigixipy, nijëjity miich ajcxy mhuin'ixipy tüg salmo, tüg ayuc huidibi yaj'ixpigamyb, tüg tiy'ajt huidibi Dios ti xyajnejhuïygixy, etz capxip huingbi ayuc, etz capxticxipy nej yhuimbidezmyb je huingbi ayuc. Tüg'óciy jadu'n tungix, jaydëbi ajcxy jäygidägiipy etz yujcpedipy ajcxy ymibijcin huidibi ti ñayyöymújcigixy. ²⁷ Pinjaty capxamb ma je naymujctac mid huingbi ayuc, huen capxy metz o tugüg jäy je'yi, e huindüg padüg huen capxcixy, ca' y'animayity. E pinjaty capxticxamb je' je' yajniguejip nej yhuimbidezmyb je ayuc tiibi capxcixy. ²⁸ Pen ca' yajpaady ma je nayyöymujctac tüg jäy huidibi capxticxip je huingbi ayuc, jac'oy co ca' ni ti yajcapxipy mid huingbi ayuc, jac'oy co migapxip Dios jotjoty huinma'ñjoty, e ca' capxip mayjäyoty. ²⁹ Nañ jadu'n mayjäyoty jëbi metz o tugüg jäy najtzcapxihuip Dios ytiy'ajt, e yi jacjadyii mibijcpidijc huidibi amido'ijtp, jëbi ajcxy huinmay pen janch Dios je' ytiy'ajt huidibi ajcxy ti najtzcapxiy, o pen ca' je' Dios tiy'ajt'adyii. ³⁰ Pen jim mayjäyoty jadüg jäy Dios yajnejhuïyii nej ycapxip, nej tiy'ajt najtzcapxihuipy, huen je jäy y'amonipy huidibi anajty jayijp ti ytigü najtxcapxiy Dios y'ayuc ytiy'ajt. ³¹ Jëbi miich ajcxy nidüg'óciy mnajtzcapxiygixy Dios ytiy'ajt huindüg padüg, jaydëbi tüg'óciy je mibijcpidijc xpijccixy Dios ytiy'ajt, e nañ jadu'n jëbi nidüg'óciy yjotmicp'ijccixipy. ³² Copicy co yi' ajcxy huidibi najtzcapxiyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzciy. ³³ Dios ca' xyajmidzojcm nicx nhuinma'ñyidigooyim, Dios chojcpy co servicio ndunim agujc jotcuje.

³⁴ Jadu'n nidüg'óciy mibijcpidijc ma canaag cajp yminaangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy

co je yëydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'n. ³⁵ Pen ñejhuihuamyb ajcxy töxyjäydijc ti ayuc ti tiy'ajt, jëbi ajcxy ñiyëydijc amidoogixy co anajty ajcxy yhuimbijtcixni ma ytijc, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuïy miich ajcxy jayijp tim ne-jhuïygixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuïy jimyi jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huidibi naybidaacip nejjihuïy Dios ti ymöyii mic'ajt nej jëbi najtzcapxihiipy Dios ytiy'ajt, o ti yhuinma'ñymöyii je Espíritu Santo tijaty tiy'ajt, hue' copicy nañ jadu'n yñejhuihiipy co je ayuc huidibi ñich miich ajcxy nyajnijayiyb, Dios jada y'ane'min ycötujcin. ³⁸ Pinjaty jim ma miich ajcxy huidibi ca' mijpidäga'ñ etz ni ca' cöbiga'ñ je ayuc tiy'ajt huidibi Dios ti xyaj'ane'myich, Dios ca' cöbiga'ñ yijadu'mbi jäy.

³⁹ Com ñich jada ayuc nyaj'ixpijcpich, paady cham nimaaybich nmigügtijcich, co huen najtzogiiygixy nej mnajtzcapxiygixy Dios ytiy'ajt, e nañ jadu'n ca' mgapx'adúccixipy yi' ajcxy huidibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz miid tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcypich co miich ajcxy mjäyméjtcixipy je Jesucristo y'ayuc ytiy'ajt huidibi ti ngapxhuäcxyich ma miich ajcxy. Je' je' je ayuc tiy'ajt huidibi miich ajcxy ti mgöbijccixy etz huidi ajcxy tudägy mibijccixyp. ² Jëbi ajcxy m'alma ñidzögipy, pen mguydumyb ajcxy ñich n'ayuc huidibi ngapxhuäcypich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huidibi Dios jayijp ti xymöyich, etz ti nyajnimaygixy huidibi jaccopicyip co Cristo y'o'cy miid ajt nbocy ycixpi, jadu'n nej Dios y'ayuc ymina'n huidibi jaybety ijtp ma yi' ñecy. ⁴ Chi ajcxy yajnaxtigiiy Jesús, e codugiig xii yi' yjugypijcy jadüg'oc jadu'n nej Dios y'ayuc ymina'n huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yi' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpí tiempo. E may yijadu'mbi mibijcpidijc jacjagy'ajtni chambaad, etz naagity ajcxy ti y'óccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yi' y'apóstol ajcxy.

⁸ Jac tim axam ñayguëxici je Cristo nañ jadu'n ma ñich. Jacjayijp Jesús huin'ijxy yi' jacjadyii apóstol ajcxy, etz jac'axam ñich xyhuin'ijxyich. Jadu'n ñich nipaady nej tüg jäy huidibi ooy ti ñinajxni je tiempo co ti yma'xung'aty. ⁹ Jaccapxpaady yi' jacjadyii Jesús y'apóstol ajcxy ca'ydi ñich. Nañ jadu'n ni ca' ñich xypaady co jäy ajcxy xytíjibich Jesús y'apóstol, miid co ooy ti n'ixhuidityich ti nbahuidityich Dios yjäy ajcxy. ¹⁰ ñich nje'ajtpich nej nje'atyich miid co Dios may'ajt miid ñich tuñ. Je mijmay'ajt je mij'oy'ajt huidibi Dios ti tuñ miid ñich, ca' ñaadigí'aty, ti y'oybidzimyb. Nigi mictägy ti nduñich ma Dios ytung, ca'ydi jacpinjaty. Ca' nan co ñich ndzachmadägyich ma Dios ytung. Hue' Dios oy xymid'ityich, etz ooy may'ajt tuñ miid ñich. ¹¹ Paady pen ti miich ajcxy mbaady Dios ytiy'ajt ma ñich, o ma yi' jacjadyii apóstol ajcxy, ca' ñejity. Je' je' je Cristo y'ayuc huidibi ñich ajcxy ngapxhuäcypich, e nañ Cristo yi' y'ayuc tiibi mmibijccixy.

Co öcypí ajcxy yjugypigipy ajcxy jadüg'oc

¹² Per pen ñich ajcxy ayuc ngapxhuäcypich co je Cristo yjugypijcy jadüg'oc co y'o'cy, ¿na'amy co nijëjity miich ajcxy minangixy co yi' jäy ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' yjayjugypijcy jadüg'oc. ¹⁴ Co ixipy yjanchity co Cristo ca' yjugypijcy,

nañ tim jadu'n je ayuc huidibi ngapxhuäcxpich ca' ti mic'ajt ixyipy müdity. E nañ jadu'n müch ajcxy mmibijcin ca' ixyipy chobaady. ¹⁵ Pen tiy'ajt ixyipy co je öcpi ca' yjugypigaangixy, hui'n'it je Dios y'ayuc huidibi ngapxhuäcxpich ixyipy yhuimbizimyb anii. Com ngapxhuäcxpich co Dios yajjugypijcy Cristo co y'o'cy, paady pen tiy'ajt ixyipy co pinjaty tiibi y'o'ccixy ca' yjugypijcy. Nañ jadu'n ixyipy ca' ytiy'ajtiy co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajugypijcy jadüg'oc co y'o'cy. ¹⁷ Co je Cristo ca' ycajugypijcy jadüg'oc co y'o'cy, chi müch ajcxy mmibijcin ixyipy ca' choobaady. E ca' müch ixyipy ajcxy Dios mbocy xyhuinmecxi. ¹⁸ E pen janch tiy'ajt ixyipy co je Cristo ca' ycajugypijcy, hui'n'it je mübijcpidijc tiibi y'o'ccixy tigoyaangixy y'alma. ¹⁹ Pen janch tiy'ajt ixyipy co nmibijcim Cristo jëyi ma jadachambi tzinaayin ya naaxhuiñ, ca' jac ni ti ixyipy njijp'ijxim co n'o'cim. Jadu'n ich ajt nipaady nej locijäy, e jäy ajcxy nigi xyñixiicim xyajxiicim, ca' ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yi' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n müd yi' ycixpi mayjäy yjugypiga'ñ ajcxy co anajty ti y'öccixy, e yñicxaangixy ma Dios yajpaady. ²¹ Com müd tüg jäy, je Adán, chondacy yi' o'cin ya naaxhuiñ. Nañ tim jadu'n müd tüg jäy, je Cristo, chondacy je jugypijcin co jäy y'o'ccixy. ²² Müd jada ycixpi co Adán ytundigooy oga'n, paady nidüg'óciy jäy patcixy yi' o'cin. Müd jada ycixpi co Cristo yjugypijcy jadüg'oc co y'o'cy, paady nidüg'óciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypiga'ñ jadüg'oc jadu'n nej anajty ñigueegiyi. Cristo ti yjayijp'aty co yjugypijcy. Tüg'óciy yi' jacjadyi jäy ajcxy huidibi mijnicxpejtcixp Cristo, yi' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'óciy naaxhuiñyjäy y'ane'min, tüg'óciy naaxhuiñyjäy ycötujcin, etz tüg'óciy naaxhuiñyjäy ymic'ajt. Jesucristo ypijctähuaanip tüg'óciy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajttähuiib. ²⁵ E tim copicy co je Cristo y'ane'mdähuaryb tüg'óciy, ixti cooni Dios anajty ti mimadactäy tüg'óciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcnipy. ²⁷ Com Dios ymimadactähuiip tüg'óciy je Cristo ymidzip, e pidactähuiip ma je Cristo y'ane'min. Per co Dios y'ayuc huidibi jaybety ijtp ymina'ñ co je Cristo ti mimadactäy tüg'óciy, ca' nan hue' je' yajhuinjihuüy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'óciy pinjaty etz tijaty huidibi mic'ajt müd, e co anajty pidactay ma je Cristo y'ane'min, chi je Dios y'ung ypidactähuiipy yi' y'ane'min ma Dios Teedy, etz ane'my yhui'mañ ma Dios Teedy, je huidibi anajty ti mimadactay. Jadu'n Jesucristo tuna'ñ, jigix jëbi Dios müd'ajttäy tüg'óciy mic'ajt etz ane'm'ajt.

²⁹ Pen ca' yjadu'nity, ¿na'amy co mdzachnibejtcixy co öcpi tzachcodinaaygixy? Co ixyipy ca' pin yjugypiga'ñ jadüg'oc co anajty ti y'o'cy, ¿na'amy co jäy ñibejtcixy müd öcpi ycixpi?

³⁰ ¿E ti ycixpi co ich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ich müch ajcxy nimaaygixy co ooy njäygidägyich müch ajcxy. Müd co mmibijccixy je nHuindzin Jesucristo, paady ycixpi ich müch ajcxy nimaaygixy co jabom jabom nyajpaadyich öcjip'am. ³² Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy njijptinäyich. Pen ca' yjanchity co yi' öcpi ajcxy yjugypigipy jadüg'oc, naadig'ajtp ixyipy co ich ayo'n jabom jabom nhuindinäy njijptinäyich. Nig oy co ixyipy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcujc'ajtim, com jabom huixtic njugy'ajtin ycixaanim müd yi' o'cin."

³³ Ca' mnayyéjigixy co pinjaty xyhuin'íingixipy. Jadu'n yjadipy nej y'ayuc y'ityin: "Yi migügtijc ajcxy huidibi jibicjot jibic-huinma'n mïid, yajtigooyb ajcxy je oyjot oy-huinma'n." ³⁴ Ixmajtcix jibicjot jibic-huinma'n etz tzinaaygix tudägy ca' mbocytungixy. Nijëjity miich ajcxy ca' mnejhuüygixy Dios ytiy'ajt. Jadu'n nmïina'nich, jigix ajcxy mdzo'ydu'n mjihuüygixipy.

Nej ajcxy yi ögypi yjugypigipy ajcxy jadüg'oc

³⁵ Ycadimjegyity co nijëjity miich ajcxy xy'amïdohuipyich: "¿Ma mic'ajt pátcixipy je o'cpi ajcxy co jëbi yjugypijccixy jadüg'oc? ¿Huidibi ninïcx ajcxy ymi'idamyb?" ³⁶ Ca' miich ajcxy ti mhuinjihuüygixy. Ca' mnejhuüygixy co je moc tïim huidibi mniipcixyp ca' ymuxe'n ixti cooni anajty jayijp ti ypüch. ³⁷ Ca' miich ajcxy mniipcixy je mocquipy. Hue' miich ajcxy mniipcixyp je tïimmoc o jacjadyii huingbi tïim. ³⁸ E co je tïim ymuxy, chi Dios möy je ñinïcx, tïim jadu'n nej Dios jayijp ti huinmay ti tzocy. E Dios nije' nije' je tïim möy je ñinïcx tigachjaty. ³⁹ Canaagnax ninïcx yajpaady ya naaxhuiñ, ca' ajcxy ytügnaxity. Tigach yi jäy ajcxy mïidity ñinïcx, tigachjaty iyujc ajcxy mïidity ñinïcx, nañ tigachjaty joon ajcxy mïidity ñinïcx, e nañ jadu'n tigachjaty acx ajcxy mïidity ñinïcx. ⁴⁰ Yi tzajpjoty tzinaayb ajcxy tigachjaty mïidity ñinïcx, nañ jadu'n huidibi ajcxy tzinaayb naaxhuiñ tigachjaty mïidity ñinïcx. Yi tzajpjoty tzinaayb ajcxy ñinïcx mïid tigachjaty y'oy'ajtin, ca'ydi jadu'n nej yi naaxhuiñ tzinaayb ajcxy y'oy'ajtin. ⁴¹ Yi xii ytücxin yjajin ca' ñaybadyii mïid po' ytücxin yjajin, nañ tïim jadu'n je po' ytücxin yjajin ca' ñaybadyii mïid madza' ytücxin yjajin. Etz nije' nije' madza' mïidity ytücxin ca' ñaybadyii mïid jacjadyii madza' ytücxin yjajin. ⁴² Nañ tïim jadu'n yjada'n mïid yi jäy ajcxy tiibi y'o'ccixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxnïcx huidibi yhuindigooyipy, e yjugypigipy jadüg'oc mïid tüg ñinïcx jemybi huidibi ca' yhuindigoya'n nimina. ⁴³ Je öcpi ñaaxnïcx co ñaaxtigiy, ca' ti oy'ajtin mïidity, e co yjugypijcni jadüg'oc ymïid y'oy'ajtin. Je öcpi ñaaxnïcx co ñaxtigiy, ca' ti mic'ajt mïidity e chi yjugypijcni mic'ajt mïid. ⁴⁴ Co je öcpi ñaaxtigiy, hue' yjugypijcni, mïid jemybi ninïcx ca'p yaj'ixy. Pen ji yajpaady ninïcx huidibi Dios ti yajcojy mïid naax, nañ tïim jadu'n ji yajpaady ninïcx huidibi Dios yajcojpy mïid yjihuñ ymic'ajt ca'p yaj'ixy. ⁴⁵ Jadu'n jaybety y'ity ma Dios ñecy ma jadu'n ymina'n: "Je jayijp Adán ymïid anajty jugy'ajtin." Je axambi Adán (je' je' je Cristo) je' tüg espíritu huidibi jugy'ajt yejcp. ⁴⁶ Je huidibi Dios yjihuñ ymic'ajt mïid ca' je' yjayijp'ajty, je' jayijp'ajt huidi Dios yajcoj mïid naax; jac'axam je' huidibi Dios yjihuñ ymic'ajt mïid, je' je' je Cristo. ⁴⁷ Je jayijpi jäy huidibi Dios yaj'oyiy, hue' je' yaj'oyiy mïid naax (e yajpaady ya naaxhuiñ). Je mimetzpi jäy huidibi Dios yaj'oyiy, ich ajt nHuindzin Jesucristo, hue' je' choon tzajpjoty. ⁴⁸ Je jäy ajcxy huidibi tzinaayb ya naaxhuiñ, yi' ajcxy ñinïcx tú'ciy ñaybadyii mïid Adán ñinïcx huidibi Dios yaj'oyiy mïid naax. Yi jäy ajcxy huidibi tzinähuamb tzajpjoty, hue' ajcxy ñinïcx tú'ciy ñaybada'nyii mïid je Cristo ñinïcx huidibi tzinaayb tzajpjoty. ⁴⁹ Jadu'n nej ich ajt, tügñax nguëxim mïid Adán huidibi Dios yaj'oyiy mïid naax. Nañ tïim jadu'n tügñax nguëxigaanim mïid je Cristo huidibi tzinaayb tzajpjoty.

⁵⁰ Migügtijc ajcxy, hue' nnimähuaangixy co je ninïcx huidibi mïid yxixy etz yñi'py ca' yi' y'ida'n ma Dios y'ane'my. Je ninïcx huidibi cixamb tigoyamb ca' pada'n it lugar ma yi' ñinïcx ajcxy ity huidibi ca' ycixa'n ytigoya'n. ⁵¹ Tungix cuendi jada ayuc, nyaj'ixpigaamybich miich ajcxy tüg tiy'ajt huidibi ca' pin huinjihuüy. Ca' nan nidüg'óciy ich ajt n'ögaanim, per nidüg'óciy ich ajt Dios nninïcx xyajtigadzaanim. ⁵² Co anajty Dios yajxüxy yi' ytrompeta, je huidibi anajty cogixiyñip, chi cixipy je naaxhuiñybi. Chi Dios xyajtigadzaanim ajt nninïcx tïim tzojcyi, tïim tüg jaxigy tüg huinmïpxy. Dios yajxüxamyb yi' ytrompeta, e je jäy tiibi ajcxy y'öccixy jugypigip ajcxy jadüg'oc, e ni ca mina ajcxy y'öccixnipy. E ich ajt huidibi jacjugy'ajtni Dios ich ajt xyajtigadzaanim nninïcx. ⁵³ Com ich ajt nninïcx huidibi ögam, huidibi huen tigoyamb, copicy ytigadzip, e nmïid'adaanim ninïcx huidibi ca' öga'n ca' yhuindigoya'n. ⁵⁴ Co anajty ytigajtzim

ajt nninïcx huidibi cixamb huindigoyamb, nmïd'ajtm anajty jemybi ninïcx huidibi ca' ycixa'ñ yhuindigoya'ñ nimina. Co anajty ytigajtzim ajt nninïcx huidibi ögam, e nmïd'ajtm jemybi ninïcx huidibi ca' y'öga'ñ, huin'it cuydunipy Dios y'ayuc huidibi jaybety ijtp huidibi jadu'n yminamb: "Co anajty ajt nHuindzin Dios mimadägy yi o'cin, huin'it cödigooynip je o'cin (ca' jacpin y'oc'o'cnip). ⁵⁵ ¿Ma yi o'cin ocjacpada'ñ mic'ajt co tijy xy'ocjactzaachytunaanim? ¿Ma yi o'cin ocjacpada'ñ mic'ajt co tijy xy'ocmimadägaanim?" ⁵⁶ Mïd co ti ndundigooyim, paady ycixp o'cin nbaatim. Mïd co ca' ti nguydundaayim Dios ycötujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mijmay'ajt ti tuuñ mïd ïch ajt ycixpi, e ti nmimadaacim yi o'cin co ajt nHuindzin Jesucristo y'o'cy mïd ajt nbocy ycixpi.

⁵⁸ Paady ycixp, miich ajcxy migügtijc huidibi ooy ndzocy njihuïyich tiydudägy mmibijccix, ca' m'ixtigïhuäccixy ma mmibijcin, ca' m'ixmajtzcixy yi mmibijcin, ca' ajcxy mjetmetzcïygixy. Tungix jabom jabom ma Dios ytung agujc jotcuyc, com mne-jhuïygixyp co ca' ñaadigï'aty ajcxy mdung ma ajt nHuindzin Jesucristo ytung.

16

Je cuejtïn mïd je hermano ajcxy ycixpi

¹ Jadu'n nej ymiñ yi meñ huidibi miich ajcxy myajmujccixyp mïd je mibijcpidijc ycixpi huidibi jim Jerusalén. Cuydungix je tiy'ajt huidibi ti nyaj'ané'mgixyich yi mibijcpidijc huidibi canaagpicy yajpatp jim Galacia. ² Naag naag domingo, je jayijpi xii ma je semana y'ixtigïy nidüg nidüg miich ajcxy mbidägip abicy hueeni pi'cmeñ, jadu'n nej anajty ii ti mbaatcixy. Je pi'cmeñ huidibi anajty ti myajmujccixy mgüend'ajtcixipy ooy, jigix co ïch jim njädip ma miich ajcxy, ca' ycopicyity meñ myajmujccixy. ³ E co anajty jim nmechich ma miich ajcxy, miich ajcxy myajmujccixy nijëjity migügtijc huidibi nicxip jim Jerusalén. E ïch nguexipyich jada migügtijc jim Jerusalén mïd tüg necy etz mïd je meñ huidibi anajty miich ajcxy ti myajmujccixy, jaydëbi yajcïdigïhuip je mibijcpidijc jim Jerusalén. ⁴ E pen ooy ytimycopicyity co ïch nañ jadu'n nnïcxibich jim Jerusalén, jëbi ajcxy ñicxy mïd ïch.

Pablo huinmay co nicxa'ñ Macedonia

⁵ Co anajty ndübicyich nnicxaambich ma miich ajcxy, jayijp naxïhua'ñich Macedonia naaxjot, com copicy jim Macedonia naxïhua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaxipyich tüg'óciy je tichypo j tiempo mïd miich ajcxy. Co anajty ndzooñich jadüg'oc ma miich ajcxy, nnïcxych anajty muumjaty, miich ajcxy xytüjijphuohuïhuibich ma ïch anajty nnicxa'ñich. ⁷ Ca' nan tzojccixy n'ida'ñich mïd miich ajcxy, hue' jatytimy huäcxibaambich ma miich ajcxy jecy jecy, pen ïch ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xii anajty ti ñajxtäy. ⁹ Com nmïdich it lugar ya ma jëbi ngapxhuäcxych Cristo y'ayuc, e mayjäy huidibi mijpidacp ïch n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjädy ma miich ajcxy, tungixy may'ajt mgöbïjccixipy agujc jotcuyc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej ïch nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüjijphuohuïhuipy, jaydëbi ca' ti jotmay mïd'adipy etz yjactüyöyip agujc jotcuyc, e ymedzipy ya Efeso ma nyajpaadyich. Com njijp'ijxypich co Timoteo xyñijädibich quipxyi mïd jacjadyii mibijcpidijc.

¹² Jadu'n nej yjajti mïd ajt nmigüg Apolos. May'ajt nbijctzoohuich ma Apolos co yi' mïdnicxip nijëjity jacjadyii migügtijc huidibi nicxamb ma miich ajcxy. Per

ca' yí' yjotcuycity co ñicxip jadachambi tiempo. Hue' janchtiy jacjiini yñicxipy, pen yaj'ahuätzciyb anajty.

Capxpocxin huidibi cijxnip je necy

¹³ Ni'ixí m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidaacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp miid tzojcin jihuiyin etz ojjäy'ajtin.

¹⁵ Migügtijc ajcxy, mnejhuiyb jadu'n nej Estéfanas miid yjugymigüg ti mibijccixy Jesucristo y'ayuc. Yí' je' jayijp ajcxy mibijcp jim Acaya, e ti yhuinma'ñypidaaccixy co ypubedamyb ajcxy yí' mibijcpidijc. ¹⁶ May'ajt nbijctzooybich ma miich ajcxy co myajmij'ájtciixy Estéfanas, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷ Ooy njotcújidyich co Estéfanas, Fortunato, etz Acaico ti ymiñ ma iich ajcxy ya Efeso. Yí' ajcxy xymiid'ijtpich, com ca' anajty y'oyiy nej nmíid'idipyich miich ajcxy. ¹⁸ E yí' ajcxy ti ooy xyajjotcugiyich, e nañ jadu'n miich ajcxy ti mjotcugiyigixy co yí' ajcxy ymiñ ma iich. Paady ycixp copicy co miich ajcxy myajmij'adip yí' ajcxy etz jacjadyii tim jadu'n nej yí' ajcxy.

¹⁹ Yí' mibijcpidijc huidibi canaagpicy ya Asia naaxjot yquejxyp ajcxy capxpocxin ma miich ajcxy. Aquila etz Priscila etz yí' mibijcpidijc huidibi ajcxy yöymujcip ma Aquila ytijc yquejxp ajcxy capxpocxin ma miich ajcxy ma ajt nHuindzin Jesucristo yxí. ²⁰ Tüg'óciy je mibijcpidijc huidibi ya Efeso yquejxp ajcxy capxpocxin ma miich ajcxy. Naygapxpóocxigixy miich ajcxy xíc xon.

²¹ Ich, Pablo, njaaybich miid ngi'mgi' ngi'mletra jada capxpocxin huidibi nguejxypich ma miich ajcxy. ²² Pen jim pinjaty ca' mijpidägy iich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminiipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miid miich ajcxy etz xyconu-ucxip ajcxy. ²⁴ Ndzojcypich njihuiybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Necy Huidibi San Pablo Yajnigujx Je Mibijcpidijc Jim Corinto

¹ Ich Pablo, Dios jadu'n ti tzocy, paady ycixpi Jesucristo ti xyajñibicyich co ngapx-huäcxibich yi' y'ayuc. Ich mïid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy mïid miich ajcxy etz xyajjotcugüygixip.

Nej Pablo yjajty y'ayoy

³ Tzoc yajnaxim Dioscojuyip ma Dios, je nHuindzin Jesucristo yTeedy, je Dios Teedy huidibi ajt xypa'ayoohum, je Dios huidibi yejcp jotcuje'ajtin. ⁴ Dios xyajjotcugüyim co nminaxim nyajnaxim tzaachypi ayo'n jigix jëbi nyajjotcugüyim jacpinjaty huidibi minajxp yajnaxp tzaachypi ayo'n. Tim jadu'n nej ich ajcxy ti nbaady jotcuje'ajtin ma Dios, nañ tim jadu'n yi' ajcxy padañ jotcuje'ajtin ma Dios huidibi minajxp yajnaxp tzaachypi ayo'n. ⁵ Com tim jadu'n nej ich ajt nminaxim nyajnaxim tzaachypi ayo'n mïid Cristo ycixpi, nañ tim jadu'n mïid Cristo ycixpi nbaatim jotcuje'ajtin. ⁶ Paady ycixpi ich ajcxy nminaxcixy nyajnaxcixy tzaachypi ayo'n, jaydëbi miich ajcxy mbaadip jotcuje'ajtin etz nañ jadu'n ypaadip ajcxy m'alma ñidzoocin. Dios yejcpy jotcuje'ajtin ma miich ajcxy, jaydëbi miich ajcxy mbaadip jotcuje'ajtin etz nañ jadu'n ñidzögip ajcxy yi' m'alma. E co ajcxy mbaadip jotcuje'ajtin etz ajcxy m'alma ñidzoocin, chi jëbi miich ajcxy mmimadägip etz mmecxtugip tzaachypi ayo'n, tim jadu'n nej ich ajcxy nmimadägy etz nmecxtüjccixich tzaachypi ayo'n. ⁷ Jotcuje nayjihuiyijich mïid miich ajcxy ycixpi, com njipp'ixpich co mmadägipy ajcxy ma mmibijcin. Com nejhuiybich co miich ajcxy mminajxyp myajnaxyp tzaachypi, tim jadu'n nej ich ajcxy nminaxcixy nyajnaxcixy tzaachypi. E nañ jadu'n Dios yejcpy jotcuje'ajtin ma miich ajcxy, tim jadu'n nej yecy jotcuje'ajtin ma ich ajcxy.

⁸ Migügtijc ajcxy, ich ajcxy ndzojcypich co miich ajcxy mnejhuihuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njipp'ixyich co nbidzimipyich juugy ma je jimbi it lugar. ⁹ Jadu'n ich ajcxy nnayjihuiyi nej jäy ajcxy huidibi yajpatcixp o'cjipp'am. Jadu'n ti njatyich, jigix jëbi n'ixpicyich nej ich huaad nigi Dios nyajmij'atyich, je Dios huidibi yajjugypigip yi' jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios mïid ich ycixpi. Njipp'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy mïid ich ycixpi, nañ jadu'n yajnaxcixyipy ajcxy jäygidaacin ma Dios mïid je may'ajt oy'ajt ycixpi huidibi Dios ytumyb mïid ich ajcxy.

Ti Pablo co yhuäcxippy, ca' chojc nicxy jim Corinto

¹² Jotcuje nayjihuiyijich mïid jada ycixpi com nejhuiybich co ti ndzinäyich mïid tudägy'ajtin etz mïid oyjot oyhuinma'ñ mïid yi' mayjäy ajcxy canaag agajp etz jacnigi ma miich ajcxy. Dios mïid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyich. ¹³ Ich miich ajcxy nyajnijayiyb je ayuc tiy'ajt huidibi miich ajcxy jëbi mgapxcixy etz mhuinjihuüygixy. E nañ jadu'n njipp'ixypich co miich ajcxy mhuinjihuüipy ich n'ayuc tüg'óciy. ¹⁴ Jadu'n nej miich ajcxy cham cuje-huäcxy mhuinjihuüygixy ich n'ayuc ndiy'ajt. Jacjiini co

anajty je xii je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcuyc mnayjihuñybyb mñid ñich ycixpi. E nañ tim jadu'n nej ñich ajcxy jotcuyc nayjihuñybyb mñid miich ajcxy ycixpi.

¹⁵ Com nejhuñybybich co miich ajcxy xychojcpich xyjihuñybybich, paady ycixpi nhuinma'ñ nbidägyich co nicxy n'ixaangixy miich ajcxy jadüg'oc, e jadu'n nyajjotcugihuaangixich miich ajcxy mejtz'oc. ¹⁶ Jadu'n nhuinma'ñ ti nbidägyich co nñicxa'ñich Macedonia. Per jayijp nnaxa'ñich ma miich ajcxy mgajp. E co anajty ndzooñich Macedonia, jadüg'oc nñicxa'ñich ma miich ajcxy. E jadu'n jëbi miich ajcxy xytüjijphuohuñybybich co anajty nñicxyich jim Judea. ¹⁷ ¿Nej mdiyy, co ñich aametz jotmetz nduñich co ca' ti nñicxyich ma miich ajcxy nej anajty ti nmñina'ñich? ¿Nej mdiyy, nhuinma'ñ mñididyich jadu'n nej naaxhuiñybyb huidibi minamb co ñicxa'ñ, e chi ca' ñicxni? ¹⁸ Per Dios jëbi tiy'ajt yegipy co je ayuc tiibi nyajnimaaaygixy, nguydunipyich yi'. ñich n'ayuc janch yi'. ¹⁹ ñich mñid Silvano etz Timoteo ngapxhuäcxixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumybyb je' y'ayuc, tudägy je' ycapxy. ²⁰ Tüg'óciy je ayuc huidibi Dios yejc jecy'ajty mñid ñich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nmñinaanim. “Amén, jadu'n jada,” com Cristo Jesús ti cuydundäy Dios y'ayuc. ²¹ Com je' je' Dios huidibi xyajmibijcim Cristo, e Dios huidibi xyajmñid'ijtim Cristo. Jadu'n Dios ytuñ mñid ñich ajcxy etz nañ jadu'n mñid miich ajcxy. Je' je' Dios huidibi xyajmibijcim etz xypidaacim tügjijp ma yi' ytung. ²² Dios ti pidägy ma ajt njot nhuinma'ñ je tiy'ajt co nyajpaatim ma Cristo Jesús. Co Dios xy'adigiym xyjottigiym yi' yjihuñ ymic'ajt, chi tiy'ajt yecy co nyajpaatim ma Cristo Jesús.

²³ Dios jëbi tiy'ajt yegipy co mñid tudägy njot nhuinma'ñ nmñydacyich co ca' jadüg'oc nñicxyñich ma miich ajcxy mic'amy, jadu'n nej anajty nhuinma'ñ ti nbidägyich, mñid co ca' ndzocyich nicxy n'ojcixy huin jijp. ²⁴ Ca' nñicxa'ñich mic'amy ma miich ajcxy, com ca' adzip nyajmibigaangixy miich ajcxy huidibi copicy ajcxy mmibigipy. Miich ajcxy tiydudägy ti mmibijccixy. Jëyi co nbubedaangixy jaydëbi ajcxy nigì jotcuyc'ajt mñid'adipy ma ajcxy mdzinaayin mjogy'ajtin.

2

¹ Paady ycixpi jadu'n nhuinma'ñ ti nbidägyich co ca' nñicxa'ñich mic'amy jadüg'oc ma miich ajcxy, mñid co miich ajcxy nyajtajipy nyajmayipy co ngapxhuijyich mñid ajcxy mbocy ycixpi. ² Com pen ñich miich anajty ajcxy nyajtajpy nyajmaayb, ¿pin jada' ñich xyajjotcugihuibich? Pues miich ajcxy huidibi tajp mayb, miich ajcxy xyajjotcugihuibich. ³ Paady ycixpi ti nnijayiygixy jadu'n co ca' nñicxa'ñich mic'amy ma miich ajcxy, com ca' jadu'n ndzocyich co ñich miich ajcxy nyajtajipy nyajmayipy. Jac'oy co ñich miich ajcxy nyajjotcugihuiy. Com nejhuñybybich co ñich jotcuyc nayjihuñybybich mñid miich ajcxy ycixpi. Nañ jadu'n miich ajcxy jotcuyc mnayjihuñybyb co mnejhuñybyb co ti njotcugihuibich mñid miich ajcxy ycixpi. ⁴ Co ti njayich je necy huidibi ti nguexyich ma miich ajcxy, ooy mij jotmay ti njihuñyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuñybyb co mijcajee ndzojccixy njihuñybyb.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ñich tügpajc tajin mayim jihuñybybich. Nañ jadu'n miich ajcxy nidüg'óciy mjihuñybyb tajin mayin. Jadu'n nmñina'ñich co huenjaty tajin mayin miich ajcxy mjihuñybyb, jigix ca' anaxy ajcxy nyajtajip nyajmayip. ⁶ Yajhuäcxijp je tzaachyp huidibi miich ajcxy mooyb je migüg huidibi ti ytundigooy. Ti mñid jadu'ñi. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuiy. Ca' yjeczy co je migüg anaxy oy jihuñybyb tajin mayin. ⁸ Paady ycixp may'ajt nbijctzooyich

ma miich ajcxy co myajnguëxigipy ajcxy co mdzocy mjihuïy ajcxy je migüg huidibi ti ytundigooy. ⁹ Ich miich ajcxy ti nijayiy jayhuin müd je migüg ycixpi huidibi ti ytundigooy, jigix jëbi nnejhuïyich, pen mguydumyb miich ajcxy ich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy mhuinmecxi yi' ypocy, nañ jadu'n nhuinmeecxi ich yi' nej ytundigooy. Com ich co nhuinmeecxyich tüg nmigügich nej ti ytundigooy, jadu'n nduñich müd miich ajcxy ycixpi, com Cristo y'ijxyp ñejhuïyb tüg'óciy tijaty nduunim. ¹¹ Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhuïyim yajxon nej Satanás mañ'ajt müdity.

Pablo ca'p anajty yjotcujc'aty jim Troas

¹² Co nja'tyich ma je cajp huidibi xijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³ Per ca' anajty jotcujc nayjihuiyijich. Com ca' nminaybatich je ich ajt nmigüg Tito jim Troas. Paady ycixp ngapxycijxyich müd je mibijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jäygidaacin ma Dios co müd Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojiy xi ya. ¹⁵ Co ngapxhuäcxich Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxich Cristo y'ayuc ma yi jäy ajcxy huidibi ajcxy y'alma tigoyaamb. Jadu'n ich ajcxy ndung nipaady nej jihuiy nboomjójcixich jabom jabom ma Dios yhuinduu müd Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma ñidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity ich ajcxy ndung. ¹⁷ Ca' ich ajcxy nduñ jadu'n nej jacnaagity ajcxy huidibi Dios y'ayuc mihuidijtip meenigixy. Cixyjot huinijot ich jäy nyaj'ixpijccixy Dios y'ayuc ytiy'ajt. Com Dios ti xyajñibicyich co yi' y'ayuc ngapxhuäcxich. Müd co nyajpaatim ma Cristo, paady ycixp nduunim jadu'n nej jihuiy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmina'ñich ¿nej m'ijxcixy nej jihuiy huinjemy nyajtzondäga'ñich ayuc co ndzachnaymayáanigixyich ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy ma miich ajcxy, jadu'n nej nijëjity jäy ytungixy? ² Ca' ich ajcxy ndiy'ajt necy ycopicyity. Com jëbi yi mayjäy ajcxy tiy'ajt pigipy ma miich ajcxy mdzinaayin mjugy'ajtin co tudägy ti nyaj'ixpicxyich miich ajcxy Dios ytiy'ajt. Jadu'n miich ajcxy nipaady nej ich ajcxy ndiy'ajt necy yjaayity ma ich ajcxy njot nhuinma'ñ. E jadu'n jäy ajcxy ijxcabipy etz huinjihuïhuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ müd je ayuc huidibi ti ngapxhuäcxich ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi ich miich ajcxy ti nyaj'ijxcixy ti nyajñimaaygixy. Miich ajcxy ca' jadu'n ocpaatni nej tüg tiy'ajt necy huidibi jäy ti jay müd tinta. Nañ jadu'n ni ca' yjëjity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypi yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhuïybich tiydudägy co janch tiy'ajt nej nmina'ñich co Cristo ti xyajñibicyich jada tung müd Dios ycixpi. ⁵ Ca'p ich ajcxy jëbi ci'm madägy ma Dios ytung. Tüg'óciy mic'ajt

etz tiy'ajt jiiby nbáatcixyich ma Dios, huidibi mïd jëbi ndúungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma ïch ajt jemybi ayuc tiy'ajt, huidibi mïd xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés yjayhui'm jecy'ajty. Mïd je Moisés y'ayuc huidibi jaybety ijtp, Dios xymooyim je o'cin. Mïd je jemybi ayuc tiy'ajt huidibi je Espíritu Santo yejcpy, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuiñyijp mic y'adicxy mïd Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuiñyijp, co anajty ooy mic chach'adixy. E jada Dios y'oy'ajtin huidibi Moisés ymïd, ca' jecy y'ijty. Hue' je' tigooyñip anajty oñydägy'amy. Per pen Dios yaj'ijxip anajty yi' y'oy'ajtin co Moisés moy je jäy ajcxy je Dios ycötujcin huidibi ane'm yi' o'cin, nigi mi'idipy Dios y'oy'ajtin je jemybi ayuc tiy'ajt huidibi je Espíritu Santo xymooyim. ⁹ Pen mij anajty oy'ajtin mïdity je cötujcin huidibi tuuñ co y'ane'my ma ïch ajt nbocy n'o'cin. Nigi mij'oy'ajtin mïdity Dios y'ayuc ytiy'ajt je jemybi huidibi minaamb co Dios jëbi xyaj'ahuimbijtim tudägy. ¹⁰ Jëbi nmïnaanım co je jécyp cötujcin y'oy'ajtin ca' yi' ytimytiijty co nyajquipxyihuaanim mïd je jac'oybi oy'ajtin huidibi Dios y'ayuc ytiy'ajt jemybi ymïd. ¹¹ Com pen ymïd oy'ajtin je cötujcin huidibi ymic'ajt ca' y'ida'ñ huinixi huinitiempo, nigi oy'ajtin mïdity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Mïd co njijp'ijxim je oy'ajtin huidibi Dios xymöhuaanim mïd je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduunim nej Moisés idich jecy'ajty co anajty mïdity yhuiñyijp huingobe'nïy, jigix ca'ydi Israel jäy ajcxy ixxy nej je' anajty ytigoy je Dios y'oy'ajtin huidibi anajty quëxëcp ma je' yhuiñyijpin. ¹⁴ Per yi' Israel jäy jecy'ajty ca' ajcxy yajxon huinjihuïy ti anajty Dios ytumyb mïd Moisés, ixti chambaadni yi' Israel jäy ajcxy ca' yajxon huinjihuïygixy co ajcxy capxcixy je ayuc huidibi Moisés yjayhui'm. Jadu'n nipaady nejjiuïy Moisés chambaadni y'ityñi huingobe'nïy. Co ajcxy mibigipy je Cristo, huin'it ajcxy huinjihuïhuipy, e jadu'n je' paadipy nej jihuïy Moisés ti ñayhuingobe'ndüdyi. Co yi' Israel jäy ajcxy mibijccixipy Cristo, e ijxip ajcxy Dios y'oy'ajtin, huin'itni ajcxy huinjihuïhuipy Dios y'ayuc ytiy'ajt je jécyp. ¹⁵ Ixti chambaadni co yi' Israel jäy ajcxy capxcixy je migooxpi libro huidibi Moisés yjayhui'm, ca' ajcxy huinjihuïyi yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty jothuimbijtp, e mibicy ïch ajt nHuindzin Jesucristo, oyñyñip yi' yhuinma'ñ, e yhuinjihuïhuipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymïd. E ma Dios yjihui'ñ ymic'ajt yajpaady, Dios yi' yi' jadu'mbi jäy ajcxy yajnihuätzictutp ma yi' Dios ycötujcin je jécyp. ¹⁸ Paady ycixp tüg'óciy ïch ajt jadu'n nipaady nej tüg ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej jihuïy n'ijtim huingobe'nïy. E nañ jadu'n ïch ajt njacyujcpejtim n'oy'ajtin, jaydëbi nguipxyjatytyim mïd Cristo. Com jabom jabom ïch ajt nigi nbaatim n'oy'ajtin ma Cristo. Jada je' huidibi je Dios yjihui'ñ ymic'ajt ytumyb ma ajt njot nhuinma'ñ. E ïch ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajñibicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcïyich. ² Per ooy ti njijpcodijyigixyich ti njijpcogapxiiygixyich yi' jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöyduuni. Ca' ïch ajcxy ti nduñich mïd jibic-huinma'ñ. Nañ jadu'n ni ca' nyajtigäjtzcixich Dios y'ayuc. Hue' janchtiy ngapxpich ajcxy huidibi janchip. Jadu'n nyaj'ixpijccixyich yi' jäy ajcxy, jaydëbi ajcxy jotcuje ñayjiuïyigixy ma

Dios yhuinduu. ³ Yi jäy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jëbi ajcxy y'alma nidzögipy. Jada je' je ayuc huidibi ngapxhuäcxixpich. Pinjaty ajcxy y'alma nidzögip yhuinjihuüyb ajcxy jada ayuc. ⁴ Yi' ajcxy huidibi y'alma tigoyaanip ca' mibijccixy Dios y'ayuc, com Satanás huidibi ane'mb ya naaxhuiñ ti yajmädyii ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'ciy yaj'ixy, tú'ciy mic'ajt müidity, nej Dios yaj'ixy nej Dios mic'ajt müidity. E Cristo y'ayuc jadu'n nipaady nej tüg mijticxin huidibi Satanás ti ahuijztucy ca'ydí yticxy ma je' ajcxy. ⁵ Co ñich ajcxy ayuc ngapxhuäcxyich, ca' ñich ajcxy ngapxhuäcxy ngi'm'ayuc ngi'mdiy'ajt. Hue' ñich ajcxy ngapxhuäcxyp Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxyich ajcxy je tiy'ajt co ñich ajcxy jadu'n naydijyigixyich nej jihuüy miich ajcxy xytumbi'adyii müid Cristo ycixpi. ⁶ Je Dios huidibi jecy'ajty ane'm co huen tiicxin ji'aty huidibi codicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tiicxin nmüid'ajtim ma ajt njot nhuinma'ñ, jigix jëbi n'ijxim je Dios y'oy'ajtin huidibi quëxícip ma Jesucristo yhuinñyijp.

Je jugy'ajtin co nmibijcim

⁷ Je Dios y'oy'ajtin oybi nmüid'ajtim ma ajt njot nhuinma'ñ, ñich ajt ca' ni ti mic'ajt nmüid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma ñich ajt, tim jadu'n nej jäy ajcxy pidaaccixy pi'cmeëñ ma pi'c'idzimboch. ⁸ Oy ñich ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich müid je tzaachypi ayo'n ycixpi, per ca' nhuinma'ñyidigóoygixyich. ⁹ Oy ñich ooy nmidzip xy'ixhuidityich xypahuidityich, per Dios ca' xy'ixmachich. Canaag'oc ñich nmidzip ti xycujy ti xyjibipyich. Per ca' ñich njugy'ajtin ti ytigooy. ¹⁰ Hueñyama'amyity nhuidityich ajcxy nmüidich je tzaach'au ma nninícxich, ma jäy ajcxy ti xychaachytúungixich. Je' je' je iixpejt co nhuidityich o'cin jipp'am, tim jadu'n nej Jesús anajty huidity o'cin jipp'am. Ngöbijcypich jada tzaachypi, jigix tüg'óciy jäy ajcxy nejhuñhuip co Jesús xypubejtpich xypudigüybich. ¹¹ Nami jacjugy'ajtnich ajcxy, o'cjipp'am ñich ajcxy nhuidijtcixy jabom jabom müid Jesús ycixpi, jigix jëbi tüg'óciy jäy ajcxy nejhuñhuipy co Jesús xypubejtcixyp xypudigüygixyp. ¹² Jadu'n ndzinäyich o'cjipp'am, jigix miich ajcxy müid'adip jugy'ajtin huidibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxpídzimybich nej ti nmibicyich." Tim jadu'n nej Dios ñecy ymina'ñ, nañ tim jadu'n ñich ajcxy yminaangixy co nmibijccixyich Dios, e paady ngapxpídzimgixyich nej nmibijccixyich. ¹⁴ Com nejhuñyim jadu'n nej Dios jajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc müid Dios ymic'ajt co anajty n'o'cim. E quipxyi müid miich ajcxy xyajnicximip ma Dios yhuinduu. ¹⁵ Tüg'óciy tzaachypi huidibi nminajxypich nyajnajxypich, hue' nminaxyich nyajnaxyich müid miich ajcxy m'oy'ajtin ycixpi. E co anajty Dios jactuñ may'ajtin müid jacjadyii mayjäy ajcxy, nañ jadu'n mayjäy yajnájxcixipy jäygidaacin ma Dios, jigix jëbi mayjäy ñbáatcixipy capxpáatcixipy Dios.

¹⁶ Paady ycixpi ni mina xii, ñich ajcxy ngajotmetzcíhuaangixy. Oy ñich ajcxy nninícx yjaccöminajc'idich jabom jabom, per ñich ajcxy njot nhuinma'ñ nigi mic'ajt paady jabom jabom. ¹⁷ Je tzaachypi je ayo'n huidibi nminajxim nyajnajxim ya naaxhuiñ, ca' yi' ytimytiijity. Cixip naxip yi'. E müid co nminajxim nyajnajxim tzaachypi ayo'n, huin'it nbaatim oy'ajtin nigi ymijity y'oyity huidibi ca' ycixipy ñaxipy ni mina. ¹⁸ Ca' huaad ñich ajt nhuinma'ñ nbidaacim ma huidijaty cixamb tigoyamb. Tüg'óciy tijaty yaj'ijxp yajhuindicxp ya naaxhuiñ, cixip tigoyip yi'. Per huidijaty ca' yaj'ixy yajhuindicxy, idíp yi', ca' ycixipy ytigoyipy nimina.

5

¹ Com nnejhuüiyim co n'o'cim, naaxnïc x ajt huidibi nmïd'ajtim ya naaxhuiñ cixamb tigoyamb yi'. Dios ymïd ni'ixi' jii by tzejpjoty huingbi ninïc x huidibi yi' ti cojy huidibi xymöhuaanim. Je ninïc x huidibi xymöhuaanim jadu'n nipaady ma ajt n'alma nej tüg tijc huidibi tinaayb huinixi huinïtiempo. Tüg tijc huidibi Dios ti cojy, ca' nan huidibi jäy ajcxy ti cojcixy. ² Janch tiy'ajt co ca' ooy jotcuje ndzinaayim ya naaxhuiñ mïd ajt nninïc x. Ooy njijp'ixim mina nbadaanim ajt je nninïc x huidibi nmïd'adaanim jii by tzejpjoty. ³ Je' nninïc x xyüdzim tim jadu'n nej co tüg jemyhuit nyajtigüiyim, ca'ydi n'ijtim niñuadz. ⁴ Nami njactzinaayim ya naaxhuiñ mïd ajt nninïc x, ca' ooy jotcuje nayjihuiiyim. Ooy xyajtajim xyajmayim je tzaachypi ayo'n huidibi nmïnajxim nyajnajxim. Ca' nan co ca' ndzojcm ajt nninïc x, o co nyajtigoyaanim ajt nninïc x. Hue' ndzojcm co nmïd'ajtim jemybi jugy'ajtin jemybi ninïc x jigix co ajt njugy'ajtin huidibi cixamb tigoyamb, ahuimbidi y' jemybi jugy'ajtin huidibi ca' ycixipy ytigoyipy. ⁵ Dios yi' ti yaj'oyiy je jugy'ajtin huidibi nmïd'ajtim cham, jigix jëbi nmïd'ajtim huingbi jugy'ajtin huidibi ca' ycixipy ytigoyipy ni mina. Dios ti xymoyim je Espíritu Santo je' je' tiy'ajt ma ich ajtin co nbadaanim jemybi jugy'ajt jemybi ninïc x.

⁶ Jabom jabom ich ajt jotcuje naybidaacim. Nejhuüiyim co nami n'jactzinaayim mïd ajt nninïc x, ca' nmïd'ajtim jemybi ninïc x, ca' nyajpaatim ma ajt nHuindzin Jesús chinäy. ⁷ Je' nninïc x xyüdzim tim jadu'n nej co tug jemyhuit nyajtigüiyim, ca'ydi n'ijtim niñuadz. ⁸ Jotcuje etz jotmic nayjihuiiyim. Nigi jotcuje ixipy nayjihuiiyim, e ooy njatzojcm co mic'amy ixipy n'ijxmajtzim jada ninïc x, jigix nicxy ndzinaydacpijcm ma ajt nHuindzin Jesús chinäy. ⁹ Paady ycixp jadu'n njacjugy'ajtim njactzinaayim jigix jëbi ajt nHuindzin Jesús jäygädägiy ajt ndzinaayin. Ca' ñejity pen njactzinaayim ixipy mïd ajt nninïc x, o pen tzoj n'ijxmajtzim ajt nninïc x ixipy, e nicxim ma Jesús yajpaady. ¹⁰ Nidüg'óciy ich ajt nayguëxigaanim ma Cristo ytiydundac, e jii by nidüg nidüg paadip hui di anajty nipidziimip jadu'n nej anajty ti chinäy, pen oy, o ca' y'oyity.

Je ayuc tiy'ajt huidibi nicy'ajt cidägy'ajt mïd

¹¹ Com nejhuüiyim co copicy nhuindzigüiyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuüiyb co tudägy ich njot nhuinma'ñich. E nañ jadu'n ndzocyich co miich ajcxy mnejhuüiyigixipy co tudägy ich njot nhuinma'ñich. ¹² Ca'p ich ajcxy yam naygapxpáatigixy jadüg'oc co ich ajcxy ooy n'oyjäyity, o co ich ajcxy ooy oy ndüngixyich. Hue' janchtiy lugar nyejcpyich, jaydëbi miich ajcxy xycapxadipyich etz jotcuje mnayjihuiiyigixipy mïd ich ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuiñyijp ooy oy yquëxigy, e ca' ajcxy tuñ cuendi pen je' mïd oyjot oyhuinma'ñ, o pen ca'. ¹³ Pen minamb jäy ajcxy co ich nlocity, huen xyajnájxcixyich loci mïd Dios ycixpi. Pen jäy minaangixp co oy huinma'ñ nmïdidyich, jëbi jadu'n ajcxy xyajnájxcixyich jadu'n nej oy huinma'ñ nmïdidyich mïd miich ajcxy m'oy'ajtin ycixpi. ¹⁴ Com Cristo ooy xychojcm xyjihuiiyim, paady ycixp njatytimycapxymidoohuim Cristo. Com nnejhuüiyim ajt nidüg'óciy tiydudägy co Cristo y'o'cy mïd ajt nbocy ycixpi, e paady ycixpi jadu'n nipaady nej jihuiy nidüg'óciy ich ajt ti n'o'cim quipxyi mïd Cristo. ¹⁵ Cristo o'c mïd tüg'óciy jäy ajcxy ycixpi, jigix co tüg'óciy jäy ajcxy huidibi jactzinaayb jacjugy'ajtp, ca' ajcxy yajtungixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy mïd Cristo ycixpi huidibi o'c mïd yi' ajcxy ypocy ycixpi, etz yjugypijcy jadüg'oc mïd yi' ajcxy ycixpi. ¹⁶ Mïd co ndzinaayim mïd Cristo ycixpi, paady ycixp ca' ndunim cuendi naaxhuiñyäy ajcxy nej ñayñigápxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxni xii tiempo, ca' ndunim cuendi nej naaxhuiñyäy ajcxy capxcixy miydaaccixy. ¹⁷ Com tigachjaty cham nhuinjihuiyich Cristo, paady ycixp

pinjaty yajpatp ma Cristo, jemyjot jemyhuinma'nñ je' ymüid'ajtnip, jadu'n nipaady nej jihuüy ti ma'xung'aty huinjemy. Je jot je huinma'nñ huidibi anajty ymüid co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'nñ ti y'ahuimbijttäy.

¹⁸ Tüg'óciy tijaty huidibi ya yajpatp, jilby chooñ ma Dios, Dios yaj'oyiyday. Müid huidijaty Cristo ytuun müid ñich ajt ycixpi, jotcuje n'ijtim müid Dios. E Dios xyajñibijcich co ngapxhuäcxyich Dios y'ayuc jadu'n nej jäy ajcxy jëbi ajcxy jotcuje y'ijtcixy müid Dios.

¹⁹ Jadu'n nmīnaanīm co Dios ymüid'ijtpy Cristo. E Dios tuun quipxyi müid Cristo co yi' yaj'oyiyy je tzip nej naaxhuiñyäjy ajcxy midzip'aty Dios. Dios ca' yajcomidohua'nñ jäy ajcxy ypocy huidibi mibijccixp Cristo, müid co Cristo ti yajpocyñihuächyī. E Dios ti xyajñibicyich co ngapxhuäcxyich yi' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcuje'ajtn ma Dios. ²⁰ Paady nhuidityich müid Cristo ycixpi ngapxhuäcxyich Cristo y'ayuc. Jadu'n huimbizimyb nej jihuüy miich ajcxy Dios xymīnucxtaaccixy müid ñich n'ayuc jigix mmibijccixipy Cristo y'ayuc. Paady ngodinäyich Cristo co nmīnucxtacypich miich ajcxy. Jothuimbijtcix nej mdundigooygixy müid Dios ycötujcin e Dios xyhuinmeecxip ajcxy mbocy, jigix jotcuje m'idipy ajcxy ma Dios. ²¹ Cristo ca' ma ytundigooy, per müid ajt nbocy ycixpi Dios yajnajx je Cristo jadu'n nej tüg pocyjäy. Jadu'n Dios ytuñ müid je Cristo, jigix co ñich ajt n'ijtim ma Cristo, nbaatim je tudägy'ajtn huidibi Dios chojcpy nmüid'ajtim.

6

¹ ñich ajcxy etz miich ajcxy quipxyi nduunim ma Dios ytung. Nmīnucxtacpyich miich ajcxy co mgöbigipy ajcxy je may'ajt je oy'ajt huidibi Dios ti tuñ müid miich ajcxy ycixpi, ca'ydi ñaadig'aty Dios ytung. ² Com jadu'n jaybety y'ity ma Dios ñecy ma Dios jadu'n ymīna'nñ:

Co je xīi tiempo ti patni, ti ñich miich m'ayuc midoohui. Ti nbubety nbudig'iyich je huin'it xīi je huin'it tiempo co ti yhuaad'aty mīna jäy ajcxy y'alma ñīdzögipy. Jadachambi xīi tiempo ti yhuaad'ajtni mīna jëbi Dios xyñīdzocim ajt n'alma.

³ Ca' pīn n'adzipyich co nduñich ma Dios ytung, jigix ca'ydi pinjaty ymīna'nñ co ca' oy nduñich. ⁴ Nañ jadu'n ca' n'adziba'nñich miich ajcxy. Nigi ndzocyich co ñiguëxīgip tüg'ociy ñich ndung co nduñich müid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypī. Ooy nyajmayjatyich nhuit nducxy ngaayin n'uucin. Ooy ñich ndzīnaayin chipity. ⁵ Ti ajcxy xyci'atyich, ti ajcxy xypidāacixyich pujxtigoty. Ti jäy ajcxy xymibidīg'yich, e ooy ajcxy yhuaangixy yjihuüygixy. Ti tzaachypī nmīnaxy nyajnaxyich ma ndungich. Mīnaajity canaag xīi ca' nmāyich, e mīnaajity ayuu n'ityich. ⁶ Nyajniguëxīcpy ñich ajcxy co ñich ndūngixyich müid Dios ycixpi, müid co huädz jot huinma'nñ nmīdidyich ajcxy. Ca' ma jibicpi nmīdidyich ajcxy, müid co n'ixpījccixyich ma Dios ytiy'ajt. Ooy mecxtujcin nmīdidyich ajcxy. Ooy ñich ajcxy nba'ayooyich nmīgügtjicich. Dios yjihuüñ ymic'ajt yajpatp ma ñich ajcxy njot nhuinma'nñ. Ooy ñich miich ajcxy ndzojccixy njihuüygixy cixyot huinijot. ⁷ Nyajniguëxīgpy ñich ajcxy co ndūngixyich müid Dios ycixpi, müid co ngapxhuäcxcixyich Cristo y'ayuc ytiy'ajt tudägypī, e nañ müid co nmīdidyich ajcxy Dios yjihuüñ ymic'ajt, etz müid co nmīdidyich ajcxy ca'pxy Dios ytiy'ajt tudägypī. Müid yi' ytiy'ajt tudägyp nyajmibicyich jäy ajcxy, etz müid yi' ytiy'ajt naygohua'nñiyijich ma nmīdzipich. ⁸ Mīnaajity jay xycapxpāadygixyich; mīnaajity jäy ajcxy xyñigapxy xyñi'ojīggygixyich; mīnaajity jäy ymīnaangixy co oy nduñich; mīnaajity jäy ymīnaangixy co jibic nduñich; mīna ngamīna jäy xytījcixyich co n'īndāaccixyich; e mīnaajity jäy ymīnaangixy co tiy'ajt ngapxpich. ⁹ Mīnaajity jäy ymīnaangixy co ajcxy ca' xy'ixy'ajtigixyich; e mīnaajity jäy ymīnaangixy co ooy oy xy'ixy'ajtigixyich; e mīnaajity ayo'n jīp'am o'cin jīp'am nhuidījtcixyich. Per jactzīnaaybich ajcxy jadu'n. Ti je tungmīdipi xychaachytūngixyich, per ca' ñich ajcxy xyaj'o'cyi. ¹⁰ Ooy ñich ajcxy njatajcxixy

njamaaygixy, per jabom jabom jotcuje nayjihuüyigixyich. Ayoobi ich ajcxy ca' ti meen etz ca' ti pidägy nmüid'ájtcixyich. Per nañ jadu'n mayjäy oy'ajtin pada'ñ ma Dios müid ich ajcxy ndung ycixpi, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmüididyich ajcxy, per nmüidich ajcxy tüg'óciy huidibi nimina ca' ycixy ytigooy.

¹¹ Migügtijc ajcxy, huidibi yajpatp jim Corinto, ti nmüidcapxcixy ti nmüidmüidaaccixy ma jada necy müid tüg'óciy tudägy'ajt. Ti ngapxyich nmüydägyich nej njot nhuinma'ñ nmüididyich. ¹² Ca' ich n'ixmach nej ich müich ajcxy ndzojccixy njihuüyigixy cixyjot huinijot. ¹³ May'ajt nbijctzooybich ma müich ajcxy co xyajnimähuibich nej müich ajcxy mjot mhuinma'ñ müidity tim jadu'n nej ti nduunich müid müich ajcxy. Jadu'n may'ajt nbijctzooyich ma müich ajcxy nej ungdeedytjic ajcxy oy'amy y'ung ajcxy ihuujcixy capxhuujcixy.

Ich ajt je' ma Dios jugypi chinaayin

¹⁴ Müich ajcxy, ca' mdungmujccixy m'ayoomujccixy müid jäy ajcxy huidibi ca' mibijccixy Cristo. Com ca' huaad tudägyjäy ajcxy müiddzinaaygixy jäy ajcxy huidibi ca' tudägy huinma'ñ müidity. ¿Nej jëbi je huidibi tiy'ajtip ytügiy müid huidibi ca' ytiy'ajtity? ¿Nej jëbi pinjaty tiy'ajt müid müid'idipy pinjaty huidibi ca' tiy'ajt müidity? Je huidibi tiy'ajt müid jadu'n nipaady nej chinäy ma jin ytücxin. E je huidibi ca' tiy'ajt müidity ñipatp nej jihuüy chinäy agootztuuby. ¹⁵ ¿Nej jëbi Cristo etz Satanás ñay'ayuc-huinjihuüyigixy? ¿Nej jëbi tüg mibijcpi yajtügiy yhuinma'ñ müid tüg huidibi ca' ymibicy? ¹⁶ Ca' ni nej jëbi tzaadzech quipychech y'idipy ma Dios ytijc. Com yi' ajcxy huidibi tzaadzech ojadaajtp ca' ajcxy yhuinma'ñ ytügiy müid Dios ytiy'ajt. Je Dios juugypi ymüid chinaydac ma ich ajt njot nhuinma'ñ, paady ycixp jadu'n ich ajt nipaady nej Dios ytijc. Com jaybety y'ity ma Dios jadu'n ymina'ñ:

Ndzinaydac nbidägaamybich ma yi' ajcxy. Huididaamybich ma yi' ajcxy yajpaady. Yi' ajcxy ich xyDios'adaanip. E ich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymina'ñ:

Copicy co müich ajcxy m'ixmadzipy yi' jacjadyii jäy ajcxy, e tzinaaygix abicy. Ca' ajcxy mnijot'adipy je jibicpi, huin'it ich müich ajcxy ngöbigipyich.

¹⁸ Ich müich ajcxy xymüid'adipyich jadu'n nej jihuüy ich müich ajcxy xyTeedy'adyii. E jadu'n müich ajcxy m'idipy nej ich nmang n'anäg. Jadu'n je mijpi Dios ymina'ñ.

7

¹ Müich ajcxy huidibi ooy ndzocy njihuüyich, com Dios jadu'n ymina'ñ co tzinaydac pidäga'ñ ma ajt njot nhuinma'ñ, paady ycixp tzoc yajhuaatzim ajt njot nhuinma'ñ, etz ma ajt n'espíritu, e jadu'n Dios nhuindzigüym etz nyajmij'ajtim cixyjot huinijot.

Co ajcxy jothuimbijt ma Dios huidibi ajcxy jim Corinto

² Tungix may'ajt xycöbigipich müich ajcxy cixyjot huinijot. Ca' ich ajcxy ni pin ti nmüidundigóoygixyich, nañ jadu'n ca' ni pin ich ajcxy ti nyaj'ixpijccixyich jibic-huinma'ñ. Nañ jadu'n ni ca' ich ajcxy pin ti nhuin'ñich. ³ Ca' jadu'n nmüina'ñich müid co nyajpocycähua'ñich müich ajcxy. Com jadu'n jacjayjip ti muna'ñich co ooy ndzocy njihuüyich müich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴ Ooy ich müich ajcxy njot'amij'adyiijich. Ooy ich müich ajcxy ngömaaygixy. Ooy jotcuje nayjihuüyijich müid müich ajcxy ycixpi. Oy njayajpaadyich tzip agujc ayo'n agujc, per co njäymechich müich ajcxy, jotcuje nayjihuüyijich.

⁵ Nej ich ajcxy nja'ty ya Macedonia, ca' njotcuje'ájtcixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymidzip'ajtpich, etz nañ jadu'n tzigüybich jotjoty huinma'ñyoty. ⁶ Per Dios je huidibi yajjotcugüyb yajjotmüicpijcp pinjaty tajp mayb, yi' ti xyajjotcugüyich co Tito yja'ty ya ma ich nyajpaady co jim choñ ma

miich ajcxy. ⁷ Ca' nan ti njotcugiyich mïid tim jëyi co Tito ti xyñijadyich. Hue' ti njotcugiyich co yi' ti xyñimäyich jadu'n nej yi' jotcuje'ajtin ti paady ma miich ajcxy. Yi' ti xyajmïidmïydaagyich jadu'n nej miich ajcxy tajin mayin mjihuiyigixy mïid mbocy ycixpi. E nañ jadu'n nej mhuinmaaygixy nej nyajpaadyich. E mïid jada ayuc nigi ti njotcugiyich.

⁸ Hich ca' ndajy nmayich mïid co ich miich ajcxy ti nyajtajcixy ti nyajmaygixy mïid je necy huidibi ajcxy nyajniguejx. Oy anajty ti njajihuiyich jotmay co nnejhuiyich co miich ajcxy ooy mdajy may tüg xii mejtz xii mïid ich nnecy ycixpi. ⁹ Jadachambi ooy jotcuje nayjihuiyijich. Ca' nmïinaanim mïid je tajin je mayin ycixpi huidibi miich ajcxy anajty mïid jotcuje'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' ich ti ndundigooyich ma miich ajcxy co ajcxy njotmaymoy. ¹⁰ Com Dios yjäygidacpyi co jäy njothuimbijtcixy, mïid co taj may ñayjihuiyigixy mïid ypocy ycixpi. E co ajcxy yjothuimbijtcixy, huin'it ajcxy je y'alma nïdzöcïn paadipy. E ca' je' huaad nidajim nimaayim co ajcxy y'alma nïdzögy. Co jäy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy. ¹¹ Mïid je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdyidungixy mïid je pocy ycixpi. Ti xyajjotma'tcixy, e ti xy'adzigiigixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E mïid jada ycixpi ti miich ajcxy myajnigüexicixy, co ca' miich ajcxy ti pocy mmidity ma jadayaabi huinma'ñ. ¹² Co ich miich ajcxy jayhuin nijayiy, ca' nmïinaanim mïid je huidibi anajty ti yajmïidundigooy. Nijayiyich miich ajcxy, jigix jëbi mnejhuiyigixy je tiy'ajt nej Dios tzocy co nduunich mïid miich ajcxy m'oy'ajtin ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcuje'ajt, e nañ jadu'n ich ajcxy ti nbáatcixyich jotcuje'ajt mïid miich ajcxy ycixpi. Nañ jadu'n ooy ti njotcugiyich ajcxy mïid co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugiy mïid miich ajcxy ycixpi.

¹⁴ Co ti nmïimäyich Tito co njot'amij'adyiijich miich ajcxy, ca' ti tzo'ydu'n ti nbaadyich, co yi' oy ti xycó'ixiigixy. Nigi oy ti yhuimbizimy mïid co tüg'óciy ayuc huidibi ich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nnimiydacyich miich ajcxy mïid Tito co njot'amij'adyiijich miich ajcxy. ¹⁵ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiyigixy co yi' nejhuiy jadu'n nej miich ajcxy mmijottigooygixy ich n'ayuc, jadu'n nej mgapxymïidoohuaangixy. E nañ jadu'n co yi' ijxy nej miich ajcxy yi' mgöbijcy mïid tzig'iñ jihuiñ. ¹⁶ Ooy jotcuje nayjihuiyijich, ooy njot'amij'adyiijich miich ajcxy.

8

Ycüejticy mïid oyjot oyhuinma'ñ

¹ Jadügnax, miich ajcxy migügtijc, nyajnejhuihuaamybich nyajmïidmïydaagaamybich miich ajcxy, jadu'n nej Dios may'ajt oy'ajt tuñ mïid je mibijcpidijc ajcxy huidibi xii ya yajpatp Macedonia. ² Je mibijcpidijc huidibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcuje yajpatcixy. Nañ ayoobi ajcxy, per ti ajcxy may meen yajmujccixy, jadu'n nej jihuiy ajcxy ycomeenity. ³ Hich testigo co je migügtijc mïid yci'm tzojcïn meen yejccixy, nej jëbi ajcxy ymadaaccixy mïid meen, ixti anaxy ajcxy yejccixy. ⁴ Ooy xymïnucxtägyich ajcxy co n'a'ixihuibich ajcxy co jëbi ajcxy meen yajmujccixy huidibi mïid pubedaangixy jacjadyii je mibijcpidijc. ⁵ Nigi anaxy ajcxy ooy meen yajmujcy ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma ich ajcxy jadu'n nej Dios tzocy.

⁶ E chi jada' ñich ajcxy ooy nm̄nucxtacy Tito co huen n̄icxy jadüg'oc ma miich ajcxy. Huen n̄icxy yajcixy yajmay huidibi ti yajtzondägy ma miich ajcxy. Co huen je meen̄ yajmujctäy huidibi cixyjot huiniyot m̄id mbubedaangixy je mibijcpidijc ajcxy huidibi yajpatp jim Jerusalén. ⁷ Miich ajcxy n̄igi ooy mm̄adaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy m̄idity. Ooy myaj'ixpijccixy Dios ytiy'ajt. Ooy mm̄ijottigooygixy mguydunaangixy ñich n'ayuc. E nañ jadu'n ooy miich ajcxy xychojccixy xyjihuiygixyich. Nañ ooy ndzocyich co miich ajcxy n̄igi pubejtin myegipy ma je mibijcpidijc huidibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huidi jim Jerusalén. Hue' ndzocyich co miich ajcxy mnejhuñhuipy jadu'n nej yi jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jēbi nnejhuñhuibich pen janch tiy'ajt jadu'n co mdzojccixy mjihuiygixy yi jacjadyii mibijcpidijc. ⁹ Com miich ajcxy mnejhuñhuigixyp jadu'n nej ajt nHuindzin Jesucristo mijmay'ajt mij'oy'ajt tuñ m̄id ñich ajt ycixpi, jadu'n Jesús nipaady nej tüg mijcomeeñybi jiiby tzajpjoty, m̄id co yi' xychojccim xyjihuiyim mijcajee, chi yi' ixmajtzatay yi' y'oy'ajtin jiiby tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti m̄idity jiiby tzajpjoty, per jadachambi mbadaangixyp mij'oy'ajtin jiiby tzajpjoty.

¹⁰ M̄id miich ajcxy m'oy'ajtin ycixpi, ma jada necy nmooybich miich ajcxy ngapxhuijin jadu'n nej jēbi huaad mdungixy oyjāy'ajtin. Jac'oy co miich ajcxy myajcixipy je huidibi ajcxy myajtzondac jadōjimijt. Miich ajcxy jacjayijp ca'ydi jac ni pinjaty ti myajtzondaaccixy meen̄ yajmugii huidi m̄id mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydi jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meen̄ yajmujccix cixyjot huiniyot jadu'n nej ti myajtzondaaccixy ixti mabaad myajmaygixy je meen̄ yajmugii. Nidüg nidüg yejccix nej ajcxy ii m̄idity. ¹² Pinjaty y'ofrenda yejcp janch cixyjot huiniyot Dios ycōbijcip yi' je' y'ofrenda, jadu'n nej ii m̄idity. Dios ca' yi' pijctzoy huidibi ajt ca' nm̄idity.

¹³ Ca' nm̄ina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhui'migixy ayo'ndumb. ¹⁴ Hue' yajm̄ina'ñ co quipxyjaty mdzinaaygixy, ni pin cayajconaxipy e ni pin cayajmayjadipy. Jadachambi tiempo miich ajcxy mm̄idity ca'pxy je huidibi mnidzinaaygixip, ixti miich ajcxy conajxpi, paady ycixp jēbi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadipy, e jacjadyii migügtijc jēbi xypubéjtcixipy, e jadu'n yhuimb̄idzimipy co mnaybubéjtgixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ym̄ina'ñ: "Pinjaty anajty may'am̄y m̄id, ca' yajconajxy. E pinjaty anajty hueeni m̄id, ca' yajmayjajty."

Tito m̄id ymigügtijc ajcxy

¹⁶ Per nyajnajxypich jäygidaacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej ñich nm̄ijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co n̄icxipy jadüg'oc ma miich ajcxy, agujc jotcuyc cōbicy, com ti anajty jayijp yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito n̄icxip ma miich ajcxy m̄id ci'mdzojcin.

¹⁸ Quipxyi m̄id Tito nguexy ñich ajcxy yam tüg nm̄igüg huidibi ooy chachcapxpaadyity majaty mibijcpidijc, co ooy oy ytuñ capxhuäcx̄i Jesús y'ayuc ytiy'ajt nej huaad jäy ajcxy y'alma n̄idzoocin paady. ¹⁹ Ca' nan jēyi co je mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxy co jēbi yhuidity m̄id ñich ajcxy, e tunipy pubejtin m̄id je may'ajtin oy'ajtin huidibi ñich ajcxy ndumyibich m̄id je migügtijc ycixpi jim Jerusalén. Jadu'n nduuñich jaydēbi jäy ajcxy capxpaadip ajt nHuindzin Jesucristo. Etz nañ jadu'n jaydēbi ñiguēx̄igy co ñich ajcxy nbubeda'ñich ajt nm̄igügtijc cixyjot huiniyot.

²⁰ Ooy ngüend'atyich je meen̄ huidibi je mibijcpidijc ti yajmujccixy, jigix ca'ydi pin huaad

xyñigapxy xyñi'ojjyich, jadu'n nej ñich ajcxy meen nyajmújccixyich. ²¹ Jadu'n ñich ajcxy nhuinma'ñ nbidägy co tudägy ndunáangixyich ca' nan jëyi ma ajt nHuindzin Jesús yhuinduu, nañ jadu'n ma je mayjây ajcxy yhuinduu.

²² Nañ jadu'n nguejxypich mïid yi' ajcxy jadüg ajt nmigüg, je huidibi oy ti ytuuñ ma Dios ytung quipxyi mïid ñich ajcxy e nejhuiybich co tudägy ytuñ cixyjot huinijot. E yi' miich ajcxy ooy xyjot'amij'adyii, e oy ytuna'ñ mïid miich ajcxy ma Dios ytung. ²³ Pen jim pinjaty nidiy yajtiy je Tito, nimaaygix co ñich yi' nmigüg, e yi' mïid nduuñich ma Dios ytung ma miich ajcxy. E nañ jadu'n pen jim pinjaty nejhuihua'ñ pinjây ajcxy yi', yi jacjadyiibi huidibi ajcxy nicxp mïid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy mïid Cristo ymij'ajtin ycixpi. ²⁴ Paady ycixp miich ajcxy yi' mdzójccixipy mjihiygixipy je migügtijc ajcxy huidibi mimb mïid Tito, jigix jëbi je mibijcpidijc ma nidüg nidüg cajp ya Macedonia nejhuihiupy co miich ajcxy yi' mdzojccixy mjihiygixy je mibijcpidijc tiydudägy. E paady ycixp jëbi ñich jotcuyc nayjihuiyijich mïid miich ajcxy ycixpi.

9

Je cüejtin mïid je mibijcpidijc ajcxy ycixpi

¹ Nañ ca' yjaty ycopicyity co ñich miich ajcxy njacnijayíygixipy co je mibijcpidijc huidibi xii ya pubejtin tunaangixyp ma Dios yjây huidibi ajcxy jim Judea. ² Com nejhuiybich co miich ajcxy nañ jadu'n mbubedaangixy cixyjot huinijot Dios yjây huidibi ajcxy jim Judea. Paady ycixp jotcuyc ñich jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'ñ pidacy jidöjimijt co mbubedaangixy je mibijcpidijc huidibi jim Judea. E mïid co miich ajcxy jayijp mhuinma'ñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'ñ pidaaccixy co ypubedaangixy nañ jadu'n. ³ Paady nguejxypich Tito mïid jacjadyii migügtijc ma miich ajcxy, jaydëbi xypubéjtcixipy ma je meen yajmugii, jadu'n nej ti mbidaaccixy huinma'ñ. E ñich ca' ti tzo'ydu'n nbáadibich mïid miich ajcxy ycixpi ma jada pubejtin huidibi ajcxy mguexamyb jim Judea. Com ñich ti nnimäyich mayjây co miich ajcxy ni'ixi' m'ijtcixy mïid mbubejtin. ⁴ Ca' yjecyity co nijëjity mibijcpidijc huidibi tzinaayb ya Macedonia ñicxa'nip ajcxy mïid ñich co anajty nnicxyich jim ma miich ajcxy. E co anajty ñich ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuihuibich, com ti anajty ooy njot'amij'ajtigixy. Nañ jadu'n miich ajcxy tzo'ydu'n mjihihui. ⁵ Paady ycixp huinma'ñ nbidägyich co oy jadu'n co nijëjity migügtijc nicxy jayijp xycogapxyygixy, e huen xypubejtcixy ma yi meen yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy mïidity yi m'ofrenda, e jëbi jây ajcxy nejhuihuip co yi m'ofrenda ti myejccixy cixyjot huinijot, ca'ydi jây yminaangixy co ñich miich adzip ajcxy ti n'ane'mgixy co m'ofrenda nyajmújccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni ycosecha yajpidigy. E pinjaty mij niip, nañ jadu'n mij ycosecha yajpidigy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'ñ ti pidägy co yega'ñ. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuiyb pinjaty cixyjot huinijot y'ofrenda yejcp. ⁸ Dios jëbi may'ajt oy'ajt tunipy mïid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmïid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax ojjây'ajtin. ⁹ Jadu'n jaybety ymiñ ma Dios ñecy, ma jadu'n ymina'ñ:

Yi ojjâydiyc ajcxy, yi' ajcxy nimooyb ayoobitijc huidibi ajcxy yajmayjajtpy. Yi ojjâydiyc ajcxy co ojjây'ajtin tungixy, yejccixyp iixpejt oybi huidibi y'idipy huinixii.

¹⁰ Dios yejcpy je t̃im huiḁibi jāy ajcxy ñiipy, nañ jadu'n Dios yejcpy je j̃icxy p̃icy huiḁibi nidzinaayim nijugy'ajtim. E jadu'n co miich ajcxy oyjāy'ajtin mdungix mijcajee, je m'oyjāy'ajtin ajcxy ñipaadip nej jihuīy mgosecha myajp̃id̃ic̃ixy may'amy. ¹¹ E jadu'n miich ajcxy m̃id'adipy t̃üg'óciy jugy'ajtin comeñ'ajtin, jaydēbi m'ofrenda myejcc̃ixy mij'amy. E mayjāy ajcxy Dioscojuyip yajnaxipy ma Dios m̃id je m'ofrenda yc̃ixpi, co anajty nyecyich miich ajcxy m'ofrenda ma yī' ajcxy huiḁibi yajmayajtp. ¹² Co ñich ajt pubejtin nyejcim ma jacjadyii migügtijc, canan jēyi co nbubejtim m̃id tijaty yajmayajtc̃ixyp. Nañ jadu'n yī' ajcxy jēbi yajnax̃c̃ixy Dioscojuyip canaag'oc. ¹³ Yī' ajcxy capxp̃adamb Dios m̃id co je m'ofrenda huiḁibi ajcxy ti myejcc̃ixy, yī' je' tiy'ajtip co miich ajcxy mgapxym̃idoog̃ixy Cristo y'ayuc ytiy'ajt. Paady yc̃ixp may mibijcp̃id̃ic̃ ajcxy Dios ojadajtc̃ixipy e nañ jadu'n Dios ñbáatc̃ixipy capxp̃aatc̃ixipy m̃id je pubejtin huiḁibi miich ajcxy anajty myejcpy m̃id yī' ajcxy yc̃ixpi, etz nañ jadu'n m̃id jacjadyii mibijcp̃id̃ic̃ yc̃ixpi. ¹⁴ E ci'm yī' ajcxy Dios ojadadipy mibijctzohuipy m̃id miich ajcxy yc̃ixpi, etz xychójjc̃ixip xyjihuiỹg̃ixip ooy m̃id co Dios je mijpi conuuc̃xin ti yecy ma miich ajcxy. ¹⁵ Dioscojuyip yī Huindzin'ajtim Dios m̃id yī ym̃ijconuuc̃xin huiḁibi ti yecy ma ñich ajtin, ni pin canejhuiy nej jēbi yajnajtzc̃apxiy.

10

Pablo m̃idity cōtujcin co y'apóstol'adyii

¹ ñich Pablo nm̃igapxyp̃ich miich ajcxy m̃id yungnaxy njot nhuinma'ñ, jadu'n nej jihuīy Cristo miich ajcxy xym̃idm̃ydaacc̃ixy. Com Cristo yungnaxy jot huinma'ñ m̃idity. Nijējity miich ajcxy ym̃inaang̃ix co ooy yungnaxy nayb̃id̃äg̃yij̃ich co n'ityich m̃id miich ajcxy, e jadachambi co jigüēgy nyajpaadyich, hue' n'ahuimbityich ahua'ñ, ndunaamyb̃ich ti ndunaamyb̃ich. ² May'ajt nb̃ijctzooyb̃ich co anajty ñich miich ajcxy nic̃xy n'ijxc̃ixy, ca' jadu'n ndzocyich co cop̃icy n'ahua'ndäg̃ib̃ich m̃id nijējity miich ajcxy huiḁibi xyñihuambejtp̃ich, co nduñich etz ngapxyich ngi'mtzojcin tim jadu'n nej huenpin naaxhuiñjāy ytungixy etz ycapxc̃ixy m̃id yci'mtzojcin. Janch ni'ixi' n'ityich, co anajty j̃im nmechich, chi m̃id nnayhuindināhuīyb̃ich yī' ajcxy huiḁibi jadu'n xyñihuambejtp̃ich. ³ Janch tiy'ajt co ndzinaayich jadu'n nej naaxhuiñjāy chinaayg̃ixy. Per ca' ndziptuñich nej jāy ajcxy chiptungixy. ⁴ Ca' ñich ajt nyajtunim naaxhuiñjāy ym̃ic'ajt co nnaygohuaanim ma je jib̃ic̃pi huiḁibi xym̃idzip'ajtim. Hue' nyajtunim Dios ym̃ic'ajt, huiḁibi jēbi m̃id nm̃imadaacim t̃üg'óciy huiḁibi ca'oybi m̃id. ⁵ Jadu'n ñich ajcxy ca' nyajtzobadāang̃ixyich je ayuc tiy'ajt huiḁibi ca' yjanchity, etz je' ayuc pin amij ag̃ix nayb̃idaacip co Dios y'ayuc ytiy'ajt adujci. T̃üg'óciy naaxhuiñjāy y'ayuc ytiy'ajt nb̃id̃aacc̃ixyich ma Cristo, jigix t̃üg'óciy jāy ajcxy capxym̃idohuip Cristo. ⁶ Co anajty miich ajcxy mhuinma'ñyb̃idaacc̃ixy co huädz mgapxym̃idohuaang̃ixy t̃üg'óciy Cristo y'ayuc ytiy'ajt, pinjaty cacapxym̃idoy, hue' ni'ixi' n'ijtc̃ixich co yajmōhua'ñ castigo pinjaty cacapxym̃idoo.

⁷ Miich ajcxy yī' mdzachcuenditungixy jāy ajcxy nej yjāy'ajtc̃ixy. Pen j̃im pinjaty ñayjihuiỹii janch agujc jotcujc co Cristo yhuin'ixỹii m̃id ytung yc̃ixpi, huen huinjihuīỹg̃ixy jotjoty co Cristo ti xyhuin'ijxc̃ixyich nañ jadu'n m̃id yī' ytung yc̃ixpi. ⁸ ñich ca' ti tzo'ydu'n jihuīyich m̃id co ci'm nnaygōmayij̃ich hueeni m̃id co Jesucristo xymooyg̃ixyich ane'm̃in cōtujcin. Com ñich ajt nHuindzin Jesucristo ti xymōoyg̃ixyich jada cōtujcin, jigix ñich miich ajcxy nyajyeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquēx̃ig̃ipy jadu'n nej jihuīy n'adzig̃ihuaang̃ixy m̃id je necy huiḁibi nyajnig̃uejxyp̃ich miich ajcxy. ¹⁰ Ym̃inaang̃ixy co ñich nnecy ooy tzaachyaty chach chaach. E ym̃inaang̃ixy co ma jāy ajcxy yhuinduu yung naxy njāy'aty, e ngapxin nm̃ydaac̃inich ca' pin jāyg̃id̃ägy. ¹¹ Per yī jāy ajcxy huiḁibi jadu'n

minaangixp, copicy ajcxy nejhuñhuipy co jadu'n nej ñich ngapxin necyjoty co nijayñygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ixquipxim o nyajtügiyim müd yi' ajcxy ytung huidibi tzach naygömayaanip ci'm. Tzuu huinma'ñ locihuinma'ñ ajcxy ytungixyp, co pin jadu'n nay'ixquipxip naymidoguiplxip müd yci'm'ayuc yci'mhuinma'ñ huidi ii yajtpy ñejhuñyb.

¹³ Ca' ñich ci'm naygömawayb ma ycapadyii, huidibi ñich ajcxy ca' xypátcixyich. Dios ñich ajcxy xyajnejhuñybich nije' nije' it lugar ma yi' tzocy ndúngixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndúngixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ñich jayjip ti n'ityich ma miich ajcxy. Pues ñich tim jayjip ngapxhuäcx Dios y'ayuc ma miich ajcxy, e ca' jac ni pin. ¹⁵ Pen huingbi jäy je Dios ytung yajtzondaacip ma tüg cajp, pues ca' ñich huaad jim nduunich, jadu'n nej jihuñy ñich ti nyajtzondägyich je tung. Ca' jadu'n nduunich, hue' njipp'ixypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xñ ya n'ñhuäcxa'ñich ngapxhuäcxa'ñich Cristo y'ayuc ytiy'ajt ma je it lugar jactim jiguemjatypi ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopicyity ngömayim nyajmij'ajtim ajt nHuindzin Jesucristo, e ca' y'oyity co naygömawayim ci'm. ¹⁸ Com Dios ca' jäygidägy pinjaty ci'm naygömawayp. Hue' Dios yjäygidacyip pinjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp müd anñ

¹ Huaad co miich ajcxy ixypy xy'ocmímecxtujcich hueeni ñich nloci huinma'ñ huidibi ngapxaamybich. Oy ixypy ñejity mímecxtuccich. ² Ooy ndzocy ooy njihuñyich miich ajcxy. Dios ti xymöyich je tzojcin jihuñyin huidibi nmüdich müd miich ajcxy ycixpi. Ndzojcpich co cixyot huinijot miich ajcxy mmijpidaaccixy Cristo. Co miich ajcxy yajmij'adip Cristo cixyot huinijot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp müd tüg yëydijc. ³ Ndzigiñybich co huingbi jäy xyajhuinma'ñy digoyaangixy müd ixpicytije y'ayuc huidibi ca' ytiy'ajtity. E miich ajcxy m'ixmadzaangixy jadu'n nej cixyot huinijot ti mmijpidaaccixy Cristo. Tim jadu'n nipada'ñ miich ajcxy mjadaangixy nej yajty jecy'ajty je Eva co tza'ñ yhuin'ini. ⁴ Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej ñich ajcxy nyaj'ixpicyich. Etz nañ jadu'n miich ajcxy jotcuje mgöbijccixy huingbi espíritu, ca' yjëjity je Espíritu Santo huidibi ti mgöbijccixy jayjip'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjëjiñ huidibi ajcxy m'alma xyajnñdzoocip. Ca' y'ocjëjiñ huidibi ti mmidoogixy ma ñich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajtity co yi' huindzindijc ajcxy huidibi naydijigixp Jesús y'apóstol huidi jim ma miich ajcxy, co jac mic'ajt müd ajcxy etz yjacmüd ajcxy ixpijcin ma Dios ytiy'ajt, ca'ydi ñich. ⁶ Oy ñich jada' ca' njatyich nej yajxon ngápñibich, ca' ooy ngo'ayúcgich. Per ca' ñejity com yajxon njatyich nnejhuñyich Dios ytiy'ajt. E ti nyaj'ixcixy nyajnejhuñygixy co n'ixpícygich ma Dios ytiy'ajt müd je ayuc huidibi ngapxhuäcxich ma miich ajcxy etz je mijhuinma'ñ huidi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxyich Jesucristo y'ayuc ma miich ajcxy e ca' nbijctzooyich meñ müd ndungich ycixpi? Jadu'n nnayyajnajxich anajty nej tüg midumbi jigix miich ajcxy jac'oy jacjotcuje mdzinähuip. ⁸ Ti ngöbicyich meñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeñ nyajtuunich co nyaj'ixpijcyich miich ajcxy. ⁹ Co n'ijtyich müd miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayajtpyich anajty. Ca' n'adzijpyich ni pin. Yi' migügtije huidibi ajcxy tzoon Macedonia, yi' ajcxy xymooyich

huidibi anajty nyajmayjajtypich, paady ycixp ca' anajty meen nbijctzooyich ma miich ajcxy, ca' n'adzippich miich ajcxy. E jadu'n njactuna'ñich jadu'n nej nduunich miid miich ajcxy co n'ijtyich jim jadöjimijt. ¹⁰ Nejhuüybich co yjanchity co nmídidyich Cristo ytiy'ajt, nañ tim jadu'n nnejhuüyich co ci'm nbaadyich huidibi miidnay'ixyijich. E ca' pin ma tüg'óciy je Acaya naaxjot xycapíjcibich jada jotcuje'ajtin. ¹¹ ¿Na'amy co jadu'n nmína'ñich? ¿Je' co ñich miich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich miich ajcxy.

¹² Per njacyajtüyöyaamybich je ndungich huidibi ndumyich, e ca' meen nbijctzohua'ñich miid ñich ndung ycixpi jigix co yi' jacjadyii huindzindijc huidibi yaj'ixpijccixp ma miich ajcxy, ca' jëbi y'ñindaaccixy co yi' ajcxy tú'ciy ytungixy jadu'n nej ñich nduunich. ¹³ Yi' ajcxy ymínaangixy co Cristo ti yajnibíjcigixy co ajcxy yi' y'apóstol'adyii, e ca' yjanchity, nigoob ajcxy huin'ingixy yi' mibijcpidijc. Ñayajnáxigixy ci'm nej jihuüy Cristo y'apóstol'ájtigixy, e ca' yjanchity. ¹⁴ Nañ ni ca' oy nhuinmaayich co jadu'n idítzcixy, com nañ jadu'n je Satanás ñayajtigachyii ñayajnaxyii nej Dios y'ángel huidibi tiy'ajt miid, e ca' yjanchity. ¹⁵ Paady ycixp nmibijcpich co yi' jáy ajcxy huidibi tumb miid je mujcu' nañ jadu'n nayajnaxyii jadu'n nej jáy tudägypi, e ca' yjanchity. Per Dios chaachytunamyb ajcxy jadu'n nej ypadyii miid je jibicpi ycixpi huidibi ajcxy ytumyb.

Je tzaachypi je ayo'n huidibi Pablo yajtyp co y'ayuccapxhuäcxy

¹⁶ Jadüg'oc ñich miich ajcxy nnímaaygixy: Ni pin ycamína'nipy co ñich locijity. Per pen nijëjity jadu'n ymínaangixy, ca' ñejity. Miich ajcxy amído'o'íjtcix ñich n'ayuc, jigix jëbi naygömayijich ci'm. ¹⁷ Ca' ñich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jáy co naygömaya'ñiyijich ci'm. ¹⁸ Mayjáy ajcxy ooy ci'm chachnaygömayáanigixyp miid huidibi ti tungixy miid yci'm mic'ajt ya naaxhuiñ. Nañ jadu'n ñich nnaygömaya'ñiyijich ci'm. ¹⁹ Miich ajcxy mdzachcöbijccixyp loci jáy ajcxy y'ayuc, je' co mdzachnayajnaaxáanigixy jadu'n nej jihuüy ajcxy ooy mdzachcohuinma'ñity. ²⁰ Mgöbijcpy miich ajcxy co jáy ajcxy xytumbi'adiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹ Oy njatzo'ydu'njihuüyich co nmína'ñich co ca' jadu'n nmídidyich je jotmic'ajtin, jigix jëbi ñich miich ajcxy nduunich jibic, jadu'n nej yi' jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñiyijich ci'm. Ca' ñejity pen capxpich jadu'n nej tüg loci jáy. ²² Pen hebreojäy yi' ajcxy, hebreojäy ñich nañ jadu'n. ¿Conaax cogajp ajcxy Israel? ñich nañ jadu'n. ¿Abraham ajcxy ymij'ap'ajtpy ymijteedy'ajtpy? ñich nañ jadu'n. ²³ ¿Nej tumb ajcxy miid Cristo? Nigi nduñyich miid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jáy. Jac mic ti nduunich miid Cristo ca'ydi yi' ajcxy. Canaag'oc codungdijc xychaachytuuñich. Ti nyajc'atyich miid matz etz miid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jipp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmídpí xycí'ajtyich miid cochac iipx majmoxc mídaax ci'. ²⁵ Tugüg'oc xychaachytuuñich miid matz. Tügtecy ajcxy xychaagächich. Tugüg'oc je barco yquín mejy'agujc je huidibi ñich anajty nyajnicxiyb. Co je barco yquín tügtecy, chi tüg tzuum etz tüg xi' n'ijtyich ma je mejy anajty ooy ypidígy. ²⁶ Ooy viaje nduunich canaag'oc, e o'cjipp'am n'ijtyich ma mājñigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi' judíojäy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyoty. E nañ ti ayo'n nbaadyich miid jáy ajcxy huidibi naybidaacip ajcxy nej ñich ajt nmigüg,

e ca' anajty yjanchity. ²⁷ Minaajity ooy mic njihuüyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxinaxyich mïd yuu tidzibi. Janam jatzojc n'ayu'atyich. Minaajity ooy njihuüyich je tüchypï, etz nyajmayjatyich nhuit nducxyich.

²⁸ Mïd jada ycixpi etz mïd jac-huidijaty, nañ jadu'n jabom jabom ooy mic njihuüyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijējity mibijcpidijc yajpaady amutz ma ajcxy ymibijcin, nañ jadu'n ïch nayjihuiyijich amutz. Pen nijējity mibijcpidijc ypocytungixy, ïch ndzo'ydu'n njihuüybich etz jibic nayjihuiyijich mïd yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuüyijich. ³¹ Je Dios ïch ajt nHuindzin Jesucristo yTeedy, je huidibi huaad n'ojadajtim n'ïbaatim ngapxpaatim huinixi huinítiempo, yi' ñejhuüyb co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb mïd je rey huidibi yxi Aretas, ypidac soldados ajcxy ma jadyii mijtu' ycajptigiy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp mïd yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuüy

¹ Ni ti ycayajpaady ycayajganar'aty co ci'm ndzachnaygömaayim ndzachnayñigapxim ndzachnayñimiydaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiybich. ² N'ixy'ajtypich tüg yëdijc huidibi mibijcp Cristo. Cham majmactz jimajt ma Dios yajpättigiyii tzajpjoty ma je midugügpi tzajp. E ca' nejhuüyich pen hue' yajpättigiyi mïd ñinïcx o pen ca'. Dios tügpaic nejhuüyb. ³⁻⁴ Jadüg'oc nmïna'ñich co Dios ti yajpättigiy je yëdijc ma je oybi it. E ca' nnejhuüyich pen janch ti ypättigiy mïd ñinïcx o pen ca'. Dios tügpaic nejhuüyb. E jiiby ma je oybi it midoy capxy ayuc huidibi ca' huaad ni pin jäy capxy miydägy nimina. ⁵ Ooy ïch amij agix nayjihuihua'ñyijich mïd je jadu'mbi yëdijc jadu'n nej jëjin huidibi Dios yajpättigiy tzajpjoty. Per ca' ïch ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma ïch ndzinaayin. ⁶ Oy ixypy ïch ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypï. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich ñigi anaxy. Huaad jadu'n co ajcxy mïd miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuüyich jiiby tzajpjoty, ooy anajty chach y'oyity. Paady ycixpi Dios pidacy jadu'n nej jihuüy tüg apy ma ïch nninïcx, jigix ca'ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugüg'oc Dios ti nmibijctzooyich co huen xyajpidzimich je huidibi xyajtzaachiybich. ⁹ Per je Huindzin Jesús xyñimaayich: “Jëbi jadu'n co may'ajt ndunipich mïd miich ycixpi. Co pinjaty pumäy ñayjihuiyii, huin'it ñigi ñiguëxigiy ïch nmic'ajt.” Paady ycixpi njotcugiyich co pumäy nayjihuiyijich, jigix ñiguëxigipy Cristo ymic'ajt ma ïch ndzinaayin. ¹⁰ Paady ycixpi ooy njotcúcidyich co pumäy nayjihuiyijich, co jäy xyñigapxy xyñi'ojyich, co ti nyajmayjatyich, co jäy xy'ixhuidityich xypahuidityich, co tzaachypï nyajnaxyich mïd Cristo ycixpi. Co nayjihuiyijich pumäy, chi ñigi mic nayjihuiyijich mïd Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co ïch jadu'n ci'm naygapxpadyijich, tim jadu'n nipaady nej jihuüy ïch tüg loci jäy. Adzip miich ajcxy jadu'n xytuufich co copicy naygapxpadyijich ci'm. Hue' yjapaadyii

miich ixypy ajcxy xycömaaybich xycapxpatpich. Hich ca'p ich ti ndzoohuity. Oy ixypy ich ca' ti mic'ajt nmüdidyich, per jatytimy nigi mic'ajt nmüdidyich, ca'ydí yí huindzindijc huidibi ma miich ajcxy, huidibi ajcxy naydijip apóstol, e ca' yjanchity. ¹² Ma je tung huidibi nduunich müd mecxtujcín ma miich ajcxy, ti ooy ñiguëxigy müd canaag ixpejt, mijhuinma'ñ etz milagros, co ich janch Cristo xy'apóstol'adyiijich. ¹³ Ca' jadu'n ytiy'ajtity co mminaangixy co nigi oy ti nduunich ma yí jacjadyii mibijcpidijc ma jacjadyii cajp, ca'ydí jadu'n nej ti nduunich ma miich ajcxy. Pen ti ndundigooyich co ca' ti nbijctzooyich meen müd ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxcich ajcxy.

¹⁴ Jadachambi ni'ixi' n'ityich co nnicxa'ñich midugig'ocpi jim ma miich ajcxy. Ca' ti pubejtin nbijctzohua'ñich ma miich ajcxy müd ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydí co miich ajcxy xypubedipyich. Jadu'n ich nipaady müd miich ajcxy nej tög ungdeedy. Je ungdeedy ypubejtpy y'ung, e ca' nan je ung pubejtyp yteedy. ¹⁵ Hich jotcujc nyajtundähuibich ma miich ajcxy tög'óciy tijaty nmüdich, ixti ngi'mmic'ajtich tög'óciy nyajtunaamybich müd miich ajcxy ycixpi, jigix jëbi nbubedipyich miich ajcxy. Oy janiguëxigy co ich miich ajcxy njadzojccixy njajihuüygixy, e miich ajcxy ca' xychójccixyich xyjihüüygixyich.

¹⁶ Nijëjity miich ajcxy mminaangixy co janch tiy'ajt co ca' ti pubejtin ti nbijctzooyich ma miich ajcxy, nijëjity yminaangixy co janch nihuinma'ñ ti nyajcägixyich ma tög trampí müd anii. ¹⁷ ¿Nej ti ich miich ajcxy nhuin'ingix müd je migügtijc huidibi ajcxy nyajñiguejx? ¹⁸ Nbijctzoohuich may'ajt ma Tito co huen nicxy xycogapxüygixy jadüg'oc. E nyajpuguexüyich jadüg ajt nmigüg huidibi müd ñicxy quipxyi. ¿Nej ti miich ajcxy Tito xyhuin'ingixy? ¿Nej ca' yjanchity co ich etz Tito quipxyjaty ich ajcxy nhuinma'ñ nmüdity, e tú'ciy ndúngixyich?

¹⁹ Ca' yjeyity co miich ajcxy mhuinma'ñybidáaccixy co ich ajcxy ndzach-nayñigapxtüutigixy ma miich ajcxy. Ca' yjadu'nity. Ngápcixpich nmiydáaccixpich ma Dios yhuinduu je ayuc tiy'ajt huidibi Cristo xymóoygixich. E tög'óciy huidibi ndúngixpich, hue' ndúngixich jigix yeegip miich ajcxy mmibijcín. ²⁰ Com tzigüybich co anajty nicxy n'ijxcixyich miich ajcxy, ca' jeyity co nbadaamybich je tiy'ajt co miich ajcxy ca' mhuinma'ñymüdity jadu'n nej jëbi njäygidägyich yí mhuinma'ñ ajcxy. E miich ajcxy nañ jadu'n ca' mjäygidáaccixipy nej ich nhuinma'ñ müdidyich. Tzigüybich co miich jada' ajcxy mnaychiptünigixy, ca' mnay'ixáanigixy nidüg nidüg, mnaymijotmá'tigixy; mnayñi'ojüygixy, e mbiitzcapxcixy; co ooy amij agix mnayjihüüygixy, e ca' mnay'ayuc-huinjihüüygixy, ca' oy m'ijtcixy. ²¹ Tzigüybich co jadüg'oc nicxy n'ixyich miich ajcxy, chi ajt nDios xyajjihüüibich tzo'ydu'n müd miich ajcxy ycixpi, etz njihuüibich tajin mayin müd miich ajcxy mbocy ycixpi, e com ca'ni mjothuibijtcixy mjäydigooygixy je mjibic-huinma'ñ jadu'n nej mmigapxtigooygixy e mmidundigooygixy huingbi töxyjäydijc, etz jadu'n nej mmidundigooygixy migüg ytöxyijc, etz jadu'n nej jibic-huinma'ñ miich ajcxy mmüdity.

13

Ane'min capxhuijin etz capxpooxin huidibi cijxnip je necy

¹ Jada je' ymidugig'oc co ich miich ajcxy nicxy ngo'ixihuaangixyp. Pen miich ajcxy mxihuaangixyp tög migüg ma ich co ti ytundigooy müd Dios ytiy'ajt, hue' tzocy müd metz o tugüig testigos. ² Co je mimejtz'ocpi ich miich ajcxy oy ngo'ixiy, chi nnimaayich yí ajcxy huidibi ti ytundigooygixy anajty, e nañ jadu'n nnimaayich je huidibi jacpocytungixp co ich anajty jadüg'oc nicxy miich ajcxy n'ijxcixy, ca' nyajtuna'ñich mecxtujcín ma yí huidibi ajcxy pocytungixp. E cham co nyajpaadyich jigüegy ma

miich ajcxy, nnägapxpejtpyich ma jada necy co jadüg'oc nicxy n'ixa'ñich miich ajcxy, ca' nmimecxtuga'ñich yi' ajcxy huidibi pocytungixp. ³ E jadu'n miich ajcxy mmüid'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tög jäy huidibi ca' mic'ajt müdity. Hue' je' yajnigüëxigyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuüy ca' anajty mic'ajt müdity. Per jadachambi Jesucristo jugy'ajtp müd Dios ymic'ajt. Nañ tim jadu'n co n'ijtim müd Jesús, jadu'n yquëxigy nej jihuüy ca' mic'ajt nmüid'ajtim. Per co n'ida'ñich müd miich ajcxy, nmüid'adaanibich Dios ymic'ajt müd co nyajpaadyich ma Cristo.

⁵ Ci'm naydiy'ajtpijcigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihui'mybijccixy, pen müd ajcxy Cristo ma mjot mhuinma'ñ? Pen ca' yjadu'nity hue' anajty Cristo mmibijccixy nügixy cohuaic. ⁶ Per nijjp'ijxypich co miich ajcxy mnejhuühuipy co yjanchity co Cristo ti xyajñibicyich yi' ytung, e ca' n'ündägyich. ⁷ Dios nmibijctzooybich müd miich ajcxy ycixpi, jigix ca' ti jibic-huinma'ñ mdüngixipy. Canan co ñich ajcxy ndzachcömaybidzimmaangixyich, o co ñich ajcxy nigü nmüidity Dios ytiy'ajt ca'ydi jac ni pinjaty. Jadu'n ndüngixyich, jigix miich ajcxy mdunipy oybi. Ca' ñejity oy jadu'n yquëxigipy nej jihuüy ñich ajcxy ca' oy mij n'ixpücycigich. ⁸ Com ca' huaad ni ti nej ndunim huidibi ca' yjanchity huidibi ca' ytiy'ajtity. Hue' tzocy co tög'óciy huidibi ndunim, naybadib müd Dios ytiy'ajt. ⁹ Paady jotcuic ñich ajcxy co nyajpáatcixyich nej jihuüy ca' ñich ajcxy mic'ajt nmüidity, jigix miich ajcxy mic'ajt mmüid'adipy ma mmibijcin. Nmibijctzoohuaamybich ajcxy Dios müd miich ajcxy ycixpi, jigix ajcxy mmibijcin mi'ijtcixipy ca'pxy. ¹⁰ Jada necy ñich jayijp nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñich n'ane'min ma miich ajcxy. ñich ajt nHuindzin Jesucristo ti xymöyich mic'ajt, jigix jëbi ñich miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich müd miich ajcxy, huen Dios xypubéjtcixipy xypudigüygixipy. Mijottigooygix cuydunaangix tög'óciy Dios ytiy'ajt ma mdzinaayin. Jotcuic'ajtcix. Chinaaygix müd tú'ciy mjot mhuinma'ñ. Naymüid'ijtigixy agujc jotcuic. Huen ajcxy Dios xymüid'ijtcixy. Je Dios huidibi jotcuic'ajtin yejcp, e nañ jadu'n Dios xychojctáaygixipy xyjihuiydáaygixipy. ¹² Naygapxpóocxigix xic xon. ¹³ Tög'óciy Dios yjäy huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy müd miich ajcxy ycixpi. Huen Dios xychojccixy xyjihuiygixy. Huen Dios yjihuiñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycixyich. Amén.

GÁLATAS

Yi Necy Huidibi Pablo Yajnigüeix Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nmīnaanīm jāy ajcxy xyajñibijcich jada tung. Jesucristo etz Dios Teedy ajcxy ti xyajñibicyich jada tung. Je' je' je Dios huidibi yajjugypijc Jesucristo co y'o'cy. ² Hich etz tūg'óciy migügtijc ajcxy huidibi ya yajpatp ma ñich nyajnigüeixpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³ Nmibijctzooybich Dios Teedy etz ñich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴ Hich ajt nHuindzin Jesucristo ti nayyoxyii ti naydogyii ci'm anajty ma yi' o'cin mīd ñich ajt nbocy ycixpi. E jadu'n ti xyñihuaanīm ma je jāy ajcxy huidibi jibic huinma'ñ ymīd huidibi tzinaayb ajcxy ma jadachambi xii tiempo. Jadu'n Jesucristo tuñ mīd ñich ajt ycixpi, com ñich ajt nDios Teedy jadu'n tzojcp. ⁵ ¡Ooy y'oyity co Dios Teedy huen mij etz cōmay y'idipy huinixii huinitio! Jadu'n jada. Amén.

Ca'p ji huingbi tiy'ajt huidibi jāy y'alma yajñdzocp

⁶ Ooy ndzachhuinmaayich jadu'n nej tim tzojcy ti mijpyöyducixy je Huindzin Dios ytiy'ajt. Dios xyhuin'ijxcixy jigix jēbi mmibijccixy je oy'ajt je may'ajt huidibi Jesucristo ytuun mīd miich ajcxy ycixpi. E miich ajcxy ti mhuinma'ñ myajtigajtcixy, e ti mmibijccixy huingbi jāy ajcxy y'ayuc, jadu'n nej ca' jēbi m'alma nīdzoocin padaangixy. ⁷ Ca' nmīnaanīm co ji jadūgnax Dios ytiy'ajt. Hue' je'nijējity jāy ajcxy ti xyajhuinma'ñyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajñdzōgaani ajcxy m'alma. ⁸ Co ixypy ñich, o co ixypy nidüg ñich ndiscípulo, o co ixypy tūg ángel huidibi tzajpjoty tzomb capxhuäcx ixypy ma miich ajcxy ayuc tiy'ajt tigachjaty huidibi ca' ñaybadyii mīd je tiy'ajt huidibi nyaj'ixpijc ajcxy oga'n'aty, ca' mgöbījccixipy yijadu'mbi ayuc huidibi ajcxy xyajñidigoyaangixy xyajtūdigoyaangixy, Dios tzaachytunīb yi' ajcxy y'alma. ⁹ Ti jayijp nyajñimay, e cham jadūg'oc nīgapxpetyich, pen ji pinjaty capxhuäcx ma miich ajcxy tiy'ajt tigachyatypī, huidibi ca' ñaybadyii mīd je tiy'ajt je tiibi miich ajcxy m'ixpijccixy, copicy Dios chaachytunipy jada jāy mīd ypocy ycixpi huidibi xychachyajñidigooygixp xychachyajtūdigooygixp.

¹⁰ Co jadu'n nmīna'ñich, ¿nej mdijy co ndzocyich co jāy ajcxy xyjāygīdāgipy o co Dios xyjāygīdāgipy? ¿Nej ndzachyajjot'adaanich jāy ajcxy? Ca' huaad nduunīch huidibi jāy ajcxy chojcpy, yi' janchtiy ndumybich huidibi Dios chojcpy. Co ixypy nduunīch huidibi jāy ajcxy yjāygīdacpy, ca' ixypy nguyduunīch Cristo ytiy'ajt.

Nej Pablo oy paady je apóstol'at

¹¹ Paady ndzocyich migügtijc co mnejhuīhuip ajcxy jada co je Dios y'ayuc ytiy'ajt huidibi ngapxyhuäcxpich anajty ma miich ajcxy jadu'n nej jēbi ajcxy m'alma nīdzōgipy, ca' yi' ayuc'adyii tiy'ajt'adyii huidibi jāy ci'm ti cojcxty ti maacxcixy. ¹² Com je Dios y'ayuc ytiy'ajt huidibi nmīdich, ca' ti nbaadyich ma jāy ajcxy, nañ ca' nmīnaanīm jāy ajcxy ti xyaj'ixpiyich. Jesucristo ci'm ti xyajhuinjhuiyich jada tiy'ajt.

¹³ Com miich ajcxy mnejhuīygixp jadu'n nej jecy'ajty ñich ti ndzināyich, co ñich anajty nmijpidāgyich yi' judío jāy ajcxy ycostumbre. E mnejhuīygixp jadu'n nej jecy'ajty n'ixhuidijtyich nbahuidijtyich mictāgy je jāy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nīgi ñich anajty n'ixpīcyidyich ma yi' judío jāy ajcxy y'ixpijcin ca'ydi jac pinjaty judío jāy, ca'ydi jac pinjaty nmigügtijcich huidibi tūgnax yjimijt mīd ñich. Com ooy anajty nīgi ndzachmijpidāgyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atyñich co ndūnībich yi' ytung. Mīd co Dios ooy ti

xychocyich ti xyjihuiyich, paady xyhuooyich müd ytung ycixpi. ¹⁶ Dios xyajnejhuiyich yi y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy ca'pi yjudíoäyity ajcxy. Ca' pinjaty n'ixtaayich huidibi jëbi xyaj'ixpicxyich Dios ytiy'ajt, hue' Dios ci'm xyaj'ixpicxyich yi' ytiy'ajt. ¹⁷ Nañ jadu'n ni ca' nbättigüyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tüyi nnicxyich jim Arabia ñaaxjot. Co ñich jim hueeni n'ijtyich, chi nhuimbijtyich jim Damasco.

¹⁸ Cooni tugüig jimijt nhuäcxipxyich huin'itni nbättigüyich jim Jerusalén. Chi n'oyich ma Pedro anajty yajpaady, e chi jim nmüd'ijtyich jëyi majmocx xii. ¹⁹ E ca' nminaybaattich yi jacjadyii apóstoles. Jëyi ñich müd naybaati je Jacobo, je Huindzin Jesús y'uch. ²⁰ Je huidibi cham ñich müch ajcxy niyajjayyigixyp, tiy'ajt yi'. Y'ijxyp ñejhuiyb Dios co ca' n'indägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjäy ajcxy huidibi nanyöymujcip cajp cajp jim Judea naaxjot, ca' ajcxy anajty xy'ix'adyiijich huingíxy jipcíxy. ²³ Jëyi ajcxy nejhuiy anajty co jäy chachminaangixy: "Yi jäy huidibi anajty xychach'ixhuidijtim xychach-pahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyya-jcödigoyamyb." ²⁴ Co je mibijcpidijc oy jadu'n tiy'ajt nejhuiygixy, chi ajcxy yajnaxxy Dioscojuyip ma Dios müd ñich ycixpi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi müd Bernabé. Nañ jadu'n Tito xypanicxyich. ² Dios jadu'n ti xyajnejhuiyich co copicy nícxibich jadüg'oc jim Jerusalén. Chi jim nyajmüdmüydacyich nijëjity jäy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ñich ajcxy nxiicmujcy ngapxmujcy, ca'ydi ymayjäy'agujcity.) Nyajmüdmüydactaayich je Dios y'ayuc ytiy'ajt huidibi ngapxhuäcxypich ma yi jäy ajcxy ca'p yjudíoäyity. Jadu'n ngapxticxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadigi'aty ñich ndung huidibi jayijp ti nduunich etz huidibi njactunaamybich anajty. ³ Je jäy ajcxy huidibi nigohuajc'ajtp anajty je mibijcpidijc jim Jerusalén yjäygidac ajcxy ñich n'ayuc jadu'n nej ngapxticxyich, e nañ ni ca' ajcxy yminañ adzip co copicy yajtiy'ajttihiipy je Tito huidibi xypa'oyich jim, com griegojäy je' anajty, paady ca' yajtiy'ajtti y anajty. ⁴ Ca' ixypy pin huaam ycaminañ jim Jerusalén co Tito ca' yajtiy'ajtti, co ca' nijëjity mibijcpidijc ycatigüy ayüch ameech huidibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyijpcogapxiygixyich. Ca' ajcxy yjotcujcity co ngapxhuäcxyich co nmibijcim Jesucristo, e ca' copicy nguydunim judíoäy ycostumbre. Yi' ajcxy adzip xyajnihuidzaambich yi judíoäy ycostumbre, jadu'n nej jäy codoogüy ajcxy adzip ytuungixy ma yhuindzin ytung. ⁵ Ni catügjaxgy ajcxy xycamimadacyich, e ni xycayaj'amoñ ñich ajcxy, com hue' ndzocyich co huen Dios y'ayuc ytiy'ajt oybi ity huädz ma müch ajcxy ca' ma anii.

⁶ Yi apóstoles ajcxy huidibi Jesús ti yhuin'ixxigixy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuiyich. (Peni capxpaady ajcxy o peni ca' ycapxpaadyity, ca' nduunich cuendi. Com Dios ca' huin'ixpety jäy ajcxy tiyduñ.) ⁷ Co oy ajcxy nejhuiy co Dios ti xyquexyich ngapxhuäcxyich yi' y'ayuc ytiy'ajt ma yi jäy ajcxy huidijaty ca' yjudíoäyity, tim jadu'n nej ti quexy Pedro co capxhuäcxi yi' y'ayuc ma yi judíoäy ajcxy, ca' ñich yi' ajcxy anajty n'ayucich xyijpcogapxiyich, ooy ajcxy jäygidacy yi' n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuäcxy ma yi judíoäy ajcxy, nañ jadu'n ñich xyquejxich co yi' y'ayuc ngapxhuäcxibich ma yi jäy ajcxy ca'p yjudíoäyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuüy jadu'n nej anajty Dios may'ajt oy'ajt ti tuuñ müd ich, chi ajcxy xycöbijcyich agujc jotcuyc Bernabé etz ich. E chi ich ajcxy müd nay'ayuc-huinjihuüyi co jëbi ich etz Bernabé nicxibich ma yi ca'p yjudíoäyity ajcxy, etz jëbi yi Jacobo, Pedro etz Juan ajcxy ñicxcixy ma yi judíoäy ajcxy. ¹⁰ Jëyi ajcxy may'ajt pijctzoy ma ich etz Bernabé co jadu'n pa'ayo'n ndunipyich ma yi judíoäy ayoobitijc. E chi ich ngo'adzoy co ndunamybich jadu'n agujc jotcuyc.

Pablo ojy yi Pedro jim Antioquía

¹¹ E jadu'n anajty müd ti n'ocnay'ayuc-huinjihuüyibich ixti coon Pedro ycidacy jim Antioquía. Chi jim nnimaayich huinjijp co ti anajty jim Dios ytiy'ajt midundigooyi co puhuäctuatni je huidibi ca' yjudíoäyity, ca' y'ocmüdcaymujcni. ¹² Com co ca'ni anajty ymiñ jim Antioquía je judíoäy ajcxy huidibi anajty tzomb ma Jacobo jim Jerusalén, chi Pedro müdcaymujcni je jäy ajcxy ca'p judíoäyity. Co ajcxy ymiñ choon Jerusalén, chi Pedro oy puhuäctuatni je huidibi ca'p yjudíoäyity, ca' y'ocmüdcaymugaani anajty. Com Pedro tzigüyb anajty co ñi'ojihuüyb je judíoäy huidibi minamb co ooy ycopicyity yajtiy'ajttihuipy tüg'óciy jäy ajcxy huidibi mibijccixp Jesucristo. ¹³ Co Pedro jadu'n oy y'idich, chi je jacjadyi judíoäy ajcxy huidi anajty jimip nañ tim jadu'n oy y'idütcixy. Oy ajcxy janehuüy tiy'ajt, e huädz cuydungixy. Ixti Bernabé nañ jadu'n y'idich nej Pedro, com ca' anajty yjotmicity. ¹⁴ E co ich jadu'n oy n'ixyich co ca' ajcxy cuydungixy yaxxon Jesucristo ytiy'ajt, chi ich nnimaayich Pedro mayjäy'agujc: “Peni miich judíoäy, e ti m'ixmajtzní judíoäy ycostumbre co ti mibicy Jesucristo, e ti m'occuydumyb je huinma'ñ huidibi judíoäy ca' cuydungixy, ¿nej tijy cham co adzip mdzachminaandägy co yi' ajcxy huidibi ca'p yjudíoäyity, copicy cuydúngxipy judíoäy ycostumbre, huidijaty miich ti m'ixmajtzní?”

Yi judíoäy ajcxy quipxyjaty müd jacpinjaty

¹⁵ Jadu'n njacnimaayich Pedro: “Ich etz miich judíoäy ich ajt, huidibi ndaj'ajtim ndeedy'ajtim nañ judíoäy. E ca' ich ajt njadu'nity nej jäy ajcxy ca'pi yjudíoäyity, huidibi ca' cuydungixy Dios ycötujcin je jecyip huidibi Moisés yjayhui'm. ¹⁶ Miich Pedro ich ajt nnejhuüym co jäy ajcxy ca' jëbi Dios yajpocyñihuächyü müd tim jëyi co ajcxy cuydungixy Dios ycötujcin je jecyip huidibi Moisés yjayhui'm. Co yi jäy ajcxy mibijccixy Jesucristo, huin'it janchtiy Dios yajpocyñihuätzüyb ajcxy. Nañ tim jadu'n ich ajt, ti nmibijcim je Cristo jigix jëbi Dios xyajpocyñihuaatzim. E ca' jëbi huaad Dios xyajpocyñihuaatzim ajt müd tim jëyi co ti nguyduunim Dios ycötujcin je jecyip. Ca' ni tüg jäy huidijaty jëbi Dios yajpocynihuächyü, müd tim jëyi co cuyduuni Dios ycötujcin je jecyip.”

¹⁷ Co ajt nhuinma'ñ nbidaacim co nmibijcim Cristo jigix Dios jëbi xyajpocyñihuaatzim, huin'it je judíoäy yminaangixy co jibic-huinma'ñ nyajtuunim co ca' njaccuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judíoäy yminaangixy? Ca' yjadu'nity. Ca' jëbi huaad je Cristo xyajtundigooyim. ¹⁸ Co ixypy nmijpidaacim jadüg'oc Dios ycötujcin je jecyip, je huidibi ti n'ixmajtzm, jada ixypy ijxpejt'ajtp co ndundigooyim ma Cristo ytiy'ajt. ¹⁹ Jecy'ajty co nguyduunich anajty Dios ycötujcin je jecyip, huin'it ca' anajty nbaadyich tiy'ajt nej jëbi huaad Dios xyajpocyñihuaachich, e jadu'n nipaady nej jihuüy ti n'ögyich. Paady ycixpi ti n'ixmachich je jecyip cötujcin, e ti nmijpidägyich Jesucristo ytiy'ajt jigix jëbi njactzinäyich müd Dios ycixpi. ²⁰ Jadu'n nayjihüüyijich jadu'n nej jihuüy ti n'oc'o'cpich, jadu'n nej jihuüy ti ngrudzpetyich quipxy müd Cristo. Jadachambi ca' n'octzinaayñich müd ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ich njugy'ajtin. E jadu'n nej cham njactzinäyich müd ich nninix, jactzinaaybich müd Dios y'ung ycixpi, nmijpidacypich Dios y'ung. Dios y'ung ti xychocyich ti xyjihüüyich, e ti nayyoxyii

maydogyii ma yi o'cin miid ñich nbocy ycixpi. ²¹ Ca' nniyajtigoya'ñich je may'ajtin je oy'ajtin huidibi Dios ti tuuñ miid ñich ycixpi. Co ixypiy jëbi Dios xyajpocyñihuaatzim miid co ajt nguydunim Dios ycötujcin jëyi, huin'it ixypiy ti ñaadigi'aty je Cristo co y'o'cy miid ajt nbocy ycixpi.

3

Je ycötujcin huidibi Moisés yejc o je mibijcin

¹ Janch loci miich ajcxy migügtijc huidibi tzinaayb jim Gálatas naaxjot. Ti jäy ajcxy xyajhuinma'nydigooygixy miid jibic-huinma'ñ. Paady ycixp mdzach'ixmadzaangixy je Dios ytiy'ajt. ñich oy njacapxhuäcxyich ma miich ajcxy mhuinduu je tiy'ajt jadu'n nej Cristo yajcruudzpejti miid ñich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nminaanim co ti mguydungixy Dios ycötujcin je jecyip. ³ Co Dios oga'n yjihui'ñ xy'adigiyygixy xyjottigiyygixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñymooygixy. ¿Nej co cham miich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgi'mhuinma'ñ. ⁴ ¿Nej naadigigixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmájtzcixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiyygixy xyjottigiyygixy etz tuñ mijhuinma'ñ ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiyygixy xyjottigiyygixy etz tuñ mijhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuüy Dios yhuinmecxi ypocy, jigix jëbi y'ity tudägy ma Dios yhuinduu. ⁷ Jadu'n yjajty miid Abraham. Je' ymibijc Dios, e yajpocyñihuaatzi Dios, jëbi ñaydijyii tudägy jäy ma Dios yhuinduu. ⁸ Dios jecy'ajty yajnihuinmayy co yajpocyñihuaadza'ñ je jäy ajcxy huidibi ca' yjudíojäyity, jëbi ajcxy ñaydijyii tudägy jäy ma Dios yhuinduu, miid co ajcxy mijpidägipy je may'ajt huidibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yi' huidibi ca' yjudíojäyity ypaadipy ajcxy y'alma nïdzoocin, com jadu'n Dios yminañ: “Miid miich tüg m'ap m'oc may'ajt oy'ajt nduna'ñich miid naaxhuiñyäjy ajcxy ycixpi.” ⁹ Paady ycixpi jadu'n nej jäy ajcxy tüg'óciy pinjaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadu'n nej may'ajt tuun miid Abraham.

¹⁰ Dios chaachytunamy jäy ajcxy miid ypocy ycixpi, pinjaty huinma'ñ tzachpidacp co y'alma nïdzoocin padaangixy miid co cuydungixy Dios ycötujcin je jecyip. Com jadu'n jaybety ymiñ ma Dios ñecy: “Dios chaachytunamyb jäy ajcxy miid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydundäy jada cötujcin.”

¹¹ Jadachambi miid je ayuc huidibi ti nyajnijayiygixy ma jada necy, jëbi miich ajcxy mnejhuñhuip co ca' ni pin jäy jëbi Dios yajpocyñihuaächyii miid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n yminañ: “Yi jäy ajcxy pinjaty mibigip ñich n'ayuc, yi' ajcxy nyajpocyñihuaadzaamybich jëbi ajcxy y'alma paadip nïdzoocin.” ¹² Dios ca' jadu'n yminañ ma yi' ycötujcin huidibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' yminañ ma ycötujcin co jëbi xychaachytuunim miid ajt nbocy ycixpi. Com jadu'n ymiñ jaybety ma Dios ñecy: “Yi jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy.”

¹³ Cristo xyñihuaanim xyyajtzoocim ma anajty Dios xychaachytunaanim miid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: "Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiñbi tuñ." ¹⁴ Cristo o'c je' miid ñich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuaniiy Abraham jecy'ajty, co may'ajt tuna'ñ miid yi' jäy ajcxy ycixpi huidibi ca'p yjudíojäyity, etz nañ jadu'n may'ajt tuna'ñ miid ñich ajt ycixpi, jigix jëbi ñich ajt nbaatim je Dios yjihui'ñ co nmibijcim je Cristo.

Je cötujcin huidibi Moisés yejc etz huidibi Dios y'ahuaniiy

¹⁵ Migügtijc ajcxy, ngapxticxaamybich jadu'n nej Dios ti tuñ miid tüg iixpejt nej jäy ajcxy ytuñ. Co ixypiy tüg jäy necy yajcojy ma nigapxy jadu'n nej ypidägy yajhui'ma'ñ, e co yajcojtäy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tuna'ñ miid yi' ajcxy jëyi. Ca' nmīnaanīm Dios y'ayuc ymīna'ñ co Dios yaj'ahuaniiy Abraham co may'ajt tuna'ñ miid tüg'óciy yi' y'ap y'oc. Hue' je Dios y'ayuc ymīna'ñ co may'ajt tuna'ñ miid tüg'pajc yi' y'ap y'oc, je' je' je Cristo. ¹⁷ Dios ca' yi' nixigy yajxigy ytiy'ajt huidibi jayijp ymoy Abraham co yajnigüeexy ycötujcin yi' Moisés. Co Abraham y'o'cy, ti anajty ñajtnñicxiyñi mīdaax mīgo'px ja'īipxmajc jīmijt, chiini oy Dios möy Moisés yi' ycötujcin. Tīm jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'ma'ñ, nañ tīm jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'ñ miid naaxhuiñyjäy ajcxy ycixpi. ¹⁸ Dios y'ahuaniiy yi' ytiy'ajt ma Abraham jecy'ajty co may'ajt tuna'ñ miid yi' y'ap y'oc ycixpi etz miid tüg'óciy naaxhuiñyjäy ajcxy ycixpi. Co ixypiy jëbi jäy padaangixy y'alma ñīdzoocin miid huidibi ajcxy ytumyb co ajcxy cuyduuni Dios ycötujcin je jecyip, ca' ixypiy may'ajt ti tuñ co ti quexy je Cristo ya naaxhuiñ co jäy yajñihuädzip.

¹⁹ ¿Ti ycixpi Dios co moy Moisés je cötujcin huidibi ycojay? Hue' je' Dios moy jada cötujcin jigix jëbi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojay mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcin hue je' yajnigüeex Moisés miid ángeles ajcxy. E chi Moisés capxnajxy ma ymigügtijc ajcxy. ²⁰ Co Dios ti quexy yi' oybi y'ayuc ya naaxhuiñ miid y'ung, paady ycixpi Dios ca' tzocy co huingbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹ ¿Nej mdijy ca' ñaybadyii yi' Dios ycötujcin huidibi Moisés ycojay, miid je ayuc huidibi Dios yajnimay Abraham? Naybaatip ajcxy y'ayuc. Co ixypiy cayejcy Dios cötujcin ma jëbi jäy ajcxy y'alma ñīdzoocin padaangixy, huin'it ixypiy jëbi nbocyñihuaatzim co ixypiy nguyduunim yajxon jada cötujcin. ²² Ca' yjanchity co jëbi Dios xyajpocyñihuaatzim miid co tijaty nduunim. Com ma Dios y'ayuc ymiñ cojay co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc ymīna'ñ, jigix jëbi Dios yajpocyñihuäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'ñ.

²³ Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidooy jäy ajcxy ypocy. Jadu'n nej jihuiy jäy ixypiy ypujxtijc'iñaaygixy e ahuijxcixy mīna je juez ytiydunāanigixy. Jadu'n anajty n'ijtim jadu'n nej jihuiy nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp. ²⁴ Jadu'n anajty Dios cuend'aty yi' judíojäy anajty miid ycötujcin huidibi Moisés ycojay. Tīm jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jëbi yajpocyñihuäch jäy ajcxy. ²⁵ Jadachambi co

Jesucristo ti y'oy ya naaxhuiñ, e ti nmibijcim (tzojcingíx) yi' ytiy'ajt, paady ycixpi cham ca' n'oc'ijtm cuend'aty mïd Dios ycötujcin huidibi Moisés ycojaj.

²⁶ Com miich ajcxy ti mmijpidaaccixy Jesucristo ytiy'ajt, paady ycixp jëbi nidüg'óciy miich ajcxy naydijigixy Dios y'ung. ²⁷ Tüg'óciy miich ajcxy huidijaty ti mnibejtcixy, ti mnibejtcixy jigix jëbi mdügmujccixy mïd Cristo, jadachambi niducy m'ijtcixy mïd Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíoäy etz nañ jadu'n ca'pi yjudíoäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëdijctijc etz miich ajcxy töxyjäydijc; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijhyb Abraham y'ap y'oc, e huin'it jëbi mbáatcixipy tzinaydac jiihy tzajpjoty, je huidibi Dios yaj'ahuaniiy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg iixpejt nyajnimäyich miich ajcxy huidibi capxticxp Dios ytiy'ajt. Tüg comeñyäjy ymang hue' anajty mutzni pi'cni je' anajty jëdaaniy yteedy ypidägy. E chi yteedy tüg jäy yajniibicy huidibi jëbi cuend'aty je pidägy etz je pi'c'anäg mabaad paady je tiempo mina ycidiğihiigxy je pidägy. Je comeñyäjy y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeñyäjy y'ung anajty y'ity ane'my, nañ tim jadu'n ich yi judíoäy ajcxy ane'my anajty n'ijtcixyich co anajty ca' tiydudägy naydijhygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judíoäy, jigix jëbi codinäy jäy ajcxy ma Dios ycötujctac. Nañ jadu'n yi' ma'xung'ajt judíoäy jigix jëbi yajpocyñihuäch yi jäy ajcxy huidibi ti yajpocycähuigixy Dios ycötujcin huidibi Moisés ycojaj. Dios ti quexy y'ung jigix jëbi xycodinaayim mïd ajt nbocy ycixpi, e jadu'n Dios jëbi xycöbijci jadu'n nej jihuiy xyci'm'ung'ajtm.

⁶ Jadachambi mïd co naydijim Dios y'ung, paady ycixp Dios ti xy'adigiiyim ti xyjottigiiyim yi' yjihuiñ ymic'ajt, paady ycixp ajt minaanim co Dios ajt nDeedy'ajtm etz nminaanim: “¡Padre Nuestro!” ⁷ Mïd co miich ajcxy ti nmibijccixy Jesucristo, jadachambi ca' ane'my m'oc'ijtcixyñi ma Dios ycötujcin je jecyip, jadu'n nej je jäy ytumbidijc mïdity ane'my. Paady ycixp jëbi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios mïdity jugy'ajtin. Jadachambi miich ajcxy Dios xy'ung'ajt, etz jëbi mbáatcixipy pidägy ma Dios.

Pablo yjotmaybaady mïd je mibijcpidijc ycixpi

⁸ Jecy'ajty ca' anajty mnejhuigixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt mïdity. E ca' anajty m'ojadajtcixy je Dios tzajpjotyp huidibi mic'ajt mïdity. ⁹ Jadachambi ti mnejhuigixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judíoäy ycötujcin, ca'p ti mic'ajt mïdity, huidibi ti m'ijxmajtcixy? E jadüg'oc xy'ane'mygixy je judíoäy ycötujcin. ¹⁰ Jadachambi mdzachcuydunaangixy judíoäy ycostumbre, jadu'n nej ajcxy myajmij'ajtcixy xii'bo' xiijimijt. ¹¹ Huinmaaybich ooy mïd miich ajcxy ycixpi co naadigi ti nyaj'ixpicxyich miich ajcxy. Ninigoob ayoohuañ ich ndung ma miich ajcxy.

¹² Migügtijc ajcxy, cham may'ajt nbijctzooyich ma miich ajcxy. Yajtügiiygix yi mhuinmañ jadu'n nej ich nhuinmañ. Ich ti nyajtügiyich nhuinmañ mïd miich ajcxy mhuinmañ co ti n'ixmachich yi judíoäy ycostumbre. Je taab anajty n'ityich mïd miich ajcxy, ca' miich anajty ajcxy ich n'ayuc xyijpcogapxiyi. ¹³ Miich ajcxy mnejhuib co anajty n'ityich ma miich ajcxy, pumäy ich anajty nyajpaady mïd yuu pa'm ycixpi, paady ycixp ich jim jecy nhuäcxipyich, ngapxhuäcxyich Jesucristo ytiy'ajt je jayip'aty. ¹⁴ Mïd ich nba'm ycixpi ooy n'adzippy miich ajcxy ma mjin mdijc, e miich ajcxy ca' ti xy'ixtijy

e ni ca' miich ajcxy xymidzippich. Jadu'n iich miich ajcxy xycöbijcy agujc jotcuje, tim jadun nej ixyipy ti mgöbijccixy Jesucristo ci'm. ¹⁵ Jadachambi çti ti ytunyii ti yjadyii co ca' mmijotcuje'ajtcixy iich n'ayuc? Com nyejcich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huiin anajty ajcxy mjayajpidzimaangixyp etz xymöhuaangixyich anajty co iich ngaa'a'ixiy. ¹⁶ ¿Nej iich ti n'ahuimbityich miich ajcxy mmidzip müd co ti nyajnimaaaygixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpijccixp huidibi ca' ytiy'ajtiy, ca' ajcxy oyhuinma'n müdity. Hue' ajcxy tzachtzocy co miich ajcxy m'ixmájtzcixip iich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ Hich njajotcujeich jadun co huingbi huindzin ajcxy jëbi xyaj'ixpijccixy. Nigoobi co ixyipy jëbi ajcxy m'oy'ajtin mbaatcixy. Ca' oy copicyity co iich ci'm miich ajcxy nmüd'ijttihuipy. ¹⁹ Migügtijc huidibi ooy ndzocy njihuüyich jadun nej jihuüy ngi'm'ung'ajtigixy, ooy tzaachypi ndzachjihuüyich müd miich ajcxy ycixpi jadüg'oc. Jadun tzaachypi njihuüyich jadun nej ungday tzaachypi jihuüy co y'ung yajma'xung'ada'n. Njihuihuaamybich tzaachypi ixti cooni miich ajcxy anajty Cristo mhuinma'n xyaj'oyi. ²⁰ Ooy iich njanay'ixpada'nyii ma miich ajcxy cham cham. Njamüdcapxaangixy njamüdmüydägaangixy, chi ixyipy tiy'ajt njacyajnimaaaygixy jac huädz. Ooy iich ndajy nmayich müd miich ajcxy ycixpi, nej n'ocjacnimaaaygixyipy.

Je Agar etz Sara y'ixpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaaygixy ajcxy, ¿nej ca'ni ajcxy midoogixy huidibi Dios ycötujcin nigapxyipi? ²² Com Dios y'ayuc huidibi jaybetyip jadun ymina'n co Abraham ymüd anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadun nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' müd ymic'ajti ypi'c'ajty, Dios ycuyduun y'ayuc huidibi yajhuinhuanüy Abraham. ²⁴ Jada jihuimbit ayuc jadun yhuimbidezmyb: jada Abraham ytöxyjäy ajcxy metz iixpejt'ajtp jadun nej Dios ti ytuñ müd yi' yjäy. Je ypödumbi huidi anajty yxii Agar, yi' müd yquipxüy yi' Dios ycötujcin huidibi Dios ymoy Moisés ma je cop huidi yxii Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadun nej tüg comeeñyjäy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaaxjot ma Dios moy Moisés je cötujcin. Agar je töxyjäy huidibi anajty pödumb, je' müd yquipxüy yi' judíojäy huidibi tzachcuyduungixp Moisés ycötujcin, etz nañ yquipxüy müd Dios y'it ya naaxhuiñ jim Jerusalén. Yi judíojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'ity ma jada cötujcin, tim jadun nej jäy ajcxy huidibi tumb ma comeeñyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, yi' müd yquipxüy iich ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'n oybi ma Dios, com Dios jadun ymina'n:

Jotcugi' jadüg'oc miich Sara huidibi ca' y'ungbaady. Xic yäx miich müd jotcuje'ajtin, miich huidibi ca' ungmoy. Nigi ymayihua'n miich m'ap m'oc ca'ydi Hagar y'ap y'oc.

²⁸ Hich ajt huidibi nmippidaacim Jesucristo tügiyim müd Abraham ymang Isaac. Com jadun nej Dios cuyduun y'ayuc huidibi yajhuinhuanüy Abraham co Isaac yma'xung'ajty, nañ tim jadun Dios cuyduun yi' y'ayuc müd iich ajt co je Cristo y'oy ya naaxhuiñ. ²⁹ Tim jadun nej Abraham ymang Ismael jecy'ajty midzip'ajty Abraham ymang huidibi Dios yajhuinhuanüy Abraham; nañ tim jadun yi' jäy ajcxy huidibi tzachcuyduungixp Dios ycötujcin je jecyip, ooy ajcxy tzach midzip'adyii yi' jäy ajcxy huidibi mibijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadun Dios nimay Abraham:

Yajpidzim ma mdijc je mbödumbi mïid ymang. Com ca' jadu'n ytiy'ajtiy co je pödumbi ymang paadipy miich mbidägy. Yi' je' padamb je mbidägy huidibi miich mdöxyijc ymang'ajtpy.

³¹ Migügtijc ajcxy, ca' ïch ajt n'ocjadu'niñ nej je pödumbi y'ung y'anäg ajcxy huidi ane'my ijtp. Jadu'n ïch ajt nipaady nej Abraham ytöxyijc y'ung y'anäg huidibi ca' y'ane'my y'ity.

5

Cristo ti xyajnihuaatzim ma je cötujcin huidibi Moisés yejc

¹ Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca' m'ixmajtcixy. Ca' mni'ahuimbijtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeeñyäj ytumbi ajcxy y'ijtcixy ane'my.

²⁻³ Amïdoo'ijtcix ïch n'ayuc. Jadachambi ïch Pablo minaambich pen miich ajcxy mgöbigamyb jada ayuc co copicy myajtiy'ajtihiipy, huin'it ñaadig'ada'ñ co mmibijccixy Jesucristo ytiy'ajt. Ca' Jesucristo may'ajt tuna'ñ mïid miich ajcxy pen jadu'n m'ididza'ñ. Jadüg'oc nmïna'ñich co pinjaty jadu'n ycuydunamyb tüg Dios ycötujcin, copicy ycuydundähiipy tüg'óciy. ⁴ Pen mijjp'ijxyp ajcxy co Dios xyajpocyñihuátzaangixy mïid co mguyduungixy tüg Dios ycötujcin, jadu'n nipaady nej jihuïy ti m'ixmajtcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huidibi Cristo ti tuñ ninigoob mïid miich ajcxy ycixpi, huin'it ca' Dios xyajpocyñihuátzcixipy. ⁵ Njijp'ijxim co Dios xyajpocyñihuádzaanim jigix jëbi naydijim tudägy ma Dios yhuinduu mïid co nmibijcim Cristo etz mïid co je Espíritu Santo xypubejtim. ⁶ Co nmibijcim ajt Jesucristo, Jesucristo ca' cuendituñ pen ti nyajtiy'ajtiyim o pen ca'. Jëyi yi' tzocy co naychojcin nayjihuïyim nidüg nidüg, e jada je' je ijxpejt co nmibijcim yi' ytiy'ajt.

⁷ Jayijp'aty oy yajxon anajty m'occuydungixp Jesucristo ytiy'ajt. ¿Pin ti xy'agapxiygixy co ca' mgapxymïdohuaangixy tiy'ajt? ⁸ Yi' jäy ajcxy huidibi ti xy'agapxiygixy ca' ajcxy tiy'ajt patcixy ma je Dios huidibi ti xyhuin'ijxim jigix jëbi nmibijcim Cristo. ⁹ Miich ajcxy mnejhuïyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anï huidibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'ñ. ¹⁰ Com ïch nmibijcpich co ajt je nHuindzin Jesucristo oy-huinma'ñ xymöhuipy ajcxy, paady ycixp njijp'ijxypich co miich ajcxy mmibigaamyb ïch ngapxy ïch n'ayuc. Dios chaachytunipy je jäy ajcxy huidibi ti xyajhuinma'ñyidigooygixy. Oy ooy yjamij yajanchity ajcxy, ca' ytimyñejity, Dios yi' ajcxy tzaachytunib.

¹¹ Migügtijc ajcxy, co ixipy yjanchity co ïch ngapxhuäcxyich co copicy nidüg'óciy jäy yajtiy'ajtihiipy, ¿nej co je'ni chambaad judiojäy xychach'ixhuidityich xychach-pahuidityich? Pen ca' ixipy xy'ixhuidityich xypahuidityich jadu'n nipaady nej jihuïy nyaj'ixpicyich co je Cristo ca' y'o'cy mïid ïch ajt nbocy ycixpi. ¹² Yi' huidi ajcxy xyajhuinma'ñyidigooygixyp, ooy ixipy y'oyity co ixipy ajcxy xypuhuäctuatni tücciyi.

¹³ Dios miich ajcxy ti xymijhuoogixy ma yi' ytiy'ajt jemybi jigix jëbi m'ixmajtcixni je Dios ycötujcin je jecyip, etz tzojcingix mijpidägy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huidibi mjot mhuinma'ñ chachñijot'ajtcixpy. Hue' a'oy naymi'oyjäy'ajtigix nidüg nidüg, naybubéjtigix miñ xyipy.

¹⁴ Dios y'ayuc ymïna'ñ: "Mi'oyjäy'adipy mmijjin mmidijc, tim jadu'n nej miich ajcxy mdzocy co mmijjin mmidijc xymi'oyjäy'adipy." Co jadu'n ajcxy mnaymi'oyjäy'adïyb miñ yxipy, ytimyñipatyp jadu'n nej jihuïy ti mguydundäy tüg'óciy je Dios ycötujcin. ¹⁵ Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayyajhuinma'ñyidigooyigixy miñ xyipy.

Je jugy'ajt huidibi yi Espíritu Santo yejcpy

¹⁶ Jada capxhuijin ñich miich ajcxy nyajnijayñyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymooygixy ajcxy. Ca' mguyduungixy je jibic-huinma'ñ huidibi mdzachnijot'ajtcixyp ci'm. ¹⁷ Je jibic-huinma'ñ huidibi mdzachnijot'ajtcixyp, hue'ymidzip'ajtpy je oybi huinma'ñ huidibi je Espíritu Santo xymooygixp. Dios y'ayuc obyí ca' ñaygodigiyii mïd miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy. ¹⁸ Pen tzojcingix mguyduungixy je Cristo ytiy'ajt huidibi Dios yjihui'ñ xymooyb ajcxy, huin'it ca' copicy mguydúngxipy Dios ycötujcin je jecyip.

¹⁹ Com nnejhuiydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yëdijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yëdijctijc tzachmïd'ügangixy etz mïd'edzaangixy etz ma yijibi ji ajcxy yhuinma'ñyigooygixy. ²⁰ E nañ nnejhuiyim jadu'n nej jäy ajcxy tzach'ojadajtcixy tzach-huingoxтинаangixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy mïd yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty mïdity; nej jäy ajcxy chachnaybijc-huäcxáanigixy, huidibi abicy tzachmïd'adamb yjäy. ²¹ E nañ nnejhuiyim jadu'n nej jäy ajcxy abijctigihuaangixy tijaty ymigüg ymïd; nej jäy ajcxy ymigüg yaj'o'ccixy; nej jäy ajcxy nijot'ajtcixy ügi etz adzuuhuididi agoodzhuididi, etz yi jäy ajcxy huidibi tzachnijot'ajtcixp yi jadu'mbi huinma'ñ. ñich miich ajcxy cham nja-cyajnimaaygixy jadu'n nej ñich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayñygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuiydaayim je oybi huinma'ñ huidibi Espíritu Santo yejcyp. Co yi jäy ajcxy huidibi ymïd Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjäy'ajtin mïd ymigügtijc; mïd ajcxy xondaacin etz mïd ajcxy jotcuyc'ajtin; etz ymimexxtujcixyp ymigügtijc; etz chojccixyp yjihuiygixyp ymigügtijc; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jipcogapxihiy. ²⁴ Tüg'óciy jäy ajcxy pinjaty Jesucristo Huindzin'ajtp, mïmadacpy ajcxy yi jibic-huinma'ñ huidibi ci'm nijot'ajtcixyp mïd Cristo ymic'ajt. ²⁵ Mïd co nmïd'ajtim je Espíritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espíritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ymimadägyii, miich ajcxy huidibi mïmadacyp yi jibic-huinma'ñ mïd Dios ymic'ajt mbubéjtcixipy jada migüg, e co mbubéjtcixipy jada migüg, ñigi jotmic mmigapx mïd oy gapxy oy ayuc. Naygüend'adii ajcxy ci'm, ca'ydi jibic-huinma'ñ xymimadaaccixy. ² Naybubéjtigix nidüg nidüg pinjaty ayo'n jotmay mïd. Co jadu'n mdúngxipy, hue' anajty ajcxy mguydungixyp Cristo ycötujcin huidibi ti xymooyim ajt.

³ Pen ji pin ñayjihuiyii amij agix etz chach naygömaya'ñyii ci'm co chach y'oyjäyity, ca' je' choobaady ma Dios yhuinduu. ⁴ Jëbi nidüg nidüg jäy ñayjihui'ñybigyii nej chinäy yjugy'aty, pen oy o peni ca'y'oyity. Peni ycuychinaayb yajxon Dios ytiy'ajt oybi, jotcuyc ñayjihuihuiyb je' ci'm e ca' huaad yajquipxiy chinaayin mïd huingbi. ⁵ Nidüg nidüg jäy

ci'm chinaayin jëbi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'n müdity.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzin tiibi yaj'ixpiyüi.

⁷ Ix ajcxy ci'm mnayhuin'ingix com Dios ca' yi' ni pin huaad nixigy yajxigy. Com pen miich ajcxy jibic-huinma'n mdumyb, Dios xychaachytunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'n tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espíritu Santo huinma'n ymöyüi, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espíritu Santo möhuib. ⁹ Peni nduunim jabom jabom oy huinma'n ca' huaad ndziipim, jëbi nmecxtujcim ixti cooni anajty nbaatim oybi ma Dios. E ca' huaad njotmetzcüyim. ¹⁰ Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'nymooyim. Nigi tzoc pubejtim nmigügtijc huidibi mibijcp mijpidacp Cristo.

Ane'min, capxhuijin etz capxpooxix huidibi cijxnip je necy

¹¹ Ijxcix huindixcix jada letra mijjatyp huidibi ñich ci'm njaayb, com ndzojcpyich co mnejhuigyixipy nej yam nijayigyixy. ¹² Yi jäy ajcxy huidibi mibijcp co Cristo o'cy ma yi cruudz müd ajt nbocy ycixpi etz nañ jadu'n mijpidacp yi tiy'ajttihui, hue' ajcxy tzach ñaygömayaanigixy ma yi judíojäy ajcxy, jigix ca' pin y'ixhuididüyb ypahuididüyb. ¹³ Yi huidi ajcxy tzach mijpidacp tiy'ajttihui, nañ ni ca' ajcxy cuydundäy tüg'óciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajttihui jigix ajcxy jëbi ñaygömayigixy müd co miich ajcxy ti myajtiy'ajttigyixy. ¹⁴ Yi jäy ajcxy huidibi jim yaj'ixpijcp anii, ci'm ajcxy chach ñaygömayaanigixy. Per ñich ca' jadu'n naygömaya'nyijich müd huidibi ndumybich huidibi nyaj'ixpijcpyich. Hue' janchtiy ngapxpadaamybich ñich ajt nHuindzin Jesucristo ytiy'ajt, jadu'n nej yajcruudzpejti müd ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyjäy yjibic-huinma'n. E paady cham ni nga'ocnijot'ajtnich yi jibic-huinma'n. ¹⁵ Co nmibijcim Jesucristo, oy ixypy ti nyajtiy'ajttiyim o oy ixypy ca' ti nyajtiy'ajttiyim, ca' ma choobaady. Huidibi tzoubatp yi' je' co nmibijcim Jesucristo, etz co nmüd'ajtim jemybi jot huinma'n. ¹⁶ Huen Dios xyajjotcugihuipy etz xypa'ayoohuipy, etz nañ jadu'n yajjotcugihuipy etz pa'ayoohuipy nidüg'óciy jäy huidijaty cuydumb Cristo ytiy'ajt, tüg'óciy Dios yjäy janchyp tiydudägyi.

¹⁷ Jadu'n nej jadachambi, etz jadu'n nej xii tiempo jacmiimb jaccidaacp, ca' ñich pin huaad xyjac'amayiyich, com nmüdich je tiy'ajt ma nninixich jadu'n nej jäy ajcxy ti xyhueenduunich ti xychaachytuunich müd co ti nduunich müd Jesucristo ycixpi.

¹⁸ Migügtijc ajcxy, huen ñich ajt nHuindzin Jesucristo tunipy nigi may'ajt oy'ajt ma miich ajcxy. Jadu'n jada ngapxycixyich. Amén.

EFESIOS

Yi Necy Huidibi San Pablo Yajniejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajñibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtip, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz xyajjotcugihuip ajcxy.

Nej je Espíritu Santo conucxy Cristo yjäy

³ Tzoc iibaatim capxpaatim Dios iich ajt nHuindzin Jesucristo yTeedy. Müd co nyajpaatim ma Cristo, paady Dios ti xyconuucxim müd tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuinduu huadz oy njot nhuinma'ñ, ca' ti bocy nmüd'ajtim. ⁵ Müd co Dios ooy xychojcin xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjiuiy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbijcin nej yci'm y'ung, e jadu'n xymüd'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc iibaatim capxpaatim Dios ooy müd co mijmay'ajt mij'oy'ajt tuuñ müd iich ajt ycixpi, co quejxy y'ung ya naaxhuiñ müd iich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuüy. ⁷ Müd co Dios ooy xychojcin xyjihuiyim paady ycixpi yi' y'ung ñi'py teemy yojcy co y'o'cy müd ajt nbocy ycixpi, ti ajt n'alma xyajñidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ müd iich ajt ycixpi. ⁸ Co Dios jadu'n mijmay'ajt mij'oy'ajt tuñ müd iich ajt ycixpi, ti xyajhuinjihuüyim ti xyajnejhuüyim yi ytiy'ajt yi yhuinma'ñ. ⁹ Dios yjäygidacpy jadu'n co ti xyajnejhuüyim nej anajty müdity capxcöducy huidibi ca' pin jecy'ajty huinjihuüy. Nañ jadu'n Dios ti xyajnejhuüyim nej ti yhuinma'ñypidacy jecy'ajty nej ytuna'ñ anajty müd Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg'ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiihy tzajpjoty etz ya naaxhuiñ Dios jayijp capxcödujc. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyb jadu'n nej yi' tzocy etz nej jäygidägy. ¹² Jadu'n Dios cuydumyb müd iich ajt ycixpi, huidibi jayijp ti nmibijcin ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios müd yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc tiy'ajt nej jëbi m'alma ñidzögiy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy müd ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuanüy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajñidzöga'ñ pinjaty yjäy'ajtip ajcxy. Jadu'n Dios tuna'ñ, jigix jëbi iich ajt n'iibaatim ngapxpaatim Dios müd y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

15-16 Com ti nnejhuüyich jadu'n nej tiydudägy miich ajcxy ti mmibijccixy ñch ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajna-jxpich jäygidaacín ma Dios müd miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je ixpijcin huidibi je Espíritu Santo yejcpy, etz nañ jadu'n xyajnejhuühuipy xyajhuinjihuühuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich müd miich ajcxy ycixpi, co xyaj'anüyip ajcxy mjot mhuinma'ñ müd yi' ytiy'ajt, jigix jëbi mnejhuüygixipy tijaty huidibi ajcxy m'ahuixyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuüygixy nej ymijity yjanchity je pidägy huidibi Dios yegamyb müd tüg'óciy ajcxy huidibi Dios yjäy'ajtp. ¹⁹⁻²⁰ Dios nmibijctzooybich jigix jëbi ajcxy mnejhuühuipy jadu'n nej Dios ymic'ajt müdity. Je' ymic'ajt ca' ycixipy ytigoyipy, e ni pín ca quipxipy. Etz yi' ymic'ajt tumb ma ñch ajt njot nhuinma'ñ nidüg nidüg co ajt nmibijcim. Dios ti xyajnejhuüyim yi' ymic'ajt huidibi ymüd may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jüby tzajpjoty. Yi' ñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi müd Dios. ²¹ Cristo jac mij'ane'min ymüd, jac mic'ajt müd, ca'ydí jacpínjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cōmay y'ity nigi, ca'ydí jac pín huidibi cham tzinaayb, etz huidibi jacjiini tzinähuaamni. ²² Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo nihuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinícx, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuüyb jäy ajcxy, paady ñüdzooccixy y'alma

¹ Ca'ni miich anajty ajcxy mmibijccixy Cristo, ooy anajty mdundigooygixy müd Dios ytiy'ajt, ooy anajty ajcxy mbocymüdity, e jadu'n nipaady nej jihuüy ti m'o'ccixy müd mbocy ajcxy ycixpi etz Dios xyajjugypijccixy huinjemy müd jemybi jugy'ajtin. ² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjäy ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi' jäy ajcxy yjot yhuinma'ñ huidibi ca' capxymidoogixy Dios. ³ Ma je tiempo tiibi ñaxy, nañ jadu'n anajty ndzinaayim jadu'n nej yi' jacjadyii naaxhuiñjäy ajcxy huidibi capxymidoob yi' ca'oybi. Ngapxymidoohuim anajty nninícx chojcin. Ndundigooyim anajty müd ngi'mjot ngi'mhuinma'ñ. Nguipxyüyim anajty müd yi' jacjadyii naaxhuiñjäy ajcxy huidibi Dios tzaachytunaanip müd ypocy ycixpi, etz nañ jadu'n nmihuaad'ajtim co Dios xychaachytuunim müd ajt nbocy ycixpi. ⁴⁻⁵ Oy ixipy ñch ajt mihuaadity tzaachypi müd ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiyim, paady ycixp tuuñ may 'ajt müd ñch ajt ycixpi co yajjugypijcy je Cristo. E jadu'n quipxyi müd Jesucristo ñch ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ müd ñch ajt ycixpi co anajty nbadaanim o'cin müd ajt nbocy ycixpi. Müd co Dios may'ajt oy'ajt tuuñ müd miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcim quipxy müd Jesucristo, paady ycixp Dios xymöhuaanim it lugar jüby tzajpjoty quipxy müd Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmüd'ajtim jadu'n nej Dios xychojcin xyjihuiyim etz xypa'ayoohuim mijcajee, etz mijmay'ajt mij'oy'ajt tuun müd ñch ajt ycixpi co nyajpaatim ma Cristo. ⁸ Müd co Dios miich ajcxy ti xychojccixy

ti xyjihuiygixy, paady ycixp yi m'alma ajcxy ti patcixy nïdzoocin co ti mmibijccixy Jesucristo. Ca' nmïnaanïm co tijaty ti mdungixy, paady ycixp yi m'alma ajcxy ti patcixy nïdzoocin. Hue' janchtiy Dios ti xymooygixy ninigoob ajcxy m'alma nïdzoocin. ⁹ Ca' nmïnaanïm huin'it jây ajcxy y'alma nïdzoocin paadip co oybi tungixy. Hue' janchtiy Dios jadu'n ci'm ti yaj'oyïy ninigoob nej jây ajcxy jëbi patcixy y'alma nïdzoocin, jigix ca' pin jëbi huaad amij agix ñayjihuiyïi. ¹⁰ Com Dios ci'm ti oyduñ ñich ajt njemybi tzinaayin jugy'ajtin müid je may'ajt huidibi Cristo ytuun co y'o'cy müid ajt nbocy ycixpi. Jadu'n Dios tuuñ müid ñich ajt ycixpi, jigix jëbi nduunim oyjây'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjây'ajtin.

Jotcuyc cham n'ijtim müid Dios, com Cristo xyajpocyhuaatzim

¹¹ Jadu'n müich ajcxy ocjâymejtzcodiï nej müich ajcxy anajty myajpatcixy co anajty ca'ni mmibijccixy Jesucristo. Ca' müich anajty ajcxy mjudiojâyity, e ni ca' müich anajty ajcxy myajtiy'ajttiïygixy nej huaad mnaydijigixy Dios yjây. Paady ycixp yi judiojây ajcxy ymïna'ñ co Dios je' yjây ajcxy, e müich ajcxy ca', müid yi'da'ajty co müich ajcxy ca' myajtiy'ajttiïygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judiojây xycöbijccixy, etz ni ca' anajty mbadaangixy huidibi Dios y'ahuaniïy ma yi judiojây ajcxy, etz ni ca' anajty ti mjijp'ijxcixy ma Dios, etz ni ca' müich anajty ajcxy myajpatcixy ma Dios. ¹³ Jadachambi, müich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo müid co yi' ñi'py teemy yojcy müid müich ajcxy mbocy ycixpi. ¹⁴ Jesucristo ci'm yaj'oyïy je tzip je capxy nej anajty ñich ajcxy judiojây etz müich ajcxy huidibi ca' yjudiojâyity naymidzip'ajtim, e cham jotcuyc n'ijtim. Jesucristo ci'm yajtigoy je judiojây ycötujcin huidibi anajty tzipcojp capxycojp ma ñich ajcxy etz ma müich ajcxy. Jesucristo yajtügmuyc judiojây, etz huidi ca' yjudiojâyity. ¹⁵ Jesús müid yci'm ninicx yajtigoy je jecy'ajtypi cötujcin co oy yaj'ögyiï cruudzcixy. Co Jesús y'o'cy, huin'it yajtügmuycy judiojây etz huidibi ca' yjudiojâyity. Huin'it oy yaj'ahuimbity tügpicy jây jemybi huidibi Dios yjây'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ögyiï cruudzcixy, huin'it yajcijxy yajnaxxy je tzip capxy jadu'n nej yi judiojây anajty midzip'adyiï yi' ajcxy huidibi ca' yjudiojâyity. Etz nañ huin'it Cristo yajtügmuycy yi judiojây müid huidibi ca' yjudiojâyity. Paady ycixp Dios ycöbiga'ñyï judiojây ajcxy etz huidibi ajcxy ca' yjudiojâyity agujc jotcuyc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jëbi ajt nbaatim jotcuyc'ajtin ma Dios. Ycapxhuäcxyp anajty ma müich ajcxy huidibi ca' yjudiojâyity, huidibi ca' anajty müidity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma ñich ajcxy judiojây huidibi jamüid anajty Dios ytiy'ajt. ¹⁸ Müid co Cristo may'ajt ti tuuñ co xy'adigiiïm xyjottigiiïm Dios yjihui'ñ ymic'ajt, paady ycixp nidüg'öciy ñich ajt nyajpaatim ma Dios jadu'n nej tügpicy jây, tanto judiojây etz nañ jadu'n huidibi ca' yjudiojâyity. ¹⁹ Paady ycixp müich ajcxy jadachambi myajpaady ma Dios. Jadu'n müich ajcxy myajpaady ma Dios tim jadu'n nej je jây ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy müich ajcxy mnaygomájtzigixy ma Dios müid judiojây ajcxy. Jadu'n müich ajcxy etz judiojây ajcxy nipaady cham nej jihuïy ajcxy mdügjuugy mdügmigüg. ²⁰ Müich ajcxy ti mmijpidaaccixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxxiybi ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jây huidibi yjây'adaanip huidibi tügjijp mijpidaaccixy Cristo, huidibi tú'ciy ijtcixyp müid Cristo. Jadu'n jadayaabi tügpicy jây nipatcixy nej tüg tijc ma jây ajcxy Dios ojadajtcixy. ²² Müich ajcxy myajpatp ma Cristo

quipxyi m̄id nidüg'óciy yi mayjay ajcxy huidibi m̄jpidacp Dios etz huidijaty m̄i'ijtp je Esp̄ritu Santo ma ajcxy yjot yhuinma'n̄, jadu'n miich ajcxy m̄jugy'ajtin nipaady nej Dios chinaydac.

3

Pablo yi' je' m̄id cōtujcin co capxhuācxy Dios y'ayuc ma pin ca' yjudíojäyity

¹ Ich Pablo, nyajpatpich pujxtigoty m̄id co nduuñich ma Jesucristo ytung ma miich ajcxy huidibi ca' yjudíojäyity. Paady ycixp nm̄ibijctzooybich Dios m̄id miich ajcxy m'oy'ajtin ycixpi. ² Mnejhuñyb ajcxy com Dios m̄jmay'ajt ti tuuñ m̄id miich ajcxy ycixpi, paady yi' ti xyajn̄ibicyich ngapxhuācxbich ma miich ajcxy yi' y'ayuc ytiy'ajt. ³ Dios ti xyajnejhuñyich yi' ytiy'ajt huidibi jecy'ajty yūch y'ijt. Jada tiy'ajt yinjaty hueeñjaty ich miich ajcxy ti nnijayñygixy jayijp'aty. ⁴ Co miich je necy mgapxip, huin'it ajcxy mnejhuñuipy co ich nnejhuñyich je Cristo ytiy'ajt huidibi ijtp yūch. ⁵ Jada tiy'ajt maabi Jesucristo, Dios ca' ni pin yajnejhuñy jecy'ajty. Jadachambi xii tiempo Dios m̄id je Esp̄ritu Santo yajnejhuñy Jesucristo ytiy'ajt je Jesús y'apóstoles ajcxy etz je Dios y'ayuc najtzcapxñybich ajcxy. ⁶ Jada je' je tiy'ajt huidibi jecy'ajty yūch anajty ijtp, co yi' jäy ajcxy huidibi ca' yjudíojäyity ypadamyb ajcxy Dios y'oy'ajtin quipxyi m̄id yi' judíojäy ajcxy, etz nañ jadu'n yi' ajcxy yajpaady ma Dios tú'ciy m̄id yi' judíojäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judíojäy co mōhuaangixy pinjaty m̄ibijccixp Jesucristo.

⁷ Dios m̄jmay'ajt ti tuñ m̄id ich ninigoob co ti xyajn̄ibicyich jada tung, e xymöyich mic'ajt co ngapxhuācxbich Jesucristo y'ayuc ytiy'ajt oybi ma yi' jäy ajcxy huidibi ca' yjudíojäyity. ⁸ Ich jactimmudzip ma yi' maybi m̄ibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma ich, e ti xypidāgyich ma yi' ytung co ngapxhuācxyich jada oybi tiy'ajt ma jacjadyi jäy ajcxy jigix jēbi ajcxy patcixy ma Cristo Jesús m̄j'oy'ajtin, huidibi ca' pin huinjiñuñy jadu'ñyi ym̄ijity. ⁹ Dios ti xyajn̄ibicyich co ngapxticxbich ma tūg'óciy jäy ajcxy je Dios y'ayuc ytiy'ajt oybi huidibi yūch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'n̄ je oybi m̄id tūg'óciy jäy ajcxy. Yi' je' Dios huidibi ti yajcojtāy tūg'óciy tijaty ya naaxhuiñ etz jiiby tzajpjoty yajpatp. ¹⁰ Jadu'n Dios capxcōdujcy co je tzajpjoty tzinaaybi ajcxy huidibi ane'm̄in etz mic'ajt m̄id, tiy'ajt padaangixy ma yi' m̄ibijcpidijc jadu'n nej Dios m̄jhuinma'n̄ canaagnax tuñ m̄id jäy ajcxy nidüg'óciy huidibi m̄ibijccixp Cristo Jesús. ¹¹ Jadu'n Dios ti cuyduuñ m̄id ajt nHuindzin Jesucristo jadu'n nej jecy'ajty capxcōdujcy. ¹² M̄id co nyajpaatim ma Jesucristo paady ycixp agujc jotcuje nm̄igapxim nm̄ihuingonim Dios. M̄id co nm̄ibijcim Jesucristo paady ca' ndzigñyim ndzo'yduunim ma Dios yhuinduu. ¹³ Paady ycixp may'ajt nbijctzooyich m̄id miich ajcxy co ca' n̄igi m'ixtigihuāccixy ma ajcxy mm̄ibijcin. Etz ca'ajcxy xyñidajipy xyñimayipyich co tzaachypi nm̄inaxyich nyajnaxyich m̄id miich ajcxy ycixpi. Com m̄id co ti nyajnaxyich tzaachypi m̄id miich ajcxy ycixpi, paady jēbi miich ajcxy oy'ajtin mbatcixy.

Cristo chojcpy yjihuñyb jäy ajcxy

¹⁴ Com Dios m̄jmay'ajt ti tuuñ m̄id judíojäy etz m̄id huidibi ca' yjudíojäyity, paady njatyhuingojxtinaaybich Dios, ich ajt nHuindzin Jesucristo yTeedy, e nm̄ibijctzooybich Dios m̄id miich ajcxy ycixpi. ¹⁵ Tūg'óciy tzajpjoty tzinaayb etz tūg'óciy naaxhuiñyäj huidibi m̄ibijccixp Dios, jēbi nidüg'óciy ym̄inaangixy: “Dios ich ajt nDeedy.” ¹⁶ Paady nm̄ibijctzooybich Dios Teedy m̄id miich ajcxy ycixpi, co Dios je huidibi mic'ajt etz oy'ajt ym̄id m̄jcajee, co xymōhuipy mic'ajt ma ajcxy mm̄ibijcin m̄id yi' yjihuññ ymic'ajt huidibi yajpatp ma ajcxy mjot m̄huinma'n̄. ¹⁷ Dios nm̄ibijctzooybich m̄id miich ajcxy ycixpi co Cristo ymic'ajt yajpaadip ma miich ajcxy mjot m̄huinma'n̄ m̄id co mm̄ibijccixy Cristo. Jadu'n Cristo ymic'ajt yajpaadip ma ajcxy mjot m̄huinma'n̄, jigix

jëbi miich ajcxy huidibi mmibijccixp Cristo, jëbi mdzójcixipy mjiuúygixipy mijcajee huinixi huinitempo je mibijcpidijc etz tüg'óciy jacjadyii jäy. ¹⁸ Nañ jadu'n Dios nmibijctzooybich müd miich ajcxy ycixpi co miich ajcxy etz tüg'óciy mibijcpidijc mnejhuúygixipy jadu'n nej Cristo xychojcm xyjihuiyim mijcajee. E yi' chojcin yjihuiyin jadu'n nipaady nej tüg tijc huidibi jac cixip jac mijip, jac yooñip jac cixyip ca'ydi ni huidi tijc. ¹⁹ Nmibijctzooybich Dios co xyajnejhuúygixipy xyajhuinjihuúygixipy nej Cristo xychojcm xyjihuiyim mijcajee nidüg'óciy iich ajt, ixti ca' huaad nhuinjihuیداایم jadu'n nej Cristo xychachchojcm xychachjihuiyim. Nmibijctzooybich Dios co xypubéjtcixip, ixti mabaad müd'ajttaaygixy Dios y'oy'ajtin.

²⁰ Jadachambi, cōmay Dios y'ity huidibi mic'ajt müd, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, müd je ymic'ajt ycixpi huidi tumb ma iich ajt. ²¹ Huen tüg'óciy mibijcpidijc ajcxy jäymejtcixy ojadájtciy Dios etz Cristo Jesús jabom jabom huinixi huinitempo. Jadu'n jada. Amén.

4

Tú'ciy n'ijtim müd Espíritu Santo ycixpi

¹ Nyajpatpich pujxtigoty müd ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzinaaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy. ² Pidaaccix mjot mhuinmañ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ajtigixy, jigix ñiguëxigip co mnaychójcigixy mnayjihuiygixy miñ xyipy. ³ Müd'adipy ajcxy mjot mhuinmañ tú'ciy müd je Espíritu Santo ypubejtin jigix jëbi mdzinaaygixy jotcuje ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinmañ. Dios ti xyhuin'ijxim, jigix jëbi quipxyjaty njipp'ijxtaayim je oybi huidibi nbadaanim jilby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nnibejtim müd Jesucristo yxi. ⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb müd nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinmañ.

⁷ Dios may'ajt oy'ajt ti tuñ müd nidüg nidüg iich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyi. ⁸ Paady ycixp jaybety ymiñ ma Dios jadu'n yminañ:

Co Cristo ypättigiy tzajpjoty, chi ymüdpättigiy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc yminañ co je Cristo ypättigiy tzajpjoty? Hue' je' jadu'n yminañ müd co je Cristo jayipp ycidacy etz ooy ayooy ya naaxhuiñgixy. ¹⁰ Je Cristo yi' je' huidibi cidaac ya naaxhuiñ chooñ tzajpjoty, nañ jadu'n ypättigiy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jilby tzajpjoty etz tüg'óciy huidijaty ya naaxhuiñ. ¹¹ Je Cristo ymooygixyp nidüg nidüg yi' ytumbi mic'ajt. Nijëjity mooygixy mic'ajt jëbi nidiy'ajt'ajtigixy co je' je' je Cristo. Nijëjity mooygixy mic'ajt jëbi najtzcapxiygixy Dios y'ayuc. Nijëjity mooygixy mic'ajt jëbi capxhuäcxcixy yi' y'ayuc. Nijëjity mooygixy mic'ajt jëbi capxhuijcixy yi' mibijcpidijc müd Dios ytiy'ajt. Nijëjity mooygixy mic'ajt jëbi yaj'ixpijccixy Dios ytiy'ajt. ¹² E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy müd ytung ycixpi. E müd yi' ajcxy ytung yjacyu-jcpedipy yi' mibijcpidijc y'ixpijcin, ixti mabaad jac müd'adipy ajcxy Cristo y'oy'ajtin. ¹³ Jadu'n Cristo mic'ajt xymooyim, jigix jëbi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijtaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinmañ, nmi'ijtim Jesucristo ytiy'ajt cixy ca'pxy. ¹⁴ Ca' n'idaanm müd ajt

nhuinma'ñ nej pi'ctijc yhuinma'ñ ymüidity. Je pi'ctijc ajcxy janam jadzojc yhuinma'ñ ytigajtcixy. Jadu'n ajcxy nipaady nej je miy huidibi je poj yajpojmiyby yajpojxijpy. Co cixy ca'pxy nmüid'ajtim Cristo ytiy'ajt, ca' pinjaty xyhuin'inim müid huing ayuc oymibijcnip huidibi ca' yjanchity. ¹⁵ Hue' janchtiy ngapxim je tiy'ajt tiybi müid tzojcin jihuüyin, jaydebi njacyeecom ajt nmibijcin etz njacnejhuüyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶ Cristo etz je mibijcpidijc nipatp nej tüg ninicx. Cristo ñipatp nej je ninicx cohujc huidibi ane'mb etz mic'ajt mooyb je ninicx. Etz yi mibijcpidijc ñipatp ajcxy nej je ninicx huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügüiyip ajcxy ymibijcin etz nañ jadu'n yaj'ijtigixy tüg'mucy. Nidüg nidüg mibijcpi ymic'ajt patcixy ma Cristo, jëbi tungixy Cristo ytung nej ypadyi. E jadu'n yeecixy nidüg'óciy ma ajcxy ymibijcin, etz nañ jadu'n yajyeecixy chojcin yihuüyin müid ymigütiyc.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich miich ajcxy etz nyajnibijccixy müid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyi jay ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyi jay ajcxy chinäy müid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuüy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpiy co copicy m'ixmajtcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy müid je jibicpi huidibi anajty ajcxy mnijot'ajtcixyp, ci'm anajty mnayhuin'inigixy. ²³ Ixmajtcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Müid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ müid tudägy'ajtin etz huädz'ajtin.

²⁵ Paady ycixp ca'huaad m'indaaccixy, nidüg nidüg cápxcix huidibi janchip müid migütiyc, müid co quipxyjaty yajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydgóoygixipy yi mjotmädi yajijp ca'ni anajty xii ycidacyñi. ²⁷ Ca' mnayyéjigixy ma je mujcu' co je mujcu' xymimadägiy.

²⁸ Yi jay ajcxy huidibi meetzcixp, huen ixmajtcixy meedzi, etz ijxtähuipy ytung. Co ytunipy ma ci'mdung jëbi pubedipy ajcxy ymigütiyc huidibi yajmayajtcixp tijaty.

²⁹ Ca' mgápxcixipy jibic ayuc. Cápxcix oy ayuc huidibi jëbi migüg ajcxy jäygidaaccixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp.

³⁰ Ca' huaad mgapxcixy mmiydaaccixy ayuc huidibi yajjotmaybijcp je Espíritu Santo huidibi Dios yjë'ajtpy. Je Espíritu Santo huidibi miich ajcxy müid ma mjot mhuinma'ñ, yi' je' huidibi tiy'ajt yejcp co miich ajcxy Dios yjäy'ajtigixy, co anajty Cristo ymiñ ya naaxhuiñ jadüg'oc huin'it mbadaangixy jugy'ajtin etz tzinaayin huidibi ca' ycixipy ytigoyipy ni mina.

³¹ Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mihuüygixy, jadu'n nej co tzojc mjotma'tcootcixy, jadu'n nej co mnaymijotmá'tigixy, jadu'n nej co mnayhuin'ójigixy nayijp'ójigixy. Ca' huaad mmigüg mnigapxcixy mni'ojüygixy. Ca' jibicpi mnijot'ajt'adütcixy müid ajcxy mmigüg ycixpi. ³² Hue' janchtiy oybi mhuinmäaygixipy müid mmigüg ajcxy ycixpi. Nayba'ayóohuigixy nidüg nidüg.

Nayméecxigix nidüg nidüg. Com nañ jadu'n Dios ti huinmecxy miich ajcxy mbocy müd co myajpatcixy ma Cristo.

5

Nej jëbi chinaaygixy yi Dios yjây ajcxy

¹ Com miich ajcxy ñipatpy nejjihuïy Dios y'ung'ájtigixy, e Dios ooy xychojccixy xyjihuiygixy, paady copicy naychójcigixy nayjihuiygixy miñ xyipy, jadu'n nej Dios ti xychojccixy ti xyjihuiygixy. ² Jabom jabom ma mdzinaayin naychójcigix nayjihuiygix nidüg nidüg, tim jadu'n nej Cristo xychojcm xyjihuiyim, e yjugy'ajt yejcy müd ajt nbocy ycixpi, e jadu'n Dios jäygidacy nej Cristo ytuñ.

³ Müd co miich ajcxy Dios xyjây'ájtigixy, paady tzinaaygixy müd huädz mjot mhuinma'ñ. Ca' huaad m'oc'ibáatcixyñi m'occapxpáatcixyñi yi töxyjäy migapxtigoyi, etz yi jibic ayuc capxi, yi jibic-huinma'ñ nijot'adi etz yi meen adzogi. ⁴ Müd co mDios miich ajcxy xyjây'ajtp, paady ycixp ca' huaad mgápxcixipy ayuc huidibi tzo'ydu'ñ yejc, ni ca' huaad mgápxcixipy huidi ca' y'oyjäygidaacnity, etz ni ca' huaad mguxiiccixy m'anidaaccixy, com yi jibic ayuc ca' Dios jäygidägy. Tzoc yajnaxim jäygidaacin ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb müd huingbi töxyjäy, pinjaty jibic-huinma'ñ müd, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadaajtp tzaadzech etz quipychech. ⁶ Ca' mnayyéjcgixy co jäy ajcxy xyhuin'ingixipy müd ayuc huidibi ca' ytiy'ajtity ca'p choubaady. Müd co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jäy ajcxy huidibi capxcymidodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' müd mnayyöymújcgixy yi jadu'mbi jäy ajcxy huidibi ca' capxymidoogixy Dios.

⁸ Jayip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuïy, e jadu'n nipaady anajty nej jihuïy myajpaady ajcxy agootztuum. Jadachambi mnejhuïygixyp Cristo ytiy'ajt, e jadu'n nipaady nejjihuïy mdzinaaygixy ma tüg tücxin. Paady ycixp jatyim cuydungixyp Cristo ytiy'ajt ma yi mdzinaayin mjugy'ajtin ajcxy, jadu'n nej jëbi huaad quëxigy co mmibijccixy Cristo. ⁹ Co nmüd'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpijccix je tiy'ajt huidibi Dios yjâygidacpy. ¹¹ Ca' miich ajcxy mnaymigüg'ájtigixy müd yi jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuijcx müd Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimiyaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi jadu'mbi jäy ajcxy ayuc müd Dios y'ayuc, chi niguëxigy pen janch tiy'ajt o pen ca' ytiy'ajtity, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tücxin. ¹⁴ Paady ycixpi Dios y'ayuc jadu'n yminañ:

Mäyhuijp miich ajcxy huidibi jadu'n nipatp nejjihuïy mdzachmaagixyp. Jugypijccix miich ajcxy huidibi jadu'n nipaady nejjihuïy ti m'öccixy. Cristo xycodíxcixipy müd yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi chinaayin. Tzinaaygix jadu'n nejjihuïy mnejhuïygixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuïygixy Cristo ytiy'ajt. ¹⁶ Ni'ix'ijtcix jabom jabom jëbi mguydungixy Cristo ytiy'ajt. Jadachambi xi tiempo mayjäy ytundigooygixy müd Cristo ytiy'ajt. ¹⁷ Ca' loci huinma'ñ myajtungixy, per nejhuiygixyp nej Dios tzocy co mdúngixipy. ¹⁸ Ca' huaad m'ijtcixy amügy jäy, com yi jocni xyajníxcixipy ayo'nduum. Nigi oy m'ijtcixy Dios yjihui'ñ ymic'ajt may'amy ma ajcxy mjot mhuinma'ñ. ¹⁹ Naymigápxigixy miñ xyipy müd yi salmo ayuc, müd yi himnos. Huin'igix Dios müd je iy huidibi je Espíritu Santo

xymooygixyp. Huin'igix etz ojadajtcix Dios cixyjot huinijot. ²⁰ Jatyim yajnajxcixy jabom jabom jâygidaacin ma ajt nDios Teedy ma ajt nHuindzin Jesús yxii, miid tûg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Miid co miich ajcxy mhuindzigiy Dios, paady ycixp miich ajcxy mnayyajmij'ájtigixy mnaygapxymidoohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi mñây ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³ Com je töxyjäy ñây nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnîdzögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidoogixipy yi ñây ajcxy.

²⁵ Nañ jadu'n tzocy co je yëydijc huen tzocy jihuüy ytöxyijc, tim jadu'n nej Cristo tzocy jihuüy yi mibijcpidijc, e paady ycixp yejc yi' yjugy'ajtin miid yi' ajcxy ycixpi. ²⁶ Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzi yi mibijcpidijc ajcxy yjot yhuinma'ñ miid yi'y'ayuc etz co niibejt ajcxy miid nii. ²⁷ Jadu'n Cristo yajhuaach yi mibijcpidijc ajcxy yjot yhuinma'ñ, jigix jëbi ajcxy nayguëxigiyb ma yi' yhuinduu miid huädz yjot yhuinma'ñ. Je mibijcpidijc ajcxy nipaady nej tûg nîjen huidibi huädz, ca' ma ytijy ymächity. ²⁸ Jadu'n tzocy co je yëydijc huen tzocy jihuüy ytöxijc tim jadu'n nej ci'm naychogyii. Yi yëydijc huidibi tzojcp jihuüyb ytöxyijc nañ jadu'n ci'm ñaychogyii. ²⁹ Ca' ji ni pin huidibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninîcx, tim jadu'n nej jây ajcxy cuend'ajtcixy yci'm ñinîcx nañ tim jadu'n Cristo ycuend'ajtpy yi mibijcpidijc. ³⁰ Jadu'n Cristo cuend'ajtpy yi' yjây, com jadu'n ajcxy nipaady nej yi' ñinîcx. ³¹ Com copicy je yëydijc tzogîp jihuühuip ytöxyijc jadu'n nej Cristo tzocy jihuüy yi mibijcpidijc. Paady ycixp je yëydijc ixmadzipy ytaj yteedy, e ypudigihuipy ytöxyijc, e jadu'n ajcxy chinähuipy nej jihuüy ytügpaicity. ³² Ooy chachmijhuinma'ñity jada tiy'ajt huidibi yûch anajty ijtp, e yi' iich jadu'n tijpy yi Cristo etz je mibijcpidijc. ³³ Cuendipijccix jada tiy'ajt co nidüg nidüg miich yëydijctijc ajcxy huidibi pijccixp copicy mdzogipy mihuühuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñây.

6

¹ Pi'ctijc ajcxy huidibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ² Yi Dios ycötujcin huidibi minamb: "Yajmij'ajtcix mdaj mdeedy", yi' ooy ytimycopicyity. Nañ jadu'n co nguyduunim jada cötujcin, huin'it Dios jecy xyajtzinaayim. ³ Co miich ajcxy jadu'n myajmij'adipy mdaj mdeedy, huin'it Dios xymöhuipy ajcxy jotcuje'ajtin, e nañ jadu'n xyajtzinaaygixipy jecy ya naaxhuiñ.

⁴ E miich ajcxy huidibi ungdeedy'ajtcixp, ca' nigoo myajjotma'tcotcixy yi m'ung ajcxy. Ane'ngix yajyeccix yi m'ung ajcxy miid Dios y'ayuc ytiy'ajt, jaydëbi capxymidoogixipy ajcxy Dios.

⁵ Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigiygix. Tim jadu'n nej jihuüy mgapxymidoogixy yi mHuindzin Jesucristo.

⁶ Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindicxcixy, e chi co je' yjihuäcni, chi nigoo mhuäccixni mdinääygixni. Tungix jadu'n nej huaad jây ytuungixy yi huidibi mijpidaaccixp Jesucristo. Tungix cixyjot huinijot jadu'n nej Dios tzocy mdúngixipy.

⁷ Tumbidijc ajcxy, tungix mdung cixyjot huinijot, tim jadu'n nej jihuïy mdungixy je Huindzin Jesucristo ytung, e ca' yjâydungity. ⁸ Mnejhuïyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci' mdung ytumyb, o pen ytumb müd tüg huindzin.

⁹ Miich ajcxy huidibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiïygixipy ca' mdzaachytungixipy. Ajihuïyigixy co miich ajcxy etz nañ jadu'n mdumbi ajcxy müd ajcxy mHuindzin tzajpjoty, e yi mHuindzin tzajpjoty quipxyjaty tiyduna'ñ nidüg'óciy miich ajcxy.

Je mic'ajt huidibi je mibijcpidijc ajcxy ypatcixyp müd Dios yjihuïñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt müdity, paady jëbi miich ajcxy mbatcixy yi mmic'ajtin ma yi'. ¹¹ Naygohuaanigixy miich ajcxy ma je mujcu' müd tüg'óciy tiy'ajt huidibi Dios xymooyim, huidi müd naygohuaanim ma je mujcu', e jadu'n ca'ydí je mujcu' xymimadaacim müd aní. Jadu'n Dios ytiy'ajt nipaady nej tujt etz pujxnñen huidibi soldados ajcxy müd naygohuaangixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'óciy mic'ajt müdpi huidibi midzip'ajtp Dios ya naaxhuiñ etz jüby tzajpjoty, ca'p ñch ajt nmidzip'ajtim naaxhuiñjây. ¹³ Paady ycixp yajtungixy tüg'óciy mic'ajt etz tiy'ajt huidibi Dios ti xymooyigixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi müd ajcxy mmibijcin. E co anajty ti mmimadactaaygixy, huin'it m'ijtcixipy mic ma ajcxy mmibijcin. ¹⁴ Ca' m'ixtigihüaccix ma ajcxy yi mmibijcin. Nayñi'ixiïyigix müd Dios ytiy'ajt, jadu'n nej jây ajcxy ñayhuïndädzigixy co ytunaangixy. Nayñi'ixiïyigix tim jadu'n nej soldados ajcxy ñayñi'ixiïyigix müd pujx nñen ma caach co chiptunaangixy. ¹⁵ Nayñi'ixiïyigix müd Dios y'ayuc, jigix jëbi ajcxy ñicxy mgapxhuäcxi Dios y'ayuc huidibi jotcuje'ajtin yejcp. Co jadu'n mdungixipy, jadu'n nibaadip tim jadu'n nej soldados ajcxy ñayñi'ixiïyigixy co yajtigixy yzapato co ytüyöyaangixy. ¹⁶ Yi' huidibi jac copicyip ca'ydí jac ni ti, mibijccix tiydudägy Jesucristo. Müd ajcxy yi mmibijcin jëbi mnaygohuaanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuaanigix ma je tip huidibi yajnajtztübiïyb müdi jün. ¹⁷ Nayñi'ixiïyigix müd Cristo ytiy'ajt huidibi müd ajcxy m'alma xyajnidzoocip, tim jadu'n nipaady nej soldados ajcxy ñaygohuaanigixy co pidaaccixy ypujx cöjup co chiptunaangixy. Naygohuaanigix miich ajcxy müd Dios y'ayuc huidibi jadu'n nipatp nej tüg espada huidibi je Espíritu Santo ti xymooyigixy. ¹⁸ Mibijctzoogix Dios müd tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom müd je Espíritu Santo ypubejtin. Huijy ycuje m'ijtcixipy, ca' mjetmetzcüygixipy. Mibijctzoogix Dios müd tüg'óciy mibijcpidijc ajcxy ycixpi. ¹⁹ Nañ jadu'n mibijctzoogix Dios müd ñch ycixpi, co huen xymöyich ayuc etz jotcuje'ajtin, jigix jëbi ngapxhuäcxibich huinmic jotmic yi' y'ayuc ytiy'ajt huidibi ca' pin jecy'ajty nejhuïygixy. ²⁰ Dios ti xyajñibicyich jada tung jëbi nyajnicxyich yi' y'ayuc ytiy'ajt ma je mayjây ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios müd ñch ycixpi co xyajjotmicpigipyich jigix jëbi ngapxhuäcxyich yi' y'ayuc huinmic jotmic.

Capxpoocxin huidibi cogixiïyñip

²¹ Ooy ndzocy njihuïyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmüdmidyägiy tüg'óciy je tiy'ajt nej nya-jpaadyich ya, etz tüg'óciy tung huidibi ya ndumybich. ²² Nguexaamybich Tíquico ma miich ajcxy jigix jëbi xymüdmidyägiy ajcxy jadu'n nej nyajpaadyich ya, e müd jada tiy'ajt jëbi miich ajcxy mjetcugiïygixy.

²³ Huen Dios Teedy etz ajt nHuindzin Jesucristo may'ajt tunipy mid miich ajcxy, jigix jëbi jotcuje mdzinaaygixy, etz nañ jadu'n jëbi mnaychójcigixy mnayjihuúyigixy miñ xyipy, etz jigix jëbi mjacmibijccixy Cristo. ²⁴ Huen Dios may'ajt oy'ajt tunipy mid miich ajcxy huídibi yajmij'ajtcixp ajt nHuindzin Jesucristo huinixi huinitiendo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Necy Hu'idibi San Pablo Yajniguejx Je Mibijcpidijc Jim Filipos

¹ Hich Pablo miid Timoteo tumbich ma Jesucristo ytung. Jada necy ich ajcxy nguejxpy ma tüg'óciy hu'idibi mibijcp Dios jim Filipos hu'idibi yajpaatp ma Jesucristo. Nañ jadu'n jada necy nyajniguesyich yi' ajcxy mjtungmüdpí etz mutztungmüdpí ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy miid miich ajcxy ycixpi etz xyajjotcugüygixipy.

Pablo mibijctzoy Dios miid je mibijcpidijc ycixpi

³ Naag'oc naag'oc njäymechich miich ajcxy njatytimyajnaxpyich jäygi daacin ma Dios miid miich ajcxy ycixpi. ⁴ Njatytimjotcuja'ajtpich ooy naag'oc naag'oc Dios nmibijctzooyich miid miich ajcxy ycixpi. ⁵ Jotcuja'ajtpich com miich ajcxy ti xy-pubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶ Nejhuüybich tiydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jactunaamni ma miich ajcxy mjot mhuinma'ñ ixti mabaad Jesucristo anajty ymiiñ jadüg'oc ya naaxhuiñ miid y'ane'min etz ymic'ajt. ⁷ Ooy ytudägyity co jadu'n jotcuja'ajtpich miid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajniñicyich jada tung, etz miich ajcxy myajpaady quipxy miid ich ma Dios ytung, miid co miich ajcxy xyjäymechich etz nañ xypubetyich ajcxy, huenma'amy ich nyajpaady, oy ixipy pujxtigoty, oy ixipy ma tungmüdpí yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy miid je tzojcin jihuüyin hu'idibi Jesucristo ti xymöyich. ⁹ Nmibijctzooybich Dios miid miich ajcxy ycixpi co xypubedipy ajcxy jigix jëbi nigi mdzogipy mjihuühuipy migügtijc, etz jigix ajcxy nigi m'ixpigipy je tiy'ajt tudägyi, etz nañ nigi mhuinjihuühuipy tüg'óciy nej Dios tzocy co nduunim. ¹⁰ Nañ nmibijctzooybich Dios miid miich ajcxy ycixpi jigix jëbi mnejhuüygixipy, etz nañ jigix jëbi mhuin'íxcixipy hu'idibi jac'oy mdúngxixipy. Co oy mdúngxixipy, huin'it jëbi mdzinaaygixy miid huädz jot huädz huinma'ñ, e ca' ni ti jotmay miich anajty ajcxy mmüdiñ, co anajty je xi je tiempo paady co Jesús anajty miñ ya naaxhuiñ jadüg'oc miid y'ane'min miid ymic'ajt. ¹¹ Dios nmibijctzooybich miid miich ajcxy ycixpi co ajcxy mbattähuip tüg'óciy oyjot oyhuinma'ñ, je oyjot oyhuinma'ñ hu'idibi Jesucristo tügpajc jëbi xymooygixy. E jadu'n jäy ajcxy capxpaadip Dios etz nañ huin'ügixip Dios co ajcxy ixipy nej tudägy mdzinaaygixy.

Miid ich, yi njugy'ajtich, yi yi' Cristo

¹² Ndzojcpyich co miich ajcxy mnejhuühuipy co miid je tzaachypí ycixpi hu'idibi nminaxyp nyajnaxypich ya pujxtigoty, nigi mayjáy ti midoy Jesús y'ayuc ytiy'ajt. ¹³ Jadu'n ti yhuimbizimy co tüg'óciy soldadtijc etz jacjadyi jäy ya ma je gobierno ymijtijc ti nejhuüydäy ajcxy co nbujxtijc'inäyich miid co nduunich ma Jesucristo ytung. ¹⁴ Nañ jadu'n miid co nbujxtijc'inäyich, paady ycixpi yi jacjadyi mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcx'y adichpy ajcxy Dios y'ayuc ytiy'ajt, ca' ma tzig'iñ jihu'iñ.

¹⁵ Janch tiy'ajt jada co nijëjity jäy capxhuäcx'y je Cristo y'ayuc ytiy'ajt miid co ca' xyajmidzojccixy, etz nañ miid co xyajmidzip'ajtcixy. Nañ tiy'ajt jada co jacjadyi migügtijc xychojcp xyjihuüyb ajcxy, e capxhuäcx'y ajcxy je Cristo y'ayuc ytiy'ajt miid oyjot oyhuinma'ñ. ¹⁶ Janch tiy'ajt co nijëjity migügtijc capxhuäcx'ixy Jesucristo y'ayuc

müid co ñaygömayañyüi ci'm, ca' nmünaanim ycapxhuäcxp ajcxy cixyjot huini jot. Yi' ajcxy y'ixtaayb nej xyajtajipy xyajmayipyich, jadu'n nej üich pujxtigoty n'ityich. ¹⁷ Yi' ajcxy huiidibi xychojcpich xyjihuiyibich ycapxhuäcxpy ajcxy Cristo y'ayuc com ñejhuiyib ajcxy co üich yam n'ityich pujxtigoty, müid co ti nhuinmaññ nbiidägyich co nnigapxpedaññich Jesucristo y'ayuc ytiy'ajt. ¹⁸ Pen jäy ajcxy capxhuäcxp Cristo y'ayuc müid co ñaygömayañyüi ci'm, o pen ycapxhuäcxp müid oyjot oyhuinmaññ, ca' ñejity, jotcuje'ajtpich co capxhuäcxp ajcxy Jesucristo y'ayuc.

¹⁹ Com nnejhuiyibich co müich ajcxy mmibijctzoogixy Dios müid üich ycixpi, e nañ nnejhuiyibich co Jesucristo yjihuiññ ymic'ajt xypubetyich, paady nigi njotcugiyich, e nañ njijp'ijxypich co nbidzimaññich pujxtigoty. ²⁰ Ndzojcpyich etz nañ njijp'ijxypich co nmimadactähuaññich tüg'óciy ma üich mdzinaayin, e ca' ti tzöydu'n nbáadibich ma Dios yhuinduu. Ndzojcpyich nañ njijp'ijxypich co njaccapxhuäcxibich Jesucristo y'ayuc huinmic jotmic, jigix Jesucristo ycömay'idipy. Ca' ñejity pen jactzinaayb, o pen n'o'cpich. ²¹ Üich ndzinaayin njuugy'ajtin Cristo yi' ycixpi, e peni n'o'cpich, ti üich anajty mij nmadägy. ²² Pen njactzinaaybich, mayjäy oybi padaññ müid üich ndung ycixpi. Ca' nnejhuiyich huiidibi jac'oy nhuin'ixipyich co tzojc n'ögibich, o co njactzinähuibich. ²³ Ooy chachchipity nnejhuihuibyich huiidibi jac'oy nhuin'ixipyich, co n'ögibyich, o co njactzinähuibyich. Üich ci'm nayjihuiyijich nigi jotcuje co ixypy tzojc n'ögyich, jigix ixypy mic'amy nicxy n'ityich jiiyby tzajpjoty ma Cristo yajpaady. ²⁴ Per jaccopity müid müich ajcxy m'oy'ajtin ycixpi, co njactzinähuibich. ²⁵ Com nnejhuiyibich co copicy njacpubedaññich müich ajcxy, paady nnejhuiyibich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n müich ajcxy nigi mjotcuje'adipy ma mmibijcin. ²⁶ Müich ajcxy huiidibi yajpaatp ma Jesucristo, nigi jotcuje m'idipy co nicxy n'idaññich jadüg'oc ma müich ajcxy.

²⁷ Jëyi janchtiy co mdzinaayin mjugy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma müich ajcxy, o pen ca' nnicxyich, per ndzojcpich co xypáadibich tiy'ajt co müich mic m'ijtcixy ma mmibijcin, tú'ciy cixyjot huini jot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸ e ca'ajcxy mdzigihuip co jäy ajcxy xymidziptzóongixipy, jada je' tiy'ajt co tigoyamb ajcxy y'alma, e nañ jada je' tiy'ajt co müich ajcxy chóocixipy yi m'alma, e nañ jadu'n jada tiy'ajtip co Dios y'ity müid müich ajcxy. ²⁹ Dios may'ajt oy'ajt ti tuñ müid müich ajcxy ycixpi co yaj'oyiy nej jëbi müich ajcxy mibijccixy Jesucristo etz nañ nej jëbi tzaachyp mminajxcixy myajnajxcixy müid Jesucristo ycixpi. ³⁰ Üich etz müich ajcxy quipxyi ti mminajxim ti nyajnajxim tung ayo'n müid Jesucristo ycixpi. Müich ajcxy ti m'ixy ti mnejhuiy jadu'n nej üich ndung n'ayo'n ti nminaxy ti nyajnaxyich, co jim anajty n'ityich ma müich ajcxy. E nañ müich ajcxy mnejhuiyib nej üich chambaad nminaxy nyajnaxyich ndung n'ayo'nich müid Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo müich ajcxy mjot'amijmooyb müid yjihuiññ müid ymic'ajt, pen ti jotcuje'ajtin mbatcixy müid co Cristo xychojccixy xyjihuiygixy, pen yi' yjihuiññ ymic'ajt ijtp ma müich ajcxy, pen mdzojccixyp mjihuiygixyp etz nañ mba'ayoogixy migügtijc, ² jotcuje'adipich müid co mdzinaaygixy ooy yajxon, xic xon, tügyi mnaychójcigixy mnayjihuiygixy miñ xyipy, tzinaaygixy quipxyjot quipxyhuinmaññ. ³ Ca' ajcxy ti mdunipy müid mgi'mdzojcin ycixpi. Nañ ni ca' amij agix naybidáacigixy co ti mdungixy. Tüg'óciy huiidibi mdungixyp, mdunipy ajcxy müid yung naxy mjot mhuinmaññ. Nidüg nidüg myajmij'adipy nigi

migügtijc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtây, nañ jadu'n tzocy co migügtijc myajmidzogipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesucristo anajty yhuinma'ñ mĩdity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jēbi ixmach yi' ymij'ajtin huidibi anajty yjamid. ⁷ Jesucristo ahuingujc pidaactay je mij'ajt huidibi anajty ymĩd, e chi jadu'n chinay nej tũg tumbi co oy jadu'n ypi'c'aty jadu'n nej jây. ⁸ E co jadu'n ñaybidaaci nej naaxhuiñjây, chi yung naxy pidacy yjot yhuinma'ñ, e nañ capxymĩdoy Dios ixti mĩbaad ñayyejci, huen jây yaj'ögyii. E ooy anajty cho'ydu'nity co jây yaj'o'ci cruudzcĩxy. ⁹ Paady ycixp Dios ti cōmay jacnĩgi Jesucristo, e ti pidäci yi' yxii jaccōmay, ca'ydi jacpinjây yxii. ¹⁰ Jadu'n Dios ti cōmay Jesús, jigix jēbi tũg'óciy tzajpjoty tzinaaybi etz tũg'óciy naaxhuiñjây, etz tũg'óciy jây ajcxy huidibi ti ñaaxtigiy, co anajty ajcxy nidũg'óciy mĩdoogixy co Dios capxpaatip Jesús yxii, chi ycojxtinaay'ihuiydāhuipy ajcxy ma yi' yhuinduu, etz y'ojadadipy ajcxy Jesús nidũg'óciy. ¹¹ E co nidũg'óciy ajcxy cōbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycōmay'ida'ñ.

Yi pin ajcxy Cristo mibijcp, yi' yi' ajcxy jadu'n nej tũg tĩcxin jajin

¹² Migügtijc ajcxy huidibi ooy ndzocy njihuĩyich, com Jesucristo jadu'n iixpejtin ti yecy, capxymĩdoogich cham co jĩguēgy nyajpaadyich ma miich ajcxy, tim jadu'n nej jayhuin iich miich ajcxy xycapxymĩdooy co n'ĩjtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huädz mjot huädz mhuinma'ñ. Tungix Dios ytung mĩd yung naxy ajcxy mjot mhuinma'ñ, e huindzigĩyigix Dios. ¹³ Com Dios yi' tumb jabom jabom ma miich ajcxy mjot mhuinma'ñ, jigix jēbi miich ajcxy mdunipy yi' ytung yi' chojcin cixyjot huinijot jadu'n nej Dios tzocy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' mĩd tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxĩgixy co ti mdundigooygixy. Miich ajcxy Dios xy'ung'adiib, ca' mnĩgix'adiyb ajcxy ti jibicpi. Tzinaaygix mĩd oyjot oyhuinma'ñ ma yi' jây ajcxy yajpaady huidi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjädijc ajcxy, jadu'n nipaady nej tũg madzä ytiicxy coodz. Pen jadu'n mdungixy, co anajty Cristo ymiiñ jadũg'oc ya naaxhuiñ, jotcuyc'adipich co anajty nnejhuĩyich co ca' iich ndung etz nxii ndiempo yñadigĩ'aty co n'ĩjtyich ma miich ajcxy. ¹⁷ Co n'ögibich mĩd Cristo ytung ycixpi, jadu'n nipaady nejjihuĩy iich nni'py ti ndem ti nyocyich mĩd miich ajcxy ycixpi co ti ngapxhuäcxyich Dios y'ayuc ma miich ajcxy. E co miich ajcxy ti mmijpidaaccixy iich n'ayuc, jadu'n nipaady nejjihuĩy miich ajcxy ti myoxy ti mdoogy yi' mjogy'ajtin ma Jesucristo. Jotcuyc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuyc'adipy quipxy mĩd iich.

Timoteo etz Epafrodito

¹⁹ Pen iich ajt nHuindzin Jesús tzojcpy, njipp'ixypich co jēbi nguexipyich Timoteo ma miich ajcxy, jaydēbi njotcuyc'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tũgpajc huidibi huinma'ñ tú'ciy mĩd jadu'n nej iich nhuinma'ñ nmĩdidyich, etz nañ huidibi janch naybidaacip mĩd miich ajcxy m'oy'ajtin ycixpi. ²¹ Yi jacjadyii migügtijc huidibi yajpatp ma iich, yajcopijcpy ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy mnejhuĩyb jadu'n nej Timoteo tudägy ytuñ mĩd iich co ngapxhuäcxyich Jesucristo y'ayuc ma miich ajcxy, tim jadu'n nej tũg ung ytuñ mĩd yteedy. ²³ Paady ycixp njipp'ixypich co jēbi nguexyich Timoteo ma miich ajcxy mina anajty nnejhuĩyich nej ycixipy iich njotmay huidibi nmĩdich ya. ²⁴ Nañ nmibijcypich ajt nHuindzin Jesucristo co yaj'ahuädzĩp iich nni'a ndũ'a co jēbi iich ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ich, jëbi xypubetyich ma tüg'óciy huidijaty nyajmayajtypich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüy co ypiyüi. ²⁷ Janch tiy'ajt co Epafrodito ooy ti ypiyüi, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nigi ayo'n jotmay nbaadyich. ²⁸ Paady ycixp nigi ndzocyich co jëbi nguexipyich Epafrodito ma miich ajcxy jadüg'oc, jigix miich ajcxy mjotcugihuip co m'ixipy. E nañ jadu'n jëbi yquëgy ich ndajin mayin müd yi' ycixpi. ²⁹ Cöbijccix Epafrodito jotcuje, jadu'n nej tüg migüg huidibi yajpaatp ma ajt nHuindzin Jesús. Yajmij'ajtcix tüg'óciy migügtijc huidibi yjugy'ajtin yojxp toocp müd Jesucristo ytung ycixpi, jadu'n nej yi' ti ytuñ. ³⁰ Com jago jago Epafrodito ti yca'ögy müd Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' ci'm jëbi xypubéjtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtijc ajcxy, jotcuje'ajtcix co myajpatcixy ma ajt nHuindzin Jesucristo. Ca' ti adzippin njihuüyich co nnigapxpetyich jada tiy'ajt jadüg'oc huidibi jayhuin ti nyajnijayiygixy. Jadu'n nduñich müd miich ajcxy m'oy'ajtin ycixpi. ² Naygüendi'ajtigix müd yi' ajcxy y'ayuc huidibi ajcxy tundigooyb co ajcxy yajcopijcy yi' tiy'ajt huidibi pidacp ma jäy ñinix müd tzujc. Jibic jäy yi' ajcxy, jadu'n ajcxy nipaady nej uc. ³ Yi' jäy ajcxy huidibi tiydudägy mibijcp Dios, ca' nmīnaanīm je' yi' ajcxy huidibi tiy'ajttiyip ñinix. Yi' Dios yjäy ajcxy janchypi, yi' ajcxy cixyjot huinijot mibijcp mijpidacp Dios ytiy'ajt jadu'n nej ich ajt. Ich ajt n'ojadajtim Dios müd ajt n'espíritu, etz müd ajt njot nhuinma'ñ. Jotcuje'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixipy ytiy'ajtiy yi' jadu'mbi huinma'ñ, jëbi ixipy naygōmayijich ci'm, com jecy'ajty ca' anajty ni pin huidibi nigi cuyduun yi' jadu'mbi tiy'ajt ca'ydi ich. ⁵ Co nductujcxijjyich ma anajty ti nma'xung'atyich, chi oy nyajtiy'ajttiyich. Raza hebrea ich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. Ich ndaj ndeedy hebreojäy ajcxy anajty. Nañ nmijpidaacich fariseo y'ixpijin, jadu'n nej ajcxy yajniguey judíojäy ycötujcin. ⁶ Ich janchmictägy anajty nguyduñich ngi'mhuinma'ñich, ixti mabaad anajty n'ixhuidity nbahuidityich mictägy yi' jäy ajcxy huidibi anajty mijpidacp Jesucristo. Ti nguydundäyich tüg'óciy judíojäy ycötujcin. Ni pin ca' huaad yxiyich co ti ndundigooyich ma yi' ajcxy ycötujcin. ⁷ Tüg'óciy yi' judíojäy yhuinma'ñ huidibi ti nyajcopicyich anajty, jadachambi ca' ytimychobaady müd ich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyajcopijcpyich, ti nnajtz'ixiyyäyich, jigix jëbi nnejhuühuibich etz nguydunipich yajxon ajt nHuindzin Jesucristo oybi y'ayuc ytiy'ajt. Müd co ti nmijpidägyich Jesucristo, paady nnajtz'ixiyyäyich tüg'óciy huidibi anajty nyajcopijcpyich, yi' jadu'mbi huinma'ñ cham ca' chobaady müd ich, jadu'n nipaady nej pux. Jadu'n nduñich müd Jesucristo ytiy'ajt oy'ajt ycixpi. ⁹ E jadu'n nduñich jigix jëbi nyajpaadyich ma Jesucristo. Jadu'n ti nnajtz'ixiyyäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jëbi nbáadibich je tudägy'ajtin huidibi Dios yejcpy co nmibijcim nmijpidaacim Jesucristo. ¹⁰ Ndzojcpyich co njacnejhuühuibich Cristo y'ayuc ytiy'ajt. Nañ ndzojcpyich co njacnejhuühuibich Cristo ymic'ajt, jadu'n nej yjugypijcy co y'o'cy. Nañ ndzojcpyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yjaty co

y'o'cy. ¹¹ E paady ycixpi njipp'ijxpyich co n'ögibich njugypigipyich jadüg'oc co anajty Dios yajjugypicy yi jäy ajcxy tübi y'öccixy.

Naymic'ijxim jigix nbaatim huidibi Dios ti xyaj'ahuanayim

¹² Ca' nmīnaanīm jadu'n nmīna'ñich co ti nmīmadactāyich nej Cristo ti mīmadactāy. Nañ ni ca' jadu'n nmīna'ñich co ñich njot nhuinma'ñ ti nyajhuätztāyich. Njactumnich, jigix jēbi Cristo y'oy'ajtin nbāadibich. Com Jesucristo ti xyhuin'ixyich jayijp, jaydēbi jada oy'ajtin nbāadibich. ¹³ Migügtijc ajcxy, ca'ñich ci'm naygōmayijich, co ti nmīmadactāyich Cristo y'oy'ajtin. Jada janchtiy ndumbyich, njäy digoydaaybich tüg'óciy huidibi ti ñaxy, e mictāgy nduunich jēbi nbāadibich je oy'ajtin huidibi Dios jii by tzejpjoty xymōhuaambich mīd co nyajpaadyich ma Jesucristo. ¹⁴ Mictāgy nduunich mīd tüg'óciy nmic'ajtich, jigix jēbi nbāadibich je oy'ajtin huidibi Dios jii by tzejpjoty xymōhuaambich. Jadu'n nipaady nejihuīy mīd pin nayboyicquixyijich co nbada'ñich tüg premio.

¹⁵ ñich ajt ti nhuinma'ñ yci xni yca'pxni, tzoc panīcxim je ixpijcin huidibi nmīd'ajtim. E pen nidügti mīich ajcxy tigachjaty huinma'ñ mīdity, Dios xyajnejhuīhuip ajcxy je tiy'ajt.

¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, panīxcix ñich n'ixpejt jadu'n nej ti ndzināyich ma mīich ajcxy. Nañ jadu'n mīich ajcxy ixpejt mbigipy ma yi' ajcxy chinaayin huidibi ixpejt ti patcixy ma ñich. ¹⁸ Canaag'oc ti nnīmaaygixy, e nnīmaaygixy jadüg'oc mīd tajin mayin co may nmigügtijc chinaaygixy jadu'n nej jihuīy mīdzip'ajtcixy je Cristo huidibi o'c cruudzcixy mīd ajt nbocy ycixpi. ¹⁹ Dios yajtigoyip je'ajcxy y'alma. Yi' ajcxy ypidacpy yhuinma'ñ ma yi' caayin uucin jicxy ypic, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygōmāyigixy ci'm ma yjapadyii tzo'ydu'n jihuīyigixipy. Hue' pidaaccixy yhuinma'ñ ma naaxhuiñ jäy chinaayin. ²⁰ ñich ajt hue' nyajpaatim njäy'ajtim tzejpjoty, e njipp'ijxim co ñich ajt nHuindzin Jesucristo mīinaamb ya naaxhuiñ jadüg'oc, chona'ñ tzejpjoty, je huidibi xyajnidzōgaanim ajt n'alma. ²¹ Jesucristo xyajtigadzaanim ajt nninīcx pocymīdipi, e xymōhuaanim tüg ninīcx jemybi oybi, tim jadu'n nej yi' ñinīcx mīdity. Cristo xyajtigadzaanim ajt nninīcx mīd yi' ymic'ajt huidibi mīd ane'mdāy mīmadactāy.

4

Jotcuje'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninīcx, paady ycixpi migügtijc huidibi ooy ndzocy njihuīyich, tiydudāgy mibijccix ajt nHuindzin Jesucristo, ca' m'ixtigihuāccixy ma mmibijcin. Migügtijc ajcxy huidibi ooy nicxy nja'ixa'ñich, ooy njotcuje'atyich mīd mīich ajcxy ycixpi. Mīd mīich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtzicxy yi' tzip etz huen naymigügpīcigixy jadüg'oc, com hue'ajcxy yajpaady mibijcpi ma Cristo.

³ Mīich migüg huidibi ti xypubetyich ma Cristo ytung, may'ajt nbijctzooybich ma mīich co mgapx'oyihuipy je tzip ma ajcxy je metzpi töxyjäy. Yijibi metzpi töxyjäy tumb anajty ajcxy quipxyi mīd ñich co ngapxhuācxyich Jesucristo y'ayuc ytiy'ajt. Yi' ajcxy xypubejtich quipxyi mīd Clemente etz yi' jacjadyii huidibi anajty tumb quipxyi mīd ñich. Jada metzpi töxyjäy ajcxy yxi ycojayiy ymīñ ma Dios ñecy, je necy ma Dios mīdity cojay je jäy ajcxy yxi huidibi padamb jugy'ajtin huinixibi.

⁴ Jotcuje'ajtcix huinixi, mīd co myajpatcixy ma ñich ajt nHuindzin Jesucristo. Jadüg'oc nīgapxpetyich co huen jotcuje'ajtcixy. ⁵ Jadu'n tzinaaygix jadu'n nej jēbi jäy ajcxy nejhuīygixy co mīich ajcxy myajtungixy mecxtujcin ma mdzinaayin. Com huīgon je xi je tiempo mina ymiina'ñ ñich ajt nHuindzin Jesucristo jadüg'oc.

⁶ Ca' ni ti mnidajcixy mnīmaygixy. Capxpīdzimdaaygix ma Dios tüg'óciy ti jotmay mīich ajcxy mmīd. Mibijctzoogix Dios, e nañ yajnajxcix jäygidaacin ma Dios. ⁷ Co Dios mmibijctzóogixipy, huin'it ajcxy yi' xymōhuip jotcuje'ajtin mijcajee, e mayñaaxhuiñjäy

ajcxy ooy yhuinmay ahuididipy mïid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzināhuipy ajcxy jotcuje etz xymōhuip ajcxy huinma'n tudāgypi.

Tzójccix nijot'ajtcix huídibí oyip

⁸ Jadügnax, migügtijc ajcxy, pidaaccix mhuinma'n ma tüg'óciy tiy'ajt huídibí janchip, tüg'óciy tiy'ajt huídibí jēbi nyajmij'ajtim. Pidaaccix mhuinma'n ma tüg'óciy tiy'ajt huídibí tudāgyip. Pidaaccix mhuinma'n ma tüg'óciy huinma'n huídí huādzip etz tüg'óciy huinma'n huídí oy jāygidacni. Pidaaccix mhuinma'n ma tüg'óciy huinma'n huídibí jēbi yajcapxpaady. Huinmaaygix tüg'óciy jada oybi huinma'n etz huídibí huaad njāygidaacim.

⁹ Yajtungix je tiy'ajt huídibí ti nyaj'ixpijixy, etz je cōtujc huídibí ti nmooygixy, etz je ayuc huídibí ti mmidoogixy co ti ngapxyich. Etz nañ tungix je ijsxpejt huídibí ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotcuje'idipy ajcxy.

Filipenses ajcxy y'ofrendi mïid Pablo ycixpi

¹⁰ Ich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjāymechich jadüg'oc. Ca' nmīnaanīm nmīna'nich co miich ajcxy ti xyjāydidogyaaynich. Hue' anajty ycanibidzimy nej jēbi xypubejtcixyich. ¹¹ Ca' nmīnaanīm jadu'n nmīna'nich co ooy ti jaty nyajmayajtnich. Com ti nhuinma'n nbidāgyich co njotcuje'adipyich mïid tijaty nmīdich, oy tim mīnaaxi tim mīnaatiempo. ¹² Com ich ci'm nejhuīybich nej jay ajcxy y'ayoy yjottigooy, e nañ nejhuīybich nej jāy ajcxy chināy co mïid'aty tijaty may'amy. Ti nnejhuīydyich nej jēbi ndzināyich, nej jēbi nyajnajxich xi tiempo; pen cu'xyi ngaayich, o pen ca' cu'xyi ngayich, pen nmīdich conax, o pen ca' ti nmīdidyich. ¹³ Jēbi ndzināhuībich jotcuje huenti huennejity, com Cristo xymic'ajtmooybich. ¹⁴ Ooy oy ti mdungixy co ti xypubejtcixyich ma ich n'ayo'n njotmay.

¹⁵ Jadu'n nej miich ajcxy huídí jīm Filipos mnejhuīyb ajcxy, je taabi nyajtzondacyich co ngapxhuācxyich Jesucristo y'ayuc ytiy'ajt, co ndzooñich jīm Macedonia miich ajcxy ti xymīoxyich, e jac tigati ti mguejxcixy ma ich. E miich ajcxy jīm Filipos huídibí mibijcp Jesús, miich ajcxy tūgpajc xypubejtich ca' jac ni pin. ¹⁶ Co n'ijtyich jīm Tesalónica miich ajcxy xyajniguejxyich pubejtin metz'oc tugiig'oc, e jadu'n miich ajcxy xypubejtyich mïid huídibí anajty nyajmayajtpich. ¹⁷ Ca' nmīnaanīm ooy ndzachjip'ixynich pubejtin, jada janchtiy ndzojcpyich co miich ajcxy nīgi oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadiy yi mbubejtin ixti nyajconajxpich. Mïid je pubejtin huídibí ti myajmiguejxcixy Epafrodito cham nmīdidyich ca'pxy, ca'ti n'ocyajmayajtnich. Mïid jada pubejtin huídibí miich ajcxy ti xymōyich, ti ooy njāygidāgyich, tim jadu'n nej Dios jāygidacy je poomjoc huídibí yajhuindzigīyi. ¹⁹ Ich nDios miich ajcxy xymōhuip tüg'óciy huídibí miich ajcxy myajmayajtpy. Mijcajee yi' miich ajcxy xymōhuip yi oybi mijpi oy'ajtin huídibí yi' ymīd ma yi Jesucristo. ²⁰ Huen ich ajt nDios Teedy cōmay'idipy huinixi huinītiempo! Jadu'n jada. Amén.

Capxpooxñ huídibí cijxnip je necy

²¹ Tungix may'ajt capxpooxcix mïid ich ycixpi tüg'óciy migügtijc huídibí yajpatp ma ajt nHuindzin Jesucristo. Je migügtijc huídibí yajpatp mïid ich nañ jadu'n xyajniguejxcixy capxpooxñ. ²² Tüg'óciy je mibijcpidijc huídibí yajpatp ya cajpjoty xyajniguejxp ajcxy capxpooxñ, yi' ooy ytimyjayijpity huídibí ajcxy yajpatp ma je mij ane'mbi César ycōtujctac xyajniguejxyp ajcxy capxpooxñ.

²³ Huen ich ajt nHuindzin Jesucristo may'ajt oy'ajt tunipy mïid tüg'óciy miich ajcxy. Jadu'n ngapxycixyich. Amén.

COLOSENSES

Yi Necy Huidi San Pablo Yajnigüeje Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajñibicyich jëbi ngapxhuäcxyich yi 'y'ayuc. ² Hich müd ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjây'ajtip e mmibijccixy yi Cristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy müd miich ajcxy etz xyajjotcugüygixip.

Pablo mibijctzoy Dios müd mibijcpidijc ycixpi

³ Jabom jabom co ich ajcxy Dios nmibijctzoy, chi nyajnaxich jäygidaacin ma Dios, nHuindzin Jesucristo ajt yTeedy, müd miich ajcxy ycixpi. ⁴⁻⁵ Ti nnejhuiyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuiygixy tüg'óciy migügtijc. Müd co miich ajcxy mijp'ixy co Dios müdity tijaty yujcicy tzejpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuiygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuiygixy co Dios müdity tzejpjoty huidi njjp'ijxyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'aditzni ma tüg'óciy naax cajp etz mayjây mijpidaaccixy. Miich ajcxy ti mmibijccixy jadu'n nej oga'n yajnimydacy e chambaadni co Dios may'ajt ti tuñ müd jäy ajcxy ycixpi, e nañ miich ajcxy mnejhuiyb tiydudägy Dios ytiy'ajt. ⁷ Jada tiy'ajt ti xyajnejhuiygixy je Epafras, ich ajt nmigüg huidibi ooy ndzocy njihuiyich, huidibi tudägy tumb ma Dios y'ayuc quipxyi müd ich. Epafras ti xycodinäyich ma miich ajcxy, e tiydudägy miich ajcxy xyaj'ijxpicy Cristo ytiy'ajt. ⁸ Epafras ti xyajnejhuiyich tiy'ajt jadu'n nej miich ajcxy myajpatcixy, etz jadu'n nej je Espíritu Santo ymic'ajt xymooygixy, jigix ajcxy mdzogipy mjihuihuipy tüg'óciy migügtijc.

⁹ Müd jada ycixpi ich ajcxy jabom jabom Dios nmibijctzooyich müd miich ajcxy ycixpi, jadu'n nduunich chondacy co oga'n nnejhuiyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhuinjihuihuipy mnejhuihuipy tüg'óciy Dios chojcin. Dios nmibijctzooybich co yi' Espíritu Santo miich ajcxy xyaj'ijxpipy xyajnejhuihuipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjogy'ajtin. E nañ jaydëbi ajcxy mdunipy oyjây'ajtin. E nañ jaydëbi jabom jabom yjacyujcpejtcixy yi m'ixpijin ma Dios. ¹¹ Dios nmibijctzooybich jigix yi' xymöhuipy ajcxy mic'ajt jadu'n nej yi' müdity ymic'ajt mijpi, jigix jëbi miich ajcxy jotcuje myajnaxipy etz mecxtujctähuip tüg'óciy tzaachyp etz ayo'n. ¹² Dios nmibijctzooybich co miich ajcxy aguje jotcuje myajnaxipy Dioscojuyip ma Dios Teedy, com Dios Teedy ajt xyajpocyñihuaatzim, e jadu'n ti xyñi'ixiym jëbi nbaatim tüg it lugar tzejpjoty quipxyi müd tüg'óciy mibijcpidijc huidibi tiydudägy tzinaaygixp müd Dios ytiy'ajt, jadu'n nipaady nejihuiy nej miich ajcxy mdzinäy ma je tücxin. ¹³ Ti Dios xyajñihuädzictuutim ma yi jibic-huinmañ ma je mujcu' xy'ane'mim, jadu'n nipaady nejihuiy ti xyajpidzimim agootztuum. Ti Dios xypidaacim ma y'ung y'ane'my, je' y'ung huidibi yi' ooy tzocy ooy jihuiy. ¹⁴ Dios y'ung ti xyajñihuädzictuutim ma yi jibic-huinmañ co ñi'py temy yojcy ma yi cruudz müd ajt nbocy ycixpi, e ti xypocyhuinmeecxim.

Co Cristo y'o'cy müd ajt nbocy ycixpi, chi jotcuje n'ijtim müd Dios

¹⁵ Ca' pín ti íxy Dios. Pínjaty ti íxy Dios y'ung, jadu'n nipaady nej ti íxy Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tüg'óciy tijaty yajpaatp jiiyby tzajpjoty etz ya naaxhuiñgíxy. Dios y'ung cojtay tüg'óciy huiðibi jëbi huaad n'ixim etz nañ cojtay huiðibi ca' huaad pín íxy. Dios y'ung pidaactay tüg'óciy y'ane'mín tüg'óciy mic'ajt ya naaxhuiñ, etz nañ jadu'n pidactay ane'mín miið yi' tzajpjoty tzinaaybi. Dios y'ung ti yajcojtäy ti yaj'abadiydäy tijaty miið yigixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pín. Je Cristo yaj'ijtpy tüg'óciy huiðijaty ya yajpatp huijtz'ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb tüg'óciy jäy huiðibi mibijcip mijpidaacip. Je Cristo yajtzinaayb yajjugy'ajtpy tüg'óciy mibijcpidijc, com yi' je' huiðibi jayijp ti yjugypicy co y'o'cy. Paady ycixp yi' cötujcín mijpi miiðity. ¹⁹ Dios hue' tzojcy co tüg'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñyjäy etz je tzajpjoty tzinaayb ajcxy ca'oy'ijtcixy miið Dios miið je mijpocy ycixpi. Dios oy jäygidägy ooy jotcuyc nayjihuiñyi co y'ung y'o'cy cruudzcíxy miið je mijpocy ycixpi e jadu'n oyiiy nej jëbi je naaxhuiñyjäy etz je tzajpjoty tzinaaybi ajcxy oy'ijtcixy miið Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miið Dios. E jadu'n anajty m'ijtcixy nej tüg midzip ma Dios, miið co jibicpi anajty mdungixy, etz miiðity ajcxy jibic ma mjot mhuinma'ñ. Per jadachambi je Cristo ti capx'oyiy miich ajcxy je mdzip m'ejcín huiðibi ajcxy miið Dios, co ti chinäy ya naaxhuiñ miið ñinícx, e nañ co ti y'ögy miið miich ajcxy mbocy ycixpi. Miið co Cristo y'o'cy miið miich ajcxy mbocy ycixpi, jaydëbi myajpáatcixipy ma Dios yhuinduu janch oyjäy, janch huätzjäy, ca' ti pocy mmiiðity, ca' ti xihuin yjac-hui'my ma Dios miið miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huiðibi ti mmidoogixy, jadu'n nej mijjp'ijxcixy co je Cristo xyajñdzögaani ajcxy yi' m'alma. Je ayuc huiðibi miich ajcxy ti mmidooy, je' je' huiðibi migügtijc ti capxhuäcxy etz ycapxhuäcx'adiichñi ma tug'óciy naax cajp, jadu'n nej jëbi jäy ajcxy y'alma yajñdzögipy. Nañ jadu'n ñich, Pablo ngapxhuäcxypich jada ayuc quipxy miið nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcuyc nnayjihuiñiijich co tzaachypí nminaxy nyajnaxyich miið nninícxich miið miich ajcxy ycixpi e jadu'n njacyajcixy njacyajca'pxich je tzaachypí huiðibi Cristo yajtzondac co yi' tzaachypí minaxy yajnaxy miið je mibijcpidijc ycixpi e je mibijcpidijc ni paady nej Cristo ñinícx. ²⁵ Dios ti xypidägyich ma jada tung, jigix ngapxhuäcxibich tüg'óciy Dios y'ayuc ytiy'ajt ma tüg'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxígy yi' ytiy'ajt. Cham Dios ti yajniguëxígy yi' ytiy'ajt ma yi' jäy ajcxy huiðibi yi' yjäy'ajtipy. ²⁷ Dios oy nihuinmayiñ co anajty yajnejhuiñhua'ñ yi' jäy ajcxy nidüg'óciy je oybi ayuc tiy'ajt huiðibi jecy'ajty ca' pín nejhuiñ. Yi' je' je' tiy'ajt co Cristo yajpaady ma miich ajcxy mjot mhuinma'ñ, paady ycixpi jëbi miich ajcxy mbaadip oy'ajtin jiiyby tzajpjoty.

²⁸ ñich ajcxy ngapxhuäcxypich Cristo y'ayuc, n'ñhuijpyich ngapxhuijpyich, nyaj'ixpijcpyich yajxon yi' Cristo ytiy'ajt ma tüg'óciy jäy ajcxy, jaydëbi nyajquëxígibich ma Cristo yhuinduu nidüg nidüg mibijcpidijc ca'pxy yhuinma'ñ. ²⁹ Miið jada ycixpi nduñich mictägy miið tüg'óciy je nmic'ajtich huiðibi Cristo xymooybich jabom jabom.

2

¹ Ndzojcpyich co miich ajcxy mnejhuiñuiipy jadu'n nej mictägy nduuñich miið tajin mayin miið miich ajcxy ycixpi, etz miið yi' mibijcpidijc huiði jim Laodicea ycixpi, etz nañ tüg'óciy mibijcpidijc ycixpi huiðibi ti xy'ixyich ahuin ajijp. ² Mictägy nduuñich jaydëbi yi' mibijcpidijc paadipy jotcuyc'ajtin ma y'ay yjot, etz jaydëbi ajcxy ñaychójcigixipy ñayjihuiñyigixipy mabaad jëbi m'ijtcixy yjot yhuinma'ñ tú'ciy. Mictägy nduuñich jaydëbi

je mibijcpidijc m'ijtcixy mij jotcuyc'ajtin co ajcxy huinjihuıydähuııb Dios ytiy'ajt, je tiy'ajt huidibi jecy'ajty anajty ca' pin nejhuıy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypi etz ixpijcin janchypi yajpaady. Jadu'n yi' ytiy'ajt etz y'ixpijcin nej tüg jugy'ajtin. ⁴ Jadu'n nimaaygixy jigix ca' pin oy cohuin'ini e midigihuıpy oy ayuc ma miich ajcxy ooy ymibijcni, e ca'yjanchity. ⁵ Ooy ich ngadim jimity, ixna' guëxna' ma miich ajcxy myajpatcixy. Ich njot nhuinma'n ca' yi' jim ytigoy'ity ma miich ajcxy myajpatcixy. Jotcuyc nayjihuiıyijich co n'ixcixy yajxon myajtüyöygixy tüg'óciy etz mic yi mmibijcin müdity ajcxy ma Cristo.

⁶ E müd jada ycixpi jadun nej miich ajcxy ti mgöbijccixy je Huindzin Jesús oga'n'aty, jadun ajcxy jactzinaaygix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi' m'ixpijcin ma Cristo ytiy'ajt jabom jabom. Ca' m'ixtigihuıaccixy ma yi' mmibijcin. Jacmibijcix jadun nej anajty ti nyaj'ixpijccixy Cristo ytiy'ajt. Jatytim myajnáxcixipy jäygidaacin ma Dios cixyot huinjot jabom jabom.

Je jemybi jugy'ajtin huidibi Cristo xyajni'ixıym

⁸ Ooy naygüend'ajtigix, ca' myajhuin'ingixy, co huingjäy xyajhuinma'nytigóoygixipy müd huingbi ayuc huingpi ixpijcin huidibi jäy ci'm ti cojy ti macxy, huidi ca' choobaady, huidi nigoo xychachhuin'ingixp müd canaag ayuc huinma'n jadun nej poj naaxhuiñ huinma'n. Yi' jadun mbi ixpijcin huidibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadun yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'mın ya naaxhuiñ, etz nañ jadun tzajpjoty, paady ycixpi co miich ajcxy myajpaady ma Cristo, miich ajcxy müd'ajttaayb tüg'óciy huidi Cristo ymüid. ¹¹ Co anajty Cristo miich ajcxy xyjäy'adyii, chi yi'pidacy ma ajcxy mjot mhuinma'n je tiy'ajt co myajpatcixy ma Dios. Hue' je' yajtigooıyb yi' pocytunı huinma'n. Jada je' je tiy'ajt huidi Cristo Jesús ypıdac, ca' miich ajcxy xyjäy'adyii. Ca' miich ajcxy mdiy'ajttıy ma mninıcx. Tigach Jesús ytuuñ müd miich ajcxy, ca' yjadunıty nej judıojäy ajcxy tiy'ajt pıdaaccixy ma ñinıcx müd tzujc. ¹² Co ti mnıbejtıxıy müd Cristo yxıı, jadun nipaady nejihuıy ti mnaaxtigııygixy quıpxy müd Cristo co yi' ñaaxtigııy. Co ti mmıjpıdaaccixy Dios ymic'ajt jadun nipaady nejihuıy quıpxy müd Cristo ti mjugypıjccixy co Dios yajjugypıjcy y'ung co y'o'cy. ¹³ Co ca' anajty miich ajcxy Dios xyjäy'adyii, müd miich anajty ajcxy pocytunı huinma'n jadun miich anajty m'ijtcixy nej öcpi. E co ti mmıjpıdaaccixy Cristo, Dios ti xyhuinmeecıı ajcxy tüg'óciy mbocy, e jadun nipaady nejihuıy Dios ti xyajjugypıjccixy quıpxy müd Cristo. ¹⁴ Co Cristo y'o'cy ma yi' cruudz müd ajt nbocy ycixpi, jadun nipaady nejihuıy Dios ti xyjödım xıhuin huidi anajty xychaachtunaanıı. Co Dios anajty yajtigooıy ich ajt nxıhuin, jadun nipaady nejihuıy ti mijxojtzpety je xıhuin necy ma Jesús ycruudz. ¹⁵ Co Cristo y'o'cy cruudzcıxy, chi ycödıgooy je ca'oybi ymic'ajt, etz je poj naaxhuiñıybi ymic'ajt. Chi je Cristo yajtzo'yduñ je ca'oybi etz je poj naaxhuiñıybi co yajcıxy yajnaxy ma jäy yhuinduu.

Tzıjccıx nijot'ajtcıx tüg'óciy huidıjaty tzomb ma Dios tzajpjoty

¹⁶ Ca' mdungıxy cuenti co pinjaty ajcxy xy'agapxıhuıpy etz xyñımähuıpy:

—Amay'at jada jııxıy pıcy, etz amay'at jada xıı, etz amay'at je jemybo', etz amay'at yi' Sábado xıı. ¹⁷ Jecy'ajty jäy jadun ti yajtuñ yıjadun mbi huinma'n, jayıpnı ca' anajty Jesucristo ymııñı ya naaxhuiñ. Jadachambi xıı tiempo Jesucristo ytiy'ajt tügıajc yi' je' ooy ycopıcyıty. ¹⁸ Ca' huaad yi' jäy ajcxy xıpijci je Cristo y'oy'ajtin huidibi ajcxy mbadamyb. Yi' ajcxy huidi oygohuin'iniıı naybıdaacıp jadun nejihuıy ooy yung naxy ajcxy yjäy'ajtcıxy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayıp co ti tiy'ajt patcixy ma cumäy, ninıgoob ajcxy amıj agıx ñayjihuiıygıxy müd co tzachmıjpıdaaccixy yci'mhuinma'n etz ñinıcx chojcin. ¹⁹ Yi' jadun mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpıdijc. Je mibijcpıdijc Cristo

yajyeecp ma ajcxy ymibijcin jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Miid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg jäy ñinïcx miid ycohuaic huidi ane'm je ñinïcx etz miid emy huidibi yajyücxtaayb je ninïcx.

²⁰⁻²¹ Co miich ajcxy ti mmibicy Cristo, jadu'n nipaady nejihuïy ti m'öccixy quipxyi miid Cristo, e nañ ti mbidzimgixy ma yi naaxhuiñyäj yhuinma'ñ xyaj'ane'mgixy. ¿Na'ámy co chambaad mjactzinaaygixy jadu'n nej jihuïy yi naaxhuiñyäj yhuinma'ñ xy'ane'mgixy? ¿Na'amy co mjaccuydungixy yi jäy ajcxy ycötujcin huidibi minaamb co ca' huaad mgonïgy jada, ni ca' huaad mjicxxy jada, ni ca' huaad nidoñ yijimbi? ²² Tüg'óciy huidibi ngonïcim, njicxim, e nnidonim, co ytundäy, chi ytigoydäy. Yi jadu'mbi huinma'ñ ci'm jäy ajcxy cojcixy macxcixy, e nañ ci'm jäy ajcxy yaj'ijxpjccixy huidibi ca' yajpaady ma Cristo. ²³ Yi jadu'mbi cötujcin jadu'n yquëxïgy nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachytungixy ñicx ycohuaic. Yi jadu'mbi cötujcin ca' ti mic'ajt miidity, com co ca' jadu'n jëb yajtigoy jibic-huinma'ñ yi jadu'mbi cötujcin.

3

¹ Miich ajcxy huidibi ti mmibicy je Cristo jadu'n nipaady nejihuïy ti mjugypjccixy quipxyi miid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je mij'ane'mbi. ³ Co ti mmibijccixy je Cristo jadu'n nipaady nejihuïy co ti m'o'ccixy miid yi', etz ma je Cristo jemybi jugy'ajtin miich ajcxy ti mbaady. Jadachambi yi mjugy'ajtin Cristo miid c'am, e yi' yajpaatp ma Dios. ⁴ Co anajty je Cristo ñayguëxïgyii jadüg'oc ya naaxhuiñ, huin'it xii miich ajcxy mnaybada'ñyii miid yi' jiliby tzajpjoty ma yi oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'ñ huidibi miich ajcxy miid, huidibi naaxhuiñyäj ajcxy yhuinma'ñ'ajtip. Ca' huaad mïdcapxtigoyipy töxyjäydijc. Ca' huaad jibic-huinma'ñ mdunipy. Ca' huaad mdungixy ninïcx chojcïn, etz huidibi ca'p y'oyhuinma'ñity. Ca' huaad m'adzogipy comeen'adii, com ñipaapty jadu'n nej ajcxy huidibi tzaadzech quipy-chech ojadaip. ⁶ Miid co jäy ajcxy jadu'n ytundigooygixy, paady ycixpi jacjiini Dios tzaachytunip jäy ajcxy huidibi ca' ycapxymidoogixy yi' ycötujcin. ⁷ Nañ jadu'n miich ajcxy jayijp co ca'ni anajty mmijpidaaccixy je Cristo, mdzinaaygixy anajty miid jibic-huinma'ñ quipxy miid je jacjadyii naaxhuiñyäj co anajty mguydungixy yi jäy ycötujcin huidibi ca' ytiy'ajtity. ⁸ Jadachambi ixmajtcix miich ajcxy yi jibic-huinma'ñ jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'ojïygixy, jadu'n nej co jibic ayuc mgapxcixy. ⁹ Ca' huaad mnayhuin'ïñigixy miñ xyipy. Co ti mmibijccixy Cristo ti m'ixmajtcixy je jibicjot je jibic-huinma'ñ huidi anajty ajcxy miid. ¹⁰ Jemybi jot jemybi huinma'ñ ti mbatcixy e Dios yjacyejcyp jemybi jot jemybi huinma'ñ jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'ñ mbidáaccixipy jadu'n nej Cristo jot huinma'ñ miidity, je Cristo huidibi ti yaj'oyïy je jemybi jot jemybi yhuinma'ñ. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijëjity ajcxy miid griegojäy y'ixpijcin etz jacjadyii miid judíojäy y'ixpijcin, ca' ñejity pen ti myajtiy'ajttiïy o ca' mdiy'ajttiïy. Ca' ñejity co nijëjity ajcxy jigüëgy choon, e ca' y'ixpicyity, etz jacjadyii ooy adzip ahua'n ñaybidáacigixy. Ca' ñejity co nijëjity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'ñ.

¹² Com Dios miich ajcxy ti xyhuin'ixy, e ti xychojccixy ti xyjihuiyigixy, e Dios ti xyajhuädzi ajcxy mjet mhuinma'n, paady ycixpi pidaaccix mjet mhuinma'n co mba'ayooohuaangixy migügtijc. Pidaaccix mjet mhuinma'n co oyjäy'ajtin mdunaangixy etz co nicy xemy mnaybidägaangixy. Pidaaccix mjet mhuinma'n yung naxy etz mímecxtujccixy migügtijc ajcxy. ¹³ Naymímecxtújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej ñich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxip yi migüg huidibi ajcxy xymidundigooyb. ¹⁴ Mnaychójcigix mnayjihuiyigix nidüg nidüg. Co mnaychójcigixipy nayjihuiyigixipy, chi jëb huaad mdzinaaygixy mïd mjet mhuinma'n tú'ciy. ¹⁵ Je jotcuyc'ajtin huidibi Dios xymooyim, huen ajcxy xy'ane'mi mjet mhuinma'n. Dios ti xyajñibijccixy, jaydëb tú'ciy m'ijtcixy mïd mjet mhuinma'n. Mjatytim yajnaixipy ajcxy jäygidaacin ma Dios jabom jabom.

¹⁶ Naybidáacigix co je Cristo y'ayuc ytiy'ajt yajtigüydähuamby ajcxy mjet mhuinma'n. Nayyaj'ixpijcigix etz nay'ihuñigix naygapxhuñigix mïd je Cristo y'ayuc ytiy'ajt, jadu'n nej Dios iñxpijcin yecy. ñigix Salmo etz ñigix himno etz yi iy huidibi je Espíritu Santo ypidägip ma mjet mhuinma'n, e jadu'n jäygidaacin m'ijtcixy ma ajcxy mjet mhuinma'n mïd Dios ycixpi. ¹⁷ Huen ti ayuc huidibi ajcxy mgapxyp, huen ti tung huidibi ajcxy mdumby, hue' capxcix tungix mïd ajt nHuindzin Jesús yxi. Etz jatytim yajnaxcixy Dioscojuyip ma Dios Teedy ma Jesucristo yxi.

Je mibijcpidijc ajcxy chinaayin ma ypijccinaaygixy

¹⁸ Miich töxyjäydijc ajcxy, capxymidoogix mñäy ajcxy com jadu'n ñich ajt nHuindzin Jesucristo tzocy co mgapxymidohuipy ajcxy mñäy. ¹⁹ Miich yëydijctijc ajcxy, tzojccix jihuiyigix ajcxy mdöxyijc, ca' ejcin mmi'idipy mïd mdöxyijc. ²⁰ Miich ajcxy ung anäg, mgapxymidohuipy ajcxy mdaj mdeedy mïd tüg'óciy. Jadu'n Dios jäygidägy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojipy m'ung ajcxy, ca' yjeyity co nicy ajcxy taj may chinaaygixy yjugy'ajtcixy. ²² Miich ajcxy tumbidijc, capxymidoogix yi mHuindzin, ca' janch xypaat oy mic mdungixy co mhuindzin jim xyhuindüxcixy, e chi co je' yjihüacni, chi nigoo mhuäccixni mdinaaygixni. Hue' janchtiy oy tungixy mïd oyjot oyhuinma'n, com je' je' je tiy'ajt co Dios mhuindzigüygixy. ²³ Je tung huidibi mdungixyp, tungix cixyot huinijot. ²⁴ Com miich ajcxy mnejhuñyb co Cristo xymöhuaangixy it lugar tzajpjoty, paady ycixpi oy tunggix jigix Cristo jäygidägipy huidibi ajcxy mdumby. ²⁵ Dios chaachytunipy pinjaty tundigooyb. Ca' Dios huin'ijxpety tzaachytunipy jäy.

4

¹ Miich ajcxy yajtumbidijc, yajtungix mdumbi nej ypadyii etz nej ytudägyity, com miich ajcxy mnejhuñyb co nañ mïd miich ajcxy tüg mHuindzin jiiyby tzajpjoty.

² Jabom jabom Dios mibijctzoogix, ca' m'ixmajtcixy Dios mibijctzoohuñ. Huijy ycuyc m'idipy ajcxy etz jatytim yajnaxcixy jäygidaacin ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios mïd ñich ajcxy ycixpi. Mibijctzoogix Dios co huen it lugar xymöhuñbyich ma jëbi ngapxhuäcxyich Dios y'ayuc ytiy'ajt. Ngapxhuäcxyñich je Cristo ytiy'ajt huidibi jecy'ajty anajty ca' pin nejhuñy. Mïd co ngapxhuäcxyich Cristo ytiy'ajt, paady ycixp nyajpaadyich pujxtigoty. ⁴ Mibijctzoogix Dios mïd ñich ycixpi, jigix jëbi ngapxhuäcxyich je Cristo ytiy'ajt huädz oy, nej jäy ajcxy jëb huädz huinjihuiyigixy, jadu'n nej ypadyii ngapxhuäcxybyich.

⁵ Tiydudägy mdzinaaygixipy mïd yi jäy ajcxy huidibi ca' mibijccixy Cristo. Yajñiguëxëccix miich ajcxy Dios ytung jabom jabom, ca' huaad xi tiempo myaj'ayoogixy. ⁶ Yi mgapxin yi mmiydaacin yajtungix oy'amy huindzig'i'ñ'amy nej jëbi huaad jäy ajcxy jäygidaaccixy. Copicy mhuinmayipy ajcxy jayijp nej jäy huaad m'adzoogixy.

Je capxpooctxin huidibi cogixiyñip je ñecy

⁷ Tíquico co ñicxipy jim ma miich ajcxy, yi' xyyajmüdmíydáaccixipy tüg'óciy nej ytunyíi yjadyíi ma ñich. Ooy ndzocy njihuíyich ñich ajt nmigüg Tíquico. Yi' ooy tudägy ytuuñ quipxyi müd ñich ajcxy ma ajt nHuindzin Jesucristo ytung. ⁸ Paady yam nguexyich Tíquico ma miich ajcxy jigix ajcxy xyajmüdmíydägipy nej yam ñich ajcxy nyajpaatcixy, etz nañ jigix xyjotmicmigápxcixipy. ⁹ Quipxyi müd Tíquico yam nguexyich Onésimo, tüg ajt nmigüg huidibi ooy ndzocy njihuíyich, huidibi tudägy ti ytuuñ müd ñich ajcxy. Onésimo miich ajcxy yi mmigogajp. Tíquico y Onésimo xyajmüdmíydägip ajcxy tüg'óciy tijaty tuunip jajtip yam ma ñich ajcxy.

¹⁰ Je Aristarco, huidibi pujxtijc iñaayb quipxyi müd ñich, cham quexy capxpooctxin ma miich ajcxy. Marcos, je Bernabé y'uch, cham quexy capxpooctxin nañ jadu'n ma miich ajcxy. Ti ñich ayuc nguexyich jayhuin ma miich ajcxy co ixipy ñicxy Marcos ma miich ajcxy, mgöbigipy ajcxy agujc jotcujc. ¹¹ Nañ jadu'n je Jesús huidibi jäy ytipy Justo, cham quexy capxpooctxin ma miich ajcxy. Yi Aristarco, Jesús etz Marcos yi' ajcxy ni tugigpajc, judíojäy huidibi tumb müd ñich ma Dios ytung co ngapxhuäcxyich Dios y'ane'min. Yi nidugügpi ñich ooy ti xyajjotcujc'atyich. ¹² Je Epafras, miich ajcxy mmigogajp je Cristo ytumbi, nañ jadu'n cham quexy capxpooctxin ma miich ajcxy. Je Epafras jabom jabom Dios mibijctzoy müd miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayeéjigix amumdügjot ma Dios, e jadu'n ajcxy mguydunipy nej Dios tzocy. ¹³ ñich jëbi tiy'ajt nyecyich co Epafras ooy jotmay jihuíy müd miich ajcxy ycixpi, etz nañ ooy nidajy nimay müd yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuíygixy etz Dimas nañ cham ajcxy quexy capxpooctxin ma miich ajcxy.

¹⁵ Yajnajxcix ñich ngapxpooctxin ma yi mibijcpidijc jim Laodicea. Nañ yajnajxcix ñich ngapxpooctxin ma yi Ninfas etz ma yi mibijcpidijc huidibi yöymujccixp ma yi' ytiyc.

¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nguexyich jim Laodicea. ¹⁷ Tungix may'ajt mnimähuipy je Arquipo co huen cuydundäy je tung huidibi ñich ajt nHuindzin je Cristo ti yajniibedyii.

¹⁸ ñich Pablo, ñich ci'm njaaybich jada capxpooctxin ma miich ajcxy. Ca' ajcxy mjäydigoyipy co ñich nbujxtijc iñäy. Huen Dios may'ajt oy'ajt tunipy müd miich ajcxy ycixpi. Jadu'n ngapxcixyich. Amén.

1 TESALONICENSES

Yi Jayijp Necy Huidi San Pablo Yajniaguejx Je Mibijcpidijc Jim Tesalónica

¹ Hich Pablo miid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugiygixip.

Je mibijcin huidibi anajty yejcpy iixpejt

² Jabom jabom ich ajcxy nyajnaxyich jäygidaacin ma Dios miid tüg'óciy miich ajcxy ycixpi. Jabom jabom ich ajcxy Dios nmibijctzooyich miid miich ajcxy ycixpi nidüg'óciy. ³ Co Dios Teedy nmibijctzooygixyich, chi njäymeichich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yi' ytung. Nañ njäymeichich jadu'n nej oyyäy'ajtin mdungixy etz jadu'n nej mdzojccixy mjihuüygixy mmigügtijc. Nañ jäymeitzpich jadu'n nej miich ajcxy mijp'ixy jabom jabom co ich ajt nHuindzin Jesucristo xymöhuaangixy it lugar jiiby tzajpjoty, e ca' mjetmetzcüygixy. ⁴ Migügtijc ajcxy, ich ajcxy nejhuüyb co Dios xychojccixy xyjihuüygixy, e nañ ich ajcxy nejhuüyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcchich, nañ nduunich mijhuinma'n miid Dios yjihuin'ñ ymic'ajt. Jotcujc nduunich ma miich ajcxy. Miich ajcxy mnejhuüyb co tudägy nduunich jigix jëbi mmijpidáaccixipy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigüygixy ich je n'ixpejt, e nañ jadu'n ajt nHuindzin Jesús y'ixpejt. ⁷ Co tzaachypi ti mminajxcixy ti myajnajxcixy miid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je iixpejt miid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy iixpejt ma canaag'it naax cajp. Je mayjäy ti nejhuüydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymiidmiydáacigixy jadu'n nej ich oy ngogapxüyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymiidmiydáacigixy jadu'n nej ti m'ixmajtzcixy yi tzaadzech ojadadii, e ti mbadüdigüygixy je Dios juugypi janchypi etz tudägypi. ¹⁰ Nañ jadu'n je mayjäy ajcxy ñaymiidmiydáacigixy jadu'n nej miich ajcxy m'ahuijxcixy mijp'ijxcixy co Jesús, Dios y'ung, yhuimbida'n ya naaxhuiñ, chona'n tzajpjoty. Je huidibi Dios ti yajjugypijc co ti y'ögy. Yi' je' je Jesús huidi ti xycohuaanim ma yi mijpi tzaachypi huidibi Dios yquexamyb miid co jäy ajcxy chach pocytungixy.

2

Pablo ytung huibidi anajty ymiid jim Tesalónica

¹ Migügtijc ajcxy, mnejhuüyb ajcxy co ca' ñaadig'i'aty, co ich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuüyb co jayijp ca'ni anajty nmechich ma miich ajcxy ich ajcxy ooy tzaachypi etz ayo'n ti nyajnajxcixy jim Filipos. Ti jäy xyhuin'ojy xyjip'ojyich. Co nmechich ma miich ajcxy, ca' ñejity co tzaachypi ti nminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcchich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy,

oy ñich jäy anajty xyca'ixa'ñ xycatzoga'ñ. ³ Ca' ñich ngapxhuäcxyich anñ, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ñingixy. ⁴ Ca' ti nhuin'ñingixy. Dios ti xyajñibicyich co ngapxhuäcxbich yi' y'ayuc ytiy'ajt, e jadu'n nguyduuñich. Ca' nduuñich co huen jäy ajcxy jäygidägy ñich ndung. Jada janchtiy ndumybich jigix Dios jäygidägipy ñich ndung. Com Dios yi' ñejhuiyb nej jäy tüg'óciy yjot yhuinma'ñ mñidity. ⁵ Miich ajcxy mnejhuiyb co ca' nyajxondaaccixy mñid ayuc oyjatypí huidi ca' choobaady. Nañ ni ca' ñich ajcxy nhuinma'ñ 'ijxtäy nej jëbi ñich ajcxy nmeenyaat. E Dios nañ ñejhuiyb co yjanchity jada. ⁶ Nañ ni ca' ñich ajcxy njipp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxbich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygixy oy'amy ti nduuñich ma miich ajcxy, jadu'n nej tüg ungda j mñidity y'ung y'anäg mñid oyjot oyhuinma'ñ. ⁸ Ti ñich miich ooy nd-zojccixy njhuiygixy, canan jëyi Dios y'ayuc ytiy'ajt ti nmooygixy, nañ naygiyegáanibich anajty ma yi' o'cin mñid miich ajcxy ycixpi. ⁹ Co jayhuin ngapxhuäcxyich Dios y'ayuc ma miich ajcxy, mjäymejchpy miich ajcxy jadu'n nej ñich ajcxy nduuñ n'ayooyich anajty xñm tzuum mñid ñich ajcxy ngaayin n'uucin ycixpi. Ca' anajty n'adzibaangixy, paady ñich ajcxy nduuñ n'ayooyich xñm tzuum mñid ñich ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuiyb ajcxy, e nañ ñejhuiyb Dios, co ñich ajcxy ndzinaayich ma miich ajcxy tudägy, huädz ñich anajty ajcxy njot nhuinma'ñ mñidityich. Ca' ma ndundigooyich ajcxy nej pin xy'ocnñhuambedipyich ajcxy. ¹¹ Mnejhuiyb miich ajcxy nej n'ñhuijciy ngapxhuijciy etz njotmñicmñigapxcixy nidüg nidüg, tim jadu'n nej tüg ungdeedy ñhuijy capxhuijy y'ung y'anäg. ¹² Ti ngapxhuijciy co ooy chach copicyity co mdzinaaygixipy nej Dios jëbi jäygidägipy yi' mdzinaayin. Com yi' miich ajcxy ti xyhuin'ijxcixy jëbi mdigñygixipy ma yi' chinaaydac, ma yi' mñidity y'oy'ajtin ymij'ajtin.

¹³ Paady ycixpi nyajnajxpich jäygidacacn ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxbich ma miich ajcxy. Ti mmibijccixy anajty co ñich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp.

¹⁴ Migügtijc ajcxy, jadu'n ti mjaicixy jadu'n nej yajty mñid je judíojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymñigogajp ajcxy ooy y'ixhuidijti ypahuidijti. ¹⁵ Je judíojäy ymidziptzoon ñich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxiyip jecy'ajty. Etz nañ jadu'n ajcxy xyajpidzimyich jim ma ajcxy judíojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymñjotmädyyi tüg'óciy jäy.

¹⁶ Yi' judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi' jäy ajcxy huidibi ca' yjudíojäyity, nej huaad ajcxy y'alma ñidzóoccixipy. Co jadu'n ajcxy ytundigooy, chi ajcxy ooy nigi ypocy ñibety ma Dios. Per Dios ti ooy chip y'ejcin pidacy ma judíojäy mñid ajcxy ypocy ycixpi.

Pablo ñijot'ajtp co ñicxy cogapxihuaangixy yi mibijcpidijc

¹⁷ Migüctijc ajcxy, cham hueeni xñ tiempo ti ñaxy ma ca' n'oc'ijxcixni ajcxy, per ca' ñich miich ajcxy njäydigoy. Ooy ñich ajcxy nja'nicxa'ñ ma miich ajcxy jadüg'oc, e ca' y'oyiy nej ñich ajcxy ñicxiybich ma miich ajcxy. ¹⁸ Ooy ñich ajcxy njanicxa'ñ anajty ma miich ajcxy. E ñich, Pablo, ci'm anajty njanicxa'ñich mejtz'oc tugüg'oc, e je mujcu' nñ'aa ndü'aa ti xy'adujcich. ¹⁹ ¿Ti mij'ajt miich ajcxy mdiy njipp'ijxpich? ¿Ma mdiy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin mñid je tiibi nduuñich ma miich ajcxy co ti mmijpidaaccixy Dios y'ayuc ytiy'ajt. ²⁰ Mñid miich ajcxy ycixpi nmñidich jotcujc'ajtin etz xondaacin.

3

1-2 Mïid jada tajin mayin co ïich anajty ca' nmïmadäga'ñ mïid miich ajcxy ycïxpi, paady ïich ajcxy nhuinma'ñ nbïdägy co jëbi nhui'ma'ñich naydüg jim Atenas, etz jëbi nguexyich ïich ajt nmïgüg Timoteo ma miich ajcxy. Timoteo nañ jadu'n ytuñ ma Dios ytung quipxyi mïid ïich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy ïich n'ayuc etz xyjotmicmïgapxip ajcxy, jigix jac mic ajcxy myajpaadip ma mmibïjcin. ³ Jadu'n Timoteo ytunipy ma miich ajcxy jigix ca' mhuinma'ñytigóoygixip mïid je tzaachypi huidibi ajcxy mminajxyp myajnajxyp. Miich ajcxy mnejhuïyb co copicy myajnajxipy ajcxy tzaachypi mïid Jesucristo ycïxpi. ⁴ Co oga'n n'ijtyich ma miich ajcxy, chi ïich miich ajcxy nnïmaayich co tzaachypi mminájxcixipy myajnajxcixipy mïid Jesucristo ycïxpi. E miich ajcxy cham mnejhuïygixyp co janch tiy'ajt jadu'n nej nnïmaaygixy, mïid co cham tzaachypi mminajxcixy myajnajxcixy. ⁵ Com nejhuiybich co tzaachypi mminajxyp myajnajxyp ajcxy, paady ycïxpi tajpich maybich mïid miich ajcxy ycïxpi. E com ca' nmïmadäga'ñich je tajin je mayin, paady ycïxp ti nguexyich Timoteo ma miich ajcxy jaydëbi tiy'ajt xypáadibich pen tiydudägy miich ajcxy mmibicy. Tzigïybich anajty co ndiyy je mujcu' ti xyajhuinma'ñytigooygixy, etz jadu'n anajty ñaadigï'ada'ñ ïich ndung ma miich ajcxy.

⁶ Jadachambi Timoteo ti xyñihuimbityich, choon ma miich ajcxy jim Tesalónica, etz ti xyajnejhuïyich jadu'n nej miich ajcxy mmïdity mmibïjcin, etz nañ ti xyajnejhuïyich jadu'n nej mnaychójcigixy mnayjihuiyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuiyich, etz nañ ooy miich ajcxy xyja'ixáangixyich jadüg'oc, jadu'n nej ïich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicxy tiydudägy yi mibïjcin, chi mij ooy ti njotcugïyich. ⁸ Jadachambi jëbi njactzinäyich jotcujc, com ti nnejhuïyich co miich ajcxy ca' m'ixtigïhuäccixy ma mmibïjcin. ⁹ Nyajnajxpich jäygidaacin ma Dios yhuinduu mïid miich ajcxy ycïxpi, mïid co janch jotcujc nayjihuiyijich co miich ajcxy ca' m'ixtigïhuägy ma mmibïjcin. ¹⁰ Xiim tzuum nmibïjctzooyich Dios mïid tüg'óciy njot nhuinma'ñich, jigix Dios xyaj'ahuáatzibich nnï'aa ndü'aajich, jëbi nnicxyich ci'm ma miich ajcxy, jaydëbi njacyaj'ixpïgipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibïjcin ma mjacyajtigoy'ijtcixy.

¹¹ Njïp'ijxypich co Dios Teedy ci'm etz ajt nHuindzin Jesús xyaj'ahuáatzibich nnï'aa ndü'aa jigix nicxy n'ijxcixy jadüg'oc. ¹² ïich ajcxy ndzojcpy co ajt nHuindzin Jesucristo xyjacmóoygixipy tzojcin jihuiyin, jigix ñigi ajcxy mnaychogïyb mnayjihuihuïyb miñ xyipy, e nañ ñigi mdzójcixipy mjihuïygixipy tüg'óciy je mayjäy, tim jadu'n nej ïich miich ajcxy ndzocy njihuïy. ¹³ ïich ajcxy ndzojcpy co Dios xyaj'ijtip ajcxy mjot mhuinma'ñ tücci'y ma Jesucristo ytiy'ajt, e ca' m'ixtigïhuäccixy, jigix co anajty ïich ajt nHuindzin Jesús ymiiñ jadüg'oc ya naaxhuiñ mïid tüg'óciy je mibïjcpïdijc huidibi mïid huädz yjot yhuinma'ñ, jëbi miich ajcxy mnayguëxigïyb ma Dios Teedy yhuinduu mïid huädz mjot mhuinma'ñ, ca' ti xïhuin ma Dios mïid miich ajcxy.

4

Je tzinaayin jugy'ajtin huidibi Dios yjäygïdacyp

¹ Jadüg nax, migügtijc ajcxy, jadachambi may'ajt nbïjctzooyich, e nyajñibïjccixy mïid ajt nHuindzin Jesucristo ycïxpi co ajcxy mjaccuychinähuipy Dios y'ayuc ytiy'ajt, jadu'n nej ti nyaj'ixpicyich miich ajcxy, etz mjactzinähuipy ajcxy jadu'n nej jëbi Dios jäygïdägy ajcxy mdzinaayin, jadu'n nej ti mdungixy.

² Miich ajcxy mnejhuïyb je cötujcin huidibi ti nyaj'ixpïjccixy. Jada cötujcin ïich ajt nHuindzin Jesucristo ti xyajñibicyich. ³ Miich ajcxy mnejhuïyb je cötujcin jadu'n nej

Dios tzocy co huädz jot huädz huinma'n myajtúngxipy ma yi mdzinaayin mjugy'ajtin. Ca' huaad mmigapxtigoogyixy tüg töxyjäy. ⁴ Miich ajcxy mnejhuiyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ mïddzinähuipy mïd oyjot oyhuinma'n. ⁵ Ca' Dios jadu'n tzocy co je yëydijc nijot'aty töxyjäy mïd jibic-huinma'n, jadu'n nej yi jäy ajcxy y'idich huidibi ca' nejhuiy Dios ytiy'ajt. ⁶ Ca' huaad ni pin migapxtigooyi ymigüg ytöxyijc, com Dios yi' tzaachytunib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiygixy jayhuin. ⁷ Com Dios jadu'n ti xyhuin'ixim jigix oyjot oyhuinma'n ndunim, canan co ndunim jibic jot jibic-huinma'n. ⁸ Co tüg jäy ytundigooy mïd huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espíritu Santo huidibi Dios ti quexy ma ñch ajt.

⁹ Miich ajcxy mnejhuiyb je cötujcin co copicy mdzogipy mjihuihuipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihuiyigix. ¹⁰ Janch tiy'ajt jadu'n co miich ajcxy mdzocy mjihuiy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihuiyigixy etz mnayyajmij'ajtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'n ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcypich co miich ajcxy mhuinjihuip je tiy'ajt ma je' yajpaady y'alma je migügtijc tiibi y'öccixy, jigix ca' mdájcixipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴ Jadu'n nej ñch ajt nmibijcim co Jesús yjugypicy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵ Paady ycixpi ñch miich ajcxy nnimaaygixy co ajt nHuindzin Jesús tiy'ajt ti yecy co ñch ajt huidibi jacjugy'ajtp co anajty Jesús yhuimbity ya naaxhuiñ, tügmucy xyajnicxaanim mïd yi mibijcpidijc tiibi y'o'ccixy. Ca' ñch ajt njayijp'adaanim yi tiibi y'o'ccixy, yi' ajcxy jayijp'adamb. ¹⁶ ñch ajt nHuindzin Jesús ci'm yhuimbida'n ya naaxhuiñ chona'n tzajpjoty mïd ycötujcin, mïd ymic'ajtin, e yi' mic capxamb ane'mamb. Huimbida'n Jesús quipxyi mïd tüg ángel mïjtungmïdipi huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'ítty Jesús xyajpidictähuaanim ya naaxhuiñ, e chi ajt naybadaanim mïd Jesús jocjoty. ¹⁷ E chi ñch ajt huidijaty anajty jactzinaayim, naybadaanim mïd ajt nHuindzin Jesús jocjoty quipxyi mïd je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitiempo mïd ajt nHuindzin Jesús. ¹⁸ Mïd jada ayuc tiy'ajt nayyajjotcugíyigix mïn xyipy.

5

¹ Migügtijc ajcxy, ca' ycopicyity njacnijayíygixipy jadu'n nej je xii je tiempo yca'pxa'n. ² Miich ajcxy mnejhuiyb co ñch ajt nHuindzin Jesucristo yhuimbida'n ya naaxhuiñ tzaachytuna'n yi mayjäy mïd ypocy ycixpi. Jesús miinaamb mina anajty je mayjäy ca' ti ocjijp'ixni. Jadu'n ymiina'n jadu'n nejjihuiy tüg meetzpi ymiñ coodz co ymeedza'n. ³ Co anajty je mayjäy yminaangixy: "Cham ooy jotcujc ndzinaayim, ca' ma tzip capxy", chi timitiina jotcômoñi Dios yajtigoya'n je naaxhuiñybi. Timitiina ayo'n ñimiiniyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypi co Dios anajty ymiñ ya naaxhuiñ yajtigoydähua'n yi mayjäy. ⁴ Per migügtijc ajcxy mïd miich ajcxy

Dios ytiy'ajt, paady miich ca' jadu'n myajpáatcixni nejjihuüy mdzinaaygixy agootztu-uby. Ca' ajcxy mgixípy mgüedípy mīna anajty Jesús miiñ jotcōmoñi, jadu'n nej jāy nigooḃi ycixy ycuēcy co ti ymēechyīi. ⁵ Com tūg'óciy miich ajcxy Dios y'ayuc ytiy'ajt mhuinjihuüygixy, jadu'n nipaady jadu'n nejhuüy ti mgoximüygixy ti mgodüxcüccixy. Hich ajt ca' njacyajpaatim agootztuuby. ⁶ Paady ycixpi ca' huaad njäy digooym Dios ytiy'ajt, ca' huaad nmi'öctigooyim jadu'n nej yi jacjaydyi jāy ajcxy huidibi ca' cuendituñ Dios y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'öctigoy. Ijtcix ni'ixi mīd tūg'óciy Dios y'ayuc ytiy'ajt. Mi'ijtcix huijy cujc mjot mhuinma'ñ. ⁷ Yi jāy ajcxy huidibi maab, coodz ajcxy ymāy. Yi jāy ajcxy huidibi muucip, coodz ajcxy ymúucigixy. ⁸ Hich ajt huidibi nnejhuüyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuüygix mīñ xyipy, jadu'n nipaady nej soldadtijc ñaygohuáanigixy mīd pujx huidibi ymīd ma ycaach. E mīd co njijp'ijxim co Dios xyajnidzōgaanim ajt n'alma, jadu'n nipaady nejjihuüy soldadtijc ñaygohuáanigixy mīd ypujxcōjup. ⁹ Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jēbi paatim nidzocin co nmijpidaacim ich ajt nHuindzin Jesucristo. ¹⁰ Jesucristo ti y'ögy mīd ajt nbocy ycixpi, jigix jēbi huaad ndzinaayim jilby tzajpjoty quipxy mīd yi', ca' ñejity pen ti anajty n'o'cim o pen jiini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápaxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy mīd Dios y'ayuc ycixpi. Yi' ajcxy huidibi xyajni'ixi yb Dios y'ayuc ytiy'ajt, yi' ajcxy xycapxhuijip mīd ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcixipy mīd je Dios ytung ycixpi huidibi ajcxy ytumyb ma miich ajcxy. Tzinaaygix jotcuyc ca' ma tzip capxy.

¹⁴ Nañ jadu'n, migügtijc ajcxy, nyajnbijcpy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigapxip huidibi ajcxy tajp maayb, etz nañ mbubedipy ajcxy huidibi hueeni mīd ymibijcin, etz yajtungix mecxtujcin mīd tūg'óciy migügtijc.

¹⁵ Hich miich ajcxy nimaayb co ca' ni pin huaad yaj'ahuimbidip jibic ma ymigüg huidibi ti ymidundigoyi. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyjäy'ajtin mdunipy ajcxy mīd tūg'óciy naaxhuiñjāy.

¹⁶ Jatytim mīd'ajtcix jotcuyc'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjaajtcixy ayoogixy nejaty, com Dios ooy yjotcujcity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom mīd tūg'óciy huidibi tuunip jajtip ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt huidibi yajpatp ma ich ajt. ²⁰ Yajjotcuyc'ajtcix huenpinity pin Dios y'ayucpidzimb ma miich ajcxy. ²¹ Jēyi janchtiy m'ixipy peni quipxyi yb mīd Dios y'ayuc huidibi ajcxy ycapxyp. Mijpidaaccix je ayuc tiybi.

²² Ixmajtcix tūg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcuyc'ajtin, co ajcxy xyajhuaatztaayip mjot mhuinma'ñ ma yi jibicpi. Dios nmibijctzooybich co yi' ci'm xycuendi'ajtip huadz oy yi m'alma ajcxy, etz yi mjihui'ñ, etz mñicx mgohuajc, ca' ma pocy yquēxigy, ixti mabaad anajty ich ajt nHuindzin Jesucristo ymiiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc mīd miich ajcxy.

Capxpooxin huidibi cijxnip je necy

²⁵ Migügtijc ajcxy, mibijctzoogix Dios mīd ich ajcxy ycixpi.

²⁶ Naygapxpóocigix xic xon nidüg nidüg mīd oyjot oyhuinma'ñ.

²⁷ Nhuindzin Jesucristo ajt ti xyajniḃicyich jada tung, paady nyajniḃijccixy co jada necy mgápxcixipy ni'abidzimy ma tüg'óciy mibijcpidiyc.

²⁸ Dios nmibijctzooybich co ich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

¹ Ich Pablo miid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy miid miich ajcxy etz xyajjotcugiygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnaxypich jabom jabom jäygidaacin ma Dios miid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcipy Jesucristo nigi jabom jabom, etz nañ nigi jabom jabom naychójcigixy nayjihuüyigixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mminajxyp myajnaxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' iixpejtíp co Dios ytudägyity miid ajcxy ytiyduunin, e xycöbijccixy co jëbi mdigiygixipy ma yi y'ane'mdac miid mmibijcin ycixpi. Miid jada ycixpi miich ajcxy mminajxcixy myajnajxcixy tzaachypi ayo'n.

⁶ Miid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcuje'ajtin tim jadu'n nej xymöhuäängixyich jotcuje'ajtin je huin'it xii co anajty ajt nHuindzin Jesucristo ñayguexigyii co anajty miiñ ya naaxhuiñ jadüg'oc choon anajty tzajpjoty. Nañ je ángeles ajcxy mic'ajt miidpi miinaamb quipxyi miid Jesucristo. Miinaamb Jesús miid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixii huinitiendo. Dios ypidägaanip yi' ajcxy y'alma jiguëgy ma ni caminaxii ajcxy ixcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xii huin'it tiempo co anajty ajt nHuindzin Jesús miiñ ya naaxhuiñ, Jesús je mibijcpidijc yajmij'adañ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy miid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich miid miich ajcxy ycixpi, jaydëbi tudägy ajcxy mdzinähuiipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy miid jada ycixpi co yi' cuydunipy huidibi miich ajcxy mbijctzooyb m'amidooyb miid oyjot oyhuinma'ñ. E nañ ycuydunipy yi' huidibi miich ajcxy mdumyib miid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxii capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'imb mayjäy

¹⁻² Migügtijc ajcxy, cham nyajmüdmidydaaccixy je xii je tiempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim miid yi'. Nminucxtaapcyich miich ajcxy, ca' mhuinma'ñytigooygixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi'

jäy ajcxy y'ayuc huidibi minamb co tüg espíritu ti yajnejhuigixy co yjadu'nity, o co muum a'ixnaxy amidoonaxy capxy ayuc, o co muum i'xpídzimý jada ayuc ma tüg necy huidibi ajcxy yti'py co ñch nnecy'adyi. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiyb tüg jibic jäy mic jäy huidibi Dios yajcödigoyamy tücci'yi. ⁴ Jada jibic jäy ymidziptzonamyb tüg'óciy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yi' naybidägiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios yti'jc, e naybidägaanip nejhuüy Diosity.

⁵ ¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuüyb pin yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'ni tiempo yhuaad'atyñi mina Dios a'ixihuip co ymiinipy. ⁷ Je mic jäy je jibic jäy cham ñi'ixiib ameech je jibicpi huidibi ytunamyb, jëyi yti'goy'ityñi mina je tü'aa y'ahuächy, je huidibi yajhuäcxijp. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy müd tüg puxujin. Jesús yajcödigoyipy je jibic jäy müd yi' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yi' je' ymüd je mujcu' yhuinma'ñ etz ymic'ajt, e ytunamyb mijhuinma'ñ etz i'xpejt huidibi anijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'ünip yi jäy ajcxy huidibi y'alma tigoyipy, müd co ca' ajcxy cöbijccixy, e nañ ca' tzojccixy Dios y'ayuc yti'ajt huidi müd jëbi y'alma ñidzoocixy. ¹¹⁻¹² E je' ycixpi co ca' ajcxy cöbiga'ñ Dios yti'ajt, paady Dios y'ixmadzáanigixy huen yajhuin'ingixy, huen mibijccixy je mujcu' y'anii, e müd jada ycixpi jëbi Dios yajtigooyi yi' ajcxy y'alma nidüg'óciy huidibi ca' mibiga'ñ Dios yti'ajt. Jacjotcuyc ajcxy co jibic-huinma'ñ tungixy.

Je jäy ajcxy tibi Dios yhuin'ixyii jigix ypcyñihuädzi'py

¹³ Migügtijc ajcxy huidibi ajt nHuindzin Jesucristo ooy tzocy jihuüy, jabom jabom nyajnaxyich jäygidaacin ma Dios müd miich ajcxy ycixpi, müd co Dios ti xyhuin'ijxcixy oga'n'aty, jigix jëbi m'alma ñidzoocixy müd Dios yjihuñ ymic'ajt, etz nañ müd Dios y'ayuc yti'ajt huidibi ti mmibijccixy. Je Dios yjihuñ ymic'ajt xyajhuaatzip ajcxy mijbicjot mijbic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy müd yi' y'ayuc yti'ajt huidibi ñch ajcxy ngapxhuäcxyp, jigix jëbi mbáatcixipy oy'ajtin ma ñch ajt nHuindzin Jesucristo.

¹⁵ Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydingooygixy je tiy'ajt huidibi ñch ajcxy ti ngapxhuäcxyp ma miich ajcxy, etz jadu'n nej ti nnimaaygixy necyjoty. ¹⁶⁻¹⁷ Huen ñch ajt nHuindzin Jesucristo ci'm etz ajt nDios Teedy may'ajt oy'ajt tunipy müd miich ajcxy, e xyajjotmicpijccixipy etz xyajmibijccixipy tiydudägy, jigix oybi ayuc mgápccixipy etz mdunipy ajcxy tüg'óciy oybi huinma'ñ. ñch ajt nDios Teedy etz ñch ajt nHuindzin Jesucristo xychojcm xyjihuüyim, e ti xymooyim jotcuyc'ajtin huinixiibi, e nañ ti tuñ may'ajt oy'ajt müd ñch ajt ycixpi, jaydëbi njip'ijxim oy'ajtin jii'by tzejpjoty.

3

Mibijctzoogix Dios müd ñch ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios müd ñch ajcxy ycixpi, jigix jëbi ngapxhuäcxibich huinmic jotmic Jesús y'ayuc yti'ajt huingnaax huinggajp. E nañ mibijctzoogix Dios jëbi yi jäy ajcxy mijpidägi'py Jesús y'ayuc yti'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios müd ñch ajcxy ycixpi, jigix ñch ajcxy Dios xyñihua'nipy xycohua'nipy ma yi jäy ajcxy huidibi jibic-huinma'ñ ymüd, huidibi jibic ñch ajcxy xytunamb, com mayjäy ca' mijpidägy Jesús y'ayuc yti'ajt. ³ ñch ajt nHuindzin Jesucristo tudägy yi', e xypubedip xypudigihuip

ajcxy jigix miich ajcxy ca' mjetmetzcíhuipy ma yi mmibjcin, e nañ xypubedip ajcxy, jigix ca' xymimadaaccixipy je jibicjáy huidibi Dios ca' capxymido. ⁴ Hich ajt nHuindzin Jesús jotcuje'ajtin ti xymóoygixyich mñd miich ajcxy ycixpi. Nmibjcpyich co miich ajcxy mguydumyb je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' ñch njaty nej njjpcogapxíhuibich, chi nguejxyich cogapxy, nnejhuíhua'ñich nej anajty ajcxy myajpatcixy ma yi mibjcin, tzigíyb ñch anajty co nicxy mujcu' xypidaaccixy jibictuum, chi ñch anajty ajcxy ndung ti ñaadigí'aty.

Ooy ycopicyity co nduunim ma ajt ndung

⁶ Migügtijc ajcxy, mñd ajt nHuindzin Jesús yxii etz ymic'ajt jada ane'min ajcxy nya-jñibjcpy, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej ñch tiy'ajt ti nyecy. ⁷ Miich ajcxy mnejhuíyb jadu'n nej ñch ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma ñch ndzinaayin nej jëbi miich ajcxy mdzinaaygixy. Co anajty ñch njimity ma miich ajcxy, ca' ñch n'ixmajch ngi'mdung. ⁸ Tüg'óciy ñch ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. ⁹ Dios ti xymöyich mic'ajt ane'min co ixipy ajcxy mbubejtin ti nbjctzoohui o ti nbjctzoohui ixipy ajcxy mgaayin m'uucin, per ca' ñch ajcxy jadu'n ti ndúngixyich, jigix ijxpejt ajcxy mbigipy ma ñch ajcxy. ¹⁰ Com co anajty n'ityich ma miich ajcxy jada cötujcin ajcxy nyajñibjcy co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n ñch ti nnejhuíy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjñin jäydjic. ¹² Yi jadu'mbi jäy ajcxy nyajñibjcpyich mñd ñch ajt nHuindzin Jesús yxii co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' mjetmetzcíygixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajnijayíyb, ijxcix pin je', e chi ca' mjactúngixip cuendi, e ni ca' mñd myöymujc mnaxmújcxipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibjcpí.

Capxpoocxin huidibi cijxnip je necy

¹⁶ Huen ñch ajt nHuindzin Jesucristo huidibi jotcuje'ajtin yejcp, ci'm xyajjotcugíygixipy jabom jabom oytim mñaaxñjity oytim yma'ámyity. Huen je Huindzin Dios xypubejtcixy xypudigíygixy.

¹⁷ Hich, Pablo, jada capxpoocxin ci'm njaayich. Jadu'n nfirmajñyich tüg'óciy ñch nnecy, e jadu'n miich ajcxy mnejhuíhuipy co ñch jada necy'adyii. ¹⁸ Huen ñch ajt nHuindzin Jesucristo may'ajt oy'ajt tunipy mñd tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajniguejxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyayajñidzoocim ajt n'alma, etz Cristo Jesús huidibi xymöhuaanim jugy'ajtin huinixibi, yi' ajcxy ti xyajñibicyich co yi' y'ayuc ngapxhuäcxibich. ² Cham hich miich nijayiy Timoteo. Jadu'n njihuüy nej hich miich ngi'm'ung'adyii, co miich Dios ytiy'ajt ti mbaady ma hich. Huen Dios Teedy etz Cristo Jesús hich ajt nhuindzin may'ajt tunipy müd miich, huen xypa'ayoohuipy etz xyajjotcugihuipy.

Nijējity jāy yaj'ixpiy hudibi ca' ytiy'ajtiy

³ Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapx'adugipy je jāy hudibi najtzcapxiyb je ayuc ca'p ytiy'ajtiy. ⁴ Mgapx'adugipy je nigoobi y'ayucity. Mgapx'adugipy yi' ajcxy hudibi tzachnigapxp tzachnimiydacpy yi judiojāy ajcxy y'ayuc jadu'n nej hudibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'ñy digoy pinjaty ixpijcp Dios ytiy'ajt.

⁵ Jadu'n Dios tzocy co huen jāy ajcxy naychojctāy yii müd oyjot oyhuinma'ñ. Huen ajcxy Dios yajmij'aty janch cixyot huinijot. Co pin yajmij'aty Dios janch cixyot huinijot, ooy ajcxy oy ñayjihuiyigixy. ⁶ Nijējity jāy ajcxy ti ixmajtzn je Dios ytiy'ajt, ti ajcxy jijptigiyiñi je ayuc huinma'ñ hudibi ca'p choobaady. ⁷ Ooy yi' ajcxy jayaj'ixpiga'ñ yi Dios ycötujcin, ni ca' huinjihuiyigixy hudibi ycapxcixyp, ni hudibi ajcxy ñigapxpejtpy.

⁸ Hich ajcxy nnejhuiyim co yi Dios ycötujcin oy yi' pen nyajtunim nej ypadyii nej ytiy'ajtiy. ⁹ Nejhuiyim co yi Dios ycötujcin ca' yi' tzaachytuñ oyjāydijc, jēyi tzaachytuñ pin ca' capxymidooy Dios, pin midundigooyb Dios ycötujcin. Je Dios ycötujcin chaachytumyb jāy hudibi ca' cuydungixy, jāy ajcxy hudibi ca' ytudāgyity, jāy hudibi ca' capxymidoogixy Dios, jāy hudibi pocytungixy, jāy hudibi ca' huindzigi'ñ yajtungixy müd Dios, jāy ajcxy hudibi capxtigooyb, hudibi ytaj yteedy yaj'öccixy, hudibi jāy yaj'öccixy. ¹⁰ Je Dios ycötujcin chaachytumyb pin migapxtigooyb töxyjāydijc etz yēydijctijc, hudibi miyēydijc ymāhua'ñ. Dios nañ chaachytumyb je jāy hudibi jāy majtzp etz toognaxy, chaachytumyb indaacpidijc etz nihuambejtpidijc. Je Dios chaachytumyb jacjadyii jāy hudibi y'ayuc ca' ytiy'ajtiy nej Dios tiy'ajt müdity. ¹¹ Jadayaabi tiy'ajt huätzpi oybi tūgiyb müd Jesucristo y'ayuc ytiy'ajt oybi hudibi hich nDios, je conuucxy yTeedy, ti xyajñibicyich co ngapxhuäcxibich.

Pablo yjāygidacpy co Dios may'ajt ti tuñ müd yi'

¹² Ooy njāygidāgyich co hich ajt nhuindzin Cristo Jesús ti xyajmicpiyich, yi' ti xy'ijxtiyyich, yi' ti xyajñibicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjāy. Hich yi' ajcxy nmidundigooyich. Ti yi' Dios xypa'ayooyich com hich jadu'n anajty ti n'adich müd co nganejhuiyich je tiy'ajt, ngamibicyich Jesús ngamijpidāgyich Jesús. ¹⁴ Paady ycixpi hich ajt nHuindzin Dios may'ajt oy'ajt ti tuñ mijcajee müd hich, co ti xyajmibicyich Jesús. E Jesús ti xymöyich tzojcin jihuiyin müd yi' yjāy ycixpi.

¹⁵ Ooy jada yjanchity, e nidüg'óciy jāy ajcxy jēbi mibijccixy co Cristo Jesús müñ ya naaxhuiñ co yajpocynihuādza'ñ pocyjāydijc. E hich nigi pocy nmüdidyich ca'ydi ni pinjāy. ¹⁶ Müd jada ycixpi Dios ti xypa'ayooyich ti xymimecxtucyich, jigix co jāy ajcxy ijxip nej Dios ti ytuñ müd hich, huin'it ajcxy mijpidāgipy yi' y'ayuc etz ypaadipy jugy'ajtin huinixibi ma Jesús. ¹⁷ Paady chojcpy co ngömayim Dios, je rey hudibi ane'mb

huinixi, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycomay'idipy cham etz tüg'óciy xii tiempo huidibi mimb cidacp.

¹⁸ Timoteo, ooy ich miich ndzocy njihuïy. Jada ayuc ich miich nyajnimaydaayb. Mihuindinähuij Dios y'ayuc ca' mhuinma'ñyidigoyipy. Mguydunipy jadu'n nej Dios y'ayucnajtzcapxiiybi xy'ihuijy xycapxhuijy co mdung mnimajch. ¹⁹ Mihuindinähuij Dios y'ayuc ytiy'ajt, huin'it ca' jibic mnayjihuihuïyb, jadu'n nej ajcxy jadyii huidibi nejhuïyb je tiy'ajt, e ca' cuydungixy, e jadu'ñyi yhuinma'ñyidigooygixy. ²⁰ Jadu'n nej Himeneo miid Alejandro ajcxy jaty, huidibi ich ti nyajcädigiiygixy je mujcu', jigix ajcxy yhuinma'ñymedzipy, ca'ydi yajjotma'tcixy Dios.

2

Jadu'n nej jëb Dios nmibijctzoohuim

¹ Yi' njatyyajnimayb co ooy ycopicyity capxtaaccixy mibijctzoogixy Dios etz yajna-jxcixy Dioscojuyip miid tüg'óciy jäy ajcxy ycixpi. ² Copicy nnibijctzoohuim ma Dios: reydiyc, ane'mbidiyc etz codungdiyc, jigix jëbi jotcuyc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. ³ Com yi' jadu'mbi huinma'n ooy yi' y'oyity, e Dios huidibi ich ajt n'alma yajnidzoocp, oy yi' jäygidägy. ⁴ Dios chojcpy co tüg'óciy je jäy ajcxy huen y'alma nidzooccixy, huen ijxcixy nejhuïygixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huidibi jëbi ytigiy ma Dios miid ich ajt ycixpi, etz huidibi jëb Dios y'ayuc capxnajxy ma ich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci miid ich ajt nbocy ycixpi, ñaygiyejci huen jäy yaj'ögyii, jigix jëb ich ajt nbidzimim ma je mujcu' anajty c'am xymiid'ajtim. Jadu'n nej Dios cham jäy yajnejhuïy co je tiempo yhuaad'ajtni, ⁷ paady Dios ti xyajniibicyich ngapxhuäcxibich y'ayuc ytiy'ajt, etz Jesús xy'apóstol'adyiijich. Je tiy'ajt jada ngapxpich, ca' n'indägyich. Ti xyajniibicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi' jäy ajcxy huidibi ca' yjudiojäyity.

⁸ Ndzojcpyich co yi' yëdijctijc huen mibijctzoogixy ojadajtcixy Dios ma tüg'óciy nay-mujctac miid oyjot oyhuinma'n, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzojcypich co yi' töxyjäydijc huen yhuit yxojx yajtungixy nej ypadyii, huidibi quipxpaady ajcxy paatip. Huen yhuit yxojx pidaaccixy nej töxyjäydijc huidib tudägyip. Huen ycohuary cüdägy caaxigy nej ypadyii, ca' ymigügtijc huinnaxtugipy miid yhuit yxojx, ca' nayxójigixy miid oori, miid perla, e miid tijaty ooy choohuity. ¹⁰ Ca' huaad töxyjäydijc ñaygömáygixy miid yhuit yxojx, huen janch yajcömaygixy miid y'oyjäy'ajtni, jadu'n nej je jäy ajcxy tungixy huidibi ti ñaygiyéjigixy cixyot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy miid yungnaxy yjot yhuinma'n. ¹² Yi' töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amonñi y'ity. ¹³ Dios jayijp yajcojy Adán, jac'axam Eva, paady ycopicy yi' yëdijctijc huen ane'my yi' töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi' töxyjäydijc ca' ypadyii nicxy nigohuajc'aty yi' mibijcpidijc. Dios jotcuyc ñayjihuiyii miid co jëyi y'ung'ijxcixy, etz yajmij'ajtcixy Dios, etz tzojctaaygixy ymigügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy miid oyjot oyhuinma'n.

3

Nej jëbi ytungixy huidibi ajcxy nigohuajc'ajtp

¹ Tiy'ajt jada nej jäy yminaangixy. Pen ji pin najtzogiy nigohuajc'ada'n yi' mibijcpidijc tüg yi' oybi anajty ytunamyb. ² Pin nigohuajc'ajtp yi' mibijcpidijc ooy ycopicyity je' jadu'n

maydijib huidibi ca' ti tundigoy, huidibi tög töxyjäy mïd ca'p ycanaagity, huidibi huijycujc jäy'ajtp, huidibi mïd oybi yhuinma'n etz tudägy pi yhuinma'n, huidibi oyjäy'ajtin tumb, huidibi jajtp nej jäy ajcxy yaj'ixpi gipy. ³ Pin nigohuajc'ajtp chojcpy tög jäy huidibi ca' y'amügity, huidibi ca' yhuindzipity, huidibi yajtumb mecxtujcin, huidibi ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tög jäy huidibi tiydudägy tzinaayb ma yjin yti jc, huidibi y'ung y'anäg yajtzinaayb nicy yxeemy. ⁵ Pen ca' jaty nej y'ung y'anäg migapx ane'mip ma yjin yti jc, ¿nej oc'ane'ma'n yi mibijcpidijc? ⁶ Nañ ca'p yjējity huidibi namni mibicy Dios y'ayuc ytiy'ajt. Ycadimjēcity nicxy ooy amij agix ñayjihuiyii, e nicxy camadägy je ane'min, e yjadipy jadu'n nej Satanäs yjajty co jibic tumb ñayyajhui'mi mïd Dios. ⁷ Chojcpy tög jäy huidibi nidüg'óciy je mayjäy oy i xip. Pen ca' yjadu'nity nicxy pin yxiyii, e chi jada anajty je mujcu' ti ymimadägyii co jäy jibic ñigapxiyb.

Yi mutz tungmïd nañ chojcpy huidibi oyjot oyhuinma'n mïd

⁸ Yi mutz tungmïd huidibi yajpat ma mibijcpidijc chojcpy jäy tudägy pi, huidibi nicy xeemy jäy'ajtp, huidibi ca' jäy'aty aguejtmïñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidáacigixy cixyjot huinijot ma je tiy'ajt janchypi. Je tiy'ajt huidibi je mayjäy ca' huinjihuiy. Je tiy'ajt huidibi ñch ajt nmibijcim. Je' chojcpy pinjaty huidibi ca' ti jibicpi jot'adyii huinma'n'adyii. ¹⁰ Pinjaty mutztung yajnicxamb, jayijp jot'ix huinma'n'ix pen tudägy yhuinma'n. Huin'it jēbi mdungmöy. ¹¹ Yi mutz tungmïd pi ytöxyijc chojcpy co huen tudägy jäy'aty, huidibi ca' ñigapx ñi'ojjy ymigüg, huidibi nicy xeemy jäy'ajtp, huidibi cuydundaayb tög'óciy. ¹² Yi jäy huidibi mutztung yajnicxamb chojcpy tög jäy huidibi picy chinaayb, huidibi ca'p mïdity metz o tugig töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjin yti jc. ¹³ Yi mutz tungmïd pi huidibi yajxon ytung cuydungixy, cōmay yi' ajcxy idipy ma mibijcpidijc. Nañ ñgi ajcxy ixpijc'idich Cristo y'ayuc.

Dios mijhuinma'n tuun mïd ñch ajt yci xpi

¹⁴ Jada necy ñch miich nyajniguejxyp. Njijp'ijxypich co tzojc nnicxa'ñich jim ma miich. ¹⁵ Pen ca' y'oyjy nej tzojc nnicxibich ma miich, ti yam nyajnijayjy je janchypi. Mïd jada necy huaad jēbi nidüg nidüg mibijcpi yjäy'ajtigixy ma yi mibijcpidijc huidibi mijpidacp Dios juugypi, je Dios huidibi huijtz'ijttaayb etz cohuandaayb je tiy'ajt janchypi. ¹⁶ Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuiyim, je huidibi jecy'ajty ca' pin nejhuiy. Je tiy'ajt huidibi xyajnejhuiyim co quexy y'ung ya naaxhuiñ. Dios y'ung hue' je' yaj'ijxy mïd ñinïcx. Tudägy nayguëxici mïd Dios yjihuiñ ymic'ajt. Je Dios y'angeles ajcxy ti ixyii. Ti yajni gapxy yajnimydägy Dios y'ung ma huidibi ca' yjudiojāyity nañ ti jäy yajmij'ajtcixy Dios y'ung ya naaxhuiñybi. E ti ycöbigyii tzajpjoty ma yi oybi it.

4

Mayjäy ixmadza'n yi Dios ytiy'ajt

¹ Yi Espíritu Santo minaan co anajty je xii tiempo ycixa'n, mayjäy ixmadzaangixy yi Dios y'ayuc ytiy'ajt. Mijpidaaccixy anajty jäy ajcxy y'ayuc huidibi yi huin'ĩmbi etz ca'oybi ytiy'ajt mïd. ² Jada jäy ajcxy mïd anii anajty naybidáacigixy nej ytudägyity, e ca' anajty yjanchity. Ca' ajcxy nej ñayjihuiyii co ajcxy ytigiiy anidaacpi. Ti jadu'n yhuinma'ñpidaaccixy janch mic. ³ Yi' ajcxy ymina'n co ca' huaad jäy ypijccixy, etz ca' huaad caaygixy nijējity caayin uucin. Yi caayin uucin Dios yi' ti conucxy jigix jēbi jäy ajcxy huidibi mibijccixy etz huinjihuiygixy je tiy'ajt, jēbi yajnajxcixy Dioscojuyip ma Dios etz cöbigipy ajcxy agujc jotcujc je caayin uucin. ⁴ Tög'óciy huidibi Dios ti yaj'oyjy, oy yi'. Ca' huaad pin ymina'n co ca' y'oyity. Agujc jotcujc ngöbijcim, jēyi nyajnajxim Dioscojuyip ma

yi'. ⁵ Dios ymína'ñ co huen huidibi caayin huidibi uucin ooy y'oy yi'. Jëyi co nyajnajxim Dioscojuyip, e huin'it Dios conuucxy je caayin uucin.

Ca' ajcxy mmijpidägy yi nigoobi'ayucity

⁶ Pen miich ajcxy jada ayuc jada tiy'ajt myajnimayyb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixyjot huinijot, chi anajty myajyeegy yi mmibijcin. Ca' mjäydgoyipy yi oybi ayuc huidibi nyajnimayyb, huidibi ayuc mbanicxyp mbayöyp. ⁷ Ca' mmijpidägy yi nigoobi'ayucity huidibi ca' choobaady ma Dios. Panicxi' payöyi' Dios ytiy'ajt. ⁸ Jac'oy co n'ixpijcin Dios y'ayuc, ca'ydi co ninicx ymic'ajt nbaatim. Co yajyujctäy jäy ñinicx, chi ñinicx ymic'ajt paady jëyi. Co n'ixpijcin nguyduunim Dios ytiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huidibi ti nyajnimäy, janch tudägy jada, jëbi ngöbijctaayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huidibi jugy'ijtp xyajndzögaanim n'alma. Jëyi yajndzögipy ajcxy y'alma huidibi mijpidaacip Dios y'ayuc.

¹¹ Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc xymijpidaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyyäy'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huädz yhuinma'ñ müd'ajtcixy. Co jadu'n mdunipy, huin'it ajcxy mijpidägy miich m'ayuc. ¹³ Mabaad ñich anajty nicxy ma miich, capx Dios ñecy ma yi naymujctac, capxhuäcx etz yaj'ixpic yi tiy'ajt. ¹⁴ Yajtun yi huij'ajt cujc'ajt huidibi Dios xymoy je taabi je mibijcpidijc mijtungmüdpä xycinixajy, e xy'ayucmoy xymic'ajtmoy ajcxy müd je Espiritu Santo ymic'ajt.

¹⁵ Naybidägy yajcopijc tüg'óciy huidibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶ Nayguend'adii miich ooy ci'm, nañ jadu'n naygüend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayyajndzögyii, nañ jadu'n anajty myajndzooccixy huidibi anajty ajcxy amidoo'ijtp miich m'ayuc.

5

Nej jëbi huaad migügtijc m'ñhuijipy mgapxhuijipy

¹ Ca'p huinjijp m'ojip mij'anäctijc. Oy'amy ñhuijcixy capxhuijcixy jadu'n nej jihuüy mdeedy'adyii. Nañ jadu'n yi yujcyecytijc ñhuijcixy capxhuijcixy oy'amy jadu'n nej jihuüy mgi'mjuugy mgi'mmigüg. ² Yi mij'anäctijc ajcxy töxyjäybi nañ jadu'n oy'amy m'ñhuijcixy capxhuijcixy, jadu'n nej jihuüy yi' ajcxy mdaj'adyii mdzitz'adyii. Yi töxy'anäctijc ajcxy mutz'anäcnip müd'ijtcixy müd tudägyi mjot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögypä, huidibi janch ni ypin ycaca'ty. ⁴ Pen jim töxyjäydijc co'ögypä huidibi müd y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity müd ytaj etz ñambiid. Com yi jadu'mbi huinma'ñ Dios yjäygidacpy. ⁵ Je töxyjäy co'ögypä ca'p pin tim müdity, yi' yijp'ijxyp co Dios ypubediyb etz Dios ymibijctzooyb y'ojadajtpy jabom jabom xim tzuum. ⁶ Je co'ögy töxyjäy huidibi tzinaayb müd mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷ Yajnimä' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyjc yajxon ixxy may'aty, ca' yi' cuyduni Dios y'ayuc ytiy'ajt. Nigi anajty yjibicity nej ti y'idich ca'ydi jadu'n nej huidibi ca' ymibicy.

⁹⁻¹⁰ Yi töxyjäy co'ögypä ajcxy tiibi ytugi'px jimijtiy, jëbi mgojayiyi yxi ma yi lista huidibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty müddzinäy, pen oyjot oyhuinma'ñ ymiid, pen ti y'ung yajxon yajyeegy, pen ti migügtijc mi'oyjäy'aty,

pen ti may'ajt tuñ mïd Dios yjây, pen ti pa'ayooy huidibi ayoob huidibi jottigooyb, pen ti yajtüyöy yajxon nej ytiy'ajtiy.

¹¹ Yi co'ögy töxyjây mutz'anäcnibi ca' mgojayiipy yxi ma yi lista huidibi yi mibijcpidijc ypubedamyb. Pen capxytumb co tuna'n mïd Cristo ycixpi tijaty tung ma naymujctac, ycajegyity co je oybi anajty yam y'octumy, chi nijot'ajtni ypigaani, chi ytung ixmajtznip.

¹² Co yi mibijcpidijc ajcxy ca' jäygidaaci yi' ytung, chi jibic ñayjihuiyii co ca' cuyduñ y'ayuc nej ti ycapxytuñ mïd yi Cristo Jesús. ¹³ Jadügnax ca' ytung yajcopicy, jëyi yhuidijtni jayjin jaydijc, e ca' yi'yity, nañ jadu'n ymigüg nigapxni ni'ojiiyñi, capxni miydaacni huidibi ca' y'oyity. ¹⁴ Ndzojcpyich co yi töxyjây co'ögy mutz'anäcnibi huen pijccixy, huen tzinaaygixy jugy'ajtcixy yajxon, huen ung'ijxcixy anäc'ijxcixy, huen yajxon cuend'ajtcixy yjin ytiyc, jigix ca' ajcxy nihuambediib ni'ojihuiyb huidibi ca' Dios y'ayuc ixaani midohuaani. ¹⁵ Nijëjity töxyjây ajcxy co'ögypi ti ixmajtzcixni Dios y'ayuc ytiy'ajt, e ti ajcxy jiptigiyiygixni yi mujcu' yhuinma'n.

¹⁶ Pen ji mibijcpidijc yëydijcpi o töxyjâybi mïdity y'ajuugy y'amigüg co'ögypi, yi' je' paatip ixipy may'adipy je y'ajuugy y'amigüg co'ögypi, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögypi ca'p ti tim mïdity.

¹⁷ Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy.

¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo mïy co yajpajc'ada'n yi trigo tim." Nañ jadu'n jadüg'it yjaybetyity: "Yi huidibi tumb paatip yi' ymuju'n." Jadu'n jada ayuc yhuimbizimy: Yi' huidibi yaj'ixpijcp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungmïdipi ma yi mibijcpidijc pen tügpajc huidibi xihuip. Ca' mdiydunipy pin tungmïdipi ixti cooni metz o tugüg testigo yquëxigipy pen janch ti ytundigooy. Pen ytundigooy yi huidibi nigohuajc'ajtp, capxpidzim mayjäydumb jigix jacjadyii chigi'n pijccixipy. ²¹ Jada tiy'ajt miich nyajnimayyb, Dios Cristo Jesús etz yi' y'angeles ajcxy huidibi Dios ti huin'ijxcixy ñidiy'ajt'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdiydunip mdzaachtunip mibijcpidijc.

²² Ca' mic'amy mginixajipy co myajtungbiga'nip jäy huidibi ca' m'ixy'adyii. Ycajegyity ypcytunipy, e tú'ciy mbocycähuaangixy miich mïd yi'. Miich nayguend'adii jigix ca' mbocycähuipy.

²³ Miich Timoteo, pen pijcp mjot, tzo'y'adii hueen vino, com jac'oy yi' ca'ydi co m'ügipy huädz nii.

²⁴ Jadyii jäy huidibi jibic-huinma'n mïd yajnejhuihuipy yi' ajcxy yjibic-huinma'n ma anajty ca'ni yajtiyungixy. Jacjadyii jäy ca' yajnejhuüy yjibic-huinma'n ixti cooni yajtiyungixy. ²⁵ Nañ jadu'n jadyii jäy yajnejhuihuip co ojjäy'ajtin anajty ti tungixy, jacjadyii jäy ca' mic'amy yajnejhuihuipy co ojjäy'ajtin ti tungixy. Yi ojjäy'ajtin ca'p yi' yhuimipy coyüch.

6

¹ Tüg'óciy tumbidijc huidibi ajcxy mibijcp huidibi ajcxy ijtp cojuuyi codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapx-aani ni'ojihuaani yi Dios etz yi' ytiy'ajt. ² Pen yi tumbi mïd yhuindzin huidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigi yajxon yajmij'ajtcixy, com hue' je' Dios yjây. Yi huidibi nihuindzin'ajt ypadamyb je oybi huidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotcuje'ajtin nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy huidibi ca' ñaybadyii mïd je Huindzin Jesucristo y'ayuc ytiy'ajt, e ni ycanaybadyii mïd je tiy'ajt huidibi ich ajt nmijpidaacim, hue' jada

nej tög jät huidibi amij agixip huidibi ca' ni ti nejhuüy. Chachnijot'aty tzip capx, e jadu'n yhuimbizimy jada tzip capxy co migög ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtijc. ⁵ Yi jadu'mbi jät huidibi ca' mijpidägy Dios ytiy'ajt cojpy ymacxpy tzip capxy huidibi ca' ycixy ytigoy. Yhuinma'ñydgoy ajcxy, ca' huinjihuüygixy tiy'ajt. Hue' ajcxy yaj'ixpicy Dios y'ayuc mäd co ycomeen'adaangixy. Puhuäctuat miich jadu'mbi jät ajcxy. ⁶ Co Dios y'ayuc ytiy'ajt nguydunim, huin'it jotcuje ndzinaayim, etz nbaatim oy'ajt mijpi. ⁷ Ni ti ich ajt ya naaxhuiñ ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen nmäd'ajtim caayin uucin huit tucxy, jebi njotcuje'ajtim mäd y'i. ⁹ Je' ajcxy huidibi ooy nijot'aty comeen'adii, hue' je' ajcxy jibic tumb ajcxy ycähuañ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meen'y'adzojcin y'i je' y'i jibic-huinma'ñ cop'ajtip. Mäd y'i meen'y'adzojcin may y'i jät huidibi jäydgoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjät, cöguög y'i jät huidibi mäd y'i jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcin, mijpidäg Dios y'ayuc ytiy'ajt, tun oyjät'ajtin, mihuindina' y'i tung, mäd'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzciy. Tun jadu'n nej jät huidibi nayboyicquixigixy naymic'ixigixy. Nijot'at cixyot huinijot y'i jugy'ajtin huidibi m'alma ypadamyb ma Dios. Dios xyajnicixy jigix mgapxhuäcxip jada tiy'ajt. Ti miich mgapxypidzimy nej mmibicy mayjäyoty. ¹³ Dios je huidibi yajjugy'ajttaayb tög'öciy, y'i nidiy'ajt'aty co ooy ycopicyity jada ayuc jadu'n nej cham nyajnimayyb. Nañ jadu'n je Cristo Jesús je huidibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajnimayyb. ¹⁴ Copicy cuydun jada ayuc ane'min. Huädz mguydundähuipy, huädz myaj'ixpipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni ich ajt nHuindzin Cristo Jesús ñayguëxigiyb ya naaxhuiñ jadüg'oc. ¹⁵ Dios yajniguëxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yi' je' je Huindzin Dios huidibi ane'mdaayb. ¹⁶ Yi' je' tügpajc je jugy'ajt cop ymäd. Yi' ijtp ma je tucxin je jajin huidibi ca' pin huaad ninej mihuingoñ. Janch ni tög jät ti ca' ixy, e ni ca' ixañ. Yi' je' cömay'idipy etz y'i ane'mdaayb tög'öciy. Amén. Jadu'n jada.

¹⁷ Yi comeen'yidijc huidibi jadachambi tiempo tzinaayb jugy'ajt, nima' miich y'i ajcxy co ca' huaad amij agix ñayjihuüygixy, ni ca' nigi adzojccixy anaxy y'i meen huidibi jadu'ñy tigoydaayb. Huen ajcxy mijpidägy y'i Dios huidibi xymooyim tög'öciy mijmay mijcajee jigix njotcuje'ajtim. ¹⁸ Huen y'i comeen'yidijc oybi tungixy, jigix ajcxy cömay ypidzimipy co oyjät'ajtin tungixy. Huen ajcxy pa'ayoogixy ymigügtijc huidibi ca' ti mädity mäd oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixibi.

Timoteo, mijpidäg jada tiy'ajt

²⁰ Timoteo, mijpidäg jada ixpijcin huidibi ti myajnic'aty. Ca' mmijpidägipy y'i nigoobi y'ayucity, y'i huidibi ca' Dios huindzigiy. Ca' mmijpidägipy y'i jät huidibi ajcxy naybidaacip jadu'n nej jihuüy ooy ycohuinma'ñity, e ca' yjanchity, huidibi midzip'ajtp Dios ytiy'ajt.

²¹ Jadu'n nej nije' ajcxy panixcixy jada ca'pi ytiy'ajity, e jadu'ñi ñitigoy.

Huen Dios je oy'ajtin tuñ mäd miich. Amén. Jadu'n jada.

2 TIMOTEO

Yi Mimetzpí Necy Huidibi San Pablo Yajnigujx Timoteo

¹ Hich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuanigyixy yi jäy co pín mijpidägy Cristo Jesús yajjugypigipy co anajty ti y'ögy. ² Ooy ich miich ndzocy njihuïy nej ngi'm'ung'adyi. Dios Teedy etz ich ajt nHuindzin Cristo Jesús huen tuñ oy'ajt may'ajt miid miich, huen xypa'ayooy, huen xyyajjotcugiy.

Pablo jotcuyc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios miid miich ycixpi jabom jabom xim tzuum. Janch cixyjot huinijot nyajmij'atyich Dios, paady ooy oy nayjihuïyijich. Nañ jadu'n n'ap ndeedy jecy'ajty janch cixyjot janch huinijot yajmij'ajty Dios. ⁴ Ooy miich nicxy njaco'ixihuañ jigix njotcugihuibich. Ooy njajäymejtzcodyiijich nej miich mjiy myaax miid ich ycixpi je taabi jim ndzooñich. ⁵ Njäymejtzpich jadu'n nej miich mmijpidägy yi Dios janch cixyjot huinijot co xymiid'ityich. Nañ njäymejtzpich co jayijp mnambiid Loida etz yi mdaj Eunice mijpidacy Dios janch cixyjot huinijot. Minambich co chambaad miich mmijpidägy Dios janch cixyjot huinijot.

⁶ Jada nyajjäymejtzcotpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzägy'aty, hue' xyajjotmic'ajtp. Miid Dios ymic'ajt jëb mnaychójcigixy mnayjihuïyigixy, jëb oyjot oyhuinmañ myajtuungixy. ⁸ Paady ca' mmidzöyduñiyb ich ajt nHuindzin Cristo Jesús ytiy'ajt. E nañ ca' xymidzöyduñiybich co ti nbujxtijc iñäyich miid ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypí huidibi myajnajxpy co mgapxhuäcxxy yi Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzach'oyjäyity. Com Dios jadu'n ti yajnihuinmayiy tunañ oy'ajtin miid ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexañ je Cristo Jesús ca'ni anajty pín ya naaxhuiñ. ¹⁰ Dios ti cham jada oy'ajtin yajnigüëxgy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödígoy yi o'cin. E ti yajnejhuïy yi jäy miid yi' ytiy'ajt nej jëb huaad ndzinaayim huinixi ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudíojäyity. ¹² Paady ycixpi tzaachypí nbaadyich. Per ca' ndzo'yduñich, com ich nejhuïyb pín nmijpidacpyich, nejhuïybich co yi' ymiid cötujcin etz mic'ajt jëb xycuend'adipyich, ixti huin'it xi minaa Cristo Jesús tiydunañ yi naaxhuiñjy.

¹³ Mijpidäg je tiy'ajt tiydudägyi huidibi ti nyaj'ixpicy, jada je' tiy'ajt iixpejt nej jëb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihuindina' yi oybi ayuc tiy'ajt huidibi ti nyaj'ixpicy. Huen je Espíritu Santo huidibi miich miid jotjoty huinmañjoty xypubedipy xypudigihuipy.

¹⁵ Ti jada' mnejhuïy co tüg'óciy yi mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyi jadu'n ajcxy ti y'adiitczixy. ¹⁶ Yi Huindzin Jesús yi' pa'ayoohuipy yi Onesífero yjuugy ymigüg, com ooy ich mij xypa'ayooyich etz xypubejtyich, ca' xymidzo'yduñiyijich co nmach'iñäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuigy Onesífero co anajty Cristo Jesús tiydunañ naaxhuiñjy. Huädz miich mnejhuïy nej yi Onesífero xypubejtyich jim Efeso.

2

Huen Cristo Jesús may'ajt tunipy m̃id miich Timoteo

¹ Miich Timoteo, jadu'n njihuĩy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mm̃idoy may'ayuc tiy'ajt huidibi ti nyaj'ixpicy. Jada ayuc mayjāy m̃idoy e jēb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yēdyjctijc huidibi oyhuinma'ñ ym̃id, jigix yi' ajcxy nañ jadu'n capxnaxipy ma jacjadyii jāy.

³ Miich m̃imadäg yi ayo'n yi tzaachyp̃i huidibi m̃minajxyp myajnajxyp, jadu'n nej tūg Cristo Jesús ysoldado huidibi oy tumb. ⁴ Yi soldado huidibi soldad'ajtp ca' huaad huingbi tung nicxy tuñ, jigix je' yjotcuje'adipy pin anajty ti ypidägyii soldado, nañ jadu'n miich adügiip̃ Dios ytung mdunipy. ⁵ Pin jāy nayboyicquipxip ca' yi' premio pada'ñ, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶ Je jāy huidibi tumb ma ycam ytu' je' jayip̃ huidib huen yajpidigy yi ujtztim̃ huidibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huidibi nyajnim̃aayb, yi Huindzin Cristo Jesús xyajnejhuĩydähuipy tūg'óciy je' ytiy'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je ayuc tiy'ajt oybi huidibi nnajtzcapxiybich. ⁹ M̃id yi' ycixpi n'ayooyich etz tzaachyp̃i nyajnajxyich. Nbujxtijc iñäyich jadu'n nej jihuĩy njibicjāyich. Oy njapujxtijc iñäyich ca' ñejity, Dios y'ayuc ca' yi' mach y'ity, yajcapxhuäcx'adit̃zp ñgi. ¹⁰ Paady iich tūg'óciy jada tzaachyp̃i ngöbijctāy nmecxtujctāy, jigix jēbi je jāy ajcxy huidibi Dios ti yhuin'ijxigixy chinähuipy ajcxy huinixii ma yi' y'it oybi, Cristo Jesús yajnidzög̃iib yi' ajcxy y'alma.

¹¹ Tiy'ajt jada ayuc:

Pen ti iich ajt n'o'cim m̃id Cristo ycixpi, yi' m̃id ndzinaayim̃ tzajpjoty.

¹² Pen nyajnajxim̃ tzaachyp̃i ayo'n m̃id Jesús ycixpi, nañ quipxyi m̃id yi' n'ane'maanim̃. Pen ca' ya Jesús y'ayuc ngöbijcim, nañ ca' jib̃ tzajpjoty xycöbigaanim̃.

¹³ Oy iich ajt nyajmij'ajtim̃ Cristo Jesús o ngayajmij'ajtim̃, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägi cixyjot huinijot ma Dios ytiy'ajt

¹⁴ Yajjāymejtzcood yi m̃ibijcpidijc jada tiy'ajt huidibi ti nyajnim̃äy. Nima' je jāy ajcxy co je Huindzin Dios ca' oy'ixy tzip capxy ayuc huidibi ca' choobaady. M̃id yi' tzip capxy ca' ni ti oybi nbaatim̃, jēyi yajhuinma'ñdygoy huidibi am̃idoo'ijtp. ¹⁵ Naybidägi cixyjot huinijot ma Dios y'ayuc ytiy'ajt, nej jēb huaad cōmay mbidzim̃y ma Dios, jadu'n nej Dios ytumbi huidibi ca' ni ti m̃idzöyduyii, huidibi Dios y'ayuc ytiy'ajt yajxon yajhuinjihuiydaayb ym̃igügtijc. ¹⁶ Ca' mgöbigipy yi ayuc huidibi ca' ytiy'ajtiy, yi nigoob ayuc huidibi yajtüyöyp mayjāy ajcxy, yi tiy'ajt huidibi ca' Dios ytiy'ajt'adyii. ¹⁷ Yi huidibi ajcxy y'ayuc ca' ytiy'ajtiy yajhuinma'ñdygooyb ym̃igügtijc. Yi' ajcxy m̃id jibic ayuc yajhuinma'ñdygoy yi mayjāy ajcxy, jadu'n nej pützpa'm̃ huidibi ninicx̃ jicxp̃ oñyädgy. Jadu'n nej ti yjaty m̃id Hemeneo etz Fileto co ajcxy yhuinma'ñdygooy. ¹⁸ Yi' ajcxy anajty Dios y'ayuc cuyduuni, chi oyhuinma'ñdygooyñi. Chi ajcxy ym̃ināangixni co je tiibi y'öccixni, ti ajcxy je' yjugypicy, e jadu'n ajcxy yajhuinma'ñdygoy nijējity jāy. ¹⁹ Huidibi Dios ti cojy ti macxy, niminaxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi Huindzin Dios y'ijxajpy pinjaty yjāy'ajtpy. Tūg'óciy pin m̃ijpidacp yi nHuindzin Jesucristo y'ayuc, huen jipphuäctüdy yi jibic-huinma'ñ yi jibic-tung.

²⁰ Ma tūg mij comeeñdyijc jim̃ oori taasi, oori texy, etz oori cuchara, etz tijaty oyjaty. Nañ ym̃id jim̃ naax taasi, naax texy, quipy cuchara etz jactijaty ca'p y'oyjaty. Yajtuñ yi oori taasi etz oori texy ma tūgi caayiñ uuciñ oybi. Yajtuñ yi naax taasi etz naax texy oyñim̃inaa. ²¹ Jadu'n yi' pin jāy jibic-huinma'ñ ixmajtzp etz tuñ oyhuinma'ñ, jadu'n

yí' nej oori taasi oori texy. Cömay'idip yí' ma yí Dios. Huädz yí' yjot yhuinma'n, jëbi nHuindzin'ajtim Dios yajtunipy ma tüg'óciy oybi tung.

²² Ixmatz miich yí yujcyec'anäg ajcxy yjibic-huinma'n. Tudägy mdzinähuipy. Yajmij'ajtcix Dios cixyjot huinijot. Mdunipy oyjäy'ajtin. Ixmatz yí tzip. M'ojadadipy yí Huindzin Dios müd oyjot oyhuinma'n. ²³ Ixmatz yí nigoobi'ayucity yí loci huinma'n, ca' yí' y'oyity. Mnejhuüyb co yí nigoobi'ayuucity tzipcojp capxycojp yí'. ²⁴ Yí Huindzin Dios ca' yí' tzocy co yí' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy müd tüg'óciy jäy etz pe'cy y'idipy müd yaj'ixpijcin. Nañ chojcpy co mímecxtugipy ymígügtijc ajcxy. ²⁵ Miich müd yung naxy mjot mhuinma'n capxhuij je jäy huidibi midzip'ajtp je tiy'ajt. Ycadimjecyity co Dios ytiy'ajt nijothuimbíjtcixipy, e nejhuüygyxyipy je tiy'ajt oybi. ²⁶ Co anajty ajcxy ti ymejtcixy yhuinma'n, chi ajcxy ycöguëgyyb je mujcu' huidibi ajcxy ycapxymidooyb ma anajty ymüd'ajtcixy cïjoty etz ycapxymidoogixpy yí Dios.

3

Jäy jotmay müd y'idaangixy

¹ Miich mnejhuüyb ma je xü tiempo anajty ycixaani jadaanip ayo'n, je jäy ajcxy jotmay müd y'idaangixy. ² Ji adipy jäy huidibi adzojcp, huidibi amij agix nayjihuiyipy, jäy huidibi ameeñ, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'n ytaj yteedy, jäy huidibi ni ti ca' jäygidäga'n, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymígüg ixa'n tzoga'n, jäy huidibi ca' pa'ayo'n müdity, jäy huidibi ymígüg nihuambejtp, jäy huidibi oy ahua'nity, jäy huidibi midzip'ajtp yí oybi. ⁴ Ji adipy jäy huidibi ymígüg agojix midundigooyb, jäy huidibi ytunamyb ti ytunamyb, ca' ajcxy tuñ cuendi capxhuijin, jäy huidibi amij agix nayjihuiyipy, huidibi tzachnijot'ajtcixy mayñaxy xondaacin, e ca' cuyduna'n Dios ytiy'ajt. ⁵ Ji adipy jäy huidibi naybidáacigixp jadu'n nej jihuüy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxícp co ca' tiy'ajt yajtuñ. Cöguëg yí jadu'mbi jäy. ⁶ Ma yí jadu'mbi jäy ajcxy jim chooñity huidibi coyöyib conaxib ma je töxyjäy huidibi ca' ytudägyity, huidibi oy ypocyjäyity, huidibi jibic-huinma'n nijot'ajtp. ⁷ Yí jadu'mbi töxyjäy ajcxy panícxp payöyp canaagnax huinma'n, e niminaa ajcxy cahuinjihuihuipy yí Dios ytiy'ajt. ⁸ Jadu'n nej Janes etz Jambres midziptzoon je Moisés, yí jadu'mbi yëydijc ajcxy nañ jadu'n midziptzoonip yí tiy'ajt. Jibicjot jibic-huinma'n ajcxy ymüd. Ñaybidägyib ajcxy jadu'n nej jihuüy cuydungixy yí tiy'ajt, e ca' cuydungixy. ⁹ Ca' ajcxy mímadägipy nej huin'ünipy Dios yjäy. Niguëxigipy yí ajcxy yjibic-huinma'n jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhuinjihuiydäy nej ich ti nyaj'ixpiy Dios y'ayuc nej njäy'atyich, nej nhuinma'n nduüñich, nej Dios nmijpidägyich cixyjot huinijot, nej ich jäy nmímecxtucyich, nej oyjäy'ajtin nduüñich, nej ti mihuindinäyich Dios ytung. ¹¹ Miich m'ijxyp mnejhuüyb nej ti nyaj'ixhuidityich nej ti nyajpahuidityich, miich mnejhuüyb je ayo'n je tzaachypí huidibi ti mímaxyich ti nyajnaxyich jim Antioquía, jim Iconio, etz jim Listra. Jadu'ñyibaad yí ayo'n tiibi nbaadyich Dios ti xyñihua'n ti xycohua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpiyich, nañ tim jadu'n ajcxy yaj'ixhuididipy yajpahuididipy. ¹³ Yí jibic jäydijc huidibi naybidáacigixp jadu'n nej jihuüy cuydungixy yí tiy'ajt, e ca' yjanchity, nigi jibic y'ididzaangixy. Huin'ünaangixy ymígügtijc ajcxy, e ñayhuin'ünánigixy ci'm.

¹⁴ Miich Timoteo, ixmatz yí jadu'mbi jäy ajcxy etz panícx yí tiibi m'ixpiy, yí tiibi myajnibic'aty. Mnejhuüyb co ich ti nyaj'ixpiyich je tiy'ajt. ¹⁵ Com miich pi'cni mutzni

ti mjayty ti mnejhuïy yi Dios ñecy. Jada necy ti xyajnejhuïy nej huaad mijpidägy yi Cristo Jesús, e ñigi jadu'n jëb huaad yi m'alma nïdzoocin paady. ¹⁶ Tüg'óciy Dios ñecy Dios ci'm ti huinma'ñmöy je huidibi jaay. Paady jëbi nyajtuunim co jäy nyajni'ixiym nyaj'ixpijcin. Jëb nyajtuunim co nijpcogapxiym huidibi ca' ytiy'ajtity, etz co n'ihuïjim ngapxhuijim. Jëb nyajtuunim co nyaj'ixpijcin nej jëb huaad tiy'ajt nbanicxim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'ñ oybi tung.

4

¹ Ooy ycopicyity mido'mbic jada ayuc jadu'n nej cham ñich miich nijayiy. Dios etz ñich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypi etz yi jäy ajcxy tiibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'ñ y'ane'min. ² Nyajnibijcypy mgapxhuäcxip Dios y'ayuc ytiy'ajt hueñytimyminaajity, oy pin midoohua'ñ o camidoohua'ñ. Copicy co mijpcogapxihiipy huidibi ca' ytiy'ajtity, capxhuij pin yinjaty huenjaty camadacp, ñhuij capxhuij yi jäy ajcxy miid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³ Minip je xii je tiempo ma jäy ajcxy ca' cöbiga'ni oybi tiy'ajt. Nijëjity miid yci'mdzojcin miid yci'm-huinma'ñ ixtähuip ajcxy yhuindzin huidibi yaj'ixpigib nej ajcxy jäygidägy, oy ca' ytiy'ajtity. ⁴ Chi ajcxy anajty jipphuäctúutcxni camidoohuáangixni je Dios y'ayuc ytiy'ajt. Mijpidaacni anajty ajcxy ñigi yi ñigoobi'ayucity. ⁵ Miich huijy ycujc m'idipy. Mecxtujcta' nej jäy ajcxy xy'ixhuidity xypahuidity. Yajnima' jäy ajcxy Dios ytiy'ajt, jëb ajcxy mijpidägipy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzonaanich ya naaxhuiñ xyaj'ögaamich jäy, ti nayxoxiijich naydogyiijich miid Cristo Jesús ycxpi. ⁷ Ti ñich ooy mic nmihuindinäy Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham nijjp'ixypich co Cristo Jesús je tiydumbi tudägyi xycömayipyich jiihy tzajpjoty, miid co tiydudägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma yi'

⁹ Tun may'ajt tzojc yminipy ma ñich. ¹⁰ Yi Demas ti ñich yam xycögueecni co yjactzojcpy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam miid ñich. Co mminipy, miidminipy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je jocxhuit huidibi nyajhui'miyyich jim Troas ma Carpo ytijc mminipy. Nañ jadu'n mimindähuipy je necy. Je' ooy ytimycopicyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyi. ¹⁵ Naygüend'adii ca' miich yi' mmijyöybedipy, com ooy mic ti jippcogapxiy Dios y'ayuc huidibi ñich ajcxy nyaj'ixpijcpy.

¹⁶ Co yi' oga'n xyxiyich ma je mij tungmiidpi, naydüg ayuc nmihuindinaayich. Nipin xycapubejtyich, ñigi ajcxy xycögueectaayich. Huen Dios ocmeecxy nej ajcxy ti y'iditczixy.

¹⁷ Ca' y'ocnejity Dios ti xypubetyich ti xypudigiyich. Dios ti xyajjotmicpicyich, jigix ngapxhuäcxtähuibich ytiy'ajt ma tüg'óciy jäy. Jëb tüg'óciy jäy huidibi ca' yjudiojäyity huen mido'mbijctaaygixy Dios ytiy'ajt. Dios ti xyñihua'ñich ti xycohua'ñich ma yi' o'cin. ¹⁸ Yi Huindzin Dios yi' xyñihua'ñ xycohuá'ñibich ma tüg'óciy jäy huidibi ajcxy jibic-huinma'ñ miid. Yi'xycuend'adipich, ca' ni ti xyjadipyich, cooni anajty njädyich jiihy tzajpjoty ma y'ane'my. ¡Huen Dios cömay idipy janch huinixi huinitio!

Pablo ymigügtijc capxpooxni yajniguexy

¹⁹ Yajnax ñich ngapxpooxni ma yi' Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófimo com pijcip anajty, ñich je' n'ixmajch

jim Mileto. ²¹ Tzojc mjatyminiipy ma ca'ni tichpy ymiini. Yquejxyp ajcxy capxpooxın ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedıpy xypudıgıhuıpy. Huen Dios tuñ may'ajt mıid miich ajcxy. Amén. Jadu'n ngapxcıxyıch.

TITO

Yi Necy Huidibi San Pablo Yajnigüejsx Tito

¹ Hich Pablo, Dios jada miid nduunich, Jesucristo xy'apóstol'ajtpich. Yi' ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjugypíccixipy e tzináaygixipy huinixii. Dios yajhuinhuaniiy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'anüädägy. ³ Jada jugy'ajtin huidibi ijp huinixii, Dios ti yajnejhuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapx-huäcxibich. Je Dios huidibi xyajnidzoocim ich ajt n'alma ti xyajniibicyich co yi' y'ayuc ngapxhuäcxpyich. ⁴ Miich Tito, cham nijayiy jadun nej jihuüy nijayiyich ngi'm'ung. Com tú'ciy nmij'ixim nmijpidaacim Dios. Huen Dios ich ajt nDeedy tzajpjotpy etz Cristo Jesús ich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcuyc'adipy.

Myajniibigipy yëdyjc huidibi jëb nigohuajc'aty ymigügtijc

⁵ Paady ich miich jim Creta ñaaxjot nyajhui'my, jigix mjacyajniixihuipy je migügtijc jadun nej ich ca' ti nyajni'ixiydäyich ajcxy. Tügpi cajp nidüg nidüg myajniibigipy yëdyjctijc huidibi nigop'adiib nigohuajc'adiib yi' mibijcpidijc, jadun nej ti nyajnimäy. ⁶ Yi' myajniibigipy yi' huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi' mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajniibigipy huidibi oyjäy'ajtin tuñ miid hueñytimypinity; huidibi ooy y'amigügity; huidibi huijycujc; huidibi tiydudägy yhuinma'ñ; huidibi huindzigüib Dios; huidibi ci'm yajxon naygüend'ajtip. ⁹ Huen cixyot huinijot naybidaacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmöhuiipy jacjadyi jäy ajcxy miid tiy'ajt janchypi, e capxjotcidägy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi nigoobi tijaty ayuc tzachnimiydacp; huidibi ajcxy huin'imb ymigügtijc, jadun nej yi' ajcxy huidibi minamb co copicy tüg'óciy mibijcp huen yajtiy'ajtiy ymang ajcxy, jadun nej judíojäy tungixy.

¹¹ Copicy co mgapx'adugipy yi' ajcxy huidibi ymigügtijc yajco'iniiyb tüg jän tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinma'ñybi nigapxy ymigügtijc ymina'ñ co yi' Creta jäy ooy ajcxy y'aniijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadun nej jada cohuinma'ñyjäy ymina'ñ. Yaj'oj ajcxy mictägy, huen huinjihuüyigixy yajxon Dios y'ayuc. ¹⁴ Ca'p ajcxy mijpidaacipy yi' judíojäy ycostumbre etz ni ca' ajcxy mijpidaacip yi' y'ane'min huidibi jäy ci'm ti nihuinma'ñ'aty, huidibi ajcxy ti jippyöyduutni Dios y'ayuc ytiy'ajt.

¹⁵ Pin jäy huädz yjot yhuinma'ñ miid, oy ti jacuyduñ costumbre, o oy ca' ti cuyduñ, Dios yjäygidacpy yi' co oyjot oyhuinma'ñ miidity. Pin jäy ca' huädz yjot yhuinma'ñ miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'ñ miidity, ca' ajcxy nej ñayjihuiiyigixy. ¹⁶ Yi' jadumbi jäy hue' ñaybidaacigixy jadun nej jihuüy nej ooy Dios ytiy'ajt ajcxy mijpidaaci, chi ma huidibi ajcxy ytumybi ji yajnigüex'ccixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjädijc huen ca' ajcxy y'amügyjäy'adipy; huen huijycujc jäy'ajtcixy; huen müd'ajtcixy oyjot oyhuinma'n; huen mijpidaaccixy Dios ytiy'ajt cixyjot huinjot; huen oyjäy 'ajtin tungixy müd huentimypinjäyity; huen ajcxy mecxtujcin yajtungixy ma yi chinaayin. ³ Nañtımıyjadu'n mijjädijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuiy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijcixy capxhuijcixy müd ayuc oybi tudägyi. ⁴⁻⁵ Yi mijjädijc ajcxy töxyjäybi huen ihuijcixy capxhuijcixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytiyc näy yajmij'ajtcixy; nej jëb huaad tzojccixy jihuiygixy y'ung y'anäg; nej jëb huaad oyjot oyhuinma'n yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxyhuij ajcxy nej jëb huaad yjin ytiyc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy näy. Pen jibic-huinma'n anajty ajcxy ytumyb, chi anajty Dios ytiy'ajt yajnigapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyecpidijc etz anäctijc nej jëb huaad oyjot oyhuinma'n yajtungixy, ca' huaad ytundigoogixy ycapxtigoogixy. ⁷ Tito, tiydudägy mdzinähuipy, oyjot oyhuinma'n myajtunipy. Jim yi migügtijc ijsxpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc müd oy'ayuc oyhuinma'n, jigix co pinjäy jippcogapxihuaanip miich m'ayuc, chi tzo'ydu'n jihuihua'n, e jadu'n ca' jadipy nej jibic xyñigäpxcixipy xyñi'ojiygixipy.

⁹⁻¹⁰ Je tumbidijc huidibi ijtp cojuyiy codoogiy, huen yhuindzin imidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yjé'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajndzoocim ajt n'alma.

¹¹ Cham n'ijxim nnejhuuiyim nej Dios may'ajt ti tuñ müd tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñndzoocin co anajty y'o'ccixy. ¹² Dios cham ti xyajnejhuuiyim pen tzögamb ich ajt n'alma, chojcpy co n'ixmajtzim je jibic-huinma'n huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njijp'ijxim mina Jesucristo, je huidibi xy'ane'mdaayim, ymiina'n ya naaxhuiñ jadüg'oc müd ich ajt ycixpi. Njotcugiyim ich ajt co n'ijxim ymiiñ müd y'oy'ajtin ymic'ajtin, yi Dios huidibi yajndzögam ich ajt n'alma. ¹⁴ Yi Cristo Jesús ti ñayyoxyii ti ñaydoogyii co y'o'cy ma yi cruudz müd ich ajt ycixpi. Yi' ti xyjuybidzimim ma anajty yi mujcu' ci'am xymiid'ajtim, co anajty ti nbocytuunim. Yi' ti xyajpocyñihuätztaayim nidüg'óciy, jigix Dios xyjäy'ajtimip müd huädz jot huädz huinma'n, jëb nduunim oyjäy'ajtin cixyjot huinjot.

¹⁵ Tito, jada tiy'ajt migügtijc myajnimaydähuipy. M'ihuijip mgapxhuijip ajcxy yajxon. Dios ti xymöy cötujcin co m'ojipy pinjaty xycacapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmüdpı

¹ M'ihuijip mgapxhuijip yi migügtijc huen capxymidoogixy yi gobierno ytungmüdpı etz cajpjäy ytungmüdpı. Huen capxymidoogixy jadu'n nej y'ane'myii ajcxy. Huen

tungixy huidibi tiydudägyip huidibi ajcxy yaj'ane'mip. ² M'ihuijip mgapxhuijip yi migügtijc ajcxy ca'p ajcxy ni pin nigapx ni'ojihuip, nañ ni ca' tzipcapxy ajcxy ixtähuip, huen ñaybidáacigixy amigüg, huen mimecxtujtaaygixy yi ymigügtijc ajcxy, huen nicy xyeemy jäy'ajtcixy müd yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim müd jibic-huinma'ñ. Ca' anajty n'imidoohuim ngapxmidoohuim. Je mujcu' anajty ti xyhuin'ñim, paady anajty nniidigooyim ndüdigooym. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim nijot anajty n'iditizim, nga'oy'ijxim anajty nmigügtijc. Paady jäy anajty xymüddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxiyib ya naaxhuiñ, etz nnejhuüyim jadu'n nej Dios ñch ajt nihuambi yajtzoocpi may'ajt oy'ajt ti tuñ müd tüg'óciy jäy ajcxy ycixpi. ⁵ Yi' xyajñdzoocim ajt n'alma canan co ñch ajt ndzach'oyjäyity. Hue' je' jadu'n ti tuñ müd co pa'ayo'n ti yajtuñ müd ñch ajt ycixpi. Ninigoob ti tuñ may'ajt oy'ajt müd ñch ajt ycixpi. Chi yaj'oyiñi ajt njot nhuinma'ñ huinjemy müd je Espíritu Santo huidibi xyajtigüym njot nhuinma'ñ, e jadu'n ajt njugy'ajtin ndzinaayin chondaacni huinjemy. ⁶ Dios ti yecy yi Espíritu Santo janch mijcajee ma ñch ajt njot nhuinma'ñ. Jadu'n Jesucristo xytuunim, je huidi ñch ajt nihuaanim yajtzoocim. ⁷ Yi' ti xyaj'ahuimbijtim tudägy müd je may'ajtin oy'ajtin huidibi ti tuñ co yi' ti y'ögy müd ñch ajt ycixpi. Jëyi cham y'oy'ahuijxñity mina anajty nbadaanim je jugy'ajtin huidibi Dios müd huidibi ca' ycixipy ni minaa xii.

⁸ Jada ayuc jada tiy'ajt ndzojcpyich co miich mnigapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägyip yi jäy ajcxy müd je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigoobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mijjptigiyihuipy yi tzip capxy ma yi judiojäy ycötujcin huidibi ajcxy ypanixyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt müdity.

¹⁰ Yi jadu'mbi jäy huidibi tzip capxy ixtaayb, müd tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuüyib co yi' jadu'mbi jäy ajcxy ti ixmajtcixy je tiy'ajt, tundigooyb yi' ajcxy, ci'm jadu'n naysajpocycähuiygixy.

Pablo nimay Tito co müd naybadaanip

¹² Nyajniguxepich nidüg, aver huidibi ñch anajty n'ocquejxyp yi Artemas o yi Tíquico. Co yi' jim yjadipy, chi miich xyjatyñiminipyich mic'amy jim Nicópolis com jim nyaj-naxa'ñich yi tich poj tiempo. ¹³ Co yi' Zenas, yi huingapxpi, etz Apolo ajcxy jim yjadipy, quejxnajxcix miich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi' jäygidaacip yi' ajcxy yhuinma'ñ.

Pablo ycapxycixy müd Tito

¹⁵ Yi migügtijc ajcxy huidibi ya yquejxyp ajcxy capxpoocxin ma miich. Nquejxpich ngapxpocxin ma tüg'óciy yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip müd miich ajcxy ycixpi. Amén. Jadu'ñyi ngapxcixyich.

FILEMÓN

Yi Necy Huidibi San Pablo Yajniguejx Filemón

¹ Hich Pablo etz Timoteo, ich ajt nmigüg, nijayibich miich Filemón huidibi ooy ndzocyich, huidibi quipxyi müd nduunim. Nmach'inäyich müd co nyajmij'atyich Cristo Jesús. ² Nañ jadu'n nijayibich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy müd ich ajcxy, etz tüg'óciy yi migügtijc huidibi naymújigixp ma miich mdijc Dios ojadajtciy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcugíygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios müd miich ajcxy ycixpi. Njatytimjäymejtzcipich miich ajcxy jabom jabom co Dios nmibijctzooyich. ⁵ Ti ich ayuc nmidoj jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios müd miich ajcxy ycixpi, huen oyjäy'ajtin mdunipy müd je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jeb ajcxy cuyduñ Cristo y'ayuc. ⁷ Hermano, ti ich ooy njotcugíyich müd yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón müd Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamíidyich cötujcin huidibi Jesús xymooyich jeb nja'ane'my co miich mgöbigipy Onésimo oy'amy. Per ca' jadu'n n'ane'ma'ñ müd co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyñich. Cham jäy ti xypidägyich pujxtigoty müd co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich müd co yi' ti mijpidägy Jesús ya ma ich nbujxtijc'inäyich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'imidoy ti xycapxymidoj. Jadachambi janchtiy capxymidoohuam jadu'n ma miich etz jadu'n ma ich. ¹² Cham nyajniguxy Onésimo. Ooy njajihuüyich co yam nguexyich. ¹³ Ooy ich yam njayaj'ida'ñich ma ich jigix ixipy yam xymídtuñich. Ytimyñipaaty ixipy jadu'n nej miich xymídtuñich ma yam nbujxtijc'inäyich müd co ngapxhuäcxich je jemybi oybi ayuc nej Jesucristo yjaty ayooy. ¹⁴ Per ca' ich n'a'ixiyich nicxy nyajhu'i'myich, pen ca' miich jadu'n mina'ñ. Ca'p ndzocyich adzip ahua'ñ tijaty miich mdunipy. Jeyi ndzocyich co miich oy'amy xypubedipyich. ¹⁵ Ca' yjeyity paady ycixpi ti xycöguëgy jebi mijpidägy Jesús. Hueeni xii tiempo ti y'ity ya, e cham co yhuimbidity ma miich, müd y'idipy jim huinixii. ¹⁶ Ca' jadu'n m'ocmíid'ajtnip cham jadu'n nej jac'oyñipin cojuyiy codoogiy tumbi. Hue' je' mmí'adip jadu'n nej Jesús yjäy huidibi ooy mdzocy mjihuüy. Pues ooy ich yi' ndzocy njihuüyich. Jac nigi cham miich mdzogipy mjihuihuipy müd co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ich miich ixipy xycöbicyich. ¹⁸ Pen ti yi' yinjaty huenjaty xymidundigoy o xymínucx'adyii ich miich nmigüedipy. ¹⁹ Hich Pablo, ich miich njaaybich nfirmajiyich müdich ngi'mgi' ngi'mletra. Hermano, nmigüedipyich nej Onésimo xymínucx'adyii. Oy ich yam ca' n'íbaady ngapxpaady co miich xymínucx'adyiijich müd co Dios ytiy'ajt ti mbaady ma ich. ²⁰ Xypubedipich müd Onésimo. Yi nHuindzin'ajtim Jesús yjäygidägy pen jadu'n mduñ. Mdunipy may'ajt müd Onésimo müd Jesús ycixpi, e jadu'n ich jeb huaad njotcujc'atyich.

²¹ Nnejhuⁱⁱybi^{ch} co ooy m'ⁱⁱmido^y mgapxmido^y, e jadu'n nej yam njacnijayⁱⁱ, jac'anaxy mduna'ñ. ²² Nañ jadu'n yam nimäy. Tun may'ajt ni'ixⁱ tüg jättac. Njijp'ijxypⁱch co nbujxtijcpidzimipyⁱch tzojc müd co müch ajcxy Dios mibijctzoogixy müd ⁱⁱch ycixpi, e jadu'n jëbi nícxiⁱbich ma müch.

Pablo ycapxycíjxy müd Filemón

²³ Nañ nbidacpyⁱch necyjoty yam. Xycapxpoo^cxp Epafras ⁱⁱch nmibujxtijc jäy müd Cristo Jesús ycixpi. ²⁴ Nañ xycapxpoo^cx Marcos, Aristarco, Demas etz Lucas. ⁱⁱch yi' ajcxy xypubejtp ya. ²⁵ Huen yi nHuindzi'n'ajtim Jesucristo may'ajt oy'ajt tunipy ma müch ajcxy, jëb müch ajcxy oy m'ity. Amén. Jadu'n ngapxcíxyⁱch.

HEBREOS

Yi Necy Huidi Pinjaty Yajniguejx Je Hebreo jäy

¹ Jecy'ajty Dios ayuc yejcy ma ajt nmij'ap nmijteedy canaag'oc etz canaagnax müd je yprofetas ajcxy, je' ajcxy huidibi najtzcapxiy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma ich ajt müd je' y'ung. Dios müd y'ung yaj'oyiye je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadziydäy tüg'óciy. ³ Dios y'ung ymüd Dios y'oy'ájtín, yi' je' Dios ytiicxin'ajtpy yjajin'ajtpy. Yi' je' codinaayb etz yajniguëxiy nej je' je Dios. Dios y'ung huijtz'ijtaayb tüg'óciy müd je' y'ayuc etz ane'min mic'ajt müdpi. Co Dios y'ung ti xyajhuaatzim ajt nbocy, chi cöbijcy je mij'ane'min jiiby tzajpjoty, jadu'n nej jihuïy y'ixtacy a'oy'amy ma je mijpi Dios ymijc jiiby tzajpjoty.

Dios y'ung jacmij yi'ca'ydí ángeles ajcxy

⁴ Je Dios y'ung jac mij je' ymic'ajt y'ane'min müdity, ca'ydí je ángeles ajcxy. Com yi' je' Dios y'ung, paady ycixpi mic'ajt müdity jaydëbi ane'my huidibi Dios yje'ajtpy, e ca'ydí yi' ángeles ajcxy yi' jadu'mbi mic'ajt müd. ⁵ Com Dios ca' yi' ni tüg ángel nimay:

Ich miich n'ung'ajtpy. Ich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adibich, ich miich n'ung'adüyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'min pidacy:

Huen je ángeles ajcxy nidüg'óciy huindzigiñhuipy pa'tjihuñhuipy je' y'ung.

⁷ E müd je ángeles ycixpi, Dios ymina'n:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jinye'n.

⁸ Jadu'n Dios ymina'n müd y'ung ycixpi:

Miich, Dios'ajtp, miich m'ane'min huinixii huinitiempo yi' y'idipy. Müd mdudägy'ajtin miich m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, miich mDios, ti xyhuin'ixy, e ti yejctäy nigi ma miich je jotcuyc'ajtin je xondaacin, ca'ydí ma yi' mmi'ane'mbidijc.

¹⁰ Dios nañ jadu'n ymina'n:

Miich, Huindzin Dios, oga'n'aty mbidac nej naaxhuiñybi chondacy, e müd miich mmic'ajt myaj'oyiye je tzajp.

¹¹ Cijxtähuip yi' naaxhuiñybi etz yi' tzajp, per miich hui'mip huinixii huinitiempo. Jadu'n yi' naaxhuiñybi etz yi' tzajp y'amijiydähuipy nej huit.

¹² Jadu'n miich yi' naaxhuiñybi etz yi' tzajp m'anëgiy nej tüg huit yaj'anëgyin. Jadu'n miich yi' naaxhuiñybi etz yi' tzajp myajtigadzipy nej jäy ajcxy yajtigach yhuít. Chi miich je'ni m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

ña' ma ich nmijc a'oy'amy, ixti mabaad ich miich je mmidzip nmimadactäyich, jadu'n yi'ajcxy nipaadipy nej yi' miich mdecypocxpejt'adyi.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyöygixy jigix pubedipy je jäy ajcxy huidibi ajcxy y'alma padam ñidzoocin.

2

Ca' n'ijxnajx nmidonajxim nigoo yi' pocyhuinmeecxin

¹ M̄id jadayaabi tiy'ajt ycixpi, oy co yajxon n'ocjāyguḡyīm Dios ytiy'ajt huidibi ti nm̄idoohuim, jigix ca' njīpyōyduutim je Dios ytiy'ajt huidibi jadu'n nipatp nej tū'aa oybi. ² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii m̄id ypocy ycixpi. ³ ¿Nej tijy ḡch ajt co Dios ycastigo nga'ocpaatim, pen je' je' yam ca' nm̄ipidaacim je Dios ytiy'ajt jadu'n nej jēbi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jēbi Dios xyajnidzoocim ajt n'alma. E jac'axam je discípulos ajcxy nañ jadu'n najtzcapxiy Jesús y'ayuc, e n̄gapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ḡch ajt. ⁴ Jadu'n anajty capxhuācxciy Jesús y'ayuc ma ḡch ajt, chi Dios yajniguēxiḡp Jesús y'ayuc co yjanchity co tuñ iḡxpejt, mijhuinma'ñ etz milagro. E co Dios xymooyim je yjihuī'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ym̄igūḡ

⁵ Dios ca' yi' ángeles ajcxy ti cōtujcin m̄öy co y'ane'mity ya naaxhuiñ, jadu'n nej xii tiempo min cidāgy, je xii je tiempo huidibi ḡch ajt nnimiydaacim. ⁶ Hue' janchtiy ji tūg'it yjaybetyity ma Dios ñecy, ma ym̄ina'ñ:

Miich Dios, ¿ti yi' je naaxhuiñyāy, co miich yi' ajcxy mjāymedziyb? ¿Ti yi' je naaxhuiñyāy, co miich je' ajcxy mjotmay'adyii?

⁷ Janch con xii tiempo miich ti mm̄öy yi' naaxhuiñyāy ajcxy e nañ ti mm̄öy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mm̄öhua'ñ naaxhuiñyāy ajcxy n̄gi ymic'ajt y'ane'm'ajt, ca'ydi je ángeles ajcxy. Tūg'óciy huidijaty miich ti myaj'oyiḡy anajty ti mb̄idactāhuip yi' ma yi' naaxhuiñyāy ajcxy ane'm̄in.

⁸ E co anajty ti mb̄idactāy anajty ma yi' ajcxy y'ane'm̄in, jadu'n nipaady nej jihuīy tūg'óciy tijaty huidibi ti myaj'oyiḡy, y'idipy ma yi' ajcxy ytecypa't.

E jadu'n yi', co Dios moyday ane'm̄in je Cristo. Dios ni ti yi' ca'ixmach nicxy yca'ity ma yi' y'ane'm̄in. Oy ixyipy ca'ni cham n'ijxim co tūg'óciy tijaty ya naaxhuiñ etz tzajpjoty ca'ni amugi' ycapxycōbigyi. ⁹ Dios ti xyaj'ijxim co Jesús m̄id mij'ajt ane'm'ajt. Je ángeles ajcxy n̄gi mic'ajt oy'ajt anajty m̄idity, ca'ydi Jesús co yi' chinay ya naaxhuiñ. Jadu'n Dios tuñ jaydēbi Jesús y'ögy m̄id jāy ajcxy ypocy ycixpi. Jadachambi Dios ti m̄öy Jesús mij oy'ajtin, etz mij ooy ti cōmay m̄id je tzaachy'o'cin huidibi ypaat.

¹⁰ Tūg'óciy huidijaty ya yajpatp, ji'ajtp yi' m̄id Dios ycixpi etz Dios ymic'ajt yaj'ijtaayb tūg'óciy huidibi ji'ajtp. Dios tudāgy ytuuñ co yajca'pxi Jesucristo y'oy'ajtin m̄id je tzaachyp̄i huidibi ti minaxy ti yajnaxy. M̄id co Jesucristo tzaachyp̄i ti minaxy ti yajnaxy, paady ycixp jāy ajcxy padaangixy Cristo y'oy'ajtin. ¹¹ M̄id co Jesucristo, je huidibi jāy ajcxy yajpocyñihuaatzp, jiiby mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E m̄id co Jesucristo etz yi' yjāy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuīy co yi' ym̄ina'ñ co je mibijcp̄idijc jadu'n nipaady nej yi' yjugytijc ym̄igūḡtjic. ¹² Paady je Cristo ym̄ina'ñ ma yjaybetyity:

Miich Dios, ḡch miich ngapxpadipyich ma nm̄igūḡtjicich. N'ihuipyich iy m̄id miich ycixpi ma je jāy ajcxy ti nayyōym̄jicigixy.

¹³ Nañ jadu'n Cristo ym̄ina'ñ ma yjaybetyity:

Nm̄ipidāgibiyich Dios.

E jadūg'oc ym̄inaanip:

Cha ḡch, m̄id je ung anāg ajcxy tiibi Dios xym̄öyich.

¹⁴ Ma jāy ajcxy ytūgquēx'ajtcixy, tūgpi yxiixy, tūgpi ni'py je' ajcxy. Nañ jadu'n Jesús ym̄id je' anajty yxiixy ñi'py jadu'n nej jāy ajcxy ym̄idity jigix jēbi y'ögy, e jadu'n je' yajhuindigoydāhuipy je huidibi anajty jamic'ajtm̄id co jāy yaj'öḡyib, je' je' je' mujcu'.

¹⁵ E jadu'n je Cristo yajnihuādztuty tūg'óciy pinjaty anajty cojuyiḡy codoogiy y'ijtp ma je

mujcu', m̃id co tzig̃iygixy yí y'o'cin. ¹⁶ Janch co Jesús ymiiñ ya naaxhuiñ, ca' nm̃inaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E m̃id jada ycixpi, Jesucristo jadu'n anajty m̃idity ñiñcx etz yjugy'ajtin tú'ciy m̃id je jugytijc ym̃igügtijc niñcx etz jugy'ajtin, jigix jēbi yí' naydügpaic codināy naaxhuiñyāy ajcxy ma Dios yhuinduu m̃id tudāgy'ajt etz pa'ayoohuin. Etz nañ jadu'n jigix jēbi huindzig̃iy Dios m̃id yci'm ñiñcx m̃id jāy ajcxy ypocy ycixpi, e jadu'n yajpocyhuaatztähuip yí mayjāy ajcxy. ¹⁸ Com Jesucristo ci'm tzaachypí minajx yajnajx, etz nañ jadu'n je mujcu' Jesucristo jot'ijxy huinma'ñ'ijxy, paady ycixp Jesucristo jēbi pubety pinjaty jadu'n tzaachypí minajxp yajnajxp, etz ma yjot'ixyíi yhuinma'ñ'ixyíi je mujcu'.

3

Jesús jacñigí mijity yí' ca'ydí Moisés

¹ M̃id co Jesucristo jadu'n ti tuñ, paady ycixp miich ajcxy m̃igügtijc huidibi cixyjot huiñijot mijp̃idacp Jesucristo, je huidibi ajcxy Dios ti xyhuin'ijxcixy co xyje'adāañigixy. P̃idaaccix m̃huinma'ñ yajxon ma je Cristo Jesús, je huidibi nejhuiñiyim co Dios ti quexy ya naaxhuiñ, je huidibi tūgpajc m̃ijtungm̃id ma Dios, huidibi tūgpajc xycodinaayim ma Dios. ² Jesús tudāgy yí' ti y'ity ma Dios yhuinduu, je Dios huidibi ti yajñibigyíi je m̃ijtung, tim jadu'n nej Moisés y'ijty tudāgy ma je ytung m̃id tūg'óciy jāy huidibi anajty ti cōbijccixy Dios ycōtujcin ma Moisés. ³ Jesús ym̃ihuaad ñigí huindzig̃i'ñ etz cōmayin, ca'ydí Moisés. Tim jadu'n nej pin tūg tijccojpi je' je' ijtp cōmay, ca' nm̃inaanim je tijc ijtp cōmay. ⁴ Tūg tūg tijc jim je' pin cojp. Per Dios yí' ti yajcojtāy yaj'oyidyāy tūg'óciy huidibi jī'ajtp. ⁵ E jadu'n je Moisés tudāgy je' ytuuñ m̃id tūg'óciy jāy huidibi ti paady Dios ycōtujcin ma yí'. Je Moisés je' ytung'ajti yejcy je tiy'ajt huidibi anajty Dios jac'axam yegamyb. ⁶ Je Cristo tudāgy ytuñ m̃id tūg'óciy iich ajt huidibi mijp̃idacp Dios, tim jadu'n nej tūg jāy y'ung tudāgy ytuñ ma yteedy ytijc yteedy ypidāgy. Jadu'n iich ajt nbaady nej Dios ytijc, e Cristo tudāgy ytuñ m̃id iich ajt, pen tudāgy nm̃ibijcim Dios y'ayuc, ca' n'ixmajtzim ajt nm̃ibijcin. Pen nm̃ijp̃idaacim Dios agujc jotcujc ixti mabaad n'o'cim m̃id je' ycixpi huidibi njjp'ijxim ma Dios.

Dios yjāy ajcxy ypoox̃in

⁷ Paady ycixp jadu'n yjaybetyity ma Dios ñecy ma je Espíritu Santo jadu'n yminañ: Jadachambi pen m̃idooyb miich ajcxy nej Dios yminañ,

⁸ ca' ajcxy m'ijtcixy jotjuuñ jadu'n nej je' anajty ajcxy jotjuuñ y'ity, je' ajcxy huidibi m̃ibid̃igy Dios jecy'ajt (co ajcxy y'ijty jim m̃ijtig̃iduum). Je x̃ii je tiempo jecy'ajty co ajcxy jot'ijxy huinma'ñ'ijxy Dios.

⁹ Chi Dios yminañ:

Miich ajcxy mm̃ij'ap mm̃ijteedy ajcxy jim m̃ijtig̃iduum xyjot'ijx xyhuinma'ñy'ijxich ajcxy jecy'ajty. Ca' ajcxy jāymech co ajcxy y'ijxy anajty canaag m̃ijhuinma'ñ huidibi ndumybich anajty m̃id yí' ajcxy ycixpi huixchiguipx jimijt.

¹⁰ Paady njotma'tyich m̃id miich ajcxy mm̃ij'ap mm̃ijteedy jecy'ajty, e nm̃inaañich: "Ñidigoy tūdigoy ajcxy jabom jabom ma yjot yhuinma'ñ. E ca' ajcxy nejhuinhuaangixy anajty iich nñi'aa ndū'aa."

¹¹ Paady yí' ajcxy nm̃ijotma'tyich, e janch janch nñimaayich ajcxy, e ca' n'indāgyich, co ca' ajcxy ytiḡihuipy ma iich nbocxtac.

¹² Migügtijc, naygüend'ájtigix nidüg nidüg co ni tūg miich ajcxy mgam̃id'adip jibicjot jibic-huinma'ñ, e ni m̃ga'ixmajtzcxipy Dios juugypí y'ayuc, m̃id co ca' mm̃ibijccixy.

¹³ Hue' janchtiy nayjot'amijmóoyigixy miñ xyipy jabom jabom nami x̃ii tiempo yjacñicxñi. Jadu'n miich ajcxy mdunipy, ca'ydí ajcxy yí pocytuñi xyhuin'ingixy, e chi anajty mnaybidaacigixy jotjuuñ. ¹⁴ Pen nm̃ibijcim nm̃ijp̃idaacim Cristo y'ayuc t̃ibi nbaatim oga'n'aty, e ca' n'ixtiḡihua'cim mabaad n'o'cim, chi jēbi n'ijtim m̃id Cristo.

¹⁵ Je' je' je huidibi jaybetyity ma Dios y'ayuc:

Cham, pen mmodooyb miich ajcxy nej Dios ymina'n, ca' ajcxy m'ijtcixy jotjuuñ, jadu'n nej je' anajty ajcxy huidibi Dios mijotma'tp anajty m'id co ajcxy mibidigy Dios.

¹⁶ ¿Pinjaty ajcxy huidibi jecy'ajty midou Dios y'ayuc e mibidigy Dios? Nidüg'óciy je' ajcxy huidibi tzomb Egipto naaxjot jecy'ajty m'id Moisés. ¹⁷ ¿Pinjaty je Dios ymijotma't jadu'n huixchiguipx jimijt? Je huidijaty ajcxy tundigoy m'id Dios ytiy'ajt, e je' ajcxy cijx y'octaaygixy jim migtig'iduum. ¹⁸ ¿Pinjaty Dios ñimay co ni camina ytigihuipy ma je Dios y'it ylugar ma jëbi ypoocxcixy m'id yí? Je' ajcxy huidibi ca' ycapxymidoy. ¹⁹ Paady nnejhuuyim co janch ca' ajcxy jaty nej ytigiygixyipy ma Dios y'it ylugar m'id co ajcxy ca' mibijcy Dios y'ayuc.

4

¹ Com nm'idni ajt Dios y'ayuc, jadu'n nej ti xyaj'ahuanuyim co ndiguyim ma yí chinaydac yjugy'ajttac, e nboocxim m'id yí. Paady ooy tzocy co ndziguyim Dios. Ca' jecyity co nidüg miich ajcxy ca' mdigihuipy m'id co ca' mmibijccixy Dios y'ayuc. ² Nañ jadu'n ti ich ajt nmidoohuim je Dios y'ayuc oybi, tim jadu'n nej yí ajcxy jecy'ajty ti midooy. Per ca' Dios y'ayuc ma ti ypubedyi ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidacy. ³ Ich ajt com ti nmibijcim je Dios y'ayuc oybi, ich ajt je' tiguyimip ma je it huidibi Dios ti tijy ma jëbi nboocxim m'id yí. Com Dios jadu'n ymina'n:

Paady yí ajcxy nmijotma'tyich, e nnimäyich ajcxy, n'ibaadyich ngapxpaadyich n'ayuc, co ni camina xii yí ajcxy ypocxtac capaadipy ma ich.

Tüg'óciy huidibi Dios yajcojy yaj'oyiy, hue' ti yajcojy ti yaj'oyiy jayijpni ca'ni anajty naaxhuiñybi chondacy. ⁴ Com ma yjaybetyity je tiy'ajt jilby muumity nigapxy je mihuixtujcxibi ma jadu'n ymina'n:

Dios ypoocxy je mihuixtujcxibi m'id je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n ymina'n:

Ca'p yí ajcxy ytigiygixipy ma ich nbocxtac.

⁶ Hue' janchtiy Dios yjacm'id'ajtyñi it lugar ma ypocxtac ma jëbi pinjaty ytigihuip. Yí ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytigiy ma Dios ypocxtac, m'id co ajcxy capxycomidodacy Dios. ⁷ Paady ycixpi Dios ti pidägy tüg xii tüg tiempo mina jëbi pinjaty tigihuipy ma yí ypocxtac. Je' jadachambi xii tiempo Dios ti pidägy. Dios ti xyñimaayim nej David ymina'n tzach com jecy, nej miiñ jaybety huidibi ti yajnigapxy co jadu'n ymina'n:

Jadachambi pen midooyb miich ajcxy nej Dios ymina'n, ca' ajcxy mnaybidäacigixy jotjuuñ.

⁸ Co Josué je Israel jäy ajcxy camoy je poocxin, ca' Dios canigapxy huingbi xii mina ytigihua'n ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'n ma Dios ypocxtac. ¹⁰ Com pinjaty tigiyb ma Dios ypocxtac hue' je' ypocxy m'id je' ytung ycixpi tiibi anajty tuñ, tim jadu'n nej Dios ypoocxy je mihuixtujcxibi m'id je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndiguyim ma je Dios ypocxtac, ca' yjecyity co nijëjity miich ajcxy mbaduunipy nej ajcxy y'idich huidibi ajcxy ca' mibijcy Dios y'ayuc, e ca' mdigiygixipy ma Dios ypocxtac.

¹² Com yí Dios y'ayuc ijtp yí huinixi huinitiendo, e ym'id mic'ajt. Nigi yajtigiyñajxtäy ninicx, jot almi, ca'ydi tüg espada huidibi mejtz'adu'm'amy jippip etz yjipxu'ñity. E Dios y'ayuc nejhuitydaayb nej jäy ajcxy yjot yhuinma'n m'idity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yí yhuinduu. Tüg'óciy nej ajt njot nhuinma'n nm'idity ñiguëxictähuip yí ma Dios, je Dios ma ich ajt nguendi ngiyegaanim, yí ijxtaayb ajt njot nhuinma'n.

Jesús yí' je' je' mijhuingapxpi ma Dios

¹⁴ Jesús, je Dios y'ung, yí' je' tūgpajc jacmijtungmūd huidibi xycodinaayim ma Dios mūd ajt nbocy ycixpi. E Jesús ti ytiḡy ma Dios yhuinduu, paady ycixp tzoc ijtīm tudāgy ma ajt nmibijcin. ¹⁵ Pues com Jesucristo, je huidibi tūgpajc mijtungmūdip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej iich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jēbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcuyc nmihuingoonim je Dios y'ane'mdac e n'ojadajtim nmibijctzoohuim Dios, jaydēbi co anajty jotmay mūd'ajtim, chi Dios may'ajt oy'ajt tunipy mūd iich ajt ycixpi.

5

¹ Tūg tūg mijtungmūdipi huidibi huingapxp jāy ajcxy ma Dios, hue' je' yajhuin'ijxp ma yēdiḡctijc, etz yajnigapxpejty, jaydēbi yhuingapx jāy ajcxy ma Dios etz yajnaxipy Dioscojuyip mūd jāy ajcxy ma Dios, etz yegipy huindzigi'ñ ma Dios mūd jāy ajcxy ypocy ycixpi. ² Je mijtungmūdipi jāy ajcxy yajnibijc huidibi huingapxp jāy ajcxy ma Dios, jēbi yí' ajcxy pa'ayooy huenpinity huidibi pocy ymūd, com nañ jadu'n yí' ajcxy pocy jihuīy. ³ E mūd ycim'bocy ycixpi copicy yegipy huindzigi'ñ ma Dios etz mūd jacjadyii jāy ajcxy ypocy ycixpi.

⁴ Ni pin huaad ci'm ycanaymōyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yí' mūd jāy ajcxy ycixpi, tim jadu'n nej Dios huin'ijxy Aaron jecy'ajty etz yajnibijcy yí' jadu'mbi tung. ⁵ Jadu'n yajty mūd je Cristo, ca' ci'm nayñibijctzoohuīy ma yí' jadu'mbi tung. Dios yajnibijci co huingapxip mūd jāy ajcxy ycixpi, e ti ymōyii je mij'ajt jadu'n nej anajty ti nimāy: Miich je' iich n'ung. iich miich mjugy'ajt ti mmōy cham.

⁶ Nañ jadu'n ymina'ñ jadūg'it ma Dios ñecy:

Miich je' mhuingapxyp je jāy ajcxy ma Dios huinixi huinītiempo, tim jadu'n nej Melquisedec ytuuñ.

⁷ Co Cristo chinay ya naaxhuiñ, chi ooy mijuydāgy minucxtāgy Dios, chi ooy mibijctzoy janch mic je Dios huidibi jēbi ycohua'ñyii ma je o'cin. Mūd co ooy mibijcy ooy huindzigi'y Dios mūd yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, mūd je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yí' y'oy'ajtin mūd je tzaachypi huidibi yminajxy yajnaxxy, chi ni'ixi' anajty y'ity jēbi cop'adyii alma nīdzoocin huinixi, jaydēbi tūg'óciy pinjaty capxymidoob Cristo, ypaadip ajcxy y'alma nīdzoocin. ¹⁰ Dios jadu'n yajnibijcy Jesús co yajnicxip je jac mijpi tung ma yí' co huingapxip jāy ajcxy ma Dios, tim jadu'n nej Melquisedec ytuñ jecy'ajty.

Je ayo'n co nijjpyōyduutim yí' mibijcin

¹¹ Ooy iich miich ajcxy mij nmūdmiydāga'ñ ma jadayaabi tiy'ajt, per ooy chachchip nimiydaacnity, com ca' miich ajcxy mic'amy mhuinijihuīhuipy Dios ytiy'ajt. ¹² Jadu'n nej jada xii tiempo ti yjejni ma miich ajcxy oga'n ti mmibicy. Hue' miich ixypy ajcxy mniyaj'ixpijnip Jesucristo ytiy'ajt je tzipjatypi. Per miich ajcxy mdzojcyñi co myajnajtzcapxihuipy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jēyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anāctijc huidibi caagy caayb. ¹³ Pinjaty yajpatp ma jada ixpijn huidibi ca' chipity, jadu'n yí' nej ma'xungdiḡc com ca' jajtciy je ayuc tiy'ajt tiybi. ¹⁴ Je' tzipjatpyi tiy'ajt je je' winjihuīyigixp, je' huidibi ymibijkin mij may mid'ajtkixpin, jadu'n nej je' huidibi y'aa ytiitz jim ajkixyin je' titzpi jich kaagy je' ykaaygixpy, je' ko yjajtkixpy je' nej winjiwīyigixichin je' huidibi oy, etz je' huidibi ka'oyin.

6

¹ Paady tzoc nigi yajyujcpejtim n'ixpijcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'n yca'pxtaayni. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcin Cristo. Ca' janam jatzojc n'ixpijco'cim huidibi oga'n ti n'ixpijcin jadu'n nej co njothuimbijtim nej anajty ndunim jibicpi huidibi xyajnicxim ma yi o'cin, e jadu'n nej nmibijcin Dios oga'n. ² Ca' jadüg'oc n'ixpijco'cim je ixpijcin miid je niibejtin ycixpi, etz jadu'n nej yajcinixajy je mibijcpidijc jaydebi paadip ajcxy je Dios yjihui'n ymic'ajt, etz jadu'n nej yi öcpi ajcxy yjugypigipy co anajty ti öccixy, etz jadu'n nej Dios tzaachytuna'n huinixi pocyjäydijc. ³ Chi njac'ixpijcin Dios y'ayuc je tzipjatypi, pen Dios jadu'n tzojcpy.

⁴ Com pinjaty ti huinjihuïy Dios y'ayuc ytiy'ajt, e jäygidägy huidibi Dios yejcpy, etz miidity Dios yjihui'n ma y'ay yjot, jadu'n je' nipaady nejjihuïy chinay ma jin ytiicxin. ⁵ Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'n ymic'ajt huidibi yajtzinaayip ajcxy y'alma ma je xii je tiempo huidibi miimb cidacp. ⁶ Yi jadu'mbi jäy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jebi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypiy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax nii'uuctich naag'oc naag'oc ytu'y. E pen je naax yejcpy ooy cosecha ma pin ti ñipy ti ytuñ, Dios je' anajty yconuucxin ymiid. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuip ma je mij jin. (Jada naax jadu'n jada' nipaady jadu'n nej jäy huidibi ti ixmach ymibijcin.)

Yi huidibi nmibijcin yi' xyhuijtz'ijtim tudägy

⁹ Migügtijc ajcxy huidibi ooy ndzocyich, oy ich ajcxy jadu'n njamüdmüydägyich miich ajcxy, janch nejhuïybich co ca' ajcxy ti m'ixmach yi mibijcin, etz nejhuïybich co oybi conuucxin mbaadaangixyp ma Dios etz m'alma ajcxy nidzoocin paadaangixy. ¹⁰ Com Dios ooy yi' ytudägyity, e ca' yi' jäydgoy huidibi miich ajcxy mdumyb miid yi' ycixpi, jadu'n nej ojjäy'ajtin ti mdungixy miid jacjadyii mibijcpidijc, e chambaad jadu'n mdungixy. ¹¹ Hue' ich ajcxy ndzocyich co miich ajcxy nidüg nidüg mnixondaaccix tungix ojjäy'ajtin ixti mabaad m'öccixy, jigix mbaadipy ajcxy tüg'öciy huidibi ajcxy mjijp'ijxyp ma Dios. ¹² Ca' ich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydebi mbaatcixy tiibi Dios xyaj'ahuanïygixy.

¹³ Co jecy'ajty Dios moy Abraham je' y'ayuc, ci'm je' nigapxpejty y'ayuc, com ca'anajty ji jac mijpi pin nigapxpedipy je' y'ayuc. ¹⁴ Chi Dios Abraham nimay: "Janch co ich miich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuijxy miid mecxtujcin, e jadu'n ycidigüiyi huidibi anajty Dios ti yaj'ahuanïy. ¹⁶ Co ajcxy jäy ycapxcixy co yjanchity, jim je' pin ñigapxpejtp je y'ayuc, je pin jacmijip, je' nigapxpejtpy jada ayuc. E co nigapxpety je' y'ayuc, chi je ayuc y'ity, e ca' huaad pinjaty ymina'n co ca' yjanchity. ¹⁷ Paady ycixpi Dios nigapxpejty yci'm'ayuc, miid co anajty yajnejhuïhua'n je jäy ajcxy co cuyduna'n y'ayuc tiibi ahuanïy. ¹⁸ Ji yajpaady mejtznax Dios y'ayuc huidibi ca' huaad capxtigach, e Dios ca' y'anüdgägy nimina. E co Dios jadu'n tuñ, chi xyajjotcugüiyim mij, ich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jijp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E miid co njijp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcuje ijtim ca' ma tzig'iñ jihui'n. Jadu'n Dios y'ayuc nipaady miid ich ajt ycixpi nej tüg pujx huidibi je barco huon'ijtp mejyoty, ca'ydi nej yjaty je barco. Ich ajt njijp'ijxim co ndigihuaanim ma Dios y'it tzajpjoty, tim

jadu'n nej je judío sacerdote mĭjtungmĭdipi ytigĭy anajty jecy'ajty ma Dios y'it ma je Dios ytĭjc, je it huidibi anajty adiyduciy mĭd huit. ²⁰ Tigĭhuaanim ĭch ajt ma je Dios y'it tzajpjoty ma Jesús ytigĭy mĭd ĭch ajt ycĭxpi, Jesús ti yaj'ahuäch nej jĕbi ndigĭyim ma Dios y'it. E jadu'n Jesús naydügpaĭc huingapxy etz codināy mayjäy ma Dios yhuinduu huinixi huinitempo. Jesús ytung tim jadu'n nipaady nej Melquisedec ytuñ jecy'ajty.

7

Yĭ Jesús tim jadu'n ymĭjity nej Melquisedec

¹ Je Melquisedec hue' je' anajty rey'ajtp ma je cajp huidi yxi Salem, e je' anajty huingapxp ma je mĭpi janchypi Dios tzajpjotypi. Co anajty Abraham yhuimbity co anajty oy ti chiptuñ, ma anajty je reydiĭc oy ti yajqueec-huäcxtäy ti mĭmadactäy, chi Melquisedec choon oy jĭpcoyöyĭ Abraham, e chi ooy Dios mĭjuydacy minucxtacy mĭd Abraham ycĭxpi. ² Huidibi anajty Abraham ti paady ma anajty oy ti chiptuñ, chi je' piĭc-huäcxy majcpicy, chi pugoon tüg-picy mooy je Melquisedec. Melquisedec yxi hue' yhuimbĭdizimy “rey tudägypi”. E com co anajty yrey'aty ĭm Salem, hue' Salem yhuimbĭdizimy “jotcuĭc'ajtĭn”, paady jĕbi nmĭnaanĭm jadu'n, “je rey huidibi jotcuĭc'ajtĭn yejcp”. ³ Je Melquisedec ca'p anajty yajnejhuĭy ytaj yteedy, ni y'ap yteedy. Ni ycaya-jnimĭydägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixi huinitempo.

⁴ Occuenditungixy miĭch ajcxy nej je Melquisedec anajty ooy ymĭjity. Je Abraham, ĭch ajt nmĭj'ap nmĭjteedy ci'm mooy Melquisedec je tüg piĭcypi huidibi anajty ti piĭci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytĭjc je pinjaty Leví y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc mĭd co jäy ajcxy yajcuend'adipy tügpicy je majc-piĭcypi huidibi xi diezmo. Oy je' anajty ajcxy ja'ajugy'adyi ja'amigüg'adyi, com hue' anajty ajcxy Abraham y'ap y'oc nidüg'óciy. ⁶ Per Melquisedec oy je' anajty ca' Leví ap'adyi teedy'adyi, yajcuejt je Abraham tügpicy je majc-piĭcypi. Je' je' anajty huidibi cĭdigĭyi tiibi anajty Dios yaj'ahuanĭy. Jadu'n Melquisedec yajpuhuanĭy Dios je Abraham. ⁷ Ni pin ycamina'nĭp co ca' yjanchity co je pin conuucxin yejcp, jac mĭj je', ca'ydi je pin yajconuucxp. ⁸ Ya ma ĭch ajt, pin cĭdigĭyip tügpicy je majcpĭcypi (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymĭna'ñ ma yjaybetyity co je' yjactzinaayñi. ⁹ E jĕbi yajmĭna'ñ co je Leví etz jadu'n yĭbaad je y'ap y'oc huidibi ajcxy huingapxp ma Dios, e yajcuejtcixy Israel jäy huidibi Dios patĭp, nañ jadu'n nipaady nej jihuĭy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuĭy Abraham ñgix'ajtyñi y'ap'ajtĭn yteedy'ajtĭn Leví etz jacjadyi je huidibi anajty ajcxy ca'ni ypi'c'atyñi yma'xung'atyñi co oy Melquisedec yjĭpcobadĭy.

¹¹ Je Israel cajp yajcĭdigĭyi je' je Dios y'ane'mĭn ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquĕxĭgy jadüg huidibi codināhuip je mayjäy ma Dios, ca' y'ocje'jiñ ma ymĭiñ Aarón y'ap y'oc. Je jadügpi huidibi codināhuamyb je mayjäy ma Dios, hue' copicy co tú'ciy naybadĭyb mĭd Melquisedec. ¹² Co ytĭgadzipy pinjaty huingapxp ma Dios, nañ jadu'n ytĭgadzip je tiy'ajt je cötujcin. ¹³ ĭch ajt nHuindzin Jesucristo, je huidibi ñimĭydacpy ma Dios ñecy co huingapxa'ñ je mayjäy ma Dios, huingbi ap huingbi Teedy je' anajty, ca' y'ocLevíjin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuĭy co ĭch ajt je nHuindzin Jesús hue' je' anajty ymĭj'ap'ajty ymĭjteedy'ajty je Judá. Moisés ca' yi' capxpaty Judá y'ap y'oc co nimĭydacy pinjaty anajty huingapxp je mayjäy ma Dios ytĭjc.

¹⁵ Jacniguëxícip jada ooy co jadüg ytigüy huidibi tumb ma Dios, huidibi tú'ciy naybaatip miid Melquisedec. ¹⁶ Ca'p Jesucristo yajtungbijci co huingapxip je mayjäy ma Dios miid je cötujcin huidibi minaamb co yi' y'amigügtijc pátip yi jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxip je mayjäy ma Dios. ¹⁷ Com miid je' ycixpi jadu'n Dios tiy'ajt yejcy co jadu'n ymina'ñ: Miich je' cham mhuingapxyp je mayjäy ma ñch. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huidibi Moisés yejc, ca' y'octuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés jayhui'm jecy'ajty, ca'p je' ni ti yaj'oybidzimy yajhuätzpidzimy. Miid je huingapxpi ycixpi huidibi nmüid'ajtim cham jac'oy yi' huidibi nijjp'ijxim ma Dios.

²⁰ Co Dios Jesucristo yajtungbicy, chi nïgapxpejty yci'm ayuc co yjanchity. ²¹ Jacjadyii ajcxy huidibi anajty tungixp ma Dios ytijc, hue' je' ajcxy tungmooyi, e ca' Dios nïgapxpejty yi' ajcxy y'ayuc. Per co Jesucristo ytungbijcy, chi Dios nïgapxpejty yci'm'ayuc. Com jaybety jadu'n ma Dios ñecy ma jadu'n ymina'ñ:

Je Huindzin Dios ti nïgapxpejty yci'm'ayuc, e ni mina ycajotmetzcïhuipy.

Jadu'n Dios nimay y'ung:

Miich mhuingapxamyb etz mgodinähuamyb je mayjäy ma ñch huinixii huinítiempo.

Jadu'n miich mdunipy nej Melquisedec ytuuñ.

²² Com Dios nïgapxpejty yci'm'ayuc co yjanchity co Jesucristo ytungbijcy, paady yi Jesús yi' je' majamoy mic'ajtmoy je jemybi ayuc huidibi yajhui'm miid jäy ajcxy ycixpi, je jac'oybi cötujcin. ²³ Jacjadyii huidibi anajty yhuingapxcixy ma Dios ytijc, nimay anajty ajcxy ooy. Com co tüg y'o'cy, chi huingbi ytigüy ma je' ytung. ²⁴ Jesús com ca' yi' yjugy'ajtin ycixipy ytigoyipy ni mina, paady ca' ytung ixmach, etz ca' yi'ytungmöy ni pin. ²⁵ Miid je' ycixpi Jesucristo mic'ajt miidity jaydëbi yajnidzoocipy jäy ajcxy y'alma huinixii huinítiempo, pinjaty mibijctzooyb Dios ma Jesucristo yxi. Jesucristo jëbi tunipy jadu'n, com yi' yjugy'ajtin ca' ycixipy ytigoyipy ni mina. E yi' Dios mibijctzodiib miid jäy ajcxy ycixpi jabom jabom huinixii huinítiempo.

²⁶ Je Jesús je' je' tügpajc je mïjtungmüidpi ma Dios, huidibi ñch ajt nyajmayajtim, je huidibi miid huädz yjot huädz yhuinma'ñ, e ca' je' miidity ni ti jibicpi ni ti pocy. Je' ca' tügnax y'ity miid pocytumbidijc. Nigi je' ymijity ycixity, ca'ydi jac ti huidibi yajpat tzajpjoty. ²⁷ Ca' Jesús yjadu'nity nej ajcxy jacjadyii huidibi tuun ma Dios ytijc jecy'ajty, co yaj'öccixy iyujc, e je' ajcxy yejcpy huindzig'iñ jabom jabom, midüg co je' ajcxy ñayyajpocyñihuächyii, e chi jada' miid jäy ajcxy ypocy ycixpi. Jesús tügtecpajc je' yejc huindzig'iñ miid mayjäy ycixpi, co je' ci'm ñayyejci ma yi o'cin jadu'n nej tüg huindzig'iñ.

²⁸ Je Dios ycötujcin huidibi Moisés yjayhui'm jecy'ajty, hue' y'ane'my co huen tungmöy jäy ajcxy huidibi pocy miid, co mïjtungmoy ma Dios ytijc. Chi jac'axam Dios yajhui'my jemybi ayuc jemybi cötujcin, e nïgapxpejty yci'm'ayuc co yjanchity. E miid je jemybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huidibi ijtp huinixii ca' ti bocy miidity.

8

Jesús yi' je' je' mijhuingapxpi ma yi Dios y'ayuc jemybi

¹ Huidibi ooy nigi ycopicity, huidibi yajnimiydaacp, co ñch ajt nmüid'ajtim pin xy-codinaayim ma Dios, je' je' je' Cristo, je huidibi jiiby ijtp mij'ane'mbi tzajpjoty, jadu'n nipaady nej jihuüy yi' y'ñäy a'oy'amy ma Dios ymijc. ² Jiiby je' ytuñ ma je janchypi Dios y'it ylugar, je amaaybi, huidibi oyhuindzigüy ijtp. Je it huidibi Dios yajcoj, e ca' nmınaanım jäy ajcxy yajcoj. ³ Tüg'óciy pinjaty huingapxp ma Dios, yajnibicy je' paady, e copicity co cïyegipy ofrenda etz tijaty huindzig'iñ ma Dios miid jäy ajcxy ypocy

ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios miid jäy ajcxy ypocy ycixpi. ⁴ Co Jesucristo ixypy ya y'ocajpaady naaxhuiñ, ni ycahuingapxy ixypy mayjäy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcin y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tüg iixpejt nej Dios y'it jiiiby tzajpjoty, jadu'n yi' nipaady nej tüg anecpi huiidibi tzomyb jiiiby tzajpjoty. Co Moisés jecy'ajty Dios ytijc je' coji miid huit, chi Dios ñimaayi: “Cuenditun yajxon co anajty mgojy je tijc tügnax jadu'n nej je iixpejt huiidibi nyaj'ijx jim copcíxy.” ⁶ Per je mijtung huiidibi Jesús ytumyb ma Dios miid jäy ajcxy ycixpi, jac'oydung yi' ca'ydí je tung huiidibi je jäy ajcxy ytumyb huiidibi mijtung miid ma Dios ytijc ya naaxhuiñ. Com jemybi etz jac'oy etz jacmic'ajt miid je cötujcin huiidibi Dios ymoy Jesús, ca'ydí je cötujcin huiidibi Dios ymoy Moisés jecy'ajt. Com hue' je' jac'oy alma nidzoocin Dios yaj'ahuanñy jäy ajcxy ma je jemybi cötujcin.

⁷ Co je jayijp'atypi cötujcin huiidibi Moisés ymooyi cayaj'oyidaayi jäy ajcxy ypocy miid Dios, ca' yi' ixypy ycopicyity je mimetzpi cötujcin huiidibi Dios ymoy jäy huinjemy. ⁸ Per Dios y'ijx co je jäy ajcxy ca' yajxon cuydungixy je cötujcin huiidibi Moisés ymoy, jadu'n nej ymina'ñ ma yjaybetyity ma Dios ñecy miid je' ajcxy ycixpi, ma jadu'n ymina'ñ: Jadu'n je Huindzin Dios ymina'ñ: “Mimb xii tiempo ma huingbi cötujcin nmöhuibich yi' Israel jäy etz Judá jäy ajcxy.

⁹ Ca' y'ocjadu'niñ nej ich ngötujcin huiidibi nmooyich je' ajcxy y'ap yteedy jecy'ajty, je huin'it tiempo taabi nyajtzooñich ajcxy jim Egipto naaxjot. Ca'p je' ajcxy cuyduñ je cötujcin huiidibi ajcxy nmooyich, e paady ca' nduunñich cuendi yi' ajcxy.” Jadu'n ymina'ñ je Huindzin Dios.

¹⁰ Jadu'n je Huindzin Dios ymina'ñ:

Je cötujcin huiidibi nyegaamybich ma Israel jäy ajcxy co anajty yijadu'mbi xii tiempo ti ñaxy, jadu'n je'. Nbidägibich ngötujcin ma yi' ajcxy yhuinma'ñ, e jadu'n nipaady nej jihuñy ti njayich n'ayuc ma ajcxy y'ay yjot. E ich yi' ajcxy xyDios'adib, e yi' ajcxy njäy'adiybich.

¹¹ Tüg'óciy ajcxy nejhuñhuipy pin ich. Ni pin ji cayaj'ixpigipy pin je' je Huindzin Dios, ni pin, ni ymígü, ni ymijün ymidijc, ni pi'ctijc ni mij'anäctijc. Com nidüg'óciy ajcxy nejhuñhuipy pin ich; ypi'city ymutzity, ymijjäyity, etz ymij'anäcity.

¹² E ich yi' ajcxy nmeecxip yjibicjäy'ajtin, ni camina ngajac'ajihuñhuibich ajcxy ypocy. Jadu'n Dios ymina'ñ.

¹³ Co Dios je' ycötujcin jemybi nimiydägy, je' je' co yaj'amijñyñi je jayijp'atypi cötujcin. Je huiidibi amijñyñip ca' je' y'octuunip, tzojc yi' yaj'ijxtigoyaani.

9

Je Dios ytijc huiidibi ya naaxhuiñ etz Dios y'it huiidibi tzajpjoty

¹ Je Dios ycötujcin jayijp'atypi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jäy ajcxy huindzigiñhuipy Dios. ² Je Dios ytijc jadu'n je' ycojity. Je jayijpi cuarto hue' anajty xijity Lugar Santo, jiiiby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jiiiby jadüg'it huiidibi xijip Lugar Santísimo (ma Dios ni'ixcidägy je jäy). ⁴ Jiiiby anajty tüg mij mesa ac tim ori je' anajty ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinñx huidityi. Jiiiby cajoonjoty anajty y'ity tüg tu'tz ac ori huiidibi anajty miid je jicxy iixpejt huiidibi Dios Israel jäy ajcxy ymooy jecy'ajty. Etz jiiiby anajty Aarón ytajc huiidibi huijp huam. Etz jiiiby anajty je tzaa y'ity ma je' anajty ycijxjayity Dios y'ane'min. ⁵ Ma je cajoonñicx jim anajty je querubines ñgojtüdyity huiidibi Dios y'oy'ajtin miid. Je querubines anajty codinaayb Dios, e je' anajty ajcxy yajnidiigooyb miid yqueec

je cajonnícx ma ajcxy je huindzigi'ñ ñi'py ypidacy mïd jäy ajcxy ypocy ycixpi. Ca' huaad yjacyajnimïydacy mijcajee jadachambi tijaty huidibi anajty yajpatp jiiby ma Dios ytiyc.

⁶ Jabom jabom co anajty jadu'n y'ijttäy ni'ixi', chi je huingapxpi ytigïygixy ma Dios ytiyc ma je jayijpi cuarto, je Lugar Santo, tuñ ajcxy huindzigi'ñ etz cuydungixy y'i' ajcxy ytiy'ajt mïd Dios ycixpi. ⁷ Jimijt jimijt ma je mimetzpi cuarto huidibi je huit adiydujcp, jiiby ytigïy tügtecypajc je huingapxpi huidibi jacmïjtungmïd ma Dios ytiyc. E co jiiby ytigïy, chi midigïy huaj ñi'py, huidibi mïd huindzigi'ñ Dios mïd yci'mbocy ycixpi etz mïd tüg'óciy jäy ajcxy ypocy ycixpi etz mïd ajcxy ypocy ycixpi co ca' nejhuïygixy co ytundigooygixy. ⁸ Mïd jada ycixpi je Espíritu Santo xyajnejhuïyim co je tungmïdipi huidibi huingapxi je mayjäy ma Dios, ma ajcxy jacyajtungixy anajty je jayijp cuarto ma Dios ytiyc, chi ca'ni je' anajty y'ahuächñi nej jëbi pinjaty ytigïy ma je it lugar Santísimo ma Dios yhuinduu. ⁹ Je Dios ytiyc huidibi ijtp anajty ya naaxhuiñ ca' je' yjëtty je janchypi. Hue' je' anajty iixpejt'ajtp huidi Dios y'it'ajtpy tzajpjoty. Jiiby je tungmïdipi huindzigi'ñ Dios mïd ofrendas etz mïd huindzigi'ñ. Per jada huindzigi'ñ ca' yajtigoy je pocytunï ma je jäy ajcxy yjot yhuinma'ñ. ¹⁰ Je judíojäy ytiy'ajt huidibi tuun ma Dios ytiyc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñihuáatzigixy mïd nï etz canaag costumbre huidibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy y'i' ycötujcin.

¹¹ Per ti y'oy ya naaxhuiñ je Cristo, e y'i' je' cham ijtp jacmïjtungmïdipi ma Dios, y'i' ti mimiñ jemybi cötujcin jac'oybi. E y'i' je' codinaayb je mayjäy ma Dios y'it'ajtpjoty, je it jac'oybi jacmïpi, jacca'pxypi, ca' nminaanim jäy ti cojy, e ca' yaajity naaxhuiñ.

¹² Cristo ti ytigïy ma je Dios y'it, je lugar Santísimo. Ca' ti ytigïy mïd co jiiby yajquëxiga'ñ pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytigïy tügtecy tigïy huinixii huinitiendo, etz xyajnidzoocim ajt n'alma huinixii. ¹³ Ooy yjanchity co y'i' toro ñi'py etz je chivo ñi'py etz y'i' cuyjam co ajcxy nöccixy huaj nïx ma je Dios ojadajtac, co ajcxy je pocyjäy yajnihuäxcixy je ni'py etz yajnixidujtcixy je cuyjam ymïd mic'ajt co yajpocyhuáatzigixy ñinícx, per jotjoty ca' yajhuäch. ¹⁴ (Je huingapxpi huidibi tumb ma Dios ytiyc ya naaxhuiñ ca' ymadägy co jäy yajpocyhuäzipy mïd toro ñi'py), Jesucristo nïgi ti ymadägy yajpocyhuäch jäy ajcxy mïd yci'mni'py. Com Jesucristo ymïd je Dios yjihuiñ ymic'ajt huidibi ca' ycixipy ytigoyipy ni mina, chi ñaygiyejci ci'm ma Dios mïd Dios yjihuiñ ymic'ajt, jadu'n nej tüg huindzigi'ñ huätzpi, com ca' ni ma ni ti tundigoy. E mïd yci'mni'py Jesucristo xyajhuaatzim je jibicpi ma ajt njot nhuinma'ñ, ca'ydi ndunim huidibi Dios ca' jäygidägy, e jadu'n ajt huaad ndunim ma je Dios juugypï ytung.

¹⁵ Paady y'i' Jesucristo y'i' je' huingapx'ajtp ma Dios mïd ñch ajt ycixpi mïd je jemybi ycötujcin huidibi Dios yajhui'm. Y'i' Jesucristo co y'o'cy, y'i' ajt je' nbocy xymeecxim tïbi ndundigooyim ma je jayijp'atyp cötujcin huidibi Moisés jayhui'm. E jigix pinjaty Dios ti yhuin'ixyii, jëbi ajcxy ycidigïyii je tzinaydac ma jëbi n'ijtim huinixii. Je tzinaydac huidibi Dios ti xy'ahuanïyim. ¹⁶ Co tüg jäy jïp'ixy y'o'cin, e yajcojy tüg testamento, ooy ycopicyity co yajnejhuïhuipy pen janch je' ti y'ögy je pin yajcoj je tiy'ajt jigix je' ytigïhuipy tumbi je tiy'ajt. ¹⁷ Co tüg jäy jïp'ixy y'o'cin e yajcojy tüg testamento, ca' je' ti mic'ajt mïdity je testamento pen jugy'ajtni pin je' anajty ti yajcojy. Huin'itni janchtiy co anajty ti y'ögy, huin'it je testamento mic'ajt mïdity. Je jemybi tiy'ajt huidibi Dios xyajhui'my jadu'n y'i' nipaady nej jäy testamento yajcojy co anajty jïp'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' mïd iyujc ñi'py. ¹⁹ Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzigy tüg lana tzaptzpi mïd tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity mïd nï, chi Moisés yajnihui'ch je libro mïd je ni'py, je libro huidibi anajty ti capxy etz nañ jadu'n jäy ajcxy yajnihui'ch je ni'py. ²⁰ Co Moisés jadu'n ytuuñ, chi yminañ: "Jada je' je' ni'py huidibi yajtzoobaatp je

ane'min je tiy'ajt huidibi Dios ti yecy ma miich ajcxy.” ²¹ Moisés nañ jadu'n ñi'pyñihui'ch je cochac tijc ma anajty yDios ojadajtcixy, e tüg'óciy tumbejt huidijaty jiiby tumb. ²² Dios ycötujcin, je jecyip, ymina'ñ co tüg'óciy huidijaty yajtungixyp co Dios ojadajtcixy, copicy yajhuädziipy müd ni'py. E pen ca' ajcxy teemy yocy ni'py, Dios ca' huinmecxa'ñ yi' ajcxy ypocy.

Co Cristo y'o'cy müd ajt nbocy ycixpi, yi' yajnicxy ajt nbocy

²³ Ooy jada anajty ycopicyity iyujc ñi'py huindzigi'ñ, jigix yhuädzip huidijaty tumb ma Dios ytijc ya naaxhuiñ, je huidibi iixpejt'ajtp anajty nej Dios y'it jiiby tzajpjoty. Per je Dios y'it huidibi jiiby tzajpjoty chojcpy jac'oybi huindzigi'ñ ca'ydi huidi ya naaxhuiñ. ²⁴ Com Cristo ca' je' ytigiy ma Dios ytijc huidibi jäy ajcxy ti cojy. Je tijc huidibi jäy ajcxy ti cojy, je' je' ñigojtuutin je it lugar janch janchypi huidi jiiby tzajpjoty. Cristo tigiy ma je Dios y'it ylugar jiiby tzajpjoty, ma je' cham xycodinaayim ma Dios yhuinduu. ²⁵ Je judío migtungmüdpí huidibi huingapxp ma Dios ytijc, huinjimigtity ytigiy ma je Dios ytijc co yecy ni'py huidibi ca' ci'mni'py'adyii. Cristo ca' yi' ñay'ahuaníyii y'ögipy canaag'oc, jëyi tügtecypajc ytigiy ma Dios y'it müd yci'mni'py. ²⁶ Co ixypy ca' yjadu'nity, canaag'oc Cristo ixypy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecypajc ñayguëxici ya naaxhuiñ, jigix codinähuiipy tüg'óciy jäy ma Dios müd ajcxy ypocy ycixpi. Jadu'n Cristo tuuñ jigix yajtigoyipy pocytuni. ²⁷ Dios ane'min pidac ya naaxhuiñ co nidüg nidüg jäy paadip yi' o'cin tügtecypajc. E Dios ti pidägy je xii je tiempo mina tiyduna'ñ nidüg nidüg jäy müd ypocy ycixpi. ²⁸ Je Cristo jotcuyc tügtecypajc nayyejci ma je o'cin co yajpocyñihuaatzäy je mayjäy. Chi jada' ñayguëxiga'ñyii je mimejtz'ocpi ya naaxhuiñ, e ca' nminaanim co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'óciy pinjaty jipp'ijxip cixyjot huinijot co je' miina'ñ müd yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjëjity je oybi. Paady je cötujcin huidibi Moisés yjayhui'm ca' je' jëbi huädz yaj'ahuimbity pinjaty pocy ytumb, pinjaty mijhuäcp anajty ma Dios müd je iyujc huidibi ajcxy Dios yajhuindzigi'yb, huidibi ytun'ahuimbijtcixyp jimijt jimijt. ² Co ixypy je cötujcin y'ocmadägy huidibi Moisés yjayhui'm yaj'ahuimbity ixypy huädz ajcxy je pocy ytumbi, ca' ixypy je jadu'mbi huindzigi'ñ y'ocyajtuuni jimijt jimijt. Com pin je jadu'mbi huindzigi'ñ yejcp, co ixypy je' ypocy yajnicxtäy, ca'p je' ma ñayjihuihuiyb ti bocy müdity jadüg'oc. ³ Co jadu'n yaj'öccixy je iyujc müd ypocy ycixpi, je' je' je' tiy'ajt co ajihuiygóotigixy ypocy jimijt jimijt. ⁴ Com yi' huaj mang ñi'py etz yi' chivo ñi'py ca' mic'ajt müdity co pocyajnicxtähuiipy nimina.

⁵ Paady co Cristo ymiñ ya naaxhuiñ, chi nimay je Dios:

Ca' miich ni ti huindzigi'ñ mdzojcní ma ymiñ iyujc ögy, ti miich xyñi'ixiiyich tüg ninïcx.

⁶ Ca' m'ocjäygidacni huindzigi'ñ iyujc huidibi yajno'cp. Ca' miich m'ocjäygidacni co jäy xyajhuindzigi'y iyujc müd ypocy ycixpi.

⁷ Chi nmína'ñich: “Dios, cha nmiiñich jigix miich mdzojcin yajcuydunipy, jadu'n nej yjaybetyity ma miich mnecy müd ich ycixpi.”

⁸ Tim jayjip, Cristo ymina'ñ co Dios ca' octzojcní, ni cajäygidägy je iyujc ögy huidibi yajhuindzigi'yip, ni je huidibi yajno'cp, jigix je pocyñicxtähuiipy, oy yi' yjajëjity huidibi ñigapxy yajtunipy ma je Dios ycötujcin huidibi Moisés yjayhui'm. ⁹ Chi jada' jadüg'it yjaybetyity co Cristo jadu'n ymina'ñ: “Cha ich nmiiñ, jigix miich mdzojcin yajcuydunipy, miich huidibi Dios'ajtp.” Hue' minaanim, yajtigoy je cötujcin huididi ane'mb co jäy ajcxy huindzigi'y iyujc müd ypocy ycixpi, etz mic'ajt mo' je jemybi cötujcin huidibi Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinïcx tügtecypajc yejcy ma yi' o'cin müd tüg'óciy jäy ypocy ycixpi.

¹¹ Tüg'óciy judío sacerdote huidibi tungmüd ma Dios ytiyc jabom jabom jadu'n tun'ahuimbijtcixy tügpí huindzigi'ñ, huidibi ni camina yajnicxtaayi jäy ajcxy ypocy. ¹² Yi Jesucristo tügtecpajc yi' yejcy ñinícx ma yi o'cin huinixii huinitiempo, chi jada' y'ixtacy a'oy'amy ma Dios ymijc ma ane'mdäy tüg'óciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mímadaactaayip, e jadu'n ajcxy nipaadipy nej jihuüy Jesucristo ytecypocxpejt. ¹⁴ Müd tügpajc je huindzigi'ñ huidibi Jesucristo yejc, tudägy yaj'ahuimbijttäy huinixii huinitiempo pinjaty ti ypocyhuäch. ¹⁵ Yi Espíritu Santo nidiy'ajtp ma ich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymina'ñ:

¹⁶ Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägbich ngötujcin ma ajcxy yjot, e njayamybich ngötujcin ma ajcxy yhuinma'ñ.

¹⁷ Chi jac'axam Dios ymina'ñ:

Ni camina njäy medzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ müd pocyhuinmeecxin ycixpi.

Chojcypy nmihuingoonim yi Dios

¹⁹ Paady miich ajcxy migügtijc, jëbi ich ajt ndigiïyim agujc jotcuyc ma Dios yajpaady müd co Jesucristo ti temy ti yocy ñi'py müd ich ajt nbocy ycixpi. ²⁰ Cristo ti yaj'ahuäch je ñi'aa je tü'aa müd ich ajt ycixpi müd yci'm ninícx, je ñi'aa tü'aa jemybi oybi huidibi tigüyb ma Dios y'it. E je' yñinícx jadu'n nipaady nej je huit huidibi anajty adujcp je Lugar Santísimo ma Dios ytiyc ya naaxhuiñ, je huit huidibi cüchhuäcx co Cristo y'o'cy. ²¹ Jesucristo yi' je' je mïjtungmüdpí huidibi xycodinaayim ma Dios ytiyc jiiby tzajpjoty. ²² Paady ycixpi jëbi nmihuingoonim Dios müd oyjot oyhuinma'ñ, etz müd je mibijcin janchypi. Cristo ajt ti xyajhuaatzim njot nhuinma'ñ co ñi'py temy yojcy müd ajt nbocy ycixpi jigix ca'ydi nayjihuiïyim pocymüd, jadu'n nej jihuüy ti ndziihuim müd huädz ñi. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniïyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcin nayjihuiïyim miñ xyipy, e nduunim oyjäy'ajtin. ²⁵ Ca' n'ixmajtzim je nayyöymugii, jadu'n nej ajcxy nijëjity costumbre müdity co ca' ajcxy yöy ma naymujctac. Nigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen ich ajt jacyotunim tzojcingixy ma anajty ti nejhuïïyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacjip'ijxim müd tzig'iñ jihu'iñ je tzaachypi co anajty Dios xytidyunim, e xypidaacim mijjinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycotujcin huidibi Moisés yjayhui'm, e jim metz o tugüig testigo co yjadu'nity, yajmoy je' y'o'cin ca' müd'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocyñihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'oïyigixy Dios yEspíritu huidibi may'ajt oy'ajt tumb müd je' ajcxy. ³⁰ Nejhuïïyim co je Huindzin Dios ymina'ñ: “Ich xypatp ndzaachtunipyich jäy ajcxy müd ypocy ycixpi. Ich yi' nyajcomidohuipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios yi' yjäy tiydunipy.” ³¹ ¡Ooy chach mij y'ayo'nity pen je Dios juugypí xychaachtunim müd ajt nbocy ycixpi!

³² Per ajihuïyigixy miich ajcxy je xii je tiempo tiibi ñaxy, je taabi miich anajty ajcxy ti xycidigüygixy je tiy'ajt janchypi, ñipatyp je' anajty nej tüg tücxin jain ajcxy müdity. Ti ooy mhuindinaaygixy mijiptinaaygixy tzaachypi ayo'n müd yi mmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n

jacjadyii ti abaaticxy tzaachypí jadu'n nej je tiibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyí, e janch agujc jotcuyc ajcxy ti myajtungixy mecxtujcin co ajcxy xypíci tijaty anajty ajcxy miid. Nejhuíyím co jii by tzejpjoty miich ajcxy miidity ti jaty jac'oybi huidibi huinixi huinitempo iítp. ³⁵ Jacmijpidaaccixy Dios, ca' mjetmetzcíyigixy. Co mmijpidaaccixipy Dios, huin'it ajcxy mbaadipy oybi may'amy ma Dios. ³⁶ Chojcipy co miich ajcxy myajtúngixipy mecxtujcin co mguydunaangixy nej Dios tzocy, e Dios xyajcídígíyigixip huidibi yí' ti ahuaníy. ³⁷ Jaybety jadu'n ma Dios ñecy ma jadu'n yminañ:

Tzojc, janch tzojc ymiinañ je huidibi tzonamb tzejpjoty, e ca'p je' jecyñity.

³⁸ Jadu'n Dios yminañ:

Pinjaty iich ti ngöbicy co ytudägyjäyity, tzinähuip je' miid ymibijcin. E pen ixtigíhua'cp ma ymibijcin, ca' jadu'n njotcuyc'adipyich miid je'.

³⁹ Ca'p iich ajt njëjity huidibi ixtigíhua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidoocin.

11

Yi mibijcin

¹ Jotcuyc nayjihuiyím jadu'n co huidibi nmibijcin janch yí', oy co ca' n'ijxim. Je huidibi nmibijcin je' xymooyím jotcuyc'ajtin miid huidibi njijp'ijxim ma Dios. Je huidibi nmibijcin nejhuíyím co janch janch jadu'n, oy ca' n'ijxim. ² Com miid co ajt nmij'ap nmijteedy ajcxy mibijci Dios y'ayuc paady Dios cöbijcy ajcxy jadu'n nej tudägyjäy.

³ Miid ajt nmibijcin ycixpi nejhuíyím co Dios oyduñ tüg'óciy huidibi jii'ajtp miid y'ayucti'ajty, jigix huidibi cham n'ijxim je' yí' yaj'oyíy huidibi ca' yaj'ixy.

⁴ Miid co Abel mibijcy Dios, paady Abel ymoy Dios huindzigi'ñ jac'oybi ca'ydi Caín, e Dios cöbijci Abel yhuindzigi'ñ, e miid je' ycixpi Abel ooy ycömaybidzimy ma Dios co anajty ytudägyity. E jadu'n oy Abel ti yja'o'cini, jadu'n nipaady nej jihuíy yjacmíydgíyñi chambaad. Com miid je mibijcin huidibi anajty ymiid yejc iixpejt ma iich ajt.

⁵ Miid co Enoc mibijcy Dios paady yajnicxi jadügpí tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n yminañ ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayín." ⁶ Pen ca' nmíid'ajtim mibijcin ni jadu'ñiyi, ca' Dios jäygidägy ajt ndzinaayín. Com co nmihuingonaanim Dios, hue' tzocy co nmibijcin co Dios yjiijity, e co yaj'ahuimbidity oybi miid pin mibijcip.

⁷ Miid co Noé mibijcy Dios, paady Dios ñimaayi jayijp co ytuna'ñiyi yjada'ñiyi mijiñgom huidibi anajty ca'ni yaj'ixy. Co Dios ymígapxi, chi Noé yjotmaybaady e yaj'oyiy je barco ma yí' etz y'ung y'anäg ñígomdzögípy. Miid co anajty Noé miidity mibijcin, paady yajpocycäy je naaxhuiñyjäy ajcxy ca'pi ymibicy. Chi Dios cöbijcy Noé jadu'n nej tudägyjäy miid co mibijci Dios y'ayuc.

⁸ Miid co Abraham anajty Dios mibicy, paady Dios yhuin'ijxi e ycapxymídouhui. Chi je' choñ ma ñaax yajpin ñicxy ma je it lugar huidibi Dios anajty möhuaanip co je'adiyb. Choñ, ni ca' anajty nejhuíy ma ñicxy. ⁹ Miid co Abraham mibijcy Dios, paady chinaydacpijcy nej tüg huíngjäy ma je naax huidibi Dios yaj'ahuaníyí, huidibi ca' yjëjity. Chinay ma huittijc, nañ jadu'n ajcxy y'idíich Isaac etz Jacob huidibi ajcxy nañ jadu'n Dios yaj'ahuaníyí je naax. ¹⁰ Abraham je' anajty y'ahuijxyp mina jëbi chinaydacpijcy ma Dios y'it ylugar huidibi jadu'n nipatp nej tüg cajp huidibi miid y'ijx ta'tzpijcy y'oyduñity, je huidibi Dios ñihuinmayiy, je huidibi Dios yajcojy yaj'oyiyb.

¹¹ Sara hue' anajty pumäy, ti anajty ymíjäyíyñi, ti ñajxni tiempo mina jëbi y'ung'ixy. Per miid co mibijcy Dios y'ayuc huidibi ti ñimaayi co y'ung'ixa'ñ anajty, chi paty mijaa co y'ungdzimígip. E chi y'ung'ijxy com ymibijc co Dios anajty cuyduna'ñ tiibi ahuaníy.

¹² Miid tügpí jäy, je Abraham, ti choondacy tügpícy y'amígügtijc huidibi oy ti ymayíy.

Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacidigiyyi je tzinaydac huidibi anajty Dios ti yaj'ahuaníyii. Míid co ajcxy mibijcy Dios, paady nejhuíy ajcxy co jacjiini Dios ymöhuiyb je huidibi ti yaj'ahuaníyii. Com ymibijc ajcxy Dios, paady jotcuyc ñayjihuiyi co Dios möhua'ñyíi jacjiini huidibi ti yaj'ahuaníyii. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbídzimý co chinaydac yjugy'ajttac ajcxy y'ixtaayb. ¹⁵ Co ixypý ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy ñgi anajty nijot'ajtcixy it lugar jac'oybi, je' je' je' tzejpjotýpi. Míid jada ycixpi Dios ca' yí cho'yduñ co ñaydijyíi Dios ma je' ajcxy. Com ti ni'ixíyí ajcxy chinaydac jibý tzejpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigíhua'ñ Dios. E janch cixyot je y'ung tügpajc anajty yecy, je y'ung huidibi Dios ti yaj'ahuaníyii anajty. ¹⁸ Dios ñimay Abraham co míid Isaac míid'ada'ñ may y'ap y'oc. ¹⁹ Abraham yhuinmaayb anajty ooy co Dios tügpajc cötujcmíidip yajjugypigipy öcpi. Paady jébi íich ajt nmínaaním co Abraham ycidigiyyi jadüg'oc y'ung co anajty ti yjugypicy co anajty ti y'ögy.

²⁰ Isaac mibijcy Dios, paady Isaac Dios mibijctzoy míid Jacob etz Esau ycixpi co huen ajcxy oybi paadip ma je tiempo huidibi mim cidacni. ²¹ Jacob ymibijcy anajty Dios, paady co anajty y'ögaani, chi ahuaníy conuucxin ma nidüg nidüg José y'ung y'anäg. E jadu'n Dios ooy huindzigíy ojadajty yam ñaygodajc'adyíi míid ytajc co anajty ooy ti ymíjjäyíyí. ²² José co anajty Dios mibicy ma anajty y'ögaani, yminañ co Israel jäy ajcxy anajty ypidzimaangixy comjey co jim Egipto, chi yajhui'my tíy'ajt nej ypajc ytuníyb co anajty choñ ajcxy jim Egipto.

²³ Míid co anajty ajcxy mibicy Dios, paady co Moisés yma'xung'ajty, chi ytaj yteedy yützi tugíig po'. Com co ajcxy íjxy co anajty ooy y'oyity je ma'xung, ca' ajcxy anajty tzigíy je rey y'ane'mín co anajty yaj'öctähua'ñ tüg'óciy ungma'xung yéydijcpi. ²⁴ Míid co Moisés mibijcy Dios, paady co oy ymíj'anäcojni, ca' tzojcy co ñaydijíyb co rey ñíx y'ung'adiib. ²⁵ Hue' janchtiy Moisés ñgi nijot'ajty co ayo'n tzaachypí minaxipy yajnaxipy quipxy míid Dios yjäy, ca'ydi co nixondägipy je jugy'ajtin ma je rey ytíj huidibi Dios ca' jäygídägy. ²⁶ Moisés ñgi ñayjihuiyi jotcuyc co tzaachypí ayo'n anajty minaxy yajnaxy míid Cristo ycixpi, ca'ydi co míid'ajttähuiipy jugy'ajt comeeñ'ajt jim Egipto. Com Moisés ti anajty yhuinma'ñypidägy co Dios yega'ñ je oybi. ²⁷ Míid co Moisés mibicy anajty Dios paady choñ jim Egipto, ni catzigiy co anajty rey yjotmädy, jadu'n y'íjty tudägy nej jihuíy íxy je Dios ca'pi yaj'íxy.

²⁸ Míid co mibijcy Dios paady Moisés tuuñ je pascuaxí, chi ni'ane'mdíy co huen tíjc'aguu tüg tüg yajni'pyíy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Míid co ajcxy mibijcy Dios paady je israelitas ajcxy yajnaxxy je tzaptz mejy jadu'n nej jihuíy ñajxcixy huindíztzuuy, e co ajcxy je Egipto jäy nañ jadu'n yjanaxa'ñ, cíjx ajcxy ñí'öctäy.

³⁰ Míid co ajcxy mibijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtucj xí. ³¹ Míid co Rahab, je töxyjäy jibic tziinaaybi, mibijcy Dios, paady ca' y'o'cy quipxyí míid je huidibi anajty ca' capxymidoogixy Dios. Com co je' yajjättacy ma ytíjcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcíyöygixy yajtecyöygixy Canaán naaxjot.

³² ¿Ti njacmíydägíibich? Nyajtígo'y'idaamybích tiempo co nimíydägíibich Gedeón, Barac, Sansón, Jefe, David, Samuel, e jacjadyíi Dios y'ayucnajtzcaxíybi. ³³⁻³⁴ Míid co

ajcxy mibijcy Dios, paady ymimadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuaniiyigixy. Yaj'adujc ajcxy caa y'ahuac, yajxeem ajcxy jin huidi anajty ooy ymijity, tzooc ajcxy co anajty yaj'ogaangixy miid espada. Pinjaty anajty pumäyip ypaat je' ajcxy ymic'ajt ymijaa, mij je' ajcxy ooy y'ijtcixni ma chiptungixy, e ymimadactay ajcxy maymidzip. ³⁵ Jim anajty töxyjäy yjätigixy huidibi ajcxy cidigiiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzinaayim jac'oybi ma Dios. ³⁶ Jadyii Dios y'ayucnajtzcaxiiybi ooy ñixiici yajxiici, yajci'ajty, etz tzumy mach ypujxtijc'ñäy. ³⁷ Jadyii Dios y'ayucnajtzcaxiiybi y'o'cy ajcxy tzaagögäch, jadyii yaj'ajidiy ajcxy janch tim cup y'ijxmajtzi ajcxy, jadyii yaj'o'ci miid espada. Ymiñ xyijpy xii yaa yhuidiitcixy ymiid ajcxy ñinix yüch miid cöbixy'ac etz miid chivo'ac, ayoob jäy ajcxy, jotmay miid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxiiybi ajcxy ni je naaxhuiñyäj anajty camihuaadity. Miid ymidzip pahuidiitcixy, paady yhuidiitcixy anajty titznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanajxy miid co mibijcy ajcxy Dios, ca' ajcxy paty tiibi anajty Dios y'ahuaniiy. ⁴⁰ Com Dios jac'oybi je' anajty yegamyb miid ich ajt, paady ca' ajcxy paty je oybi tiibi Dios y'ahuaniiy. Ti anajty Dios nihuinmayiy co yajca'pxaani yi' ajcxy ytudägy'ajtin quipxyi miid ich ajt co Cristo y'o'cy miid ich ajt nbocy ycixpi.

12

Tzoc ich ajt nhuinma'ñybidacim ma Jesús

¹ Com nmüid'ajtim canaag ijxpejt nej jäy jecy'ajty mibijcy Dios, paady ich ajt jadu'n nipaady nej jihuüy huinduy jajixci'py nmüid'ajtim jäy huidibi ti yajniguëxigxy ymibijcin. Paady ycixp tzoc ahuing pidaacim je huidiatxy xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñydidgooyim, e tzoc naymic'ijxim cuydunim yi tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ² Tzoc nhuinma'ñybidacim ma Jesús. Jim ijxpejt nbaatim ma Jesús nej jëbi nmibijcin Dios. Jesús yi' je' ti xyajnejhuüiyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuüiyb anajty co jadu'n y'oc'ayoohipy, chi ypaadipy jotcuyc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'ijxpejt, nej pocyjäydijc chaachytuungixy etz ñi'ojiiygixy, etz ca' y'ixaani, paady ca' mdzijpcigixy ni mgamijotmetzciiygixy. ⁴ Ca'ni miich ajcxy ayo'n tzaachypí myajnaxy mabaad ni'py ajcxy mxibidyii jadu'n nej Cristo yajty. ⁵ ¿Nej ti miich ajcxy mjäydidgooygixy je capxhuijin huidibi Dios ti xymooygixy nej jihuüy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuüy ca' ytim ytiijity je tzaachypí huidibi Dios miid xycapxhuijy, ni ca' mjotmetzciihuipy co xyaj'ójipy.

⁶ Dios ycapxhuijpy yi' pinjaty chojcpy yjihuüyb. Dios chaachytumby yi' ajcxy co ytundigooy, pinjaty yi' ti cöbicy nej jihuüy yci'm'ung.

⁷ Mímadaaccix miich ajcxy je castigo, com Dios jadu'n yi' xymüidity ajcxy nej jihuüy yci'm'ung. ¿Nej ji jada' tüg ung, e ca' yteedy chaachytunüyb co ytundigooy? ⁸ Pen ca' miich ajcxy Dios ti tzaachypí xymooygixy, jadu'n nej yi' moy castigo tüg'óciy y'ungdijc y'anäctijc, ca' miich ixypiy ajcxy Dios xy'ung'adyii tiydudägy. Jadu'n miich ajcxy m'idipy nej tüg pi'c'anäg huidibi yteedy ca' y'ixa'ñyii. ⁹ Jadüg nax, taabi anajty ajt nbi'cnity, ich ajt ndeedy ya naaxhuiñ xy'ñhuijim xycapxhuijim anajty, e xychaachytuunim co ca' ngapxymidoohuim nhuindzigiiyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy

ytigoyipy nimina. ¹⁰ Hich ajt ndeedy ya naaxhuiñ xy'ñhuijim xycapxhuijim anajty mïd jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios ñch ajt xychaachytuunim mïd ajt n'oy'ajt ycixpi etz jigix nmïd'ajtm huädz jot huädz huinma'ñ nej Dios ymïdity huädz yjot huädz yhuinma'ñ. ¹¹ Oy yjanchity co ca' ti tzaachypï ndzojcm ma yam nbaatim je tzaachypï, com ooy ndzachjihuïyim je tzaachypï, e ca' jotcuyc nayjihuïyim. Per pinjaty ixpijcpï Dios chojcin mïd je tzaachypï ycixpi, chi je' yhuimbizimïygixy tüg jugy'ajtm tädägyi etz jotcuycpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma mmibijcin, jadu'n nipaadip nej jihuïy myajpidiccixy mgi' tiibi y'anucxiyñi, etz mgoxcohuajc mic'ajt paady huidibi anajty ca' mic'ajt mïdity. ¹³ Ixtaaygix nñ'aa tñ'aa tiybi ma mdzinaayin, jadu'n nipaadip nej jihuïy yi mdecy huidibi mädip ti chögy, e camina jadüg'oc yhuïdip.

¹⁴ Tzinaaygix mïd oyjot oyhuinma'ñ mïd nidüg'óciy jäy. Ca' mdúngixipy ti tzip. Mïd'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajippyöydüdiy je pubejtin huidibi Dios ti ahuanïy, jigix nañ jadu'n ni pin ycayajpaadipy janch mät yjot yhuinmañ, e ya-jhuindigoydäy yajmättäy jacjadyi ymügütiyc, tm jadu'n nej tüg ujtz ta'mbi ypa'mduñ. ¹⁶ Ni tüg miich ajcxy ca' huaad ti ayuc mïd'aty mïd huingbi töxyjäy huidibi ca' miich mdöxyijc'adyi. Ca' nañ jadu'n m'ixtijipy je ayuc huidibi Dios yajhui'my mïd miich ajcxy ycixpi, jadu'n nej y'idüch Esaú. Mïd tüg caayin uucin Esaú toocnax je huidibi anajty möhuanip yteedy co y'unggoobity. ¹⁷ Miich ajcxy mnejhuïyb co Esaú tocy huidi anajty paatip co japada'ñ je conuucxin huidibi anajty yteedy möhuanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'ñ nej yjothuimbizip mïd je' ycixpi tiibi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty yi israelitas ajcxy yjajty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuïdzucy yjidity etz mijpoj migtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxip. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigüygixy. ²⁰ Je' je' anajty ycixpi co anajty ca' mïmadägaangixy je ane'min cötujcin huidibi anajty minamb: "Pin anajty ytecy pidacp ma yi cop, hue' yi' y'oyaj'o'cnity cögäch mïd tzaa o mïd quipyijpxu'ñ, oy ixipy y'iyujcity." ²¹ Oy chigüyñi huidibi anajty yaj'ixxp, Moisés ci'm minaan: "Tziyuuybich yam mïd tziği'ñ."

²² Per miich ajcxy jadu'n nipaady nej jihuïy ti mmihuingoongixy yi cop huidibi yxi Sión etz je Dios juugypï ycajp. Je' je' je Jerusalén tzajpjotpy ma canaag mil je ángeles ajcxy yöymujccixy. ²³ Ti miich ajcxy mmihuingoongixy ma ti yöymujccixy je jaccömaaybi jäy huidibi ajcxy yxi cojaay ma Dios ñecy jilby tzajpjoty, je huidibi ajcxy huinñib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjäydijc y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huidibi xycodinaayim ma Dios mïd je jemybi cötujcin huidibi Dios yajhui'my mïd ñch ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy yojcy mïd ajt nbocy ycixpi. Yi Jesús co ci'm ñi'py teemy yojcy mïd jäy ajcxy ypocy ycixpi, ñigi oy yi' ca'ydi co Abel iyujc ñi'py teemy yojcy mïd ypocy ycixpi.

²⁵ Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctiy ñch ajt ca' ndzoocim, pen nmooyim ajt njix je Dios, je pin y'ayuc xyajmihui'mim huidi tzoön tzajpjoty.

²⁶ Co Dios y'ayuc yecy jecy'ajty, chi yajtziyuuy ooy naax. Jadachambi Dios ymina'n: "Jadügtecypajc nyajtziyuaya'nich je naax, e ca' nminaanim naaxti'ajty, nañ jadu'n nya-jtziyuaya'nich je tzejp." ²⁷ Co jadu'n Dios ymina'n: "Jadügtecypajc nyajtziyuaya'nich je naax." Hue' yajhuinjihuïy co ytigoydähuipy huidijaty yücxp huidibi Dios yaj'oyïy, e je' hui'mip je huidijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnajxim Dioscojuyip mïid Jesús y'ayuc ycixpi, e nyajmij'ajtim n'ojadajtim Dios mïid tudägy'ajt etz mïid huindzigi'n nej je' jäygidägyin. ²⁹ Ich ajt nDios jadu'n yi' nej tüg jïin huidibi nöctaayb tüg'óciy.

13

Nej jëbi nyajjäygidacim Dios

¹ Miich ajcxy huidibi mibijcp Jesucristo, ca' mjäydigooygixy co ajcxy mnaychójcigixipy miñ xyipy nej jihuïy ajcxy mdügquëxyity. ² Ca' ajcxy mjäydigooygixipy co oyjäy'ajtin mdüngixipy mïid pinjaty ajcxy xycojädïyb. Mïid co oyjäy'ajtin ajcxy tuuñ, chi nijëjity ajcxy yajjättacy ángeles ajcxy, ni ca' ajcxy huinjihuïy co ángeles anajty ti yajjättaaccixy.

³ Mjäymedzip ajcxy pinjaty tzumy'iñaayb mach'iñaayb jadu'n nej jihuïy miich ajcxy nañ jadu'n mdzumy'iñaaygixy mmach'iñaaygixy quipxy mïid je' ajcxy. Jäymedzip miich ajcxy pinjaty tzaachypï ayo'n minajxp yajnajxp, com nañ jadu'n miich ajcxy mïidity je ninïcx huidibi jëbi y'ayoy.

⁴ Huen nidüg'óciy jäy huindzigïygixy yajmij'ajtcixy je pijcin casada'ajtin. Huen je yëydijc etz je ytöxyijc naymïdtzinäayigixy yajxon, com Dios yi' tzaachytunipy pinjaty tundigooyb mïid huingbi töxyjäy.

⁵ Ca' m'adzojccixy meëñ. Mijotcuic'ajtcixy ti ajcxy ii mïid. Dios ti je' ymina'n: "Camina xï ich miich ajcxy n'ixmadzipy, ni ich miich ajcxy ngajäydgoyipy." ⁶ Jadu'n jëbi nminaanim agujc jotcuic: "Yi Huindzin Dios yi' xypubejtpich, ca' ndzigïhua'nich jäy nej xyjatuna'nich."

⁷ Jäymejtzcix miich ajcxy je pinjaty ti xyñigohuajc'ajtcixy, je pinjaty ti xyajmïdmïydaaccixy Dios y'ayuc ytiy'ajt. Huinmaaygix nej je' ajcxy anajty ytudägy'aty, padungix nej je' anajty ajcxy mïidity ymibijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixï huinitiempo, ca' yi' yajtigadzip yi yhuinma'n ni mina. ⁹ Ca' miich ajcxy myajhuin'ingixy mïid canaag ixpijcin huidibi ca' ytügnaxity mïid Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcin xyjihuiyim, nej yi' may'ajt tuñ mïid ich ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcuic'ajt ajcxy capaty pinjaty panïcxp yi jadu'mbi cötujcin.

¹⁰ Je judío tungmïdipi huidibi huindzigi'n tumb anajty ma Dios yhuittijc je jecyip, ca' yi' jëbi yjactuuni ma ich ajt nmibijcin jadu'n nej Jesucristo tuñ huindzigi'n mïid ich ajt ycixpi. ¹¹ Je judío mïjtungmïdipi ma Dios ytiyc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñinïcx jiguem je' yajnögy, ca' jiiibyity cajpjoty ma je Dios anajty huindzigïygixy. ¹² Tim jadu'n nej je judío sacerdote yajnögy je huindzigi'n iyujc ñinïcx cajp nïnaxy, nañ tim jadu'n Jesús paty tzaachy'o'cin cajp nïnaxy jigix mïid je' yci'mni'py pocyñihuaadzip je mayjäy. ¹³ Tzoc mïjpidaacim je Jesús tibi y'ögy cajp nïnaxy mïid ich ajt nbocy ycixpi. Tzoc minajxim yajnajxim je canayyajmij'adii je canay'ixa'nii, tim jadu'n nej Jesús minajx yajnajx je canayyajmij'adii je canay'ixa'nii.

¹⁴ Ya naaxhuiñ ca' ya ajt nmïidity tüg ciudad ma jëbi n'ijtim huinixï huinitiempo, je' ich ajt nijjp'ijxim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixï mïid Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii mibijctzoohuim, tzoc ojadajtim mïid ajt ngi'm'ahuac ngi'm'ayuc. ¹⁶ Ca' mjäydigooygixipy

co oybi mdúngixipy etz naybubéjtigix naybudigíyigix miñ xyipy. Co jadu'n mdúngixipy jadu'n nipaady nej tüg huindzigi'ñ ti myejccixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi' m'alma. Nejhuñyim co ciyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb müd yi' ajcxy, jotcuyc ajcxy ñayjihuihuñyb. Pen jibic miich ajcxy mduñ müd yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcuyc'ajt mmüid'adipy.

¹⁸ Mibijctzoogix Dios müd iich ycixpi etz je pinjaty xymüdhuidijtpich. Jatytim naymic'ijxibich tudägy nduunich ma tüg'óciy iich ndung, paady ycixp jotcuyc nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix müd iich ycixpi, jigix Dios a'ixihuipy co nícixibich tzojc ma miich ajcxy.

Oy'ajt etz capxpooxín huidibi cogixñip je necy

²⁰ Dios nmibijctzooybich müd miich ajcxy ycixpi. Je Dios huidibi yajjugypijc jadüg'oc iich ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcín huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcuyc'ajtim je' huen xyaj'ahuimbijtcixy huädz etz oyjäy ma tüg'óciy ajcxy mmibijcín etz ma tüg'óciy ajcxy mdzinaayín, jigix ajcxy mdunipy nej yi' tzocy. Dios huen tuñ ma iich ajt njot nhuinma'ñ müd Cristo ymic'ajt nej yi' tzocy. ¡Huen Cristo y'idipy mij cömay huinixii huinítiempo! Amén. Jadu'n jada.

²² Nmügügtijc, nbijctzooybich may'ajt yajtungixy mecxtujcín ma jada ayuc capxhuijin. Ti ajcxy ii con nijayñygixy. ²³ Nejhuñygix miich ajcxy co ajt nmügüg Timoteo y'ity ahuätztuum. Pen tzojc yjädy ya ma nyajpaadyich, chi yi' xymüdnícixibich co iich anajty miich ajcxy nicxy n'ijxcixy.

²⁴ Nguejxpyich ngapxpooxín ma nidüg'óciy pin ajcxy xyñigohuajc'ajtp etz je mügügtijc ajcxy huidibi mibijccixyp. Je mügügtijc huidibi ajcxy yajpatp ya Italia yquejxyp ajcxy capxpooxín ma miich ajcxy.

²⁵ Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

Yi Necy Huidi Santiago Yajniejx Je Judío Mibijcpidijc

¹ Hich Santiago, ndzojcingix ich nduñ ma Dios etz je Huindzin Jesucristo ytung. Cham jada necy nyajniegexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajt cajt muid co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huidib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'ñ muidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñydigoyaangixy, ca' mdajipy mmayipy ajcxy, jotcuyc ajcxy mnayjihuihuuyb. ³ Miich ajcxy mnejhuuygixyp co jadu'n mمیمعxtujccixyp je tzaachyp ayo'n huidibi mminajxcixyp myajnajxcixyp muid co ti mmijpidaaccixy Jesucristo, huin'it mbaatcixipy mic'ajt, jigix jebi mımadactaygixy tög'ociy jibic-huinma'ñ. ⁴ Copicy miich ajcxy mımadactaaygixipy tög'ociy jibic-huinma'ñ, ca' ma mdundigóoygixipy, e huin'it huadz mjot mhuinma'ñ muid'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjaty oyhuinma'ñ, co jäy ajcxy xychach'ijxmadzaani mjot mhuinma'ñ nej muidity, mibijctzou Dios huen xymöy je oyhuinma'ñ, com yejcpy yi' oyhuinma'ñ muid tög'ociy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'ñ. ⁶ Copicy pijctzohui Dios huijy'ajt cujc'ajt cixyjot huinijot, ca' y'ametz yjotmetzity. Pinjaty ametz jotmetz Dios mibijctzoob, ca' tú'ciy muidity yjot yhuinma'ñ, janam jatzojc yajtigach yhuinma'ñ jadu'n nej je meyy co ypidigy y'ixtägy muid je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy muidity, ca' tögijp yhuinma'ñ pidaaccixy ma Dios.

⁹ Yi ayoobitijc huidibi mijpidaaccixyp Dios, ooy jäygidägaangixy co Dios ypubeduyb ypubigihuiyb. ¹⁰ Yi comeñyjäy ajcxy huidibi mijpidaaccyp Dios, ooy jotcuyc ajcxy ñayjihuihua'nyii co ajcxy ymeen ytictähuipy jadu'ñyi. Com yi' ajcxy ymeen tigoyamb yi' jadu'n nej tög pijy co ñiicxni muid xii an. ¹¹ Co xii ypejtni, chi ooy y'andaacni mic, e chi je jinboj ypidzimy, chi je pijyquipy ytich, chi yhuingädaayñi je pijy, e jadu'ñyi ytigoydäy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeñydic ajcxy, jadu'ñyi ñitigoyaangixy yjugy'ajtin.

Co yjot yhuinma'ñ chach'ijxmadza'ñyii

¹² Jotcuyc pinjaty mımecxtujctaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mımecxtujctäaygixipy, Dios möhuib ajcxy jugy'ajtin huinixibi, huidibi yajhuinhuaniiy tög'ociy jäy ajcxy huidijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaani. Dios ca' ti jibicpi tuñ muid jäy ajcxy. E nañ ni pin ca' huaad ixxmach Dios nej yjot yhuinma'ñ ymuidity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocynibejtni co nicxy y'ó'ccixni.

¹⁶ Migügtijc ajcxy, huidibi ooy ndzocy njihuuyich, ca' mnayhuin'iniigixy. ¹⁷ Hich ajt nDios Teedy huidibi tzajpjoty tzinaayb, yi' huidibi yajcojtaay xii madza' huidibi jajp tiicxp, yi' je' yejctaayb tög'ociy tijaty oybi, tög'ociy yhuinma'ñ huidibi ich ajt nmuid'ajtim. Dios ca' yi' yjot yhuinma'ñ yajtigach jadu'n nej yi' xii madza' yjajin ytichin ytigach. ¹⁸ Dios y'oydumyb huinjemy ich ajt njot nhuinma'ñ muid yi' y'ayuc ytiy'ajt, jigix jebi ich ajt

nmí'ijtm oyjot oyhuinma'ñ. Yí jáy ajcxy huidibi yajmij'ajtcixp Jesucristo, Dios nīgi tzocy ajcxy ca' jac ti huidibi oyduñ.

Je tiy'ajt tiydudäcypí

¹⁹ Migügtijc huidibi ñich ooy ndzocy njihuïyich, mnejhuïhuipy miich ajcxy jada co ooy ycopicyity mmido'mbijctähuipy ajcxy Dios y'ayuc ytiy'ajt, ca' mjäydgóoygixipy, ca' mgapxmayïygixipy, pen mjetmätcotp ajcxy ca' anajty mguydungixy Dios ytiy'ajt. ²⁰ Je jáy huidibi jotma'tp, ca' je' tuñ huidibi Dios yjäygidacyp. ²¹ Ixmajtztaaygix yí jibic ayuc, ca' mnijot'ajtcixy yí jibic-huinma'ñ. Cöbijccix müd oyjot oyhuinma'ñ yí Dios y'ayuc ytiy'ajt, yí huidibi Dios ti yajnicödugiy, huin'it jëbi ajcxy m'alma nïdzoocin paady.

²²⁻²⁴ Cuydungix ajcxy Dios y'ayuc ytiy'ajt, ca' ajcxy mjetcuje'adipy müd yíyí co m'amidoo'ijtcixy, hue' anajty nigoo mnayhuin'ïnigixy. Peni nigooob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pín yhuinñyijp aa'ijxnajxp ma tügi iix. Co ñay'aa'ijxnajxtäyí, chi yjihuägy, e mic'amy jäydgoydäy nej yhuinñyijp ti ixy. Naadigi' anajty ti ñay'aa'ijxnaaxyí. ²⁵ Pen miich ajcxy yajxon m'ixpijxyp Dios ytiy'ajt, je tiy'ajt huidibi yaj'oyihuip ajcxy mjet mhuinma'ñ, pen mmijpidaaccixyp, pen mguydungixyp Dios y'ayuc, e ca' mjäydgóoygixy, chi jada' Dios xyconuucxip ajcxy müd jëgixpi huidibi anajty mguydungixyp.

²⁶ Pen ji pín ñayjihuiyí co cuyduni Dios ytiy'ajt, e ca' ñay'ahuijtzägyí, ci'm anajty ñayhuin'ïñyí, tundigooyb anajty, e ca' yjanchity co mijpidaaci Dios ytiy'ajt. ²⁷ Pen miich ajcxy huädz mijpidaaccixy Dios etz mguydungixy yí ytiy'ajt jadu'n nej jëbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyí naaxhuiñyjäy y'iditczixy, huidi ca' mijpidaaccixy Dios.

2

Ca' huin'ijxpety migüg myajmij'ajtcixipy

¹ Migügtijc ajcxy, co m'ojadaajtcixy co mmijnicxpejtcixy ñich ajt nHuindzin Jesucristo, yí huidibi tzejpjoty ane'm, ca' ajcxy huin'ijxpety migügtijc myajmij'ajtcixipy. ² Pen jim jáy ytiyí ma mnayyöymújcigixy comeñyí müd oori cijiitz, etz müd yhuít yxojx janch oybi, etz pen nañ tigiyb tüg jáy ayoob huidibi yhuít ytucxy cïtz tuc nïbüdy xipüdy. ³ Chi miich ajcxy je' jac nīgi myajmij'ada'ñ je comeñyí huidibi oyxoxy, e chi mnimähua'ñ: "Íña' miich ya ma jada oybi íñaaybejt." E je ayoob jäy mnimähuaangixy: "Íña' naaxcíxy o jim jadu'n tina'." ⁴ Co jadu'n m'iditzip ajcxy, ca'p anajty jadu'n ytiy'ajtity. Mdundigooygixy anajty ma Dios ytiy'ajt co huin'ijxpety ajcxy migüg mdzogipy. Hue' anajty myajtungixyp jibic-huinma'ñ co jadu'n m'ixtíjcixipy jáy huidibi ayoob.

⁵ Migügtijc ajcxy, Dios ti huin'ixy yí ayoobitijc, jëbi ajcxy mijpidägy Dios etz jëbi ajcxy paadipy it lugar ma Dios y'it tzejpjoty. Jadu'n Dios yajhuinhuaníy pínjaty tzejcip jihuïyí co it lugar möhua'ñ jiiby tzejpjoty. ⁶ Myajtzo'yduungixyp miich ajcxy ayoobitijc. ¿Nej cayí comeñyí ajcxy huidibi miich ajcxy xychachxip ma cötujctac, e xyajnicxcixy ma tungmüdpí yhuinduu, oy ajcxy mdzocy mgatzocy? ⁷ ¿Nej ca yjējity ajcxy huidibi jibic nigapxp ni'ojyib Jesucristo, je oyjāy huidibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huidibi jaybety ma Dios ylibro: "Mdzogipy mjihuïhuipy mmigügtijc hueñytimypinity, jadu'n nej miich ajcxy ci'm mnaychogyí mnayjihuiyí." Pen jadu'n anajty mdungixy, tüg anajty oybi mdungixyp. ⁹ Pen huin'ijxpety ajcxy anajty jäy myajmij'ajtcixy jadu'n nej yhuít yxoxy ajcxy müdity, mdundigooygixp, e ti anajty mnayyajpocycähuigixy ma Dios ytiy'ajt. ¹⁰ Pen tüg jáy cuydundaayí Dios ycötujcín, co nicxy tüg cacuyduñ, jadu'n nipaady nej jihuïy anajty janch

ni tög cötujcin ti cacuyduñ. ¹¹ Je Dios je cötujcin ti pidägy co ca' huaad mmigapxtigooyipy töxyjäydijc, etz nañ ti cötujcin pidägy co ca' huaad njäyyaj'o'cim. Pen mmigapxtigooyb töxyjäydijc, oy ca' ti mjäyyaj'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jëbi huaad jäygidägy ñich ajt nHuindzin Jesucristo nej je' cuyduñ yí ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti pa'ayoohuin ma ymigügtijc. Pin pa'ayoohuin tumb ma ymigügtijc, je' capxpaady y'idip co anajty Dios tiyduñ yí yjáy.

Je mibijcpi etz je oyjáy'ajtin

¹⁴ Migügtijc ajcxy, ni ti m'alma capada'ñ pen miich mmınaamb co myajmij'ajtyp Dios, e pen ca' myajnigüexigy ni ma co oybi mduñ. Ca' Dios yajnïdzöga'ñ yí m'alma miid co nigooob mmına'ñ co Dios mmijpidägy, e ca' mguyduni yí ytiy'ajt. ¹⁵⁻¹⁶ Pen miich ajcxy miid tög migüg yëydijcpi o töxyjäybí huidibi yajmayajtp yhuit ytucxy caayin uucin, e chi nigoo miich ajcxy mnimähuipy: "Ñicx agujc jotcujc, Dios xypubedipy xypudigihuipy, ca' mdich'ögipy ca' myuu'ögipy." E miich ca' anajty ti ti mmöy huidijaty yajmayajtpy. ¿Ti oyjáy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' oyjáy'ajtin mduñ miid mmigügtijc, ytimyñipaty jadun nej ixipy ca' mmibicy yí Dios ytiy'ajt.

¹⁸ Ca' yjeczy co tög jäy xyñimähuibich jadun: "Miich mdzachmijpidacpy yí Dios ytiy'ajt, e ñich ndumybich oybi." ñich n'adzohuipyich yí jadunmbi jäy co ca' jadun ytiy'ajtiy nej miich minañ. Pen ca' miich mmijpidägy Dios y'ayuc, ca' mjadipy nej mdunipy oybi jadun nej Dios huaad jäygidägy. Co ñich oybi nduñ, jadun ñigüexigy co nmijpidägyich Dios. ¹⁹ Miich mmibijcpy co Dios ji tügpaic, e oy jadun co mmibicy. Nañ jadun yí ca'oybi ajcxy mibijcp etz chigüyb ajcxy Dios. ²⁰ Loci miich, ca' mhuinjihuñhua'ñ je tiy'ajt. Co pinjaty mibicy Dios, e ca' yajnigüexigy co oybi tuñ, ca' tiydudägy mibicy Dios. ²¹ Je Abraham yejc tög iixpejt nej jëbi huaad ngapxymidoohuim Dios co jecy'ajty je' ymang Isaac ciyejcy nej tög huindzigi'ñ ma Dios. ²² Je Abraham ymibijc co Dios yjiijity etz nañ ycapxymidou nej Dios ñimaayi. Paady nejhuñyim co yjanchity co Abraham mijpidacy je' Dios miid co cuyduñ jadun nej Dios ñimaayi. ²³ E jadun oy cuydundäy nej yjaybetyity ma Dios ñecy: "Yí Abraham ymijpidac Dios, paady Dios ymecxtaayi ypocy, e ycöbijci jadun nej jihuñy ca' anajty ytundigoy." Paady ycixpi Abraham oyñaydiyii: "Co Dios minaymigü'adyii."

²⁴ Cham nejhuñygix co Dios ycöbijcpy jäy huidibi cuydungixp yí ytiy'ajt, e ca' mmınaanim miid jëyi co ymibijccixy. ²⁵ Tim jadun nej Abraham yjajty, nañ tim jadun yjajty miid je töxyjäy huidi anajty yxi Rahab, huidibi anajty ooy ti ytundigoy miid mayyëydijc. Je Rahab ycoyüdz ma ytiyc nimetz jäy huidibi anajty Israel jäy yaj'ix'ijtyp, e chi yajqueegix ma huingbi tü'aa, e jadun ajcxy yajtzoocy ma ymidzip. Miid co jadun oyjáy'ajtin tuñ miid je Israel jäy, chi Rahab oy paady je nïdzocin ma Dios. ²⁶ Je ninicx huidibi ca' alma miidity, ca' ni ti mic'ajt miidity. Nañ tim jadun pinjaty mibijcp co Dios yjiijity, e ca' cuyduñ Dios ytiy'ajt, yí ymibijcin ca' Dios cuendipicy.

3

Co pinjaty nigapxy ni'ofiy ymigüg

¹ Migügtijc ajcxy, huinmaygix yajxon pen janch mnajtztzogixy co ajcxy mni-huindzin'adaangixy Dios y'ayuc. Com ñich ajt huidibi nyaj'ixpijim Dios y'ayuc, pen tundigooyim ñigi mij nyajtiydunaanim. ² Nidüg'óciy ñich ajt ndundigooyim minajity. Pen ji pin ca' y'idigooy ycapxtigooy, yí tiydudägy anajty yjáy'aty, jëbi ñaygüend'adyii yajxon, e ca' huaad y'ocjactundigooyñi. ³ Ypidacpy jäy freno ma cohuay y'ahuac jigix jëbi ane'my je cohuay nej tzocy. Nañ jadun tzocy co jäy ajcxy huen y'ahuac ahuijtcixy jadun nej jäy cohuay ane'my miid freno. ⁴ Nañ jadun yí barco oy mabaad ooy yjamijity, per ooy poj ytiJimmy ytiixiyii. Je barco yaj'ane'm yajxon miid tög pi'c pujx yindi'cni huidib xiijip timón. Yajxon ytüyöy je barco ma je' timdzocy je huidibi ane'mip. ⁵ Nañ

jadu'n yjaty mïid yi tootz, janch tim yindi'cni yi', per ooy mij cajee tuñ jibicpi, jëbi y'ïdigooy ycapxtigooy mij cajee. M'ijxyp miich ajcxy nej tim yindi'cni jïn mij ooy nïgy quipychaa miy'ujtz. ⁶ Yi jây ajcxy y'ahuac nañ tim jadu'n nej pi'c jïn, mïid nhuin n'ahuac mijcajee n'ïdigooyim ngapxtigooyim. Co jadu'n n'ïdigooyim ngapxtigooyim, chi jëbi mijcajee midundigooyim mayjây. Co n'ïdigooyim ngapxtigooyim, etz nayya-jpocycâhuim, chi ñiguëxïgy canaagnax jibic-huinma'ñ huidibi nmïid'ajtim. Jada jibic-huinma'ñ jim yi' nbaatim ma je mujcu' huidibi tzinaayb ma yi infierno. ⁷ Yi naaxhuiñjây ti mimadaaccixy yi iyujc animal huidibi queegïcp queec-huidijtp, naag iyujc ahua'nbi, etz iyujc nïjotyp. Ti ooy yajmaxïygixy yajxon iyujc huindzïcyp etz ahua'nibi. ⁸ Yi naaxhuiñjây oy ti mimadaaccixy yi iyujc animal, per nitüg ycaca'ty pin yajxon y'ahuac ahuijtzïgipy, ac'ïdigooygixp capxtigooygixp ajcxy. Pin ymigüg nigapxy ni'ojïyb, huin'it je ymigüg ooy jibic ñayjihuihua'ñyii, jadu'n nej jihuïy veneno ti möy ymigüg. ⁹ Mïid jada' nhuin n'ahuac ajt ngapxpaatim ïich ajt nHuindzin Jesucristo etz ïich ajt nDios Teedy. Nañ jadu'n mïid nhuin n'ahuac nigapx ni'ojïyim nmïgügtijc. Dios ti yajcojy yi jây mïid oyjot oyhuinma'ñ jadu'n nej yi' oyjot oyhuinma'ñ mïidity, paady ca' y'oyity co n'ïdigooyim ngapxtigooyim. ¹⁰ Mïid nhuin n'ahuac ajt mïid ngapxim oybi ayuc etz jibic ayuc. Mïid nhuin n'ahuac yi' mïid ngapxpaatim etz ni'ojïyim nmïgügtijc. Ca' jadu'n y'oyity co jadu'n n'adïtzim. ¹¹ ¿Nej jëbi jada' ma tüg nïgop ypidzimy nï päcpi etz nï ta'mbi? ¹² Migügtijc ajcxy, ¿nej jëbi jada' yi higueri ytïm'aty aceituna etz yi muuxy'aadz ytïm'aty higos? Nañ tim jadu'n ma nï ymuxy tamtzpi, ca' jim ypidzimy nï päcpi. Paady ycixp ca' y'oyity co jây ajcxy capxcixy oybi etz jibicpi.

Je tiy'ajt janchypi

¹³ Pen miich ajcxy huijycujc mnayjihuiyi, pen oyhuinma'ñ ajcxy mmïid, yajtungix m'oyhuinma'ñ ma mdzinaayin mjugy'ajtin. Ca' huaad ci'm ñaygömaayigixy. Mïid je oyjây'ajtin huidibi ajcxy mdumyb huen jây ci'm nejhuïygixy co oyhuinma'ñ miich ajcxy mïid'ajtcixyp. ¹⁴ Pen ta'm mjot mhuinma'ñ mjihuïygixy, pen mga'oy'ijxcixyp ymigügtijc, pen mhuinnaxtugaangixyp ymigügtijc, pen jadu'n mjihuïygixy mhuinmaaygixy, huin'it ca' huaad mnaygömaayigixy ci'm co mdzachcuydungixy Dios ytïy'ajt, com ca' yjanchity, nigoo m'anïdaaccixy. ¹⁵ Jada jibic-huinma'ñ ca' jada choon ma Dios huidibi tzinaayb tzajpjoty. Ya naaxhuiñ jada jibic-huinma'ñ yajpaady, mïid co jây tzachnijot'ajtcixy jibic-huinma'ñ. Yi mujcu' yejcpy jada jibic huinma'ñ, e ca' nminanim co Dios yecy jada jibic-huinma'ñ. ¹⁶ Paady ycixp co jây ajcxy ycanay'ixa'ñyii, co huinnaxaangixy ymigüg, chi ca' oy y'ijtcixy, oy ajcxy ñaymidundigöoyigixy mijcajee. ¹⁷ Je huijy'ajt cujc'ajt huidibi Dios yejcpy, ooy yi'. Yi Dios huidi tzinaayb tzajpjoty oyhuinma'ñ ymïd. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmimecxtujcim nmïgügtijc, etz yung naxy jot huinma'ñ nmïd'ajtim, etz nba'ayoohuim nmïgügtijc, etz nduunim oyjây'ajtin, etz tudägy nhuinma'ñ nmïd'ajtim. E ca' nigoo naybidaacim jadu'n nej jihuïy nmïjpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim mïid tudägy njot nhuinma'ñ, jadu'n nej jëb Dios jäygidägy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdiy choon je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjot mhuinma'ñ, paady ycixp mganay'ayuc-huinjihuiygixy, e tzipcapxy myajcojixy myaj'abadiygixy. ² Ooy miich ajcxy tijaty mjatzojccixy, e ni ti mgapaatcixy, e huin'it mjäyyaj'öccixy. Ooy m'adzojccixy tijaty migüg yjë'ajtyp, paady ycixpi mdziptungixy, etz mganay'ixáanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi

ca' ti mbaatcixy, mïid co mbijctzoogixy mïid jibic-huinma'ñ. Mbijctzoogixyp co mya-jtunaangixy ma ca' ypadyii. ⁴ Mdundigooyb ajcxy. ¿Nej ca' mnejhuiygixy co Dios ca' jäygidägy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyii jäy ya naaxhuiñ huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: “Je Espíritu Santo huidibi Dios ti xy'adigiïyim ti xyjottigiïyim ooy xychojcim xyjihuiïyim mijcajee.” ⁶ Dios ninigoobi may'ajt oy'ajt tuuñ mïid iich ajt ycixpi, paady ycixpi ymina'ñ ma Dios ñecy co ca' yi' oy'ixy pinjaty amij agix nayjihuiïyp. Dios yejcpy may'ajt oy'ajt ma yi jäy ajcxy huidibi yung naxy jot huinma'ñ mïidity. ⁷ Naybidáacigix cixyot huinijot ma yi Dios. Mic mihuindinaaygix yi mujcu', e jihuägipy yi' ma miich ajcxy. ⁸ Ojadajtcix Dios mïid oyjot oyhuinma'ñ, e Dios xypubedipy xypudigihuipy ajcxy. Miich ajcxy pocyjäydijc, ixmajtzcix yi jibic-huinma'ñ. Yajhuaatzcix yi mjot yi mhuinma'ñ miich ajcxy huidibi ametz jotmetz mibijcp. ⁹ Tajcix maygix, amutzciïygix. Huen yi mxiicin yi mxondaacin ahuimbity jiiyin yaaxin. E yi mjotcujc'ajtin huen ahuimbity tajii mayii. ¹⁰ Pidaccix yung naxy yi mjot yi mhuinma'ñ ma yi mHuindzin Dios, e yi' may'ajt oy'ajt tunipy mïid miich ajcxy ycixpi.

Ca' huaad nigapxcixy ni'ojiiygixy ymigügtijc

¹¹ Migügtijc ajcxy, ca' mnayñigápxigixy mnayñi'ojiiygixy miñ xyipy. Pen mnigapxyp mni'ojiiyb mmigügtijc, hue' mnixiicpy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayyajmij'adyii ci'm. Pen mnixigamyb myajxiigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixyipy miich mina'ñ co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojiiygixy.

Dios tügpajc nejhuïy nej je jabombi mimb cidacp

¹³ Tungix cuendi iich n'ayuc miich ajcxy huidibi minamb: “Cham o jabom nnicxim ma yijimbi naax cajp, e jim nyajnajxim jimijt agujc jotcujc, jim negocio nduunim, ooy mijcajee nbaatim.” ¹⁴ E miich ajcxy ni mganejhuïygixy ti je' anajty je jabombi mimb cidacp. Je jugy'ajtin ni pin ca' nejhuïy nej pin chinähua'ñ yjugy'ada'ñ. Jadu'n miich ajcxy mjogy'ajtin nej joc co y'ocquëxigy cham, e tim tügjaxigy ti ñitigooyñi. ¹⁵ Jac'oy ajcxy mmina'nip: “Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty.” ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömäayigixy; co ci'm mnaybidáacigixy amij agix, ni Dios mgamibijccixy. ¹⁷ Pin janejhuiïyb je oybi, e ca' tuñ, pocytumb anajty.

5

Je comeeñyjäy yjugy'ajtin nitigoyam

¹ Comeeñydijc, oc'amidoo'ijtcix nej cham nmina'ñich. Amutzciïygix, tajcix maygix co xyñiminaangixy ayo'n. ² Miich ajcxy mmeëñ etz ajcxy mjogy'ajt ñitigoyamb yi', miich ajcxy mhuit mducxy ti uucxyting yjicxtäy. ³ Miich ajcxy m'oori, ajcxy mplata, ajcxy mmeëñ naadigi' ti myujpijccixy ti m'amay'ajtcixy. Ti ixyipy myajtungixy mïid oyjäy'ajtin. Co ti myujcpjccixy ti m'amay'ajtcixy ji jadu'n je tiy'ajt co mdundigooygixy ma Dios. Mïid co yi mmeëñ ca' ti myajtungixy mïid oyjäy'ajtin, paady ycixpi ayo'n mbadaangixy mïid je xii tiempo huidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumbidijc huidibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huidi ane'mdaayb tüc'ócay jiiiby tzajpjoty etz ya

naaxhuiñ, yi' ñejhuiydaayb nej miich mdumbi ajcxy ymīnaangixy. ⁵ Ti miich ajcxy agujc jotcujc mdzinaaygixy ya naaxhuiñ mīd mayñax xondaacīn. Ti miich ajcxy mgūxyii mbedyii, ti ajcxy m jotcujc'ajtcixy. Cham m'ahuijxcixyp yi tzaachypī yi ayo'n huiḁibi ajcxy mbadamyb ma Dios, jadu'n nej huaj nīcxpī ahuixy co jāy ajcxy chūḁza'ñyii. ⁶ Miich ajcxy comeeñyājdyjc ti miich ajcxy mxīgixy mñihuambejtcixy, mdzaachytungixy ti myaj'ōccixy jāy ajcxy tudāgypī, e ca' yi' ajcxy xymihuimbijty.

Je mecxtujcīn etz je capxtāgī

⁷ Migūgtijc ajcxy, yajtungixy mij yi mecxtujcīn mabaad anajty je Huindzin Jesús ymiñ jadūgtēc y ya naaxhuiñ. Tīm jadu'n nipaady nej naymīdumbīdjc ahuijxcixy je tībī nidungīygixy, ahuijxcixy mīd mecxtujcīn je oga'n tuu etz je poj tuu huiḁi mīd je' ypidāgy yhuindihuipy. ⁸ Mīd'ajtcix nañ jadu'n ooy mecxtujcīn, etz ca' m jotmetzcīygixy, com huingomb je tiempo mīna ymiīna'ñ je Huindzin Jesús ya naaxhuiñ jadūgtēc. ⁹ Migūgtijc ajcxy, ca' jadūg jadūg mnayñigāpxīgixy nayñi'ojīygixy. Pen jadu'n mdungixy Dios miich ajcxy xyajpocycāhuipy, com tīm huingonip je xīi je tiempo mīna Dios tīyduna'ñ jāy ajcxy mīd ypocy ycixpī. ¹⁰ Migūgtijc ajcxy, pijccix je iixpejt jadu'n nej tzaachypī minajxy yajnajxy je profetas ajcxy huiḁibi ajcxy īihuācxp capxhuācxp je Huindzin Dios y'ayuc. ¹¹ Minaanim jadu'n, mīd co ajcxy ooy mīmecxtucy nej jāy jībīc ytuuñ mīd yi' ajcxy, e chī jotcujc cham yajpaady ma Dios. Ti jada' m jatymīdoogixy je ayuc nej Job ayo'n tzaachypī minajxy yajnajxy, e ymīmecxtujc je'. Mīd co ooy anajty mījpīdāgy Dios, paady Dios pa'ayoy Job, e conuucx mijcajee.

¹² Migūgtijc ajcxy, co tijaty ayuc m'adzohuimbīdy, tīydudāgy ajcxy m'adzohuipy: “Janch jadu'n o ca' yjadu'nīty”, ca' ajcxy m'īndāgipy. Ca' Dios nīgoo m'ībaadipy mgapxpaadipy. Nī ca' m'ībaadipy mgapxpaadipy yi naaxhuiñybī o tijaty ya naaxhuiñ. Huin'it ca' mnayyajpocycāhuīyb ma Dios.

¹³ Pen jī pīn ma miich ajcxy ti ayo'n mīdīty, huen mībijctzoogixy Dios mīd yi jāy ycixpī huiḁibi ayo'n mīd. Pen miich ajcxy jotcujc nayjihuīyp, huen huin'īgixy Dios. ¹⁴ Pen jī pīn nidūgtī ypīgyīi ma miich ajcxy, huoomīngix yi' huiḁibi ajcxy nīgohuajc'ajtp yi mībijcpīdjc, jīgix ajcxy mībijctzoohuipy Dios mīd je pa'mjāy ycixpī, etz pīdāgipy hueenī aceite ma je jāy ycohujc etz capxpaadipy yi Huindzin Jesús yxīi. ¹⁵ Mīd co miich ajcxy mmījpīdaaccixy e mmībijctzoogixy Dios, paady ycixpī tzōgipy yi pa'mjāy. Chī je Huindzin Dios yejcnīp mīc'ajt oy'ajt, etz ymecxtaayipy yi' ypocy huiḁibi anajty ti tuñ. ¹⁶ Capxpīdzīm yi mbocy nidūg nidūg. Ñayñībijctzoohuīygix nidūg nidūg ma Dios, jīgix ajcxy mdzōgipy. Pen tūg tudāgypī jāy ymībijctzooyb yi Dios cixy jot huinījot, madāgipy yi' mīd y'oración. ¹⁷ Elías nañ tīm jadu'n anajty yjothuīma'ñ mīdīty nej īch ajt. Janch cixy jot huinījot mībijctzooy Dios ca'jīty ytūy, e ca' je' jadu'n ytuuy tugīg jīmījt ja tudujc po'. ¹⁸ Chī jadūg'oc Elías mībijctzoy Dios co huen tūy, chī Dios yajtuuy, e chī ya naaxhuiñ yhuindīy je jāy ajcxy ypidāgy.

¹⁹⁻²⁰ Migūgtijc ajcxy, pen jī miich ajcxy nidūg ñīdīgoy ytūdīgoy ma yi Dios ytīy'ajt, e huin'it tūg quēxīgipy pīn ymīgūg yajhuimbīdy ma Dios ytīy'ajt, nejhuīygix miich ajcxy co pīn huiḁi yajhuimbījtp ymīgūg ma Dios ytīy'ajt, huiḁibi ti ñīdīgooy ti ytūdīgooy, ti je' anajty tūg alma yajtzōgy ma yi o'cīn, e ti anajty yajpocyñīhuaatzāy.

1 PEDRO

Yi Necy Huidibi San Pedro Yajniejx Je Judio Mibijcpidi

¹ Hich Pedro, Jesucristo ti xyajñibicyich ngapxhuäcxibich yi' y'ayuc. Jada necy nya-jnigiejxyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuüy co xyjäy'ada'ñyii ajcxy. Dios ti yajtigiyüy yi' yjihui'ñ ymic'ajt ma miich ajcxy mjot mhuinma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymooygixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuj müd miich ajcxy ycixpi. Pidaaccix mhuinma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajñixidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcuyc mdzináaygixipy.

Jijp'ijxcix jugy'ajtin huinixibi

³ Yi Dios, hich ajt nHuindzin Jesucristo yTeedy, huen capxpaady y'ity, müd co may'ajt oy'ajt ti tuñ müd hich ajt co ti oyduñ huinjemybi hich ajt njot nhuinma'ñ, jëbi n'ijtim Dios yjäy. Jadachambi ooy njijp'ijxim je jugy'ajtin huinixibi, müd co Jesús yjugypijcy huinjemy ma anajty ti y'ögy. ⁴ Nañ ooy njijp'ijxim tijaty Dios xymöhuaanim jilby tzajpjoty, huidibi ca' yhuindigoy, huidibi ca' yjibicüy, etz huidibi ca' ycixy ytigoy. ⁵ Dios xycuend'adip ajcxy müd yi' ymic'ajt, ixti jiini co anajty ajcxy je m'alma nidoocin padaangixy, co anajty je naaxhuiñ ycixy ytigoy. Mbadaangixy m'alma nidoocin müd co ti mmijpidaaccixy Dios ytiy'ajt.

⁶ Paady miich ajcxy ooy jotcuyc'ajtcixp. Oy cham tzaachypi m'ocminajxcixy m'ocyajnajxcixy müd co jäy tzach'ijxmadza'ñ miich ajcxy mjot mhuinma'ñ. Nigi ooy jotcuyc nayjihuiyigixy co ajcxy yi' m'alma nidoocin pada'ñ. ⁷ Dios y'ixamyb ñejhuihuamyb pen janch miich ajcxy cixyot huinijot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jëbi nigi myajhuaatzcixy mjot mhuinma'ñ, tim jadu'n nej jäy yajhuaatzcixy yi' oori müd jün. Dios nigi tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuinma'ñ, pen ca' mhuinma'ñtigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcuyc'ajtin co anajty Jesús ñayguëxigyii jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiyii nigi jotcuyc anaxy. Je jotcuyc'ajtin huidib mmüd Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajñidzögaani.

¹⁰ Jadu'n nej Jesucristo xyajñidzögaani miich ajcxy m'alma je Dios y'ayuc najtzcapxiiybi ooy anajty jecy'ajty janejhuihuaangixy nej Dios y'ayuc ñigüeje, e ca' ajcxy huinjihuüy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ müd miich ajcxy ycixpi. ¹¹ Je Dios y'ayucnajtzcapxiiybi jecy'ajty ooy ajcxy jahuinmay, ooy ajcxy jahuinjihuihuaañ nej yhuimbizimy je ayuc huidibi ajcxy ymüd jotjoty huinma'ñyoty, je ayuc huidibi Jesucristo yajmiguejx yi' yjihui'ñ ymic'ajt, je Espíritu Santo, jadu'n nej ajcxy najtzcapxiiy co je Cristo tzaachypi minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuüy yi' y'ayucnajtzcapxiiybi co je' huidib ajcxy ycapxhuäcx jiini je' ytuna'ñyii yjada'ñyii, ca' ajcxy ixa'ñ. Migügtijc ajcxy, Dios ti yajtu-ynyii ti yajjadyii ma miich ajcxy je mxii mdiempo nej anajty je' y'ayucnajtzcapxiiybi

najtzcapxiiy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxtäy ma iich ajt nidüg'óciy. Je jäy huidibi capxhuäcx je tiy'ajt ymiid anajty ajcxy je Dios yjihuiñ ymic'ajt huidibi Dios anajty yajniguejxip, choon tzajpjoty. Ixti je ángeles huidibi ajcxy tzajpjoty tzinaayb yjanejhuihuañ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhuíy.

Chojcpy Dios co tudägy ndzinaayim

¹³ Paady ycixp ni'ixi pidaaccix mjet mhuinma'ñ. Huijy ycuje ajcxy mdzinähuip. Jijp'ijxcix je may'ajtin oy'ajtin huidibi Dios tunamyb miid miich ajcxy ycixpi co anajty Jesucristo yhuimbity ya naaxhuiñ. ¹⁴ Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóoygixni jadu'n nej anajty mdundigoogixy co anajty ca'ni mnejhuíygixy Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶ Com jadu'n ymiñ jaybety ma Dios ñecy, jadu'n Dios migapxy je' yjāy: "Mi'idip ajcxy oyjot oyhuinma'ñ jadu'n nej iich nmi'ityich oyjot oyhuinma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yi jäy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuinma'ñymidity, pen jibic-huinma'ñ ymiid, chi tzaachytunipy nigi. Paady ycixp tiydudägy ajcxy mdzinähuipy. Tzigiiygix Dios. ¹⁸ Je Dios canan hue' ti xyajpocyñihuaatzim co ti cojuy iich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajtiy. ¹⁹ Hue' janchtiy Dios ti xyajpocyñihuaatzim miid Cristo co y'o'cy cruudzcixy, e chi ñi'py teemy yojcy miid iich ajt nbocy ycixpi. Jadu'n nej anajty Israel jäy ñayajpocyñihuaatzigixy co yaj'ögy tüg boregi ung, huidibi ca' anajty ti jibicpi midity, e chi ñi'py teemi cuji. ²⁰ Jadu'n nej Cristo y'o'cy miid iich ajt nbocy ycixpi, Dios jayijpni jadu'n yajnihuinmayiiy co jadu'n tuna'ñ, ca'ni anajty naaxhuiñybi chondägy. Jecy'ajty ca'ni anajty pin nejhuíy, e jadachambi Dios ajt ti xyajnejhuíyim. ²¹ Paady ycixp miich ajcxy mijpidägy Dios. Dios yajjugypijc huinjemy je Cristo co y'o'cy, e Cristo cōmay ooy ypidzimy jiiyby tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

²² Ti myajhuaatzcixy mjet mhuinma'ñ co ti mmijpidaaccixy Dios ytiy'ajt. Naychójcigix nayjihuiyigix nidüg nidüg cixyjot huinijot, ca' y'ametz yjotmetzity. ²³ Com ti Dios oyduñ miich ajcxy mjet mhuinma'ñ huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy ytigoy, huidibi huinixi ijtp, je tiy'ajt huidibi jugy'ajt yejcpy. ²⁴ Jadu'n ymiñ jaybety ma Dios y'ayuc:

Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytiitzni, chi je pijy jadu'ñyi yca'ni, e chi jadu'ñyi je pijy y'oy'ajtin ytigoooy.

²⁵ Dios y'ayuc ytiy'ajt huinixi y'ity, ca' ycixy ytigoooy nimina.

Jada je ayuc je tiy'ajt huidibi Dios yjāy ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'ñ nej migüg ajcxy jibic mnigapxcixy. Ca' m'anidáaccixipy. Ca' ajcxy mnyabidägiyb jadu'n nej jihuíy ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'idigoyipy mgapxtigoyipy. ² Jadu'n nej yi ma'xungdijc tzocy chidz, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jēbi ca'pxy yi mhuinma'ñ mi'idipy ajcxy miid je xpijcin huidibi Dios xymooygixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhuíygixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

4-5 Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhuiñjyay etz ooy tzocy. Yi naaxhuiñjyay ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'n ma yi tzaadijc ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb mïd miich ajcxy tügpiçy jäy huidibi yi' yjây'adaanip, huidibi ojadadaangixp Dios, huidibi Dios ytung tunaangixp.

6 Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägiçich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägiçich. Je mij'ane'mbi jadu'n je' nipaady nej tüg tzaa oybi huidibi tigihuamb ma tijtaatz co tzaadijc ycojy.

7 Miich ajcxy huidibi mijpidacp Jesús, mïd miich ajcxy je mij'ane'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyb nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzpidijc huidibi ca' yajtunaangixy tüg tzaa oybi co tzaadijc cojçixy. Yi Cristo yi' je' je mij'ane'mbi huidibi ane'mdähuamb tüg'óciy.

8 Nañ jadu'n yi' ajcxy huidibi ca' mijpidägy Jesús cuydumyb nej ymina'n ma yjaybetyity: Jadu'n je Cristo nipaady nej tüg tzaa ma jäy ajcxy ycönejpcixy etz ycidaagixy.

Je jäy ajcxy huidibi ca' mijpidägy Jesús, jadu'n nipaady nej jihuïy ycönejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi mïd ypocy ycixpi, jadu'n nej Dios ti yajcöduçy.

Je huidibi Dios yjây'adyi

9 Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca'capxymidoy Dios. Dios miich ajcxy ti xyhuin'ijçixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyb. Dios miich ajcxy xyjây'ajtip. Miich ajcxy je' xypaat mnidiy'ajt'adipy jadu'n nej Dios ti xyajpidzimçixy ma anajty mdundigooygixy, e ti xyajhuinjihuïygixy je' ytiy'ajt nej jëb huaad mguydungixy. Jadu'n nipaady nej jihuïy Dios ti xyajtzoongixy agootztuuyb, e ti xyajtigiiygixy ma ytiçxy yjajy. 10 Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjây'ajtp cham.

Yajtungix Dios y'ayuc ma mdzinaayin

11 Migügtijc ajcxy huidibi ooy ndzocy njihuïyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi jibic-huinma'n, jadu'n nej je jäy ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' ñaygodigiiygixy mïd oyhuinma'n.

12 Tiydudägy mdzinähuipy ajcxy, yajtungix oyhuinma'n mïd je jäy ajcxy ma miich ajcxy m'adzinaaygixy, je jäy ajcxy huidibi ca' nejhuïygixy Dios ytiy'ajt. Oy ajcxy ca' xy'ixaangixy etz jibic xyñigapçixy xyñi'ojiiygixy, mïd co oyjây'ajtin mdungixyp, chi ajcxy jäygidägiçy, etz miich yi' ajcxy xycapxpátçixipy ma Dios, mina anajty Dios ñinmiñyii ajcxy.

13 Mïd je Huindzin Jesucristo ycixpi, capxymidoogixy tüg'óciy gobierno tungmïdpi etz cajt tungmïdpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. 14 Nañ capxymidoogix tungmïdpi ajcxy huidibi je mij'ane'mbi yquejxyp jigix tzaachytunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. 15 Dios chojcyp co tiydudägy mdzinäaygixipy, jigix jëbi je jäy ajcxy huidibi ca' huinjihuïygixy Dios ytiy'ajt, huidibi tzuu huinma'n mïd, ca' ajcxy mihuinma'nbybaady nej jibic xyñigapçip.

16 Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmïdpi y'ane'min

ycötujcín, ca' huaad mnaybidáacigixy jadu'n nej jihuüy Dios xylugarmooygixy jigix jëbi mdundigooygixy. Copicy mdzináhuipy ajcxy jadu'n nej Dios ytumbi huidibi oy tumb. ¹⁷ Migüg'adii ajcxy tüg'óciy jáy. Naychójcigix nayjihuüyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi mij'ane'mbi.

Jadu'n nej Cristo tzaachypi yajnajx

¹⁸ Tumbidijc ajcxy, imidoogix capxymidoogix mhuindzindijc. Pen oyjáy yi mhuindzin huidibi yung naxy yjot yhuinma'n muidity, o pen ahua'njáy jibicjáy, ca' yñejity, capxymidoogix. ¹⁹ Yjáygidägipy Dios pen mmecxtujctaaygixyp nej jáy ajcxy xychaachytúngixy muid co oyhuinma'n miich ajcxy mmuidity. ²⁰ Pen ti anajty mdundigooygixy, e paady anajty myajtzaachytungixy, ca' pin xycómáaygixipy xycapxpáadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jáygidägipy nej mmimecxtujctaaygixy. ²¹ Dios chojcpy co mmecxtujctáaygixipy je tzaachypi huidibi mminajxyp myajnajxcixyp muid co oybi mdungixy. Paady ycixpi je Cristo tzaachypi ayo'n minajxy yajnajxy muid ich ajt ycixpi, e yejc iixpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanixxcixy mbayöygixy yi' y'ixpejt. ²² Je Cristo ca' je' ma ytundigooy, e nañ ca' pin huin'ññ. ²³⁻²⁴ Je Cristo co jáy ajcxy y'oji, ca' je' y'adzouhuimbijty; e co jáy ajcxy chaachytuuni, ca' mijotmäthuimbijty je jáy ajcxy, ñgi Dios yajpuhuanñy. Com Dios je' paatip nej chaachytuna'n huidi ajcxy tundigooyb. Je Cristo ci'm yajnicx ich ajt ndzaachypi co y'o'cy cruudzcixy. E muid co jadu'n y'o'cy cruudzcixy muid ajt nbocy ycixpi, chi jëbi n'ixmajtzim jibic-huinma'n etz tudägy jëbi ndzinaayim. Muid co Cristo je tzaachypi minajxy yajnajxy muid ich ajt nbocy ycixpi, paady nidoocim ajt n'alma. ²⁵ Miich ajcxy jecy'ajt muidigooyb mdüdigoooyb anajty ajcxy ma Dios, mgi'mhuinma'n anajty ajcxy myajtumyb nidüg nidüg, jadu'n nej jáy yborregi ñidigoy ytüdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'ñymech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijccixy

¹⁻² Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'n Jesucristo, muid co miich oyjot oyhuinma'n myajtunipy muid yi', ycadimjetyity huin'it mñäy yhuinma'ñymedzip etz mijpidägipy Jesucristo, co y'ixipy nej miich mmuidity tudägy'ajtin. ³ Töxyjäydijc ajcxy, ca' mnaygömayñyb muid mhuit mxojx oyjatpyi tzoujatpyi, muid oori cijiitz etz oori taatztiy, muid co mgöhuay mdzachcüdägy muid cüd oyjatyp. ⁴ Hue' janchtiy jáy miich ajcxy xycömayip muid co oyjot oyhuinma'n anajty myajtungixy, muid co yung naxy mjot mhuinma'n ajcxy muidity. Co jadu'n mdungixipy jada je' oy jáygidaacni ma Dios huinixii. Yi mhuit yi mxojx etz oori taatztiy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'n, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xigoyäxy Abraham: "Ich nhuindzin." Pen myajtumyb miich ajcxy oyjot oyhuinma'n jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy. ⁷ Nañ jadu'n miich ajcxy yëydijctijc, yajtungix pa'ayo'n muid mdöxyijc, yajmij'ajtcix. Com jac mic miich ajcxy ca'ydii yi töxyjäydijc. Dios may'ajt ti tuñ tú'ciy muid miich ajcxy, paady ycixpi copicy yajxon naymüddzináayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'n mi'ijtcix, naymigüg'ájtigix yajxon, naychójcigix nayjihuiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'n. ⁹ Co ajcxy migüg xymidundigoyipy, ca' myaj'ahuimbidipy jadu'n nej anajty ti xytuñ. Co ajcxy migüg xyñi'ojihuipy, ca' myaj'ahuimbidipy jadu'n nej anajty ti xyñi'ojiy. Nigi nibijctzohui' ma Dios miid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰ Com jiiby ymiñ jaybety ma Dios ñecy:

Pinjaty jotcuyc tzinähuamb e yajnaxa'n xii tiempo agujc jotcuyc, nay'ahuijtzägiñb ca'ydi y'iidigooy ycapxtigooy, ca'ydi y'anüädgy.

¹¹ Huen jihuägy ma je jibicpi e huen oyjäy'ajtin tuñ. Huen ixmach tüg'óciy tzipcapxy, ca' tzipcapxy ixtähuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypuägiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'n tumb.

¹³ Pen mdumyb oyjot oyhuinma'n ajcxy, huin'it ca' pin ajcxy xymijotmädiy. ¹⁴ Co oyjot oyhuinma'n myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigüygixipy, ni ca' mhuinma'nydigóoygixipy. ¹⁵ Mijpidaaccix yi Jesucristo ich ajt nHuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mijjp'ijxcixy co Jesucristo xyajndzögaani ajcxy yi m'alma. ¹⁶ Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'iidigooygixp xymigapxtigooygixp, chi ajcxy jihuihuamyb tzo'ydu'n miid co ca' yjanchity nej ajcxy ymina'n com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnjáxcixipy, jac'oy co tzaachypi mminájxcixipy myajnjáxcixipy miid yi m'oyjäy'ajtin ycixpi, e ca' anajty tzaachypi mminájxcixy myajnjáxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnaxxy co y'o'cy cruudzcixy miid jäy ajcxy ypocy ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n ich ajt ti naymi'oyiyim miidi Dios. Oy je Cristo ñinix y'o'cy, per je' y'alma ca' je' y'o'cy, jugypijcy je' jadügtecy miid jemybi ninix. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jiiby y'alma ijtp jibictuuby huidibi anajty ca' capxymidooy Dios. Je taab Noé yajcojy je mij barco, ooy Dios ajcxy jecy ymimectujci, huen tijy cayjothuimbijty ajcxy. Jeyi niductujc je jäy choocy ma je mijtuu je mijñgom. Je' co je jacjadyi ca' ajcxy yjothuimbijty. ²¹ Jadu'n nej je nidujctujcpi ajcxy mijpidacy Dios y'ayuc, e chi ajcxy choocy, nañ tim jadu'n ich ajt co nniibejtim je' ich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninix, etz ti xyajhuaatzim njot nhuinma'n jigix ooy oy nayjihuiyim, etz nañ jadügtecy co anajty n'o'cim xyajjugypijcim miid jemybi ninix. Co nniibejtim, je' je' je' tiy'ajt co Dios ti xyajhuaatzim njot nhuinma'n. ²² Je Cristo ti je' ñicxy tzajpjoty. Jiiby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

4

Yajtungix je mic'ajt huidibi Dios ti xymooygixy

¹ Je Cristo ayo'n tzaachypi minajx yajnax co yhuidijty ya naaxhuiñybi, e chi yajtuuñ oyjot oyhuinma'n miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'n miid migügtijc jadu'n nej Cristo yajtuuñ. Pen miich ajcxy mminajxyp myajnjaxyp tzaachypi miid co oyjot oyhuinma'n myajtuñ, chi ca' mjacnijot'ajtip ajcxy jibic-huinma'n. ² Jadu'n nej ajcxy mjactzinähua'n mjacjugy'ada'n, ca' huaad mjacnijot'ajtcixy je jibic-huinma'n. Hue' janchity mdunipy ajcxy jadu'n nej Dios tzocy. ³ Jecy'ajty co

anajty ca'ni mnejhuigixy Jesucristo ytiy'ajt, jibic-huinma'n anajty ajcxy myajtumyb ma mdzinaayin mjogy'ajtin, jadu'n nej jäy ajcxy jacjadyii huidibi ca'ni nejhuiygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'üccixy vino, huin'it anajty ooy ajcxy ymügyii. Ooy anajty mnixondaaccixy coodz huididi, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴ Paady ycixpi je jäy ajcxy huidibi ca' nejhuiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi' ajcxy y'idich, chi ajcxy jibic xyñigapxcixy xyñi'ojiiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'ócüy jäy ajcxy huidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy müd Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhuingoni je xii je tiempo mina ycixaani ytigoyaani tüg'ócüy tijaty ya naax-huiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohipy ajcxy Dios. ⁸ Ooy ycopicyity co jacnaychójcigix jacnayjihuiygix nidüg nidüg. Müd co mnaychójcigixy, paady ycixpi jëbi mnayméecxigixy. ⁹ Naymi'oyjäy'ajtigix nidüg nidüg agujc jotcujc, ca' y'ametz yjotmetzity. ¹⁰ Yajtungix müd je migügtijc jadu'n nej Dios xymooygixy xpijcin nidüg nidüg. Naybubéjtigix naybudigiiygix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymooygixy xpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcip. Pen miich xypaat pujigii jëdzigii, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mguyduunipy, huin'it Dios cōmaya'n miich ajcxy, müd co ti mmijpidaaccixy Jesucristo. Je Jesucristo je' cōmay'idip etz ane'mip huinixii huin'tiempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuñich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachtunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuihuñyb jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naax-huiñ müd ymic'ajt y'oy'ajt, jëbi ajcxy jotcujc mnayjihuihuñb. ¹⁴ Pen xymi'iidigooyb xymigapxtigooyb jäy ajcxy, müd co miich ajcxy ti mmijpidaaccixy Jesucristo, jotcujc mnayjihuihuipy, müd co miich ajcxy müd je Dios yjihui'n etz Dios ymic'ajt ma mjot mhuinma'n. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich ajcxy tzaachypi mminajxyp myajnajxp müd co ti mmijpidaaccixy Jesucristo, ca' ti tzo'ydu'n mjiuhihuipy, nigí Jesucristo cōmay'idipy.

¹⁷ Ti xii tiempo tim paatni mina Dios tiyduna'n je jäy ajcxy huidibi cuydumb je' ytiy'ajt. Pen Dios ich ajt huidi nmibijcin xytiyduunim e nbaatim hueeni tzaachypi, nigí tzaachypi padaangixy ajcxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'n müd mic tzaach padaangixy je' y'alma nidzoocin, ¿ti jada ytunaangixy pinjaty jibic-huinma'n müd, pinjaty pocytungix? ¹⁹ Pen tzaachypi mminajxyp myajnajxyp ajcxy müd co Dios jadu'n chojcyp, ca' ajcxy mjotmetzcihuipy, nigí ajcxy panicxcix payöygix oyhuinma'n, nigí cixyot huinijot mijpidägiipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada ñich miich ajcxy yajñimaayb huidibi nigohuajc'ajtp je mibijcpidijc, ñich nañ jadu'n nigohuajc'ajtpyich mibijcpidijc. ñich n'ijxyich co je Cristo ayo'n tzaachypí minajxy yajñajxy. Nañ jadu'n ñich yí' nmíid'idaamybich jadüg'oc co anajty ymiñ ya naaxhuiñ míid y'oy'ajtin ymij'ajtin. ² Jada ñich miich ajcxy nyajñimaayb: yaj'ixpijccix etz cuend'ajtcix Dios yjáy agujc jotcuyc. Ca' myaj'ixpigipy ajcxy ametz jotmetz, cuend'ajtcix Dios yjáy, tim jadu'n nej jáy ycöbixy cuend'aty. Ca' meenígíxy myaj'ixpigipy ajcxy. Míid oyjot oyhuinma'ñ myaj'ixpijccixy. ³ Ca' adzip ahua'n m'ane'mipy Dios yjáy. Hue' janchtiy ijxpejt oybi yejccix. Cuydungix Dios ytiy'ajt. ⁴ Co anajty Jesucristo, je huidibi ni-huindzin'ajttaayb tüg'óciy, ñayguëxígyii ya naaxhuiñ jadüg'oc, chi cömay miich ajcxy mbidzimipy. Tim jadu'n nej jáy ajcxy co y'iyiygixy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idipy huinixii.

⁵ Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayyajmij'ájtigixipy miñ xyipy míid oyjot oy-huinma'ñ. “Dios ca' je' jáygidägy pinjaty amij agix jáy'ájtigixy. Dios ypubejtyp míid y'oyjot pinjaty yung naxy yjot yhuinma'ñ míid.” ⁶ Mgapxcöbigipy ajcxy tiydudägy Dios, je mij'ane'mbi, chi Dios xycömayipy mina anajty. ⁷ Mibijctzougix Dios míid tüg'óciy tijaty jotmay ajcxy míid'ajtyp, chi jëbi Dios xypubedipy xypudigihuipy ajcxy.

⁸ Huijycujc m'idipy ajcxy. Níxi' m'idipy ajcxy. Com je mujcu' huidibi xymíidzip'ajtim, ooy je' xy'ix'ijxim xypa'ijxim. Hue' xyajhuinma'ñyidigoyaanim, tim jadu'n nej je caa co ixtay ti chüdzaamyb. ⁹ Huindina' jijptina' ajcxy je mujcu'. Yí jacjadyii jáy huidibi mijpidaaccixy Jesucristo, nañ yminajxcixyp yajñajxcixyp tzaachypí nañ jadu'n. ¹⁰ Co anajty ajcxy hueeni tzaachypí ti m'ocyajnaxy, huin'it Dios xyaj'oyíyipy ajcxy yí mjet yí mhuinma'ñ, xyajmibigip ajcxy yí ytiy'ajt, xyajjotmicipigip ajcxy. Com Dios yí je' huidibi may'ajt ti tuñ mijcajee míid nidüg'óciy jáy ajcxy. Yí je' huidibi ti yaj'oyíy nej jëbi cömay huinixii n'ijtim míid Jesucristo jibby tzajpjoty. ¹¹ Huen Dios y'oy'ajtin etz ymij'ajtin idipy huinixii.

Capxpooxín yajñajxp

¹² Jada necy nyajnigüejaxy ajcxy míid Silvano ñich ajt nmigüg huidibi ndijpyich co ooy yajmij'aty Jesucristo. Hueeni jada ayuc huidibi nyajñijayíyb, nañ ti nbidägyich necyjoty capxhuijín etz ti nbidägyich necyjoty yí Dios ytiy'ajt tudägy, nej Dios may'ajt oy'ajt tuuñ míid miich ajcxy ycixpi. Mijpidaaccix nigi Dios ytiy'ajt, ca'ydi mhuinma'ñyidigooygixy.

¹³ Je jáy huidibi ya Babilonia huidibi ajcxy yajmij'ajtcixp Jesucristo, je jáy ajcxy huidibi Dios ti huin'ixy, xyajnigüejaxp ajcxy capxpooxín. Nañ jadu'n Marcos ñich nmigüg, je huidibi njihuíybich nej jihuíy ngi'm'ung'adyiijich xyajnigüejaxp capxpooxín nañ jadu'n.

¹⁴ Naygapxpóocxigix xíc xon nidüg nidüg miñ xyipy. Je' je' je tiy'ajt co mnaychójcigixy mnayjihuíyigixy miñ xyipy.

Jotcuyc mnayjihuíhuíyb ajcxy nidüg'óciy huidib yajmij'ajtp Jesucristo. Amén.

2 PEDRO

Yi Mimetzpí Necy Huidibi San Pedro Yajnigujx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapx-huäcxpyich yi' y'ayuc. Cham hich miich ajcxy jada necy nyajnijayiygixy huidibi ajcxy ti mbaatcixy mibijcin janch oybi, tim jadu'n nej hich ajcxy ti nbáatcixyich mibijcin janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ muid hich ajt nidüg'óciy. ² Huen Dios mijmay'ajt tunipy muid miich ajcxy, etz jotcuyc'ajtin xymöhuipy mijcajee, muid co tiy'ajt ti mbaatcixy ma Dios etz ma je Jesús hich ajt nHuindzin.

Je mibijcpidijc chinaayin jugy'ajtin

³ Dios muid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun muid hich ajt ycixpi co ti xyajnejhuüyim Jesucristo y'ayuc ytiy'ajt. Je Jesucristo ti xyhuin'ijxim jigix jëbi nmuid'ajtim yi' ymij'ajtin y'oy'ajtin, etz jigix jëbi nduunim oyyäy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jëbi miich ajcxy mbaatcixy Dios yjihuñ ymic'ajt huidibi xyajtzinaaygixy muid huadz jot huinma'ñ, etz jigix jëbi muid jada ycixpi tübi xyaj'ahuanüyim, miich ajcxy mijpyöyduutcixy je jibicpi huidibi naaxhuiñyäy ajcxy ñijot'ajtcixyp. ⁵⁻⁷ Com Dios muid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcin mjacyajmijtiğiyyigixipy tudägy'ajtin; e muid mdudägy'ajtin mja-cyajmijtiğiyyigixipy ajcxy Dios y'ixpijin; e muid je Dios y'ixpijin mjacyajmijtiğiyyigixipy yi' Dios yjihuñ ymic'ajt ma ajcxy mjot mhuinma'ñ huidibi muid mmimadägiipy ajcxy yi' jibicjot jibic-huinma'ñ; e muid je mic'ajt ma ajcxy mjot mhuinma'ñ jacyajmijtiğihiipy ajcxy mecxtujcin; e muid je mecxtujcin mnejhuüyigixipy nej jëb huaad myajmij'ajtcixy etz mdzigüygixy Dios; e muid je mecxtujcin mjacyajmijtiğiyyigixipy je tzojcin je jihuüyin muid migügtijc; e nañ mijtiğihiipy nañ jadu'n je mibijcin nej jëb huaad Dios myajmij'ajtcixy etz nej jëb huaad cixyot huinijot mjacyajtungixy oyyäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijiy ymayiy, yi' mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy hich ajt nHuindzin Jesucristo, ti mnejhuüyigixy yi' y'ayuc ytiy'ajt. ⁹ Pin jada ca' capxymidooy tüg'óciy jada yaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydgoy co Jesucristo ti yajpocyñihuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuühiipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigiy ma miich ajcxy mjugy'ajtin. E pen mdumyb ajcxy jadu'n, nimina mgapocycägiipy. ¹¹ E jadu'n miich ajcxy myajmöhüipy tiydudägy tigiydac mijpi ma hich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹² Paady ycixp hich miich ajcxy jatyimy yajjäymejtzcoodaangixy jada tiy'ajt. Oy miich ajcxy jada tiy'ajt mjajajtcixy mjanejhuüyigixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham muid. ¹³ Minaambich co yjanchity nami njactzinaayñich co hich miich ajcxy nmöhuipy capxhuijin. ¹⁴ Hich ajt nHuindzin Jesucristo ti xyajnejhuüyich co tzojc n'ixmadziipyich jada njugy'ajtin (n'ögibich). ¹⁵ Paady

ycixp naymic'ixyijich mictägy ma miich ajcxy co ngapxhuijcixy jigix co anajty n'ögyich mjäymetziyb ajcxy tüg'óciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpiy je tiy'ajt maabi nHuindzin Jesucristo, jadu'n nej Dios ymij'ajt müdity, e jadu'n nej je' yhuimbida'n jadüg'oc ya naaxhuiñ. E ca' ich ajcxy nyaj'ixpiy nigoo'ayuc anii'ayuc huidibi ci'm ti ngojyich ti nmacxyich. Müd ich ngi'mhuin ti n'ijxcixyich je Huindzin Jesús ymij'ajtin. ¹⁷ N'ijx ich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: “Jada je' ich n'ung huidibi ooy ndzocyich njihuñyich, e ooy jotcuyc nayjihuñyijich müd yi' ycixpi.” ¹⁸ Hich ajcxy nañ jadu'n ci'm ti nmidóogixyich je ayuc huidibi anajty tzomb tzajpjoty. Jim ich ajcxy anajty quipxyi müd je Huindzin Jesús ma je amay gop.

¹⁹ Nañ jadu'n nmüd'ajtim je ayuc jac'oybi jactiyybi. Je' je' je tiy'ajt je ayuc huidibi ajcxy yjay je Dios y'ayucnajtzcaxiyybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jin tixcp agootztuum etz jadu'n nipaady nej je xii co yximiydäy, etz jadu'n nipaady nej je mijmadza' jayhuixtucpi co ypidziy. Jada tiy'ajt xycodixcip ajcxy mjot mhuinma'n. ²⁰ Cuendtungix miich ajcxy jada: tüg'óciy je tiy'ajt, huidibi Dios ytiy'ajtmüdpie yejc huidibi ijtp jaybety ma Dios ylibro, ca' huaad pin yajniğejip müd yci'mhuinma'n. ²¹ Com je Dios y'ayucnajtzcaxiyybi camina je' ajcxy ayuccapxhuäcxy müd yci'mdzojcin yci'mhuinma'n. Dios anajty ajcxy huin'ixyip jebi ayuccapxhuäcxy müd Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxyp.

2

Yi' ajcxy huidibi yaj'ixpijcp anii

¹ Per nañ ji anajty nañ jadu'n ayucnajtzcaxiyybi huidibi anajty ajcxy anidaacp ma je Israel jäy. E nañ jadu'n yji'adipy ayuccapxhuäcxi huidibi anii yaj'ixpiğipy ma miich ajcxy. Je' ajcxy ayüch ameech yaj'ixpiğipy yci'm'ayuc yci'mhuinma'n huidibi ajcxy yajhuinma'nydigooyipy je mibijcpidijc. Ymina'n ajcxy co ca' yjanchity je Huindzin Jesús y'ayuc, je huidibi yajnidzooc ajt n'alma, e jadu'n ci'm ñay'ayo'nmóoyigixy müd Dios mic'amy. ² Mayjäy ooy panicxa'n je jibicpi huidibi ajcxy ytungixyp, e müd je' ajcxy ycixpi yajniğapxiy yajnimiydägiy ajcxy jibic je huidibi ajcxy cuydumb je tiyybi ayuc, je Jesucristo y'ayuc oybi. ³ Müd co anajty tzach'adzojccixy meen, chi anajty xyhuimbijccixy xyhuimmeetzcixy müd ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidzooy. Ti yjejni maabi ajcxy ypocyca'ni ma Dios. Dios tzaachytunib ajcxy müd ypocy ycixpi.

⁴ Dios ca' je' huinmecxxy je ángeles ajcxy huidibi tundigooygixp. Hue' janchtiy ycötijnajxtaayb ayoodactuuyb etz yajhui'my agootztuuyb, cadeniñy y'ijtcixy cuend'aty, xti cooni anajty paady xii tiempo co anajty yajtiyduna'n naaxhuiñyjäy müd ypocy ycixpi. ⁵ Nañ ni ca' Dios huinmecxxy je naaxhuiñyjäy huidibi tundigooy jecy'ajty. Chi quejxy ayo'nduu etz mijniğom ma je jibicjäydijc. Jëyi yajtzoocy je Noé huidibi capxhuäcx je tiy'ajt. Quipxy müd Noé yajtzoocy jahuixtuc y'amigügtijc. ⁶ Dios nañ jadu'n tzaachytuñ müd ypocy ycixpi etz yajhuindigoy müd jin metz cajp, Sodoma etz Gomorra, xti cooni yajhui'my accuyjam jigix y'idipy je ijxpejt ma je jibicjäydijc huidibi ajcxy jac'axam jactzinähuam jacjugy'adam. ⁷ Dios yajtzooc je Lot, hue' je' anajty janch ooyäy, e janch ymüd anajty jotmay co anajty je jibicjäydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jäy ooyäybi huidibi anajty tzinaayb quipxyi müd je jibicjäydijc, ni ca' anajty yjotcuyc'aty co anajty ixymidoy nej anajty ytundigooygixy je jäy ajcxy ca'pi ytudägyity. ⁹ Dios müd mic'ajt jebi nihua'n yajtzögy pinjaty mibijccixp

cixyjot huinijot co je mujcu' yjot'íjxigixy huinma'n'íjxigixy. Nañ jadu'n Dios mic'ajt miidity jigix jëbi yaj'íjtcixy je jibicjädijc miid tzaachypi ayo'n, huidibi ymöhuamy co anajty naaxhuiñjây tiyduñ miid ypocy ycixpi.

¹⁰ Dios ymiid mic'ajt jëbi tzaachytunipy pinjaty tumb jibic-huinma'n nej ñinícx nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuiyíi. Ytumb ajcxy yci'mjot yci'mhuinma'n. Ni ycatzigíygixy co oyñinej ajcxy ni'ojíygixy pinjaty mic'ajt miid ma Dios ytung. ¹¹ Oy je ángeles ajcxy miidity mijcötujcin etz ane'mín, ca'p je' ajcxy yjot yhuinma'n miidity nicxy ni'ojíygixy ma Dios yhuinduu pinjaty mic'ajt miid ma Dios ytung.

¹² Per jadayaab jibicjädijc ajcxy jadu'n ajcxy yí' nej iyujc, ca' yhuinma'n; nigoob ytimyhuidity etz yma'xun'ajtcixy jigix jây ymadzíyb etz yaj'ögíyb. Ñixiicpy yajxiicpy ajcxy yí' huidib ca' huinjihui'y. Per nañ tim jadu'n ajcxy y'ögípy nej iyujc y'ögy ytigoy.

¹³ Cobadihuaangixy jadu'n nej ti ytundigooygixy. Hue' nayjihuiygixy capín yjadu'nity, yxondaaccixy tûg jaxícyjaty. Jadayaab jây ajcxy pocy ypa'tcípy ajcxy yí' chinaaygixy yjugy'ajtcixy. Tûg tzo'ydu'n co ajcxy nañ jadu'n xymijyöybejtcixy ma m'amugíygixy.

¹⁴ Co ajcxy huindíxcixy töxyjädijc, chi ajcxy ooy nijot'ajtcixy co miid tundigoya'n. Ca'p ajcxy chíjpigixy y'anucíygixy miid pocytuní. Yajtundigooygixy pinjaty amútzip ma mibíjcin, ooy ajcxy yhuijty ycuicity ycohuinma'nity ma meen'adzoogí. Dios yajtigoyíib ajcxy y'alma. ¹⁵ Tigoyjây yí' ajcxy, je' co ti ñidigajtcixy ti ytüdigajtcixy ma je tíybí je janchypi tiy'ajt. Je' ajcxy ypanícx ypayöyp je profeta Balaam y'íjxpejt, je Beor y'ung, co ooy ymeen'ybada'n anajty miid yjibic-huinma'n. ¹⁶ Chi Balaam oy yaj'ojyíi ypocy tûg töxyburro, ycapxy jadu'n nej tûg jây, e jadu'n je' yajhuäcxíjpy je profeta Balaam miid je' ylocíhuinma'n.

¹⁷ Com jada jây ajcxy ca' paníxcixy je janchypi tiy'ajt, paady ycixp jadu'n ajcxy nipaady nej tûg ñipozojut ca'pí ñíi miidity, etz jadu'n ajcxy nipaady nej joc huidibi poj yajyöyí (ca' ytu'y). Dios möhuiib ajcxy tzaachypi miid ypocy ycixpi, idam ajcxy agootztuuyb huiníxi huinitíempo. ¹⁸ Com ycapxyp ajcxy ayuc huidibi ca' choubaady. E miid je jibic-huinma'n ycixpi huidibi ajcxy chachnijot'ajtpy yajtundigooygixy pinjaty tíibi choongixy ma je huidibi ajcxy tzinaayb miid jibic-huinma'n. ¹⁹ Yí' ajcxy yaj'íxpíjcp je mayjây co jëbi tungixy huentim ti huidibi ajcxy ñijot'ajtpy. Per yí' ajcxy huidib jibic-huinma'n yaj'íxpíjcp, ci'm ajcxy ñay'íjtigixy pocypa'tcípy, je pocy tzach'ane'mb ajcxy yjot yhuinma'n, ixti jadu'n nipaady nej jihuíy ajcxy ane'my y'ity. ²⁰ Pinjaty ti ymibíjccixy ti ñejhuíygixy je Huindzin Jesucristo ytiy'ajt huidibi yajnídzoocp ajcxy y'alma, e jadu'n ti yjihuäccixy ma je naaxhuiñjây yjibictzinaayín yjibicjugy'ajtin, pen jadüg'oc anajty y'ayöyíyñip ma je jibicpi, e je jibicpi ymímadägyíi ajcxy, o'ctiy anajty ñígi yhui'mgixy ca'ydi nej je jayíjp'atypi. ²¹ Nígi oy co ixíipy je' ajcxy ca' ytimnejhuiygixy je janchypi tiy'ajt. Com ti ocnejhuiygixyp, e chi jada' y'ixtigíhuäccixy ma je huätzpi Dios ycötujcin huätzpi Dios ytiy'ajt tíibi anajty y'ocjamóoyigixy. ²² Per je' yí' ajcxy ytimycuydumy nej je ayuc y'ity: "Je uc yci'm'íich ñihuimbíjtpy, e je ídzim huidibi namdziidaayb, nicxy je' yajtznip yquitníp mo'ntzjoty jadüg'oc."

3

Je Huindzin Jesús huimbidaamb ya naaxhuiñ

¹ Miich ajcxy migügtíj huidibi íich ooy ndzocyích ooy njihuíyíich, jada je' je mímetspi necy huidibi ajcxy nyajnijayíyb. Ma jada metzpi necy hue' íich ndzoga'ñích co nya-jhuinma'ñymedzip ajcxy ma Dios ytiy'ajt miid jada capxhuijín huidibi ti njaayích. ² Ti nnijayíygixy jigix m'ajihuihuiyb ajcxy je ayuc huidibi ajcxy pa'tcípy'aty ñajtzcapxíy je Dios y'ayucnajtzcapxíybí ajcxy huidibi huädz yhuinma'n anajty ymiid. Nañ ajihuíyigix

je Huindzin Jesucristo je' y'ane'min huidibi yajnīdzoocp ajt n'alma, je ane'min huidibi apóstoltijc miich ajcxy xyajñimaayb.

³ Nejhuīgixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jāy ajcxy huidibi nixīgip yajxīgip huidibi Dios yjē'ajtpy. Chīnaaygixy yjugy'ajtcixy anajty mīd jibic-huinma'ñ huidibi cī'm ñijot'ajtcixyp. ⁴ Chi ajcxy ymina'nip: "¿Ti co mdzachmibijccixy co Cristo yhuimbida'ñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttāy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'ñ jadüg'oc ya naaxhuiñ," jadu'n yminaangixy. ⁵ Yi' ajcxy ca' huinjihuīhuaangixy cuendtunaangixy co mīd Dios y'ayuc yī tzajp jī'ajtp anajty yī' tzachjecyip, e mīd Dios y'ane'min huin'it je naax oy yguēxīg y huidibi ijtp anajty ñijoty. ⁶ Nañ jadu'n mīd Dios y'ayuc je jecy'ajtpy naaxhuiñyāj y'ayo'nbaty, ñijīcxtay nidüg'óciy e ytigoyday ñijoty. ⁷ Per Dios mīd yī' y'ayuc yaj'ijtpy jada naaxhuiñybi etz tzajp huidibi cham jī'ajtp ixti coon yajtigoydāhuipy mīd jīn. Je jīn huin'it je' nōctāhua'ñ co anajty yhuaad'ajtni ma Dios tiyduna'ñ je camadacpidijc je jibicjāydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huidibi ooy ndzocy njihuīyich, ca' mjāy digooygixy co ma yī Huindzin Dios, tüg xī jadu'n yī' nej tüg mīl jīmijt, e tüg mīl jīmijt jadu'n yī' nej tüg xī. ⁹ Ca' mīnaanim co yī Dios yajhuācxibaamyñi yī' mīna cuyduna'ñ huidibi yī' ti ahuanīy, jadu'n nej nijējity jāy a'ixīgixy. Dios yajtumy mecxtujcīn mīd miich ajcxy, com hue' yī' tzocy co nī tüg jāy ayo'n paadipy. Yi' chojcpy co nidüg'óciy jāy huen jothuimbijtcixy etz ixmajtzcixy pocytunī.

¹⁰ Co anajty je Huindzin Jesús ymīñ jadüg'oc ya naaxhuiñybi chaachytunipy je' tüg'óciy jibicjāydijc, hue' je' ytunīyb yjadīyb ma anajty ca' pīn jīp'ixy, jadu'n nej tüg meetzpi ymīñ coodz co meedza'ñ tijaty. Huin'it je tzajp yhuindigoydāhuipy mīd tüg ne'mīn jīdijtin oy chīgīyñip. E tüg'óciy huidibi mīd ndzīnaayīm njugy'ajtm toydāhuip yī' mīd jīn, yī naax toydāhuip yī', etz tijaty yajpatp ya naaxhuiñ toydāhuip nañ jadu'n.

¹¹ Com tüg'óciy tijaty huidibi jī'ajtp yhuindigoydāhua'ñ mīd jīn, paady ycixpi ñigī copīcy miich ajcxy co mdzīnaaygixp tudāgy e myajmīj'ajtcixyp Dios. ¹² Ahuījxcix ajcxy je xī tzuu mīna Dios anajty yajhuaad'aty co yajhuindigoya'ñ je naaxhuiñybi. Naymic'ījxīgix co tzojc ymīnipy yī jadu'mbi xī tzuu. Co yhuaad'ajtnip huin'it xī, je tzajp yhuindigoydāhuip mīd jīn; je xī po', je poj p xemembi, je tuu enee jadu'ñ yī yticxtāhuipy yjīydāhuipy jīnjoty. ¹³ Per iich ajt n'ahuijxim je jemybi tzajp jemybi naax huidibi Dios ti xyaj'ahuanīyīm, tüg tzīnaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huidibi iich ooy ndzocyich njihuīyich, namī m'ahuijxyp miich ajcxy co Dios yajhuindigoyaanip jada naaxhuiñ, naymic'ījxīgix ma tüg'óciy ajcxy yī mdzīnaayīm co mguydunipy ajcxy Dios ytiy'ajt jīgix ajcxy Dios xy-paadipy, ca' ajcxy ti tzip ti gapxy, nī ti jibicpi, e nī ti pocy, ac huādz jot huādz huinma'ñ anajty mīd'ajtcixy. ¹⁵ Cuenditungix je mecxtujcīn huidibi iich ajt nHuindzin Jesucristo yajtumy mīd iich ajt jīgix jēbi xyajnīdzoocīm ajt n'alma. Nañ jadu'n yī', iich ajt nmīgüg Pablo huidibi ooy ndzojcīm, ti miich ajcxy xyñijayīgixy, jadu'n nej xpijcin Dios ti ymōyī ma yī' y'ayuc. ¹⁶ Ma tüg'óciy Pablo ñecy tībī xyajnigūejxcixy, jada tiy'ajt ti xyajmīdmīydaaccixy. Nijējity Pablo ñecy ooy chachchiphuinjihuīyñity, e nijējity jāy ajcxy tīgach ajcxy huinjihuīy Pablo y'ayuc, ca' ajcxy huinjihuīy nej Pablo yjamīna'na'ñ. Huingjaty ajcxy ñigūej Pablo y'ayuc, e cī'm ñayyajhuinma'ñ ydigōoyīgixy.

¹⁷ Paady ycixp miich ajcxy migügtijc huidibi ooy ndzocy njihuīyich, miich mnejhuīydaaygix jada tiy'ajt. Nayguend'ājtīgix ca'ydi jibicjāydijc mīd y'anī xyajmīdigajtcixy xyajtūdigajtcixy, e ca'ydi m'ixtigīhuāccixy ma ajcxy mmibijcin jadu'n nej tiydudāgy ti mmibijccixy. ¹⁸ Huen iich ajt nHuindzin Jesucristo huidibi yajnīdzoocp ajt n'alma ñigī may'ajt oy'ajt tunipy mīd miich ajcxy, e nañ ñigī yujcpedipy ajcxy yī m'ixpijcin ma yī' ytiy'ajt. Huen Jesucristo cōmay y'idipy etz mī'idipy oy'ajtin mī'ajtin

jadachambi xii tiempo etz jadu'n nej xii tiempo miimb cidacp. Jadu'n ngapxycíxyich.
Amén.

1 SAN JUAN

Yi Jayjipi Necy Huidibi San Juan Yajniguejxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ijxyich miiid ngi'mhuiinich, jadu'n nej nhuindicxyich yi' ci'm, e nañ jadu'n nej nnidoñich miiid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'ñ huidibi ca' cixa'ñ tigoya'ñ niminaabi. ² Ti ñayguëxigyii ya naaxhuiñ je Dios y'ung huidibi ymiiid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajnimaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiby ijtp ma Dios Teedy, nayguëxici je' ma ich ajcxy. ³ Je huidibi ich ajcxy n'ijxich nmidoahuich, cham miich ajcxy nyajnimaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijäyiy ajcxy jigix ajcxy jotcuyc'ajtin mbattáaygixipy miiid jada ayuc tiy'ajt.

Dios yi' je' je tücxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham ich miich ajcxy nyajnimaaygixy. Dios huädz ytiy'ajt miiidity, ca' ma Dios aniidägy. Jadu'n Dios nipaady nej tüg jiin ytiicxy ma tüg it e ni ca' ni mina ypich. ⁶ Co nminaanim co Dios ajt miiid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuüy ndzinaayim agootztuum. Nigoo n'indaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt miiidity, jadu'n nipaty nej jihuüy ndzinaayim ma jiin ytiicxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy miiid ich ajt nbocy ycixpi.

⁸ Co ixypy nminaanim co ca' nbocytuunim, nigooob nayhuin'ünim ci'm, e ca' jadu'n Dios ytiy'ajt yajpaady ma ich ajt njot nhuinma'ñ. ⁹ Pen ngapxypidzimim ajt nbocy ma Dios, yi' ñidinaayb yi' y'ayuc huidibi ti xyajnimaayim co ymecxamy ajt nbocy, e nañ tudägy ytuñ miiid ich ajt ycixpi. Dios xyhuinmeecxim ajt nbocy etz xyajhuaatzim njot nhuinma'ñ jëbi n'ixmajzim jibic-huinma'ñ. ¹⁰ Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbjiyim cixyjot huinijot yi' ytiy'ajt.

2

Cristo, ich ajt nhuingapxi ma Dios

¹ Miich ajcxy migügtijc huidibi ooy ndzocy njihuüyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi miiid ypocy ycixpi. Jesucristo yi'je' huingapxp ma Dios Teedy miiid ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy miiid ich ajt nbocy ycixpi, paady ycixp jëbi capx'oyiy ma Dios miiid ich ajt ycixpi e xycapx'oyiyim ich ajt nbocy etz nañ capx'oyiyip tüg'óciy naaxhuiñy jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuüyim tiydudägy jadu'n nej Dios may'ajt oy'ajt ti tuñ miiid ich ajt ycixpi. ⁴ Co ixypy pinjaty ymina'ñ co ñejhuüy Jesucristo ytiy'ajt e ca' cuychinaayi yi' ytiy'ajt hue' yi' tzach anidaacpi, e ca' miiidity Dios ytiy'ajt. ⁵ Yi' jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt,

janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuiyim co nyajmij'ajtim Dios. ⁶ Yi jäy ajcxy pinjaty minamb co ymüid Jesucristo y'ayuc ytiy'ajt ma je' y'ay yjot, copicy ajcxy chinaaygixipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huidibi ooy ndzocy njihuïyich, ca' nmînaanîm jemybi tiy'ajt ajcxy nyajnimähuamy ma jada necy. Je' jada je tiy'ajt huidibi jecy'ajty ti mnejhuïygixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimaaygixyp ma jada necy. Jada je'je tiy'ajt huidibi Jesucristo ymüid ma yjot yhuinma'ñ etz nañ ïch ajt nmüid ma ajt njot nhuinma'ñ. Yi jecyip ayuc huidibi ca' ytiy'ajtiy, ti yi' ñaxy e cham Dios ytiy'ajt tiydudägy nyajtuunim, jadu'n nej jihuïy je coodzpi ti ñaxy e cham ti yximïy.

⁹ Yi jäy ajcxy huidibi minam co Dios y'ayuc ytiy'ajt ajcxy cuyduuni e ca' ixáanigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbîdzimy jadu'n nej jihuïy agootztuuy ijtciy. ¹⁰ Yi jäy ajcxy pinjaty tzojcp jihuïyb ymigügtijc hue' yi' yajpaatcixy müid Dios ytiy'ajt ma ajcxy yjot yhuinma'ñ, jadu'n nipaady nej jihuïy y'ijtcixy ma xï ytiicxy, ca' ajcxy ñîdigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuïy agootztuuby y'ijtcixy, ca' ajcxy chinaaygixy nej Dios ytiy'ajt yja'ané'migixy, ca' ajcxy nejhuiygixy huidibi tiy'ajt jëbi yajtungixy, com jibic-huinma'ñ chachtuumyb ajcxy huidibi ca' Dios tiy'ajt'adyii.

¹² Miich ajcxy migügtijc huidibi ooy ndzocy njihuïyich ajcxy jadu'n nej ixipy ngi'm'ung ngi'm'anäcich, com Dios ti miich ajcxy mbocy xyhuinmecxtayî co Jesucristo y'o'cy müid ajcxy mbocy ycixpi, paady ycixp cham nnijayïygixy. ¹³ Cham nnijayïygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayïygixy miich ajcxy anäctijc, com ti mmimadaaccixy je ca'oybi.

Cham nnijayïygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayïygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayïygixy miich ajcxy anäctijc, com mic mjot mhuinma'ñ müidity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi ca'oybi.

¹⁵ Migügtijc, ca' anaxy m'adzôjccixip yi huidibi müid ndzînaayim ya naaxhuiñ. Yi jäy ajcxy huidibi adzojctaayb anaxy yi huidi müid ndzînaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzôjctähuipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huidibi amij agix müid ndzachnayjihuïyim. Com yi jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'ñ huidijaty yi huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anï

¹⁸ Miich ajcxy migügtijc huidibi ooy ndzocy njihuïyich nej ixipy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuïygixy co miinaam jäy ajcxy huidibi nayyajnaxaanip nej Cristo' e ca' yjanchity. Müid co cham ji mayjäy ajcxy huidibi nayyajnaxip jadu'n nej Cristo, paady nejhuiyim co tim cijxnip yi tiempo müid ïch naaxhuiñyjäy ajt ycixpi. ¹⁹ Yi jäy ajcxy huidibi nayyajnaxaanip jadu'n ixipy nej Cristo, naybijc-huäcxaanip yi' ajcxy müid ïch ajt, ca' anajty ajcxy ytügiy yi' ajcxy yhuinma'ñ müid ïch ajt nhuinma'ñ, tûgmucy ixipy ajt xymüid'ijtim. Ji jadu'n ñiguëxy co ca' ytügiy yhuinma'ñ müid ïch ajt nhuinma'ñ co ti ajcxy xypuhuäctutim.

²⁰ Ti miich ajcxy xy'adig'iy xyjottig'iy Dios yjihu'iñ ymic'ajt, paady miich ajcxy mhuinjihu'iñ tüg'óciy Dios y'ayuc ytiy'ajt. ²¹ Ca' nminaanim paady miich ajcxy nijayigixy co ca' mhuinjihu'iñyigixy Dios ytiy'ajt. Paady nnijayigixy miich ajcxy jigix mnejhu'iñyigixyip Dios ytiy'ajt etz mnejhu'iñyigixyip co yi jäy ajcxy huidibi'indaacp, ca' yi' ajcxy Dios ytiy'ajt miidity.

²² Yi' je' indacp huidibi' minamb co Jesús ca' yi' yjējity je Cristo huidibi' Dios yquejx. Yi' indacp je' midzip'ajtp Jesucristo etz ca' mibicy Dios Teedy etz nañ ca' mibijci Dios y'ung.

²³ Je jäy ajcxy huidibi' indacp minam co Jesús ca' yjējity je Cristo, e nañ ca' ajcxy miidity Dios Teedy ytiy'ajt. Yi' jäy ajcxy huidibi' minam co Jesús yjējity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi' miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydúngixyipy e ca' mjäy digóoygixipy. Pen mmi'ijtcixp yi' ayuc huidibi' Dios yjäy oga'n ajcxy xyaj'ixpijc, huin'it jēbi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuan'iyim co xyajtzinähuaanim ajt n'alma huinixii huin'itempo.

²⁶ Jada tiy'ajt ajcxy nyajnijay'iyb jigix ca' mmijpidáaccixipy yi' ajcxy y'ayuc huidibi' xyajhuinma'ñy digoyaam ajcxy. ²⁷ Yi' Dios yjihu'iñ ymic'ajt huidibi' ti xy'adig'iygixy ti xyjottig'iygixy ijt'itib yi' ma miich ajcxy mjot mhuinma'ñ. Paady ycixp ca' myajmayjajtcixy pin xyaj'ixpigip ajcxy com je Espíritu Santo xyaj'ixpigip ajcxy. Je Espíritu Santo xyajni'ixiydaayb ajcxy tüg'óciy Dios ytiy'ajt, tiydudägy yi', ca' yi' y'anijity. E jadu'n nej je' xyajni'ixiygixy, jadu'n mguydunipy ajcxy. Mi'ijtcix Dios yjihu'iñ ymic'ajt ma mjot mhuinma'ñ ajcxy.

²⁸ Miich ajcxy migügtijc, mi'idipy ajcxy Jesucristo ytiy'ajt ma mjot mhuinma'ñ jigix co ñayyajnigüexig'iyb Jesucristo ya naaxhuiñ jadüg'oc, huin'it jotcuyc ajt nnayjihuiy'iyim etz ni ca' jibic nayjihuiy'iyim co anajty xyñimiinim. ²⁹ Ti mnejhu'iñyigixy co yi' Jesucristo tiydudägy ytuñ, e ti mnejhu'iñyigixy nañ jadu'n co tüg'óciy yi' jäy huidibi' tiydudägy tumb, yi' je' ajcxy Dios y'ung'ajtip.

3

Dios #ch ajt xy'ung'ajtim

¹ Jihu'iñybiccix tüg'óciy je mijpi may'ajt Dios Teedy ti tuñ miid #ch'ajt ycixpi jigix jēbi naydijim Dios y'ung. Yi' naaxhuiñy jäy ajcxy huidibi' ca' mijpidaaccixy Jesucristo ca' ajcxy nejhu'iñyigixy huinjihu'iñyigixy Jesucristo ytiy'ajt, paady ycixp ca' ajcxy nejhu'iñ huinjihu'iñ co Dios xy'ung'ajtim. ² Miich ajcxy migügtijc huidibi' ooy ndzocy njihu'iñyich, jadachambi Dios #ch ajt xy'ung'ajtim. Jadachambi ca'p y'ocnigüexig'iyñi nej #ch ajt jiini n'idaanim. Co anajty Jesucristo ymiin jadüg'oc ya naaxhuiñ, huin'it nguipxyjatyt'iyim miid je', com n'ixaanim ajt Jesucristo jadu'n nej je' yajpaady. ³ Tüg'óciy jäy ajcxy huidibi' jipp'ijxp co Jesucristo ymiina'ñ jadüg'oc ya naaxhuiñ, copicy yajhuädzipy ajcxy yjot yhuinma'ñ. Huen mi'ijtcixy oyjot oyhuinma'ñ jadu'n nej Jesucristo mi'ity oyjot oyhuinma'ñ.

⁴ Tüg'óciy jäy ajcxy huidibi' pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵ E mnejhu'iñy miich ajcxy co yi' Jesucristo ti ñayguexig'iyi ya naaxhuiñ jigix jēbi xyajpocyñihuaatzim. Jesucristo ca' anajty ti pocy miidity, ca' anajty ma ti ytundigoy. ⁶ Tüg'óciy jäy ajcxy huidibi' cuydundähuam Jesucristo ytiy'ajt, ca' huaad pocytuñ. Yi' jäy ajcxy huidijaty pocytundiib, ca'ni ixy ajcxy yi' Jesucristo, nañ ca'ni ajcxy huinjihu'iñy yi' ytiy'ajt. ⁷ Miich ajcxy migügtijc huidibi' ooy ndzocy njihu'iñyich jadu'n nej ngi'm'ung ngi'm'anäcich, ix ni pin xycahuin'ingix. Yi' jäy ajcxy huidibi' oyjot oyhuinma'ñ yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸ Yi' jäy ajcxy huidibi' tzachpocytundiibni, yi' ajcxy mujcu' yjäy'ajtip. Com jadu'n nej chondacy je

naaxhuiñybi oga'n yi mujcu' jëni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'ñ yajcödigoyaani.

⁹ Yi jäy huidibi Dios ajcxy ti ymöyïi jemybi jot jemybi huinma'ñ, ca' ajcxy ypocytundiïy com je'co tú'ciy ajcxy yjot yhuinma'ñ mïidity, jadu'n nej anajty Jesucristo yjot yhuinma'ñ mïidity, ca' huaad ajcxy ypocytundiïy com Dios ti ymöyïi ajcxy jemybi jot jemybi huinma'ñ. ¹⁰ Paady ycixp yñiguëxïgy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'ñ ymigügtijc, etz ca' ajcxy tzocy jihuïy ymigügtijc, hue' ca' ajcxy Dios ymöyïi jemybi jot jemybi huinma'ñ, mujcu' ajcxy y'ung'ajtip.

Naychojcm nayjihuiïyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcm nayjihuiïyim nidüg nidüg. ¹² Ca' huaad jadu'n n'iditizm nej Caïn y'idïich co anajty mujcu' huinma'ñ mïidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy mdzachhuinmaay ajcxy co ca' yi naaxhuiñyäjy ajcxy xy'ixa'ñ, huidibi ajcxy ca' Dios y'ayuc mijpidaaci. ¹⁴ Com ïich ajt nnejhuiïyim co je nmigügtijc ajcxy ndzojcm njihuiïyim co n'o'cim, huin'it njugypigaanim e ndzinähaanim jiihy tzajpjoty huinixi huinïtiempo. Yi jäy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiihy tzajpjoty. ¹⁵ Huenpinjäyity huidibi ca' ymigüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuiïyim, co je' y'ögipy, ca' chinähua'ñ jiihy tzajpjoty. ¹⁶ Ya ixyipy jëbi ïich ajt ixxpejt nbijcm nej huaad migügtijc ndzojcm njihuiïyim, jadu'n nej Jesucristo ixxpejt yejcy co ñayyojxi ñaydooci co y'o'cy mïid ïich ajt nbocy ycixpi. Paady ycixp ïich ajt jëbi huaad ndzojcm njihuiïyim nmigügtijc, oy jada ndimco'ögïyim. ¹⁷ Janch pinjaty yjamïd ymadaacin, e yja'ixpy co ymigüg tigati yajmayjaty, e amij agix ñayjihuiïyii, ca' pa'ayo'n mïidity, ca' pubeda'ñ ymigüg, ca' je' anajty tzocy jihuïy ymigüg jadu'n nej Dios chogyii yjihuiïyii. ¹⁸ Miich ajcxy migügtijc huidibi ooy ndzocy njihuiïyich jadu'n nej ixyipy ngi'm'ungich, mïid oyjäy'ajtin etz mïid Dios ytiy'ajt tzoc yajxon naychojcm nayjihuiïyim miñ xyipy. Ca' nmïinaanim nigoo ngapxim nmïydaacim ahuac aguuy.

Cixyjot huinïjot naybidaacim ma Dios

¹⁹ Co nyajtuunim oyjäy'ajtin mïid ïich ajt nmigügtijc, huin'it nejhuiïyim co Dios ytiy'ajt nguyduunim e jotcuyc nayjihuiïyim co Dios n'ojadajtim. ²⁰ Co jibic njot nhuinma'ñ ajt njihuiïyim, mïid co ca' oyjäy'ajtin nduunim, jac nigï Dios jibic ñayjihuiïyii com yi' jacmijhuinma'ñ mïid, ca'ydi ïich ajt, e yi' nejhuiydaayb tüg'óciy tijaty ajt nduunim. ²¹ Miich ajcxy migügtijc huidibi ooy ndzocy njihuiïyich, co ca' ti jibicpi njihuiïyim ma ajt njot nhuinma'ñ mïid co oybi nduunim, huin'it jotcuyc ajt n'ijtim mïid Dios. ²² E huentimtiijity huidibi ïich ajt Dios nyajmibijctzoohuim, yi' xymooyim mïid co yi' y'ayuc nguyduunim, e nduunim je huidibi yi' yjäygïdacpy. ²³ Dios jada ti xyajnajtz'ane'mïyim co tzoc mibijcm mijpidaacim yi' y'ung Jesús etz tzoc naychojcm nayjihuiïyim miñ xyipy, jadu'n yi' ti xyajnajtz'ane'mïyim. ²⁴ Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiïyim co Jesucristo ytiy'ajt yajpaady ma ïich ajt mïid co je Dios yjihui'ñ ymic'ajt ti xy'adigïyim xyjottigïyim.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy migügtijc huidibi ooy ndzocy njihuiïyich, ca' ajcxy mmibijctähuipy tüg'óciy jäy huidibi Dios y'ayuc capxhuäcxip. Mïdo'mbijccixy jayijp peni janch ajcxy mïidity Dios

yjihui'ñ ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxi yi' ajcxy e ca' yjanchity. ² Jada je' je tiy'ajt ma huaad mjihui'ñybijccixy pen janch müdity ajcxy Dios yjihui'ñ ymic'ajt, yi' ajcxy huidibi Dios y'ayuccapxhuäcxi: tüg'óciy jäy huidibi capxhuäcxi co Jesucristo yma'xung'ajty ya naaxhuiñ müd ñinícx, Dios yi' ytiy'ajt ymüid. ³ E tüg'óciy jäy ajcxy huidibi ca' ñigapxpety ajcxy co Jesucristo chinäy ya naaxhuiñ müd ñinícx, ca' yi' Dios ytiy'ajt müdity. Ti müich ajcxy ayuc midoogixy oga'n co miinaam yi naaxhuiñyjäy ajcxy müd je mujcu' yjihui'ñ ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' ñigapxpejtcixy co Jesucristo yma'xung'ajty ya naaxhuiñ müd ñinícx.

⁴ Migügtijc huidibi Dios yjihui'ñ ymic'ajt ti xy'adigüygixy ti xyjottigüygixy, e ti müich ajcxy mmimadaaccixy yi huidibi ajcxy ñigapxpejtp co Jesucristo ca' ma'xung'ajty ya naaxhuiñ müd ñinícx. Com Dios huidibi müich ajcxy xy'ane'mb, jac mij yi' ca'ydi je mujcu', paady müich ajcxy ti mmimadaaccixy je mujcu'. ⁵ Je huidi ajcxy jadu'n jaminaamb co Dios y'ayuc capxhuäcxi e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi naaxhuiñ yhuijy'ajtin ajcxy tzachcapxhuäcx, e yi naaxhuiñyjäy tzachmijpidaaccixy etz amidoo'ijti ajcxy y'ayuc. ⁶ Hich ajt tiy'ajt ti nbaatim ma Dios. Tüg'óciy jäy ajcxy huidibi Dios ytiy'ajt huinjihuüyip, y'amidoo'ijtyp ajcxy ich ajt n'ayuc. Yi jäy ajcxy huidibi ca' Dios ytiy'ajt müdity, ca' ajcxy amidoo'ijtcixy ich ajt n'ayuc, paady ycixp n'ijxcajpim je jäy ajcxy huidibi tudägyip, etz je jäy ajcxy huidibi nigoo tzach'aniidaacp.

Dios ooy xychojcm xyjihuiüym

⁷ Müich ajcxy migügtijc huidibi ooy ndzocy njihuüyich, tzoc oy yajxon naychojcm nayjihuiüym miñ xyipy. Dios ti yecy ymic'ajt ma ajt njot nhuinma'ñ jigix jëbi ajt naychojcm nayjihuiüym miñ xyipy. Tüg'óciy jäy huidibi ymigügtijc chojccixyp yjihuiüygixyp, ti Dios yjihui'ñ y'adigüygixy yjottigüygixy etz ñejhuüyip yhuinjihuüyip ajcxy Dios y'ayuc ytiy'ajt. ⁸ Pinjaty ca' ymigüg tzocy jihuüy, ca' yi' nejhuüyi huinjihuüyi Dios ytiy'ajt, com Dios tüg'óciy yi' tzojctäy. ⁹ Jada je'je tiy'ajt co Dios ajt xychojctaayim co je y'ung huidibi tügpajcpi ymüid, quejxy ya naaxhuiñ jigix ich ajt nbaatim Dios yjihui'ñ ymic'ajt müd yi' ycixpi. E Dios yjihui'ñ ymic'ajt ca' ycixa'ñ ytigoya'ñ nimina, paady ich ajt njugy'ajtin ca' ycixa'ñ ytigoya'ñ. ¹⁰ Dios ti xychojcm ti xyjihuiüym, paady quejxy y'ung ya naaxhuiñ jigix jëbi xycodinaayim ma yi Dios ycötujctac müd ich ajt nbocy ycixpi. Ca' nminaanim müd co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ müd ich ajt ycixpi.

¹¹ Müich ajcxy migügtijc huidibi ooy ndzocy njihuüyich, müd co Dios jadu'n ajt ti xychojcm ti xyjihuiüym mijcajee oga'n, paady ycixp tzoc ich ajt naychojcm nayjihuiüym miñ xyipy. ¹² Ni minaabi pin ca' ixyni Dios. Co naychojcm nayjihuiüym miñ xyipy, huin'it Dios yjihui'ñ ymic'ajt ijttiy ma ich ajt njot nhuinma'ñ. Jadu'n Dios yjihui'ñ ymic'ajt xypubejtim xypudigüym, jëbi ñigi naychojcm nayjihuiüym nidüg nidüg jadu'n nej Dios jäygidägy. ¹³ Nejhuüym ich ajt co nyajpatim ma Dios, e nañ jadu'n Dios yajpaady ma ich ajt, müd co yi' yjihui'ñ ymic'ajt ti xy'adigüym ti xyjottigüym. ¹⁴ E ich ajcxy, ti ich ajcxy yi Jesucristo n'ixyich, paady ich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnïdzöga'ñ tüg'óciy naaxhuiñyjäy co anajty Dios nbocy ajt xyajcomidoohuaanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Hich ajt nnejhuüym etz nmijpidaacim jadu'n nej Dios ajt xychojcm xyjihuiüym nidüg'óciy. Dios chojctaayb yi' nidüg'óciyi yi' jäy. Pinjaty tzojccixp jihuüygixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Müd co yajxon nmijpidaacim Dios paady jotcujc nnaxaanim ma Dios ycötujctac, mina anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi'

Jesucristo. ¹⁸ Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jëbi tzig'iñ nyajqueecim. Yi jäy ajcxy huidibi tzig'iñb etz tzo'ydum, ca' ajcxy Dios mijpidägy yajxon.

¹⁹ Com Dios jayijp ti xychojcm ti xyjihuiyim, paady ycixp tzoc ajt naychojcm nayjihuiyim nidüg nidüg etz nañ nmijpidaacim Dios. ²⁰ Yi jäy ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy aniidaacp. Com peni ca' jajtciyx nej tzójccixipy jihuihuiygixipy yi ymigügtijc huidibi ajcxy ixy'ajtpy, ca' ajcxy jadip nej mijpidaaccixipy Dios huidibi ca' ixy'ájtigixy. ²¹ E Dios iich ajt xyñajtz'ane'miiyim co pin Dios mibijcp mijpidacp, huen nañ jadu'n ymigügtijc tzocy jihuiy.

5

Yi pin huidibi ca' ixa'ñ midohua'ñ Cristo y'ayuc

¹ Tüg'óciy jäy huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiygixy je' ajcxy huidibi Dios y'ung'ajtip. ² Co ndzojcm njihuiyim huidibi Dios y'ung'ajtip, je' jada je' je iixpejt co nañ jadu'n jëbi nmijpidaacim Dios etz jëbi nguyduunim nej xyñajtz'ane'miiyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miiyim e yi' y'ayuc ca' ooy chipity co nguyduunim. ⁴ Com tüg'óciy yi jäy ajcxy huidibi Dios ti y'adigiiyi ti yjottigiiyi yjihuiñ ymic'ajt, ymihuindinaayb ajcxy yi jibic-huinma'ñ ya naaxhuiñ. Co nmibijcm Dios, huin'it jëbi mihuindinaayim yi jibic-huinma'ñ ya naaxhuiñ. ⁵ Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'ñ ya naaxhuiñ.

Je ayuc huidibi nidiy'ajt yi Dios y'ung

⁶ Yi Jesucristo je' je' je' huidibi miin ya naaxhuiñ, je' je' je' huidibi niibejt etz ñi'py teemy gujy co y'o'cy miid jäy ajcxy ypocy ycixpi. Ca' nminaanim jëyi anajty ti ñibety, hue' nañ jadu'n ti y'ögy miid ajt nbocy ycixpi. ⁷ E yi Espíritu Santo yi' tiy'ajt yejcp co Dios Jesús y'ung'adyii, com je Espíritu Santo yi' Dios ytiy'ajt ymiid. ⁸ Ji tugügnax huidibi tiy'ajt yejcp co Dios Jesús y'ung'adyii: je Espíritu Santo, je niibejtin, etz Jesús ñi'py co teemy cujy miid iich ajt nbocy ycixpi. E jadu'n nidugüig ñaybaatigixy tügnax, e tügnax ytiy'ajt yejccixy. ⁹ Mijpidaacim iich ajt jäy y'ayuc co Dios Jesús y'ung'adyii, ñigi copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'ydi jäy ajcxy. ¹⁰ Yi jäy huidibi mijpidaaccixp Dios y'ung, ymi'ijtpy ajcxy je tiy'ajt ma yjot yhuinma'ñ. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajxcixy Dios nej aniidägyin co ca' mibijccixy yi Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jëbi ajt n'alma y'ijtim huinixii huinitiempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy tigoyipy co y'ögipy.

Capxycijxin etz capxhuijin

¹³ Jadayaabi ayuc ajcxy nyajnijayiygixp ma jada necy jigix jëbi mijpidaaccixipy Dios y'ung, etz jëbi mnejhuiygixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴ Jada jotcuje'ajtin iich ajt nmiiid'ajtim co nmibijctzoohuim Dios jadu'n nej Jesucristo xyñajtz'ane'miiyim, yi' iich ajt jëbi xymidouhuim. ¹⁵ Miid co nnejhuiyim co yi' ajt xymidouhuim ma tijaty Dios nyajmibijctzouhuim, paady ycixp nejhuiyim co nmiiid'ajtim tijaty anajty ti nyajmibijctzou.

¹⁶ Co pinjaty ixy co ymīgüg ypocytuñ huiḁibi huaad jēbi Dios meecxy, huen mibijctzooyi Dios mīd yi' ycixpi, e Dios yajtzināhuiyib pen ca' anajty ooy ymijpocyity je tiibi anajty tuñ. Com ji tūg mijpocy huiḁibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷ Tūg'óciy jibic-huinma'ñ huiḁibi jāy ytumyb, pocy yi', per ji jibic-huinma'ñ huiḁibi jāy ytumyb, huiḁi jēbi Dios huinmecxy e ca' y'alma ytigoyip.

¹⁸ Nejhuīyim co tūg'óciy pinjaty Dios ti ymōyii jemybi jot huinma'ñ, ca' yi' y'ocpocytuni. Yi Dios y'ung, huiḁibi ti ymōoyigixy jemybi jot huinma'ñ, cuend'ajtip yi' ajcxy, ca'ydī je mujcu' xyajhuinma'ñy digōoyigixy.

¹⁹ Nejhuīyim iich ajt co Dios jadu'n xy'ane'mim njot nhuinma'ñ etz nejhuīyim co tūg'óciy jacjadyii naaxhuiñy jāy huiḁibi ca' mijpidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuīyim co yi Dios y'ung ya y'oy naaxhuiñ e ti xyajnejhuīyim yi' y'ayuc ytiy'ajt, jigix jēbi nejhuīyim huinjihuīyim yajxon je Dios janchypi tudāgypi. Nmi'ijtim ma iich ajt ndzinaayin je janchypi je tudāgypi je Dios y'ung je Jesucristo. Jada jēdu'n je tiydudāgypi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migūgtijc huiḁibi ooy ndzocy njihuīyich jadu'n nej ixyipy ngi'm'ung ngi'm'anācich, ca' nigoo mdzachDios'ājtigixy tijaty huiḁibi ca' ni ti mic'ajt mīdity, jadu'n nej Dios Teedy tzajpjotypi ymic'ajt mīdity.

2 SAN JUAN

Yi Mimetzpí Necy Huidibí San Juan Yajnigüejsx Tüg Mibijcpi Töxyjäybi

¹ Hich Juan huidibí nigohuajc'ajt Dios yjäy. Nyajnigüejspxich miich töxyjäy jada necy, miich Dios xyjäy'ajtp, e ti mmijpidaäy Jesucristo. Nañ nyajnigüejspxich jada necy tüg'óciy miich m'ung m'anäc ajcxy. Ooy ndzocy njihuüyich miich ajcxy. Ca' nmīnaanīm hich naydügpajc ndzojcyp njihuüyibich miich ajcxy, nañ jadu'n tüg'óciy jäy ajcxy, huidibí huinjihuüyigixp Dios ytiy'ajt, xychojccixp xyjihuüyigixp ajcxy. ² Hich miich ajcxy ndzojccixyp njihuüyigixyp com Dios ytiy'ajt yajpatp ma hich ajt njot nhuinma'ñ, etz yí ijt huinixi ma hich ajt. ³ Huen Dios Teedy etz hich ajt nHuindzin Jesucristo, yí Dios y'ung oy'ajt may'ajt tuñ mīd miich ajcxy, huen xypa'ayoogixy huen xyajjotcugiiygixy mīd co mguydungixy yí ytiy'ajt etz mnaychójcigixy mnayjihuiiyigixy mīn xyipy.

⁴ Ti nmīnaybadyiijich nijēity miich m'ung m'anäc, e ooy njotcugiiyich mīd co tiydudäy ajcxy payöyí Dios ytiy'ajt, jadu'n nej Dios Teedy ajt ti xyñajtz'ane'miym.

⁵ Cham njacnimäyich miich ajcxy co jēbi ajcxy mnaychójcigixy mnayjihuiiyigixy mīn xyipy. Ca' nmīnaanīm huinjemy jada tiy'ajt huidibí cham nyajnijayiiygixipy. Je' jada je ayuc huidibí oga'n'aty ti nbaatim co ti nmibijcim Jesucristo. ⁶ Co ndzojcm njihuüyim nmigütiyc, jada je' tiy'ajt co nguyduunim nej Dios ajt ti xyajnajtz'ane'miym. Jada huidibí Dios ti xyajnajtz'ane'miym huidibí miich ajcxy ti mbaatcixy, co oga'n ti mmibijccixy Jesucristo, copicy co ajcxy mnaychójcigixipy mnayjihuiiyigixipy.

Yi jäy ajcxy huidibí anīdaaccixp

⁷ Com ji mayjäy ya naaxhuiñ huidibí huin'īmb yí jäy ajcxy. Yí ajcxy ti puhuäctüdy mibijcpidijc, yaj'ixpijcp ajcxy co Jesucristo ca' ñayguēxici ya naaxhuiñ mīd ñinīxc. Jadayaabi jäy ajcxy yhuin'īmyb yhueñypinity etz Jesucristo ymidzip'ajtyp ajcxy.

⁸ Naygüendi'ajtigix ci'm. Ix mgamijpidaaccixy yí ajcxy y'ayuc. Co ajcxy myajhuin'īngixipy, huin'it anajty myajtigooygixy je oy'ajt huidibí mbadaangixyp ma Cristo. Co mguydúngixipy Jesucristo ytiy'ajt, huin'it mbáatcixipy tüg oy'ajt ca'pxypí jilby tza-jpoty.

⁹ Tüg'óciy jäy huidibí ca' cuydungixy je Jesucristo y'ayuc ytiy'ajt, ca' ajcxy mīdity Dios ytiy'ajt ma ajcxy yjot yhuinma'ñ. Je jäy ajcxy huidibí cuydundiib je Cristo y'ayuc ytiy'ajt, ymīd ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibí yaj'ixpijcp huidibí ca' ytiy'ajtity, ca' ajcxy mgöbiguipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiib je jäy ajcxy huidibí yaj'ixpijc huidibí ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuüy ti jijptigiiyñi ajcxy je huingbi ixpijcin huidibí ca' ytiy'ajtity.

Capxycjxin

¹² Oy hich ooy mij may miich ajcxy njamīdmiydägaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm nninīcxaangixy jim, e nmīd miydägaangixy au'am jigix ajcxy ooy jotcuyc mnayjihuiiyigixipy.

¹³ Je mdzi' y'ung ajcxy huidibí ya yajpatcixp xyajnigüejspx ycapxpocxin, je huiidi ajcxy Dios nañ jadu'n ti yhuin'ijxigixy. Jadu'n ngapxycixyich mīd miich. Amén.

3 SAN JUAN

Yi Necy Huidibi San Juan Yajniguejx Gayo

¹ Señor Gayo:

Nguejxypich capxpocxin ma miich. Ich miich nyajniguejxyp jada necy. Nnigo-huajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich mïd miich ycixpi, huen agujc jotcuje mdzinähuipy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugiyich co je mibijcpidijc ajcxy ymiiñ ya huidibi jim tzoön ma miich ajcxy, e yi' ajcxy xytiy'ajtmoooyich jadu'n nej tiydudägy mdzinäy e nañ jadu'n nej yajxon mguyduni Dios ytiy'ajt. ⁴ Ooy njotcujcidyich jac nigi co tiy'ajt nbaadyich jadu'n nej nmigügtijcich cuydungixy Dios ytiy'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ mïd je migügtijc. Nigi oy co oyjäy'ajtin mduñ mïd je migügtijc huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti tiy'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtijc yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnaxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios ytiy'ajt nejhuïyi. ⁸ Copicy nbubejtim ajcxy je mibijcpidijc ajcxy huidibi Dios y'ayuc ycixpi yhuidity. Co jadu'n nbubejtim, chi jadu'n paady nej jihuïy tú'ciy nduunim mïd yi' ajcxy ma Dios y'ayuc capxhuäcxii.

Je Diótfes yjibic-huinma'ñ

⁹ Ti nnijayiyich jayhuin je mibijcpidijc huidibi nayyöymújcigixp jim. Jim yajpaady tüg jäy huidi xii Diótfes huidibi ca' cöbiga'ñich n'ayucich etz ngötújcínich. Amij agix jada jäy chachñayihuïyii, yi' ci'm tzach'ane'mam ma miich ajcxy. ¹⁰ Paady ycixp co nnicxibich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótfes ytumyb, jadu'n nej jibic xyñigapxy xyñi'ojiyich etz jadu'n nej anii yajixpicy. E nañ ni yi' ca' mmidity jotcuje'ajtin jadu'n nej chach'idich. Nigi ytundigoy co ca' yajjättäga'ñ ajt nmigügtijc huidibi Dios mïd ycixpi yhuidity. E co ich ajt nmigüg pinjaty yajjättäga'ñ, chi yi' capxaducy e yajpidzimy je mibijcpidijc jäy yajjättäc, e ca' je' cöbiga'ñ ma miich mnayyöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymïd Dios ytiy'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios ytiy'ajt nejhuïyi.

Je Demetrio tüg y'ijxpejt oybi

¹² Yi jäy, huidibi yxii Demetrio, tüg'óciy jäy ajcxy ymïnaangixy co ooy y'oyjäyity, e janch yajpaady ma Dios ytiy'ajt. Ich nañ jadu'n nmïna'ñich co ooy y'oyjäyity yi Demetrio, e miich mnejhuïyb co ich ajt ndiy'ajt janch janch yi'.

Capxycixin

¹³ Ooy ich anajty miich mijcajee ayuc njayajmïdmiydäga'ñ. Per ca' nijayihua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmïdmiydäga'ñich miich ajcxy ci'm.

¹⁵ Jotcuje'ajtcix. Yi mibijcpidijc ajcxy huidibi ya yajpatp yajnaxpy ajcxy capxpocxin ma miich ajcxy. Tun may'ajt yajnaxigich ngapxpocxin ma nmigügtijcich jim nidüg nidüg etz xibety xibety. Cham ngapxycixyich, Juan je Apóstol.

SAN JUDAS

Yi Necy Huidibi Judas Nijayiy Je Huidibi Dios Ti Huin'ijxigixy

¹ Hich Judas, tumbich ma Jesucristo ytung, Jacobo xy'uch'ajtpich. Nijayiybich miich ajcxy nidüg'óciy huidibi Dios Teedy ti huin'ijxcixy jëbi mibijccixy yi' y'ayuc huidibi jëbi xyajpocyñihuaatzcixy. Nijayiybich miich ajcxy tüg'óciy huidibi Jesucristo ycuend'aty ymüid. ² Huen Dios miich ajcxy mijcajee xypa'ayoogixy etz xyajjotcugiygixy etz chojccixy xyjihuiygixy.

Yi' ajcxy huidibi yaj'ixpijcp anii

³ Miich ajcxy migügtijc huidibi ooy ndzocyich njihuüyich, müid je nüzoozin ycixpi müid ajt n'alma huidibi miich ajcxy etz ich cham nmüid'ajtm, ooy chachycopicity co nijayihuibich miich ajcxy müid yi mibijcin ajcxy ycixpi, e ngohuanüyb ajcxy co jëbi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj. ⁴ Naagity jäy ajcxy ti ytiygixy ma miich ajcxy ayüch ameech müid anii. Jecy'ajty Dios tiy'ajt yejcy ma yi' y'ayuc co yi jadu'mbi jäy tigoyam ajcxy y'alma müid ypocy ycixpi. Hue' yi' ajcxy jibic jäy huidibi ca' huindzigiygixy Dios. Anüidaacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jëbi nduunim huen tiijity huidibi nijot'ajtm. Ca' cöbijccixy je Dios huidibi nHuindzin'ajtm, etz ca' cöbijccixy ich ajt nHuindzin Jesucristo.

⁵ Oy miich ajcxy ti mjanejhuiydaaygixy jada tiy'ajt, per nyajjäymetzcodamy ajcxy jadu'n nej Dios jayijp yajpidzimy jecy'ajty jim Egipto je Israel jäy ajcxy, e jac'axam tzaachytuun müid o'cin je huidibi anajty ajcxy nijëjity ca' ymibijccixy. ⁶ Je ángeles huidibi ajcxy ca' yhui'my ma Dios ytung huidibi ajcxy capxycömidodacy Dios, y'ixmajztay ajcxy y'it chinaydac. Dios je' cham müid'ajtp ajcxy ahuing. Mach ajcxy y'ity agoodztuuby huinixii huinitiempo ixti cooni je mij xii anajty Dios ti yajhuaad'aty, mina anajty tiydunañ naaxhuiñyäj ajcxy müid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuydungixyp ñinücx chojcin, naygiyejci ajcxy ma je jibic-huinma'ñ. Yëydijctijc ytundigooygixy müid huingbi yëydijc. Je' jadu'n hui'm ijxpejt ma tüg'óciy jäy co je tzaachypi ajcxy paatcixy.

⁸ Jim yajpaady ma miich ajcxy jäy huidibi nejhuüyb co Dios jecy'ajty tzaachytuun ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinücx müid pocytunü. Jijpcogapxiygixy je Dios ycotujcin, nigapxcixy ni'ojiiygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min müid, co anajty ychiptuñ müid je mujcu', yajcapxyoongixy yaj'ayucyoongixy je Moisés ñinücx, ca'p je' müid'ajty huinma'ñ nixcy yajpocycäy je mujcu' müid nay'ojii. Jëyi janch co nimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuüygixy. Tügüyb ajcxy yhuinma'ñ müid iyujc animal yhuinma'ñ, etz iyujc animal ca' ajcxy müidity huinma'ñ tiydudägyi. Ci'm jada jäy ajcxy ñayyajhuinma'ñyidigóoygixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypi mijcajee müid pocy ycixpi com je' yi' ajcxy ypadumyib nej Caín y'idüich. Müid co meen tzach'adzojccixy, paady ñidigóoygixy ytüdigóoygixy jadu'n nej Balaam ñidigoy ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucijpcogapxiyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy müid yi' ajcxy, e jadu'n ijxpejt yejccixy co mnaychójcigixy. Caaygixp uuccixp tügmucy müid miich ajcxy agujc jotcujc per ni ca' ajcxy müidity huindzig'iñ müid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ajtigixyp, e ca' tungixy cuendi je cöbixy. Jadu'n

ajcxy nej joc huidibi ca'pi nñ mñdity, huidibi je poj yajhuidiitip. Jadu'n ajcxy nej quipy huidibi ca' ytiim'aty mina yjapadyi, jayijp y'ocniicxy, e chi jada ytiich, e ytimypidigy mñd ñidictz. ¹³ Yi' ajcxy ytundigoyi ooy cho'ydu'n yecy, tim jadu'n nipaady nej je mejy y'oobigy co ypidigy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixi huinitiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtucpi co anajty Adán ti yjayijp'aty, yminañ co Dios yhuinma'ñymooyi mñd jada ycixpi, e yminañ: "N'ijxich je Huindzin Dios co anajty ymiiñ mñd janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyäjy mñd ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy mñd yjibicjäy'ajt etz mñd jibic ayuc tiibi mñd nigapxcixy ni'ojiiygixy Dios." ¹⁶ Jada jibic jäydijc ca' ajcxy ni ti mijotcujc'ajtcixy, ooy nigapxcixy ni'ojiiygixy ymigügtijc. Jëyi ajcxy yci'm jotcujc'ajt ixtaaygixy. Ycapxcixy amij agix. Ooy oy nigapxcixy nijëjity jäy mñd co ti oybi padaangixy ma je' ajcxy.

Judas capxhuijp je' ymigügtijc ajcxy

¹⁷ Per miich ajcxy migügtijc huidibi iich ooy ndzocy, jäymejtzcix je ayuc huidibi jécyip ti najtzcaxiiygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: "Ma anajty xii tiempo ycixaani, ji'adip jäy ajcxy huidibi nixigipy yajxigipy huidibi Dios yje'ajtpy, e chináaygixipy jadu'n nej yi' ajcxy ci'm tzachnijot'ajtcixy jibic-huinma'ñ." ¹⁹ Je' ajcxy yajnaybijc-huäcxiiib mibijcpidijc co ca' ajcxy mñdity je Dios yjihui'ñ ymic'ajt.

²⁰ Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtzcix mibijctzoogix Dios mñd je Espíritu Santo ypubejtin.

²¹ Naygüend'äjtigix jigix jëbi Dios xychojccixy xyjihuiygixy ajcxy, e ahuijxcix je xii mina anajty iich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina mñd co ti xypa'ayoohuim.

²² Capxjotcidaaccix pinjaty ca' ti mijpidägy janchypidägy. ²³ Yajmñdmñydaaccix jac-jadyi migügtijc jigix ajcxy jëb paatcixy nañ jadu'n nñdzoocin mñd ajcxy y'alma. Jadu'n anajty paady nej jihuiy myajpidzimgixy jijnjoty. Yajtungix pa'ayo'n mñd jacpinjaty pocytumbi. Naygüend'äjtigix ma yi' ajcxy ypocytunii, ca' mbocytungixy nañ jadu'n. Jadu'n yi' ajcxy ypocytunii nipaady nej huit huidibi ti yjibicci'y.

Judas capxycixy mñd je' ymigügtijc

²⁴⁻²⁵ Je Dios tügpajcpi, je Dios huidibi xyajñdzoocim ajt n'alma, je huidibi yajtaayb ñejhuiydaayb, ymñd je' mic'ajt etz cötujcin jëbi miich ajcxy xycuend'adipy jigix ca' mbocycägixipy, etz je' ymñd mic'ajt jigix jëbi xyajja'tcixy agujc jotcujc ma Dios yhuinduu, ma yi' yajpaady mñd y'oy'ajtin ymij'ajtin ca' ti mbocymñdity ajcxy. Yi' paatip je oy'ajtin etz mij'ajtin etz mic'ajt etz cötujcin mñd nHuindzin Jesucristo ycixpi, tiyip etz cham etz huinixii. Amén. Jadu'n ngapxycixyich.

EL APOCALIPSIS O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huinjihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt mïd tüg ängel ma Juan. E je ängel yajhuin'ijxy Juan jada y'ayuc etz ijxpejt. ² E Juan yecy tiy'ajt janchypi tüg'óciy jadu'n nej anajty ti huin'ixy ti huinmïdoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüy.

³ Janch jotcujc je' pinjaty capxp jada necy etz pinjaty mïdo'mbïjc jada Dios y'ayuc huidibi Juan nidiy'ajtpy etz ñajtzcapxïyb. E jotcujc je' pinjaty cuydumb tüg'óciy huidibi jaybety ma jada necy, com je xï je tiempo huingooniñ je' mina ytuna'ñyii yjada'ñyii.

Juan nijayïy huixtujc'itpi mïbijcpïdjç

⁴ ñich Juan nijayïybich yam je mïbijcpïdjç huixtujcpïcypï huidibi yajpatp jim Asia naaxjot. Huen Dios etz je huixtujcpï espíritu huidibi yajpatp ma je' y'ane'mdac may'ajt oy'ajt tunipy mïd miich ajcxy etz xymóoygixipy jotcujc'ajtïn. Dios je' huidibi cham ijt, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy mïd miich ajcxy etz xymóoygixipy jotcujc'ajtïn. Jesucristo je huidibi tiydudägy Dios ytiy'ajt yejci, je jayïjpï jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiçc huidibi ane'mb ya naaxhuiñ. Je Cristo, huidibi xychojçim xyjihuiïym, ti xyñihuaanim mïd ñi'py ma je tzaachypï huidibi mihuaad'ajtim mïd ajt nbocy ycïxpï. ⁶ Jesucristo ti xycötujçmooyim etz ti xytungmooyim mïd Dios Teedy, huiidi yï' yteedy'ajtpy. Jadu'n ñich ajcxy ndung etz ngötujçin nipaady nej je tung etz cötujçin huidibi reydiçc etz teedytïjc ajcxy ymïd. Huen Jesucristo y'idipy cömay huinixï huinïtiempo etz huen yï' y'ane'min cötujçin y'idipy huinixï huinïtiempo. Jadu'n jada. Amén.

⁷ Cuendtungix ñich n'ayuc, ¡Cristo miinaamb jocjoty e tüg'óciy je mayjây y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypïjc. Tüg'óciy naaxhuiñyjäy yjihuihua'ñ yäxa'ñ ytaja'ñ ymaya'ñ mïd je'ycïxpï. Jadu'n jada. Amén.

⁸ Jadu'n je mïjpï Dios huidibi tüg'óciy mïc'ajt mïd ymïna'ñ:

—ñich je' huidibi yajtzondacp je naaxhuiñybï, je tzajp etz je huidibi jaccogixïyb. Jadu'n ñich nej letra A huidibi yajtzondacp je alfabeto etz je letra Z huidibi cogixïyb ma je alfabeto. ñich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yï Cristo oybi ymïjity

⁹ ñich Juan, miich ajcxy mmïgüg, quipxyi mïd miich ajcxy nminaxy nyajnaxyich ayo'n tzaachypï. Quipxyi mïd miich ajcxy ndzinäyich ma Dios y'ane'my. Etz quipxyi mïd miich ajcxy nyajtuñich je mecxtujçin ma ndzinaayin huidibi Jesucristo ti xymooyim. Jim ñich anajty mach n'ityich ma je naax huidibi mejy agujc, huidibi xï Patmos, mïd Dios y'ayuc ytiy'ajt ycïxpï, je ayuc tiy'ajt huidibi Jesucristo xyajnejhuüyim. ¹⁰ Jadu'n tügtecy ti njatyich, hue' anajty tüg domingo xï co ñich Dios n'ojadaptyich, e Dios yjihuiñ ymïc'ajt ti anajty xymïmadactayich njot nhuinma'ñich. Chi nmïdooyich jïxcï'py'amy tüg huidibi mïc capx, jadu'n yï' ycapxin nmïdooyich nej tüg trompeta yxüxy. ¹¹ Chi je huidibi xymïgapxpich anajty ymïnañ:

—ñich je' huidibi yajtzondacp etz je huidibi yajcogixïyb tüg'óciy tijaty ya naaxhuiñybï etz tzaippoty. Jadu'n ñich nej je letra A huidibi yajtzondacp je alfabeto etz je letra Z huidibi yajcogixïyb je alfabeto. Cojaay miich ma tüg libro huidibi mhuin'ijxyp, e quex je necy

jim Asia naaxjot ma je huixtujc picypí mibijcpidijc ma je huixtujcpí cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixa'ñich pin ñich anajty xymigapxpích. Co nnayji'ijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujcp candelero nhuin'ijxyich tim jadu'n nej je jäy huidibi tzoon tzajpjoty (je Cristo), yxoxyity miid tüg huit yjädy anajty mabaad ytecy, e yhuññity ma ycaach miid tüg oorihuñ. ¹⁴ Yi' ycohuajc etz ycöhuay janch poob, jadu'n nej lana huidibi janch poob, jadu'n nej nieve ypoobity, e je yhuñ jadu'n nej jñnye'n. ¹⁵ Je' ytecy tim jadu'n nej latón huidibi janch oy, nej jihuñ jñnjoty ornojoty yam ypidzimy. E je ymiydaacin janch mic, tim jadu'n nej canaag mijñi y'a'ñich y'agimimy. ¹⁶ E ymiid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjipity. E yhuñyijp jadu'n anajty nej xñ janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycñixajyich miid y'a'oygi', chi xyñimaayich:

—Ca' mdzigíy; ñich je' huidibi jayijp'ajtp ya naaxhuñ etz tzajpjoty etz ñich je' je huidibi cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixñ huinitempo. Nmíidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuñ nmíididyich je öcpi it ahuaazti. ¹⁹ Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xñ tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuñ maabi je huixtujcpí madza' tiibi mhuin'ixy ma ñich n'a'oygi', etz je huixtujcpí oricandelero. Je huixtujcpí madza', je' je' je ángeles ajcxy huidibi cogapxy'ajtp miid Dios ycixpi ma je huixtujcpicypí mibijcpidijc. E je huixtujcpí candelero huidibi ti m'ixy, je' yi' je huixtujcpicypí mibijcpidijc.

2

Je ayuc huidi yajmoy yi mibijcpidijc jim Efeso

¹ Nijayi' miich je ángel huidibi cogapxy'ajtp jim ma je huidibi ajcxy mibijcp jim Efeso: “Nima' ajcxy co jadu'n yminañ je huidibi huixtujc madza' miid ma y'a'oygi', je huidibi jim yajpatp agujc'amy ma je huixtujcpí candelero, je' jadu'n minamb: ² ñich nejhuñybich tüg'óciy ti miich ajcxy mdumyb, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuñybich co ca' m'ocmimectugaani ajcxy jibicjäydijc, e ti m'ijxmajtzcixy je ajcxy huidibi naydijp co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuñ co ajcxy ooy y'anñdaaccixy. ³ Nejhuñybich co ooy ayo'n mij miich ajcxy mmñajxcixy myajnajxcixy miid ñich ycixp, etz ooy mij mecxtujcin ajcxy myajtungixy, etz ooy janch mic mdungixy miid ñich ycixp, e ca' ti mmidzípigixy ñich ndung. ⁴ Per nejhuñybich ma miich ajcxy mdundigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Miid jada ycixpi jäymetz miich ajcxy ma oy m'agñajxcixy. Jothuimbijtcix, e tungix nej anajty m'octungixp co oga'ñ ajcxy mmibijcy. Pen ca' ajcxy jadu'n mdungixy, chi tzojc ñicxibich ma miich ajcxy, chi huingbi nbidägyibich ma miich ajcxy xyjapaady, tim jadu'n nipaady nej jihuñ nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy mjäydgoydaaygixy je jibicjäydijc ajcxy yhuinma'ñ. Nej je nicolaítas ajcxy ytungixy, miich ajcxy ca' mjäygidaaccixy e nañ jadu'n ñich ca' njäygidägyich. ⁷ Pinjaty ytädzac miid huen amidoo'ity nej je Espíritu Santo yminañ ma je mibijcpidijc huidibi yajpatp xi ya. Pinjaty madacp ma ymibijcin, ñich yi' nmöhuipy tzinaayin jugy'ajtin ma Dios y'ane'my, jaydeb jotcuje chinähuipy ma Dios y'it, jadu'n nipaady nej jihuñ ajcxy jicxy je quipytim ma Dios y'it huidibi jugy'ajtin yejcp.”

Je ayuc huidi yajmoy yi mibijcpidijc ajcxy jim Esmirna

⁸ Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: "Jadu'n ymina'n je huidibi yajtzondac je naaxhuiñybi etz tzajp etz huidibi cogixihui, je huidibi o'c e yjugy'aty jadüg'oc: ⁹ Ich nejhuiybich tüg'óciy ti miich ajcxy mdumyb. N'ijxajpyich nnejhuiybich je m'ayo'n mjetmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuiybich co ayooob jäy miich ajcxy, per müd miich ajcxy Dios y'oy'ajtin, e jadu'n nipaady miich ajcxy nej comeefnydijc. Nejhuiybich co nijëjity jäy miich ajcxy xyñigapxyp xyñi'ojyib. Naydiyii ajcxy co yjudíoäyity, e ca' yjanchity. Hue' ajcxy müd y'ijtcixy je mujcu'. ¹⁰ Ca' ni ti mdzigiy miich ajcxy nej mjadaangixy m'ayooohuaangixy. Yi mujcu' miich ajcxy nijëjity xyajpujxtijccähuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xii. Ijtcix tudägy mabaad ajcxy m'öccixy. E ich miich ajcxy je jugy'ajtin huinixibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty müd ytädzac, huen mido'mbijccixy nej je Espíritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayooohuipy ayoodactuuyb, ca' y'öga'n mimejtz'ocpi."

Je ayuc huidi yajmoy yi mibijcpidijc jim Pérgamo

¹² Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n ymina'n je huidibi y'espada müd mejtz'adu'm'amyb yjijpity: ¹³ Ich nejhuiydaaybich jadu'n nej miich ajcxy mdzinaaygix mjugy'ajtcix. Nejhuiybich co miich ajcxy mdzinaaygixy mjugy'ajtcixy ma tüg cajp ma je mujcu' y'ane'my. Per mi'ijtyñi je nxijich, e ca' m'ixmach je mmibijcin ma ich. Ni mga'ixmajch je mmibijcin je huin'it xii co Antipas yaj'o'ci jim ma miich ajcxy, tüg ich nmigüg, je tudägyi testigo, jim je' y'o'cy ma mujcu' chinäy. ¹⁴ Nmüdich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'n je Balaam y'ixpijcin, je huidibi yaj'ixpij jecy'ajty co huen jicxcixy je huidibi anajty tzaadzech quipychech ti yajhuindzigiygixy. E nañ jadu'n yaj'ixpic co huen tundigooygixy müd huingbi töxyjäy. ¹⁵ Nañ jadu'n miich ajcxy mmüdity nije' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi ich ca' ndim'ixa'nich. ¹⁶ Paady jothuimbijtcixy miich ajcxy, yajtigajtzn ajcxy mjet mhuinma'n. Pen ca' jadu'n mdunipy, nícxibich jim tzojc ma miich ajcxy. Chi jada' ndziptunipyich müd yi' ajcxy huidibi midundigooyb ich ngötujcin huidibi ngapxpich. Ich n'ayuc jadu'n nipaady nej espada. ¹⁷ Pin ytädzac müd, huen mido'mbicy je ayuc huidibi je Espíritu Santo ñigapxyp ma je huidibi ajcxy Dios y'ayuc ytiy'ajt mibijcip. Pin jada tiydudägy mimadacp cuyduunni Dios ytiy'ajt, ich yi' nmöhuipy oy'ajtin huidibi Dios yjë'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n ich yi' nmöhuibich tüg pi'cpoobtzaa, e ma je poobtzaa jim yaayity tüg xii jemybi huidibi ca' ni pin ijxcabipy, jëyi janchtiy ijxcabip je xii pin anajty cöbijcp je tzaa."

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huidibi cogapxy'ajtp ma je mibijcpidijc jim Tiatira: "Nima' ajcxy, jadu'n je Dios y'ung ymina'n, je huidibi yhuin müd jadu'n nej jihuiy jänye'n, e ytecy jadu'n müdity nej bronze tiibi ytoyhuäch ma jün: ¹⁹ Jadu'n yi' ymina'n: Nejhuiybich tüg'óciy ti ajcxy mdumyb. Nejhuiybich jadu'n nej miich ajcxy mijcajee myajmij'ajtcixy Dios etz mdzojccixy mijhuiygixy ymigügtijc; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuiybich co cham nigi mdungixy ma Dios ytung, ca'ydi jadu'n ajcxy nej myajtzondacy. ²⁰ Ji tüg huidibi miich ajcxy mdumyb huidibi ich ca' n'oy'ixyich. Mdzachmimécxtujccixy yi töxyjäy Jezabel huidibi naydijip co ycapxyp Dios y'ayuc e ca' yjanchity. Je' yajni'digooyb yajtüdigooyb ich ndumbi müd anii. Jadu'n je' ymina'n co jëbi huingbi töxyjäy migapxtigooygixy e co jëbi caaygixy

jicxcixy je huidibi ajcxy yajhuindzigiiyb quipychech tzaadzech. ²¹ Ti ich je Jezabel nmöy tiempo co ixypy yjothuimbity, per yi' ca' ixmadza'n yjibic-huinma'n. ²² Jadachambi nyajcähua'nich je Jezabel cijx'am müd pa'm, e jadu'n ajcxy nmöhua'nich ayo'n je yëdyjc ajcxy huidibi müd chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'n huidibi je Jezabel ymüd. ²³ E nyaj'öctähuibich tüg'öciy ajcxy pinjaty panixp cixyot huinijot je Jezabel y'ixpijcin jigix nidüg'öciy je mibijcpidijc ajcxy nejhuiydähuipy co ich je' nejhuiydaayb tüg'öciy jäy ajcxy yjibic-huinma'n. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyi miich ajcxy jim Tiatira ca' mbanicxcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytiypy mujcu' y'ixpijcin huidibi tzip huinjihuuyb. Ich miich ajcxy nimaayb co ca'p ich miich ajcxy huingbi ixpijcin njacmóoygixipy. ²⁵ Mi'ijtcixy je Dios ytiy'ajt huidibi miich ajcxy müd, ixti cooni anajty nhuimbityich. ²⁶ Pin madacp ma ymibijcin etz pin cuydumb ich ndiy'ajt mabaad anajty je' y'ögy, ich je' nmöhuibich je cötujcin, jaydeb ane'my naaxhuiñyäj ajcxy. ²⁷ Ich je' nmöhuipy je ane'min cötujcin ma naaxhuiñyäj huidibi Dios Teedy, ich nDeedy, ti xymöyich. E je' ane'mipy müd Dios ymic'ajt. E je' yajhuindigoydähuipy naaxhuiñyäj y'ane'min, tim jadu'n nej jäy püy pochutu'tz müd pujxtajc. ²⁸ Nañ jadu'n ich je' nmöhuipy ich nmic'ajt huidibi nipaady nej je madza' jayhuixtujc. ²⁹ Pin ytädzac müd, pin midoohuamb, huen midoy nej je Espíritu Santo ymina'n ma yi mibijcpidijc nidüg'öciy."

3

Je ayuc huidi yajmoy yi mibijcpidijc jim Sardis

¹ Nijayi' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: "Jadu'n ymina'n je pin müd je huixtujcpi Dios y'espíritu, huidibi müd je huixtujcpi madza': Ich nejhuiyb ti mdumyb. Nejhuiybich co cömay ajcxy m'ijtcixy co mmüdiy yjugy'ajtin huinixibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy njacmüdiy. Ti ich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtzcootcixy je Cristo ytiy'ajt je tiibi m'ixpijccixy, je tiibi mmidoogixy. Panixcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy jadu'n nej tüg meetzpi, ni mganejhuihuüyixipy anajty nnicxyich. ⁴ Miich jacmüdni mibijcpi ajcxy jim Sardis huidibi ca'ni ajcxy ymibijcin yajtigooygixy, ca'ni ajcxy ytundigooygixy, tim jadu'n nipaady nej jihuüy ajcxy müdiy poob huit huidibi ca' yjibicüy. Yi' ajcxy xymüd'idipich müd huädz jot huädz huinma'n, tim jadu'n nipaady nej ypoob huit ajcxy müdiy, com ajcxy ypadyi jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymüd'adipy ajcxy je huätzpi jot huinma'n, huidibi jadu'n nipatp nej poob huit ajcxy müdiy. E ni ca' ajcxy yxi yajjödzip ma je libro ma ycojaayity je tudägyi jäy ajcxy yxi. E ich yi' ajcxy ngapxquëxiccixy yxi ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶ Pin midoohuamb, pin ytädzac müd, huen midoy nej je Espíritu Santo ymina'n majaty je huidibi ajcxy Dios y'ayuc ytiy'ajt mibijcip."

Je ayuc huidi yajmoy yi mibijcpidijc jim Filadelfia

⁷ Nijayi' je ángel huidibi capxy'ajtpi ma je mibijcpidijc jim Filadelfia: "Jada ayuc tiy'ajt nigapxyp je tügpajcpi huätzpi, tügpajcpi janchypi, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'aducp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'nich: Ich nejhuiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi

ni pin ca' huaad yaj'aducy. Nejhuüybich co hueeni Dios yjihu'iñ ymic'ajt miich ajcxy miidity. Per ti mguydungixy ñich n'ayuc, e ca' nxijich xycoyützi. ⁹ Cuenditungix nej nmina'ñich. Yi' ajcxy huidibi mijpidacp Satanás y'ayuc, je huidibi anidacp ajcxy co ñaydíjigixy judíojäy, e ca' yjanchity. Hich yi' ajcxy nmimadägibich jigix yi' ajcxy miich xyhuingojxtinähuiipy xyajmij'adipy. E chi nejhuühuip ajcxy co ñich miich ajcxy ti ndzocy. ¹⁰ Miid co ti myajtungixy mecxtujcin ma mdzinaayin, ti mguydungixy ñich n'ayuc n'ane'min. Paady ñich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'ñ'ijxcixy ajcxy. Miinipy je xii je tiempo mina je mujcu' jot'ixipy huinma'ñ'ixipy tüg'óciy je mayjäy huidibi yajpatp ya naaxhuiñ. ¹¹ Hich tzojc nnicxa'ñich jii by naaxhuingixy. Mi'ijtcixy yi' Dios y'ayuc huidibi miich ajcxy miid jigix ni pin xycapijcp ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, ñich yi' nbidägibich mij'ane'mbi ma ñich nDios y'it, jadu'n yi' nipaadip nej tüg pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayüybich ma yi' ñinïcx ñich nDios yxii, e nañ jadu'n njáayibich je ñich nDios ycajp yxii, je Jerusalén jemybi huidibi tzoon tzajpjoty ma Dios yajpaady. E nañ jadu'n njáayibich nxii jemybi ma yi' ñinïcx. ¹³ Pin ytädzac miid huen midoy ti je Espíritu Santo ñigapxyp ma tüg'óciy je mibijcpidijc.”

Je ayuc huidi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: “Jadu'n ymina'ñ je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ: ¹⁵ Nejhuüybich nej mdungixy. Nejhuüybich co miich ajcxy mibijccixy huenjaty, ca' myajtigoydaygixy yi' mmibijcin, e ni ca' ooy mij mmibijccixy. Jadu'n miich ajcxy nipaady nej ñii huidibi ni ca' ytiçity, e ni ca' y'anity. Jac'oy ixipy co ooy mij mmibijccixy, o co ca' ixipy mdimmibijccixy. ¹⁶ Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi ñich miich ajcxy njijpcogapxihiipy miid je ndzip n'éjcinich, tim jadu'n nej jäy ajcxy ixtzuju huidibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjogy'ajtin mmidity, e ca' ti ajcxy myajmayajtcixy, e ni ca' miich ajcxy nejhuüygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi nihuädz ixhuädz huidijtp. ¹⁸ Paady ñich miich ajcxy nimaaygixy co copicy ajcxy mbaadip ma ñich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huädz oori ma ñich, huidibi ti y'oybidzimy miid jin jigix mgomeeñ'ajtcixip. Nañ jadu'n ñich miich ajcxy nnimaaygix co copicy ajcxy mbáatcixip pocyhuinmeecxin ma ñich, huidibi jadu'n nipaady nej jihuüy huit oyjatypi poopjatypi mjuuygixy ma ñich, jigix mxójxcixipy mninïcx ca'ydi tzo'ydu'n mbáatcixipy. Nañ jadu'n ñich miich ajcxy nnimaaygix co mbaadip tiy'ajt ma ñich nlibro, huidibi jadu'n nipaady nej jihuüy huindzooy mjuuygixy, jigix mdzoydúngxipy mhuin e huin'it ajcxy m'ijxcixipy huädz. ¹⁹ N'ojypich etz ndzaachytumyb tüg'óciy pinjaty ndzojcpyich njihuüybich, paady ycixpi miich ajcxy mhuindina'mijiptina' mic ñich ndiy'ajt etz jothuimbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuüy ndinayich ma nidüg nidüg jäy ytiyc'aguu e ngojxnojcich ajcxy ytiyc agi'. Nbijctzooybich co xyajtigihuibich ajcxy ma ytiycin. Pinjaty xyyöcmidoobich, e yaj'ahuäch ytiyc, tigihuibich ma yi', e cayipich miid yi', e yi' miid ñich. ²¹ Pinjaty cuydundaayb Dios y'ayuc ytiy'ajt, ñich je' nmöhuipy it lugar tzajpjoty quipxyi miid ñich ma ñich n'ane'mdac. Ti nguydundaayich Dios y'ayuc, e nmüidich it lugar ma ñich nDeedy y'ane'mdac, paady ycixp jëbi nmöhuibich miich ajcxy it lugar ma nyajpaadyich. ²² Pin ytädzac miid, pin midoohuamb, huen midoy huidibi je Espíritu Santo ycapxyp majaty mibijcpidijc huidibi canaagpicy yajpatp.”

4

Ibbaatcixy capxpaatcixy yi Dios huidibi tzajpjoty tzinaayb

¹ Co jada jadu'n yjajti, chi nhuindicxyich tzajpjoty, e nhuin'ijxyich tög tije aguü ahuädz jiihy tzajpjoty. E nmidooyich tög ayuc janch tim jadu'n nej tög trompeta yxüxy huidibi ich anajty jayijp ti xy'ocmigapxpi, xyñimäyich:

—Pet ya ma ich, cham nyajni'ixihua'n tijaty copicy tunaanip jadaanip co anajty jadayaabi xii tiempo ñaxy.

² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tög ane'mdac jiihy tzajpjoty. E ma je ane'mdac jim anajty tög iñäy. ³ E je huidibi anajty jim iñäy ma je ane'mdac, jadu'n anajty yquëxigy nej tög tzaa janch oybi janch adicxp. E jühuidity ma je ane'mdac je Dios yhuätz'ajt quëxigy nej tög i'ñch janch oycolor huidibi janch adicxp nej tög tzaa tzuxjatypi. ⁴ Nañ jadu'n jühuidity ma je ane'mdac jiihy anajty iipx madaax silla, e ma je silla iñäy iipx madaax mijjây, ac poob huit mïid. E ymïid anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huidzuc, e ooy anajty enee yjidiñin ñe'my. E ma je ane'mdac huinduu jiihy anajty Dios yjihui'ñ ymic'ajt je huixtucpi, huidibi quëxig nej huixtucj tzinhuaty huidibi ooy mic ytichxy. ⁶ E je tigot ma je ane'mdac huinduu jadu'n quëxigy nej vidrio meyy, janch huädz janch adicxp.

E cujc'amy jühuidity ma je ane'mdac mïdaax iyujc huidibi mïd mayhuiin jahuinduu jajixcipy. ⁷ Je midügpi iyujc tim jadu'n anajty nej tög jamgaa. Je mimetzpi iyujc tim jadu'n nej tög huajmang. Je midugigpi tim jadu'n anajty yhuiñyijp nej jây. Je mïmadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymïid anajty ajcxy nidüg nidüg tudujc yqueec, e ymïid anajty ajcxy yhuiin queecnigixy etz queecpa'tci'py. E ca' anajty ajcxy ypocxy xim tzuu, chachmïnaangixy:

Santo, Santo, Santo, je Huindzin Dios huidibi tög'óciy nejhuiydaayb, huidibi tög'óciy mic'ajt mïd, je huidibi anajty ji'ajtp, je huidibi cham ji'ajtp, etz je huidibi mïnaamb.

⁹ Je iyujc ajcxy huin'igixy etz huindzigiygixy etz yajmij'ajtcixy Dios, etz yajnajxcixy Dioscojuyipy ma Dios je huidibi anajty iñäy ma je ane'mdac, je huidibi tzinaayb jugy'ajtp huinixii huinitiempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjây ycojxtinaydaaccixy ma je' yhuinduu huidibi anajty iñäy ma je ane'mdac. E ooy anajty huindzigiygixy je huidibi tzinaayb huinixii huinitiempo. Pïdaaccixy anajty ajcxy ycorona ma je' yhuinduu, cham chachmïnaangixy:

¹¹ Miich, ich ajt nHuindzin, ich ajt nDios, miich mihuaad co mïdity tög'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich mïd'ity tög'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadïy tög'óciy huidibi ji'ajtp. Com miich jadu'n ti mdzocy, paady ycixpi tög'óciy tijaty ji'ajttây.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñäy ma je ane'mdac mïdity anajty ma y'aoygi' tög libro abugucy, yaayity jotjoty'amy etz nigixy'amy, yco'aducyity mïd huixtucj selli. ² Chi nañ jadu'n nhuin'ijxyich tög ángel huidibi mij cötujcin mïd, yajtiy mïd ycapxin janch mic:

—¿Pin jada' janch tudägyip co yaj'ahuädzip jada libro etz migïdzydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich mïd tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxp. ⁵ Chi nidüg je mijjây xyñimaayich:

—Ca' myäxy. Chi je' je mic'ajt mïdipi ma yi judíojaý, je David y'ap y'oc huídibi nipatp nej tüg ama'ycaa, yi' ti mïmadactäy tüg'óciy jibicpi. Yi' mihuaad yi libro yaj'ahuädzip, etz miguejiydähuipy je huixtujcpi yselli.

⁶ Chi nhuindicxpejtyich, e agujc'amy ma je ane'mdacin, etz agujc'amy ma je mïdaaxpi iyujc, etz agujc'amy ma je mijjäydic ajcxy, jïm anajty ytinäy je Dios y'ung, je Cordero. Ooy anajty ñiguëxigy chaachï'au nej anajty ayo'n tzaachypï ti yajnaxy. Ymïd anajty huixtujc ymu'n, e huixtujc yhuin, je' je' je huixtujcpi Dios yjihui'ñ ymic'ajt huídibi yquejx huindu'my naaxhuiñ. ⁷ Chi je Cordero, je Dios y'ung, ninicxy je huídibi anajty iñaayb ma je mij'ane'mdac, e chi oy ciychoy je libro huídibi je mij'ane'mbi anajty ymïd ma je a'oy'amybi yci'. ⁸ Co je' anajty ti ciychoy je libro, chi je mïdaaxpi iyujc etz je iipxmïdaaxpi mijjäy ycojxtinay'ahuïyday ajcxy ma je Dios y'ung, je Cordero, yhuinduu. Ymïd anajty ajcxy nidüg nidüg y'arpa etz oori copi ujtzyty mïd poom, je' je' anajty nipaady nej ajcxy chajpcapxy capxy je huídibi ajcxy mibijcp Dios. ⁹ Janch y'ïyb anajty ajcxy iy jemybi, ymïnaangixy:

Miich mihuaad co mgyigy yi libro, e mmiguejiydaayi je huixtujcpi yselli. Com miich ti myaj'ögyii, ti mgojuy jäy ajcxy ypocy ma Dios mïd mgi'mni'py. Ti mgojuy ma Dios nidüg'óciy jäy ajcxy ypocy, huen huídibi razity, pinjaty capx huen huídibi ayucity, pinjaty tzomb huen huídibi cajpity huen huídibi naciónity.

¹⁰ Miich ti xymóoygixyich ane'min etz je tung mijpi nej huaad ñch ajcxy n'ojadajtcixy nmibijctzoogixy Dios, jigix jëbi ñch ajcxy n'ane'mgixy yi naaxhuiñjäy etz n'ojadajtcixy nmibijctzoogixy Dios mïd jäy ajcxy ycixpi.

¹¹ Chi ñch oy nhuin'ixyich e nhuinmïdooyich may ángeles ajcxy ycapxin ymïydaacin jühuidity ma je ane'mdac, ma je iyujc ajcxy yajpatcixy, etz ma je mijjäy ajcxy yajpatcixy. E janch canaag millon je ángeles anajty ajcxy. ¹² Janch mic' je' anajty ajcxy chachmïnaangixy:

Je Dios y'ung, je Cordero, je huídibi öc mïd jäy ajcxy ypocy ycixpi, yi' mihuaad paadip ane'm'ajtin, comeen'ajtin, ixpijcin, mic'ajt, cömayin, oy'ajt mij'ajt, etz huin'ïhuin huinyaaxin.

¹³ E tüg'óciy iyujc animal je huídijaty Dios ti yajcojy ti yaj'abadïy huídibi jiihy tzajpjoty, etz huibi ya naaxhuiñ etz naaxpa'tci'py, huídibi jiihy mejyjoty, nhuinmïdooyich co tüg'óciy ajcxy chachmïnaangixy:

Tzoc huin'ïhuim tzoc cömayim, tzoc mooyim oy'ajtin etz mij'ajtin huinixi huinitiempo je Dios y'ung, je Cordero, etz je huídibi iñaayb ma je ane'mdaacin.

¹⁴ Je mïdaaxpi iyujc anajty chachmïnaangixy:

—Jadu'n huen tuñyii jadyii. Amén.

Chi nañ jadu'n je iipxmïdaaxpi je mijjäy ajcxy ycojxtinaygidactay, chi ajcxy ooy huindzigïy patjihuiy je huídibi huinixi huinitiempo tzinaayb.

6

Je huixtujcpi selli

¹ Huin'it nhuin'ijxyich je Dios y'ung, je Cordero, quejtzciich tüg selli ma je huixtujcpi chi nmïdooyich, co nidüg je mïdaaxpi iyujc ycapxy, jadu'n nmïdooyich nej enee yjidity, chi ymïnañ:

—Min ya, e chi m'ixipy.

² Chi nhuindicxpejtyich, chi nhuin'ijxyich tüg poob cohuay. E je huídibi yaj'iñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coronï co yrey'adipy. Chi jada' choñ tziptunaangixy jigix jacmïmadägipy ymidzip.

³ Co je Dios y'ung, je Cordero, yaj'ahuaach je mïmetzpi selli ma je necy, huin'it nmïdooyich je mïmetzpi iyujc ma je mïdaaxpi ymïnañ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huidibi yaj'iñaayb je cohuay chaptzpi, ycüdigiïyi cötujcin co je naaxhuiñjây canayyajjotcujc'adiib ajcxy, e ñayyaj'öcigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agiitztuudy je midugigpi selli ma je necy, chi nhuinmidooyich je midugigpi iyujc ma je madaaxpi, ymina'ñ:

—Min ya, e chi m'ixipy.

Chi nhuindicxpejtyich, chi nhuin'ijxyich tüg cohuay tzixypi. E je huidibi anajty yaj'iñaayb je cohuaychixy, ymüd tüg pujxtzim ma yci'. ⁶ Huin'it nhuinmidooyich tüg ayuc choñ ma je madaaxpi je iyujc ajcxy yajpaatcixy, ymina'ñ:

—Tüg denario meen chohuïy tüg libra trigo; nañ jadu'n tüg denario meen chohuïy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi ymina'ñ:

—Min ya, chi m'ixipy.

⁸ Huin'it nhuin'ijxyich tüg cohuay nitzuxy pu'tz, e je huidibi anajty yaj'iñaayb je cohuay, hue' anajty yxiï öcpi. Axi am anajty ymiiñ je huidibi ane'mb je it ma je öcpi ñimucy. Chi ajcxy yajmoy cötujcin je huidibi yaj'iñaayb je cohuay, jigix yaj'ó'ccixipy je tügpicypi ma je madaaxpicypï naaxhuiñjây ajcxy. Chi yaj'ögip ajcxy müd tzip, müd yuuba'm, etz müd iyujc ahua'nbi huidibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat müd Dios y'ayuc ycixpi, huidibi anajty ajcxy capxhuäcxixp etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ögy patp müd Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma ich ajcxy. ¿Jadu'ñyi jada' mjac-huäcxiba'ñ mina anajty yi jäy ajcxy mdiydunaangixy mdzaachytunaangixy müd ypocy ycixpi huidibi xyaj'o'c ich ajcxy, yi' ajcxy huidibi tzinaayb naaxhuiñgyixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpoocxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy müd müch ajcxy tumb ma Dios ytung, je' ajcxy huidibi yaj'ögy paadipy müd Dios y'ayuc ytiy'ajt ycixpi, tim jadu'n nej müch ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñyxijty, chi je xii yajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin. ¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidiy. ¹⁴ Chi je tzajp yjihuäcni jadu'n nej tüg libro'abidity. Tüg'öciy tungop huidibi naaxhuiñgixy etz huidibi mejy'agujc, cijx chondägy ypidictäy ma anajty y'ity. ¹⁵ Huin'it ñayyütztaayi je reydiyc, je mijtungmüdpidijc, generaltjic, comeeñydiyc, pinjaty ymic'ajt müd, je tumbidijc etz je midumbidijc ñayyütztaayi ajcxy nidüg'öciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Nigägootcich nigägootcich, ca'ydi ich ajcxy njac'ijxi yhuiñyijp je huidibi iñaayb ma Dios y'ane'mdac, e nañ ca'ydi nbáatcixyich je tzaachypï ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñjây. ¿Pin je' ocmimadägip ajcxy chip y'ejcïn?

7

Huidibi anajty ajcxy tiy'ajtmüd ma je Israel jäy ajcxy

¹ Chi co jadu'n yjajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzciy. Adujccixy anajty je madaax'it poj ca'ydi ypojy ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiiniy anajty xibidzimy'amy, midity ma yci' je Dios juugypí yselli. Jadayaabi ángel ooy mic miyaaxy je jamidaaxpi ángeles ajcxy huidibi anajty ajcxy ti ycidigiiygixy je mic'ajt je cõtujcin nej huaad yajhuindigooygixy tijaty ya naaxhuiñ etz ma nii mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocin, je tiibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñyi je' tiibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchigui'px madaax mil je' ñaybaati huidibi anajty ajcxy tiy'ajt miiid ma yhuimboc ma nidüg'óciy Israel jäy ajcxy. ⁵⁻⁸ Majmetz mil anajty ajcxy tiy'ajt y'ijxpejt midity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftalí jäy, majmetz mil je Manasés jäy, majmetz mil je Simeón jäy, majmetz mil je Leví jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip miiid poob huit

⁹ Chi jada' nhuin'ijxyich janch mayjäy choon ma canaag nación, hue' ajcxy canaagnax raza'adyii, e capxy ajcxy canaagnax ayuc, etz choon ajcxy ma canaag cajp. Hue' je mayjäy ytinay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñimujcy ma je Dios y'ung yhuinduu, ni pin je' anajty huaad camichoudäy ajcxy. Ac poob huit anajty ajcxy miiid yxoxity, e ymiiid anajty ajcxy tiixy'aay ma yci'. ¹⁰ E janch mic anajty ajcxy miyaaxcixy Dios, chachminaangixy: Hich ajt nDios yi' je' tügpajc huidibi xyajpocyhuaatzim. Hich ajt nDios yi' je' huidibi ane'mdaayb tüg'óciy, e nañ jadu'n yi' y'ung, je Cordero.

¹¹ E nidüg'óciy je ángelestijc anajty ajcxy ytinaaygixy jühuidityi ma je Dios y'ane'mdac. E cham je mijjäy ajcxy etz je madaaxpi iyujc huijoj'ihuüy ajcxy ma je ane'mdac huinduu, huindzigiiygixy yajmij'ajtcixy je Dios. ¹² Chachminaangixy: Jadu'n jada. Amén. Hich ajt nDios, je' mihuaad huinixi huinitiempo tüg'óciy je iihuín, je xondaacin, je oy'ajtin, je ixpijcin, je jäygidaacin, je cömayin, je ane'min, je mij'ajtin. Amén. Jadu'n jada.

¹³ Huin'it nidügti je mij jäy ycapxy, e xy'amidooyich:

—¿Pin jada ajcxy jada' huidibi poob huit miiid yxoxity, e ma yi' jada' ti choongixy?

¹⁴ Chi ich je' n'adzooy:

—Huindzinich, miich mnejhuüy.

Huin'it je' xy'adzooyich:

—Jada je' ajcxy tiibi je mij ayo'n minajxcixy yajnajxcixy, e ti ypocyhuaatzcixy miiid je Dios y'ung, je Cordero ñi'py, tim jadu'n nej jihuüy yhuit ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xim tzuum ma Dios ytiyc tzajpjoty. E yi' Dios y'ung huidibi iñaayb ma je mij'ane'mdac, yi' yi' mi'ijttaayb cuend'aty ma yi' yhuinduu. ¹⁶ Ca'p ajcxy jacjihuüyigixipy yuu tidzibi, ni xian ycajacnögiiyb ajcxy, ni anbi ycajacyajtzibiiyb ajcxy. ¹⁷ Com je Dios y'ung, je Cordero, huidibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuüy cöbixy cuend'aty, e yajnicxip ma je nii huätzpi ymuxy huidibi yejcp jugy'ajtin. Dios yajquägipy yi' ajcxy ytajin ymayin jigix ca' yjacjiiygixipy yjacyáaxcixipy miiid tajin mayin.

8

Je mihuixtujcpi selli etz je poomjogi'ñ ac oori

¹ Co Dios y'ung, je Cordero, yaj'ahuaach je mihuixtujcpi selli, huin'it y'ijty oy jahuengi cup hora amoñi jiiyby tzajpjoty. ² Chi nhuin'ijxyich Dios y'ángeles huixtujc ajcxy ytinaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel miiñ, chi je' ytinaay'ihuuy ma mesi huinduu ma je Dios ojadajtac. Je ángel ymüid anajty tüg poomjogi'ñ ac oori. Chi ymooyi poom may'amy huiidibi jojc. E je poomjoc tigüyb ma Dios yhuinduu quipxi müid juydacin nuucxtacin huiidibi je jäy ajcxy ytumyb huiidibi Dios ti huin'ixy ajcxy. ⁴ Ma je ángel yci'am jim je poomjoc chooñ ñicxy ma Dios yhuinduu quipxy müid je oración huiidibi ajcxy ytumyb je tübi ypocyhuaatzcixy. ⁵ Huin'it je ángel majch je poomjogi'ñ, chi yaj'ujch müid jünbajc huiidibi anajty jim ma je Dios ojadajttaacin, chi najtzjibibüy naaxcíxy, huin'it ooy yajmidooy jidihtin micpi etz huidzuc e je naax ooy yücxy.

Je maytrompeti

⁶ Je huixtujcpi ángeles ajcxy huiidibi anajty müid je huixtujcpi trompeti, ñayni'ixüyi ajcxy co yajxüxaangixy.

⁷ Je midügpi ángel yajxuxy je ytrompeti, e huin'it ooy eneedütz yca'y mihuididü jün etz ni'py. Chi oy ycäy naaxcíxy. E jahuengi cujc-huäcxy oy nögy je naax, je quipy etz je aay ujtz tzuxjatypi etz nöctay müy.

⁸ Je mimetzi ángel yajxuxy ytrompeti, chi ooy ycäy mejyjoty jadu'n nej tüg mijcop janch tooyb anajty müid jün, e jahuengi cujc-huäcxy je mejy oy y'ahuimbity ni'py. ⁹ E jahuengi cujc-huäcxy oy y'ögy huiidijaty anajty tzinaayb ma je mejy. E je maybarco huiidijaty anajty ma je mejy, nañ jadu'n jahuengi cujc-huäcxy oy ytimyhuindigoydäy.

¹⁰ Chi je midügpi ángel yajxuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjün huiidibi nayyajcodücxim. Je madza' oy ycäy ma jahuen cacujc-huäcxy mijni, etz ma ni müxy. ¹¹ Je madza' hue' je' anajty xü'adyii ta'm'ujtz. E je ni jahuen cacujc-huäcxy oy yajtni ta'm, jadu'n yta'mity nej ta'm'ujtz, e ooy jäy may y'o'cy müid je ni ycixpi co anajty ti y'ahuimbity ta'm.

¹² Je mimadaaxpi ángel yajxuxy je' ytrompeti, e huin'it jahuen cacujc-huäcxy je xü oy yhuindigooy, e nañ jadu'n je po' etz je madza' jahueng cacujc-huäcxy oy yhuindigooy. E müid jadu'n ycixpi je po' etz je madza' yhui'ngixy jahuen cacujc-huäcxy agootz, e jahuen cacujc-huäcxy ytiicxin ocyejcni ajcxy xim tzuum.

¹³ Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'ñ janch mic:

—¡Ay! ¡Naaxhuiñjyäj ajcxy ayoobidijc! co anajty trompeti yajxüxy je jatugügpí ángeles ajcxy, huin'it ayo'n ypada'ñ je naaxhuiñjyäj ajcxy, ayo'n ypadamy ajcxy, ayo'n ypadamy ajcxy.

9

¹ Chi je migooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcíxy. E chi je madza' yajmoy je ahuaasti huiidibi müid yaj'ahuädzip je ayoodac ma Dios cuend'aty müidity je ca'oybidijc. ² Chi je ángel yaj'ahuaach je jut ma je ayoodac, e ma je jut jiiyby ypidzimy jadu'n nej jünjoc huiidibi pidzim ma tüg horni. ³ E ma je joc ypidzimy ooy maymu' naaxhuiñygixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty müidity ytiip. ⁴ Chi je' ajcxy yajcötujcmoy co ca' ni ti aay ni ti ujtz yajhuindigóoygixipy huiidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachihuipy je jäy ajcxy huiidibi ca' müidity Dios ytiy'ajt y'ijxpejt ma yhuimboc. ⁵ Ca' ajcxy yajcötujcmoy co yjäyyaj'ó'ccixipy, jëyi co janchtiy ayo'n ajcxy yegipy migoox po'. E je ayo'n huiidibi anajty ajcxy yejcpy jadu'n je' nej co ca'ty jäy yajtzaachüy

müid ytijp. ⁶ Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcxipy. Ooy anajty janijot'ájtciy o'cin, e cöguëgiib ajcxy je o'cin.

⁷ Je maymu' jadu'n je' anajty yquëxigy nej maygohuay huidibi ni'ixi'ijtcixp co yajnicxáanigixy ma tzip ytuna'ñyii. Ymüid anajty je maymu' ma ycohuajc jadu'n anajty quëxigy nej oori coroni. E je maymu' yhuiñyjijp jadu'n yquëxigy nej jäy yhuiñyjijp. ⁸ Je maymu' ymüid anajty ycohuay jadu'n nej töxyjäy ycohuay, e ytiitz jadu'n nej jamgaa ytiitz. ⁹ E je maymu' ymüid anajty ajcxy jadu'n nej pujx huidibi müid ñinïcx cohuaangixy. E co ajcxy queec-huidity, ooy ajcxy yqueec yaj'amüy jadu'n chachne'mïy nej je carro huidibi cohuaay ajcxy yjugujcyp co ñicxcixy ma tzip ytuñyii. ¹⁰ Je maymu' ymüid anajty ajcxy ypïxy tim jadu'n nej ca'ty ypïxy, e ma ajcxy ypïxy ymüid anajty ytijp. E ma ajcxy ypïxy müidity anajty je mic'ajt co jäy ajcxy yajtzaachihiipy migoox po'. ¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxiiity Apolión, hue' je yxii yhuimbïdzïmy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je müdudujcpi ángel yajxuuxy je ytrompeti, chi nmïdooyich tüg ayuc choon ma je mïdaaxpi huaj mu'n ity ma je altar ac óoribi, huidibi anajty ijtp ma Dios yhuinduu. ¹⁴ Je ayuc ymïna'ñ:

—Nima' je müdudujcpi ángel huidibi anajty trompeti müid: “Najtzmazdi' yi mïdaaxpi ángeles huidibi ajcxy coxoch ijtp ma Eufrates mijñiba'.”

¹⁵ Huin'it oy yajcoguejttuutciy je mïdaaxpi ángeles, jigix yjäyyaj'o'ccixipy jahuen cacujc-huäcxy huidibi yajpatp ya naaxhuiñ. Je mïdaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jïmït co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmïdooyich co ajcxy michoy je soldadtijc huidibi anajty ajcxy cohuaagix. E hue' mejtz mïgo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohuaay ajcxy, e müid je ñijäy ajcxy huidibi anajty yaj'iñaaayb. E je ñijäy ymüid anajty ajcxy pujx ma ycaach, je' müid ñinïcx cohuaangixy. E je pujx hue' anajty ycolor tzaptz, azul etz pu'tz. Je cohuaay ajcxy jadu'n anajty ycohuajc nej jamgaa ycohuajc, e ma ajcxy y'ahuac ypidzïmy nej jïin, nej jïinjoc, etz nej azufre. ¹⁸ E müid jada jahueng cacujc-huäcxy naaxhuiñyjäy chach'o'cy ajcxy müid je jïin, je jïinjoc etz je azufre ycixpi huidibi anajty pidzïmb ma je cohuaay ajcxy y'ahuac. ¹⁹ Je cohuaay ajcxy ymüid anajty mic'ajt ma y'ahuac etz ma pïxy. Com je' ajcxy ypïxy jadu'n je' anajty nej xoox müid ycohuajc, e je cohuaay ajcxy chach'ahua'ndaaccixy müid ypïxy.

²⁰ E je jacjadyii jäy ajcxy huidibi ca' y'o'cy müid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigïygixy. Nañ jadu'n ca' ajcxy ixmajch nej ajcxy huindzigïygixy huidijaty ajcxy oyduñyip müid plata, müid bronce, etz tzaadzech etz quipychech. Je huidijaty ajcxy y'oydumyb etz ñidzejtztuutciy, ni yca'ijxcixy, ni ycamïdoogixy, ni yca'yöygixy.

²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäyyaj'o'ccixy, jadu'n nej ajcxy tzachcaxpojcixy ymïgügtijc, jadu'n nej ajcxy hu-ingbi töxyjäy tzachmïgapxtigooygixy, etz jadu'n nej ajcxy chachmeetzcixy.

10

Je ángel müid je mutz libro

¹ Nhuin'ijxyich co choon tzajpjoty tüg ángel micpi ñiducyity müid joc, e müidity i'ñch ma ycohuajc. Je yhuiñyjijp yquëxigy nej xii. Je' ytecy jadu'n yquëxigy nej mijjïnye'n. ² E ma yci' müidity tüg libro yëphuäcxy, e pidacy y'a'oydecy mejyhuingixy, e y'anajtytecy pidacy naaxhuiñgixy. ³ Chi je ángel oy janch mic yaaxquecy jadu'n nej tüg jamgaa yäxy. E co anajty jadu'n ti yaaxquëgy, chi oy yajmïdoy huixtujc jidijtin huidibi ycapx yci'm'ayuc.

⁴ Co je huixtujcpí jidijtín oy ycapxtaaygíxy, chi ñich anajty njaaya'ñich huidibí tì capxy. Chi nmidooyich tüg ayuc choon' tzejpjoty xyñimaayich:

—Mi'it jada ayuc yüch huidibí yí huixtujcpí jidijtín tì capxy, ca' mjaay.

⁵ Chi je ángel huidibí nhuin'ijxich co mejyhuingíxy etz naaxhuiñyíxy ytinäy, yujcxajy yci' a'oy'amybí tzejpcíxy. ⁶ Chi je ángel capxcödujcy co je Dios huidibí jugy'ajtp huinixii huinitempo, je huidibí yajcojy je tzejp, je naaxhuiñyí, je mejy etz tüg'ócíy huidibí jilby yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypí ayo'n ya naaxhuiñ. ⁷ Co yhuaad'ajtnip je xii je tiempo ma anajty je mihuixtujcpí ángel yxuux yajxutzondägy, chi cuyduunip je Dios y'ayuc ytiy'ajt huidibí ca'pín anajty huinjihuíy, je ayuc huidibí je Dios ytumbidijc je profetas ajcxy ñajtzcapxiy jecy'ajty.

⁸ Je ayuc huidibí nmidoohuich, je huidibí anajty tì choon' tzejpjoty, ycapxy je' jadüg'oc, e xyñimaayich:

—Ñicx miich etz ciyíy yí libro huidibí yëphuäcxy yí ángel ymüid ma yci'. Je' je' je ángel huidibí anajty tinaayb mejyhuingíxy etz naaxhuiñyíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojñicxnax, e xyajta'mmüiyip mjot e ma miich m'ahuac mjihuñhuipy päg jadu'n nej ceripäg.

¹⁰ Huin'it ñich je pi'clibro ngiyígy huidibí je ángel anajty ymüid ma yci', e chi ñich je' ngöjicxnajxy. Ma ñich n'ahuac njihuñyich janch päg jadu'n nej ceripäg. Co oy ngojñicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajñimaayich:

—Ñicx miich capxhuäcx jadüg'oc je ayuc huidibí Dios tì xymöy, je huidibí tì mgapx-huäcxy ma je mayñaax maygajp, ma je mayñaciones, huidibí canaag ayuc capxcixp, etz ma je reydiyc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxígy jadu'n nej baari huidibí quipx yajhuamb. Chi ajcxy xyñimaayich:

—Pidíg e quipxta' yí Dios ytiyc, nañ jadu'n quipx je mesi ma Dios yajhuindzigíy, etz nañ jadu'n míchou naag jäy ajcxy jilby Dios huindzigíygyxy. ² Je Dios ytiba' ahuing miich je' pidäg, ca' mguipxipy. Com yí' yí' tì ycidigíyíi yí jäy ajcxy huidibí ca' yjudíojäyity. Yí jäy ajcxy huidibí ca' yjudíojäyity ymimadägamyb ajcxy je Jerusaléngajp ma Dios müidity tzinaydac etz ane'mamb ajcxy jilby huixchiguipx metz po'. ³ Ñich metz testigo nguexipyich ma je cäp ma Dios müidity tzinaydac, e yí' ajcxy capxhuäcxamb ñich n'ayuc tüg mil jametzmigo'px jatugi'px xii. Yxoxyity ajcxy müid huit nücuyjaam ixcujaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibí tinaaygixp ma je Dios yhuinduu, je huidibí ñaaxhuiñyí ane'mb. ⁵ Pen jì pín nej jaty müidundigoya'ñ je metzpi testigo, je' ajcxy yajpidzimip je' ajcxy jün ma y'ahuac, yjicxtähuipy yjündähuipy je' ymidzip. E jadu'n je' y'ögipy pinjaty anajty je metzpi testigo müidundigooyb. ⁶ Je metzpi testigo ymüid yí' ajcxy cötujc co ahuäctúccixity je tzejp, ca'ydi ytüy jadu'ñyí tiempo anajty ñhuäcxixy capxhuäcxixy Dios y'ayuc ytiy'ajt. E nañ jadu'n ymüid ajcxy cötujcín co ñii yaj'ahuimbijtcixipy ni'py. Yí' ajcxy yajtuniib yaj'jadiib canaagnax ayo'n ya naaxhuiñ, naag'oc anajty ytimdzójccixy. ⁷ E co anajty je metzpi testigo ajcxy yajmaaygixy ytung, chi je iyujc huidibí anajty pidzimib ma je ayoodac, je abismo, je' je' tziptuunip müid je metzpi testigos etz yaj'öctähuip je metzpi testigo. ⁸ Chi je metzpi testigo ñinícx ajcxy yhuimipy mijñigujc mütügujc jím ma je mij ciudad ma

je Huindzin Jesucristo yajcruudzpejti, je cajp huidibi tundigooy mïid Dios tim jadu'n nej Sodoma etz Egipto ytundigooy jecy'ajty. ⁹ Nijëjity jäy ajcxy huidibi xi ya conaaxip cogajpïp, oy ypinjäyity, oy ti ayuc capxcixy, y'ixipy ajcxy tugüg xii jagup je metzpi testigo ñaaxnïcx mïjtügüj, e ni ca'a'ixihuiipy ajcxy co yajnaaxtigihuiyb. ¹⁰ Huidijaty ajcxy tzinaayb ya naaxhuiñ ooy yxondáaccixipy etz yjotcugüygixipy mïid je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy mïñ xyipy ñaymóoyigixipy tijaty, e ñayyajnigüéjigixipy tijaty. Com je metzpi yëydijc huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñjyäj ajcxy. ¹¹ Codugügxi jacup naxy, chi Dios cijx yajjugypïctäy je metzpi öcpi, e chi ajcxy jadüg'oc ypidigy, e pinjaty je' iix, ooy je' ajcxy chachchigüi. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jüby tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigüy tzajpjoty ma tüg joc, e iixi ajcxy ymidziptijc. ¹³ E janch huin'itïy ooy naax yücxy mïid tüg mic ujx. E tüg picypï je majc picypï jäy jim Jerusalén oy ymijähuiygixy. E mïid je ujx ycixpi y'o'cy ooy mayjäy, ñaybaati je öcpi huixtujc mil yëydijc. E jacjadyi jäy ooy chigüygixy yjihuiygixy, e ojadajtcixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiiñ je midugügpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic ymïnañ:

Je ane'min huidibi ya naaxhuiñ, yï' je' cham mïid ajt nHuindzin Dios etz yï' yCristo, e yï' je' ane'mip huinixi huinitio.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuijoj'ihuiydaaygixy, e chi ajcxy ooy Dios ñibaty capxpaty, ymïnaangixy:

¹⁷ Huindzin Dios, Dioscojuyip nyajnáxcixpich ma miich, huidibi jac mic'ajt mïid ca'ydï jac pin. Miich tüg'ócïy mdundaayb mjaajtaayb mnejhuiydaayb. Miich je' huidibi ijtñaayb, e ti m'ijtnäy, e m'ida'ñyi, com miich ti m'ijxcugüy je mgötujcin, e ti mbidägy m'ane'min.

¹⁸ Mayñaax maygajp mayñaaxhuiñjyäj ooy yjotmäty ajcxy, mïid co ti xii hori paady co miich mdzaachytuna'ñ je jäy ajcxy mïid ypocy ycixpi. Ti je xii je hora paady co miich mdiyduna'n je jäy ajcxy tiibi y'o'ccixy. Ti je xii je hori paady co miich mmöhua'ñ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigüyïp, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigooygixyp naaxhuiñjyäj ajcxy.

¹⁹ Je huin'it tiempo oy Dios je ytijc y'ahuäch jüby tzajpjoty, e chi nhuin'ijxyich je caax ma Dios ycötujcin y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidiitin, etz njihuiyich tüg ujx, etz ooy yca'y eneedïtz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxïgy tzajpcixy tüg iixpejt mïjpi. Tüg töxyjäy ñidigooyity mïid xii, jadu'n nej jihuiy mïid tüg huit ñimochity, e jadu'n yquëxïgy nej jihuiy anajty po' yajhuäcpety, e ymïid ma ycohuaic tüg corona ac oori huidibi majmetz madza' mïid.

² Jadayaabi töxyjäy hue' anajty ungmijäy'ajtp, e janch yaax tinaayb je' anajty mïid je tzaachypï, mïid co y'ung anajty yajma'xung'ada'ñ. ³ Huin'it oy yquëxïgy jadüg tiy'ajt iixpejt tzajpcixy. Tüg ama'y tza'ñ janch mij, tzaptz ycolor, e mïidity huixtujc ycohuaic,

majc ymu'n, e tög corona majaty ycohuaic. ⁴ Je mij tza'ñ mïd je' ypïxy jugujcmujcy jahueng cacujc-huäcxy je madza' jim tzejpcïxy. Chi je' najtzyemïyday je maymadza' naaxhuiñgïxy. Je mij tza'ñ oy yhuäcxipy ma je töxyjäy yhuinduu huidibi anajty ungbadamb tzojc, chi tzüdza'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tög pi'cyëdyjc, huidibi ane'mip mïd Dios ymic'ajt, ymïd yi' tög pujxtajc huidibi iixpejt ajt co mij ane'min mïdity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mïjtigïdum, ma anajty Dios ti ñi'ixïyi y'it ylugar co jim y'idipy, e jim ymöhuiyb ycaayin y'uucin tög mil jamejtmïgo'px jatugi'px xii.

⁷ Je huin'it tiempo tög tzip yjajti tzejpjoty mïd je' ycïxpi. Chi Miguel huidi mij cötujcin mïd, mïd jadyi y'ángeles ajcxy, ooy chiptuñ mïd je ama'y tza'ñ etz yi' y'ángeles ajcxy. ⁸ E ca'p je ama'y tza'ñ ajcxy ymadacy ma je tzip, e ca'p je' ajcxy mïd'ajty tigïydac tzejpjoty. ⁹ E jadu'n Dios yajqueecy je mujcu', je ama'y tza'ñ mïjyabi, jiiyby tzejpjoty. Je' je' je ama'y tza'ñ huidibi xii'ajtp diablo etz Satanás, je huidibi huin'imb tög'óciy naaxhuiñyäj. Je mujcu', je ama'y tza'ñ, mïd je' y'ángeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmïdooyich tög ayuc janch mic tzejpjoty choon, yminañ:

—Ti je xii je tiempo nigoody mina Dios ti nihua'ñ ti yajnidzögy jäy ajcxy ma je mujcu'; mina Dios ti yajnigüëxïgy yi' ymic'ajt; mina Dios ti yajnigüëxïgy yi' y'ane'min; etz mina Cristo ytigïy ane'mbi mïd ymic'ajt. Com ti Dios cötijnaxy je mujcu' huidibi tzachxïp iich ajt nmigügtïjc, je mïbijcpidïjc. Je mujcu' anajty tzachxïp ajcxy xim tzuum ma Dios. ¹¹ Hich ajcxy nhermanotïjc ti yi' mimadaaccïxy je mujcu' mïd je Dios y'ung ñi'py, etz mïd je' y'ayuc ytiy'ajt tiibi mïbijccïxy, je huidibi ajcxy nidiy'ajtcïxp ma yi mayjäy. Ca' ajcxy tzigïy anajty co yjugy'ajt ytigöoygïxip. Nigi ni'ixï y'ijtcïxy anajty mïd ymïbijcin oy ytimy'ó'ccïxipy. ¹² Jotcujc'ajtcïx etz jotcugïygïx huidibi jiiyby tzinaaygïxp tzejpjoty. Ayo'n ypadamyb ajcxy huidibi tzinaayb naaxhuiñgïxy etz mejyjoty. Com je mujcu' ti je' ycidägy ma miich ajcxy mïd chip y'ejcïn. Com je mujcu' ñejhuiyb co tim jayinjaty jahuenjaty xii tiempo jacmïdity.

¹³ Co je mujcu' iixy co ti yajcötijnaxy ya naaxhuiñgïxy, chi ooy pahuidijttacy je töxyjäy huidibi anajty ti yajpi'c'aty pi'cyëdyjc. ¹⁴ Chi je töxyjäy metz me'tyqueec mïjpi yajmoy, jigix cöguëgipy je ama'y tza'ñ, ñicxip agueegïccip mïjtigïdum ma je ama'y tza'ñ ca' ñijädiyby. Jim mïjtigïdum yajmoy ycaayin y'uucin tugïg jimïjt ja cup. ¹⁵ Chi je ama'y tza'ñ ooy nï yajpidzïmy ma y'ahuac, jigix y'ahuimbidity mij nï huidi je töxyjäy pagujip mij nïjoty. ¹⁶ E yi naax ooy je töxyjäy pubejty, chi je naax y'ahuäcxy, e uuctïtztay je nï huidibi anajty je ama'y tza'ñ ti yajpidzïmy ma y'ahuac. ¹⁷ Mïd jada ycïxpi je ama'y tza'ñ ooy y'ahua'ndacy mïd je töxyjäy, chi ñicxy tziptumbi mïd je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

13

Je metzpi ca'oy'iyujc

¹ E jim ndinay'ihuiyich ma pïjot mejypäbi. Chi nhuin'ijxyich co tög iyujc janch oy chigïyñi ypidzïmy mejyjoty ymïd anajty huixtujc ycohuaic, e majc ymu'n. E ma ymu'n mïdity majc corona. E ma ycohuaic mïdity anajty cojaay yxii huidibi yajjotma'tp Dios. ² Jadayaabi ca'oy'iyujc huidibi nhuin'ijxyich, jadu'n anajty yquëxïgy nej tög cuuxyubïjy. E ytecy jadu'n anajty yquëxïgy nej osi ytecy, e y'ahuac jadu'n anajty yquëxïgy nej jamgaa y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³ E n'ijxyich tög ycohuaic ma je ca'oy'iyujc co mij chaachïjty, nej jihuïy je' yaj'ögïb. Chi je chaachï'au oy choogy, e tög'óciy naaxhuiñyäj ooy janch jihuïygïxy huinmaaygïxy mïd

jada ycixpi co ti choocy. Chi je mayjäy ajcxy panicxy je ca'oy'iyujc. ⁴ Je mayjäy ajcxy ooy huindzigüigixy je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigüigixy je ca'oy'iyujc, chachminaangixy:

—¿Pin jada' ocjadu'nip nej jadayaabi ca'oy'iyujc, e pin jada' octziptuunip miid yi'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi miid'adipy ane'min cötujcin huixchiguïpx metz po'. ⁶ E jadu'n je' tuuñ. Nigapxy ni'ojüy ooy Dios. Nigapxi Dios yxii oy ca'oy, etz nigapxi ni'ojüy Dios ytiyc. Nañ jadu'n nigapxy ni'ojüy huidibi ajcxy jiihy tzinaayb tzajpjoty. ⁷ Chi mic'ajt ymooyi, jigix chiptuunip miid je huidijaty mibijcp Dios, huidijaty miid ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñyäjy huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñyäjy ajcxy huidijaty janch ni ycamiiñ yxii jaybety ma je jugy'ajt libro huidibi je Dios y'ung, je Cordero, ymiid. Dios yhuinma'ñypidacy jayijp ca'ni naaxhuiñybi anajty chondägy co y'ung y'öga'ñ miid jäy ajcxy ycixpi, jaydëbi cijxjaayi ajcxy yxii ma yi jugy'ajt libro.

⁹ Pinjaty tädz'ac miid, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp yi' ajcxy huidijaty mibijcp Dios, huen yajtungixy miid ymigügtijc mecxtujcin etz mibijcin.

¹¹ Huin'it nhuin'ijxyich jadüg ca'oy'iyujc chooñ naaxjoty, e ymiid anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'ñ ycapxy. ¹² Je mimetzpi ca'oy'iyujc ymiid ane'min huidibi je jayijpi ca'oy'iyujc ti ymöyüi. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyäjy huen ojadajtcixy huindzigüigixy je jayijp'atyp ca'oy'iyujc huidibi anajty je chaachi'au ti chögy.

¹³ Nañ jadu'n ooy anajty tijaty mijhuinma'ñ tuñ, ixti jün yajcödigüyb tzajpcixy, yajcäy naaxcixy ma jäy ajcxy yhuinduu. ¹⁴ E miid je mijhuinma'ñ huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajnigojtútcixipy je ca'oy'iyujc huidibi anajty tzachijip miid espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajnigojtútcixy, jigix je' ycapxipy etz nañ jadu'n jigix je' ane'min pidägipy co yaj'öctähuipy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeeñydijc, ayooöbitijc, tumbidijc, midumbidijc etz jac pinjaty co huen ajcxy tiy'ajt iixpejt jadu'n pidaaccixy ma ajcxy y'aoygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymiid je ca'oy'iyujc tiy'ajt y'ixpejt, o yxii, o je' yxii ñinúmero. ¹⁸ Jadayaabi ayuc chojcpy xpijcin, pinjaty huinjihuüyb jëbi mihuinma'ñybaady ti número je ca'oy'iyujc miid. Je' je' je número huidibi tüg jäy miidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchiguïpx milbi yëydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögop huidi yxii Sión. Ymiid anajty migo'px jahuixchiguïpx madaax mil jäy huidibi anajty ajcxy miid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhuinmidooyich tüg ayuc chooñ tzajpjoty, jadu'n nmidooyich nej mijñii y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy igixy tüg iy jemybi ma je mij'ane'mdac yhuinduu, ma je midaaxpi iyujc

jugu'ajtmüdpí yhuinduu, nañ jadu'n ma je mijjáy ajcxy yhuinduu. Jac ni pin je' anajty ca' huaad ixpícy je iy, jéyi ajcxy je huixchiguípx midaax milbi jébi ixpijccíxy je iy, je huidibi ajcxy Dios ti yhuin'ixyíi etz ti yajnidzögy ya naaxhuiñ. ⁴Jada je' ajcxy huidibi ca' ajcxy migapxtigooygíxy töxyjäydíjc, huädz tudägy ajcxy yjot yhuinma'ñ müdity, ca' ajcxy pijccíxy. E ypanícxyp ajcxy je Dios y'ung, je Cordero, oy tim ma'ámy ñícxý. Yí' ajcxy je jayíjp'atypi jäy ya naaxhuiñ huidibi Dios ti yjuybidzimy ma anajty ijtíxy codoogíy müd ypocy ycíxpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayíjpí je almas ajcxy huidibi ti yajpidzimy ya naaxhuiñ. ⁵Ni ti aníi ti ycayaipaady ma je' ajcxy. Com ca' ajcxy tibocy müdity, ca' ti xíhuin ajcxy müdity ma Dios y'ane'mdac.

Je nidugügpí ángeles ajcxy y'ayuc ytiy'ajt

⁶Chi nhuin'ijxyích jadüg ángel yqueec-huidity cuptzajp, e ymüd anajty Dios ytiy'ajt jemybi oybi huidibi ijtp huinixíi. Hue' je' yajcapxhuäcxip ma huidibi anajty ajcxy tzinaaygíxp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷E je ángel ymína'ñ anajty janch mic:

—Tzigüygíx Dios, huin'ügíx huinyaaxcíx cömaygíx Dios. Ti paady je xíi je hori mína Dios tiyduna'ñ yajtigoya'ñ yí' ajcxy huidibi jibic tumb. Ojadajtcíx je huidibi yaj'oyíy je tzajp etz je naax, je meyy etz majaty ní ymuxy.

⁸Co je müdügpi ángel ycapxtaay, chi je mimetzpi ángel ymína'ñ:

—Ti ymic'ajt ytigoydäy je Babilonia je mijpi cajp. Yí Babilonia jäy ti yajhuinma'ñydgoydäy je naaxhuiñjäy müd yjibic-huinma'ñ, paady yí Babilonia jäy ayo'n müdity cham, com je Dios ti ymíjotmättäyíi ajcxy. Jadu'n Babilonia nipaady nej tüg töxyjäy huidibi huin'ümb yéydíjctíjc müd aníi etz jocníi.

⁹⁻¹⁰Co je mimetzpi ángel ycapxtay, chi je müdugügpí ángel ymína'ñ janch mic:

—Pen pinjaty huindzigüyb yajmíj'ajtp je ca'oy'iyujc etz je ñígojtuutín etz nañ jadu'n cöbíjccíxy je ca'oy'iyujc ytiy'ajt y'íjxpejt ma yhuimboc o ma yci', hue' Dios tzaachytuníib yí jadu'mbí jäy ajcxy mictägy, ypaadíp ajcxy Dios chip y'ejcín. Tim jadu'n nipaady nej jihuíy Dios yaj'ügyíi ajcxy je vino níi huidibi yí' ti ní'ixíy. Dios ti ní'ixíy je it ma ajcxy ayo'n pada'ñ, tim jadu'n nipaady nej je tasi ma Dios yvinoníi ijtp. Chi je' ajcxy ayo'n paadipy ma ytoy je mijjín müd azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹Je jínjoc huidibi anajty pidzimb ma anajty je mayjäy ayo'n paatcíxy, pidzímip je' huinixíi huinítiempo. E ní pocxín ycaca'ty xím tzuum müd je pinjaty anajty huindzigüyb pa'tjihuíyb je ca'oy'iyujc etz müd y'ahuinax, o pen ycöbíjccípy anajty je ca'oy'iyujc yxíi ycojayity ma yhuimboc o ma yci'. ¹²Com Dios chaachytunamyb je jäy ajcxy huidibi ijtp müd je ca'oy'iyujc, paady ycíxp copícy co yí jäy ajcxy huidibi ijtp müd Dios huen cuydungíxy yajxon Dios y'ane'mín ycötujcín etz huen mibíjccíxy mijpídaaccíxy tudägy Jesús, etz nañ jadu'n yajtungíxy mecxtujcín ma ajcxy chinaayín.

¹³Nmidoohuich tüg ayuc tzajpjoty choon xyñimäyích anajty:

—Cojay jada ayuc: “Jadachambi etz jacnícxpi xíi tiempo, jotcuyc ajcxy huidijaty öccíxp co mibíjccíxy je Huindzín Jesús.” Je Espíritu Santo ymína'ñ co jadu'n tunamb jadamb, pocxníp ajcxy nej ytungíxy, e co ajcxy yjadípy tzajpjoty, chi ajcxy nejhuíhuip je' ajcxy tzajpjoty tzinaaybí jadu'n nej je mibíjcpí ajcxy anajty oybi ti tungíxy.

Co Jesús anajty miñ tiyduñ tzaachytuñ jibícjäydíjc

¹⁴Chi jada' nhuin'ijxyích tüg joc janch poob. E ma je joc nícx íñäy tüg yquëxígy nej je jäy huidibi tzoön tzajpjoty (je Cristo). Je' ymüd anajty ma ycohuajc tüg corona ac oori, e ma yci' müdity tüg hoz janch jippi. ¹⁵E ypidzimy ma je Dios chinaydac jadüg ángel, je' tzachmíyäxy anajty janch mic je huidibi anajty íñaayb jocnígíxy, ymína'ñ:

—Pidäg yí mhoz, e yajpidíg yí cosecha, com ti paady je xíi je hori etz je cosecha ti chamní jiiyb naaxhuiñ.

¹⁶ Huin'it je' pıdacy je' yhoz ya naaxhuiñ, je huidibi anajty iñaayb jocnıgıxy, chi ya naaxhuiñ yajpidıgy je ycosecha.

¹⁷ Nañ tim jadu'n huin'it jadüg ángel ypidzımy ma je Dios chinaydac jıiby tzajpjoty. Nañ jadu'n je' anajty mıidity yhoz janch jıjp. ¹⁸ Chi jadüg ángel ypidzımy ma je Dios ojadaıttac huidibi anajty cõtujc mıid ma je jıın. Chi yaaxı janch mıc je huidibi anajty je' yhoz janch jıjpi mıid, chi nımay:

—Pidäg yı mhoz janch jıjpi ma yı muuxycha'm cosecha huidibi yajpatp jıiby naaxhuiñ, com tı ooy chamni.

¹⁹ Chi je ángel yajnaxy je' yhoz naaxhuiñ, chi yajpidıgy je camuuxycha'm cosecha, chi tüg'ıtiy yajnıgidacy ma huaad yajhuinmııcxı. Hue' je' yhuimbıdzımy co je' je' je' mıj ayo'n je mıjtaachypi huidibi Dios yquexamyb mıid jäy ajcxy ypocy ycıxpi. ²⁰ Je camuuxycha'm hue' je' oy yajhuinmııcxı Jerusalén cajpa'. Ma anajty tı y'ocnıgidacpi ypidzımy ooy nı'py janch com, ycody mabaad je cohuay ajcxy mıidity yfreno, e ymıjhuin'ajtıñ hue' anajty mıidity tugıg mıgo'px kilómetro.

15

Yı ángeles ajcxy mıid je huıxtujcnaıxpi ayo'n

¹ Huin'it nhuin'ıjxyıch jadüg tıy'ajt ıjxpejt janch mıjpi tzajpjoty, e janch oy huinmaayñı. Huıxtujc ángeles anajty mıidity cı'am je huıxtujcpi tzaachypi ayo'n huidi cogıxıyñıp, e mıid jadu'n ycıxa'ñ ytıgoya'ñ Dios chip y'eıcin.

² E nhuin'ıjxyıch jadu'n nej tüg meıy ac vidrio, e je vidrio mıhuididıı jıın. E jım anajty je jäy ajcxy huidıjaty madac co ca' huındzigıy anajty je ca'oy'ıyujc etz je' y'ahuınax, je huidıjaty ca' ajcxy cöbıjci je ca'oy'ıyujc yxıı ñınúmero. E jım anajty ajcxy ytınaaygıxy nıgıxy ma je meıy ac vidrio huidibi janch adııcxp ajajp anajty, ymıid ajcxy je arpas huidibi ajcxy Dios mooyı. ³ Ooy anajty ıgıxy je Moisés y'ıy, je Dios ytumbı etz nañ jadu'n anajty ıgıxy je Dios y'ung, je Cordero, y'ıy huidibi mııamb:

Mıj ooy, etz janch mıjhuinma'ñ huidibi mııch tı mduñ. Huındzin, mııch Dios huidibi jac mıc'ajt mııdip ca'ydı jac pın. Janch tudägy mııch mnıı'aa mdu'aa. Mııch rey'ajtp huındu'myñıaxhuiñ huınıxıı huınıtiempo.

⁴ ¿Pın mııch xyca'octzigıhuamb, Huındzin? ¿Pın mııch xyca'occömayaanıp mıxıı? Tug'óciy naaxhuiñyjäy xyajmıj'adıpy xyhuındzigıhuıpy, com mııch naydügpajc je huätzpi Dios, com mııch nyaj'ıjxp mgötujcin co ytudägyty.

⁵ Co jadu'n yajtı, chi n'ıjxyıch co y'ahuaach je Dios y'ıt jıiby ma Dios ytıjc huidibi yajpatp tzajpjoty, ma y'ıty je tzaa ma yjaybetyıty Dios ycõtujcin. ⁶ E ma je Dios yajhuındzigıy yajpa'tjıhuıy, jıiby ypidzımy huıxtujc ángeles. Ymıid anajty ajcxy ycı'am huıxtujc ayo'n tzaachypi. Hue' anajty ajcxy yxoxıty mıid huit janch oybi janch huätzpi, e janch adııcxp ajajp anajty. Ymıid anajty ajcxy oorıhuın mabaad ycaachyjıjp. ⁷ Nıdüg je mıdaaxpi ıyujc jugy'ajtmııdpi moy je huıxtujcpi y'ángeles huıxtujc tası ac tim oorı, janch ujtz je tası mıid je Dios chip y'eıcin. ⁸ E je ıt ma Dios yajhuındzigıy yajpa'tjıhuıy yajpa'tjıhuıy ujtztay je' mıid je jıınjoc huidibi jadu'n ñıpatpy nej je Dios y'oy'ajtıñ etz Dios ymıc'ajtıñ. E nı pın anajty huaad ca' jıiby ytıgıy ma je Dios ytıjc jıiby tzajpjoty, ıxtı coonı je' ycıjxtähuıpy je huıxtujcpi ayo'n, je tzaachypi huidibi je huıxtujcpi ángeles ajcxy ymıid.

16

Je tası huidibi ujtz mıid ayo'n tzaachypi

¹ Chi nmıdooyıch tüg ayuc choon ma Dios ytıjc jıiby tzajpjoty, nımay anajty janch mıc je Dios y'ángeles nıhuıxtujcpi:

—Nıcx ajcxy yajyojctıutcıx jıiby naaxhuiñ yı huıxtujcpi tası huidibi ujtzıty mıid Dios chip y'eıcin.

² Chi ñicxy je midügpi y'áangel, chi je' ytasi yajtemduty jiihy naaxhuiñ ujtz mïid may'ayo'n. E tüg'óciy je mayjäy huidibi anajty ajcxy mïid ma yhuimboc je ca'oy'iyujc ytiy'ajt, pinjaty anajty je ñigojtuutin huindzigïyip pa'tjihuiyip, chi je' ajcxy ypaati ñibidzim tüg nïbüdz janch jibicpi, e huidibi janch pijcp.

³ Je mimetzpi y'áangel yajyojctuty je' ytasi huidi anajty ujtz mïid ayo'n mejyhuingíxy. Chi je meji y'ahuimbijty ni'py, jadu'n nej jihuiy öcpi ñi'py. E huidijaty iyujc jiihy tzinaayb mejyoty, cijx je' y'öctäy.

⁴ Je midugiigpi y'áangel yajyojctuty je' ytasi huidi anajty ujtz mïid may'ayo'n maajaty je mijñi, etz maajaty nii ymuxy, nañ jadu'n ac ñi'py je' y'ahuimbijttay. ⁵ Chi nmïidooyich co je áangel ymïna'ñ huidibi ane'mb je ñi:

—Huindzin Dios, tudägy mduñ co ti mdiyduñ je naaxhuiñyäj ajcxy mïid ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypi huätzpi miich, huidibi ijtñaayb etz ti m'ijtnäy. ⁶ Com je naaxhuiñyäj ajcxy tundigooy co ajcxy teemi yojci je mibijcpidijc ñi'py, je huidibi mhuin'ijx, je huidibi ajcxy miich m'ayuc najtzcaxxiyb anajty. Paady ycixp miich je ñi huidibi yi naaxhuiñyäj y'uuccixyp, ti myaj'ahuimbity ni'py, com jadu'n ajcxy mihuaadity je tzaachypi mïid ajcxy ypocy ycixpi.

⁷ Nmïidooyich co pinjaty ma je it ma yajhuindzigïy Dios, ymïna'ñ:

—Janch jadu'n, Huindzin Dios, huidibi tüg'óciy mic'ajt mïid, mïid mdiy'ajt etz mïid mdudägy'ajtin, ti mdiyduñ je naaxhuiñyäj ajcxy mïid ypocy ycixpi.

⁸ Je mimadaaxpi Dios y'áangel yajyojctuty ma je xii je' ytasi huidi anajty ujtz mïid Dios chip y'ejcín. Chi je xii yajmoy ymic'ajt co jäy nögiib mïid je' yjiin. ⁹ E tüg'óciy jäy ajcxy yxiidzaydaayi janch mic. E ni ca' ajcxy yhuinma'ñ yajtigajch, ni ca'ojadajtcixy ni ca' cömaygixy Dios. Nigi ajcxy ooy jibic Dios nigapxy ni'ojiiy, je Dios huidibi ane'mdaayb tüg'óciy ayo'n mïid ymic'ajt.

¹⁰ Je mimigooxpi y'áangel yajtemduty je ytasi, huidi anajty ujtz mïid Dios chip y'ejcín, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodziygidactäy. Yi jäy ajcxy ooy ytoodz oc'adzützmúccixni mïid je ayo'n tiibi anajty ytuñyii yjadyii. ¹¹ Per ni jadu'n ajcxy ca'ixmajch je jibicpi huidibi anajty ajcxy ytumyb. Nigi ajcxy ooy oyñinej ycapxcixy etz ni'ojiiygixy Dios tzejpjotypi mïid je jübi pa'mii etz je nïbüdz ycixpi.

¹² Je midudujcpi y'áangel yajtemduty je ytasi huidi anajty ujtz mïid Dios chip y'ejcín ma je Eufates mijñi. Chi je mijñi ytiich jigix jëbi ajcxy je reydiyc ñaxy huidibi ajcxy tzoomb xiiidzimy'amy.

¹³ Chi nhuin'ijxyich co ypidzimy ma je ama'y tza'ñ y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugüig ca'oybi. E je tugüigpi ca'oybi jadu'n anajty yquëxigy nej tugüig tuc. ¹⁴ E je tugüigpi tuc hue' ajcxy ca'oybi ymïid, e tungixy anajty mijhuinma'ñ mïid je mujcu' ymic'ajt. E oy ajcxy huoomucy huidijaty anajty rey'ajtp huindu'my naaxhuiñ, jigix je' ajcxy chiptúngixipy mïid je mijpi Dios huidibi tüg'óciy mic'ajt mïid, co anajty je xii je tiempo yhuaad'ajtni huidibi Dios ti yajnigödugyi.

¹⁵ Jadu'n Dios ymïna'ñ:

—Cuenditungix ich n'ayuc. Ameech nhuimbida'ñich naaxhuiñ jadu'n nej meetzpi ameech nicxy meech tijaty. Paady ycixp jotcuyc pinjaty ni'ixi xy'ahuijxpich, je huidibi ypocy ti ymecxyii, e tudägy'ajtin ti paady ma ich jigix ca' jadu'n paadip nej tüg jäy huidibi yhuut ti meechyii, e jadu'n je' yhui'my nïhuädz, e tzo'ydu'n jihuiy co jäy yhuindixxyii. ¹⁶ Chi je tugüigpi ca'oybi huoomujctay ajcxy je reydiyc ma tüg it huidibi yxi Hebreo'amy Armegeedón.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzigïy Dios etz ma je' y'ane'mdac tzejpjoty, jiihy tüg ayuc choon janch micpi ymïna'ñ anajty:

—Ti ytuñyii yjadyii.

¹⁸ Huin'it ooy yjajti huidzuc, ne'min micpi etz jidijtin, ooy naax yücxý mïd tûg ujx janch micpi, niminaabi jadu'n ycajadyi maabi jây chinay'ijtigixy naaxhuiñ. ¹⁹ Chi je mij ciudad, je Jerusalén, oy yhuäcxý tugig picy, nañ jadu'n je may ciudad huidibi huindu'myñaaxhuiñ, cijx ymijähuiydäy. Chi Dios jäymejtzcoty je Babilonia cajp nej je jây ajcxy jim ytundigooygixy, e chi quejxy may ayo'n jim mïd chip y'ejcín ycixpi. ²⁰ Tûg'óciy je naax mejy'agujcpi ytigoyday. Etz tûg'óciy tungop naaxhuiñygixy cijx je' ytigoydäy. ²¹ Nañ jadu'n ooy ycäy choon tzajpjoty eneedïtz mijjatypi majaty jây ajcxy, janch jempxy anajty je eneedïtz, tûgijatypi huixchiguipxy kilo. Chi jây ajcxy ooy oyñinej nigapxy ni'ojïy je Dios mïd je eneeditz ycixpi, com ooy je' mij chachajti je ayo'n je castigi.

17

Je töxyjäy jibictzinaaybi chaachypi ycastigi

¹ Nidüg je huixtujcpi ángeles huidibi anajty ajcxy mïd je huixtujcpi ytasi ymiiñ. Chi ajcxy ymiydacy mïd ñich, xyñimaaygixich:

—Min yam, miiñ nyajni'ixiy je tzaachypi huidibi ypadamyb je töxyjäy pocyumbi, huidibi ñaayb mejyhuingixy. ² Je reydiyc ya naaxhuiñ ti ooy ytundigooygixy mïd jada töxyjäy, e je naaxhuiñyây ajcxy ti ooy huinma'ñyidigooygixy mïd jada töxyjäy ypocytunï huinma'ñ, jadu'n nej jihuïy ajcxy ooy ti ymúucigixy.

³ E Dios yjihui'ñ ymic'ajt xyajcumäyich e cumäyjoty xyajnicxyich je ángel mijtigïduum. E jim n'ijxyich tûg töxyjäy yaj'ñäy tûg ca'oy'iyujc huidibi ycolor tzaptz, e janch niducy mïd pinjaty yxï cojaayip huidibi yajjotma'tp Dios, e ymïd anajty huixtujc ycohuaic etz majc ymu'n. ⁴ Je töxyjäy hue' anajty yxojx mïdity mïd huit janch oyjatypi, ycolor ucy etz tzaptz, ooy anajty yaj'oyguëxigy mïd oori, mïd pi'ctzaa janch oybi etz perla. Ymïd anajty ma yci' tûg tasi ac tim oori janch ujtz je' anajty mïd jibic-huinma'ñ huidibi ca' y'oyjäygidaacnity, huidibi pocyunï huinma'ñ mïd. ⁵ E ymïd anajty cojaay tûg xï ma yhuimboc huidibi ca' pin huinjihuïy. Je letra jadu'n ymina'ñ: “Je mijpi Babilonia, huidibi nigop'ajtip pocyunï huinma'ñ etz tûg'óciy tijaty ca' y'oyjäygidaacnity ya naaxhuiñ.”

⁶ Mic'amy ñich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huidibi ajcxy mibijcp Dios etz huidibi ajcxy Jesús yjäy'ajtip, e jadu'n nipaady nej jihuïy je töxyjäy ti ooy ymügyi mïd je mibijcpidijc ñi'py. Co jadu'n nhuin'ijxyich, chi ooy ngijxy ngüejtyich njihuïy nhuinmaayich. ⁷ Chi je ángel xyñimaayich:

—¿Nej co mgixy mgüety? ñich miich nyajnimähuipy nej yhuimbidzimy huidibi ca' pin huinjihuïy ma yi töxyjäy etz ma yi ca'oy'iyujc huidibi yaj'ñäy, huidibi ycohuaic huixtujc mïd etz majc ymu'n. ⁸ Yi ca'oy'iyujc huidibi ti m'ixy, je' yi' tiibi chinäy e cham ca'p je' ma. Chi ypidzimipy ayoodactuuyb, jayijp ma anajty ca'ni nicxy y'ayoy ytigoy tücci'yi. E je jây ajcxy huidijaty tzinaayb naaxhuiñ, e ca'p yxï y'ity cojaay ma je jugy'ajt libro huidibi oyïy ca'ni anajty naaxhuiñybi chondägy. Ooy je' ajcxy huinmäaygixipy jihuïygixipy co ijxcixipy je ca'oy'iyujc huidibi jecyip ti y'octzinaaybi, e cham ca' je' ma, e chi jada' jadüg'oc yhuimbida'ñ.

⁹ Ya ii tigati pin jëbi huinjihuïy je huixtujcpi cohuaic, je' je' je huixtujcpi copjot ma je cajp y'ity. E je cajp jadu'n je' nipaady nej jada töxyjäy pocyumbi. ¹⁰ Je huixtujcpi cop jadu'n ajcxy nej huixtujcpi rey. Ma je huixtujcpi rey migoox je' ajcxy tiibi ymic'ajt ytigooygixy. Nidüg je' cham y'ane'my. Je jadügpi ca'ni je' ymiiñ. E co je' ymiinipy je huidibi cogixiyb, ca'p je' mijcajee yhuäcxibipy. ¹¹ Je ca'oy'iyujc huidibi jecyip tzinay, e cham ca' ma, je' je' je miductujcpi rey, oy je' yjajëjity nidüg ma je nihuixtujcpi rey. Huin'it je' ñicxnipy ayoobi jottigooybi tücci'yi ayoodactuuby.

¹² Je majcpi mu'n tiibi m'ixy, je' je' je majcpi rey huidibi ca'ni ajcxy ytigüygixy ane'mbi. E cïdigihuib ajcxy ycötujcin co yrey'ajtcixipy tûg hora quipxyi mïd je ca'oy'iyujc. ¹³ Jada majcpi rey ajcxy tú'ciy ajcxy y'ijtcixy, tú'ciy ajcxy yhuinma'ñ, e yegipy ajcxy y'ane'min

ycötujcin ma je ca'oy'iyujc. ¹⁴ Tziptuunip ajcxy müd je Dios y'ung, je Cordero. E je Cordero ymimadactähuipy je' je majcpi rey ajcxy. Com je' je' tügpajc Huindzinip ma pin janaydíjip huindzin. Je' je' tügpajc reyip jac mic'ajt müdpi ma je reydijc ajcxy. E pinjaty Cristo müd y'ity, Dios je' ti huin'ixy, e tudägy je' panicxy Dios y'ung.

¹⁵ Nañ jadu'n je ángel xyñimaayich:

—Yi mejy tiibi m'ixy ma je töxyjäy pocytumbi iñäy, hue' je' jadu'n nipaady nej maygajp, nej mayñación ma mayjäy chinaygixy huidibi capxcixp canaagnax ayuc. ¹⁶ Je majcpi mu'n tiibi m'ixy ma je ca'oy'iyujc, je' ajcxy ca'ixa'nip catzoga'nip je töxyjäy pocytumbi. Chi ajcxy ix'ijxnip je töxyjäy pocytumbi, yajhui'mipy ajcxy niñuadz. Chi ajcxy je töxyjäy pocytumbi ñinix tzu'tzipy, e nöccixipy müd jün. ¹⁷ Dios ti pidägy ma ajcxy y'aa yjot huen tungixy nej Dios tzocy, müd co anajty ti pidaaccixy tú'ciy yhuinma'ñ. E cötujc möhuaangixy ane'min möhuaangixy co yrey'adipy je ca'oy'iyujc, ixti cooni yajcuydundähuipy je ayuc huidibi Dios anajty ti capxy. ¹⁸ Je töxyjäy tiibi mhuin'ixy, je' je' je mij cajp huidibi ane'mdaayb je reydijc ajcxy huindu'myñaaxhuiñ.

18

Babilonia cajp oy yhuindigooy

¹ Co jada jadu'n yjajti, chi nhuin'ijxyich jadüg ángel ycidägy naaxhuiñgixy, choon tzajpjoty müd ymij'ane'min ymijcötujcin, e ooy je naax yaj'anüy müd je ytücxin yjajin.

² Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic'ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuadzity, huidibi ca' y'oyjäygidaacnity. ³ Com ti je mayjäy huidibi tzinaayb ma tüg'óciy nación yhuinma'ñydigooygixy müd je Babilonia yjibic-huinma'ñ pocytunü huinma'ñ. Ti je reydijc huidibi ane'mb ya naaxhuiñ müd ytundigooygixy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy müd je Babilonia pocytunü ñegocio. Je Babilonia jadu'n yi' nej tüg töxyjäy jibic-huinma'ñ müdpi.

⁴ Chi nmidooyich jadüg ayuc choon tzajpjoty, e ymina'ñ anajty:

—Pidzimgix ma yijilbi cajp com ich miich ajcxy një'ajtpy, jigix miich ajcxy ca' m'aminmugipy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi jadu'mbi cajpjäy ypocy ti oy mayiñi e Dios yi' ajcxy tzachytunü müd ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungixy. ⁶ Dios ymoyhuimbidity je tzaachypi yi Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ni ca'ydi jadu'n nej yi' ti yecy. ⁷ Mo' yi Babilonia cajp yi tzaachypi ayo'n, tim jadu'n nej yi' ti ñaymöyü ma yi chinaayin etz ñayjihuiyi amij agix. Yi' ymina'ñ jotjoty huinma'ñjoty: “Ich mij'ane'mbi ich. Ca' nyajpaadyich nej tüg co'ögytöxyjäy müdity tajin mayin. Ni nga'ixipyich jüyin yaaxin.” ⁸ Müd je' ycixpi tügxüyi ymiinipy je mij'ayo'n o'cin, tajin mayin, jüyin yaaxin etz yuuba'm ma je Babilonia cajp. Chi ninögihuipy je Babilonia cajp müd jün. Com yi Huindzin Dios ooy yi' ymijity, e yi' ti yajpocycäy yi Babilonia cajp, huidibi nipatp nej tüg töxyjäy pocytumbi.

⁹ Je reydijc ya naaxhuiñ huidibi jibic-huinma'ñ pocytunü huinma'ñ tungixp quipxy müd je Babilonia jäy, chi ajcxy ytájcixipy ymáygixipy yjüygixipy yáaxcixipy co anajty ijxcixyp je Babilonia cajp jünjoty co anajty ytooybicy. ¹⁰ Jiguem ajcxy yjacmij'ijxcixipy müd co anajty chigüygixy co páatcixipy ayo'n quipxy müd Babilonia, e ymináangixipy:

—¡Ay, miich Babilonia mij cajp, huidibi ooy mgapxpaadyity, ooy mmijity, ooy mmic'ajt müdity! Per janch tim tüg jaxigy ti xyñimiñ je' ayo'n huidibi Dios ti quexy müd mbocy ycixpi.

¹¹ Je ajuybidijc adoocpidijc huidibi ajcxy naaxhuiñ jüyigixipy yáaxcixipy ajcxy müd je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymüid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey y huit, huit color tzaptzpi, nañ jadu'n ymüid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymüid ajcxy canela, etz tijaty ooy oy xuucin müidity, poom, mirra, perfume, vino aceite, trigo tñm, iyujc animal huidibi tziy yajyöyb, cöbixy, cohuay, carreti, tumbi huidibi codoogiyip, etz jacjadyii jäy juugyp. ¹⁴ Je ajuybidijc adoocpidijc ajcxy ñimähuipy je Babilonia jäy ajcxy:

—¡Ca' ajcxy m'ocmüidiñ je tñm tza'm huidibi ajcxy mjot yjatzojcipy, ca' ma anajty y'ocyajpatni. Ti tigoydäy müich ajcxy mjogy'ajt, je mgomeeñ'ajt, etz m'ijxin huidibi anajty müich ajcxy mmüid, ca' ma ocyajpatnip jadüg'oc!

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cajpin, jiguem ajcxy yhui'mdähuipy müid tzig'iñ jihu'iñ, co nañ jadu'n je tzaachyp castigi padaangixy. Yäxip ajcxy etz nidájcxipy nimáaygixipy je Babilonia cajp. ¹⁶ Chi ajcxy ymínaanipy:

—¡Ay! ¡Müich mij cajp huidibi ayo'n patp! Jadu'n müich anajty nej tüg töxyjäy huidibi xoxyip müid huit oyjatypi, huidi ycolor ucy etz tzaptz, yaj'oyguëxigy müid oori, müid pi'ctzaa oyjatypi, müid perla. ¹⁷ ¡Janch tim tüg jaxigy, janch tim tüg hori, ti ycixy müich mmijjugy'ajtin mmijcomeeñ'ajtin!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguëgy. ¹⁸ Co ajcxy ijxy nej anajty ytoy yjocy je mij ciudad, chi ajcxy ymíañ:

—¿Huidibi cajp jada' ji jadu'nip nej jada anajty jadayaabi mij cajp?

¹⁹ Chi ajcxy ooy naax ñayyajcöhuoogiyi müid jotmay, cham ooy yaaxcixy, ytajcixy ymaygixy, e mic chachmínaanigixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymüid barco ma mejy, ti ycomeeñygojcixy anajty müid je'! ¡Janch tim tüg mij jaxigy, tim tüg hori, ti yhuindigoydäy müich mmijjugy'ajtin mgomeeñ'ajtin!

²⁰ Jotcugiygix müid je Babilonia cajp ycixpi, müich tzajpjoty tzínaayb ajcxy, etz müich ajcxy huidibi Dios xyhuin'ijx co jëbi m'apóstol'ajtcixy, etz nañ jadu'n müich ajcxy huidibi najtzcapxiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymüidundigoy.

²¹ Huin'it tüg ángel janch mic'ajtmüdp conigy tüg tzaa, jadu'n nej tüg molino paandzaa mijpi, chi je' cogädziy mejyjoty, e ymíañ:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydähuipy. E janch ni mína pin cajac'ixipy. ²² E ni camína ajcxy mgajac'midohuipy jim Babilonia co pin arpí coob etz flauta yajxuuxp trompeti yajxuuxp mijñi mijtu'. E ca' jacyajpaadip pinjaty ti dung ii jajtp, ti oficio jajtp, ni mgamidohuipy je molino paandzaa ñe'mín. ²³ Ni mína ti ycatíxcixy jadüg'oc ma je Babilonia cajp. Ni mína ycajamidohuipy jadüg'oc je xii je xondaacin huidibi jajtip co jäy ypícy. Oy je Babilonia ajuuybi y'adoocpi ajcxy anajty ooy yjamícjäyity ya naaxhuiñ, e ti ajcxy huin'ñi mayñaxhuiñyjäy müid ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tñbi ajcxy Dios y'ayuc najtzcapxiyi, je huidibi ajcxy huin'ixyip ma Dios etz tüg'óciy mibijcpidijc tñbi yaj'ögypaatcixy naaxhuiñgixy.

19

¹ Co jadu'n yjajti, chi nmídooyich may'ayuc micpi co mayjäy ajcxy ooy ycapxcixy ymíydaaccixy tzajpjoty, ymíañ ajcxy:

¡Aleluya! Hich ajt nDios yi' tügpajc ti xyajñidzoocim ajt n'alma. Yi' je' tügpajc mij'oy'ajt müid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajp huidibi ti yajhuinma'ñydgoy je naaxhuiñyäj mïd je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc ymïnaanip:

—¡Aleluya! Je jïnjoc huidibi jim Babilonia co ytoy je cajp, pa'ttigihuij tzajpcíxy huinixii huinitiendo, ca' yjïin ypïdzip ni mina.

⁴ E je iipx madaaxpi mijjây etz je madaaxpi iyujc, huidibi jugy'ajt mïd ñaygojtinaygïdaaci naaxcíxy, chi ajcxy ooy Dios ojadaaty huidibi anajty ane'mb ma je mij'ane'mdac, e ymïnaangixy:

—¡Jadu'n jada! ¡Aleluya!

⁵ Huin'it yajmidooy jiiby ma je Dios y'iñaydac ycötujctac tûg ayuc ymïna'ñ: Huindzigïyigix iibatcix capxpatcix iich ajt nDios nidüg'óciy pinjaty tumb mïd yi', pinjaty yi' tzigïyb, huen mutztijcity huen ymïj'anäctijcity.

Je jotcuyc'ajtin huidibi nbadaanim co anajty Cristo yjây nimir

⁶ Nmidoohuich nañ jadu'n nej jihuïy ooy mayjây ycapxy ymïydägy, nej canaag mijni y'a'ich, nej enee micpi yjïdity, ymïnaangixy:

¡Aleluya! Ti y'ane'mdigïy jiiby naaxhuiñ je Huindzin Dios huidibi tûgpajc mijip.

⁷ Agujc'ajtim jotcuyc'ajtim, tzoc cömaayim Dios, tzoc mooyim mij'ajt. Com ti paady je xii je tiempo mina Dios y'ung naybadáanigixp tûmugáanigixp mïd yi' yjây, tim jadu'n nej jihuïy ypïga'ñ mïd yi' ajcxy. Ti Cristo yjây ñayñi'ixïyigixy, jaydëbi ñaybaatigixip ytûgmújccixip mïd yi', tim jadu'n nej tûg jây ñayxoxiy co ypïga'ñ.

⁸ Dios ti a'ixiy co Cristo yjây ajcxy ñayxoxiyb mïd yhuít oyjatypi, huidibi adïcixp ajajp. Je huit xojx oyjatypi jadu'n nipaady nej je tudägy'ajtin huidibi je mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcuyc ajcxy pinjaty huooyip ma yajhuinxïduna'ñ Dios y'ung, je Cordero, co naydûgmugáanigixy mïd yi' yjây ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojtinay'ihuïyich ma je ángel yhuinduu co njahuindzigïhuaañich. Chi je' xyñimaayich:

—Ca' jadu'n m'idïch. Dios iich xytumbi'ajtp jadu'n nej miich etz nej jacjadyii migügtijc huidibi mijpïdaaccixp cixyjot huinijot je ayuc tiy'ajt janchypi huidibi Jesús ycapxhuäcx. Huindzigï Dios.

Jadayaabi ayuc tiy'ajt janchypi huidibi Jesús ñidiy'ajt'ajt, yi' je' je Dios y'ayuc huidibi je profetas ajcxy ñajtcapxiy.

Je mij'ane'mbi huidibi poobcohuay yaj'iñayb

¹¹ Chi nhuin'ijxyich tzajp'ahuädz, chi yquëxïgy tûg poobcohuay, e je pin anajty yaj'iñayb hue' anajty naydijyïi je tudägypi je janchypi. Je huidibi tiydumb naaxhuiñyäj mïd tudägy'ajtin etz huidibi tziptumb mïd tudägy'ajtin. ¹² E je' huidibi yaj'iñayb je poobcohuay, je' yhuin jadu'n je' nej jïnye'n, e ymïd anajty ma ycohuajc maycoroni huidibi nidiy'ajt'ajtp co yrey'aty ma tûg'óciy jây. E je' ymïd anajty tûg xii cojaay, e je' anajty naydûgpajc nejhuïyb yxii ca' jac pin. ¹³ Hue' anajty yxoxyity mïd huit y'uucyity mïd ni'py, e je' yxii hue' anajty xii'adyii Dios y'ayuc. ¹⁴ Je ángeles ajcxy huidibi soldad'ajtp tzajpjoty ypayöyïi anajty ajcxy ac poobcohuaygixpi, yxoxyity ajcxy mïd sedi huit janch oybi, poobi etz huätzpi. ¹⁵ Je huidibi yaj'iñayb je poobcohuay, ma yi' y'ahuac ypïdzïmy anajty tûg espada janch jïpi, e je' mïd yajtzaachïhua'ñ je maynaaxhuiñyäj. E je' ane'ma'ñ mïd Dios ymic'ajt. E mïd yi' y'ayuc castigi möhua'ñ je mayjây mïd ypocy ycixpi

huidibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jippi. E yi' müd'adaanip je mijpi Dios chip y'ejcin, je Dios huidibi tüg'óciy mic'ajt müd. E mictägy tzaachypi castigi yega'n ma je mayñaaxhuiñjây müd ypocy ycixpi, jadu'n je maynaaxhuiñjây nipaady nej jihuñy Dios y'ung tenmicx uvas müd ytecy. ¹⁶ E ymüdd anajty cojaay ma yhuít etz ma ypuy jadayaabi ayuc: “Reydijc ajcxy yrey. Huindzindijc ajcxy yHuindzin.”

¹⁷ Huin'it nhuin'ijxyich tüg ángel ytinäy xi'agujc, chi ooy janch mic miyaaxy tüg'óciy je joon huidijaty queec-huidijtp tzajpcujc yminañ:

—Miingix naymujctáayigix ma Dios adzuu'ibi yecy. ¹⁸ Miingix, jigix mdzüdzcixipy reydijc ajcxy ñinícx, capitán ajcxy etz micjäydijc ajcxy ñinícx, cohuay chüch etz nañ jadu'n je' ajcxy ñinícx huidibi yaj'inaayb. Mdzüdzp tüg'óciy jäy ñinícx: tumbidijc midumbidijc, je huindzindijc, comeeñydijc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huidibi yajpatp ya naaxhuiñ müd tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymújcigixy co chiptunaangixy midziptzonaangixy je huidibi poobcohuay yaj'inaayb quipxyi müd je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxyi müd je profeta ca'pi yjanchity, je tiibi anajty tuñ mijhuinmañ ma je ca'oy'iyujc yhuinduu. Müd je mijhuinmañ ycixpi je profeta, ca'piy yjanchity, ti anajty ooy huin'ññ tüg'óciy je huidijaty ajcxy nayyejci co je ca'oy'iyujc ytiy'ajt iixpejt cöbijci ma yhuimboc etz co huindzigiiy je ñidzejtztuutin. Jadu'n je ca'oy'iyujc etz je profeta, ca'piy yjanchity, yajcötijnajxy ajcxy ma jün ytoy müd azufre, jadu'n je jün nej tüg meyy huädz jün. ²¹ Jacjadyii jäy hue' ajcxy o'cin patcixy müd espada huidibi anajty pidzimb ma je' y'ahuac je huidibi anajty poobcohuay yaj'inaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtáayigixy ytimypejttaayigixy müd may öcpi chüch.

20

Je mil jimijtpi

¹ Huin'it nhuin'ijxyich tüg ángel ycidägy chooñ tzajpjoty müdity je ahuasti huidibi müd yaj'ahuäch je mij jut huidibi oy yciyity, ymüdd anajty nañ jadu'n tüg mijcadena ma yci'. ² Jadayaabi ángel majch je ama'y tza'n huidibi yajtijp mujcu' etz Satanás, chi yajcadenitigiiy, e yajhui'my mach tüg mil jimijt. ³ Chi je ángel cötijnajxy je mujcu' ma je mij jut, chi cö'agiiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'ññ je mayñaaxhuiñjây, ixti cooni tüg mil jimijt yca'pxipy. E co jadu'n anajty mil jimijt ti ñaxy, ooy ycopicyity co yajnajtzmazihuipy je mujcu' tzojccíxy.

⁴ Chi canaag ane'mdac nhuin'ijxyich ma anajty ajcxy inäy tiibi ajcxy patcixy cötujcin co tiydúngxixipy naaxhuiñjây. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuutciy müd co ajcxy capxhuächy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiiygixy je ca'oy'iyujc, ni je' ñidzejtztuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi müd Cristo tüg mil jimijt. ⁵ Je jacjadyii je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jimijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'ó'ccixnjp jadügtecy. ⁶ Jotcujc etz huädz, ca' tibocy müdity, je' ajcxy öcpidijc huidibi jugypigipy co Jesús yajjugypigipy yi tügpiy öcpi huidibi jayijp'adamb. Je mimetzipi o'cin ca' ni ti mic'ajt müdity ma je' ajcxy. Hue' janch ajcxy ytung'adiyb huingapxi ma Dios etz Cristo. E je' ajcxy Cristo quipxy müd y'ane'mip tüg mil jimijt.

⁷ Co anajty ti ñaxy je mil jimijt, huin'it je Satanás yajcoguejttüdipy ma ymach'ity.

⁸ Chi Satanás nicxy huin'ññ je mayñaaxhuiñjây huindu'mybi ñaaxhuiñ. Je' nicxy huin'ññ Gog jäy etz Magog jäy. E yi' ajcxy y'ane'mbidijc yajmujctähuañ soldado ajcxy, jigix

chiptúngxixipy mïid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypä'am. ⁹ E jadu'n ajcxy ypediïy ma ymijhuinity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojcpy. Chi Dios quejxy jün huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰ Je mujcu', huidibi anajty ti huin'iiñ je mayjäy, oy yajcötijnaxy ma je mij jün ytoy mïid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiïby je' ajcxy ayo'n tzaachypï paadipy xïm tzuum huinixii huinitiempo.

Je tiyduunin ma je mij'ane'mbi yhuinduu

¹¹ Nhuin'ijxyich tüg mij'ane'mdac janch poob, mïid je huidibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹² Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huidibi mïid je jäy yxii cojay huidijaty ajcxy jugy'ajtin huinixii mïid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³ Je meji yciyejctay je' je öcpi ajcxy huidibi anajty jiïby yajpatp. E je o'cin etz je öcpijut yciyejctay je' je öcpi huidibi jiïby yajpatp, e tüg'óciy je' yajtiydunday nidüg nidüg nej anajty ti chinaaygixy. ¹⁴ Je o'cin etz je it ma je öcpi y'ity yajnajtztijyday jünjoty ma je mijjün ytoy. Je' je' je mïmetzpi o'cin ma je mijjün ytoy. ¹⁵ E huidijaty anajty ajcxy ca' yxii ymiiñ ma je libro huidibi jugy'ajtin huinixii mïid, hue' je' ajcxy yajnajtztijy jünjoty ma je mijjün ytoy.

21

¹ Huin'it nhuin'ijxyich tüg tzajp jemybi etz tüg naax jemybi, com je jayijpi tzajp etz je jayijpi naax ti je' anajty ytigoydäy, e ni ma anajty mejy ycacädy. ² Ich, Juan, nhuin'ijxyich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyï ñayxoxyyï co ypiga'ñ mïid yëdyjc. ³ Nmïdoohuich tüg ayuc mïcpi chooñ anajty tzajpjoty, e yminañ:

—Cuenditun ich n'ayuc. Dios tzinaydac pigamb ma naaxhuiñyäjy ajcxy. Yi' tzinähuipy mïid yi' ajcxy, e yi' ajcxy Dios yjäy'adiyb. E Dios ci'm idaamb mïid yi' ajcxy jigix yi' ajcxy Dios'adiyb. ⁴ Dios yajquëgüib ajcxy ytajin ymayin etz yajtïdzüib ajcxy yhuinnii, e ca'p yjadüib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtnaayb, ti je' ñaxy.

⁵ Huin'it je' yminañ huidibi anajty iñaayb ma je mij'ane'mdacin:

—Cuenditungix ich n'ayuc. Huinjemy ngojtigadza'ñich tüg'óciy huidibi jii'ijtp.

Nañ jadu'n yminañ:

—Jaay jada ayuc. Com jadayaabi ayuc ooy jada yjanchity, e ooy yi' jot'amij'ajt mïidity.

⁶ Huin'it je mij'ane'mbi xyñimaayich:

—Ti tüg'óciy ytunyii yjadyii. Ich je' nyajtzondacp tüg'óciy tijaty, etz ich nyajcogixiïyb tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiïyb je alfabeto. Pinjaty tzojcp jemybi jugy'ajtin ich yi' nmöhuip. Jadu'n nipaady nej jihuïy ajcxy ytidzïyigixy, e nyaj'ügich ma ymuxy je nii huidibi yejcp jugy'ajtin, ni ca' ajcxy mimeeñyduunip ni jadu'ni. ⁷ Pinjaty mimadactaayb jibic-huinma'ñ etz pocyunii, yi' je' cidigihuüib huidibi një'ajtpy, e ich yi' xyDios'adiyb, e yi' ich n'ung'adiyb. ⁸ Je huindzïcytjic ajcxy, pinjaty ca' ymibicy ich ndiy'ajt, pinjaty tumb huidibi ca' y'oyjäygidaacnity, pinjaty jäy yaj'öcp, pinjaty migapxtigooyb töxyjädyjc, pinjaty tumb capxpogii, pinjaty mijpidacp huijyäjy yhuinma'ñ, pinjaty huindzigiiyb quipychech tzaadzech, etz pinjaty aniïdacp, je' ajcxy nidüg'óciy nibidzimüib ñicxipy ma mijjün ytoy mïid azufre, huidibi quëxïcp nej jünmeji. Je' je' je mïmetzpi o'cin.

Yi jemybi Jerusalén

⁹ Huin'it nidüg ángel je nihiuxtujcpi huidibi anajty mïd huixtujc tasi ujtztatypi mïd je huixtujcpi ayo'n tzaachypï huidibi jac'axam tunaanip jadaanip, je' xyñimaayich:

—Min, e cham nyajni'ixihua'ñ je mibijcpidijc huidibi tügmugamb mïd Dios y'ung, je Cordero, jadu'n nej tüg yëydijc ytügmucy mïd ytöxyijc co ajcxy ypicxy.

¹⁰ Je huidibi Dios yjihui'ñ ymic'ajt xyaj'ijxich cumäyjoty, chi je ángel cümäyjoty xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty choon tzejpjoty jiiby ma Dios yajpaady. ¹¹ Je mij ciudad santa janch adicxp je' anajty mïd Dios y'oy'ajtin. Jim jadu'n anajty y'adixcy nej tüg tzaa janch oybi nej mármol, janch yaj'ijxnajxp nej iixin. ¹² Jühuidityi anajty mïdity je ciudad santo ac poch janch mij etz cixy. Je poch ymïd anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpi ángel ma tügjaty ciudad aguu. Etz yjaybetyity je' ajcxy yxii je majmetzpi Israel tribu, tügpi tribu yxii yjaybetyity ma tüg tüg poch y'aguu. ¹³ Tugig anajty y'aguu mïdity xibidzim'amy, tugig y'aguu ma tichypo ymiiniy, tugig y'aguu ma jinboj ymiiniyin, etz jatugig y'aguu ma xigidägy'amy. ¹⁴ Je poch huidibi anajty ymïd je cajn, ymïd anajty majmetz tzaa huidibi y'ijx'ajtip, e majmetzpi tzaa ymïd anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpi apóstol yxii ma tüg tüg tzaa.

¹⁵ Je ángel huidibi anajty miydacp mïd ich, ymïd anajty tüg quipx ac tim oori je' anajty. Je' anajty mïd quipxa'ñ je cajn, je poch y'aguu, etz je poch. ¹⁶ Je cajn, je ciudad, hue' je' anajty cuadradi; nej anajty yon'ajt, nañ jadu'n anajty y'agon'ajt, etz nañ jadu'n ycix'ajt. Chi je ángel quipxy je ciudad santa mïd je' yquipx. E hue' quipxy mejtz mil jamejtz migo'px kilómetros, y'ayon'ajtin ycix'ajtin etz y'agon'ajtin quipxyjaty je' anajty. ¹⁷ Huin'it je ángel quipxy je poch, hue' quipxy migo'px jahuixchiguipx midaax cinuux, jadu'n nej naaxhuiñyäj ajcxy ycinuux, huidi je ángel yajtumyb.

¹⁸ Je poch hue' je' anajty ypochity mïd tzaa oyjatypi, e je cajn hue' je' anajty ac tim oori, yguëxigy nej iix huätzpi. ¹⁹⁻²⁰ Je tzaa huidibi je poch y'ijx'ajtip hue' je' anajty y'oyduñity huidi mïd y'oyguëxigy, tzaa janch oyjatypi canaagnax color. Je jayijpi poch y'ijx hue' anajty y'oyduñity mïd jaspe tzaa, je mimetzpi poch y'oyduñity mïd safiro tzaa, je midugigpi poch y'oyduñity mïd ágate tzaa, je mímadaaxpi y'oyduñity mïd esmeralda tzaa, je mimigooxpi poch y'oyduñity mïd ónice tzaa, je midudujcpi poch y'oyduñity mïd coralina tzaa, je mihiuxtujcpi poch y'oyduñity mïd crisólito tzaa, je mituctujcpi poch y'oyduñity mïd berilo tzaa, je midaxtujcpi poch y'oyduñity mïd jacinto tzaa, je mimajmetzpi poch y'oyduñity mïd amatista tzaa. ²¹ Je majmetzpi poch'aguu hue' anajty y'oyduñity mïd tügpi perla. E je mijtu' huidibi najxp cajpcujc hue' y'oyiy mïd oori huätzpi, e yquëxigy nej vidrio huätzpi yaj'ijxnajxp.

²² Ma je Jerusalén cajn jemybi ca'p nhuin'ijxyich ni tüg templo, ni tüg tijc ma jay ajcxy Dios ojadajtixy. Com je Huindzin Dios, yi huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjy ajcxy y'ojadajtixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajticxihip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je ticxin jajin huidibi amb ticxp ma je Jerusalén jemybi. ²⁴ Je mayñaaxhuiñyäj huidibi ticpatcixy y'alma nidzoocin naxipy tigihuipy ajcxy mïd je jemybi Jerusalén yticxin yjajin huidi anajty ti ymöy. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵ E je cajn aguu ni camina je' agiy yca'idipy xim, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuiñyäj, canaag agajp, minicxip ajcxy ymij'ajt y'oy'ajt ycomay'ajt ma je Jerusaléngajp, je jemybi. ²⁷ Ca'p jim ytigihuipy ni pin huidibi ca' ypocynihuachñi, ni pin huidibi tumb ca'pi y'oyjäygidaacnity, etz huidijaty jay huin'im. Jëyi jim tigihuip pinjaty ijtp yxii cojay ma

je libro huidibi Dios y'ung, je Cordero, ymüd, ma cojay y'ity je jäy ajcxy yxii huidibi ymüd jugy'ajtın huinixibi.

22

¹ Huin'it je ángel xyajni'ixiyyich tüg mijni huätzpi, je nii huidibi yejcp jugy'ajt huidibi ca' ycixip ytigoyip. Janch huädz janch tücx je' anajty je nii nej tüg ixxın. E je nii jim anajty ymuxy ma Dios etz je Cordero y'ane'mdac. ² Jada mij nii hue' je' anajty ñaxy cuidad mijtüguc, etz ma je mejtz'adu'm'amybi mijniiba', jim anajty je quipy huidibi jugy'ajt müd, huidibi tiim'ajt majmetz'oc tügpi jimiit, po' po' ytiim'aty, e je quipy y'aay hue' anajty ytuñ jigix huaad naaxhuiñyây chooccixy. ³ Ca'p jim y'adipy ni ti ayo'n ni ti jotmay müd pocyunii ycixpi. Je Dios etz je' y'ung je' jim y'ane'mdac ycötujctac yajpaadipy. E je' ytumbidijc je' ajcxy jim yajmij'adiib ojadadiib. ⁴ Y'ixixy ajcxy je Dios y'ung yhuiñyijp etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihiuty. E pinjaty jim tzinaayb ca'p ajcxy yajmayjadipy linterna jin, lamparajin, ni xiidicxpi, com Dios ich ajt nHuindzin yi' yi' ajcxy codicxiib. Je Huindzin Dios etz je' y'ung je' ajcxy jim ane'mip huinixii huinitempo.

Huingooniñ yi Jesucristo ymin'aa

⁶ Huin'it je ángel xyñimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios huidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—¡Miimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt huidibi jaybetyip ma jada libro.

⁸ Ich Juan, nmidoohuich etz nhuin'ixich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuuiyich ma je ángel ytecymijc huidibi anajty yam xyajni'ixiyyich. ⁹ Chi je' xyñimaayich:

—Ca' jadu'n m'idich. Ich, Dios xytumbi'ajtp jadu'n nej miich etz jacjadyii migügtijc huidibi Dios y'ayuc najtzcapxiyip, e tüg'óciy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxi je Dios y'ayuc huidibi ti mjay ma jada necy, ca' myüdzip. Com ti yhuingoñ je tiempo mina Dios cuydunañ yi' y'ayuc huidibi yjayhui'm ma jada necy.

¹¹ Pinjaty ca' ytudägyity, huen jadu'n jacyajpaady müd ycatudägy'ajt. Pinjaty jibicjot jibic-huinmañ tumb, huen nigi jibicjot jibic-huinmañ tuñ. E pinjaty tudägyi tumb, huen jactuñ tudägy'ajtın. Pinjaty huädz yjot huädz yhuinmañ müd, huen huädz yjot huädz yhuinmañ jacmi'ity ma Dios.

¹² Chi je Cristo yminañ:

—Timetiini nhuimbidiipyich jadüg'oc naaxhuiñ. Co anajty ti nmiiñich, huin'it nya-jjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³ Ich je' ti njayijp'atyich ya naaxhuiñ, etz ich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Ich ti nyajtzondacyich je naaxhuiñ etz nyajcixipyich.

¹⁴ Jotcujc ajcxy pinjaty ti ypocyniñhuäch, jadu'n nipaady nej ajcxy yhuit ti pujcixy e müd ajcxy yhuit huätzpi. Com ti ajcxy ypocyniñhuaatzcixy, paady jëbi jicxcixip je ujtz tza'm huidibi jugy'ajt yejcpy huidibi ca' ycixipy ytigoyipy ni mina, e jadu'n jëbi ytigiy ma je jemybi Jerusaléngajp. ¹⁵ Dios ca' yi' ajcxy cöbigañ ma je jemybi Jerusalén etz hui'mip ajcxy cajppa' tüg'óciy pinjaty huidibi jibic-huinmañ müd, pinjaty ca' mibicy Dios, pinjaty mijpidacp huijyây yhuinmañ brujo yhuinmañ, pinjaty ajcxy migapxtigooby

midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiyb quipy-chech tzaachech, etz tüg'óciy pinjaty tzachnixondacp anii ayuc.

¹⁶ Ich Jesús huidibi capxp. Ti nguexyich n'ángel ma miich jigix jada tiy'ajt capxticxipy majaty mibijcpidijc ma tüg tüg cajt. Ich je' iix'ajtp cop'ajtp ma je rey David miiñ. Etz ich je' nmij'ap'ajtpyich nmijteedy'ajtpyich je rey David. Jadu'n ich nipaady nej je mijmadza' huidibi yajtijp jayxim.

¹⁷ Je Espíritu Santo etz je mibijcpidijc huidibi jadun nipatp nej Cristo ytöxyijc yminaangixy:

—Min ma Jesucristo.

E pin amidoo'ijtp ich n'ayuc ymináangixipy:

—Min ma Jesucristo.

E pin tzojcp jugy'ajtin huidibi ca' ycixipy ytigoyipy nimina, jadun nej jihuïy ytidziyii e tzocy jada nii, huen miiñ, e nmöhuibych jugy'ajtin, jadun nej jihuïy nyajni'ügich je nii huidibi jugy'ajtin miið e ni ca' mimeeñydunipy ni jadunñi.

¹⁸ Tüg'óciy pinjaty amidoo'ijtp Dios y'ayuc ytiy'ajt huidibi jaybetyip ma jada libro, ich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuib tzaachypi ayo'n, ca'ydi huidi jaybetyip ma jada libro. ¹⁹ E pin puuhuijtzp hueeni jada Dios y'ayuc huidibi jaybetyip ma jada Dios ylibro, Dios yi' jötzib yxii huidi cojaayip ma je jugy'ajt libro. Nañ jadun ypuhuidziyb huidi anajty japaatip ma je jemybi Jerusaléngajp, huidi jada libro ñimiydacpy.

²⁰ Yi Jesucristo huidibi jada ayuc capxp, yi' minamb:

—Ca' ooy jecy njac-huäcxiba'ñich co nhuimbidiipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy miið miich ajcxy huidibi mibijcp. Jadu'n ngapxycixyich. Amén.